

Lerérun Búngiu To
Lánina Iséri Darádu



New Testament in Garifuna (HO:cab:Garifuna)

Lerérun Búngiu To Lánina Iséri Darádu New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source files dated 29 Jan 2022

df8e4807-f4f9-5f4a-ab14-d1f7ffe98b0a

Contents

SAN MATEO	1
SAN MARCOS	76
SAN LUCAS	123
SAN JUAN	201
HECHOS	259
ROMANOS	329
1 CORINTIOS	361
2 CORINTIOS	393
GÁLATAS	414
EFESIOS	426
FILIPENSES	436
COLOSENSESES	444
1 TESALONICENSES	451
2 TESALONICENSES	457
1 TIMOTEO	461
2 TIMOTEO	470
TITO	476
FILEMÓN	480
HEBREOS	482
SANTIAGO	506
1 PEDRO	514
2 PEDRO	523
1 JUAN	528
2 JUAN	536
3 JUAN	537
JUDAS	539
APOCALIPSIS	542

UGÁNU BUÍTI LE LABÜRÜJABEI MATÉO LUÁGU JESÚSU

Linébaanfaangu Jesúsu

(Lc 3.23-38)

¹ Niján jíri linébaanfaangu Jesucristu le jádaangiñebei meja ladügawagun Davíd lúma Abrahám.

² Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu, ³ Judá lúguchi Fáres lúma Zára, Támar tugúya jágachu, Fáres lúguchi Esróm, Esróm lúguchi Arám, ⁴ Arám lúguchi Aminadáb, Aminadáb lúguchi Naasón, Naasón lúguchi Salmón, ⁵ Salmón lúguchi Booz, Raháb lúgachu, Booz lúguchi Óbed, Rut lúguchi, Óbed lúguchi Isaí, ⁶ Isaí lúguchi urúei Davíd, urúei Davíd túma tó meja lúmari Urías, jagía lagübürigubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása, ⁸ Ása lúguchi Josafát, Josafát lúguchi Jorám, Jorám lúguchi Uzías, ⁹ Uzías lúguchi Jótam, Jótam lúguchi Ácac, Ácac lúguchi Ezequías, ¹⁰ Ezequías lúguchi Manasés, Manasés lúguchi Amón, Amón lúguchi Josías, ¹¹ Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

¹² Lárigiñe le, Jeconías lúguchibei Salatiél, Salatiél lúguchi Zorobabél, ¹³ Zorobabéll lúguchi Abiúd, Abiúd lúguchi Eliaquím, Eliaquím lúguchi Azór, ¹⁴ Azór lúguchi Sadóc, Sadóc lúguchi Aquím, Aquím lúguchi Eliúd, ¹⁵ Eliúd lúguchi Eleázar, Eleázar lúguchi Matán, Matán lúguchi Jacób, ¹⁶ Jacób lúguchi José le túmari María, tugúyati lúguchuboun Jesúsu le gíribei Crístu.

¹⁷ Catoúrusuñanu lubeíti linébaanfaangu Jesúsu lúmagiñe Abrahám lúmoun Davíd, catoúrusu lúmagiñe Davíd lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagüriaajoún Crístu.

Lagüriaajoún Crístu

(Lc 2.1-7)

¹⁸ Ítara lína ligáburi lagüriaajoún Jesucristu. María to lúgachu, gadáraduñoun lúma José lun tamárieidun lúma, lubáragiñeti jaganoún jámagua, lubáragiñe lasúbudirunun quei wúri, ába tadáriragun túngua láu dagáñu tíña lan láu lubáfu Sífiri Sándu. ¹⁹ Quei ában lubeí wügüri buídu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun. ²⁰ Dan le niján lubeí arítagua

luágu cátei le, ligía larúfudagun ában láni Wabúreme Búngiu ánjeli língua lun lídan luwénedi, ába laríñagun lun.

—José, ladügawagun Davíd, manúfudebá lun berésibirunun María queísi búmari, ladüga irájü le lúnbei tagáraüduni, lúmagiñe Sífiri Sándu liábin. ²¹ Tagáraüduba ában irájü, ábame bíchuguni líri Jesúsu. Ítara lúba líri ladüga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúñfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdun ában irájü, Emanuél, ligíaba líri, líla íri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladügünü le lubeíbei ánjeli ligía lun, ába lerésibirunun María queísi lúmari, ²⁵ masúbudirúngaloún queísi würi darí tagüriañi furúmiñeti tiraü, ába líchuguni líri Jesúsu.

2

Jachüllürün chu táu aríjei Jesúsu

¹ Lidan fulásu le gíribei Belén, lumúanrugu Judéa, ñi lagüriaajoúa Jesúsu dán meja le Heródes lan urúeibei lídan jageíra juríu. Ábatí jachüllürün fiú wügüriña chu táu ubúrugun Jerusalén lueígiñe oúbaü le ñígiñe lubeí laboúcha wéyu. ² Ába jálugüdajan.

—¿Jageísan jarúeite juríu le agüriaajoúbei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna. ⁴ Ábatí lagúarun joun sun jábutigu fádirigu lídan jafíñen juríu, jáma ja arúfudajabalín lilúrudun Moisés joun gürígia, ába lálügüdaguniña jalíabeí lan libítí fulásu lagüriaajoúa Crístu. ⁵ Ába jaríñagun lun.

—Belén, le lumúanrugubei Judéa, ladüga ítara líña labürüdüni proféta.

⁶ Amürrü Belén, lumúanruguna Judéa, amürrü ában lídaangiñe ubúrugu weírigutimaati lídan múa le, láu sun biñüraü, ladüga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷ Ábatí lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun. ⁸ Ábatí loúnajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñüdün námuga gíñe ájuduragua lun.

⁹ Lárigiñe jagáambuni chu táo lerérun urúe, ába joúdin. Warúguma bugáti to jaríjuboun le ñígíñe lubeí láfuara wéyu, ába tídin jabá jabá, darí taráramun loúgiñe fulásu le ñí lubei irájü le. ¹⁰ Dan le jaríjinun chu táo ja warúguma, ába jagúndaaragun sarágu. ¹¹ Dánti le jebélurun tídoun múna, ába jaríjini irájü le túma lúguchu to María. Ábatí jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífiti. ¹² Lárigiñe, ába jawíasarúniwa lídan jawénedi lun magíribudun jamá ñígíñe lubei Heródes, ába jagíribudun jageíroun lídaangiñe ámu úma.

Anúrajani lun Ejíptoun

¹³ Lárigiñe joúdin chu táo jagía, ába larúfudagun ába láni Búngiu ánjeli lúngua lun José lídan luwénedi, ába laríñagun lun.

—Sarába, barübei irájü le táo sun lúguchu, anúrabá Ejíptoun, ábame beréderun ñi daríme nawíasarunibu, ladüga láluajaali Heródes irájü le lun láfaruni jilágubei.

¹⁴ Ábatí lásaarun José, ába lanügüni irájü táo sun lúguchu áriebu ligía, ába lídin jáu Ejíptoun. ¹⁵ Ába jeréderun ñi darí loúnwen Heródes. Lasúseredunbei sun le lun lagúnculirun le laríñagubei Búngiu liyúmulugugiñe proféta. “Sagá numuti Ni-raü Ejíptogiñe.”

Láfaraguágüduniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táo, ába lagáñidun, ába loúnajan áfaraguaña sun irájüñü ja biáma tíña irúmu jáu lun ünabun, ja aganoúbaña Belén lúma sun fulásu geyégua láu, según dan le jaríñagubei chu táo luágu lagúriaajoúniwa irájü ligía. ¹⁷ Ítara líña lagúnculirun le labürüjabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu, umálali ligía tumálali Raqué, to ayájuboun járigi tirájüñü, mabúseeruntu lun támalijoún ladüga jilágua jamá.

¹⁹ Lárigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejípto, ába laríñagun lun.

—Sarába, barübei irájü le táo sun lúguchu, giríbu jumá jageíroun Israelítagu ladüga jilágua ja abúseerubaña meja jáfaruni irájü le.

²¹ Ába lásaarun José, ába lanügüni irájü táo sun lúguchu jageíroun Israelítagu. ²² Dan le lasúbidiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñíjin, ába laríñawagúniwa lun lídan uwénedi lun lídin Galiléoun. ²³ Lachülürün ñi, ába lídin agánawa lídan fulásu le gíribei Nazarét, le lumúanrugubei Galiléa.

Lasúseredunbei sun cátei le lun lagúnculirun le jaríñagubei profétagu luágu Nazarétna lan Jesúsu.

3

Lapúrichijan Juan le abásteragüdajabeí lídan fulásu mageírawati (Mr 1.1-8; Lc 3.1-9, 15-17; Jn 1.19-28)

¹ Lídoun dan ligía, ába liábin Juan le abásteragüdajabeí apúrichija lídan fulásu mageírawati, Judéa, ² ába laríñagun lídan lapúrichijan.

—Sáansi jumeí joúserun, ladüga yaráfaali larúeijan Búngiu.

³ Juan le, ligía le uágubei meja labürüja proféta Isaías ítara. Agaambúati lumálali ában gürigia agúaraja lídan fulásu mageírawati ítara.

“Aráanse jumoún janígi lubá liábin Wabúreme,
queísi ladárarúniwa üma surúti.”

⁴ Lanáangun Juan, látu lúra caméyu, liábin lagürüga liránaagua, guérü, chigángaru leígubaña lúma síruudu le áraabuna.

⁵ Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambei lapúrichijan, ⁶ dántija le jagúfeseruni jafígoun, ába labásteragüduniña lídan dúna le gíribei Jordán.

⁷ Dan le laríjin Juan luágu sarágu jáña lan gürigia lídaangiñetiña jadámurin fariséogu jáma saduséogu nübüntiña lun jabásterun, ába laríñagun joun.

—¡Jarásan jówe jugúa le! ¿Ca awísarubadün lun janúrajan lueí lanárime afáyeiragülei luágu figoú le lúnbei liábin? ⁸ Oúsera jumá buídu, arijúa lámuga furáangu luágu sáansigua lan ligáburi joúserun. ⁹ Mapántajan jugúyame, aríñaga jídaangua.

“Linébaanfaangu Abrahám wagía”, ladüga naríñajare jun luágu gayára lan ladügün Búngiu linébaanfaangu Abrahám lídaangiñe dübü le. ¹⁰ Madíseeli lagúnculirun le laríñagubei Búngiu,

luágu yaráfaali lan lidáani abeichúni luágu figoú, aráanseeru jaráwa lun lánchuajoún wéwe, áni sun wéwe le mabuídunti lin, chaünwati, ába lagudún. ¹¹ Áu, láu dúna nabásteragüdaün, arúfudei luágu sáansi jumáali lan ligáburi joúserun, áanjeinti le lúnbei liábin nárigi, labásteragüdübädün láu Sífiri Sándu, áni lafáyeiragüdübädün luágu figoú queísi láu wátu geméti.

Gabáfuti nueí darí lun madüna nan ni lun narágachunun ligeídin. ¹² Nújeinjaru lichóbulin lújaburugu, larúmadagüdubei türígu, ábame lanúadiruni lídaangiñe sagádi mábeijali. Ábame lareíduni türígu, ábame láguduni sagádi le mábeijali lídan wátu geméti le méñeguchadibeí.

*Labásterun Jesúsu
(Mr 1.9-11; Lc 3.21-22)*

¹³ Dan le liábin Jesúsu Galiléagiñe, ába lachülürün luágun dúna le góribei Jordán le ñí lubei Juan lun labásteragüduni.

¹⁴ Májati yebéti Juan labásteragüduni, ába laríñagun lun Jesúsu.

—Nugúa lúnbei babásteragüdünina, ¿amürü lubéi ñübin nun lun nabásteragüdünib?

¹⁵ Ába laríñagun Jesúsu lun.

—Ítara lúba guetó, ladüga lúnti wadügüni le lubeíbei Búngiu.

Ába labásteragüduni Juan Jesúsu,¹⁶ lárigiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun.¹⁷ Ába lagaambún ába umálali siélugiñe le aríñagubei.

—Niraü le jínsiñebi nun le, le áubei oúnwenbun lan nugúndan.

4

Loúchaguni Máfia Jesúsu

(*Mr 1.12-13; Lc 4.1-13*)

¹ Ába lanügüni Sífiri Sándu Jesúsu lídoun fulásu mageírawati lun loúchaguni Máfia.

² Lárigiñe leréderun Jesúsu bián-wein wéyu lúma bián-wein áriebu meíginga, ába lalámachun. ³ Ábatí liábin Máfia lubádun, ába laríñagun lun lun loúchaguni.

—Ánjein liraü bubei Búngiu, salíguagüdabeí dübü le feínme.

⁴ Ába loúnabun Jesúsu.

—Taríñajare Lerérun Búngiu. “Mámarügübei táu fein labágarida gürígia, labágariduba gíñe láu sun dimúrei le laríñagubei Búngiu.”

⁵ Ábatí lanügüni Máfia Jesúsu Jerusaléoun, ubúruugu le sándubei joun juríu, ába laweínragüduni tábulugun témpulu,⁶ ába laríñagun lun.

—Ánjein liraü bubei Búngiu, chubába yágiñe lun ūnabun, ladüga taríñajare Lerérun Búngiu.

Laríñaguba Búngiu joun láni ánjeligu lun joúnigirunibu.

Janügübadibu jájaburugu lun machúgeragun lan bugúdi luágu dübü.

⁷ Ába loúnabuni Jesúsu.

—Aríñagatu gíñe Lerérun Búngiu. “Moúchaguabeí Babúreme Búngiu.”

⁸ Ába lanügüni Máfia Jesúsu luágun ában wübü íñuti, ába larúfuduni sun aruéjani le uboúagubei lun, lúma buri luweírigun,⁹ ába laríñagun lun.

—Níchugubei sun le bun ánjabu ájuduragua nun.

¹⁰ Ábatí laríñagun Jesúsu lun.

—¡Beíba nueí, Máfia! ladüga taríñajare Lerérun Búngiu. “Lúnrüguba Babúreme Búngiu bájuduragua, lúnrüguba gíñe besériwida.”

11 Ábati ladisedun Máfia lueí, ába jayábin ánjeligu esériwidei.

*Lagúmeseruni Jesúsu luwádigimari, Galiléa
(Mr 1.14-15; Lc 4.14-15)*

12 Dan le lagáambunbei Jesúsu luágú níjein lan Juan furísunrugu, ába lídin lárgoún Galiléoun. 13 Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí. 14 Lasúseredunbei sun le lun lagúnculirun le labürüjabeí meja Isaías, lé meja proféta.

15 Lageíra Zabulón lúma Neftalí, lídan üma lubádu barána, lueígíñe oúbaü le ñígíñe lubeí láfuara wéyu libítí Jordán,

Galiléa le ñí lubei jagánawa ja mámabaña juríu.

16 Jugúya lé meja lídaanbei lubúriga aríjaadün ában oúnwenbun larúguonga, jugúya lé meja lídaanbei lamúñounga le lánina oúweni, jarúguongagüdawaali jáu.

17 Lúmagíñe dan ligía, ába lagúmeserun Jesúsu apúrichija ñi ítará.

—Sáansi jumeí jigáburi, ladüga yaráfaali larúeijan Búngiu.

*Lagúarun Jesúsu joun gádürü esénijatiña lun lánime disípulugu
(Mr 1.16-20; Lc 5.1-11)*

18 Eíbugeina líña Jesúsu láru láru dúna Galiléa, ligía laríjin bián gamúlenuguátiña, ában jádaangiñe, Simón le méme gríbeí Pédro, le ában, Andrés. Esénijani jabágaribeí, jáguruñati. 19 Ábati laríñagun Jesúsu joun.

—Falá jumana, ábame mesénijanjadün lan úduraü, anáajarügaadünme gürígia nun lun nánigume.

20 Furése furése ába jígirunun jasénin, ába joúdin lúma.

21 Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedeo. Tídaañanu ában ugúnein lúma jáguchi arámadajoun jasénin. Ába lagúarun Jesúsu joun lun lánime disípulugu, 22 lídan óra ligía ába jígirunun ugúnein, ígira jáguchi, ába joúdin lúma Jesúsu.

*Larúfudajan Jesúsu joun sarágu gürígia
(Lc 6.17-19)*

23 Ábajei leíbuguni Jesúsu sun Galiléa arúfudajeina tídan buri jalígilisin juríu to lídaanboun ságü fulásu. Ábaja lapúrichijani ugánu butí luágú larúeijan Búngiu, areídaguagüda ligía sun luwúyeri sándi le jawáguti gürígia. 24 Ába lagaambúniwa luágú Jesúsu lídan sun Síria, ába janügüniña sun ja asúfurirubaña láu ámuñegueinarügü sándi, igárigu, ja gawágubaña lagübüri

espíritu, ja goúwejadibaña, jáma ja derégüdaña úgubu, ába lareídagüduniña.²⁵ Sarágu jána gürígia afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lúma lueígiñe oúbaü le ñígíñi lubeí laboúcha wéyú libítí Jordán.

5

Lapúrichijan Jesúsu wübüyüggügiñe

¹ Dan le laríjinbaliña Jesúsu sun gürígia jagía, ába laweínrun luágun ában wübü, ába lañúurun ñi. Ábati joúndaragun láni disípulugu geyéguá láu,² ába lagúmeserun arúfudaja joun ítara.

³ —Fuleíseiwatün jugúya le asúburirubalin luágu mégei jumáni lídejan Búngiu lun jadügüni le labúseerubei, ladüga méréengunbei jun lun jebélurun lídoun larúeijan Búngiu siélu.

⁴ ‘Fuleíseiwatün jugúya le jírubei, ladüga líchuguba Búngiu gurásu jun.

⁵ ‘Fuleíseiwatün jugúya le ünabugubei, ladüga jerésibirubei le uágubei laríñaga Búngiu luágu líchugubei lan jun.

⁶ ‘Fuleíseiwatün jugúya le weíríbei jabúseerun lúaradagun jabágaridun, ladüga líderagubadün Búngiu lun jadügüni.

⁷ ‘Fuleíseiwatün jugúya le gudémejabubei, ladüga gudémebadün gíñe lun Búngiu.

⁸ ‘Fuleíseiwatün jugúya le jarúmabei anígi, ladüga jaríjubei Búngiu.

⁹ ‘Fuleíseiwatün jugúya le áfaagubei lun jámalijan sun cátei, ladüga lagúarubadün Búngiu queísi lirájüñü.

¹⁰ ‘Fuleíseiwatün jugúya le asúfurirubei eíbaajoúni luágu lúaragun jibágari, ladüga jebéluruba lídoun larúeijan Búngiu siélu.

¹¹ ‘Fuleíseiwatün dan le janábagunün gürígia, eíbaaja jamaün, aríñaga jagía sun luwúyeri iyéeni juágu, nueígiñe.¹² Gúndaañu jumá, ladüga jerésibiruba ában oúnwenbun fáyeiti siélu, ítara liñá meja gíñe jeíbaajoúniwa profétagu ja ñübinbaña jubáragiñe.

*Ítara jíñia queísi sálu lúma lámpu lun uboú
(Mr 9.50; Lc 14.34-35)*

¹³ Ába lasígirun Jesúsu aríñaga.

—Ítara jíñia quei sálu joun lílana uboú le lun jeréderuniña lueí jagádeirun, ánjein leférídira sálu lubásuan, ¿cábagi un ju lan? Úaalime ju lan ni ca un lueídügüya lun lágurúniwa, ábame jadügüraguni gürígia.

¹⁴ ‘Ítara jíñia quei lámpu joun lílana uboú le. Ában ubúrugu le luáguti ában wübü siñáti larámudagun, furáanguti larijoúniwa.

¹⁵ Mebedúnti gíñe ában lámpu lun líchugúniwa tábugiñe ában gáfu, luágu dábula líchugúa lun larúgoungadágüdün jáu sun ja

múnadabaña. ¹⁶ Ítara jumá gíñe, durúnguagüda jumeí jilámpun jádan gürigia, lun dánme lan jaríjini buítí le jadügübei, ábame gíñe jadímurejan buítí luágú Wáguchi Búngiu le siélubei.

Larúfudajan Jesúsu luágú lilúrudun Moisés

¹⁷ 'Marítagua jumátia luágú niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímatimaati. ¹⁸ Ninárün lubeíti jáu luágú níjeingua rügáali ligía lan siélu lúma uboú, magídarúnwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun. ¹⁹ Ligía, le lubeí íchuguti mebéresení luágú furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürigia lun jadügüni líbe le ladügübei, ñúraüraübei lanügüniwa yágüta siélu lídan larúeijan Búngiu. Ánjeinti le ñüdünbei láu sún buri gumádi lídan lúaragun, ítara gíñe larúfudajan, weíribei lanügüniwa yágüta siélu. ²⁰ Naríñajare jun luágú ánjein lan mabuídun ligáburi joúserun sarágu weíyaasu jaweí arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágú igáñi

(Lc 12.57-59)

²¹ 'Agáamba jumáali luágú aríñawagúa lán meja joun binádu jagübürigu lun máfarajan jamá, ladüga furúmieguarügü lan le áfarajati, lagúseragüdúwaba. ²² Wel, naríñajare jun luágú furúmieguarügü lan le agáñiduti lúma gürigia líledi lagúseragüdúwaba. Le anábuti gürigia líledi lagúseragüdúbei luweírin-ägei lúrudu, le aríñaguti lun gürigia líledi, "ibídiougua táu", luágúñein üma lun máfiougatin. ²³ Ítara líña lubeíti, ánjein banüga bedéweejan luágún láni Búngiu latárü, báu ñi ába barítaguni luágú níjein lan cátei lídan furúmieguarügü gürigia bubá, ²⁴ ígirabeí le lúnbei bedéweejani ñi ligíbugiñe latárü, ábame bídin aráandara lúma gürigia ligía. Lárigíñemeti, gayáraajalíme bagíribudun luágún latárü íchigei bedéweejan.

²⁵ 'Ánjein abúseera ában gürigia lanügünibú ligíbugiñoun lúrudu, belúba lídoun úarani lúma luágú jeíbuguniwagu lueí ledéregerunibu lun agúseragüduti, ledéregerabume agúseragüduti lun polisia, ábame badaürün. ²⁶ Ninárün báu, máfuridunbadibu ñígíñe darí bafáyeiruni lagúmujoún gáwanün.

Larúfudajan Jesúsu luágú adultériu

²⁷ 'Agáambaadün luágú aríñawagúa lán meja. "Magámarida jumá jámari ámu, adultériu líra." ²⁸ Áu naríñajare jun luágú furúmieguarügü lan le awámadirutu ában würi, adügaali adultériu túma tídan lanígi.

29 'Ánjabu lubeíti lafigoungüda bágu le lueígiñebi boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügü láu bídin láu sun búgubu máfiougatin. 30 Áanjein bújabu lubeí le boúnwenren afífigoungüdübädibu, dürübei, fíbei díse, buítimaati lun lefériderún ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni

(Mt 19.9; Mr 10.11-12; Lc 16.18)

31 'Aríñawagúati meja gíñe luágu furúmieguarügü lan le ígirutu lúmari lúnti líchugun gárada lánina ígiraguni tun. 32 Áu naríñajare jun luágu furúmieguarügü lan wügüri ígirutu lúmari, áanjein máma lubeí ladüga tagámaridun ligíbuagun, ába taganoún lúma ámu wügüri, adügagüda lumútu furúmiñeti wügüri adultériu. Le gíñe agámaridutu würi ígiraguaaru ladügüña gíñe adultériu.

Larúfudajan Jesúsu luágu áfiñuruni

33 'Agáambaadün gíñe luágu aríñawagúa lán meja joun binádu agübürigu lun jagúncularun láu le jaríñagubei láu áfiñuruni ligíbugiñe Búngiu. 34 Áu naríñajare jun luágu moún lumuti lan jáfiñurun ni ca uágu—ni luágu siélu ladüga ñi lan lañúura Búngiu, 35 ni luágu múa ladüga ñi lan líchigei Búngiu lugúdi, ni luágu Jerusalén ladüga ligía lubúrugutebei Warúeite Búngiu le weírigubei, 36 ni luágu jichügü ladüga siñáti ni jájarudagüdün ni jáuridagüdün ában ídiburi. 37 Aríñagarügü jumá "ánja" o "uá", máfiñurunga ni ca uágu, ámu cátei lueí líra lúmagiñeti Máfia.

Larúfudajan Jesúsu luágu láguyugüdüniwa wuríbani

(Lc 6.29-30)

38 'Agáambaadün luágu aríñawagúa lán meja. "Águu luágu águu, ári luágu ári." 39 Áu naríñajare jun lun máguyugüdün jumá wuríbani luágu wuríbani, lubáragiñe líra, áanjein íchiga mútu agúfudein luágu ában loúba jigíbu, rúya jumeí le ában oúbaü lun. 40 Le áluguutu lanügünün ligíbugiñoun lúrudu tueígiñe jisímisin, ígira jumeí lun gíñe lanügünun jabíte. 41 Ánjaün lafósura ában gürígia lun janügün ában anügüni ában máili, barüjumei bián máili. 42 Furúmieguarügü le amúria jati ában cátei júma, rújumei lun, míchiga jumeí gíñe janágan luágun le afúredeijati júma.

Ísiñejabuni joun áganiñu

(Lc 6.27-28, 32-36)

43 'Agáambaadün gíñe luágu aríñawagúa lán meja. "Jínsiñelá bumáda bun, liyéreegudame bágani bun." 44 Áu naríñajare jun. Jínsiñe jamá jáganiñu jun, buídulá jayúmajan jabá ja wuríbabai jayúmajan jubá, adüga jumá buítí joun ja iyéreejabúbaña jun,

ayúmuragua jumá lun Búngiu jawágu ja anábagubadün, ja wuríbabei oúserunün. ⁴⁵ Ítara lúba jagáburiduña lan queísi lirajüñü Júguchi Búngiu le siélubei, ligía oúnaja lumúti wéyu joun buitiña jáma wuríbatiña, oúnajaleí júya dándu joun múaantiña queísi joun úaratiña. ⁴⁶ Ánjein já rügübaña lubeí jínsiñejabúbaña jun ínsiñeda jun, ¿cábagi fáyeiti jerésibira luágu líra? Adüga jamúti gíñe ja agúburajabalín liseínsuna gumádi ítara. ⁴⁷ Ánjein joún rügüñein lubeí jumádagu jayoúragua, ¿ca buiti jadügübei láu líra? Ibini ja ibídiñejabubaña lun Búngiu adüga jamúti líra. ⁴⁸ Úaragua jumá le gumúti queísi úaragua lan Júguchi Búngiu le siélubei.

6

Larúfudajan Jesúsu luágu ladügün cátei buíti

¹ Ába lasígirun Jesúsu arúfudaja joun gürígia wübüwaügügiñe, laríñaga.

—Toúnigi jumá lueí jadügün cátei buíti jagíbugiñe gürígia lúnrügü jaríjinün. Ánjein jadüga ítara, míchubei Júguchi Búngiu le siélubei fáyeiti buíti jun. ² Ligía, dánme lubeí jíderagun ában gudémeti, masúbudiragüda jumeí lun sun uboú quei jadüga ja biánguabaña igíbu ligílisirugu lúma ümadarugu. Jagía, jadüguni líra lúnrügü jadímurejan gürígia buídu jawágu. Ninárün jáu luágu láu lan jadüguni líra, ibíja jamáali jafáyeiruája. ³ Dan le jíchugun ában cátei lun gudémeti, masúbudiraleí ni lubuídunágei jumáda, ⁴ adüga jumeí lábugiñe libídiñewa. Júguchi Búngiu le aríjubalin le jadügübei lábugiñe libídiñewa, líchuguba jafáyeiruája.

Larúfudajan Jesúsu luágu ligáburi ayúmuraguni lun Búngiu (Lc 11.2-4)

⁵ ‘Dan gíñe le jayúmuragun lun Búngiu, mítaran jumá quei ja biánguabaña igíbu ja jínsiñebi joun lun jayúmuragun rára tídan jalígilisin juríu lúma lídan legéyedun üma lun jaríjiniña gürígia. Ninárün jáu luágu láu lan jadüguni líra ibíja jamáali jafáyeiruája.

⁶ Dan le jayúmuragun lun Búngiu, belújuma jirúmurugun, darú jumeíme jubéneri, ábame jayúmuragun lun Júguchi Búngiu le lábuguabei júma ñi. Júguchimetí Búngiu, le aríjubalin le jadügübei lídan límanin, líchuguba jafáyeiruája. ⁷ Lídan le jayúmuragun, máguyuguagüda jumá luágu dimürei le málati quei jadüga ja ibídiñejabubaña lun Búngiu, jarítaguatiñati luágu lagáambubaña lan Búngiu ladüga líbe jadímurejan. ⁸ Mítaran jumá lubeíti quei jagía, ladüga lubáragiñe jayúmuragun lun Búngiu subúdi láali ca lan jabúseerubei. ⁹ Ítara lúba lubeíti jayúmuragun.

Wáguchi Búngiu le siélubei,

inébewalá bíri.

¹⁰ Nübinlá bidáani lun barúeijan ya uboúagu,
adügüwalá bugúndan uboúagu quei ladügüniwa bugúndan
siélu.

¹¹ Rúba fein buídurügütu woun lun wéyu le ugúñebesi,

¹² ferúdunabeí wuríbati le adüga wamálibei quei ferúduna
wamániña ja adügübaña wuríbati woun.

¹³ Mígira báwa lun wáburujan lídoun wuríbani,

dísegüdarügü báwa lueí,

ladüga amürü le arúejabei, amürü le Súntibei Gabáfu, amürü
le weírigubei lun sun dan. Ítaralá.

¹⁴ ‘Ítara líña lubeíti, ángaña ferúduna jumá ámu luágu wuríbati
le adüga jamálibei jun, ferúduna lubádün gíñe Júguchi Búngiu
le siélubei, ¹⁵ áanjein úa ferúduna jumá ámu, úabei gíñe ferúduna
láani Júguchi Búngiu jifígoun.

Larúfudajan Jesúsu luágu ayúnaruni

¹⁶ Ába lariñagun Jesúsu.

—Jugúya, dánme le jayúnarun, marúfuda jumá lírun igíbu
quei jadüga biángua tigíbu, jagía jadügünbalin ítara lun jaríjini
gürígia luágu jayúnaruña lan. Ninárün jáu luágu láu lan
jadügüni líra ibíja jamáali jafáyeiruája. ¹⁷ Áanjein jugúya,
dan le jayúnarun, amúriga jumeí jídiburi, chibá jumeíme
jigíbu, ¹⁸ meféen jamámuga gürígia luágu jayúnaruña lan.
Júguchirügüba Búngiu le júmabei ñi geféen luágu jayúnaruña
lan, ábameti líchugun jafáyeiruája.

Irísini siélu (Lc 12.33-34)

¹⁹ ‘Moúndaragua jumá irísini ya uboúagu le ñí lubei gayára
lan jájüchün jamútiri áni gayára ligía lagájüdün ámu luwúyeri
irísini, le gíñe ñíjin lubeí gayára lan jebélurun jíwerutiña lun
jíwerujan. ²⁰ Oúndaragua jumá irísini siélu, le ñí lubei siñá lan
jájüchün jamútiri, magájüdadi ni cáta, mebélú jagía jíwerutiña
íweruja ñi. ²¹ Le ñí lumuti jirísin, ñíñoun gíñe janígi.

Lilámpun úgubu (Lc 11.34-36)

²² ‘Ítara líña bágu quei ában lámpu lun búgubu, áanjein lubeíti
buídu lubeí bágu, aríja ligía luágun irísini siélu, camá jamuga
jarúgoungabéi gíñe láu sun búgubu, áni buídubei gíñe sun
bigáburi. ²³ Áanjein sándi lubeí bágu, aríja ligía luágun irísini
ya uboúagu, camá jamuga lídaanbei lubúriga sun búgubu, áni
wuríbabéi gíñe bigáburi. Áanjein ñübin larúgounga le bídaanbei
lun lubúrigame, jluweírin méfuna líwurin lubúriga ligía!

*Búngiu lúma seínsu
(Lc 16.13)*

24 'Úati ni ában gayáraati lesériwidun joun biáma iyúbudirigu, ladüga lísiñeduba ában jádaangiñe lun, liyéreegudáme le ában lun, úaraguabei lúma ában jádaangiñe, líchigame meberesen luágu le ában. Siñati lesériwidúniwa lun Búngiu lúma lun seínsu.

*Toúnigi lumútiña Búngiu lirájüñü
(Lc 12.22-31)*

25 'Naríñajare lubeíti jun, madíjeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáürunun. ¿Máfunagi gebégitimaati ibágari sügü láu eígin, gebégi úgubu sügü táo anáanguni? 26 Aríja jumá joun dunúru ja ájamajabaña garábalirugu. mábunagun jáña, malúbajan, mareídun jameí alúbajani lídan lágei, láu sun líra, rúti Júguchi le siélubei eígin joun. ¡Sarágu gebégitima jumá sügü jáu dunúru! 27 ¿Cáteigi jídaangiñe gayáraabei líchugun bián ugúdi lánwoun lúgubu, ca lan lanárimbeí láfaagun luágu?

28 '¿Ca uágu jadíjerida tuágu anáanguni? Aríja jumá ída líña lan laweínamudun fulúri. láu sun mawádigimari lan, madügün ligía gamísia, 29 ni méja urúei Salomón láu sun luwéndegun, mawéndentí meja ladáüragun quei fulúri. 30 Ánjeinti daüguagüda lubálin Búngiu jíduru ítara le ugúñebi lájücha, jarúgabei yebe lagudúña, ¿gúbumésan líderaguajün loúgua tafíñen jugúya le? 31 Madíjerida jumá lubeíti aríñaga. "¿Cába weíga?" o "¿Cába wáta?" o "¿Cába wadáüra?" 32 Gúrígia ja lánigu uboú le, luágu rügüñéin buri cátei le jarítagua, ánjein jugúya, níjein júguchi Búngiu siélu le subúdijabúbei cátei lan jemégeirubei. 33 Seríwi jumá lun Búngiu furúmiñe, áluaja jumeí ibágari surúti le áubei lagúndaara, ábame líchuguni sun le jemégeirubei jun. 34 Madíjerida jumá lubeíti luágu jarúga, ladüga barü lumuti gíñe jarúga lidíjeridüna lúmagua. Ságü ában wéyu gíbeti cátei lun.

7

*Míchiga jumá jadúnrun ámu
(Lc 6.37-38, 41-42)*

1 Ába lasígirun Jesúsu aríñaga joun gúrígia wübüwaügügiñe.

—Míchiga jumá jadúnrun ámu, míchugun lámuga gíñe Búngiu jidúnrun, 2 ladüga quei ligáburi jíchugun jidúnrun ámu, ítara lúba gíñe líchugun Búngiu jidúnrun, le áubei jamísuraja, láuba gíñe lamísurajaün Búngiu. 3 ¿Ída lubásan gayára lan jaríjini liraüraü ífei le lídaanbei lágu jamúlen áni masándi jumúti durúsu le lídaanbei jágu? 4 ¿O ída lúba gayára lan jaríñagun lun jamúlen. "Sagánei liraüraü ífei le lídaanbei bágu," áni níjein ában durúsu

lidan jágu? ⁵ ¡Biángua tigíbu jugúya le! Sagájumei durúsu le lídaanbei jágu furúmiñe, ítara lúba gayára lan jaríjin buídu lun jaságaruni liraüraü ífei le lídaanbei lágu jamúlen.

⁶ Míchiga jumeí arúfudajani luáguti asálbaruni joun gürígia ja gáñitiña, garábagua jáñein juágun quei oúnli lun jágürünün. Míchiga jumeí gíñe arúfudajani ligía le gebégibei sarágu joun gürígia ja büírujuduátiña, dügürgua jañálin.

*Agáamba lumúti Búngiu wamúriaajan lúma
(Lc 11.9-13, 6.31)*

⁷ Jamúriaaja lúma Búngiu, ábame líchugun jun, jáluaja, ábame jadárirun, daünjuma luágua béna, ábame lánjunrenchún jun.
⁸ Ladüga le amúriaajati, abiјati, le áluguti, daríti, le adaünjati luágua béna, jurénwati lun.

⁹ ¿Níjein funági ában jídaangiñe gayáraati líchugun ában dübü lun lisáani dan le lamúriaajan fein lúma? ¹⁰ ¿o líchugun lan ában jéwe lun dan le lamúriaajan úduraü lúma? ¹¹ Ánjein lubeíti láu lubeí sun wuríba jumá, gíchigaditün cátei buíti joun jisáanigu, igúbuméti líchiga Júguchi Búngiu le siélubei cátei buíti joun ja amúriaajatiña lúma!

¹² ‘Súnwandanlá lubeíti jadügün joun ámu quei le jabúseerubei lun jadüguni jun, ladüga ligía laríñagubei lilúrudun Moisés túma jalíburun profétagu.

*Bürüraüti lubéneri siélu
(Lc 13.24)*

¹³ Belújuma lídaangiñe béna le bürüraübei. Béna lúma ūma le anügübei gürígia lídoun féridi, tuléburi líña, gabáranouga ñi, áni sarágu jáña ebélurutiña lídaangiñe. ¹⁴ Ánjeinti béna lúma ūma le anügübei gürígia lídoun ibágari le magúmuchaditi, bürüraü líña, murúgua, mibetiñati adáriruti.

*Luágua cátei le wadülgübei lasúbudirúa cátawa lan
(Lc 6.43-44)*

¹⁵ Toúnigi jumá jaweí yéetiña ja aríñagubaña luágua lerérunt lan Búngiu jadímureja. Jayábin jun quei mudún boúgudigiñe jabíti, ánjein múnadagiñe, ítara jáña quei anímaalu gáñitiña.

¹⁶ Jugúya, gayáraabei jasúbudiruniña luágua le jadügübei, malúbajoóntu beíbei lídaangiñe jíyu, ni ígo lídaangiñe guríbiyuwa.

¹⁷ Sun lubeíti wéwe le buíti, buíti lin, wéwe le wuríbati, wuríbati lin. ¹⁸ Wéwe le buíti, siñáti wuríba lan lin, wéwe le wuríbati, siñáti gíñe buídu lan lin. ¹⁹ Sun wéwe le mabuídunti lin, chaünwati, ába lágudúniwa. ²⁰ Jasúbudirubaña lubeíti yéetiña jagía luágua le jadügübei.

*Másubaña ebélura lídoun arúeijani le siélubei
(Lc 13.25-27)*

21 'Máma sun ja aríñagutiña nun. "Nabúreme, Nabúreme," jebéluruba lídoun arúejani le siélubei,' líña Jesúsu. 'Ja rügübaña adügübalin lugúndan Núguchi Búngiu le siélubei ebélura. 22 Dánme lachülürün wéyu lánina agúseragüdüni, sarágubaña aríñagutiña nun. "Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatiña lídan bíri, adüga wagía sarágu miláguru lídan bíri." 23 Ábameti naríñagun joun. "Ibídiñegubeiñadün nun, díse jumá nueí, jugúa le adüga jumáalibeí le wuríbabei."

*Jawúyeri gürígia ja agáambubalin lerérung Búngiu
(Lc 6.47-49; Mr 1.22)*

24 'Le agáambutina, adügaleí le nubeíbei, ítara líña quei ában wügüri gunfaráandati le adügübei lúban ligíbuagu dübü. 25 Ába liábiningua júya, ába liñúrun dúna, fúguá garábali tuágun muna tugúya, meíguaduntu ladüga luáguñein lan dübü tuágaburi. 26 Ánjeinti le agáambutina, madügün lumúti le nubeíbei, ában wügüri ibídiouguá táo ligía, le ábunagubei ligíbuagu ságoun. 27 Ába liábiningua júya, iñúra dúna, fúguá garábali tuágun muna tugúya, ¡ma lanárime táburujan!

28 Dan lásurun ladímurejan Jesúsu, ¡ma luweírin janígi gürígia láu le larúfudajabe! 29 ladüga láu lan ubáfu larúfudaja, máma quei arúfudajatiña lilúrudun Moisés.

8

*Lareídaguagüdün Jesúsu ában gawáguti gumeín le
mareídaguadibei
(Mr 1.40-45; Lc 5.12-16)*

1 Dan le larárirunbei Jesúsu lueígiñe wübü, sarágu jáña gürígia afálaruti. 2 Ába liábin ában wügüri gawáguti gumeín le mareídaguadibei, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguágüdünina.

3 Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídaguagüda numútibu. 4 Ába laríñagun Jesúsu lun.

—Maríñaga beítia ni ca un, ñüdünrügübá arúfudagua búngua lun fádiri, rúbeíme edéweejani le uágubei laríñaga Moisés, lun jaríjini gürígia luágu areídaguadibu lan.

*Lareídaguagüduni Jesúsu lumúsun ában gumándan Rómána
(Lc 7.1-10)*

⁵ Dan le lebélurun Jesúsu lídoun fulásu le gíribei Capernaúm, ába liábin ában gumándan Rómana lubároun, ⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágú gáriti luágu.

⁷ Ába laríñagun Jesúsu lun.

—Neíbuga agáranija lun.

⁸ Ába loúnabun gumándan.

—Nabúreme, madünatina lun bebélurun núbiñoun, aríñagarügübeí dimúrei, ábame lareídagun numúsun.

⁹ Naríñagubaalin líraladüga nugúya lábugiñeñadina gíñe gumádi le íñutimaati, áni añájein gíñe súdaara lábugiñe nagúmadijan. Dan le naríñagun lun ában jádaangiñe lun lídin, ñüdünti, dan le naríñagun lun ában lun liábin, ñübinti, dan le naríñagun lun numúsun lun ladügün furúmieguarügü cátei, adüga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le laríñagubei gumándan ligía ába laweíridun lanígi, ába laríñagun joun ja afálarubalin.

—Ninárün jáu luágu madárigidina lan wügüri weíri tafíñen ni jádan numútuniña Israelítagu quei wügüri le. ¹¹ Naríñajare jun luágu sarágujaba lan já meja ibídiñejabubaña lun Búngiu ñübintiña lueígiñe oúbaü le ñigiñe lubeí laboúcha wéyu, jáma le ñigiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina siélu. ¹² Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírin-ágei lubúriga, ábame jayájuajan, ábame lacúnrinjan jári le luweírin jagárigu.

¹³ Ába laríñagun Jesúsu lun gumándan ligía.

—Beíba búbíñoun, le uágubei bafíñera, ladügüba bun.

Ába lareídagun músu ligía lídan óra ligía.

Lareídagüdünun Jesúsu límenidi Pédro

(*Mr 1.29-31; Lc 4.38-39*)

¹⁴ Ába lídin Jesúsu lúbiñe Pédro, ába ladárirunun límenidi Pédro roun láu abíruaü. ¹⁵ Ába lagúurun luágu tújabu, ába lagídarun abíruaü tueí, ába tásaarun, ába tagúmeserun esériwidaña.

Lareídagüdün Jesúsu sarágú sánditiña

(*Mr 1.32-34; Lc 4.40-41*)

¹⁶ Dan le lagúñedunbei, ába janügün sarágú gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jawéi láurügü ában dimúrei, areídagüda láña sun ja sándibaña. ¹⁷ Lasúseredunbei sun le lun lagúñfulirun lé meja uágubei ladímureja proféta Isaías

dan le laríñagunbei luágu Jesúsu. “Barü lumuti wadébilin, gidálei wasándigu.”

*Já yebe abúseerubaña jafálaruni Jesúsu
(Lc 9.57-62)*

¹⁸ Dan le laríjin Jesúsu luágu sarágu jáña lan gürigia geyégu láu, ába líchugun dimúrei lun jájifuragun ligía jáma láni disípulugu loubáfurugun dúna. ¹⁹ Ába layárafadun ában arúfudajati lilúrudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

²⁰ Ába loúnabuni Jesúsu.

—Darítiña gasígamu jýyu lun jaganoún ñi, gádibutiña gíñe dunúru, ánjeinti áu le Wügüri Garaüwarügüti, madáritina ni jalíaba lan nabálachagüdei nichügù.

²¹ Laríñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen núguchi, buná neíme, ábame nafálarunibu.

²² Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi.

*Lagálumaruni Jesúsu garábali lúma lugúdi barána
(Mr 4.35-41; Lc 8.22-25)*

²³ Ába ládinun Jesúsu tídoun ugúnein, ába joúdin láni disípulugu lúma. ²⁴ Sódini ába láfuragun ában garábali jéreti, ába lebélujan lugúdi barána tídoun ugúnein. Larúmuguñati Jesúsu. ²⁵ Ába jagágudajani láni disípulugu, ába jaríñagun lun.

—¡Wabúreme, séfu báwa! ¡Wadíbiragu!

²⁶ Ába loúnabuniña.

—¿Cásan uágu janúfudeda? ¡Loúgua tafíñen jugúya le!

Ába lásaarun, ába ladeínjan lun garábali lúma barána, ába lagálumadun. ²⁷ Ába laweíridun janígi, ába jaríñagun.

—¿Cáteisan wügüri le, agáamba lubálin garábali lúma barána?

Laságarun Jesúsu espíritugu wuríbatiña jádaangiñe bián wügüriña Gadárana

(Mr 5.1-20; Lc 8.26-39)

²⁸ Dan le lachülrün Jesúsu loubáfurugu dúna, jageíroun Gadárana, ába jáfuridun bián wügüriña lídaangiñe buri umúajaü achigítí luágu dübü, ába jayábin luágun. Biángubei jagía, jáuñanu espíritugu wuríbatiña áni janárimetiti jagáñi darí lun siñá lan jásügürün gürigia lídaangiñe üma ligía. ²⁹ Ábati jagúarajan ítara.

—¿Cásan uágu bemétera wámoun, Jesúsu Liraü Búngiu? ¿Biábiña asúfuriragüdawa lubáragiñe dan le lánina asúfuriruni?

30 Ñíñanu sarágu büíruju eíga madíse ñígiñe, 31 ába jayúmuragun espíritugu wuríbatiña ja lun Jesúsu, jaríñaga lun.

—Ánjawa baságara, ígirabá lun webélurun jádoun büíruju ja.

32 Ába laríñagun Jesúsu joun.

—¡Jeíbati jádoun!

Ába jáfuridun espíritugu wuríbatiña jagía jádaangiñe wügüriña jagía, ába jebélurun jádoun büíruju, ába jáguragun büíruju jagía joúngua lueígiñe ában gudúungu, ába jáburujan dúnarugun, ába jañáradagun.

33 Ába janúfudedagun ja oúnigirubaliña büíruju, ába jeíbaagun, jachülün aüdübü, ába jabájüdaguni le asúseredubei joun büíruju lúma joun wügüriña já buga jáubaña espíritugu wuríbatiña.

34 Ábati jayábin sun lílana fulásu ligía lúmoun Jesúsu, ába jayúmuragun lun lun láfuridun jageíragiñe.

9

*Lareídaguagüdün Jesúsu ában wügüri derégüdaali
(Mr 2.1-12; Lc 5.17-26)*

1 Ábati ládinun Jesúsu tídoun ugúnein tugúya, ába lánjiñuragun loubáfurugun dúna, ába lachülürün lageíroun. 2 Ába janügün ában wügüri derégüdaali lun, roun tídan lubárari. Dan le laríjinbalin Jesúsu luweírin jafíñen, ába laríñagun lun sánditi ligía.

—Ragüba gurásu, niraü, ferúdunawati bifígoun.

3 Ñíñanuti jádaangiñe arúfudajatiña lilúrudun Moisés, aríñagutiña joúnguarügü. “Lanábaguñeigan wügüri le Búngiu láu dimúrei le laríñagubei.” 4 Queíti subúdi lubálín Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara? 5 ¿Cátimasan ménreengúnbei laríñawagúniwa. “Ferúdunawati bifígoun”, ódi “Sarába, beíbuga”? 6 Narúfudaaliti jun luágu gabáfu nan, áu le Wügüri Garaüwarügti, lun ferúduna nan figoú.

Ába laríñagun lun sánditi ligía.

—Sarába, budáboun bubárari, beíba búbiñoun.

7 Ába lásaarun sánditi ligía, ába lídin lúbiñoun. 8 Dan le jaríjinbaalin gürígia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügüriña.

*Lagúarun Jesúsu lun Matéo lun lánime disípulu
(Mr 2.13-17; Lc 5.27-32)*

9 Ába lídin Jesúsu ñígiñe, ába laríjinina, áu le gíribei Matéo, le abürüjabarun líburu to. Agúburajatina meja liseínsuna gumádi,

ñun níña lídan nubára lánina agúburajani wéyu ligía dán le lásügürünbei Jesúsu ñígíñe. Ába laríñagun nun.

—Falábana, queímoun núma queísi náni disípulu.

Ába násaarun, ába nafálaruni.

¹⁰ Lárigíñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafigountiña eíga lúma úara jáma láni disípulu. ¹¹ Dánti le jaríjini fariséogu cátei le, ába jaríñagun joun láni Jesúsu disípulu.

—¿Ída liñásan leíginbei jumáesturun jáma agúburajatiña liseínsuna gumádi lúma jáma ámu gafigountiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia. ¹³ Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdün anímaalu nun.” Máma niábiña áluyaña ja magádiebaña ligíbugíñe Búngiu, niábiña áluyaña gafigountiña lun jasáansiruni ligáburi joúserun.

*Jálügüdüni Jesúsu libülgürü ayúnaruni
(Mr 2.18-22; Lc 5.33-39)*

¹⁴ Ábati jayábin ja láni Juan le abásteragüdajabeí disípulu, ába jaríñagun lun Jesúsu.

—¿Ánsan wagía jáma fariséogu ayúnara wabeí sarágu, ánjaña báni disípulu mayúnaruntiña?

¹⁵ Ába líchuguni Jesúsu jémpulu le joun luágu iséri larúfudajan lúma binádu, laríñaga.

—¿Gayáraati funági jíruñu jamá ja amísurajoúbaña lídoun ában maríei dan le niján lan adári jáma ñi? Lachülüruba wéyu lun lúadun adári jáma, ligíalime jayúnarun.

¹⁶ ‘Siñáti táfadajoún gamísa ñulújaru táu murúsun to derégiru ladüga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíriti. ¹⁷ Siñáti gíñe léserúniwa bínu le isérígili lídoun guéru le binádujali, ánjein adügüwa ítara, ábame lafaünchün guéru dánme le liñúrun bínu, fériwi ligíameti gúeru, fériwi bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

*Liraiü Jáiro túma würi to agúurubarun lanáangun Jesúsu
(Mr 5.21-43; Lc 8.40-56)*

¹⁸ Dan ñíñein lan Jesúsu arúfudajeí sún buri cátei le, ligía liábin ában ábuti jádaangiñe juríu, ába lájuduragun ligíbugíñe, ába laríñagun lun.

—Sun líña toúnwen nisáani, ánjabu ñüdün lun bíchuguni bújabu tuágu, táguyuguba.

19 Ába lásaarun Jesúsu, ába lídin lúma ñi jáma láni disípulugu.
 20 Ñíñounti ában würi ümada sánditu, dúusu irúmu tátu láu lésejan jítäu tídaangangiñe, ába tayárafadun lun Jesúsu lanágangangiñe, ába tagúurun luágu táru lanáangun, 21 taríñaga túnguarügü. “Láurügü nagúurun tuágu lanáangun nareídaguba.” 22 Ába lagáraragun Jesúsu, ába laríjinun, ába laríñagun tun.

—Ragüba gurásu niraü, areídaguaadibu ladüga bafíñen.

Lúmagangiñe óra ligía ába tareídagun.

23 Dan le lachüllerün Jesúsu lúbiñoun buga ábuti ligía, dan le laríjiniña ífiaajatiña aráanseña lun ábunajani, añaña gürígia areíncha, 24 ába laríñagun joun.

—Furíjuma yágiñe, moúnwengiru irájü to, tarúmuguña.

Ába jéjerajan láu. 25 Dan le furígüda láña sun gürígia, ába lebélurun, ába lárügündüni tújabu irájü tuguya, ába tásaarun.

26 Ába labúruchagun luágu le asúseredubei lídan sun fulásu ligía.

Lareídagüdün Jesúsu bián marijintiña

27 Dan láfuridun Jesúsu ñígiñe, ába joúdin bián wügüriña maríjintiña lárigi, agúarajeina ítara.

—¡Gudéme wamá bun, amürü le ladügawagun Davíd!

28 Dan lebélurun Jesúsu múnadoun, ába jachüllerün maríjintiña jagía lúmoun, ába laríñagun joun.

—¿Afíñetün luágu gayára lan nareídagüdünün?

Ába jaríñagun.

—Ánja, afíñetiwa, Wabúreme.

29 Ába lagúuruni Jesúsu jágu, ába laríñagun joun.

—Ítaralá quei ligáburi jafíñen.

30 Ába léfegechun jágu, ába léredun Jesúsu jawágu lun joúchun lun masúbudirúniwa lan luágu ligía lan agáranijabeí joun.

31 Quei jáfuridun ñígiñe, ába jabájüdaguni le ladügübeí Jesúsu lídan sun fulásu geyégua láu.

Lareídagüdün Jesúsu ában meréngaditi

32 Dan le áfurideina jamá, ligía jayábin fiú gürígia láu ában wügüri meréngaditi, gawáguti ában espíritu wuríbati, ába jayábin láu lun Jesúsu. 33 Lárigiñe laságaruni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janígi gürígia, ába jaríñagun.

—Maríjijájádíwa líbe le jageíra Israelítagu.

34 Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun gürígia

³⁵ Eíbuga lumúti meja Jesúsu sun fulásu arúfudajeina tídan jalígilisin juríu, apúrichijeí ugánu buíti luáguti arúeijani le lánina siélu, areídagaguagüdeina sun luwúyeri sándi lúma gáriti. ³⁶ Dan laríjiniña gürígia, ába jagúdemedagun lun, ladüga nídiíjeri jamá, magúraasun jagía, camá mudún ja moúniritiña. ³⁷ Ába laríñagun joun láni disípulugu jabügürü gürígia jagía.

—Sarágu jáñia gürígia buséntiña jagáambuni ugánu luáguti asálbaruni, ítara jáñia quei nádü lun lalúbajoún, áni loúguatiña ñadágimeintiña. ³⁸ Lúnti lubeíti jamúriajan lúma Labúreme nádü lun loúnajan ñadágimeintiña lun japúrichijan joun.

10

Láni Jesúsu dúusu disípulugu (Mr 3.13-19; Lc 6.12-16)

¹ Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatiña jaweí gürígia lúma lun jareídagaguagüdün sun luwúyeri sándi lúma gáriti. ² Niján jíri dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamülen, Jacóbo lúma Juan le lamülen—lirajüñü Zebedeo, ³ Felipe, Bartolomé, Tomás, numá, áu Matéo le agúburajabeí meja liseínsuna gumádi, Jacóbo le liraü Álfeo, Lébeo, le méme gíribei Tadéo, ⁴ Simón—ában meja wügüri áfaagutí lun jawáanserun juríu, lúma Júdas Iscarióte, le alúgurubalin Jesúsu.

Loúnajaniña Jesúsu disípulugu apúrichija (Mr 6.7-13; Lc 9.1-6)

⁵ Dan loúnajabaliña Jesúsu dúusu ja apúrichija, ába laríñagun joun ítara.

—Mídin jumá le ñí jamuti ja mámabaña juríu, mebelu jugúyame lídoun buri fulásu le láni Samária, ⁶ jabügürülá gürígia féridijaña ja Israelítagu jídin. ⁷ Jeíba, apúrichijeina luágu yaráfaali lan larueijan Búngiu. ⁸ Areídagaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jiláaña, sagá jumaña espíritugu wuríbatiña. Mafáyeijántün lun jibíjini ubáfu le, magúburaja jumá gíñe luágu.

⁹ ‘Manüga jumá seínsu, ¹⁰ manügün jugúyame lágei ni cáta. Ábanrugütá simísi janüga, manügün jugúyame sabádu ni bádun, ladüga le ñadágimeinbei garíchatí lun leígin lídaangiñe luwádigimari.

¹¹ ‘Dánme le jachülürün lídoun ában ubúrugu o ában lan liraüraü fulásu, ábame jálugun gürígia ja ánjatiña lun jerésibirunün ñi, ábame jeréderun jáma jábiñe darí jídin. ¹² Dánme jebélurun tídoun ában muna, ábame jabúsurun, ayúmuragueina magádiei jawágu tílana muna tugúya. ¹³ Ányaün

jerésibira tílana muna tuguya, ígira jumeí jabúsurun jáma, ánjaün merésibirun jamá, giríbugüda jumeí busúguau ligia lun ua lan magádiei joun. ¹⁴ Ánjaünti merésibirun jamá, mája jagia jagáambunün, ábame jáfuridun tídaangiñe muna tuguya o lídaangiñe lan fulásu ligia, ábame jáfuruduni calíqui lueígiñe jugúdi lun jarúfuduni luágu mabuídun lan jagáburi gürigia jagia, ígira jumáñia quei jadáriragun joúngua. ¹⁵ Ninárün jáu luágu dánme lan le lachülürün wéyu lánina agúseruni, weíritimaabei jasúfurirun lílana fulásu ligia sügü láu jasúfurirun lílana Sodóma lúma Gomórra.

Eibaajoúni le lúnbei jasúfuriruni láni Jesúsu disípulu

¹⁶ 'Noúnajaadüntia quei mudún jagánaguouún anímaalu gáñitiña. Aráanseñu jumá lubeíti ítara quei jéwe, áni ítara jumá quei únjun madügünga wuríbani. ¹⁷ Toúnigi jumá ladüga j juríu. ¹⁸ Janügüwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, ítara lúba gayára lan jadímurejan nuágu jagíbugiñe, lúma jagíbugiñe ja mámabaña juríu. ¹⁹ Dánme le jederegerúniwa joun lúrudugu, májüchüra jumá luágu cába lan jaríñaga o ída lúba lan jaríñaguni, ladüga dánme lachülürün óra lun jadímurejan, líchugubei Búngiu le lúnbei jaríñaguni jun. ²⁰ Mámaba juguya adímureja, láni Júguchi Búngiu Espíritu, ligíaba adímureja jídaangiñe.

²¹ 'Jalúgurubaña wügüriña jabíriña guánarü lun jafarún jilágubei, alúgura jamáname agübürigu jasáanigu, garábagua jagíame isáanigu jawágun jagübürigu lun jáfaragüduniña. ²² Jeyéreegudúba lun sun uboú nueígiñe, áni le derégüdaguti darí lúmoun lagúmuchun libágari, lebéluruba siélun. ²³ Dánme le jeíbaajoún lídan ában fulásu, ábame janúrajan lídoun ámu, ninárün jáu, niábinyaba, áu le Wügüri Garaüwarügüti, lubáragiñe jeíbuguni sún buri jabúrugute Israelítagu.

²⁴ 'Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun. ²⁵ Lúnti gúndan lan disípulu láu lachülürün ítarada quei lumáesturun, lúma músu quei liyúbudiri. Ánjein aríñawagúa lubeí nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa

(Lc 12.2-9)

²⁶ 'Ligia manúfudededa jumá lubeí javeí gürigia,' lína Jesúsu joun láni disípulu lubáragiñe loúnajaniña apúrichija. 'Úati cátei darúguati láu lun machülaagunbei lan, ua ni cáta le arámudagúati lun masúbudirúnwabei lan. ²⁷ Le nariñagubei jun lídan lubúriga aríñaga jumeí lídan larúgounga, le nariñagubei jun ibidiñoun joun ámu, wágu jumeí íñugiñe tibíti muna. ²⁸ Manúfudededa jumá javeí ja gayáraabei jáfaruni úgubu

jilágubei áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janúfudedun lueí.

²⁹ ‘¿Malúgurúntiña funági bián jarájüñü dunúru luágu ában liraüraü seínsu? Áni máburujantu ni ában jádaangiñe múarugun áanjein mabúseerun lubeí Júguchi Búngiu. ³⁰ Ásta ídiburi le jabolugubei, abájüdüwati ában ában. ³¹ Manúfude jumá lubeíti, gebégitün sügü jáu dunúru.

*Ja mayéedagúnbaña láu Jesúsu jagíbugiñe gürígia
(Lc 12.8-9)*

³² ‘Sun ja arúfudagutiña joúngua jagíbugiñe gürígia luágu númagiñeñánu lan, naríñaguba gíñe ligíbugiñe Núguchi Búngiu le siélubei luágu nánigu jamá. ³³ Ja ayéedagutiña náu jagíbugiñe gürígia, nayéedaguba gíñe jáu ligíbugiñe Núguchi Búngiu le siélubei.

*Le busénbei lun lafálaruni Jesúsu
(Lc 12.51-53, 14.26-27)*

³⁴ ‘Marítagua jumátia luágu niábiña lan lúnrügü níchugun gáluma uboúagu, máma niábiña íchiga gáluma, niábiña íchiga wuríbu. ³⁵ Láu niábin, jafánreinraguba ja mafíñebaña nuágu jáma ja afíñebaña nuágu, lawúribujaba wügüri lúma lúguchi, isáani túma táguchi, ídiñu túma tágürü, ³⁶ lagáganiraguba cáda ában jáma lidújeñu.

³⁷ ‘Le jínsiñejabuti lun lúguchi o lúguchi sügü láu nísiñe lun, madüna lumúti nánigu lan, le jínsiñejabuti joun lirájüñü sügü láu nísiñe lun, madüna lumúti gíñe nánigu lan. ³⁸ Le mawándunti asúfuriruni líbe lasúfurirúniwa luágu gurúwa lun lafálarunina, madüna lumúti nánigu lan. ³⁹ Le busénbei lesáfuragun lúngua ya uboúagu lefériderubei ibágari le magúmuchadibeí siélu, áanjein le ánjabeí leférideragun lúngua ya uboúagu nueígiñe, libíjubei ibágari magúmuchaditi siélu.

*Ja lúnbaña jerésibiruni jafáyeiruaja lúmagiñe Búngiu
(Mr 9.41)*

⁴⁰ ‘Le erésibirutün resíbi lumútina, le erésibirutina resíbi lumúti le oúnajabalina. ⁴¹ Le erésibiruti ában proféta ladüga liábin láu líri Búngiu, lerésibirubei afáyeiruajaü le libíjubei ában proféta, le erésibiruti ában wügüri buíti ladüga lubuídun, lerésibirubei afáyeiruajaü le lerésibirubei ában wügüri buíti. ⁴² Furúmiegarügü le íchuguti ában wéru dúna dilíti lun ában jádaangiñe ünabugutiña ja ladüga nánigu jamá, libíjuba lafáyeiruaja lúmagiñe Búngiu.

11

*Ja loúnajabaña Juan le abásteragüdajabei adímureja lúma Jesúsu
(Lc 7.18-35)*

¹ Dan le lásurunbei laríñaguni Jesúsu le lúnbei jadüguni láni disípulugu, ába lídin ñígiñe lun larúfudajan, apúrichija ligíame lídan buri fulásu geyégua láu ubúrugu le Capernaúm.

² Dan ligía, furísunruguñein Juan, ába lagáambun luágu sun le ladügübei Crístu. ³ Ába loúnajan biáma jádaangiñe láni disípulugu aríjei Jesúsu lun jálügüdüni ítara.

—¿Amürü Crístubei le lúnbei liábin ódi lúnti wagúrabajan ámu?

⁴ Ába laríñagun Jesúsu joun.

—Jeíba jaríñageime le jaríjubei lúma le jagáambubei lun Juan. ⁵ Jabájüdaguáme lun luágu aríjaña lan já meja marijinbaña, eíbuga já meja meibugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijoúa luágu ugánu buíti le lánina asálbaruni joun gudémetiña. ⁶ Áni fuleíseiwati le mefériderunbalin lafíñen nuágu.

⁷ Dan le joúdin, ába lagúmeserun Jesúsu adímureja joun gürígia luágu Juan, ába laríñagun.

—¿Cásan jídinbei meja aríja lídan fulásu le mageírawati? ¿Ában wügüri le medéraaguagüdünti larítagun queísi ában mabúru le lánjingichun garábali? ⁸ Ánjein máma lubeí líña, ¿cáti jídinbei aríja? ¿Ában wügüri wéndeti ladáüragun? Subúsiti jun luágu ja lan wéndebeña adáüragun, tídaañanu lan jában urúeigu. ⁹ ¿Cáteiti jídinbei aríja? ¿Ában proféta? Ánja, ligía, áni ában wügüri weíriguti sügü láu ában proféta Juan. ¹⁰ Ligía le uágubei taríñaga Lerérung Búngiu.

Noúnajañein noúnagüle bubáragiñe,
lun laráansejani üma bubá.

¹¹ Ninárün jáu, jádan sun gürígia, úagili ni ában weíriguti lueí Juan le abásteragüdajabei, láu sun líra, le ünabutimaabei lídan arúejani le siélubei weíritimaati lueí le anügarügübalin ugánu luágu arúejani ligía.

¹² 'Lúmagiñe dan le liábinbei Juan le abásteragüdajabei darí lúmoun dan le, murúgu jáña gürígia áluga jebélurun lídoun larúeijan Búngiu. Ja ebélurubaña, ragü jamuti jabára ñi queísi ában cátei le gebégití sarágu. ¹³ Lilúrudun Moisés jáma sun profétagu, adímurejatiñá meja luágu larúeijan Búngiu, láu liábin Juan, ába lagúmeserun jerérung profétagu jagía luágu larúeijan Búngiu agúnfulira. ¹⁴ Ánjeinti busén jubeí jafíñerun, Juan ligía proféta Elías lé meja lúnbei liábin lubáragiñe liábin arúejani ligía. ¹⁵ Ja garígeirugubaña lun jagáambun, agáamba jamá.

¹⁶ ‘¿Cábasan úma núaradaguágüdaña gürígia ja lánina dan le? Magúndaatiña ni ca áu, ítara jáñia quei irájüñü ja añúurubaña adíbirija mágidirugu, ába jagúarajan joun jíbirigu ítara. ¹⁷ “Íñaajatiwa fidu jun, mabínajantün, erémuja wagía urému jíruthu jun, mayájuntün.” ¹⁸ Ladüga liábin Juan meígin líñia buídu quei leígin furúmieguarügü, mátun, ába jaríñagun luágu níjein lan espíritu wuríbati lídan. ¹⁹ Lárigiñe, ába niábin, áu le Wügüri Garaüwarügti, jou áu quei leígin furúmieguarügü, gurá, ába jaríñagun luágu geígadi nan, gátadi, jamáda áu gafíountiña jáma agúburajatiña liseínsuna gumádi. Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

*Lílana buri fulásu ja magáambadibaña
(Lc 10.13-15)*

²⁰ Ábati lagúmeserun Jesúsu adeínja joun gürígia lídan fulásu buri le ñi lubeí meja ladügei líbe-ágei láni miláguru, ladüga masáansirun jamágili lan joúserun. Ába laríñagun.

²¹ —¡Fugiábu jugúa Corazínna! ¡Fugiábu jugúa Betsáidana! Lun jamúga lídan lan ubúrugu le góribei Tíro lúma Sidón ladügüwa miláguru buri le adügübei jagánagua, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi. ²² Naríñajare jun luágu dánme lan lachülürün wéyu lánina agúseraguni, weíritimaabei jabeichún sügü jáu ja Tírobaña jáma ja Sidónbaña. ²³ Amürüti ubúrugu le Capernaúm, ¿jarítaguatibu luágu weírigubadibu lan queísi siélu? Maweírigúnbadibu ítara quei maweírigun lan máfiougati. Ladüga lun jamúga lídan lan ubúrugu Sodóma ladügüwa miláguru le adügübei bídan, níjeingua jamúga fulásu ligía lúmoun dan le. ²⁴ Naríñajare jun luágu lídan lánme wéyu lánina agúseraguni, weíritimaabei jabeichún sügü jáu Sodómana.

*Jigoúgu lun Jesúsu, eméraagua jumámuga
(Lc 10.21-22)*

²⁵ Lídan dan ligía, ába laríñagun Jesúsu lun Búngiu.

—Adímurejatina buíti buágu, Núguchi le Labúremebi siélu lúma uboú, ladüga barámuduni buri cátei le jaweí chu táo jáma gunfaráandatiña, ába barúfuduni joun ja mafúnrendeirungiñábaña queísi irájüñü. ²⁶ Ánja, Núguchi, ladüga ítara líña lan babúseeruni.

²⁷ ‘Derége láali Núguchi sun cátei nun. Ibídiñeti Búngiu Irájü ni ca un buídu buídu lueídügyüa lun Búngiu Úguchili, ibídiñeti gíñe Búngiu Úguchili ni ca un buídu buídu lueídügyüa lun Búngiu Irájü jáma ja únbaña labúseera Búngiu Irájü lasúbudiragüduni. ²⁸ Jigoúgu númeroun, sun jugúa ja bucháañabaña uágu lárigi juwádigimari lúma lijürü janügün, eméraaguagüda námugaün.

29 Resíbi jumeí narúfudajan, furéndeí jugúyame númagiñe, láu gagúraasun nan, ñulú tugúya nanígi, ábame jadárirun eméraaguni tun juwáni. 30 Ménreengunti lun jesériwidun nun, juáliti giñe anügünü le níchugubei jun lun janügünü.

12

*Játünjan disípulugu türígu lídan wéyu le eméraaguagülei
(Mr 2.23-28; Lc 6.1-5)*

¹ Luágu ában wéyu le eméraaguagülei eíbugeina líña Jesúsu jáma láni disípulugu labádinagua nádü. Ába jalámachun láni disípulugu, ába játünjan lílewe türígu, ába jeíginí líla. ² Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adüga wadágimanu le moún lumuti ladügün lídan wéyu le eméraaguagülei.

³ Ába laríñagun joun.

—¿Malíjangidün luágu lé meja ladügübei Davíd luágu ában dan, dan le lalámachunbei, ligía jáma ja úarabaña lúma? ⁴ Ába lebélurun tídoun lúban Búngiu, ába leígin tídaangiñe fein to sagráuboun to moun luboún yebe leíginun, ni ligía ni ja úarabaña lúma, fádirigu rügüñanu lun jeíginun fein tugúya segúnlilúrudun Moisés, áni mámati figoú le ladügübei Davíd ligibugiñe Búngiu. ⁵ ¿Ódi malíjangidün lídan lilúrudun Moisés luágu ñadágimein jamá fádirigu tídan lúban Búngiu lídan wéyu le eméraaguagülei áni máma figoú? ⁶ Naríñajare jun luágu níjein lan ában weíriguti sügü táu lúban Búngiu ya, áu. ⁷ Jugúya, úagili gunfaráanda jumáni le laríñagubei Búngiu tídan Lerérun. “Jímein numúti lun gudémejabu jumá sügü láu jadágaragüdün anímaalu nun.” Lun jamúga gunfaráanda jumáni, madímurejaantún jamúga wuríbati jawágu gürígia ja madügünbaña ni cáta wuríbati. ⁸ Gabáfutina giñe, áu le Wügüri Garaüwarügüti, lun naríñagun cába lan gayára ladügüniwa lídan wéyu le eméraaguagülei.

*Wügüri le jilálibei ában lújabu
(Mr 3.1-6; Lc 6.6-11)*

⁹ Ába lídin Jesúsu ñígíñe, ába lebélurun tídoun jalígilisin juríu. ¹⁰ Ñíñein ában wügüri jiláali ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáratísan lagáranijoún lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, áanjein galügün lubeí ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun? ¹² ¡Ma gebégitimaati ában wügüri sügü táu

ában mudún! Gayáraati lubeíti ladügün buíti lídan wéyu le eméraaguagülei.

13 Ába laríñagun lun wügüri ligía.

—Tulébei bújabu.

Dan le látuleruni, ába lareídagun quei le ában. 14 Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

15 Dan lasúbudirunbalin Jesúsu cátei le, ába lídin ñígíñe, ába jafálaruni sarágu gürígia, ába lareídagüduniña sun sánditiña.

16 Ábaja laríñagun joun lun maríñagun jamáni cáteiñein lan.

17 Lasúseredunbei líra lun lagúnfulirun lé meja laríñagubei proféta Isaías.

18 Niján numútun le nanúadirubei lun lesériwidun nun, le jínsiñebi nun, le áubei nagúndaara, líña Búngiu.

Níchugubei náni Espíritu luágu,
ábame larúfudajani joun ja mámabaña juríu ída lúba lan gayára
lan júaradun nigibugiñe.

19 Mageíndagunbei, magúaragun,
mareínjabei ümada.

20 Gudémejabubei joun gürígia ja gudémebaña queísi ában
mabúru le barúguuali, lúma joun ja débilibaña lídan
jafíñen queísi ában lámpu le ñegúmemeeeli.

Ítara méme lúba daríme adüga láali larúeijan le úaraguabei.

21 Ábame jíchuguni ja mámabaña juríu jeménigi luágu.

Laríñawagún luágu lubáfu lan Máfia lúmabei Jesúsu

(*Mr 3.19-30; Lc 11.14-23, 12.10*)

22 Ábati lanügüniwa ában wügüri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía.

23 Ába laweíridun janígi sun ja ñíbaña, ába jaríñagun.

—¿Niján funásan ladügawagunbei Davíd?

24 Dan le jagáambunbalin fariséogu cátei le, ába jaríñagun.

—Wügüri le, láu lubáfu Beelzebú, le Máfia, le jábuti espíritugu wuríbatiña laságajaña.

25 Quei subúdi láani Jesúsu le jarítagubei, ába laríñagun joun.

—Furúmieguarügü arúeijani le afánreinraguti lun jageíndagun jámagua, lagúnrinchaguba, ánjaña gíñe afáreinragua lílana ában ubúrugu o ában lan familia ladüga wuríbu, siñábei jadúrarun.

26 Ítara líña giñéti, ánjein laságara Máfia mafía guánarügü, ligía guánarügü afánreinragubei, áni ¿ída lubáti ladúrarun lubáfu ítara? 27 Jugúya, aríñagatün luágu láu lan lubáfu Beelzebú, o Máfia, naságaja espíritugu wuríbatiña, ánjein ítara líña lubeí,

¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá. ²⁸ Áu, láu lubáfu láni Búngiu Espíritu naságaja espíritugu wuríbatiña. Arúfuda lumúti líra luágu chülüjali lan larúeijan Búngiu jídoun.

²⁹ ‘Ída lubági gayára lan lebélurun ában gürígia lúbiñoun ában wügüri jéreti lun lanügüni lílagu ánjein magüragun lan furúmiñe? Ítara rügüñein lun gayára lan lanügüni lílagu.

³⁰ ‘Le mámabei númagiñe, náganiñein, le míderagun lumútina, güríngua lumúti le nadügübei.

³¹ ‘Jugúya aríñagatün luágu láu lan lubáfu Máfia naságaja espíritugu wuríbatiña, áni láu lubáfu Sífiri Sándu naságajaña. Ligía naríñagunbei jun luágu gayára lan ferúdunawa lan sun figoú lúma sun wuríbati le jaríñagubei gürígia, ánjein lun jadímurejan wuríbati luágu Sífiri Sándu, siñábei ferúdunawa lan figoú líra. ³² Furúmieguarügü gíñe le aríñaguti furúmieguarügü cátei wuríbati nuágu, áu le Wügüri Garaüwarügüti, gayáraati ferúdunawa lan, ánjeinti le adímurejati wuríbati luágu lubáfu Sífiri Sándu le nídaanbei, úabey ferúdunawa lan ni lídan uboú le, ni lídan le ában.

*Luágu lin ídibu lasúbudirúa ca lan luwúyeribei
(Lc 6.43-45)*

³³ ‘Ánjein buídu lubeí ídibu, buídubei gíñe lin, ánjein mabuídun lubeí ídibu, mabuídunbei gíñe lin. Luágu lin ídibu lasúbudirúa ca lan luwúyeribei. ³⁴ ¡Jarásan jéwe jugúya le! Siñáti jadímurejan cátei buíti, wuríbatüngan. Cátei le buínbei tídan anígi, ligía laríñagubei iyúmaü. ³⁵ Wügüri le buídubei, cátei buíti laríñagubei ladüga tídaañein lan lanígi ubuíduni, wügüri le wuríbabey, cátei wuríbati laríñagubei ladüga tídaañein lanígi wuríbani. ³⁶ Naríñajare jun luágu dánme lan lachülürün luwéyuri agúseruni, sun gürígia geféenbaña luágu sun dimúrei málati le jaríñagubei, ³⁷ ladüga luáguba le baríñagubei bagúseragüdúwa, ligíaba arúfudei ánjein gadúnrun bubeí lúmoun madúnrun ban.

*Jamúriajan gürígia wuríbatiña seíni láuti miláguru
(Mr 8.12; Lc 11.29-32)*

³⁸ Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badügün ában seíni le láuti miláguru luágu lúmagiñe lan Búngiu biábin.

³⁹ Ába laríñagun Jesúsu joun.

—Gürígia wuríbatiña áni magúnfuliruntiña amúria jatiña seíni láuti miláguru, míchugúnbei ámu seíni joun lueí le asúseredubey lun proféta Jonás. ⁴⁰ Ladüga queí leréderun Jonás ürüwa

wéyu ürüwa áriebu lurágeirugu údu, ítara lúba gíñe neréderun, áu le Wügüri Garaüwarügüti, lídan numúa ja ürüwa wéyu, ürüwa áriebu, segün ligáburi jabájüdüni juríu dan. ⁴¹ Já meja aganoúbaña Nínive jásaaruba lídan luwéyuri agúseruni dánme jagúseragüdüniwa gürígia ja lánina dan le, ábame jichugun jadúnrun ladüga sáansiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weíriguti sügü láu Jonás, áni májatün jagáambunina. ⁴² Tásaaruba gíñe lurúeitena Súru lídan luwéyuri agúseruni dánme le jagúseragüdüniwa gürígia ja lánina dan le, ábame tichugun jadúnrun, ladüga ñübintu lídaangiñe lidíse-ägei uboú lun tagáambuni lichú láu Salomón, áni anája áu, ában weíriguti sügü láu Salomón, áni májatün jagáambunina.

Espíritu wuríbatí le agíribudutí

(Lc 11.24-26)

⁴³ ‘Dan le láfuridun ában espíritu wuríbatí lídaangiñe ában gürígia, ába eibugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴ “Nagíribuda tídoun núban to ñígíñe lubeí náfurida.” Dan le lagíribudun, ába ladáriruni gürígia buga ligía queísi ában muna to málatu, abuídoúaaaru, aráanserúa. ⁴⁵ Ábati lídin, ába liábin jáu sédü espíritugu wuríbatimaatiña sügü láu, ába jebélurun sun jagía agánawa lídan gürígia ligía, wuríbatimájaliti le gádaanbalin sügü láu meja furúmiñe. Ítara lúba giñéti lasúseredun joun gürígia wuríbatína ja lánina dan le.

Lúguchu Jesúsu jáma lamúlen

(Mr 3.31-35; Lc 8.19-21)

⁴⁶ Ñígili Jesúsu adímureja joun gürígia, ligía tiábin lúguchu jáu lamúlenu. Ába jeréderun boúgudi, buséntiña yébe jadímurejan lúma. ⁴⁷ Ába laríñawagún lun Jesúsu.

—Nuján búguchu jáma bamúlenu ya boúgudi, buséntiña jadímurejan búma.

⁴⁸ Ába laríñagun Jesúsu lun le awísarubalin.

—¿Ca núguchuboun, ca namúlenubaña?

⁴⁹ Ába larúfudun jawágun láni disípulugu, ába laríñagun.

—Añája núguchubaña, jagía gíñe namúlenubaña, ⁵⁰ ladüga furúmieguarügü le adügüti lugúndan Núguchi le siélubei, ligía namúlenbei, nítu, núguchu.

13

Jémpulu luáguti ábunaguti

(Mr 4.1-9; Lc 8.4-8)

¹ Wéyu ligía, ába láfuridun Jesúsu múnadagiñe, ába lañúurun láru dúna. ² Quei jagíbedagun gürígia le ñí lubei, ába ládinun tídoun ában ugúnein, ába lañúurun, ába jeréderun sun gürígia láru dúna. ³ Ába larúfudajan sarágu cátei joun láu jémpulu, ába laríñagun.

—Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburujan lídaangiñe luágun üma, ába jayábin dunúru, ába jeígini. ⁵ Líbiri, ába láburujan labádinaguóún dübü le ñí lumutí úa lan sarágu múa, ába laboúchun furése ladüga majúlin lan múa. ⁶ Dan le lásüdün wéyu, ába lásaürün queíti málagüle lan, ába loúnwen. ⁷ Líbiri ílaü, ába láburujan labádinaguóún jíyu, ába laweínamudun jíyu úara lúma, ába láfaruni. ⁸ Ñíñein lídaangiñe, áburujati lídoun múa buíti, alúbajoúati buídu, níjein lídaangiñe, íchuguti san águu luágu cáda ában águu, líbiri rúti ürüwa-wein, líbiri darándi. ⁹ Jugúya le garígeirugubei lun jagáambun, agáamba jumána.

*Ca lan laníchigubei jémpulu le
(Mr 4.10-12; Lc 8.9-10)*

¹⁰ Ábatí jayábin disípulugu, ába jaríñagun lun Jesúsu.

—¿Cásan uágu badímureja joun gürígia láu jémpulu?

¹¹ Ába laríñagun joun.

—Jugúya, subúdigüda láali Búngiu sun cátei arámudaguati le lánina larúejan jun, ánjein jagía, siñáti jasúbudiruni. ¹² Le agúncularuti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí. ¹³ Ligía nadímurejanbei joun láu jémpulu ladüga aríja jamáni le nadügübei, ába jeréderun camá maríjintiña, agáamba jameí le naríñagubei, ába jeréderun úaga gunfaráanda jamá camá jamuga magáambuntiña. ¹⁴ Jawágu lagúncularuti lé meja laríñagubei proféta Isaías dan laríñagunbei.

Jugúya, jagáambuba, úabej gunfaráanda jumá,
jaríjuba, ibidiñebi jun ca lan lílabei le jaríjubei,

¹⁵ ladüga deréeru janígi,

wuríbaaliti jagáambun,

murúñu líñia jágu,

lun maríjin jumá láu,

magáambun láu jarígeirugu,

úa gunfaráanda jumá táu janígi,

magáragaragun jugúyame nun lun nareídaguagüdünün.

¹⁶ ‘Ánjeinti jugúya le nánigubei, fuleíseiwatün ladüga aríjatün láu jágu, agáamba jugúya láu jarígeirugu. ¹⁷ Ninárün jáu, sarágu jañá meja profétagu jáma ámu gürígia gúnfulitiña lúma Búngiu abúseerutiña jamúga jaríjinina quei jaríjinina jugúya

guetó, marijin jamútina, buséntiña jamúga meja jagáambuni le jagáambubei jugúya, magáambun jamúti.

*Lafúnraanguagüdüni Jesúsu jémpulu luáguti ábunaguti
(Mr 4.13-20; Lc 8.11-15)*

¹⁸ 'Agáamba jumeíti le lílabei jémpulu luáguti ábunaguti. ¹⁹ Ja agáambubalin ugánu luáguti arúejani le lánina siélu áni úati gunfaráanda jamáni, ítara jáña quei üma le ídounbei láburuja lídaangiñe líla nádü, ába liábin Máfia, ába laságaruni ugánu buíti le ábunúbei tídaangiñe janígi. ²⁰ Dübü le ñíjin lubeí láburuja ílaü, ítara líña quei gürígia ja agáambubalin ugánu, ába jerésibiruni láu ugúndani, ²¹ quei márügündün lubeí buídu tídan janígi, madúrati jádan. Dánti le lachülürün dan lun joúchawagún lúma jeíbaajoún lueígiñe ugánu ligía, ába leíguadun jarüna. ²² Jíyu le ñíjin lubeí láburuja ílaü, ítara líña quei gürígia ja agáambubalin ugánu, weíritimaati jafúudun luágu cátei le lánina ibágari le, ába leyéeduniña irísini. Sun le, ába láfaruni ugánu tídaangiñe janígi, mígiruntiti lun lalúbajoún jádan gürígia jagía. ²³ Múa buíti le ñíjin lubeí láburuja ílaü, ítara líña quei gürígia ja agáambubalin ugánu, ába gunfaráanda jamáni, ába jíchugun ában alúbajoúni buiti. Añájein, ítara jáña quei ílaü le íchugubei san águu luágu ában, jíbiri quei le íchugubei ürüwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

24 Ábaya líchuguni Jesúsu jémpulu le joun.

—Arúejani le lánina siélu, ítara líña quei ában wügüri le ábunagubei ílaü buíti lídan lufúlasun, ²⁵ dan añája lan sun ja ñíbaña arúmuga, ába lebélurun ában lágani labúreme fulásu ligía, ába lábunun jíduru wuríbati labádinagua türígu, ába lídin. ²⁶ Dan le laweínamudun türígu ába legélewejan, ába gíñe lachülaagun jíduru wuríbati. ²⁷ Ába joúdin músu, ába jaríñagun lun jayúbudiri. “Wayúbudiri, ánjein buídu lubeí ílaü le bábunagubei bumúanrugu, ¿jalíagiñésan lasálira jíduru wuríbati le?” ²⁸ Ába laríñagun iyúbudiri joun. “Ladüga ában ágani le.” Ábati jaríñagun músu lun. “¿Buséntibu lun wájulajani jíduru wuríbati le?” ²⁹ Ába laríñagun joun. “Uá, ladüga dánme jájulajani jíduru wuríbati, julá jiñein lin gíñe türígu úara lúma. ³⁰ Ígiragubei jumeí lun laweínamudun úara daríme lidáani alúbajani, ábame naríñagun joun ñadágimeintiña lun jájulajani jíduru wuríbati furúmiñe, ábame jagüraguni lun lágudúniwa, lárigiñeme, ábame jareíduni türígu tídan lágei.”

Jémpulu luáguti tília mostása

(Mr 4.30-32; Lc 13.18-19)

31 Rúlumuti gíñe Jesúsu jémpulu le joun.

—Ítara líña arúejani lánina siélu quei ában tíla mostása le lábunubei ában wügüri lufúlasunrugu.³² Tíla mostása, ligía ílaü ñüraütimaabei lídaangiñe sun ílaü, áni dan laboúchun, ligía weíritimaabei lídaangiñe sun nádü, ába liábin lun ábanbei lan wéwe weíriti darí lun jayábin dunúru adüga jádibu luágu lilímun.

Jémpulu luáguti ísi

(Lc 13.20-21)

³³ Rúlumuti gíñe jémpulu le joun.

—Ítara líña arúejani le lánina siélu quei ísi le tagúbudubei ában würi tídan ürüwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le

(Mr 4.33-34)

³⁴ Láu jémpulu laríñagei Jesúsu sun cátei le joun gürígia, maríñagunti ni cáta joun mayúsurunga jémpulu.³⁵ Sun cátei le, lun lagúñfulirun le laríñagubeí meja Búngiu liyúmulugugiñe proféta.

Nadímurejaba láu jémpulu jun,
nafúnraanguagüdübei cátei lé buri meja arámudaguabei jun
lúmagiñe nadügni uboú.

Lafúnraanguagüdüni Jesúsu jémpulu le luáguti jíduru wuríbati labádinagua türígu

³⁶ Ába loúnajaniña Jesúsu gürígia jábiñoun, ába lebélurun múnadoun, ába jayábin láni disípulugu, ába jaríñagun lun.

—Furáanguagüdabeí jémpulu le luáguti jíduru wuríbati woun.

³⁷ Ába laríñagun Jesúsu joun.

—Áu le Wügüri Garaüwarügti, áu le ábunagubalin ílaü buíti,³⁸ múa, ligía uboúbei, ílaü buíti, jagía gürígia ja lílana larúejian Búngiu, jíduru wuríbati, jagía gürígia ja lánigu Máfia,³⁹ áganiti le ábunubalin jíduru wuríbati, Máfia méme, alúbajani, ligía lagúmuchunbei uboú, ja alúbajabaña, ánjeligu.⁴⁰ Ítara quei labúdajoúniwa jíduru wuríbati ába lágorún wáturugun lun lágidun, ítara lúba gíñe lasúseredun dánme lagúmuchun uboú,⁴¹ áu le Wügüri Garaüwarügti, noúnajabaña náni ánjeligu aságaraña sun ja afígoungüdübaña ámu, jáma ja adügübaña wuríbati, lídaangiñe narúejian,⁴² ábame jácharaguniña lídoun wátu geméti lánina máfiougati. Ábame jayájuajan ñi, ábame lacünrinjan jári.⁴³ Jámeti adügübalin le lubeíbei Búngiu, ábame jámiridun quei wéyu lídan larúejian Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irísini le arámudúañubei

⁴⁴ 'Ítara líña arúejani le lánina siélu quei irísini le arámudúañubei lábugiñe múa. Ladárirei ában wügüri irísini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérla le weírabei ebégi

⁴⁵ 'Ítara líña gíñe arúejani le lánina siélu quei ában alúgurajati le eibugañajabeí áluaja pérla fínuti, ⁴⁶ dánti ladárirun ában le weíriti lebégi, ába lídin, ába lalúguruni sun le lúmabei, ába lagáñijani pérla ligía.

Jémpulu tuáguti séni

⁴⁷ 'Ítara líña gíñe arúejani le lánina siélu quei ában séni to agurúboun baránaja, ába tañúgun sun jawúyeri úduraü. ⁴⁸ Dan tabuínchun, ába jacháwarunun esénijatiña lárunk béya, ába jañúurun ñi anúadajaña úduraü, ába jareíduniña ja buídubaña, ába jachágaruniña ja wuríbabaaña. ⁴⁹ Ítara lúba dánme lagúmuchun uboú, jayábiba ánjeligu lun jafánreinruniña ja buídubaña jádaangiñe ja wuríbabaaña. ⁵⁰ Ábame jádaruniña ja wuríbabaaña lídoun wátu geméti lánina máfiougati, ñíba lubeí jayájuaja, acúnrijame jári.

Irísini buri iséri lúma binádu

⁵¹ Ábati lálügündüniña Jesúsu, laríñaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísin lun líchuguni joun títana lúban dan le jemégeiruni, queígubeirügü, gayáraati larúfudajan joun gürígia luágu lilúrudun Moisés lúma gíñe luágu cátei le narúfudajabeí, áu le Jesúsu.

Jesúsu lídan fulásu le gíríbei Nazarét

(*Mr 6.1-6; Lc 4.16-30*)

⁵³ Dan lagúmuchunbei líchuguni Jesúsu jémpulu buri le, ába lídin ñígiñe, ⁵⁴ ába lachülürün lageíroun. Ába lagúmeserun arúfudaja tídan jalígilisin juríu to lídaanboun fulásu ligía, ába laweíridun janígi gürígia, ába jaríñagun.

—¿Jalíasan lafúnrendeirei wügüri le sun lichú áu le? ¿Ída liñásan gayára láani miláguru buri le adüga? ⁵⁵ Liraüga saráfangei le, María lúguchuboun, líbugaña Jacóbo, José, Simón

lúma Júdas,⁵⁶ ya gíñe jagánawa lamúlenu jáma lítunu wádan.
¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába laríñagun Jesúsu joun.

—Sun gürígia jínsiñeti ában proféta joun, mámarügaali ligía lídaangiñeti fulásu le ñí jabeí o títana lan jában.

⁵⁸ Madügüntiti sarágu miláguru ñi ladüga mafíñen jamá luágu.

*Loúnwen Juan le abásteragüdajabei
(Mr 6.14-29; Lc 9.7-9)*

14

¹ Lídan dan ligía, ába lagáambun Heródes, le gumándan lídan fulásu le gíribei Galiléa, luágu Jesúsu,² ába laríñagun joun ja lúmabaña.

—Juan le abásteragüdajabei le, sará jádaangiñe jiláaña, ligía gabáfu lubeí lun ladáagun miláguru.

³ Lé meja suséreelibei, daülmuti meja Heródes Juan, ába lagüraguágüdüni láu güríngüri tueígiñe Heródias tó meja lúmari Felípe, le lamúlen. ⁴ Aríñagaalí meja Juan lun Heródes luágu moun láni lagámaridunun lúmari lamúlen, madügünti Heródes gásu láu.

⁵ Busénti yebéti Heródes láfaruni Juan jilágubei, ladüga lanúfude jaweí gürígia, madügun lumúti ladüga sun lan gürígia afíñetiña luágu proféta lan Juan. ⁶ Dánti le efédujani luágu lagúncularun Heródes irúmu, ába tiábin tiraü Heródias, ába tabínajan jagíbugiñe amísurajoútiña, léti línsiñe tabínajan lun Heródes, ⁷ ába laríñagun tun láu fiñún luágu líchugubei lan furúmieguarügü cátei le tamúriaian lúma tun. ⁸ Ábati taríñagun túguchu tun lun tamúriaian lábulugu Juan le abáste jilágubei, ladüga, lun jichuguni tun lídan ában asíedu, ába tamúriaian lúma ítara.

⁹ Ába lírudagun Heródes lueígiñe cátei le, quei aríñaga láali lan láu fiñún, agáamba jameí amísurajoútiña, ába laríñagun lun líchugúniwa tun. ¹⁰ Ábati laríñagun lun ladürürüniwa lábulugu Juan furísunrugu,¹¹ ába janügüni lídan ában asíedu, ába líchugúniwa tun irájü tuguya, ába tíchuguni tun túguchu.

¹² Ábati jayábin l-íñagun tun láu fiñún luágu lanigu Juan, ába janügüni lúgubu, ába jábununi, lárigiñe, ába joúdin awísarei Jesúsu.

*Líchugun Jesúsu eígini joun seíngü mílu wügüriña
(Mr 6.30-44; Lc 9.10-17; Jn 6.1-14)*

¹³ Dan lagáambuni Jesúsu cátei le, ába lídin ñígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni gürígia, ába jáfuridun lídaangiñé buri aüdü,

ába joúdin lárigi, eíbu. ¹⁴ Dan larárirun Jesúsu tídaangiñe ugúnein, ába laríjin luágu sarágu jaña lan gürígia jagía, ába jagúdemedagun lun, ába lareídaguagüdüniña ja sándibaña jádan. ¹⁵ Queíti agúñedeinaali lubeí, ába jaríñagun láni Jesúsu disípulugu lun.

—Dárüjalitia áni úatiña gürígia aganoútiña lídan fulásu le. Oúnaja báña gürígia ja, ñüdün jamámuga lídoun buri lirájüñü fulásu yaráfa agáñija eígini lun jeígin.

¹⁶ Ába laríñagun Jesúsu joun.

—Mídinbaña, rújuma eígini joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsu joun.

—Barüjumoun nun ñájoun.

¹⁹ Ába laríñagun joun gürígia lun jañúurun luágu jíduru. Ába lanügünun seíngü fein jáma bián úduraü jagia lújaburugu, ába laríjin siélun, ába leteíngiruni Búngiu tuágu. Ábatí lagúbachagunun fein, ába líchugunun joun láni irun Jesúsu tídaangíñe ugúneidisípulugu, ába jafánreinjanun jádan gürígia. ²⁰ Sun jagía joútiña quimúle, lárigiñe, ába jabuínchagüdüün dúusu faníñe táo to ígiragutu. ²¹ Seíngüñhanu mílu wügüriña eígitíña, mabájüdünga würiñña jáma irájüñü.

Leíbugun Jesúsu ligíbuagu dúna

(*Mr 6.45-52; Jn 6.16-21*)

²² Ába loúnajaniña Jesúsu láni disípulugu lubá tídan ugúnein tuguya lun jánniñuragun loubáfurugun sun niján lan oúnajaña gürígia águyu. ²³ Lásun loúnajaniña, ába laweínrunt lábugua luágun wübü ayúmuragua lun Búngiu. Dan le lagúñedunbei, ñíñein Jesúsu lábugua, ²⁴ sun núnguran tan ugúnein lamídan dúna. Ába láfarajan lugúdi barána tuágu ugúnein ladüga tubárouñein lan garábali. ²⁵ Ába liábin Jesúsu jawágun lubá larúgan, eíbugeina ligíbuagu dúna. ²⁶ Dan jaríjini láni disípulugu eíbugeina ligíbuagu dúna, ába janúfudedagun, ába jagúaragun láu anúfudei.

—¡Úfiaü!

²⁷ Ába ladímurejan Jesúsu joun, ába laríñagun joun.

—¡Ragüjuma anígi, áu le, manúfudededa jumá!

²⁸ Ába laríñagun Pédro lun.

—Nabúreme, áanjein amürü lubeí, eíbugagüda bána gíñe ligíbuagu dúna chülü le ñí bubei.

²⁹ Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna.³⁰ Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

³¹ Ába lárügündüni Jesúsu lújabu, ába laríñagun lun.

—¡Loúguati gíñe bafíñen! ¿Ca uágu laloúguada bafíñen?

³² Dan jádinun tídoun ugúnein, ába lagálumadun garábali.

³³ Játí buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraü ban Búngiu.

Lareídaguagüdünbaliña Jesúsu sánditiña Genésaret

(Mr 6.53-56)

³⁴ Ába jánjiñuraguni dúna, ába jachülürün Genésaret.

³⁵ Dan le jíchugunbei lílana fulásu fe luágu Jesúsu lan, ába jabúruchaguagüdüní lídan sun fulásu ligía, ába janügünüña sun sánditiña le ñíjin lubeí.³⁶ Ába jayúmuragun lun lun lígirun lúnrügü jagúuruni táru lanáangun, sun ja agúurubarun, areídaguátiña.

15

Cátei le marúmadagüdünbaliña gürígia ligíbugiñe Búngiu

(Mr 7.1-23)

¹ Ába jayábin fiú fariséogu jáma arúfudajatiña lilúrudun Moisés, ñübintiña ubúrugugiñe Jerusalén lúmoun Jesúsu, ába jaríñagun lun.

² —¿Ánsan jájalachagunbalin báni disípulugu binádu jagáburi weíyaaña mútu? Magúnfuliruntiña láu lachibúniwa újabu lubá eígini, según wagáburi.

³ Ába laríñagun Jesúsu joun.

—¿Ánti gíñe jájalachagunbalin lerérun Búngiu lun jafálaruni binádu jigáburi?⁴ Laríñajare Búngiu. “Inébe jamá bagübürigu bun, le anábagubaliña lagübürigu, jilála.”⁵ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchi. “Siñáti níderagunibu ladüga sun le númabei, aríñagaadina luágu lun lan níchuguni lun Búngiu”,⁶ luágu furúmiegarügü lan le aríñaguti ítara, mámaali lan lúnti líderaguniña lagübürigu. Láu lira mebégigüda jumáali lagúmadijan Búngiu lun jafálaruni binádu jigáburi.⁷ ¡Biángua tigíbu jugúya le! Linárün proféta Isaías laríñagunbei juágu ítara.

⁸ Jayumárrurügü gürígia ja jíchiga inébesei nun, líña Búngiu, áanjein tídan janígi, mebéresentiña náu.

⁹ Málati jájuduragun nun,

ladüga le rügüñein jagúmadijan wügüriña jarufudaja.

¹⁰ Ábati lagúarun joun gürígia, ába laríñagun joun.

—Agáamba jumá, gunfaráanda jugúyame. ¹¹ Máma eígini le leígubei gürígia adügübalin lun marúman lan ligíbugiñe Búngiu, dimúrei wuríbati le laríñagubei wügüri, ligía adügübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggú wuríba lan láburujan dimúrei le baríñagubei joun fariséogu?

¹³ Ába laríñagun joun.

—Furúmieguarügü nádü to máma lábunun Núguchi Búngiu le siélubei, lájulúba láu sun lílagüle. ¹⁴ Ígira jumáña, maríjintiña ja adúndejatiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵ Ábati laríñagun Pédro lun Jesúsu.

—Furáangugüdabeí jémpulu le woun.

¹⁶ Ába laríñagun Jesúsu.

—¿Úati gíñe gunfaráanda jumá? ¹⁷ ¿Úati gunfaráanda jumá luágú sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu? ¹⁸ Ánjein dimúrei le áfuridubei lídaangiñe iyúmaü, tídaangiñe anígi liábin, ligíati adügübalin wügüri lun marúman lan ligíbugiñe Búngiu, ¹⁹ ladüga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu. ²⁰ Ligía buri cátei le adügübalin wügüri lun marúman lan, ánjeinti leigíniwa machibúnga újabu según jagáburi juríu marúmadagüdün lumúti ligíbugiñe Búngiu.

Ában würi teréncha to afiñeruboun luágú Jesúsu

(Mr 7.24-30)

²¹ Ába láfuridun Jesúsu ñígiñe, ába lídin lídoun buri fulásu geyéguá láu fulásu le Tíro lúma Sidón. ²² Ñíñoun ában würi jádaangiñetu Cananítagu aganoúti lídan fulásu ligía, ába tiábin luágún Jesúsu agúarajeina.

—¡Nabúreme, ladügawagun Davíd, gudémená bun! Níjein ában espíritu wuríbati tuágú nisáani, weíriti tasúfurirun lurúma.

²³ Moúnabun lumútu Jesúsu. Ábati jayábin disípulugu, ába jayúmuragun lun, ába jaríñagun.

—Adügabeí le tamúriajabei búma, ladüga nuteíntia agúarajeina wárigi.

²⁴ Ába laríñagun Jesúsu.

—Joún rügüñein gürígia féridijaña ja Israelítagu loúnajana Búngiu lun níderaguniña.

25 Ába tiábin würi tugúya, ába tájuduragun ligíbugiñe, ába taríñagun.

—¡Nabúreme, íderagua bána!

26 Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein javeí isáanigu lun tichugúniwa joun oúnli.

27 Ába taríñagun.

—Ánja, Nabúreme, láu sun líra, gayáraati jeígini oúnli ífei le áburujati lueígiñe jadábulan jabúriña.

28 Ábati laríñagun Jesúsu tun.

—Würi, ¡weíriti gíñe bafíñen! Susérelá le babúseerubei. Lúmagiñe óra ligía, ába tareídagun tísáani.

Lareídaguagüdün Jesúsu sarágú sánditiña

29 Ába láfuridun Jesúsu ñígíñe, ába lachülürün lárun dúna Galiléa, lárigiñe, ába laweínrun luágun ában wübü, ába lañúrun ñi. 30 Ába jayábin sarágu gürígia le ñíjin lubeí barüína jagía meíbuguntiña, maríjintiña, maríñaguntiña, danímaati jarüna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídaguagüduniña. 31 Ába laweíridun janígi gürígia láu jaríjin adímurejaña jamá já meja maríñagadibaña, areídagua ja danímaabaña arüna, eíbuga ja meíbuguñajabaña, aríja ja maríjiñajabaña. Ába jagúmeserun adímureja weírigu luágu Jabúngiute Israelítagu.

Líchugun Jesúsu eígini joun gádürü mílu wügüriña

(Mr 8.1-10)

32 Ábati lagúarun Jesúsu joun láni disípulugu, ába laríñagun joun.

—Gudémetiña gürígia ja nun ladüga ürüwaali wéyu jáu núma ya áni úaali ni cáta jáma lun jeígin. Mabúseeruntina noúnajaniña jábiñoun meíginga, dagá líñein falálaü jawágu ümada.

33 Ábati jaríñagun láni disípulugu lun.

—¿Ída lubáti wadárirun eígini joun sarágu gürígia ya lídan fulásu le ñí lumuti úa jamá aganoútiña?

34 Ába lálügüduniña Jesúsu.

—¿Átiriñoun fein júma?

Ába jaríñagun.

—Sédü, jáma biánraü úduraü.

35 Ába laríñagun joun gürígia lun jañúrun múarugu,

36 ába lanügünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun

gürígia.³⁷ Joútiña súngubei quimúle, buíngüda gíñe sédu faníñe túu to ígiraguboun.³⁸ ¡Gádürüñanu mílu wügüriña eígitiña, mabájüdüngä würíña jáma irájüñü!³⁹ Lárigiñe, ába loúnajaniña Jesúsu gürígia águyu, ába ládinun tídoun ugúnein, ába lídin loúbawagun Mágdala.

16

*Jamúria jan fariséogu jáma saduséogu ában seíni le láuti miláguru
(Mr 8.11-13; Lc 12.54-56)*

¹ Ába joúdin fariséogu jáma saduséogu aríjei Jesúsu. Lun jáburugüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, afíñe jamámuga luágu lúmagiñe lan Búngiu liábin.² Ába laríñagun joun.

—Rábounwéyu, ába jaríñagun. “Buídubei dan ladüga funáti siélu.”³ Bináafin, ába jaríñagun. “Wuríbabéi dan ugúñe ladüga funáñu líñia siélu áni jamúñounga.” ¡Biángua tigíbu jugúya le! Subúditi luáguti ligáburi dan jun, áni ibídiñeti jun luágu chülüjali lan lidáani asálbaruni.⁴ Gürígia wuríbatiña, múaraantiña ja, amúriajatiña seíni láuti miláguru lun jafíñerun luágu áu lan anügübei asálbaruni joun gürígia. Wel, marúfudúnbei ámu seíni joun lueí liseíni Jonás.

Ába lígiruniña, ába lídin.

*Ítara líñia jarúfudajan fariséogu quei ísi
(Mr 8.14-21)*

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janügün fein.⁶ Ábatí laríñagun Jesúsu joun.

—Toúnigigua jumátia júngua lueí jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladügatia manügün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Loúguati gíñe jafíñen!⁹ ¿Úagili gunfaráanda jumá, marítagun jugúya tuágu seíngü fein to nafánreinjaboun jádan seíngü mílu wügüriña lúma átiriñein lan faníñe túu ígiragutu?¹⁰ ¿Bulíeiguatün funásan tuágu sédu fein to nafánreinjaboun jádan gádürü mílu wügüriña lúma átiriñein lan faníñe túu ígiragutu?¹¹ ¿Ida liñági meféen jubeí luágu máma lan tuágu fein nadímureja dan le naríñagunbei jun lun joúnigiragun júngua lueí jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, lueí lan arúfudajaní le jáni fariséogu jáma saduséogu lawéridiraña.

*Laríñaguni Pédro luágú Jesúsu lan Crístubei
(Mr 8.27-30; Lc 9.18-21)*

¹³ Dan le lachülürün Jesúsu ubúruju Cesárea le Filípo ába lálügündüniña láni disípulugu.

—¿Cátanasan lídan jarítagun gürígia, áu le Wügüri Garaüwarügüti?

¹⁴ Ába laríñagun.

—Añájein aríñagutiña luágú Juan lan lé meja abásteragüdajabe amürü, jíbiri aríñaga luágú Elías ban, añájeingua aríñagutiña luágú Jeremías ban o ámu lan proféta.

¹⁵ Ábati laríñagun joun.

—Ánti juguya, ¿cátanati lídan jarítagun?

¹⁶ Ába laríñagun Simón Pédro lun.

—Crístu le Liraü Búngiu le wínwanbei amürü, le ñübinbei asálbaraña gürígia uboúagu.

¹⁷ Ába laríñagun Jesúsu lun.

—Fuleíseiwatibu Simón, liraü Jonás, ladüga máma lasúbudirágüdün ni ába gürígia cátei le bun, lasúbudirágüdün Núguchi Búngiu le siélubei bun. ¹⁸ Naríñajare bun luágú Pédro lan amürü, líla íri ligía, “dübü”, luáguba ébuu le nábunaguoun nilígilisin, áni ni íbini oúweni mabáfubei tuágú. ¹⁹ Níchugubei ligélen arúejani le lánina siélu bun, le cátei le uáguti baríñaga luágú moun lan jadügünü afíñetiña, ligía gíñe uágubei laríñaga Búngiu luágú siñá lan ladügünüwa, le cátei le uáguti baríñaga luágú gayára lan ladügünüwa, ligía gíñe le uágubei laríñaga Búngiu luágú gayára lan ladügünüwa.

²⁰ Ábati laríñagun Jesúsu joun láni disípulugu lun mariñagun jamá ni ca un luágú ligía lan Crístubei.

*Ladímuréjan Jesúsu luágú loúnwén
(Mr 8.31-9.1; Lc 9.22-27)*

²¹ Lúmagíñe dan ligía, ába lagúmeserun Jesúsu aríñaga joun láni disípulugu furáangu luágú lúnti lan lídin Jerusalén, luágú gíñe jasúfuriragüdubei lan wügüríña weírigutiña lídan jafíñen juríu, jáma jábutigu jafádirigun juríu, jáma arúfudajatiña lilúrudun Moisés. Aríñagati joun luágú láfarúba lan jilágubei, áni lásaaruba lan luágú lürüwan wéyu. ²² Ába ladíñurun Pédro láu Jesúsu ñígiñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáraragun Jesúsu, ába laríñagun lun Pédro.

—¡Dísebá nueí, Máfia! Babúseerúña beréderuni ladügünüwa lugúndan Búngiu. Masáminaruntibu quei Búngiu, basáminarun quei wügüri.

²⁴ Ábati laríñagun Jesúsu joun láni disípulugu.

—Le busénti lafálarunina, bulíeileí cáteiñen lan, awándaleí sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálana. ²⁵ Ladüga le abúseeruti leséfuragun lúngua ya uboúagu lefériderubei ibágari le magúmuchaditi, ánjein le ánjabei leférideruni libágari ya uboúagu nueígiñe, libíjubei ibágari le magúmuchaditi siélu. ²⁶ ¿Cági ju lan lun gürígia lagáñeiruni sun le lánina uboú le, lefériderime lubára siélu? Úati ni cáta lánina uboú le áuti gayára lan lagáñijan gürígia ubáraü siélu. ²⁷ Nagíribuduba, áu le Wügüri Garaüwarügüti, úara jáma náni ánjeligu, niábinba láu uweíriguni le meme láni Núguchi. Ábameti nafáyeiruniña gürígia quei ligáburi le adüga jamáalibe. ²⁸ Ninárün jáu luágu añájein lan jádaangiñe ja yábaña guetó, moúnwenbaña daríme jaríjini liábin narúeijan, áu le Wügüri Garaüwarügüti.

17

Lámuñedagun larijín Jesúsu

(*Mr 9.2-13; Lc 9.28-36*)

¹ Sísi wéyu lárigiñe, ába lanügüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wübü íñuti, jagía rügüñanu ñi. ² Ába lámuñedagun larijín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³ Sódini ába jaríjini Moisés lúma Elías (já meja abágaridubaña lídan dan le sügüjalibe) ayánuja lúma Jesúsu. ⁴ Ába laríñagun Pédro lun Jesúsu.

—Nabúreme, ¡lidan dan awánja lan ya! Ánjabu busén, adüga wagíame ürüwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába loúburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraü le jínsiñebi nun, le aúbei oúnwenbun lan nugúndan, adüga jumeí le lubeíbei.

⁶ Dan jagáambuni disípulugu, ába jabúluchagun láu jagíbu mýarugu le luweírin janúfude. ⁷ Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸ Dan le jaríjinbei, maríjinjaña ámu lueídügü Jesúsu.

⁹ Dan le arárireina jamáni wübü, ába laríñagun Jesúsu joun.

—Mabájudagua jumeítia cátei le aríja jumáalibeí lun ni ában daríme saráadina, áu le Wügüri Garaüwarügüti, lídaangiñe oúweni lúnya nabágaridun.

¹⁰ Ábati jaríñagun disípulugu lun Jesúsu.

—Guetó subúdi wamáali luágú amürü lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágú lúnti lan liábin Elías lubáragiñe liábin Crístu?

¹¹ Ába laríñagun Jesúsu joun.

—Inárüni luágú liábinba lan Elías, ábame líchugun sun cátei lídoun lubúdubu, ¹² áni naríñajare jun luágú ñübinjali lan Elías, masúbudirun jamúti gürígia, adügarügü jamúti sun le jabúseerubei láu. Ítara lúba gíñe jasúfuriragüdünina, áu le Wügüri Garaüwarügti.

¹³ Ábati jasúbudiruni disípulugu luágú Juan lan lé meja abásteragüdajabe, ligía lan Elíasbei le uágubei ladímureja Jesúsu.

Lareídagüdün Jesúsu ában irájü goúwejaditi

(*Mr 9.14-29; Lc 9.37-43*)

¹⁴ Dan le jachülüürünbei le ñíjin jabeí gürígia, ába liábin ában wügüri lúmoun Jesúsu, ába lájuduragun ligíbugiñe, ába laríñagun lun.

¹⁵ —Nabúreme, gudémelá nisáani bun, goúwejaditi, weírititi lasúfurirun, níjein dan jeíguati wáturugun, níjein dan dúnarugun.

¹⁶ Barü numuti ñajoun joun báni disípulugu, siñá jamuti areídagüda.

¹⁷ Ába loúnabun Jesúsu.

—¡Gürígia mafíñeraditiña, gürígia wuríbatiña! ¿Átiribeísan dan lun neréderuni júma lubá gayára lan jafíñerun nuágú? ¿Ídame lagúmucha mafíñeni le jídaanbei? Barüjumei irájü ligía ñajoun.

¹⁸ Ábati ladeínjan Jesúsu lun espíritu wuríbati ligía, ába láfuridagüduni lídaangiñe lúmagiñe óra ligía, ába lareídagun irájü le.

¹⁹ Lárigiñe, ába jadímurejan disípulugu lúma Jesúsu jábugua, ába jálögüduni.

—¿Cásan uágu siñá wabalin espíritu wuríbati ligía aságara?

²⁰ Ába laríñagun Jesúsu joun.

—Ladüga liloúguan jafíñen. Ninárün jáu luágú ánjein lan ibíja jubeí fe íbini ñüraüraü lan quei ában tágu mostása, jaríñaguba lun wübü le. “Gidába yágiñe, beíba lídoun ámu fulásu”, ábame lagídarun wübü ligía. Úabei ni cáta jásiñerun ánjein ibíja jubeí fe le tímatimaati. ²¹ Ánjeinti jíbe espíritugu ja, láu rügüñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágú loúnwen

(*Mr 9.30-32; Lc 9.43-45*)

²² Dan le eíbugeina jamá úara loúbawagu Galiléa, ába laríñagun Jesúsu joun luágú ledéregerúaba lan, ligía le Wügüri Garaüwarügti, jájaburugun wügüriña wuríbatiña, ²³ ábame

jáfaruni jilágubei, áni lásaaruba lan lídaangiñe oúweni luágu lürüwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachülürün Jesúsu jáma láni disípulugu Capernaúm, ába joúdin ja agúburajabalín tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába loúnabun Pédro, ába laríñagun lun.

—Afáyeijati.

Dánti lebélurun Pédro múnadoun, ába lálügündüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina uboú le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubeíti jafáyeijan, áu le Liraü Búngiu, moún lumuti nafáyeijan tiseínsuna lúban Núguchi. ²⁷ Lun magáñidagüdün wamá ni ában, beíba, ábame bachürunun bürünjüre dúnarugun, ábame badígini furúmiñeti úduraü le eígití bun. Badáriruba ában seínsu liyúmulugu úduraü ligía, buídurügübei lun bafáyeijan wawoúgua láu, ábame bafáyeiruni.

18

¿Cáteisan weírigutimaabei lídan larúeijan Búngiu?

(Mr 9.33-37; Lc 9.46-48)

¹ Lídan dan ligía, ába jayábin disípulugu lúmoun Jesúsu, ába jálugüdüni.

—¿Cáteisan weírigutimaabei lídan larúeijan Búngiu?

² Ába lanügün Jesúsu ában irájü, ába líchuguni jamídan jámagua, ³ ába laríñagun.

—Ninárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu. ⁴ Ítara líña lubeíti, le ñüraüti lanáangun língua, ñübin ligía lun ítarabei lan quei ában irájü, ligía weírigutimaabei lídan arúeijani le lánina siélu. ⁵ Gürígia gíñe le erésibiruti ában irájü lídan níri resíbi lumúttina gíñe.

Luríban lafígoungüdüniwa ában gürígia

(Mr 9.42-48; Lc 17.1-2)

⁶ ‘Furúmieguarügü le afígoungüdüti ában jádaangiñe ja isérígiñabaña lídan jafíñen nuágu, buítimaati jamúga lun lun lagurúniwa baránajoún láu ában oúnwenbun dübü le amúligülei

güráñu luágu ligíina sügü láu ladügüni cátei líra. ⁷ ¡Wuríbati lun uboú, níjein lán buri cátei le afígoungüdübaliña gürígia! Súnwandan ñíbei lan, áni ¡fugiábu le wügüri le lébunabei!

⁸ ‘Ligía ánjein lubeí lafigoungüdübadi bu lubeí bújabu o bugúdi lan, dürübei, fíbei díse buáriua, buítimaati lun bebélurun siélun májabuga o magúdiga, sügü láu badarún láu biángubei bújabu lúma biángubei bugúdi máfiougatin le ñí lubei wátu le méñeguchadibei. ⁹ Ánjein bágu lubeí afígoungüdübadi bu, sagábei, fíbei díse buáriua, buítimaati lun bebélurun siélun máguga sügü láu badarún láu biángubei bágu máfiougatin.

*Jémpulu tuáguti mudún to eférideruboun
(Lc 15.3-7)*

¹⁰ ‘Manüga jumá ni ában jádaangiñe ja ünabugububaña ja quei ni cáta. Naríñajare jun luágu ligíbugiñeñanu lan Núguchi Búngiu le siélubei ánjeligu ja aríjubaña jáu afíñetiña ja súnwandan. ¹¹ Ladüga asálbarei le féridijalibe yebe niábin, áu le Wügüri Garaüwarügüti.

¹² ‘¿Ída líña jaríjin lun? Ánjein añájein lubeí san mudún lúma ában wügüri, teféridira ában jádaangiñe, ¿ma lígirubaña jíbiri luágu wübü, ábame lídin álauajoun to ayúridaguboun? ¹³ Ánjounti ladárira, choúruti luágu gúndaabei lan táu sügü jáu ja mayúridagunbaña. ¹⁴ Ítara líña giñéti, mabúseerunti Júguchi Búngiu le siélubei lun leféridirun ni ában jádaangiñe ünabugutiña ja.

*Ligáburi ferúdunawa jamá idújeñu lueígiñe Jesucristu
(Lc 17.3)*

¹⁵ ‘Ánjein adüga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adüga gásu báu, gamádaguyáadün. ¹⁶ Ánjein madügün gásu báu, ábame banügün ában o bián gürígia jánwoun lun sun lan le aríñawagúti, añájein jamámuga ámu geféentiña luágu. ¹⁷ Ánjein madügün gásu jáu, ábame baríñaguni lun jadámurin afíñetiña, ánjein madügün gásu láu adámurini, ábame banügün quei ában mafíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburi.

¹⁸ ‘Ninárün jáu luágu le lan cátei le uáguti jaríñaga jugúya disípulugu luágu moun lan jadügüni afíñetiña, ligía gíñe uágubei laríñaga Búngiu luágu siñá lan ladügüniwa, le cátei le uágubei jaríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

¹⁹ ‘Naríñajare gíñe jun luágu ánjaña lan úarada biáma jidaangiñe ya uboúagu lun jamúriajan ában cátei lúma Búngiu le

siélubei, líchugubei jun, ²⁰ ladüga le ñí jamuti biáma o ürüwa oúndaragu lídan níri, anájein ñí jamídaangua.

²¹ Ába layárafadun Pédro lun Jesúsu, ába laríñagun lun.

—Nabúreme, ¿átiribeísan weíyaasu ladügün nibíri ában wuríbani nun lun ferúduna méme náani? Darí sédu weíyaasu?

²² Ába laríñagun Jesúsu lun.

—Maríñaguntina bun luágu darí lan sédu weíyaasu lúnti ferúduna báani, darí ürüwa-wein-díisi weíyaasu sédu.

Jémpulu luáguti móusu le májabei ferúduna lan

²³ ‘Ligía ítara líña lubeí arúejani le lánina siélu quei ában urúei le ñübinbei lun laráansejan luágu seínsu jáma lumúsuniña. ²⁴ Lagúmesera adügei, ába janügün ában le adúweirubalin sarágu míñun fiádürü, ²⁵ quei maseínsun lan lun lafáyeijan, ába laríñagun urúei lun lalúgurúniwa idámunime táu sun lúmari, lirajüñü, lúma sun le lúmabei lun lafáyeiruni ladúweijan. ²⁶ Ába lájuduragun móusu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” ²⁷ Ába lagúdemedagun lun urúei, ába ferúduna láani ladúweiruni, ába lígiragüdüni. ²⁸ Quei láfuridun móusu ligía ñígíñe, ítara ladúnragun lúma ában móusu líledi le adúweirubalin átiri fiádürü. Ába lárügüdüni lueígiñe ligíina, ába lagúmeserun achócurei, ába laríñagun lun. “Fáyeibeí le badúweirubalina.” ²⁹ Ábatí lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” ³⁰ Májati le ában, ñüdünrügü ligía ába ládaruni furísunrugun darí lafáyeiruni ladúweijan. ³¹ Dan le jaríjinbaalin ja jíbiri móusu cátei le, ába lagáridun joun sarágu, ába joúdin, ába jabájüdaguni lun urúei. ³² Ába loúnajan urúei oúgei, ába laríñagun lun. “¡Móusu wuríbati! Ferúduna numúti sun badúweijan ladüga bayúmuragun nun. ³³ Lúnti yebe gíñe gudéme lan boúba bun quei bagúdemedun nun.” ³⁴ Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesúsu aríñageina.

—Ítara lúba gíñe ladüga Núguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

Larúfudajan Jesúsu libülgürü ígiraguni (Mr 10.1-12; Lc 16.18)

¹ Lárigiñe laríñaguni Jesúsu sun cátei le, ába lídin Galiléagiñe lun loúbawagun Judéa le lueígiñebei oúbaü le ñígíñe lubeí

laboúcha wéyu libíti Jordán.² Sarágu jáña gürígia afálaruti, ába lareídagüduniña sánditiña ñi.

³ Ábatí jayábin fiú fariséogu lúmoun Jesúsu áluga jáburugüdüni tídoun sádara, ába jálüğüdüni.

—¿Según barítagun, gayáraatísan lígirunun gürígia lúmari lueígiñe furúmieguarügü cátei?

⁴ Ába loúnabun Jesúsu.

—¿Malíijangidün tídan Lerérun Búngiu luágu lúmagiñe lan furúmiñeti dan, dan le ladügünbalína Búngiu gürígia, adüga lumúti wügüri, adüga würi?⁵ Aríñagati gíñe. “Ligía lígirubei lubeí wügüri lúguchi túma lúguchu lun laganoúniwa túma lúmari, ábame jeréderun quei ábanrügü.”⁶ Mámaaña lubeíti biáma, ábanrügaaña. Ligía moún lubei lafánreinraguni wügüri le ladúnraguagüdübei Búngiu.

⁷ Ábatí jálüğüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun würi lun tigirún?

⁸ Ába laríñagun Jesúsu joun.

—Ladüga tidére janígi lánjarunbei Búngiu lun jígiragun jáma júmarigu, máma líña meja furúmiñe.⁹ Naríñajare jun luágu furúmieguarügü lan le ígirutu lúmari ába lagámaridun ámu, ladügüña adultériu, mámarügaali ligía ladüga tagámaridun ligíbuagun, le gíñe agámariduti würi to ígiraguaaru, ladügüña gíñe adultériu.

¹⁰ Ábatí jaríñagun láni disípulugu lun.

—Ánjein ítara líña lubeí luáguti wügüri túma lúmari, buítimaati lubeí lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügüñanu únbaña rújali lan Búngiu ubáfu.¹² Ámuñegueinarügüti lébuna magámaridun jamá wügüriña, añájein, ítaragubeíñanu lúmagiñe jagüriajoún, jíbiri, adügüwarügüti joun, jíbiri, reídeitiña magámaridunga lun jederegeragun joúngua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü (Mr 10.13-16; Lc 18.15-17)

¹³ Ába janügüniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adeínja joun ja anáajabaliña.¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladüga ja jarúmabaña afíñe quei irájüñü, jagía lílana arúeijani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

*Ladímurejan ában wügüri ñüraügili lúma Jesúsu
(Mr 10.17-31; Lc 18.18-30)*

¹⁶ Ába lídin ában wügüri ñüraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁷ Ába laríñagun Jesúsu lun.

—¿Ca uágu baríñaga nun “buíti”? Ában rügüñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

¹⁸ Ába laríñagun wügüri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá würi gámaritu, míwerujabá, madímurejabá iyéeni luágu ni ában, ¹⁹ inébe jamá bagübürigu bun, jínsiñe jagíame gürígia bíledigu bun quei bínsiñegua búngua.

²⁰ Ába laríñagun lun.

—Gúnfuli numúti sun le lúmagiñe ñüraügidina, ¿cági ámu nemégeirubei?

²¹ Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin irísini siélu, ábameti biábin, ábame bafálarunina.

²² Dan lagáambunbalin wügüri ligía cátei le, májati, ladüga weíribalin Jesúsu cába lan ladügti lirísin, ába lídin láu íruni.

²³ Ábati laríñagun Jesúsu joun láni disípulugu.

—Ninárün jáu luágu jénreengu lan lun lebélurun ában rísite lídoun arúeijani le lánina siélu. ²⁴ Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügü láu lebélurun ában rísite lídoun arúeijani le lánina siélu.

²⁵ Dan jagáambuni disípulugu cátei le, ába laweíridun janbalin Jesúsu cába lan ladügigi sarágu, ába jálugüdagun jámagua.

—¿Cáteiti gayáraabei lasálbarun?

²⁶ Ába laríaguniña Jesúsu, ába laríñagun joun.

—Siñáti jasálbaragun gürígia joúngua, ánjein Búngiu, gayára lumúti sun cátei adüga.

²⁷ Ábati laríñagun Pédro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

²⁸ Ába laríñagun Jesúsu joun.

—Ninárün jáu luágu lidan lánme dan ligía dánme iséri lan sun cátei, dánme le nañúurun, áu le Wügüri Garaüwarügüti luágu nála yágüta siélu lun narúeijan láu sun nuweírigun, juguya le afálarubalina jañúuruba gíñe luágu dúusu jalaú lun jagúseragüduniña dúsugubei láni Israél türíbu. ²⁹ Súnti ja ígiraañábaña jában, o jamúlenu, o játunu, o jagübürigu, o jasáanigu, o jamúan, nuágu, jerésibiruba san weíyaasu lánwoun, resíbi jameíme ibágari magúmuchaditi. ³⁰ Áni sarágu jáña ja furúmiñetiñábaña guetó, jagíaba agúmujoúni, sarágu ja agúmujoúnibaña guetó, jagíaba furúmiñe.

20

Jémpulu jawáguti ñadágimeintiña

¹ Ába laríñagun Jesúsu.

—Ítara líñia arúejani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu. ² Ába ladügün darádu jáma ñadágimeintiña lun líchugun fiádürü jour luágu wéyu, ába loúnajaniña ñadágimein lichárirugu. ³ Lárigiñe, ábaya láfuridun queí buri ladaünrün néfu bináafin, ábaya ladárirun ámu wügüriña mafísiutetiña, mágidirugu. ⁴ Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” Ába joúdin. ⁵ Ábaya láfuridun amídirugu, furí ligía ladaünrün ürüwa rábounwéyu, ligía méme ladüga. ⁶ Queí buri ladaünrün seíngü rábounwéyu, ábaya lídin mágidirugu, ábaya ladárirun wügüriña mafísiutetiña ñi, ába laríñagun joun. “¿Cásan uágu yá jubei sun wéyu mawádigimariga?” ⁷ Ába jaríñagun lun. “Úagili ni ában álugutiwa.” Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” ⁸ Dan le lagúñedunbei, ába laríñagun labúreme ichári lun jábuti ñadágimeintiña. “Wába jour ñadágimeintiña, fáyei bámugaña, bagúmeserame jámagiñe ja atátilubaña agúmujoúni, bagúmuchame jáma ja atátilubaña furúmiñe.” ⁹ Ábati jayábin ja atátilubaña ñadágimein queí buri ladaünrün seíngü rábounwéyu, ába jibíjin fiádürü cáda ában. ¹⁰ Lárigiñe, dan le lachülürün jadáani ja atátilubaña furúmiñe, ába jarítagun luágu gíbetimaabei lan jabíjin. Ába gíñe jabíjin fiádürü cáda ában. ¹¹ Dan le jerésibiruni jaseínsun, ába magúndan jamá lúma labúreme ichári, ¹² ába jaríñagun. “Ja ñübinbaña agúmujoúni,

ában rügүñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísüga sun wéyu.”¹³ Ába loúnabun labúreme ichári, ába laríñagun lun ában jádaangiñe. “Numáda, máma nadügüña ni murúsun maríchaü jun. ¿Ma funági luágu ában fiádürü jadüga darádu núma?”¹⁴ Barüjumei jiseínsun, jeíba. Nafáyeiruñanu ja atátirubaña agúmujoúni quei nafáyeirunün ladüga ítara líña lan nabúseerun.¹⁵ ¿Maríchatina funági lun nadügüni le nabúseerun láu niseínsun? ¿Ódi gimúgatün ladüga nubuídun?”¹⁶ Ítara líña lubeíti, sarágu jáña ja agúmujoúnibaña guetó, jagíaba furúmiñetiña, sarágu jáña gíñe ja furúmiñetiñábaña guetó, jagíaba agúmujoúni. Ladüga sarágu jáña agúarútiña áni míbetiña anúadirútiña.

*Ladímuñrejaanya Jesúsu luágu loúnwen
(Mr 10.32-34; Lc 18.31-34)*

¹⁷ Dan le niján lan Jesúsu luágu üma lun Jerusaléoun, ába ladíñurun jáu láni dúusu disípulugu javeí ja jíbiri gürígia ja luágubaña üma úara jáma, ába laríñagun joun.

¹⁸ —Quei lubeí jaríjini, aweínreina wáña Jerusaléoun le ñíba lubeí nederegerúa, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasádirunína lun noúnwen.¹⁹ Ábame jederegerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe oúweni luágu lürüwan wéyu.

*Le tamúriajabei jáguchu Jacóbo láu Juan lúma Jesúsu
(Mr 10.35-45)*

²⁰ Ábati tiábin jáguchu Jacóbo láu Juan, ja lisáanigu Zebedeo, lúmoun Jesúsu jáu tísáanigu, ába tájuduragun lun tamúriajan ában fuleísei lúma.²¹ Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe boúnwenren, ában lueígiñe bubaüna yágüta lídan baruéijan.

²² Ába laríñagun Jesúsu joun.

—Ibídiñeti jun ca lan jamúriajabei. ¿Gayáraati jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabeí.

²³ Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, áanjeinti lun jañúurun lueígiñe

noúnwenren lúma lueígiñe nubaüna, máma áu lúnbei níchuguni, líchugúaba joun ja ubáabaña laráanserei Búngiu.

²⁴ Dan le jagáambunbalin jíbiri díisi disípulugu cátei le, ába jagáñidun jáma bián amúlenugu jagía. ²⁵ Ába lagúarun Jesúsu joun, ába laríñagun joun.

—Queísi jasúbudiruni, ja agúmadijabaña jádan ja mámabaña juríu arúfudaguatiña joúngua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ²⁷ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri ²⁸ ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu.

Lareídagüagüdün Jesúsu bián maríjintiña

(*Mr 10.46-52; Lc 18.35-43*)

²⁹ Dan le áfurideina jabeí Jesúsu jáma láni disípulugu Jericógiñe, sarágu jáñia gürígia afálaruti Jesúsu. ³⁰ Ñíñanu bián maríjintiña fiún láru üma, dan le jagáambun luágu Jesúsu lan le ásügürübei, ába jagúaragun.

—Wabúreme, ladügawagun Davíd, gudéme wamá bun!

³¹ Ába jadeínjan gürígia joun lun jámanichun, ligíatima jagúaragun.

—Wabúreme, ladügawagun Davíd, gudéme wamá bun!

³² Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadügün jun?

³³ Ába jaríñagun lun.

—Wabúreme, buséntiwa waríjin.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

21

Lebelurun Jesúsu Jerusaléoun

(*Mr 11.1-11; Lc 19.28-40; Jn 12.12-19*)

¹ Dan le yaráfaaña lubeí lun Jerusalén, ába jachülrürün ligíbugiñe fulásu le gíribei Betfajé, le ünabubei libíti wübü le Olivos, ² ába laríñagun Jesúsu joun biáma jádaangiñe láni disípulugu.

—Jeíba lídan liraüraü fulásu le wagíbugiñebei, jadáriruba ában burígü güránu ñi láu ában liraüraü burígü túma, ábame jafáragaduniña, ábame janügüniña nun. ³ Ánjein ñi adímurejati

jun lueígiñe jadügüni, ábame jaríñagun lun luágu busén lániña Jesúsu, luágu láguyugüdübaña lan.

⁴ Lasúseredunbei líra lun lagúnfulirun lé meja laríñagubei proféta dan le labürüjanbei ítara.

⁵ Aríñaga jumá lun ubúrugu Sión.

“Niteín Burúeite bun láu ünabuni,
waríñu lanágawagu ában burígü,
waríñu luágu ában liraüraü burígü, anímaalu anáajati ílaü.”

⁶ Ába joúdin disípulugu, ába jadügüni quei laríñaguni Jesúsu joun. ⁷ Ába janügünun burígü tugýa láu sun tiraü, ába jíchugunun janáangun jawágu, ába lawárirun Jesúsu. ⁸ Sarágu jañati gürígia, ába jábudunun janáangun luágu üma, jíbiri, ába jáchuajan tilímun wéwe, ába jíchaajani luágu üma. ⁹ Dándu gürígia ja ubáraübaña quei ja árigibaña, ába jagúmeserun agúaraja.

—¡Uweíriguni lun ladügawagun urúei Davíd! ¡Biníwati wügüri le ñübinbei lídan líri Wabúreme Búngiu! ¡Uweíriguni lun Búngiu!

¹⁰ Dan lebélurun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisan gürígia le?

¹¹ Ába jaríñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünun Jesúsu témpulu

(*Mr 11.15-19; Lc 19.45-48; Jn 2.13-22*)

¹² Lárigiñe, ába lebélurun Jesúsu tídon láni Búngiu témpulu, ába labúgaguniña sun alúgorajatiña jáma agáñijatiña ja ñíbaña. Ába lagárabaguni dábula buri le jadábulan asáansijabaña seínsu ñi joun gürígia, lúma jála ja alúgorajabaña únjun.

¹³ Ába laríñagun joun.

—Laríñajare Búngiu tídan Lerérunt. “Núban fulásu le ñí lubei gayára lan jayúmuragun gürígia nun”, áanjein jugúya, barü jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüduniña. ¹⁵ Dan le jaríjinbaalin jábutigu fádirigu jáma arúfudajatiña lilúrudun Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweíriguni lun ladügawagun urúei Davíd!”, ába jagáñidun. ¹⁶ Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíijan jumágili tídan Lerérunt Búngiu le ñí lubei laríñawagúa lun Búngiu.

Adügaadibu lun jerémujan ñübürigiña jáma irájüñü ja machülaagiña, cátei buíti buágu?

¹⁷ Ába lígiruniña, ába lídin ubúrugugiñe lun Betánioun, ába lásügürüni áriebu ñi.

*Líñaragunun Jesúsu tídibu ígo to mínboun
(Mr 11.12-14, 20-26)*

¹⁸ Larúgan bináafin, dan le lagíribudun Jesúsu ubúrugun, ába lalámachun. ¹⁹ Ába laríjin ában tídibu ígo láru üma, ába lídin tuágun, madáriti ni cáta tuágu lueídügüya ubánaü. Ába laríñagun tun tídibu ígo tugúya.

—¡Magíindadügüyabá!

Lídan óra ligía ába tásaurün. ²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaurübei tídibu ígo to ítara oúfun?

²¹ Ába laríñagun Jesúsu joun.

—Ninárün jáu, ánjaün afíñe le gumúti, mámarügübei líbe le nadügübei tun tídibu ígo to gayára jumá adüga, gayáraabei jaríñagun lun wübü le. “Gidába yágiñe, dabúba baránajoun”, ábame lasúseredun. ²² Súnme gíñe cátei le jamúriaian lúma Búngiu, ánjein afíñe jubeí, jibíjubei.

*Lubáfu Jesúsu
(Mr 11.27-33; Lc 20.1-8)*

²³ Ábati lebélurun Jesúsu témpulurugun, dan niján lan arúfudaja ñi, ába jayábin jábutigu fádirigu jáma wügüriña ábutigu lídan jafíñen juríu, ába jaríñagun lun.

—¿Aríñagabeí woun ca lan biríchabei lun badügni cátei le?
¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün gíñe ában cátei, ánjein joúnaba nun, ábame naríñaguni jun ca lan áu ubáfu nadügei buri cátei le. ²⁵ ¿Ca oúnajabalín Juan abásteragüdaja? ¿Búngiu, ódi wügüriña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan oúnajabalín, laríñaguba woun ca lan uágu mafíñerun wabeí lun. ²⁶ Ánjawa aríñaga luágu joúnajan lan wügüriña, joúserubadiwa gürígia wuríba ladüga súngubei afíñetiña luágu proféta lán.

²⁷ Ábati jaríñagun lun Jesúsu.

—Ibídiñeti woun.

Ába giñeti laríñagun joun.

—Maríñagun nubeí giñéti jun ca lan áu ubáfu nadügei buri cátei le.

Jémpulu jawáguti bián isáanigu

²⁸ Ába laríñagun Jesúsu joun.

—Nabájüdaguá ában cátei jun, jaríñageime nun ída líña lan jaríjin lun. Ñíñein ában wügüri, biámañanu lisáanigu. Ába laríñagun lun ában jádaangiñe. “Niraü, beíba ñadágimein ugúñe lídan talúbajoún ninádirigu.” ²⁹ Ába laríñagun lisáani lun. “Mabúseeruntina nídin.” Lárigiñe, ába lasáansiragun larítagun, ába lídin ñadágimein. ³⁰ Lárigiñe, ába lídin úguchili aríjei le ában, aríñageinaleí le méme laríñagubeí buga lun le furúmiñeti lun. Ába loúnabun le. “Ánja, nídiba.” Mídinti. ³¹ Aríñaga jumeí nun, ¿cági jádaangiñe biángubei adügübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Ninárün jáu luágu choúrutima lan jebélurun agúburajatiña liseínsuna gumádi jáma jórugu lídoun larúejan Búngiu sügü jáu, ³² ladüga ñübinti Juan le abásteragüdajabeí arúfudaja jun ída lúba lan ligáburi jabágaridun, mafíñeruntün lun, ánjañati ja agúburajabaña liseínsuna gumádi jáma jórugu, afiñeratiña lun. Jugúya, láu sun aríja jumáni sun líra, masáansiragunti jigáburi lun jafíñerun lun.

Jémpulu jawáguti ñadágimeintiña ja wuríbabaaña

(*Mr 12.1-12; Lc 20.9-19*)

³³ ‘Agáamba jumeí ábaya jémpulu le. Luáguti ában wügüri labúreme ában ichári, ában lábunagun tídibu beíbei lichárirugu, ába ladügün baríeru láu, adüga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adüga weíyaasu. ³⁴ Dan le lachülürün dan lun alúbajani, ába loúnajan jádaangiñe lumúsuniña amúriaiei lufánran jámagiñe ñadágimeintiña. ³⁵ Ábarüga járugüdüniña ñadágimeintiña músu jagía, buleísei jameí ában, áfara jameí ában jilágubei, rúrgua jagía dübü luágu le ában. ³⁶ Ábaya loúnajan labúreme ichári gíbetimaajaña sügü jáu ja loúnajabaña furúmiñe, ligía méme jadüga ñadágimeintiña joun.

³⁷ ‘Agúmujoúni, ába loúnajani liraü, ába laríñagun lúnguarügü. “Inébebei niraü joun.” ³⁸ Dan le jaríjinbaalin ñadágimeintiña liraü, ába jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.” ³⁹ Ábati járugüdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti liábin labúreme ichári, ¿cábagi ladüga jau ñadágimeintiña ja?

41 Ába jaríñagun lun.

—Láfara gubaña wuríbatiña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntiña jederegeruni lufánran lun lídaangiñe alúbajani lídan dan.

42 Ábati laríñagun Jesúsu joun.

—¿Malíijaña jumágiru Lerérerun Búngiu? Taríñajare nuágu. Le meja dübü le mabúseerun jabeí ábunagutiña, ligáali furúmiñeti.

Wabúreme Búngiu adügübalin lun furúmiñebi lan, áni aríja wamúti quei ában cátei weíriguti.

43 Ligía naríñagunbei jun luágu lagídarúaba lan larúeijan Búngiu jueí, juguya le weírigubei lídan jafíñen juríu, ábame líchugúniwa joun gürígia ja ederegeruti alúbajani le láni larúeijan Búngiu. **44** Ánjeinti áu, le dübü ligía, furúmieguarügü le eíguaduti nuágun lañaürudagúba, léti uáguti leíguada nigáñi, lagúmuchaguagüdübei. Ligíaba asúsereda joun gürígia ja májabaña nun.

45 Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja. **46** Ábati jabúseerún yebe járugüdüni, madügün jamúti ladüga janúfude jaweí gürígia, ladüga afíñe jamá gürígia luágu proféta lan.

22

Jémpulu luáguti maríei

1 Ábaya lagúmeserun Jesúsu adímureja joun láu jémpulu, ába laríñagun joun.

2 —Nijánya ában jémpulu luáguti arúeijani le lánina siélu. Ñíñein ában urúei adügüti ában fédu lubá lamárieidun lisáani. **3** Ába loúnajaniña lumúsuniña oúgaña amísurajoútiña, májatiña amísurajoútiña jayábin. **4** Ábaya loúnajan ámu mûsu, ába laríñagun joun. “Aríñaga jumá joun amísurajoútiña luágu aráanseeli lan eíngini. Áfaragüda náaña bágasu jáma nilügüniña anímaalugu dibúnetiña, aráanseeli sun cátei, lun jayábin maríeirugu.” **5** Madügüntiña amísurajoútiña gásu. Ába lídin ában jádaangiñe líchárigu, ñüdün ában adüga ámu wadágimanu, **6** ja jíbiri, ába járugüdüniña lumúsuniña urúei, ába joúseruniña wuríba, ába jáfaraguniña jilágubei. **7** Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. **8** Ába laríñagun

joun lumúsuniña. “Aráanseeli sun cátei lun maríei, áni amísurajoútiña jagüra madünamatiña lun jamísurajoúniwa.⁹ Jeíba lubeíti luágu buri larígei üma, ábame jamísurajaniña sun ja úmatiña jadúnragua.”¹⁰ Ába joúdin mûsu luágu buri üma, ába joúndaruniña sun ja úmabaña jadúnragua, buítíña jáma wuríbatíña, ába tabuínchun mûna jáu gürígia.

11 ‘Ábati lebélurun urúei aríjaña amísurajoútiña, ába laríjin ában wügüri le madáüragunti quei lun ában maríei ñi. ¹² Ába laríñagun lun. “Numáda, ¿ída liñagi bebélurunbei ñájoun madáüragunga quei lun ában maríei?” Maní ligía. ¹³ Ába laríñagun urúei joun ja eténirubaña lún buri dábula. “Gürágua jumeí lugúdi lúma lújabu, fíjumei lídoun lubúriga le boúgudibei, le ñíba lubeí layájuaja, acünrijame lári.”¹⁴ Ába laríñagun Jesúsu joun ja agáambubalin.

—Gíbettiña agúarútiña lun jebélurun lídoun larúeijan Búngiu, míbettiña anúadiruña.

*Luáguti lafáyeirun liseínsuna gumádi
(Mr 12.13-17; Lc 20.20-26)*

¹⁵ Ába joúdin fariséogu, ába júaradun aríja cába lan gayára lan jadügün lun jaríñagagüdüni Jesúsu cátei le uáguti gayára lan jadárirun lidúnrun. ¹⁶ Ábati joúnajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladüga ni cáta lan luweírigun gürígia bun. ¹⁷ Rúbei lubeíti barítagun woun. ¿Buítisan lun lafáyeirúniwa seínsu lun urúei Rómana ódi mabuídunti?

¹⁸ Aríagu líña Jesúsu lun luríba jayúmajan, ába laríñagun joun.

—¡Biángua tigíbu jugúya le! ¿Ca uágu jíchaaja sádara nubá?
¹⁹ Arúfuda jumeí seínsu le áubei lafáyeijoúa liseínsuna gumádi nun.

Ába janügün ában seínsu le denáriu lun. ²⁰ Dan laríjini, ába lálügündüniña.

—¿Ca iyáwa le luágubei seínsu le, lúma íri le bürüwañubei luágu?

²¹ Ába jaríñagun lun.

—Láni urúei Rómana.

Ábati laríñagun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

²² Dan jagáambunbalin le, ába laweíridun janígi, ába jígiruni, ába joúdin.

*Álügündajani libügürü ásaaruni lídaangiñe oúwени
(Mr 12.18-27; Lc 20.27-40)*

23 Wéyu méme ligía, ába joúdin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe oúweni. Ábati jaríñagun lun Jesúsu.

24 —Maésturu, aríñagatí meja Moisés luágu ánjein lan oúwe ában wügüri le marieiti masáaniguga táo lúmari, lúnti lan lamárieidun lamúlen túma würi to ueíboun loúwe, lun gasáanigu lan táo lun líbugaña le oúwebe. 25 Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába loúnwen. Quei masáanigu lubeí táo lúmari, ába lígirunun lun lamúlen. 26 Ligía méme suséreti lun jabíaman, lárigiñe lun jürüwan darí lúmoun jasédün. 27 Lárigiñe, ába gíñe toúnwen würi. 28 Dánmeti jásaarun lídaangiñe oúweni, ¿cábati úmari würi tugúya jádaangiñe sédü gamúlenuguátiña ja, lárigiñe mariei jamá sun jagía túma?

29 Ába laríñagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu. 30 Dánme le jásaarun jiláaña lúnya jabágaridun, ámujalime jabágari, magámaridun jába, míchugun jamáñame jasáanigu lun mariei, queísi magámaridun jamá ánjeligu siélu. 31 Ánjeinti luágu sará jamá jiláaña lúnya jabágaridun, ¿malíijan jumágili le laríñagubei Búngiu gúanarü jun? Ítara líña laríñagun. 32 “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeíti, ánjein jamúga jiláaňu jáña lubeí wügüriña jagía lun sun dan, mariñagunti jamúgati Búngiu luágu Jabúngiute lan, ladüga máma Jabúngiute jiláguuaña Búngiu, Jabúngiute wínwangiña.

33 Dan jagáambunbalin gürígia cátei le, ába laweíridun janígi láu le larúfudajabe.

Gumádi le weírigutimaabei

(*Mr 12.28-34*)

34 Dan le jasúbudirunbalin fariséogu luágu manígüda láaña lan Jesúsu saduséogu, ába joúndaragun, 35 ñíñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñagun lun.

36 —Maésturu, ¿cásan gumádi weírigutimaabei lídan lilúrudun Búngiu?

37 Ába laríñagun Jesúsu lun.

—“Jínsiñelá Babúreme Búngiu bun táo sun banígi, táo sun buwáni, láu sun bisáminan.” 38 Niján gumádi weírigutimaabei, furúmiñeti gíñe lídaangiñe sun lugúmadin Búngiu. 39 Áni le libíaman lídan uweíriguni lenége le, ítara líña. “Jínsiñe jamá bíbirigu bun quei bínsiñegua búngua.” 40 Bián gumádi le, ligía ébuubei lun sun lilúrudun Moisés lúma jarúfudajan profétagu.

*¿Ca adügawagun Crístu?
(Mr 12.35-37; Lc 20.41-44)*

⁴¹ Sun añája lan fariséogu oúndaragu, ⁴² ába laríñagun Jesúsu joun.

—¿Cásan jarítagubei libügürü Crístu le lanúadirubei Búngiu lun lasálbaruniña gürígia? ¿Cásan adügawagun?

Ába jaríñagun lun.

—Ladügawagun Davíd.

⁴³ Ábatí laríñagun Jesúsu joun.

—¿Ída liñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

⁴⁴ Laríñajare Búngiu lun Nabúreme.

“Nurúba núma lueígiñe noúnwenren
daríme níchuguniña báganiñu bújaburugun.”

⁴⁵ ¿Ída lubáti ladügawagun lan Davíd Crístu ánjein wá lubali Davíd guánarü Crístu Nabúreme?

⁴⁶ Úati ni ában gayáraati loúnabun ni ában dimúrei, lúmagiñeti wéyu ligía, manígiti ni ában lun liábin álügündaguei.

23

Líchugun Jesúsu jadúnrun fariséogu jáma arúfudajatiña lilúrudun Moisés

(Mr 12.38-40; Lc 11.37-54, 20.45-47)

¹ Ábatí laríñagun Jesúsu joun láni disípulugu jáma jíbiri gürígia ja ñíbaña.

² —Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. ³ Agáamba jumáña lubeíti, adüga jumeíme sun le jaríñagunbei jun, le jadügübei, mafálara jumeí ladüga aríñagatiña ában cátei, jadüga ámu.

⁴ Rújamuti gumádi joun gürígia queísi anügüni jürtü le siñábei lanügüniwa, ánjein jagía, madügüntiña ni cáta lun jíderaguniña gürígia luágu buri anügüni lánina lúrudu le jíchugubei jawágu.

⁵ Jadügüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarüna, lúma lun jadáüragun anáanguni to durúruntu.

⁶ Buséntiña járugüdüni lubuídun-ägei ubáraü lídan eígini lúma jalaü le jála weírigutiña tídan jalígilisin. ⁷ Buséntiña lun jabúsurun gürígia joun láu sarágu inébesei ümada, lun gíñe lagúarúniwa joun, “maésturugu”.

⁸ ‘Ánjein jugúa, mígira jumá lun laríñawagúniwa jun, “maésturugu”, ladüga sun jugúa ában jáu, áni ában rügüñein gíñe Jumaésturun, áu le Crístubei. ⁹ Maríñaga jumá gíñe “núguchi” lun ni ában wügüri uboúagu lídan ligáburi jagúaruni Búngiu le siélubei “Núguchi”. ¹⁰ Mígirun jugúyame lun

laríñawagúniwa jun “ábutigu” ladüga Crístu rügüñein Jábuti.
 11 Le esériwidubei joun jíbiri, ligía weírigutimaabei jídan,
 12 ladüga le anáanguti lúngua weíri, lünabudagüdüwaba,
 áanjein le anáanguti lúngua ünabu, laweíridagüdüwaba.

¹³ ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu!, ladüga darú jumuti lubéneri arúeijani le lánina siélu lueí jebélurun ámu, mebélü jugúyati, mígirun lun jebélurun ja busénbaña jebélurun.

¹⁴ ‘¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gidá jumutu jában würiña ja jiláaña úmari jaweí, lúnti ibidiñewa lan, ába jadáagun ayúmuraguni lun Búngiu le migínaguti. Ligía weíritimaabei lubeí jasúfurirun lueígiñe.

¹⁵ ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja gürígia lun jánigume, dánti le ibíja jumáali le jabúseerubei, ába jadügüniña gürígia jagía bián weíyasu lúntima jóúdin máfiougati sügü jáu.

¹⁶ ‘¡Fugiábugu jugúya, adúndejatiña maríjintiña! Aríñagatün luágu le lan gürígia íchuguti dimúrei, áanjein áfiñura tuágu témpulu mala lan líra, áni áanjein lan áfiñura luágu tigóluna témpulu, aná lan líra, lúnti lan lagúnfulirun. ¹⁷ ¡lbídiougua líña jáu, maríjin! ¿Cági weírigutimaabei, gólu ódi témpulu to adügüboun lun sagráubei lan gólu? ¹⁸ Aríñagatün gíñe luágu áanjein lan íchiga gürígia dimúrei lun láfiñurun luágu latárü, mala lan líra, áni áanjein lan áfiñura luágu cátei le adágaragüdüwabei luágu latárü, aná lan líra, lúnti lan lagúnfulirun. ¹⁹ ¡lbídiougua líña jáu, maríjin! ¿Cági weírigutimaabei, cátei le luágubei latárü ódi latárü le adügübalin cátei ligía lun sagráubei lan? ²⁰ Le áfiñurubei luágu latárü, máma rügüñein luágu latárü láfiñurun, láfiñuruña gíñe luágu sun le ligíbuagubei latárü. ²¹ Le gíñe áfiñurubei tuágu témpulu, máma rügüñein gíñe tuágu témpulu láfiñura, láfiñuruña gíñe luágu Búngiu le aganoúbei tídan. ²² Le gíñe áfiñurubei luágu siélu, láfiñuruña gíñe luágu lála Búngiu, lúma gíñe luágu Búngiu le añúurubei luágu jalaü ligía.

²³ ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adügatün díisi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weírigutimaabei lídan lilúrudun Búngiu, queí buri lun jadügüni sun cátei láu úaraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadügüni, mígirunga jumeíme jadügüni le líbiri. ²⁴ ¡Jugúya, adúndejatiña maríjintiña jugúya le, áseija jumúti ában minímini áni julútün ában caméyu!

²⁵ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adügatün lun jarítagun gürígia luágu buídu lan jigáburi. Ítara jíñia quei wéru lúma asíedu le jachíbubei boúgudigiñe libíti, ánjein múnadagiñe jibíti, buín jíñia láu buri luweínamu-águu lúma íweruni. ²⁶ Fariséogu maríjintiña. jarúmagüda jumeí wéru lúma asíedu lurágeirugugiñe furúmiñe, ábame gíñie larúmadun boúgudigiñe libíti.

²⁷ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíñia quei umúajaü le afeíndijoúti láu jarúti boúgudigiñe libíti, buídumeraüti larijín, ánjein lurágeirugugiñe, buín líñia láu jábu jiláaña lúma sun luwúyeri iwíyei. ²⁸ Ítara jíñia, boúgudigiñe jibíti, ma lubuíduñiwa jagíbugiñe gürígia, ánjein múnadagiñe, buín jíñia láu iyéerejabuni lúma wuríbani.

²⁹ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dübü arítaguagüleime luágu jamúaja profétagu, wéndegüda jumeí umúajaü le jáni gürígia já meja buídubaña. ³⁰ Ábatí jaríñagun. “Lun jamúga meja awánjeinjadiwa lan le jadáani binádu wagübürigu, míderagun wamútiña jamúga áfaraguaña profétagu.” ³¹ Láu líra, subúdiguatün júngua luágu jádaangiñetün lan ja áfaragubaliña profétagu jagía. ³² ¡Gumújumeiti jadügüni lé meja jagúmeserubei binádu jagübürigu adüga!

³³ ¡Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina máfiougati? ³⁴ Ligía noúnjaba lubeí profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágu jumáñame jíbiri luágu gurúwa, bei jumáñame jíbiri tídan jalígilisin juríu, eíbaaja jumáñame lídan sun fulásu. ³⁵ Ítara lúba láburujan dúru juágun luágu sun jítaü le áwiyurubei jádaangiñe sun wügüriña buítiña ja jáfarawagubaña, lúmagiñé meja Abél le richáguabei darí lúmoun Zácarías, liraü Berequías lé meja jáfarubei tabádinagua témpulu lúma latárü. ³⁶ Ninárün jáu luágu láburujaba lan dúru jawágun gürígia ja lánina dan le luágu buri sun cátei le.

*Layájun Jesúsu jawágu lílana Jerusalén
(Lc 13.34-35)*

³⁷ ¡O jugúya Jerusalénnal! ¡Áfaragua jumáaña profétagu, chürgua jugúya dübü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarüna, májatün! ³⁸ Ígira láadün Búngiu, ³⁹ áni naríñajare jun luágu maríjindügüya jumáadina lan queísi jasálbaragüle daríme lachülürün dan lun jaríñagun. “Biníwati le ñübinbei lídan líri Wabúreme Búngiu.”

24

*Laríñagun Jesúsu luágu tagünrinchawagúba lan témpulu
(Mr 13.1-2; Lc 21.5-6)*

¹ Dan le láfuridun Jesúsu témpulurugugiñe, leíbuga yebe, ligía jayábin láni disípulugu lúmoun, ába jarúfudun tuágun témpulu lun. ² Ába laríñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dübü ligíbuagu dübü, tagünrichawagúba sun to.

Seíni buri lubáragiñe lagúmuchun uboú

(Mr 13.3-23; Lc 21.7-24, 17.22-24)

³ Ábatí joúdin luágu wübü Olivos, dánti ñun lan Jesúsu ñi, ába joúdin láni disípulugu agülülüja lúma, ába jaríñagun lun.

—Buséntiwa lun bariñaguni woun ídaba lan tagünrinchawagúua témpulu. ¿Cába liseíni bagíribudun uboúagun, lúma lagúmuchagüle?

⁴ Ába laríñagun Jesúsu joun.

—Toúnigi jumá lun úa lan ayéedutün, ⁵ ladüga sarágujaba nübüntiña aríñageina. “Áu Crístubei”, áni sarágujaba jayéedun.

⁶ Jugúya jagáambuba lamúri wuríbu yaráfa jun lúma ugánu luáguti buri wuríbu díseti jueí, manúfudedagua jumá. Lúnti ítara lan, mámagilíme lagúmuchagüle uboú líra. ⁷ Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, járabaganáli lídan sarágu fulásu. ⁸ Sun líra lagúmesejarügügili le lúnbei lasúfurirúniwa.

⁹ ‘Jugúyati, jedéregerúaba lun lúrudu lun jasúfurirawagüdün, lun gíñe jáfarawagúniwa jilágubei, jiyéreegudúba lun sun uboú nueígiñe. ¹⁰ Lídaanme dan ligía, sarágujaba eféridiruti jafíñen nuágu, ábame jeyéreegudún joúniwagua, ábame jalúguragun joúniwagua. ¹¹ Jachülaaguba sarágu yéetiña aríñiaga luágu profétagu jamá áni sarágujaba gürígia jayéedun. ¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua. ¹³ Le asígiruti derégüdagu darí lúmoun lagúmujoún, lasálbarúba. ¹⁴ Lapúrichijoúba ugánu buíti le luáguti larúeijan Búngiu lídan sun uboú lun lasúbudirúniwa lídan sun fulásu, ligíalímeti lagúmuchun uboú.

¹⁵ ‘Abürüjatí meja proféta Daniél luágu cátei iyéreeguti le gagünrinchaguagüdadibei, dánme le jaríjin chülüyüji lan cátei le lídoun fulásu le sánduti —le alíjabei, gunfaráandalá—,

¹⁶ jámeti Judéabaña, lúntime janúrajan luágun buri wübü. ¹⁷ Léme tábulugubei lúban wéyu ligía, maráriralá aságara ni cáta múnadagiñe, ¹⁸ le áraabubei, magíribudalá ni abúdoun lanáangun. ¹⁹ ¡Fugiábugume würiña ja dageínatiña o ja lan gasáanigutiña ja gurágiña lídounme wéyu ligía! ²⁰ Amúriaaja jumá lúma Búngiu lun máma lan lídan lidíliga ni lídan luwéyuri eméraaguni janúraja.

21 Ladüga ñíbei sarágu súfuri le úagili líbe lúmagiñe lagúmeserun uboú, úabei gíñe lárigiñe. 22 Lun jamúga madüraagun lubeí lan Búngiu dan ligía, úati jamúga ni ában asálbaruti, ladüraagubei jawágurügü ja lanúadirubaña lun lánigu jamá.

23 ‘Ánjein lubeíti aríñawagua jun. “Niján Crístu” o “Ningitán lan”, mafíñera jumá, 24 ladüga jayábinba ayéejatiña lun jarúfudagun joúngua camá Crístu, camá buri profétagu, áni jadáaguba oúnwenbun buri seíni lúma miláguru lun jeyéedaguniña ja anúadira láañabaña Búngiu áanjaña gayára. 25 Aríñaga náali le jun lubáragiñe lasúseredun, 26 ligía lubeíti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, áanjaña aríñaga jun. “Niján ya rúmurugu”, mafíñera jumá. 27 Quei larijíniwa labírichagun lueígiñe ában oúbaü libiti siélu lun luágun le ában, ítara lúba dánme le niábin, áu le Wügüri Garaüwarügüti. 28 Ábame láburujan ligáñi Búngiu jawágun gafíountiña quei wadúbi luágun úgubu jiláali.

Seíni buri lubáragiñe lagíribudun Crístu uboúagun

(Mr 13.24-37; Lc 21.25-33, 17.26-30, 34-36)

29 ‘Lárigiñerügume lásügürün wéyu buri lánina súfuri ligía, ábame labúrigadun wéyu, marúnijalime játi, ábame jeíguadúnga warúguma ja siélubaña, ábame ladádagaru sun siélu. 30 Ábameti jaríjini niseíni siélu, súnme gürígia wuríbatiña uboúagu, jayájuajaba láu jaríjini niábinya, áu le Wügüri Garaüwarügüti, lídan juánriñu siélugiñe láu oúnwenbun ubáfu lúma uweíriguni. 31 Dánme línwirúniwa fídu rein, ábame noúmajaniña náni ánjeligu ja siélubaña lun joúndaruniña nánigu ja anúadira náañabaña lídaangiñe gádürü larígei uboú.

32 ‘Furéndeí jumeí jémpulu le tuáguti tídbu ígo. Dan le ñulúgili tilímun, ába laboúchun tubána, subúdi jumúti luágu yaráfaali lan lubáchouga. 33 Ítara méme, dánme gíñe jaríjini sún buri cátei le, subúdi jumeí luágu yaráfaali lan niábin. 34 Ninárün jáu, luágu lagúnrinchawagúba lan sun ubúruju le Jerusalén lubáragiñe joúwegun gürígia ja lánina dan le. 35 Lagúmuchaguba siélu lúma uboú, ánjein nerérun, merédebei magúñfulirúngua.

36 ‘Ánjeinti luágu wéyu lúma óra le lúnbei nagíribudun uboúagun, ibídiñeti ni ca un, ni joun ánjeligu ja siélubaña, ni nun, áu le Liraü Búngiu, Búngiu rügüñein Úguchili asúbudirei.

37 ‘Ítara queí meja lasúseredun lídan meja lidáani Noé, ítara lúba gíñe dánme le niábin, áu le Wügüri Garaüwarügüti.

38 Lídan meja dan ligía, lubáragiñe ladíbirun uboú, jerédera meja gürígia eíga, áta, amárieidagua, íchaajaña jasáanigu lun maríei, darí wéyu le lebélurunbei Noé tídon ugúnein.

39 Meféentiña, darí ladíbirun uboú, ába jañáradagun súngubei.

Ítara lúba gíñe dánme niábinya, áu le Wügüri Garaüwarügüti uboúagun. ⁴⁰ Lídaanme dan ligía, ñíbaña bián wügüriña áraabu, lanügüba ában, igirúame le ában segün jafíñen nuágu. ⁴¹ Ñíbaña bián würíña amúlija, tanügüba ában, igirúame to ában.

⁴² ‘Agágudúañu jumá, ladüga ibídiñeti jun cába lan óra niábin, áu le Jabúreme. ⁴³ Subúdi jumeí le, luágu ánjein lan jamúga lasúbudira tabúreme ában müna cába lan óra liábin jíweruti áriebu, leréderuña jamúga marúmugunga, mígirunti jamúga lun lebélurúniwa íweruja lúbiñe. ⁴⁴ Ligía aráanseñu jumá lubeí, ladüga léme óra magáradajan jumá, ligíame niábin, áu le Wügüri Garaüwarügüti.

*Músu le úaraguabei, lúma le múaragúnbei
(Lc 12.41-48)*

⁴⁵ ‘Ítara jumá queísi músu úaraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eíngini joun lídan dan. ⁴⁶ Gúndaabei músu le dánme le liábin liyúbudiri ánjein ladárira agúnfulira lúma lifísiute. ⁴⁷ Ninárün jáu luágu líchugubei lan liyúbudiri lun laríjin láu sun lumégen. ⁴⁸ Ánjein ában lubeí wügüri wuríbatí músu ligía, ábame larítagun luágu lügili lan liábin liyúbudiri, ⁴⁹ ábame lagúmeserun oúseraña jíbiri músu wuríba, reídei ligíame eíga lúma áta jáma bacháruatiña, ⁵⁰ ábameti liábin liyúbudiri lídan wéyu le magúrabun láani, lídan óra le ibídiñeti lun. ⁵¹ Ábame líchuguni luweírin-ägei abeichhúni luágu, lasíadireime lun máfiougatín úara jáma biángua tigíbu, ábame layájun, acünrijame lári.

25

Jémpulu jawáguti díisi würíña irájüñü

¹ Ába laríñagun Jesúsu.

—Ítara lubáti arúejani le lánina siélu quei díisi würíña irájüñü ja anügübaña jalámpun le gálati gási, ába jáfuridun lun jadúnragun lúma adári, ñüdün jamámuga úara lúma maríeirugun. ² Seíngü jádaangiñe, maráanseruntiña, seíngü aráansetiña. ³ Ja maráanserunbaña, dan le janügünbalin jalámpun, manügüntiña ámu gási lueí le lídaanbei jalámpun, ⁴ áanjañati ja aráansebaña, barütiña jabúdein láu gási boúgudin lueí le lídaanbei jalámpun. ⁵ Queísiti ladárasarun adári, ába ladábulunga jágu súngubei, ába jarúmugun. ⁶ Queí buri luágu amídi áriebu, ligía lagaambúniwa agúaraguni. “Niteín adári, furíjuma adúnraguei.” ⁷ Sun würíña irájüñü jagía, ába jásaarunga, ába jagúmeserun aráansejei jalámpun. ⁸ Ába jaríñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladüga léñeguchuña

walámpun.” ⁹ Ába jaríñagun ja aráansebaña joun. “Siñáti, ladüga loúguabei woun, loúguame jun. Jeíbagubei le ñí lubei lalúgurajoúa agáñija jumámuga júngua.” ¹⁰ Léti añángüra lan ja maráanserunbaña agáñija gásı, ligía liábin adári. Játí aráansebaña, ába jebélurun lúma maríeirugun, ába ladaurúniwa béna. ¹¹ Lárigiñe, ligía jachülürün jíbiri würíña irajüñü jagía, ába jaríñagun. “¡Wabúreme, wabúreme, darábei béna wabá!” ¹² Ába laríñagun joun. “Ninárün jáu, ibídiñetün nun.”

¹³ Ábatí laríñagun Jesúsu joun.

—Agágudúañu jumá, ladüga ibídiñeti jun cába lan wéyu, ni cába lan óra nagíribudun, áu le Wügüri Garaüwarügüti, uboúagun.

Jémpulu luáguti seínsu

¹⁴ ‘Ítara líña arúejani le lánina siélu quei ában wügüri le dan lébei laráansejan lun ladügün weíyaasu lídoun ámu fulásu, ába lagúarun joun lumúsuniña, ába líchuguni liseínsun lábugiñoun jaríaaajan.

¹⁵ ‘Lun ában jádaangiñe, rúti queí buri seíngü-mílu fiádürü, queí buri bián-mílu lun ában, queí buri mílu lun ában. Lafánreinjani joun quei jabáfu lun jawádigimariduni. Ábatí lídin luágu luweíyasun. ¹⁶ Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun. ¹⁷ Ítara méme le erésibirubei bián-mílu, gáñeiti bián-mílu lánwoun. ¹⁸ Ángeinti le erésibirubei mílu, ába lídin, ába lachígin ában jýyu, ába larámuduni liseínsun liyúbudiri ñi.

¹⁹ ‘Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu. ²⁰ Furúmiñe, ába liábin le erésibirubei seíngü-mílu fiádürü, ába lederegeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.” ²¹ Ába laríñagun iyúbudiri lun. “Buítí, ában músu buítí amürü, úaragua, quei úaragua bubeí lídan le murúsunrügüti, níchiga gíbetimaati lábugiñe baríaaajan. Queímoun, gúnda amürüme úara núma.”

²² Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.” ²³ Ába laríñagun liyúbudiri lun. “Buítí, ában músu buítí amürü, úaragua, quei úaragua bubeí lídan le murúsunrügüti, níchiga gíbeti lábugiñe baríaaajan. Queímoun, gúnda amürüme úara núma.” ²⁴ Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügüri ban jéreguti, alúbaja ban le ñí lumuti mábunagun ban, abúdaja amürü le

ñí lumuti machágarun ban ni cáta. ²⁵ Ligía nanúfudedunbei, ába nídin arámudei biseínsun lábugiñe múa. Niján le báni.” ²⁶ Ába laríñagun iyúbudiri lun. “Músú wuríbatí, moúnti. Subúdigubei bíñein luágu alúbaja nan le ñí lubei mábunagun nan, abúdaja áu le ñí lubei machágajan nan ni cáta. ²⁷ Ligía lúnti lubeí jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.” ²⁸ Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei díisi-mílu, ²⁹ ladüga le adügübei buíti láu le lúmabei, líchugúba lánwoun lun, ábanme lígiragun lun, ánjein le madügübei buíti láu murúsun le lúmabei, lagídarúaba lueí. ³⁰ Músuti moúnti le, fíjumei lídoun lubúriga le boúgudibe, le ñíba lubeí layájuaja, acúnrijame lári.”

Jagúseragüdüniwa sun gürígia

³¹ ‘Dánme nagíribudun, áu le Wügüri Garaüwarügüti, uboúagun, niábinba quei urúei geyégu ánjeligu náu, ábame nañúurun luágu nála láu uweíriguni lun nagúseragüdüniña sun gürígia. ³² Ábame joúndaragun gürígia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña joúniri mudún, mudún jádaangiñe gábara. ³³ Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabáña ligíbugiñe Búngiu, lueígiñebeña nubaüna. ³⁴ Naríñagame joun ja lueígiñebeña noúnwenren. “Jigoúgu, jugúya le biní laalíbei Núguchi, resíbi jumeí arúejani le aráanserúbei jubá lúmagiñe ladügüni Búngiu uboú. ³⁵ Ladüga dan le nalámachunbei, rútün eíginí nun, dan le namágürabudunbei, rútün dúna nun, dan le eíbugaňaja nubeí quei chüldügüti, rútün múna nun. ³⁶ Dagáti manáanguni nuágu, rútün anáanguni nun, dan le nasándirunbei, ñüdüntün aríjana, dan le nadaürünbei, ñüdüntün aríjana.” ³⁷ Ábameti jaríñagun richáguatiña jagía nun. “Wabúreme, ¿ída bugagí waríjabu láu ilámaü, ába wíchugun eíginí bun? ¿ída bugagí waríjabu láu mágürabu, ába wíchugun dúna bun? ³⁸ ¿Ída bugagí waríjabu quei chüldügüti, ába wíchugun múna bun? ¿o manáangunga, ába wíchugun anáanguni bun? ³⁹ ¿Ída bugagí waríjabu láu sándi o furísunrugu, ába woúdin aríjabu?” ⁴⁰ Ábame naríñagun joun. “Ninárün jáu, furúmieguarügü cátei le jadügübei lun ában jádaangiñe namúlenu, ca lan lúnabunbei, nun méme jadügei.”

⁴¹ ‘Naríñagameti joun ja lueígiñebeña nubaüna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le méñeguchadibe, le aráanserúbei lubá Máfia jáu lánigu. ⁴² Ladüga dan le nalámachunbei, míchutün eíginí nun,

dan le namágürabudunbei, míchutün dúna nun. ⁴³ Eíbugatina quei chüldügüti, míchutün müna nun, mégeitina anáanguni, míchutün nun, sánditina, daüwa áu, mídintün aríjana.” ⁴⁴ Ábame jaríñagun wuríbatiña jagía nun. “Wabúreme, ¿ída bugagí waríjabu láu ilámaü o mágürabu, o quei chüldügüti, o manáangunga, o láu sándi, o furísunrugu, míderagun wamútibu?” ⁴⁵ Naríñagame joun. “Ninárün jáu, luágu furúmieguarügü lan cátei le madügün jubeí joun gürígia, ca lan lünabunbei, madügün jumúti gíñe nun.” ⁴⁶ Ábameti joúdin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame joúdin siélun lun jagúndaarun ñi lun sun dan.

26

*Aráansejani lun lárügündüniwa Jesúsu
(Mr 14.1-2; Lc 22.1-2; Jn 11.45-53)*

¹ Dan aríñaga láali Jesúsu sun cátei le, ába laríñagun joun láni disípulugu.

² —Quei jasúbudiruni, bián wéyu lárigiñe le, ligíame fédu le páscua, áni nederegerúaba, áu le Wügüri Garaüwarügüti, lun nádarawagún luágu gurúwa.

³ Ába joúndaragun jábutigu fádirigu, arúfudajatiña lilúrudun Moisés, jáma wügüriña weírigutiña lídan jaffíñen juríu tigíbugiñe lúban Gáifasi, fádiri le íñutimaabe. ⁴ Ñi jaráanseja luágu Jesúsu lun járugüduni láu yéguaü, lun jáfaruni jilágubei. ⁵ Jaríñagati.

—Máma látia fédurugu lueí jachágaragun gürígia.

*Tájuduraguni ában würi lábulugu Jesúsu
(Mr 14.3-9; Jn 12.1-8)*

⁶ Betániañein Jesúsu, lúbiñe Simón lé meja gawágubei gumeín luágu sun lúra, ⁷ ába tiábin ában würi luágun, gómeina tugúya ában lágei ibíñei le weíriti lisérunt. Dan luáguñein lan dábulu Jesúsu, ába téseruni ibíñei ligía lábulugun. ⁸ Dan jaríjinbaalin disípulugu cátei le, ába jamágundarun, ába jaríñagun.

—¿Cámesan lefériderúa le ítara? ⁹ Gayáraati jamúgagu lalúgurúniwa le luágu sarágu seínsu lun jíderawagún gudémetiña.

—Ába lagáambuni Jesúsu le jaríñagubei, ába laríñagun joun.

—¿Ca uágu jañawurija tun würi to? Cátei buíti le tadügübei. ¹¹ Súnwandan yábaña lan gudémetiña júma, ánjein áu, mámaba súnwandan júma nan. ¹² Le tadügübei würi to láu téseruni ibíñei le nuágun, taráanseruñadina lubá nábunúniwa. ¹³ Ninárün jáu luágu le lan ñi lumuti lapúrichijoúa ugánu luáguti asálbaruni lídan sun uboú, labájüdawagúaba gíñe le tadügübei würi to, lun larítawagún tuágu.

*Lalúguruni Júdas Jesúsu
(Mr 14.10-11; Lc 22.3-6)*

¹⁴ Ába lídin ában jádaangiñe dúusu disípulugu, le gíribei Júdas Iscarióte, adímureja jáma jábutigu fádirigu. ¹⁵ Ába laríñagun joun.

—¿Atiribei jíchugun nun ánjein nedéregera Jesúsu jun?

Ába jíchugun darándi murúsun pláta lun. ¹⁶ Lúmagiñeti óra ligía, ába láluajan Júdas ída lúba lan luwúyeri ledéregeruni Jesúsu joun.

Lagúmujoún leígin Jesúsu jáma lánigu

(Mr 14.12-25; Lc 22.7-23; Jn 13.21-30, 1 Co 11.23-26)

¹⁷ Le furúmiñeti wéyu lídan fédu le ñí lubei teigúa fein magánatu ísi, ába jayábin disípulugu lúmoun Jesúsu, ába jaríñagun lun.

—¿Jália babúseera waráanserun lun ñíba lan wadügei eígni le lánina páscura?

¹⁸ Ába laríñagun joun.

—Jeíba ubúrugu, lúbiñe ítaga wügüri, ábame jaríñagun lun. “Ítara líña laríñagun Maésturu. Yaráfaali nórare, búbiñeba nefédujei páscura jáma náni disípulugu.”

¹⁹ Ába jadüguni disípulugu quei laríñaguni Jesúsu joun, ába jaráanseruni eígni le lánina páscura.

²⁰ Dan le lagúñedunbei, ába lañúrun Jesúsu luágu dábula jáma láni dúusu disípulugu, ²¹ súnti añája lan eíga, ába laríñagun joun.

—Ninárün jáu luágu lalúgurubadina lan ában jídaangiñe.

²² Ábati jajírudagun, ába jagúmeserun álüğüdei ában ában.

—Nabúreme, ¿nugúya funásan?

²³ Ába laríñagun joun.

—Le éderutu leígan fein núma lídan asíedu, ligiába alúgurana.

²⁴ Nídiña, áu le Wügüri Garaüwarügüti, luágu üma le uágubei taríñaga Lerérunt Búngiu, áni ƒugíabutia wügüri le alúgurutina! Buítimaati jamúga lun magüria joúagubei lan.

²⁵ Ábati ladímurejan Júdas, ába lálügündajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

²⁶ Dan añája lan eíga, ába lanügünun Jesúsu fein lújaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joújuma, núgubu le.

²⁷ Lárigiñe, ába lárügündün ában wéru buin táu diweín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya. 28 Níta le, le añúuragüdübalin iséri darádu, le gíñe áwiyurubei joun sarágu gürígia lun ferúdunawa lan jafígoun. 29 Naríñajare jun luágu mätundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Núguchi Búngiu yágüta siélu.

*Laríñaguni Jesúsu luágu leyéedaguba lan Pédro láu
(Mr 14.26-31; Lc 22.31-34; Jn 13.36-38)*

30 Lárigiñe jerémujani urému luágu Búngiu, ába joúdin luágu wübü Olivos. 31 Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebu le, ladüga laríñajare tídan Lerérunt Búngiu. “Náfarubei joúniri mudún jilágubei, ábame jeréderun mudún chagágu.” 32 Lárigiñeme násaarun lídaangiñe oúweni lúnya nabágaridun, nídiba Galiléa jubáragiñe.

33 Ába laríñagun Pédro lun.

—Gayáraati járugüdün súngubei magúraasuni buágu, nugúya no.

34 Ábati laríñagun Jesúsu lun.

—Ninárün báu luágu áriebu méme lan le, lubáragiñe layúgurujan gáyu, beyéedaguba náu ürüwa weíyaasu.

35 Ába laríñagun Pédro lun.

—Gayáraati noúnwen búma, meyéedagunbadina báu.

Ligía méme gíñe jaríñaga sun disípulugu.

Layúmuragun Jesúsu lun Búngiu, Getsemaní

(Mr 14.32-42; Lc 22.39-46)

36 Ábati lachülürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—Ñurújuma ya, neíbuga ayúmuragua lun Búngiu yára.

37 Ába lanügüni Pédro jáma bián lirájüñü Zebedeo lúmagua, ába jagúmeserun asándira íruni lúma tigári anígi. 38 Ábati laríñagun joun.

—Sandítina ában íruni le lánina oúweni tídan nuwáni. Reídei jumá ya, agágudúañu jugúyame núma.

39 Ábati lídin Jesúsu lubáruaguóún mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, ánjein gayára lubeí, adügabá lun masúfurirun náani cátei le lúnbei nasúfuriruni, mámalá quei nabúseerun, queílá babúseerun.

40 Ábati lagíribudun le ñíjin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátiásán buga jeréderun agágudúañu núma ni ában óra? 41 Agágudúañu jumá, ayúmuragua jugúyame, máburujan jumámuga lídoun ínchajoúni lun jeféridiruni jafíñen nuágu.

Inárüni luágu ánja tan juwáni lun cátei le buídubei, áanjeinti júgubu, débiliti.

42 Ábaya lídin luágu libíaman weíyaasu, ába layúmuragun ítara.

—Núguchi, áanjein siñá lubei masúfurirun náani le lúnbei nasúfuriruni, adügüwalá bugúndan.

43 Ábaya lagíribudun, ábaya ladáriruniña láni disípulugu arúmuga ladüga weírijali lidábu jágu. 44 Ába lígiruniña, ábaya lídin ayúmuragua luágu lürüwan weíyaasu, ariñageina méme dimúrei ligía. 45 Ábati lídin le ñíjin jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chülüjali óra lun nedéregeruníwa, áu le Wügüri Garaüwarügüti, jájaburugun gafígountiña. 46 Sarájuma, queímoun lubároun le lúnbei lalúgurunina, níteeli.

Janügüni Jesúsu adáüra

(*Mr 14.43-50; Lc 22.47-53; Jn 18.2-11*)

47 Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu gürígia táo efeín lúma wéwe. Jayábin lueígíñe joúbadina jábutigu fádirigu jáma wügüriña weírigutiña lídan jafíñen juríu. 48 Aríñagaaliti buga Júdas joun.

—Le nachúurun, ligía, járugüdeime.

49 Ábati layárafadun lun Jesúsu, ába laríñagun.

—¡Buítí gúñoun, maésturu!

Ába lachúuruni. 50 Ába laríñagun Jesúsu lun.

—Numáda, ¿ca bálugubei?

Ábati jayábin, ába járugüduni Jesúsu, ába janügüni adáüra.

51 Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei.

52 Ába laríñagun Jesúsu lun.

—Areídaboún befeínte, ladüga sun ja áfarajatiña táo efeín, táuba gíñe efeín jáfarúa. 53 ¿Ibídiñeti bun luágu ánjana lan jamúga busén, gayára lan namúriajan ürüwa-wein-dísimílu jádaangiñe láni Núguchi ánjeligu, áni loúnajañanu lan jamúga? 54 Lun jamúga nadügüni ítara, ¿ída lubági lagúncularun le tídaanbei Lerérun Búngiu to aríñaguboun luágu lúnti lan lasúseredun le ítara?

55 Ábati laríñagun Jesúsu joun mítu jagía.

—¿Jiábin táo efeín lúma wéwe lun járugüdünina camá jamuga jíwerutina? Ságüñaja wéyu nañúurun témpulurugu jagánagua arúfudaja, madaü jumútina. 56 Wel, lasúseredunbei sun le lun lagúncularun le jaríñagubei profétagu tídan Lerérun Búngiu.

Ábati jígoruni sun disípulugu Jesúsu lábugua, ába janúrajan.

*Jesúsu ligibugiñe líñun-ágei lúrudu
(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Ja adáürübalin Jesúsu, ába janügünü ligibugiñoun Gáifasi, fádiri le íñutimaabei, le ñí lubei adámurigu jamá arúfudajatiña lilúrudun Moisés jáma wügüriña weírigutiña lídan jafíñen juríu. ⁵⁸ Árjeinti Pédro, falá lumuti dísegíñe darí tübüürürugun lúban fádiri le íñutimaabei le ñíjin lubeí lebélura, ába leréderun ñun jáma oúnigirutiña témpulu lun laríjin jalíaba lan lébeda cátei le.

⁵⁹ Jálujati jábutigu fádirigu, jáma sun jíbiri líñun-ágei lúrudu lidúnrun Jesúsu láu iyéeni lun gayáraabei lan jasíadiruni lun loúnwen, ⁶⁰ madáritiña, láu sun sarágu jáña lan gürígia ñüdüntiña aríñaga iyéeni luágu. Agúmujoúni, ligía jayábin biáma yéetiña íchiga fe luágu, ⁶¹ ába jaríñagun.

—Aríñagati wügüri le luágu gayára lan lagünrichagunun láni Búngiu témpulu, ábaya lánme laráramagüdünun lídan ürüwa wéyu.

⁶² Ábati laráramun fádiri le íñutimaabei, ába laríñagun lun Jesúsu.

—¿Moúnabuntíbusan ni cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wíñwanbei báfiñura lun baríñaguni inárüni. Aríñagabeí woun árjein amürü lubeí Crístubei le Liraü Búngiu, le lanúadirubei Búngiu lun lasálbaruniña gürígia uboúagu.

⁶⁴ Ába laríñagun Jesúsu lun.

—Ánja, áu, quei baríñaguni. Aríñagatina gíñe jun luágu jaríjubadina lan, áu le Wügüri Garaüwarügüti, ñun lueígiña loúnwenren Búngiu le Súnti Gabáfu, jaríjubei gíñe niábin lídan juánriñu siélugiñe.

⁶⁵ Ábati lajeíridagunun fádiri le íñutimaabei lanáangun, le ligáñi, ába laríñagun.

—¡Anába láali wügüri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le laríñagubei, ⁶⁶ ¿ida líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásueraguni ligíbu, buleísei jameí, jíbiri, ába jagáyuajan ligíbuagun, ⁶⁸ ába jaríñagun lun.

—Quei amürü lan Crístubei, jaríñaga beígia ca lan agáyuajabeí buágu!

Jaríñagunbei lun ítara ladüga gürágu líña lan lágu.

*Laríñagun Pédro luágu ibídiñe lan Jesúsu lun
(Mr 14.66-72; Lc 22.56-62; Jn 18.15-18, 25-27)*

⁶⁹ Súnti lasúseredun sun cátei le, ñun líña Pédro boúgudi tübürürurugu lúban fádiri le íñutimaabei, ába tiábin ában esériwijatu luágun, ába taríñagun lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe súngubei, ába laríñagun.

—Ibídiñeti nun ca lan uágu badímureja.

⁷¹ Leíbuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein gíñe Jesúsu le Nazarétna.

⁷² Ábaya leyéedagun Pédro láu fiñún, ába laríñagun.

—Ibídiñeti wügüri ligía nun.

⁷³ Murúsun lueígiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amürü, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Ibídiñeti gürígia ligía nun!

Lídan méme óra ligía, ába layúgurujan ában gáyu. ⁷⁵ Ábati larítagun Pédro luágu le laríñagubei Jesúsu lun. “Beyéedaguba náu ürüwa weíyaasu lubáragiñe layúgurujan gáyu.” Ába láfuridun Pédro ñígiñe, ába layájujan láu igárigu.

27

*Ledéregerúniwa Jesúsu lun Piláto
(Mr 15.1; Lc 23.1-2; Jn 18.28-32)*

¹ Dan larúgadunbei, ába jadámuridagun sun jábutigu fádirigu jáma wügüriña weírigutiña lídan jafiñen juríu arija cába lan jadüga lun lasíadirúniwa Jesúsu. ² Ába janügüni gürágu, ába jedéregeruni lun Póncio Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu siádi jamáali lan Jesúsu lun loúnwen, ába laságürijan, ába láguyugüdüni darándi murúsun pláta ligía joun jábutigu fádirigu lúma joun wügüriña weírigutiña, ⁴ ába laríñagun joun.

—Afígounjaadina láu nedéregerun ában wügüri madúnrunti lun loúnwen.

Ába jaríñagun lun.

—¿Cáme? le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádirigu seínsu ligía, ába jaríñagun.

—Siñáti wíchuguni seínsu le tídoun gáfu to lágei liseínsuna Búngiu ladüga lebégi oúweni.

7 Ába júaradun lun lagáñijoún lufúlasun ában wügüri le adáagubei barámbi láu seínsu ligía lun jábunajoún teréncha ñi.
 8 Ligía Lufúlasun Jítäu lubeí líribei fulásu ligía chülu lúmoun dan le.
 9 Ítara líña lagúnfulirun lé meja laríñagubei proféta Jeremías.
 “Barü jamuti darándi murúsun pláta ligía, ebégi le jíchugubei Israelítagu luágu wügüri ligía,¹⁰ ába jagáñijani lufúlasun ában wügüri le adáagubei barámbi láu, quei laríñaguni Nabúreme nun.”

Jesúsu ligíbugiñe Piláto

(*Mr 15.2-5; Lc 23.3-5; Jn 18.33-38*)

11 Barüwati Jesúsu ligíbugiñoun gumádimati, le gíribei Piláto, le álögüdübalin.

—¿Amürusan Jarúeitebei Juríu?

Ába laríñagun Jesúsu lun.

—Ánja, áu quei baríñaguni.

12 Dán buriti jíchugun jábutigu fádirigu jáma wügüriña weírigutiña lidúnrun, moúnabuntija Jesúsu ni cáta.
 13 Ábatil laríñagun Piláto lun.

—¿Magáambun bumútisan le jaríñagubei buágu?

14 Moúnabunti Jesúsu ni cáta, ábatil laweíridun lanígi gumádimati.

Lasiádirún Jesúsu lun loúnen

(*Mr 15.6-20; Lc 23.13-25; Jn 18.38-19.16*)

15 Gagáburi lumúti mejáti gumádimati lígiragüdüń ában adaürüti joun gürigia lídan fédu, furúmieguarügü adaürüti le jamúriaian lúma.
 16 Ñíñeinti ában adaürüti, díseti leíbaajan líri, gíriti Barabási,
 17 dánti le adámuriñujaña lan sun gürigia, ába lálögüdüniña Piláto.

—¿Ca jabúseerubei nígiragüdüń jun, Barabási, ódi Jesúsu le únbei laríñawagua Crístu?

18 Líridubalin gíñe Jesúsu ladüga subúdi láali lan luágu ladüga lan jagímugan lun jedéregerei.

19 Sun ñun lan Piláto luágu lála le lánina agúseruni, ába toúnajan lúmari aríñaga lun. “Madügabá ni cáta láu gürigia úaraguati le, ladüga gewéneditina buga ában uwénedi wuríbati áriebu buga ladüga gürigia le.”

20 Ába jádaruni jábutigu fádirigu jáma wügüriña weírigutiña jádoun gürigia lun jamúriaian lun láfuridun Barabási, lun lafarún Jesúsu.
 21 Ábaya ladímurejan gumádimati joun sun gürigia jagía, ába laríñagun joun.

—¿Ca jádaangiñe biángubei jabúseerubei lun nígiragüdüni jun?

Ába jaríñagun.

—Barabási.

²² Ába lariñagun Piláto joun.

—¿Cábati nadüga láu Jesúsu le únbei lariñawagúa Crístu?

Ába joúnabun súngubei.

—¡Dáguabeí luágu gurúwa!

²³ Ába lariñagun Piláto joun.

—¿Cáti wuríbati ladügübei?

Ábatima jagúaragun.

—¡Dáguabeí luágu gurúwa!

²⁴ Dan le laríjinbalin Piláto luágu siñá lan ladügün ni cáta lueídüguya chagáguau, ába lamúriajan dúna, ába lachíbuni lújabu jagíbugiñe gürígia, aríñageina.

—Máma áu lúnbei naríjin láu loúnwen wügüri madúnrunti le, jugúya lun jaríjini ñi.

²⁵ Ába jaríñagun sun gürígia.

—¡Wagía jáma warájüñü, wanüguba furúmieguarügi dúru wawoúguoun luágu loúnwen!

²⁶ Ábati lígiragüduni Piláto Barabási, ába loúnajan abeíchei Jesúsu, ába ledéregeruni lun ládarawagún luágu gurúwa.

²⁷ Lárigiñe, ába janügünü lisúdaaranigu gumádimati Jesúsu tíoun lúban Piláto, ába joúndaraguagüduniña sun súdaara geyégua láu. ²⁸ Ába jarágachunun lanáangun, ába jíchugun ában anáanguni funátu luágu, ²⁹ ába jíchugun ában rídi láuti jíyu lábulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰ Ába gíñe jásueraguni, janügeija mabúru ligía, jíchaaguei lábulugu. ³¹ Lárigiñe jéjerajan láu ítara, ába jagídarunun anáanguni funátu lueí, ába jadáürünun lanáangun luágu. Ába janügünü lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

³² Dan le áfurideina jáña lan, ába jadúnrugun lúma ában wügüri Cirénena, gíriti Simón, ába jafósuruni lun lanügünü lugúruwan Jesúsu.

³³ Ítara líña jachülürün lídoun ában fulásu gíriti Gólgota, líla líra, Lufúlasun Lábu Ichügü. ³⁴ Ni jíchiga diweín láu árani tídan lun Jesúsu lun látunun, joúcharügi lumútu, mátun lumútu.

³⁵ Dan le dáqua jamáali luágu gurúwa, ába jájurerun súdaara ubúnuruni lun jafánreinjanun lanáangun Jesúsu jádaangua. Ítara líña lagúnfulirun lé meja labürüjabei proféta. “Ájurera tiña ubúnuruni lun jaríjin cába lan jádaangiñe erédera

táu nanáangun." ³⁶ Ába jañúurun ñi lun joúnigiruni. ³⁷ Ába jíchugun ában abürüjoúni loúgiñe lichügü le ñí lubei laríñaga ca lan lidúnrunbei. Abürüjoúni ligía ítara líña. "Jesúsu le, le jarúeitebei juríu."

³⁸ Dáwaguatiña gíñe bián jíwerutiña luágua gurúwa lúma, ában lueígiñe loúnwenren, ában lueígiñe lubaúna. ³⁹ Já buriti ásügürubaña fígiñe, ába janábuni, ába jánjingichuni jachügü, ⁴⁰ aríñageina.

—Bugúya le gayáraabei bágurunun témpulu ábaya baráramagüdünun lídan ürüwa wéyu, sálbaguabá búngua. Ánjein Liraü bubei Búngiu, raríba lueígiñe gurúwa.

⁴¹ Ítara líña gíñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügüriña weírigutiña, láu, ábaja jaríñagun jámagua.

⁴² —Sálbati ámu, ánjein lúngua, siñáti lasálbaragun. Ánjein ligía lubeí Jarúeitebei Israelítagu, raríla lueígiñe gurúwa, afíñe wamámuga luágua. ⁴³ Rúlaali laffínen luágua Búngiu, sálbaleíti Búngiu guetó ánjein inárüni lubeí luágua jínsiñe lan lun, quei aríñagaali lan woun luágua Liraü lan Búngiu.

⁴⁴ Anába jamúti gíñe jíwerutiña ja dáwaguñubaña luágua jagúruwan úara lúma.

Loúnwen Jesúsu

(*Mr 15.33-41; Lc 23.44-49; Jn 19.28-30*)

⁴⁵ Ábati labúrigadun sun fulásu lúmagiñe amídirugu darí ladaúnrün ürüwa rábounwéyu. ⁴⁶ Queí buri óra méme ligía, ába lagúaragun Jesúsu jére.

—Elí, Elí, ¿láma sabáctani? —lila líra. Nubúngiute, Nubúngiute, ¿cásan uágua bígirana?

⁴⁷ Ñíñanu agáambuti jádaangiñe ja ñíbaña, ába jaríñagun.

—Lagúajaña wügüri le lun proféta Elías.

⁴⁸ Ába lídin ában jádaangiñe eíbaagueina anüga ában mudúsi, lárigiñe ladüdürügüduni táu diweín garüjütu ába líchuguni luágua ában wéwe, ába líncunun lun lun lachúrunun. Ába lachúrunun. ⁴⁹ Ába jaríñagun ja jíbiri.

—Ígirabeí, waríja ánjein ñübin Elías asálbarei.

⁵⁰ Ábaya ladügün Jesúsu ában agúaraguni jéreti, ábati loúnwen.

⁵¹ Lídan óra ligía, ába tajeíridagun tubélun témpulu lídan bián murúsun, íñugiñe lun ünabun. Ába ladágarun ában járabaganáli, ába láwarajan dübü. ⁵² Ába lánjunrenchúnga umúajaü, águyuguatiña sarágu jádaangiñe afíñetiña luágua Búngiu já meja jiláguaañábaña. ⁵³ Ába jáfuridunga lídaangiñe jamúaja lárigiñe lásaarun Jesúsu lídaangiñe oúweni. Ába jebélurun lídoun

ubúrugu Jerusalén le biníwabei, le ñí lubei jaríjaña sarágu gürígia.

⁵⁴ Léti jábuti súdaara jáma súdaara ja oúnigirubalin Jesúsu, dan jasándirunbalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraü Búngiu wügüri le.

⁵⁵ Ñíñanu sarágu würíña aríagua dísigiñe, ja afálarubalin Jesúsu lúmagiñe Galileagiñe íderagua jameí. ⁵⁶ Ñíñoun María Magdaléna jádan, María to lúguchu Jacóbo lúma José, túma jáguchu lirajüñü Zebedéo.

Labunúniwa Jesúsu

(*Mr 15.42-47; Lc 23.50-56; Jn 19.38-42*)

⁵⁷ Dan le agúñedeina líña lubeí, ába liábin ában wügüri rísite gíriti José, lídaangiñeti fulásu le gíribei Arimatéa, jádaangiñeti gíñe ja afálarubalin Jesúsu. ⁵⁸ Ábati lídin aríjei Piláto, ába lamúriajadi lúgubu Jesúsu lúma. Ábati laríñagun Piláto lun líchugúniwa lun, ⁵⁹ ába lanügüni José, ába loúburaguni tídan ában gamísa jarúmatu. ⁶⁰ Ába líchuguni lídoun lumúaja iséri lé yebe lachígagüdübei lubárua luágu dübü. Lárigiñe ladáuruni umúajaü láu ában dübü weíriti luágu lubéneri, ába lídin. ⁶¹ Ñíñounti María Magdaléna túma to ában María ñun ligíbugiñe umúajaü.

Oúnigirutiña ligíbugiñe lumúaja Jesúsu

⁶² Larúgan, lárigiñe aráansejani lubá luwéyuri eméraaguni, ába joúdin jábutigu fádirigu jáma fariséogu aríjei Piláto, ⁶³ ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja moúnwengili luágu lásaaruba lan luágu lürüwan wéyu lárigiñe loúnwen. ⁶⁴ Oúnajagubeibá achoúrurei umúajaü daríme lürüwan wéyu, mayábin jamámuga láni disípulugu áriebu íwerueji lúgubu, ábame jaríñagun joun gürígia luágu saráali lan. Weíritimaajalímeti lagúmujoún iyéeni le sügü láu le furúmiñeti.

—Ába laríñagun Piláto joun.

—Barüjuma fiú súdaara, jeíba choúru jumeí umúajaü le lubuídun-ägei juáraati.

⁶⁶ Ábati joúdin, ába jachoúruruni dübü le luágubei umúajaü, ába jígiruniña súdaara lun joúnigiruni.

28

Lásaarun Jesúsu lídaangiñe oúweni

(*Mr 16.1-8; Lc 24.1-12; Jn 20.1-10*)

¹ Dan le lásügürünbei luwéyuri eméraaguni áni arúgadeina líña dimáasu, ába joúdin María Magdaléna túma to ában María

ariíei umúajaü. ² Sódini, ába ladágarun ában járabaganáli jéreti óra ligía láu larárirun ában láni Wabúreme ánjeli siélugiñe, ába liábin luágun umúajaü, ába lagídaruni dübü le áubei ladaurúa, ába lañúurun luágu. ³ Miríti ánjeli ligía quei ában labírijanoúga, tiábin lanáangun, jarú jarú. ⁴ Dan le jaríjinbalin súdaara, ába jadádagarun láu anúfudei, ába jeréderun camá jiláguaña. ⁵ Ábati laríñagun ánjeli ligía joun würíña jagía.

—Manúfude jumá. Subúsiti nun luágu jáluajañein lan Jesúsu le ádarawagúbei luágu gurúwa. ⁶ Úati ya, saráali quei laríñaguni. Jigoúgu jaríjei fulásu le ñíjin lubeí líchugúa, ⁷ ábame jídin furése, ábame jaríñagun joun láni disípulugu luágu saráali lan, luágu ningiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸ Ába joúdin würíña jagía oúfudagueina, láu anúfudei lúma sarágu ugúndani, ába joúdin eíbaagueina aríñagei joun disípulugu. ⁹ Súnti añája lan luágu üma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába joúburuni lugúdi. ¹⁰ Ába laríñagun joun.

—Manúfude jumá. Jeíba awísaraña nánigu lun joúdin Galiléoun, luágu ñíba lan jaríjana.

Cátei le jabájüdagubei súdaara

¹¹ Dan le joúdiña lubeí würíña, ligía joúdin jádaangiñe súdaara ja oúnigirubaña, ába joúdin ubúru, ába jabájüdaguni le asúseredubei joun jábutigu fádirigu. ¹² Ába joúdin ábutigu ja adímureja jáma wügúriña weírigutiña lídan jafíñen juríu lun jebélurun jáma lídoun ában úarani, ába jichugun sarágu seínsu joun súdaara, ¹³ ába jaríñagun joun.

—Jaríñagame luágu dan lan le anjünja lan arúmuga áriebu, ába lan jayábin láni Jesúsu disípulugu, ába jíwerujani lúgubu. ¹⁴ Ánjein lasúbudira gumádimati cátei le, wadímurejaba luágu jáni fuleísei lúma lun madüğün lan ni cáta jáu.

¹⁵ Ábati jerésibiruni súdaara jagía seínsu, ába joúdin adügei le uágubei laríñawagúa joun. Ítara liñáti jaríñaguni juríu chülü lúmoun dan le.

Líchugun Jesúsu jadásin disípulugu (Mr 16.14-18; Lc 24.36-49; Jn 20.19-23)

¹⁶ Ába lubeíti joúdin únsu disípulugu Galiléoun luágu wübü lé meja uágubei laríñaga Jesúsu joun lun joúdin. ¹⁷ Dánti le jaríjinbalin Jesúsu, ába jájuduragun lun, láu sun añájein lan jádaangiñe, loúguati jafíñen luágu ligía lan. ¹⁸ Ába liábin Jesúsu jawágun, ába laríñagun joun.

—Rúaali sun ubáfu nun siélu lúma uboúagu. ¹⁹ Jeíbati jabügürü gürígia ja lílana sun fulásu, adüga jumáña nánime

disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu. ²⁰ Arúfudaja jugúyame joun lun gagáambadi jamá lun sun le uágubei nariñaga jun. Subúdi jumeí luágu anájein lan júma ságü wéyu darime lagúmuchun uboú. Ítaralá.

UGÁNU BUÍTI LE LABÜRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucristu, le Liraü Búngiu, ² latátira láu lagúnlirúniwa dimúrei lé meja labürüjabei proféta Isaías, laríñaga.

Niján noúnagüle, lína Búngiu, noúnajañein bubáragiñe, amürü le Niraü,

lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queísi ladárarúniwa üma surúti.”

⁴ Lun lagúnlirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñübinbaña lun luágu lúnti lan jasáansiruni ligáburi joúserun lun ferúdunawa lan jafígoun, badísei jagíame. ⁵ Ábatija jayábin lídaangiñe sun Judéa lúma sun Jerusalén agáambei lapúrichijan. Dántija le jagúfeseruni jafígoun, ábajei labásteragüdüniña Juan lídan dúna le gíribei Jordán.

⁶ Mebégitu lanáangun Juan, láutu lúra caméyu, lagürüga lamídan, guérü, chigángaru leígibaña lúma síruudu le áraabuna.

⁷ Lariñagaja joun gürígia lídan lapúrichijan.

—Liábinba ában le gabáfutimaati nárigiñe, weíriti lubáfu nueí darí lun madüna nan ni lun nélemuchun afáragadei tagürüga ligeídin. ⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdüni Juan lídan dúna le Jordán. ¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu quei jamúga ában únjun. ¹¹ Ában lagaambúniwa ában umálali siélugiñe aríñaguti.

—Amürü niraü le jínsiñebi nun, gúndaatina báu.

Loúchaguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanügüni Sífiri Sándu Jesúsu lídoun fulásu mageírawati, ¹³ ába leréderun Jesúsu bián-wein wéyu ñi

jagánagua anímaalugu janárimetiña. Sun dan le láubei ñi, ába loúchaguni Máfia, lárigiñe, ába jayábin ánjeligu lun jeténirun lun.

*Lagúmeseruni Jesúsu luwádigimari lídan fulásu le góribei Galiléa
(Mt 4.12-17; Lc 4.14-15)*

¹⁴ Lárigiñe ladaürüniwa Juan, ába lídin Jesúsu Galiléa apúrichijei ugánu butí lúmagiñeti Búngiu. ¹⁵ Ába laríñagun.

—Chülüyüji dan lun lagúmeserun larúeijan Búngiu, sáansi jumeí ligáburi joúserun, afíñe jumá luágu ugánu le lánina asálbaruni lídaangiñe figoú.

Lagúarun Jesúsu joun gádürü esénijatiña lun jafálaruni

(Mt 4.18-22; Lc 5.1-11)

¹⁶ Luágu ában wéyu, eíbugeina líña Jesúsu láru láru dúna le góribei Galiléa, ába laríjini Simón lúma Andrés le lamúlen. Esénijani lubeígia jawádigimariebi, jáguruñati óra ligía. ¹⁷ Ába laríñagun joun.

—Jigoúgu nárigi, falá jumana, madíajanjadünme úduraü, gürígiajañame jadíaja nun.

¹⁸ Ába jígirunun jasénin furése furése, ába joúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraü Zebedeo, láu sun Juan le lamúlen, tídaañanu ában ugúnein arámadajoun jasénin. ²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába joúdin lúma Jesúsu.

Ában gürígia gawáguti ában espíritu wuríbati

(Lc 4.31-37)

²¹ Ába jachüllürün lídoun fulásu le góribei Capernaúm lídan wéyu le eméraaguagülei, ába lebélurun Jesúsu tídoun jalígilisin juríu, ába lagúmeserun arúfudaja joun. ²² Weírito janígi gürígia láu sun le laríñagubei Jesúsu joun ladüga larúfudajan joun láu ubáfu, máma quei arúfudajatiña lilúrudun Moisés. ²³ Ñíñein ában wügüri tídan ligílisi tugúya láu ában espíritu wuríbati, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábiñasan lun bagünrichaguniwa? Subúdi numúti cátabu lan, láu amürü lan Búngiu Irájü le sándubei.

²⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

²⁶ Ába loúwejgüduni espíritu wuríbati gürígia ligía, ába láfuridun lídaangiñe, wágueina. ²⁷ Sun ja ñíbaña, ába laweíridun janígi, ába jálugüdagun jámagua.

—¿Cáteisan le? ¿Cáteisan iséri arúfudajani le? ¡Gürígia le, gabáfuti lun gíñe lagúmadiruniña espíritu wuríbatiña áni agáamba jamúti!

²⁸ Ába lagaambúniwa luágú Jesúsu lídan sun Galiléa furése.

*Lareídaguagüdünun Jesúsu límenidi Simón Pédro
(Mt 8.14-15; Lc 4.38-39)*

²⁹ Dan le jáfuridunbei tídaangiñe ligílisi tugúya, ába lídin Jesúsu lúma Jacóbo láu Juan jábiñe Simón lúma Andrés. ³⁰ Roun tiñati límenidi Simón, tabíruajaña, ába jaríñagun lun Jesúsu luágú sándiñoun lan. ³¹ Ábatí lídin tuágun, ába lárügündüni tújabu, ába liñúragunun, lídan meme óra ligía ába tareídagun, ába tásaarun, ába teténirun joun.

*Lareídaguagüdün Jesúsu sarágu sánditiña
(Mt 8.16-17; Lc 4.40-41)*

³² Dan le lálüdün wéyu, gúñeeli, ába janügüniwa sun sánditiña jáma sun ja gawágubaña espíritugu wuríbatiña lun Jesúsu, ³³ ába joúndaragun sun lílana fulásu lubádu béna. ³⁴ Areídaguagüdati Jesúsu sarágu sánditiña ja láutiña ámuñgueinarügú luwúyeri sándi, sagá ligía sarágu espíritugu wuríbatiña jaweí gürígia. Mígiruntijati lun jadímurejan espíritugu jagía, ladüga subúdi jamáni cáteñein lan.

*Lapúrichijan Jesúsu Galiléa
(Lc 4.42-44)*

³⁵ Lubá larúgan, dan le búrigagili, ába lásaarun Jesúsu, ába láfuridun boúgudin lueí ubúrugu lídoun ában fulásu le mageírawati lun layúmuragun lun Búngiu ñi. ³⁶ Ába lídin Simón jáma líbirigu áluajei. ³⁷ Dan le jadáriruni, ába jaríñagun lun.

—Añájeintia sarágu gürígia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ñi, ladüga lun napúrichijan lídan sun fulásu niábin uboúagun.

³⁹ Ítara líña lubeíti eíbuga lumúti Jesúsu sun Galiléa apúrichijeina tídan buri jalígilisin juríu lídan sun fulásu, aságajeina ligía espíritugu wuríbatiña jaweí gürígia.

*Lareídaguagüduni Jesúsu ában gawáguti gumeín luágú sun lúra
(Mt 8.1-4; Lc 5.12-16)*

⁴⁰ Ába liábin ában gürígia sánditi láu gumeín luágú sun lúra, ába lájuduragun ligibugiñe Jesúsu, ába layúmuragun lun, laríñaga.

—Gayáraati bareídaguagüdünina ánjabu busúen.

⁴¹ Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía. ⁴³ Ábatí loúnajani Jesúsu ñígiñe láu ában furése, aríñageina lun.

⁴⁴—Mabájüdaguabeítia lun ni ában, ñüdünrügübá arúfudagua búngua lun jafádirin juríu, ábame bíchuguni badágaragüdün luágu barúmadun queísi laríñaguni lilúrudun Moisés. Ítara lúba jaríjini gürígia luágu areídaguaadibu lan.

⁴⁵ Ábarüga lídin, ába labájüdaguni sun le asúseredubei lun joun sun gürígia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá gürígia. Láu sun líra, ñübin mémetiña lídaangiñe sun fulásu aríjei.

2

*Lareídaguagüduni Jesúsu ában wügüri le derégüdaali lúgubu
(Mt 9.1-8; Lc 5.17-26)*

¹ Átiri wéyu lárigiñe, ába lagíribudun Jesúsu Capernaúm, ába jagáambun gürígia luágu giríbujali lan. ² Ába joúndaragun sarágu gürígia darí lun mabáraaña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun. ³ Ñíñein apúrichija, ligía jayábin gádürü wügüriña barüína jagía ában wügüri le derégüdaali lúgubu. ⁴ Queísiti siñá lubei jachülürün le ñí lubei Jesúsu ladüga jíbe gürígia, ába jagídarun murúsun lueígiñe tábulugu müna loúgiñe le ñí lubei Jesúsu, ába jarárigüduni sánditi ñígiñe tídan lubárari. ⁵ Dan le laríjinbalin Jesúsu jaffíñen, ába laríñagun lun le sándibei.

—Niraü, ferúdunawaali bifígoun.

⁶ Ñíñanu jádaangiñe arúfudajatiña lilúrudun Moisés ja ñúnbaña ñí, ába jasáminarun. ⁷ “¿Cásan uágu ladímueraja gürígia le ítara? Lanábaguñeiga le Búngiu, ladüga úati ni ában gayáraati ferúduna lan figoú lueídügya Búngiu.” ⁸ Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara? ⁹ ¿Cáteitimasan ménreengunbei laríñawagún lun sánditi le. “Ferúdunawaali bifígoun”, o laríñawagún lun. “Sarába, budáboun bubárari, beíba”? ¹⁰ Narúfudaaliti jun luágu gabáfu nan, áu le Wügüri Garaüwarügti lun ferúduna nan figoú.

Ába laríñagun lun sánditi.

¹¹—Sarába, budáboun bubárari, beíba águyu.

¹² Ába lásaarun sánditi lídan óra ligía, ába labúdunun lubárari, ába láfuridun ñígiñe, aríagu sun ja ñíbaña lun. Weíriti janígi ja ñíbaña luágu cátei le, ába jíchugun uweíriguni lun Búngiu, aríñageina.

—¡Maríjíñajágidiwa cátei ítara buriti!

*Lagúarun Jesúsu lun Leví lun lánigume
(Mt 9.9-13; Lc 5.27-32)*

¹³ Ñígiñe, ábaya lídin Jesúsu láru dúna, dan le jayárafadun sarágu gürígia lubádun, ába larúfudajan joun. ¹⁴ Lásun larúfudajan joun, ába lasígiruni leíbugun, ába laríjini Leví, le liraü Álfeo, ñun líña le ñí lubei lagúburajoúa liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

¹⁵ Murúsun óra lárigiñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumádi, jáma ámu gafíountiña ñun luágu dábula úara lúma, jáma láni disípulugu, ladüga sarágu jáña afálaruti. ¹⁶ Ja arúfudajatiña lilúrudun Moisés, jáma fariséogu, dan le jaríjinbalin eíga jáma sun wuríbatiña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafíountiña?

¹⁷ Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía buséndaña surúsia. Máma lubeíti niábiña áluaja gürígia buítiña ligíbugiñe Búngiu, niábiña áluajaña ja gafíounbaña lun lasáansirún joúserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

¹⁸ Luágu ában wéyu, dan le jayúnarun lánigu Juan jáma jánigu fariséogu lun jagúnculirun lúma Búngiu, ába jayábin fiú gürígia álögüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnculirun lúma Búngiu, ánjaña báni disípulugu mayúnaruntiña?

¹⁹ Ába loúnabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajoútiña lídan ában maríei dan le níjein lan adári ñi jáma? Ánjein níjein lubeí adári ñi, siñáti jayúnarun, lúnti jeígin. ²⁰ Lachülürüba dan lun lanügüniwa adári jámagiñe, ligíameti jadáani lun jayúnarun.

²¹ ‘Máfadajoúntu anáanguni binádujaru táu gamísa to macháwaragungiru, ladüga le méme tífe gamísa to macháwaragungiru tajeíridaguboun to binádujaruboun dánme le tacháwaragun, laweíridatimaabati jeíriti. ²² Meserúnwati gíñe bínu le isérigili lídoun ában ágei guéru le binádujali ladüga laboúchagubei bínu iséri guéru binádu dánme le liñúrun. Féridimeti bínu, féridi guéru. Bínu iséri lúnti leserúniwa lídoun guéru iséri.

*Játüjan disípulugu türígu lídan wéyu le eméraaguagülei
(Mt 12.1-8; Lc 6.1-5)*

²³ Ában wéyu le eméraaguagülei, eíbugeina líña Jesúsu jáu láni disípulugu labádinagua bunáguaü, ába játüjan láni disípulugu türígu dan le jásügürün. ²⁴ Ába jaríñagun fariséogu lun Jesúsu.

—¡Aríjabá joun bánigu! ¿Cásan uágu jadüga wadágimanu le moún lumuti ladügüniwa lídan wéyu le eméraaguagülei?

²⁵ Ába laríñagun joun.

—¿Malíjangidün luágu le ladügübei Davíd luágu ában dan, dan le lalámachunbei, ligía jáu sun líbirigu? ²⁶ Ába lebélurun ligílisirugun dan le Abiatár lan fádiri le íñutimaabei, ába leíginun fein to sagráuboun, to majoúaboun jeíginun ámu gürígia jaweídügüya fádirigu según lilúrudun Moisés, áni ru ligía joun gürígia ja lúmabaña. Mámati figoú le ladügübei Davíd ligíbugüñe Búngiu.

²⁷ Ába gíñe laríñagun Jesúsu joun.

—Lun wügüri ladügüwa wéyu le eméraaguagülei, máma wügüri adügüwabei lun wéyu ligía. ²⁸ Ligía gabáfutina gíñe, áu le Wügüri Garaúwarügti, lun naríñagun cába lan gayára ladügüniwa lídan wéyu le eméraaguagülei.

3

*Ában wügüri jiláali ában lújabu
(Mt 12.9-14; Lc 6.6-11)*

¹ Ábaya lebélurun Jesúsu tídoun ában jalígilisin juríu, ñíñeinti ában wügüri jiláali ában lújabu. ² Jaríjati ja ñibaña ánjein lagáranijaba lubeí Jesúsu lun lídan wéyu le eméraaguagülei, lun jadárirun lidúnrun. ³ Ába laríñagun Jesúsu lun le jiláalibei újabu.

—Sarába, ráramabá ya jagíbugüñe súngubei.

⁴ Ába lálügünduniña ja jíbiri.

—¿Cátei lúnbei ladügüniwa lídan wéyu le eméraaguagülei, lun jíderawagúniwa gürígia ódi lun ladügüniwa wuríbati joun, lun leséfurúniwa jabágari ódi lun jígorúniwa lun joúnwen?

Sun jagía, ába jámanichun. ⁵ Ábati laríaguniña Jesúsu láu igáñi lúma íruni ladüga tidére janígi. Ába laríñagun lun wügüri ligía.

—Tulébei bújabu.

Ába látuleruni, ába lareídagun. ⁶ Ába jáfuridun fariséogu, ába jagúmeserun adímureja jámagua jáma gíñe lánigu Heródes ída lúba lan jáfaruni Jesúsu jilágubei.

Sarágu gürígia láru dúna

⁷ Ába lídin Jesúsu jáu láni disípulugu lárun dúna, ába jafálaruni sarágu gürígia Galiléana. ⁸ Dan le lagaambúnbei luágu oúnwenbun buri cátei le ladügübei, ába jayábingua gürígia

Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogíñe, lúma Sidóngiñe lun jaríjini.⁹ Ligía laríñagunbei Jesúsu joun láni disípulugu lun aráanseñu jamá ában ugúnein lubá lueí jámuruduni sarágu gürígia jagía,¹⁰ ladüga queí gíbeeña lan lareídaguagüdün, sun sánditiña, ába jáguragun joúngua luágun lúnrügü jagúuruni lun lareídaguagüduniña.¹¹ Dántija le jaríjini ja gawágubaña espíritugu wuríbatiña, ábaja jájuduragun ligibugiñe, ába jagúaragun espíritugu jádaangiñe.

—Liraü Búngiu amürü.

¹² Ába lewéridiruniña Jesúsu lun maríñagun jamá cátieñein lan.

Lanúadiruniña Jesúsu dúusu apóstolugu

(Mt 10.1-4; Lc 6.12-16)

¹³ Lárigiñe, ába lamúdeirun Jesúsu luágun ában wübü ñí lubei lagúara joun ja labúseerubaña queísi loúnagülegu, ába jayábin lun.¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asálbaruni.¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatiña.¹⁶ Niján jíri dúusu wügüriña jagía. Simón, le únbei lagúaja Jesúsu Pédro,¹⁷ Jacóbo láu Juan le lamúlen, ja lirajüñü Zebedeo, ja únbaña lagúaja Jesúsu Boanérges —míni lan líra, Lirajüñü Wayújururu,¹⁸ Andrés, Felipe, Bartolomé, Matéo, Tomás, Jacóbo le liraü Álfeo, Tadéo, Simón —ában meja wügüri le áfaaguti lun jawáanserun juríu,¹⁹ lúma Júdas Iscarióte le alúgurubalin Jesúsu.

Aríñagatiña luágu lubáfu lan Máfia lúmabei Jesúsu

(Mt 12.22-32; Lc 11.14-23, 12.10)

Lárigiñe, ába jagíribudun járigoún, ába jebélurun tídoun ában múna,²⁰ ábaya joúndaragun sarágu gürígia ñí darí lun madáani jamá ni lun jeígin.²¹ Dan le jasúbidirunbalin lidújeñu Jesúsu ca lan ásügürübei, ába jayábin lún yebe janügüni, ladüga jaríñagun gürígia luágú wuríbaali lan lichügü.

²² Ñíñanu arúfudajatiña lilúrudun Moisés ja achülürubaña Jerusaléngiñe, ába jaríñagun.

—Wügüri le, njíjein Beelzebú, le Máfia, le jábuti espíritugu wuríbatiña, lúma, láu lubáfu Máfia laságaja espíritugu wuríbatiña.

²³ Ábati lagúarun Jesúsu joun lun jayárafadun lubádun, ába líchugun ában jémpulu joun, ába laríñagun.

—¿Ída lúba gayára lan laságaruni Máfia Máfia guánarügü?²⁴ Furúmieguarügü arúejani le afánreinraguti lun jageíndagun jámagua, lagünrinchaguba,²⁵ áni ánjein fánreingujaña lubeí idújeñu ladüga wuríbu jádaangua, siñábei jadúrarun

idújeñu jagía queísi idújeñu. ²⁶ Ánjein lubeí jamúgati afáreinragua Máfia, lageíndaguame lúmagua, siñábei ladúrarun, lagúmuchagülerügei le.

²⁷ 'Uati ni ában lun lebélurun lúbiñoun ában wügüri le jéreti lun lanügüni lílagu ánjein magüragun lan wügüri jéreti ligía furúmiñe. Ítara rügüñein gayára lan lanügüni lílagu.

²⁸ 'Láu sun ninárün naríñagun jun luágu gayára lan ferúdunawa lan sun figoú lúma sun wuríbani le laríñagubei gürígia, ²⁹ lueídügüya lun jadímurejan wuríbati luágu Sífiri Sándu, siñábei ferúdunawa lan figoú líra, leréderuba lidúnrun lun sun dan.

³⁰ Laríñagunbalin Jesúsu líra, ladüga jaríñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu

(Mt 12.46-50; Lc 8.19-21)

³¹ Lárigiñe, ába tachülürün lúguchu Jesúsu jáu lamúlenu tubádun muna to ñí lubei Jesúsu, ába jeréderun boúgudi, ába joúnagüdün luágu. ³² Jati ñúnbaña geyégu láu Jesúsu, ába jaríñagun lun.

—Nurántia búguchu jáu bamúlenu boúgudi, jáluajañádibu.

³³ Ába laríñagun joun.

—¿Cági núguchuboun jáu namúlenu?

³⁴ Ába laríagun jawágun ja ñúnbaña geyégu láu, ába laríñagun.

³⁵ —Añája núguchu jáu namúlenu, ladüga furúmieguarügü ja adügüti lugúndan Búngiu, jagía namúlenubaña, nítunu, núguchu.

4

Jémpulu luáguti ábunaguti

(Mt 13.1-9; Lc 8.4-8)

¹ Ábaya lagúmeserun Jesúsu arúfudaja láru dúna, ába joúndaragun sarágu gürígia le ñí lubei. Quei gíbeyaaña lan gürígia ñi, ába ládinun Jesúsu tídoun ában ugúnein to ñíboun dúnarugu. Ába lañúurun ñi, ába jeréderun sun gürígia láru béya.

² Ábati larúfudajan sarágu cátei joun láu jémpulu, laríñaga joun.

³ —Agáamba jumána. Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburujan murúsun lídaangiñe luágun üma, ába jayábin dunúru, ába jeígini.

⁵ Líbiri, ába láburujan labádinaguóún dübü le ñí lumuti úa lan sarágu múa, ába laboúchun furése ladüga majúlin lan múa. ⁶ Dan le lásüdün wéyu, ába lásaürün, queíti málagüle lan, ába loúnwen. ⁷ Líbiri ílaü, ába láburujan labádinaguóún jíyu, ába laweínamudun jíyu úara lúma, ába lañáradaguagüduni, magíinduntiti nádü ligía. ⁸ Níjeinti lídaangiñe, áburujati lídoun múa buíti, ába laboúchun, ába laweínamudun, ñma lubuídun

alúbajoúti lídaangiñe! Níjein lídaangiñe, íchuguti darándi águu luágu cáda ában águu, líbiri rúti ürüwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

*Le lébubei larúfudajan Jesúsu joun gürígia láu jémpulu
(Mt 13.10-17; Lc 8.9-10)*

¹⁰ Lárigiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálugüdüni ca lan lílabei jémpulu le. ¹¹ Ába laríñagun joun.

—Jugúya, subúdigüda láali Búngiu cátei arámudaguati le lánina larúeijan jun, ánjaña ja mebéresenbaña láu lererun, láu jémpulu laríñawagúa cátei luáguti larúeijan joun, ¹² lun dánme lan jaríjin, ibidiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásiñerun jagíribudun lun Búngiu lun ferúdunawa lan jafígoun.

*Lafúnraanguagüdüni Jesúsu jémpulu luáguti ábunaguti
(Mt 13.18-23; Lc 8.11-15)*

¹³ Ába laríñagun joun.

—¿Úatisan gunfaráanda jumáni le? ¿Ída lubági gunfaráanda jumáni líbiri jémpulu? ¹⁴ Le ábunagubalin líla nádü, ítara líña quei le apúrichijabalín Lererun Búngiu. ¹⁵ Añájein gürígia, ítara jáña quei üma le uágunbei láburuja lídaangiñe líla nádü, ába jagáambuni Lererun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi. ¹⁶ Jíbiri gürígia, ítara jáña quei dübü le abádinaguoúnbei láburuja lídaangiñe líla nádü, ába jagáambuni Lererun Búngiu, ába jerésibiruni láu ugúndani. ¹⁷ Quei márügüdüñi lubeí Lererun Búngiu tídan janígi buídu, madúrati jádan, dánti le larijíniwa jábun, o jeíbaajoúniwa lan lueígiñe Lererun Búngiu, magúraasuntiña. ¹⁸ Jayábin jíbiri, ítara jáña quei jíyu le abádinaguoúnbei láburuja lídaangiñe líla nádü, ába jagáambuni Lererun Búngiu, ¹⁹ weíritimaati jafúudun luágu cátei le lánina ibágari le, ába leyéeduniña irísini. Sun le, ába láfaruni Lererun Búngiu tídaangiñe janígi, mígiruntiti lun lalúbajoún jádan gürígia jagía. ²⁰ Añájein gíñe gürígia, ítara jáña quei múa buíti le ídounbei láburuja lídaangiñe líla nádü, ába jagáambuni Lererun Búngiu, ába jerésibiruni, alúbajoúati cátei buíti jádaangiñe. Buíti jagáburi quei líla nádü le íchugubei darándi águu luágu ában, o ürüwa-wein, o san.

*Jémpulu luáguti lámpu
(Lc 8.16-18)*

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábula líchugúa lun larúgoungadágüdün múnada. ²² Úati lubeíti ni cáta le arámudaguati lun mafúnraangudúnbei lan, úa ligía ni cáta le ibídiñewati lun masúbudirúnwabei lan. ²³ Agáamba jumána, jugúya le garígeirugubei lun jagáambun.

²⁴ Aríñagati gíñe joun.

—Toúnigi jumátia lun jagúnculirun lúma inárüni le jagáambunbei. Láuba jagúnculiruni, gunfaráandatima jumáni le nariñagubei jun. ²⁵ Ítara líña, gürígia le aténirubei buídu lun nerérun, gunfaráandatima lumúti, áanjeinti le meténibeí lun, labúlieidubei sun le agáamba láalibeí.

Jémpulu luáguti nádü le aweíridubei

²⁶ Aríñagati gíñe Jesúsu.

—Ítara líña larúeijan Búngiu quei le asúseredubei lun ában wügüri le ábunubei líla nádü lábugiñe múa, ²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülü dan ába laboúchun nádü, ába laweíridun, ibídiñeti lun ábunaguti ída líña lan lasúseredun. ²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuínchun ílewei láu ílaü. ²⁹ Dánti le funáali líla nádü, ába látüjoúniwa ladüga chülüjali lan dan lun lalúbajoún.

Jémpulu luáguti tíla mostásä

(Mt 13.31-32; Lc 13.18-19)

³⁰ Aríñagati gíñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabeí wíchuguni lúmoun? ³¹ Ítara líña quei ában tíla mostásä le abunúti lábugiñe múa. Tíla mostásä, ligía ában lídaangiñe ílaü le ñüraütimaabei uboúagu, ³² dan le labunún, ába laweíridun, ligía weíritimaabei tídaangiñe sun nádü, weínamuti lilímun darí lun gayára lan jeméraagun dunúru lábugiñe lamúñounga le líchugubei.

Layúsuruni Jesúsu jémpulu

(Mt 13.34-35)

³³ Ítara liñájei larúfudajan Jesúsu luágu larúeijan Búngiu joun láu sarágu jémpulu líbe le darí le ñí lumuti gayára lan gunfaráanda jamá. ³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagüduni sun jémpulu joun láni disípulugu dan le jagíarügü lan lúma.

Lagálumaruni Jesúsu garábali lúma lugúdi barána

(Mt 8.23-27; Lc 8.22-25)

³⁵ Wéyu méme ligía, dan le lagúñedunbei, ába laríñagun Jesúsu joun láni disípulugu.

—Queímoun loubáfurugun dúna.

³⁶ Ábatí jígiruniña bürübunu gürígia jagía, ába janügüni Jesúsu tídan ugúnein to gádaanbaliña. Ñínoun buri gíñe ámu ugúnein úara jáma. ³⁷ Ába láfuragun ában garábali jéreti, ába lebélujan lugúdi barána tídoun ugúnein darí lún yebe tabuínchun láu dúna. ³⁸ Larúmuguñati Jesúsu tiyúna ugúnein baláñu tuágú ában ichügübarari. Ába jagágudajani, ába jaríñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeínjan lun garábali, ába laríñagun lun barána.

—¡Maníba! ¡Derégüdagubá!

Ába lagálumadun garábali, ába darángila lan sun cátei. ⁴⁰ Ábatí laríñagun joun láni disípulugu.

—¿Cásan uágu luweírinbei janúfude? ¿Cásan uágu mafíñen jubeí?

⁴¹ Ába jeréderun láu luweírin janígi, ába jálugüdagun jámagua.

—¿Cátei funásan le, garábali lúma barána ñüdüntiña láu le lubeíbei?

5

*Ában wügüri Gadárana le gawágubei máfianu
(Mt 8.28-34; Lc 8.26-39)*

¹ Ába jachülürün loubáfurugun dúna lídoun fulásu le góribi Gadára. ² Lárigiñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achigítí luágu dübü luágun, wügüri ligía gawáguti ában espíritu wuríbati. ³ Lidan jabára jiláaña lagánoua áni úati ni ában gayáraati lagüraguni, ni láu güríngüri. ⁴ Güráguañája jamáali láu güríngüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni. ⁵ Súnwandanja leíbugun áriebu wéyuagu agúarajeina luágu buri wübü lúma buri lídan jabára jiláaña íbiagua lúngua láu dübü. ⁶ Dan le laríjinbalin gürígia ligía Jesúsu disegiñein, ába leíbaagun lubároun, ába lájuduragun ligíbugiñe, ⁷ ába lagúaragun lun.

—¿Cásan uágu bemétera númoun, Jesúsu Liraü Búngiu le Íñutimaabei? Ayúmuraguatina bun luágu líri Búngiu lun masúfuriragüdün bánina.

⁸ Lariñagunbei ítara ladüga guméseeli lan Jesúsu aríñaga lun.

—¡Espíritu wuríbati, ígirabeí gürígia le!

⁹ Ába lálugüdüni Jesúsu.

—¿Ca bíri?

Ába loúnabun.

—Lejión níña ladüga gíbetiwa.

¹⁰ Ába jayúmuragun espíritugu jagía lun Jesúsu lun moúnajan lániña boúgudin lueí fulásu ligía. ¹¹ Queíti ñíñanu lan sarágu büíruju eíga ñi luágu wübü, ¹² ába jayúmuragun espíritugu wuríbatíñia jagía lun.

—Oúnaja báwa jádoun büíruju jára, rúba üma woun lun webélurun jádoun.

¹³ Ábati líchugun Jesúsu üma joun, ába jáfuridun lueí gürígia ligía, ába jebélurun jádoun büíruju. Ñíñanu jawára bián-mílu büíruju. Ába jáguragun büíruju jagía joúngua lueígiñe ában gudúungu, ába jáburujan baránajoun, ába jañáradagun.

¹⁴ Ábati janúfudedagun ja oúnigirubaliña büíruju jagía, ába jeíbaagun abájüdaguei le asúseredubei ubúrugu lúma áraabu. Ába jayábingua gürígia arijei ca lan asúseredubei. ¹⁵ Dan le jachülürünbei le ñí lubei Jesúsu, ába jaríjini gürígia lé meja gawágubei espíritugu wuríbatíñia ñun líña, táoñein gíñe lanáangun, areídaguaali, ába janúfudedagun. ¹⁶ Játí aríjubalin, ába jabájüdaguni le asúseredubei lun gürígia lé buga gawágubei espíritugu wuríbatíñia lúma jawáguti büíruju, joun. ¹⁷ Ábati jayúmuragun lun Jesúsu lun láfuridun lídaangiñe jageíra.

¹⁸ Dan le ládinun Jesúsu tídoun ugúnein, ába layúmuragun wügüri lé buga gawágubei espíritugu wuríbatíñia lun lun lídin lúma, ¹⁹ májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladügübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájüdaguei sun le ladügübei Jesúsu láu lídan sun fulásu Decápolis, ába laweíridun janígi súngubei.

*Liraiü Jáiro, túma wiüri to agúurubarun lanáangun Jesúsu
(Mt 9.18-26; Lc 8.40-56)*

²¹ Dan le lagíribudunbei Jesúsu tídan ugúnein loubáfurugun dúna, ába jayábingua bürübunu gürígia le ñíjin lubeí, ába leréderun ñi láru dúna. ²² Ábati liábin ában jádaangiñe tábuti jalígilisin juríu, gíriti Jáiro. Dan le laríjinbalin wügüri le Jesúsu, ába lájuduragun lubádu lugúdi, ²³ ába layúmuragun lun ítara.

—Nújein niraü toúwe, queímoun bíchigei bújabu tuágu, areídagua támuga, moúnwen támuga.

²⁴ Ába lídin Jesúsu lúma, sarágu jáña gürígia afálarutiña, ába buriti jámurudaguni Jesúsu. ²⁵ Jádaanti sarágu gürígia ja, ñíñoun ában würi sánditu, dúusu irúmu táo láu lésejan jítäu tídaangiñe. ²⁶ Súfurijaru sarágu jámagiñe surúsiagu áni gásta táali sun le túmati, mareídaguntu, gáwoun gueínarügü. ²⁷ Ligía tagáambun ladímurejoún luágu Jesúsu, ába tiábin lanágangiñe jádan sarágu gürígia, ába tagúurunun lanáangun,

28 ladüga taríñagun túnguarügü. “Láurügüme nagúrunun lanáangun nareídaguba.” 29 Lidan óra ligía, ába leréderun lésejan jítäu tueí, ába tasándiragun túngua luágu areídaguaaru lan. 30 Ábatı lasándiruni Jesúsu luágu areídaguagüdaali lan gürígia láu lubáfu, ába lagáraragun jawágun gürígia ja lanágangiñébaña, ába lálügündajan.

—¿Ca agúurubei tuágu nanáangun?

31 Ába jaríñagun láni disípulugu lun.

—Aríagu biñátia lun jíbe gürígia ya luágu murúgu jáña lan, álögüdajágidibu ca lan agúurubei buágu?

32 Ába laríaaajan Jesúsu áluaja ca lan agúurubei luágu. 33 Ába tiábin würi tugúa adádagareina láu anúfudei, subúdiñuteí le asúseredubei tun, ába tájuduragun ligibugíñe, ába taríñaguni sun inárüni lun. 34 Ába laríñagun Jesúsu tun.

—Niraü, areídaguaadibu ladüga baffínen. Beíba láu darángilaü, areídaguañu lídaangiñe bisándi.

35 Nígili Jesúsu adímureja, ligía jayábin lúbiñegiñe wügüri lé buga ñüdünbei oúgei luágu tisándi liraü, ába jaríñagun lun túguchi irájü tugúa.

—Jilátia biraü, ¿ca uágu bebéresea lun maésturu guetó?

36 Agáamba lumúti Jesúsu le jaríñagubei, ába laríñagun lun wügüri ligía.

—Manúfudedabá, afíñerügübá.

37 Májatiti joúdin ámu lúma lueídügya Pédro, Jacóbo lúma Juan le lamúlen Jacóbo. 38 Dan le lachülürünbei lúbiñoun wügüri ligía, ába laríjini chagáguäü jáma gürígia ja ayájubaña, agúaraja. 39 Ába lebélurun, ába laríñagun joun.

—¿Cásan uágu jareíncha, ayájua buri jugúa ítara? Moúnwentutia irájü to, tarúmuguña.

40 Ába jéjerajan láu. Ábatı láfuridagüdüniña Jesúsu súngubei nígiñe, ába lanügni túguchi irájü túma túguchu jáma ja ñüdünbaña lúma, ába lebélurun le ñíjin tubeí irájü. 41 Ába lárügündüni tújabu, ába laríñagun tun.

—Talíta, cumi—líla líra. Niraü, sarába.

42 Lidan óra ligía, ába tásaarun irájü tugúa, ába teíbugun. Weíyaraüjaru, dúusu irúmu táo. Ába laweíridun janígi gürígia ja ñíbaña. 43 Ába líchugun Jesúsu dimúrei derégüdati joun lun mabájüdagun jamáni ni ca un, ába laríñagun joun lun jíchugun eígnini tun.

6

*Jesúsu lídan fulásu le Nazarét
(Mt 13.53-58; Lc 4.16-30)*

¹ Ába lídin Jesúsu ñígiñe, ába lagíribudun lageíroun, ába joúdin láni disípulugu lúma. ² Dan lachülürün wéyu le eméraaguagülei, ába larúfudajan tídan jalígilisin juríu, sarágu jáña gürígia agáambei, ába laweíridun janígi láu larúfudajan, ába jaríñagun.

—¿Jalía funásan lafúnrendeirei gürígia le sun le? ¿Cáteisan lichú áu le luágubei? ¿Ída liñásan gayára lubeí ladáagun miláguru? ³ Saráfangeiga le tiraü María le, líbugaña Jacóbo, José, Júdas, lúma Simón, ñáñanu gíñe lítunu wáma.

Ába jíchugun mabájüduni luágu. ⁴ Ába laríñagun Jesúsu joun.

—Sun gürígia, gúndaatiña láu ában proféta jaweídüguya ja lupaísanun jáma lidújeñu, jáma ja titlana lúban, jagía rügüñanu íchiga mabájüduni luágu.

⁵ Ligía lásiñerunbei ladügün ámu miláguru ñi lueídüguya líchugun lújabu jawágu biñáraü sánditiña, ába lareídaguagüduniña. ⁶ Weírititi lanígi láu mafíñen jamá. Lárigiñe, ába leíbuguni lirajüñü fulásu, arúfudajeina.

Loúnajaniña Jesúsu láni disípulugu apúrichija

(Mt 10.5-15; Lc 9.1-6)

⁷ Ába loúnajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatiña. ⁸ Rúti dimúrei joun lun manügün jamá ni cáta luágu jeíbugun lueídüguya bádun, moún lumuti janügün ni fein, ni ságü, ni seínsu, ⁹ lun geídi tan jasábadun, lun mabíaman tan jasímisin. ¹⁰ Ába gíñe laríñagun joun.

—Dánme le jebélurun lídoun ában fulásu apúsaraja, reídei jumá ñi tídan ában méme múna darí jáfuridun lídaangiñe fulásu ligía. ¹¹ Ánjaänti merésibirúniwa lídan ában fulásu, mája jagía jagáambunüñ, furíjuma ñígiñe, ábame jáfuruduni calíqui lueígiñe jugúdi, liseínime magúndani jáu lítana fulásu ligía, ígira jumáña quei jadáriragun joúngua. Le ninárün jáu luágu dánme lan lachülürün luwéyuri Búngiu lun lagúseragüduniña sun gürígia, maweíribei jabeichúniwa Sodómana jáma Gomórrana quei lítana fulásu le merésibirunbalüñ.

¹² Ábati jáfuridun, ába japúrichijan joun gürígia luágu lúnti lan jasáansiruni ligáburi joúserun. ¹³ Sagátiña gíñe sarágu espíritugu wuríbatiña jaweí gürígia, jurúgua jagía aíli jawágu sarágu sánditiña, ába jareídaguagüduniña.

Loúnwen Juan le abásteragüdajabei

(Mt 14.1-12; Lc 9.7-9)

¹⁴ Queíti eíbaajali lubeí luáguti Jesúsu lídan sun fulásu, ába gíñe lachülürün lábun lagáambun urúei Heródes. Sarágu jáña ariñagutiña.

—Saráya Juan le abásteragüdajabei lídaangiñe oúweni, ligía luweírinbei lubáfu.

¹⁵ Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

¹⁶ Dan le lagáambunbalin Heródes sun le, ába laríñagun.

—Juan le, le nadürüragüdübei ichügü, saráaya lídaangiñe oúweni.

¹⁷ Lé meja asúseredubei, oúnajali meja Heródes adáürei Juan, ába lagüraguni láu güríngüri furísunrugu tadüga Heródias. Würi tugúya, lúmari meja Felípe, le lamúlen Heródes, ába lanügünun Heródes lúmarime. ¹⁸ Ába meja laríñagun Juan lun Heródes.

—Moún lumuti bagámaridunun lúmari bamúlen.

¹⁹ Ába liyéreegudun Juan tun Heródias, ába tabúseerun táfaruni jilágubei, ²⁰ siñá tumuti ladüga subúdi lan lun Heródes luágu ában lan wügüri le eíbuguti buídu lúma Búngiu Juan, áni ában lan wügüri esériwiduti lun Búngiu, janúfudetiti lueí. Ligía mája lubeí lun tadügün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani. ²¹ Ába tadáriruni Heródias ticháansin dan le lagúncularun Heródes irúmu, ába ladügün fédu jour gumádimatiña jáma jábutigu súdaara jáma ámu buri gürígia weírigutiña ja Galiléabaña. ²² Ába tebélurun tiraü Heródias ní lubei fédu le, ába tabínajan, gúndaatiti Heródes jáma sun ja níbaña eíga lúma láu tabínajan irájü to, ába laríñagun tun.

—Amúriajabeí le babúseerun núma, níchugubei bun.

²³ Rúlumuti leréruntun luágu líchugubei lan furúmieguarügü cátie le tamúriaian lúma tun, gayára lan lamídan lan fulásu le ní lubei larúeijan tamúriaia. ²⁴ Ába táfuridun, ába taríñagun tun túguchu.

—¿Cábasan namúriaia lúma?

Ába taríñagun tun.

—Amúriajabeí lábulugu Juan le abásteragüdajabei lúma.

²⁵ Ába tebélurun irájü to furése le níjin lubeí urúei, ába taríñagun lun.

—Buséntina lun bíchuguni lábulugu Juan le abásteragüdajabei nun lídan ában asíedu guelé guelé.

²⁶ Ába lajírudagun urúei sarágu, quei rúlaali lan leréruntun áni agáambagu jáña amísurajoútiña lun, májati lun míchu lubeí lan le tamúriaabei lúma tun. ²⁷ Furése furése, ába loúnajan urúei ában súdaara láu dimúrei lun lanügüni lábulugu Juan lun. ²⁸ Ába lídin súdaara ligía furísunrugu, ába ladürürüni lábulugu Juan, ába

lanüguni lídan ában asíedu. Ába líchuguni tun irájü tugúya, ába tíchuguni tun túguchu.

²⁹ Dan le jagáambunbalin lánigu Juan, ába jayábin lun janüguni lúgubu, ába jábununi.

Leígagüdün Jesúsu seíngü mílu wügürriña

(Mt 14.13-21; Lc 9.10-17; Jn 6.1-14)

³⁰ Lárigiñe jagíribudun láni Jesúsu apóstolugu, ába joúndaragun lúma, ába jabájüdaguni sun le jadügübei lúma le jarúfudajabei, lun. ³¹ Ába laríñagun Jesúsu joun.

—Jigoúgu, queímoun weméraagua lídan ában fulásu le mageírawati.

Laríñagubaalin líra ladüga ñíñanu sarágu gürígia, jíbiri ñüdün, jíbiri ñübin, darí lun madáani lan Jesúsu jáma láni disípulugu ni lun jeígin. ³² Ába joúdin tídan ába ugúnein lídoun ában fulásu mageírawati. ³³ Sarágu jáña aríjiti joúdin, dan le jasúbudiruni luágu níjein lan Jesúsu jádan, ába jeíbaagun geyégu láu lagúnu lídaangiñe sun lirajüñü fulásu, ába jachüllürün lubáragiñe lachüllürün Jesúsu jáu láni disípulugu. ³⁴ Dan le larárirunbei Jesúsu tídaangiñe ugúnein, ába laríjin sarágu gürígia jagúrabajañein, ába jagúdemedagun lun ladüga ítara jáña lan quei mudún ja moúniritiña. Ába lagúmeserun arúfudaja sarágu cátei joun. ³⁵ Dan le dárijali, ába jayábin láni disípulugu, ába jaríñagun lun.

—Dárüjalitia áni úatiña aganoútiña lídan fulásu le. ³⁶ Oúnaja báña gürígia ja lun joúdin lídoun buri lirajüñü fulásu le yaráfabei lun jagáñijan fein, ladüga úati ni cáta ya lun jeígin.

³⁷ Ába laríñagun Jesúsu.

—Rújuma eígnini joun.

Ába jaríñagun lun.

—¿Gayáraati funági woúdin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súngubei.

³⁸ Laríñaga Jesúsu joun.

—¿Átiriñoungi fein júma? Jeíba aríjoun.

Dan le jaríjinun, ába jaríñagun lun.

—Seíngü fein jáma bián úduraü.

³⁹ Ába lañúuragüduniña gürígia sagádirugu. ⁴⁰ Ába jañúurun san san lúma dimí dimí san, queísi laríñagun joun. ⁴¹ Ába lanügunun Jesúsu seíngü fein to lújaburugu jáma bián úduraü ja, ába laríjin siélun, ába leteíngiruni Búngiu tuágu, ába lagúbachagúnun, lárigiñe, ába lamúrusujanun lun líchugunun joun láni disípulugu lun jafánreinjanun jádan gürígia jagía, fánrein jamáña gíñe bián úduraü jagía jádan súngubei. ⁴² Joútiña

sun jagía químule. ⁴³ Lárigiñe, ába jabuínchagüdün dúusu faníñe láu tífe fein lúma úduraü ígiragúti. ⁴⁴ Seíngüñanu mílu wügüriña eígitíña, mabájüdünga würiña jáma irájüñü.

*Leíbugun Jesúsu ligíbuagu dúna
(Mt 14.22-27; Jn 6.16-21)*

⁴⁵ Ába ládinagüdüniña Jesúsu láni disípulugu tíoun ugúnein lun jánjiñuragun lubá lun jachülürün Betsáida, sun niján lan ayoúragua joun gürígia. ⁴⁶ Dan le ñüdünjaña, ába lídin luágu wübü ayúmuragua lun Búngiu. ⁴⁷ Dan le lagúñedunbei, lamídaanjaru dúna ugúnein jáu disípulugu, Jesúsu rugáali lábugua müarugu. ⁴⁸ Ába laríjin luágu jénreenguja lan joun lun jénjunjan ladüga jabárouñein lan garábali. Lubá larúgan, ába lídin Jesúsu jawágun eibugeina ligíbuagu dúna, lásügürá yebe jáu. ⁴⁹ Dan le jaríjini eibuga ligíbuagu dúna, ába jarítagun luágu úfiaü lan, ába jagúaragun, ⁵⁰ ladüga sun jagía aríja jamúti, ába janúfudedagun. Ába ladímuñeran joun, ába laríñagun.

—¡Ganígi jumá! ¡Manúfude jumá, áu le!

⁵¹ Ába ládinun tíoun ugúnein jámoun, ába lagálumadun garábali. Ába laweíridun janígi láu, ⁵² ladüga úagili lan gunfaráanda jamáni miláguru le ladügübei táu fein, luágu gabáfu lan lun sun cátei, derégili jachügü.

*Lareídagüdüniña Jesúsu sánditiña Genésaret
(Mt 14.34-36)*

⁵³ Ába jánjiñuraguni dúna, ába jachülürün Genésaret, ába jagürünun ugúnein láru dúna. ⁵⁴ Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan. ⁵⁵ Ába jeíbaagun lídoun sun fulásu aríñaga luágu chülijali lan, ába jagúmeserun gürígia anáaja sánditiña tídan jabárari le ñíjin lubeí jagáamba luágu níjein lan Jesúsu ñi. ⁵⁶ Súnti fulásu ñíjin lumúti lebélura, ubúrugu yébe, lirajüñü yébe fulásu, áraabu yébe, ába jíchaajoún sánditiña ümada, ába jamúriajan lúma lun lígiruniña lúnrügü jagúrun sánditiña jagía luágu táru lanáangun. Súnti ja agúurubaña luágu, areídaguatiña.

7

*Cátei le adilgübalin gürígia lun marúman lan ligíbugiñe Búngiu
(Mt 15.1-20)*

¹ Ába jayábin fariséogu jáma jádaangiñe arúfudajatiña lilúrudun Moisés ja ñübinbaña Jerusaléngiñe, luágun Jesúsu.

² Ába jaríjin luágu añájein lan jádaangiñe disípulugu machíbun jamúti jájabu lubá jeígin según jagáburi juríu. ³ (Falá jamuti fariséogu jáma jíbiri juríu binádu jagáburi binádu jagübürigu lun meígin jamá, machíbunga jameí jájabu sarágu weíyasu.

⁴ Dan le jayábin mágidirugugiñe, meíginbaña magúñfulirunga jagía láu jachíbuni jájabu. Níjein buri gíñe sarágu luwúyerigu igáburi jafálarun, queí buri lachibúniwa wéru, soúdieru, boúlu, asíedu.) ⁵ Ábati jálugüdüni fariséogu jáma arúfudajatiña lilúrudun Moisés jagía, Jesúsu.

—¿Cásan uágu mafála jabálin báni disípulugu binádu jagáburi binádu wagübürigu, jeíginbei láu liwíye jájabu?

⁶ Ába loúnabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi lueí le áubei jarúfudagua júngua. Aríñagati. Gúrígia ja, jayumárurügü jíchiga inébesei nun, líña Búngiu, ánjein tídan janígi, mebéresentiña náu.

⁷ Málati jájuduragun nun,

ladüga lé rügüñein jagúmadijan wügüriña jarúfudaja.

⁸ Ába laríñagun Jesúsu.

—Ígira jumáali lagúmadijan Búngiu lun jafálaruni binádu jagáburi binádu gúrígia. lachibúniwa soúdieru, wéru, lúma cátei líbeina líra. ⁹ ¡Maésturugu gíñe buítíña jugúya, ígira jumúti lagúmadijan Búngiu lun jafálaruni binádu jigáburi! ¹⁰ Aríñagatí meja Moisés. “Inébe jamá bagübürigu bun, le anábagubaliña lagübürigu, jilála.” ¹¹ Ánjeinti jugúya, aríñagatün luágu gayára lan laríñagun ában gúrígia lun lúguchi o tun lúguchi. “Siñáti níderagunibu ladüga sun le númabei, aríñagaadina luágu lun lan níchuguni lun Búngiu”, ¹² luágu furúmieguarügü lan le aríñaguti ítara, mámaali lan lúnti líderaguniña lagübürigu. ¹³ Láu líra, mebégigüda jumáali lagúmadijan Búngiu lun jafálaruni binádu jigáburi, adüga jugúya sarágu cátei líbeina líra.

¹⁴ Ábaya lagúarun Jesúsu joun gúrígia ja ñibaña, ába laríñagun joun.

—Agáamba jumána, sun jugúya, gunfaráanda jumáname. ¹⁵ Úati ni cáta ebéluruti lídoun gúrígia lun laríbadagüdüni ligibugiñe Búngiu, le áfuridubei tídaangiñe lanígi gúrígia, ligía aríbadagüdübalin ligibugiñe Búngiu. ¹⁶ Jugúya le garígeirugubei lun jagáambun, agáamba jumána.

¹⁷ Dan le lígiruniña Jesúsu gúrígia jagía, ába lebélurun múnadoun, ába jálugüdüni láni disípulugu luágu jémpulu le.

¹⁸ Ába laríñagun joun.

—¿Úati lubeí gíñe gunfaráanda jumá? ¿Úati gunfaráanda jumáni luágu sun lan le ebélurubei boúgudigiñe lídoun gúrígia siñá lan laríbadagüdüni ¹⁹ ladüga mebéluti tídoun lanígi, lurágeirugun lebélura, ñígiñe ábaya láfuridun lídaangiñe?

Láu líra laríñaguña luágu sun lan eígini, jarúmati. ²⁰ Aríñagati gíñe.

—Le áfuridubei lídaangiñe gürígia, anáti líra, wuríbagüda lumúti,²¹ ladüga lídaangiñe gürígia o tídaangiñe lanígi láfurida lagübüri samínaü, adultériu, salúfuri, áfarajaní,²² íwerujaní, wámajabúni, iyéreejabúni, iyéeni, marícharagun lan ibágari, gimúgaü, marásualugú, anáanguni únguaü, medéraaguaguduni.²³ Sún buri cátei wuríbatí le, tídaangiñe lanígi gürígia liábin, ligíati mabuídundagüdübalin ligíbugiñe Búngiu.

*Ában würi teréncha to afiñeruboun luágu Jesúsu
(Mt 15.21-28)*

²⁴ Ába lídin Jesúsu ñígiñe loúbawagun Tíro lúma Sidón. Ába lebélurun tídoun ában múna áni mabúseerunti yebe lun lasúbudiruni ni ában. Siñáti larámudagun,²⁵ furése, ába tagáambun ában würi luágu, túguchu ában irájü gawágutu ában espíritu wuríbatí. Ába tiábin, ába tájuduragun ligíbugiñe Jesúsu.²⁶ Würi tugúya, máma juríu, Síro-Feniciána. Ába tamúriajan lúma Jesúsu lun laságaruni espíritu wuríbatí le tueí tiraü.²⁷ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tichugúniwa joun oúnli.

²⁸ Ába toúnabuni.

—Ánja Nabúreme, oúnli ja lábugiñebaña dábula gayáraati gíñe jeígin tídaangiñe tífe fein to jágujaboun isáanigu.

²⁹ Ábati laríñagun Jesúsu tun.

—Adímurejadibu buídu, gayáraajali bídin, furíja espíritu wuríbatí tídaangiñe biraü.

³⁰ Dan le tachülürün múnada, ába tadárirunun irájü tídan gabána, furíjali espíritu wuríbatí tídaangiñe.

Lareídagüdüni Jesúsu ában magáambaditi, mariñagadi

³¹ Ába láfuridun Jesúsu loúbawagugiñe Tíro, ába lásügürün Sidóngiñe lúma lídaangiñé buri fulásu lánina Decápolis, ába lachülürün luágun barána Galiléa.³² Ni janüga ában wügüri magáambaditi, dagádaga lerérungun lun, ába jamúriajan lúma lun líchuguni lújabu luágu lun lareídagüdüni.³³ Ába ladíñurun Jesúsu ñígiñe láu jaweí gürígia, ába ládaruni bián lirájüñü lújabu larígeirugun, ába lásuerun, ába lájurudunun liñéñe láu arürei.

³⁴ Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénda!

³⁵ Ába lánjunrenchun larígeirugu magáambaditi ligía, ába tánjingichun liñéñe lun ladímurejan buídu.³⁶ Ába laríñagun Jesúsu joun lun mabájüdagun jamáni ni ca un, létilma laríñagun

joun lun mabájüdagun jamáni, ligátima jabájüdaguni. ³⁷ Ábatí buri laweíridun janígi sarágu, ába jaríñagun.

—Adüga lumúti sun cátei buídu, darí lun lagáambagüduniña magáambaditiña, adímuregüda láña maríñagaditiña.

8

*Leígagüdün Jesúsu gádürü mílu gürígia
(Mt 15.32-39)*

¹ Lídan dan ligía, ábaya joúndaragun sarágu gürígia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña gürígia ja nun ladüga ürüwa wéyu jáu núma ya áni úaalí ni cáta jáma lun jeígin. ³ Ánjaña noúnaja águyu meíginga, ladágaruba falálaü jawágu ümada, ladüga añájein jádaangiñe, díseti ñígiñe lumúti jayábin.

⁴ Ába joúnabuni láni disípulugu.

—¿Ída lubáti jeígagüduniwa ya lídan fulásu le mageírawaguti?

⁵ Ába lálügüduniña Jesúsu.

—¿Átiriñoun fein júma?

Ába jaríñagun lun.

—Sédü.

⁶ Ába lañúuragüduniña gürígia múarugu, ába lanügünun sédü fein tugúa lújaburugu, ába líchugun eteíngiruni lun Búngiu. Ába lagúbachagunun, ába lamúrusujanun, ába líchugunun joun láni disípulugu, ába jafánreinjanun jádan gürígia jagía. ⁷ Ñíñanu gíñe átiri jarájüñü úduraü jáma, ába líchugun eteíngiruni jawágu, ába lafánreinragüduniña. ⁸ Joútiña sun jagía químule, buíngüdagíña sédü faníñe táo tífe to ígiraguboun. ⁹ Yaráfañanu joun gádürü mílu wügüriña. Ába loúnajaniña Jesúsu águyu, ¹⁰ ába ládinun tídoun ugúnein jáma láni disípulugu, ába joúdin Dalmanutoún.

*Jamúriajan fariséogu miláguru lúma Jesúsu
(Mt 16.1-4; Lc 12.54-56)*

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriajan lun larúfudun ában miláguru joun, siélugiñe. ¹² Ába lawáragun Jesúsu weíri, ába laríñagun.

—¿Cásan uágu jamúriaja gürígia ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ládinun tídoun ugúnein, ába lídin loubáfurugun dúna.

*Jarúfudajan fariséogu quei ísi
(Mt 16.5-12)*

¹⁴ Bulíei jamútiti disípulugu janügün eígini, ában rügüñoun fein jáma tídan ugúnein. ¹⁵ Ába lewéridiruniña Jesúsu, laríñaga joun.

—Toúnigi jumátia lueí jísíte fariséogu lúma lísite Heródes.

¹⁶ Ába jaríñagun disípulugu jádaangua.

—Ladügatia meígan wamá fein laríñagubei ítara.

¹⁷ Ába lasúbudiruni Jesúsu jarítagun, ába laríñagun joun.

—¿Ca uágu jaríñaga luágu meígan jumá fein? ¿Úagili gunfaráanda jumá, meféen jugúya? ¿Ítara lidére jichügü?

¹⁸ ¿Maríjintün láu jágu, magáambun jugúya láu jarígeirugu? ¿Marítagun jumáali? ¹⁹ Dan le nafánreinjanbarun seíngü fein jádan seíngü mílu wüguriña, ¿átiriñoun faníñe táu tífie jabúdun?

Ába jaríñagun.

—Dúusu.

²⁰ —Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdun?

Ába jaríñagun.

—Sédü.

²¹ Ába laríñagun joun.

—¿Úagili gunfaráanda jumá luágu máma lan tuágu fein nadímureja?

Lareídagüdüñin Jesúsu ában maríjinti Betsáida

²² Lárigiñe, ába jachülürün Betsáidoun, ába lanügüniwa ában marijínti lun Jesúsu, ába jayúmuragun lun lun lagúurun luágu.

²³ Ítara líña lárügündüni Jesúsu maríjinti ligía, ába lanügüni bougudín lueí fulásu ligía. Ába lájurudagun arürei luágu lágu, ába líchuguni lújabu luágu, ába lálügündüni ánjein gayáraaraü lubeí laríjin. ²⁴ Ába laríjin, ába laríñagun.

—Aríja numútiña wüguriña, naríjiniña quei tídibu wéwe, eíbugeina.

²⁵ Ábaya líchuguni Jesúsu lújabu luágu lágu, ába laríjin gürígia ligía láu goúnigi, ába lareídagun, ába laríjini sun cátei furáangu.

²⁶ Ába loúnajani Jesúsu águyu, aríñageina lun.

—Mebélurabátia ubúrugun, maríñagunbeíme lun ni ában ñi.

Lariñaguni Pédro luágu Jesúsu lan Crístubei

(Mt 16.13-20; Lc 9.18-21)

²⁷ Lárigiñe, ába lídin Jesúsu jáu láni disípulugu lídoun buri lirajüñü fulásu le geyéguabei láu ubúrugu Cesaréa le Filípo. Ümada, ába lálügündüniña láni disípulugu, laríñaga joun.

—¿Cátanasan jaríñagun gürígia?

28 Ába joúnabun.

—Añájein aríñagutiña luágua Juan lan le abásteragüdajabeí lan aműrû, jíbiri aríñaga proféta Elías ban, añájeingua aríñagutiña luágua ámu lan proféta aműrû.

29 Ába laríñagun.

—Ánti jugúya, ¿cátanati lídan jarítagun?

Ába laríñagun Pédro lun.

—Aműrû Crístubeí, le loúnajabeí Búngiu lun lasálbaruniña gürigia lídaangiñe jafígoun.

30 Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágua loúñwen

(Mt 16.21-28; Lc 9.22-27)

31 Ába lagúmeserun Jesúsu, le Wügüri Garaüwarügüti, arúfudaja joun luágua lúnti lan lasúfurirun sarágu, luágua weíribei lan jíchugun wügüriña weírigutiña lídan jafíñen juríu mebéresení láu, ítara lúba gíñe joúseruni jábutigu fádirigu jáma arúfudajatiña lilúrudun Moisés. Aríñagati joun luágua láfarúaba lan jilágubei, áni lásaaruba lan lídaangiñe oúweni lúnya labágaridun luágua lürüwan wéyu. **32** Furáanguti laríñaguni le joun. Ábati lanügünü Pédro Jesúsu ñigiñe, ába lagúmeserun adeínja lun. **33** Ába lagáraragun Jesúsu, ába laríjin jawáguna láni disípulugu, ába lébechuni Pédro, ába laríñagun lun.

—¡Díseba nueí, Máfia! Bugúa, masáminaruntibu quei Búngiu, basáminarun quei wügüriña.

34 Ábati lagúarun Jesúsu joun láni disípulugu jáma jíbiri gürigia lun jayárafadun lun, ába laríñagun joun.

—Le busénti lafálarunina, bulíeileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanügünü ában wügüri lugúruwan, falálana. **35** Ladüga le abúseeruti leséfuragun lúngua ya uboúagu lefériderubeí ibágari le magúmuchaditi, ánjeinti le ánjabei leférideruni libágari ya uboúagu nueígiñe, libíjubei ibágari le magúmuchaditi siélu. **36** ¿Cági ju lan lun gürigia lagáñeiruni sun le lánina uboú, lefériderime lubára siélu? **37** Úati ni cáta lánina uboú le áuti gayára lan lagáñijan gürigia lubára siélu. **38** Le anügüti busíganu nuágua lúma luágua nerérun jagíbugiñe gürigia müaraantiña áni gafíountiña ja, nanügüba gíñe busíganu láu, áu le Wügüri Garaüwarügüti, dánme le niábin siélugiñe láu luweírigun Núguchi, geyégu jáu ánjeligu ja sándubaña.

—Ninárün jáu, luágu añájein lan jádaangiñe ja yábaña guetó, moúnwenbaña darí jaríjini lachülürün larúeijan Búngiu láu ubáfu.

Lámuñedagun larijín Jesúsu

(Mt 17.1-13; Lc 9.28-36)

² Sísi wéyu lárigiñe, ába lanügüni Jesúsu Pédro, Jacóbo, lúma Juan, ába lídin jáu luágu ában wübü íñuti le ñí lumuti gayára lan jábugua jamá, ába lámuñedagun larijín ñi jagíbugiñe. ³ Ába támiridun lanáangun jarú quei jeméreedu, weíriti tíjarun chülü lúmoun úa jamá ni gürígia uboúagu gayáraati jachibun gamísá lun tájarudun ítara. ⁴ Ába jaríjini Elías lúma Moisés ayánuja lúma Jesúsu, ⁵ ába laríñagun Pédro lun Jesúsu.

—Maésturu, jlidan dan awánja lan ya! Adüga wamá ürüwa dibásein, ában bun, ában lun Moisés, ában lun Elías.

⁶ Laríñagubaalin líra ladüga janúfude disípulugu, áni ibídiñeti lun Pédro ca lan laríñagubei. ⁷ Ába larárirun ában juánriñu le ñíjin jabeí, ába ladáuragun jáu, ába lagaambúniwa ában umálali lídaangiñe juánriñu ligía le aríñagubei.

—Niján Niraü le jínsiñebi nun, jeíba láu le lubeíbei.

⁸ Lídan óra ligía, dan le jaríjin geyégu ñi, maríjinjaña ámu ñi lueídügyüa Jesúsu.

⁹ Dan le arárireina jamá lueígiñe wübü, ába léredun Jesúsu jawágu lun mabájüdagun jamáni le jaríjibeí lun ni ában daríme saráali lídaangiñe oúweni lúnya labágaridun, ligía le Wügüri Garaüwarügüti. ¹⁰ Ligía jareídunbalin jádaangua, álügündajárügütiña jámagua cátei lán funa ásaarunibei lídaangiñe oúweni. ¹¹ Ábatí jálügündüni Jesúsu.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Crístubei?

¹² Ába loúnabuniña.

—Inárüni le jaríñagubei luágu Elíasba lan ñübin furúmiñe áni laráanserubei lan sun cátei. ¿Cági taríñagubei Lerérunt Búngiu nuágu, áu le Wügüri Garaüwarügüti? Aríñagatu luágu nasúfuriruba lan sarágu áni mabájüdünbadina lan. ¹³ Naríñajare jun luágu ñübinjali lan Elías, ába jadügüni gürígia sun le jabúseerunbei láu, quei taríñaguni Lerérunt Búngiu luágu ítara láuba lan lasúseredun lun.

Lareídaguagüdün Jesúsu ában irájü gawáguti espíritu wuríbati

(Mt 17.14-21; Lc 9.37-43)

¹⁴ Lárigiñe, ába jagíribudun le ñíjin jabeí jíbiri disípulugu, ába jaríjin sarágu gürígia geyégu jáu. Ñíñanu gíñe arúfudajatiña lilúrudun Moisés asígeneja jáma. ¹⁵ Dan le jaríjinbalin Jesúsu, ába laweíridun janígi láu jaríjini ñi, ába jeíbaagun abúsura lun. ¹⁶ Ábatí lálügündüniña, laríñaga joun.

—¿Ca uágu jasígeneja jáma?

17 Ába loúnabun ában jádaangiñe ja ñíbaña, ába laríñagun.

—Maésturu, niján niraü nanügün bun, níjein ában espíritu wuríbati luágu, merérunjali ladüga. 18 Ñí lumuti lárügüdei espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacúnrinjan lári. Ledébiliduñati ítara. Amúriaajaadina jáma báni disípulugu lun jaságaruni espíritu wuríbati le lueí, siñá jamuti.

19 Ába loúnabun Jesúsu, ába laríñagun.

—¡Gürígia mafíñeraditiña! ¿Átiribeísan dan lun neréderuni júma lubá gayára lan jaffínerun nuágu? ¿Ídame lagúmucha mafíñeni le jídaanbei? Barüjumei irájü ligía ñájoun.

20 Ába janügünü lun. Dan le laríjinbalin espíritu wuríbati ligía Jesúsu, ába loúwejagüduni irájü ligía, ába leíguadun múarugun, ába lagárabajan, ába láfurijan jacútaü liyúmulugugiñe. 21 Ába lálügündüni Jesúsu lúguchi, ába laríñagun lun.

—¿Átiri dan lueígiñe ítara lan?

Ába laríñagun lúguchi.

—Lúmagiñe ñüraügili. 22 Gíbeeli weíyaasu lájuchuruni espíritu wuríbati ligía wáтурugun o dúnarugun lan lún yebe láfaruni jilágubei. Ánjein lubeíti níjein lubeí gayára bumúti adüga, gudéme wamá bun, íderagua báwa.

23 Ába laríñagun Jesúsu lun.

—¿Ca uágu baríñaga ítara? Inárüni luágu gayára lan nadügünü. Sun cátei gayáraati lun le afíñebesi.

24 Ába lagúaráragun lúguchi irájü ligía.

—¡Afíñetina, íderagua bána lúntima nafíñerun!

25 Dan le laríjinbei Jesúsu luágu furésetimájali lan jagíbedun gürígia, ába ladeínjan lun espíritu wuríbati ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabeí irájü le áni mebéluradügyabá lídoun.

26 Ába lagúaráragun espíritu, ábaya loúwejagüduni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan. 27 Ába lárügündüni Jesúsu lueígiñe lújabu, ába liñúraguni, ába laráramun.

28 Ábati lebélurun Jesúsu múnadoun, ába jálügündüni láni disípulugu dan le jábuguarügaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

29 Ába laríñagun joun.

—Ladüga líbe espíritu le, láu rügüñein ayúmuraguni lun Búngiu lúma ayúnaruni gayára lan láfuridun.

*Ladímuerajaanya Jesúsu luágu loúnwen
(Mt 17.22-23; Lc 9.43-45)*

30 Dan le joúdin nígiñe, ába jásügürün Galiléagiñe,
31 mabúseeruntiti Jesúsu lun lasúbudirúniwa jalíñañein lan
ladüga larúfudajaña lan joun láni disípulu, aríñageina ligía
luágu lederegeruába lan, ligía le Wügüri Garaúwarügüti,
jájaburugun wügüriña wuríbatiña áni jáfarubei lan jilágubei,
ábame lásaarun lídaangiñe oúweni luágu lürüwan wéyu lúnya
labágaridun. 32 Úati gunfaráanda jamáni le laríñagubei joun, áni
janúfudetiña lun jálögüdüni.

*¿Cátima weírigubei?
(Mt 18.1-5; Lc 9.46-48)*

33 Ába jachülürün ubúrugu Capernaúm, múnada, ába
lálgüdüniña Jesúsu.

—¿Cásan buga uágu jadímueraja le eíbugeina jumá?

34 Ába jeréderun maníñu ladüga ümada adímuerejeina jañá
buga luágu ca lan jádaangiñe weírigutimaabei. 35 Ábati lañúrun
Jesúsu, ába lagúarun joun dúsugubei disípulu lubádun, ába
laríñagun joun.

—Le abúsueruti ligía lan furúmiñeti, lúnti agúmujoúni lan
jádan súngubei, lun gíñe lesériwidun joun súngubei.

36 Ába lanügün ában irájü, ába líchuguni jamídaangua, ába
lanüguni lújaburugu, ába laríñagun joun.

37 —Gürígia le erésibiruti ában irájü quei le lídan níri, resíbi
lumútina, áni máma rügüñein áu lerésibira, resíbi lumúti gíñe
Núguchi le oúnajabalina.

*Le mámabei wágani, wámagiñeñein
(Lc 9.49-50; Mt 10.42)*

38 Ába laríñagun Juan lun.

—Maésturu, aríjatiwa ában wügüri aságajati espíritugu
wuríbatiña lídan bíri, quei máma lan wámañein, ába
wawéridiruni lun madügündügüya láani.

39 Ába laríñagun Jesúsu.

—Mawéridira jumeí, ladüga úati ni ában le adügüti miláguru
lídan níri lun ladímuerajan wuríba nuágu. 40 Le mámabei wágani,
wámagiñeñein. 41 Ninárün jáu luágu furúmieguarügü lan le
íchuguti ában wéru dúna jun lídan níri ladüga láni jumá Crístu,
libíjuba afáyeiruajaü buíti.

*Goúnigi lueí leíguadúniwa lídoun figoú
(Mt 18.6-9; Lc 17.1-2)*

42 'Furúmieguarügü le afígoungüdüti ában jádaangiñe ja
isérígiñabaña lídan jafíñen nuágu, buítimaati jamúga lun lun
lágurúniwa baránajoún láu ában oúnwenbun dübü le amúligülei

gúráñu luágu ligíina sügü láu ladügünü cátei líra. ⁴³ Ánjabu lafigoungüda bújabu guánarü, buítimaati jamúga lun báchuguni, ladüga buítimaati jamúga bídin siélun láurügü ában újabu sügü láu jamúga badarún láu biángubei bújabu máfiougatin, ⁴⁴ ñí lubei moúnwen jamá jéweraü ja eígibalin jágubu jiláña, méñeguchadi wátu. ⁴⁵ Ánjabu gíñe lafigoungüda bugúdi guánarü, buítimaati jamúga gíñe lun báchuguni, ladüga buítimaati jamúga bebélurun siélun láu ában ugúdi sügü láu badarún máfiougatin láu biángubei bugúdi, ⁴⁶ le ñí lubei moúnwen jamá jéweraü, méñeguchadi ligía wátu. ⁴⁷ Ánjabu gíñe lafigoungüda bágu, buítimaati lun baságaruni, ladüga buítimaati jamúga bebélurun lídoun larúeijan Búngiu láu ában águu sügü láu jamúga badarún máfiougatin láu biángubei bágu, ⁴⁸ le ñí lubei moúnwen jamá jéweraü, méñeguchadi ligía wátu.

⁴⁹ ‘Sun gúrígia ja lánigubaña Búngiu, jouchúaba quei lau wátu geméti jawágu lun jarúmadagüdúniwa, queísigubeirügü líchugúniwa sálu luágu cátei adágaragüdúwati lun Búngiu, arúfuda lámuga luágu jarúma lan, buídu ligía lun lareidúniwa. ⁵⁰ Buíti sálu, ánjein leféridira lubásuan, ¿cábagi un ju lan? Ítara líña lubeíti, awánda jumeí sun ouchúni lubá jarúmadun ligíbugiñe Búngiu, lídan jumá úaraguni júmagua.

10

*Larúfudajan Jesúsu luágu ígiraguni
(Mt 19.1-12; Lc 16.18)*

¹ Ába láfuridun Jesúsu Capernaúmgiñe, ába lídin loúbawagun Judéa lúma luágun oúbaü le ñígiñe lubeí láfuacha wéyu libiti dúna le Jordán. Ábaya joúndaragun gúrígia le ñí lubei, ábaya larúfudajan joun queíñaja ligáburi. ² Ábatí jayábin jádaangiñe fariséogu luágun Jesúsu áluga járugüdúni tídan jasádaran láu jálugüdúni ánjein maríban lubeí lun lafánreinragun wügüri túma lúmari. ³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába jaríñagun lun.

—Aríñagati Moisés luágu gayára lan tíchugúniwa gárada lánina ígiraguni tun úmari.

⁵ Ába laríñagun Jesúsu joun.

—Líchugunbaalin Moisés gumádi líra jun ladüga tidére janígi.

⁶ Ánjein méja, dan le ladügünbalin Búngiu sun cátei, “adüga lumútiña wügüri túma würi”. ⁷ “Ligía lígirubei lubeí wügüri lúguchi túma lúguchi lun laganoúniwa túma lúmari, ⁸ ábame jeréderun quei ábanrügü.” Mámaña lubeíti biáma, ábanrügaaña.

⁹Ligía moún lubei lafánreinraguni wügüri le ladúnraguagüdübei Búngiu.

¹⁰Dan le múnada jamá, ábaya jálugüdüni disípulugu luágu cátei le, ¹¹ába lariñagun Jesúsu joun.

—Le ígirutu lúmari, ába lagámaridun ámu, ladügüña adultériu.

¹²Ánjein gíñe tígira würi túmari, ába tagámaridun ámu, tadügüña gíñe adultériu.

Labíniruniña Jesúsu irájüñü

(Mt 19.13-15; Lc 18.15-17)

¹³Ába janáajan gürígia irájüñü lun Jesúsu lun lagúrun jawágu, ába jagúmeserun disípulugu adeínja joun ja anáabajabiña.

¹⁴Dan le larijini Jesúsu, magúndaati láu, ába lariñagun joun.

—Ígira jumá lun jayábin irájüñü númoun, mamájara jumá, ladüga ja jarúmabaña afíñe quei irájüñü, jagía lílanabaña larúeijan Búngiu. ¹⁵Ninárün jáu luágu le lan marúfudunti ában igáburi ünabugubuti queísi ában irájü, siñábei lebélurun lídoun larúeijan Búngiu.

¹⁶Ába lanügüniña lújaburugu, ába labíniruniña láu lújabu jawágu.

Ladímurejan ában rísciti lúma Jesúsu

(Mt 19.16-30; Lc 18.18-30)

¹⁷Dan le lasígirunbalin Jesúsu luweíyasun, ába liábin ában wügüri eíbaagueina lubároun, ába lájuduragun ligíbugiñe, ába lálugüdüni ítara.

—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁸Ába lariñagun Jesúsu lun.

—¿Ca uágu baríñaga nun “buíti”? Ában rügüñein buíti, Búngiu.

¹⁹Subúditi gumádi bun. “Maganoúabá túma ában gámaritu ámu, máfarajabá, míwerujabá, madímurejabá iyéeni luágu ni ában, mayeeda báña gürígia, inébe jamá bagübürigu bun.”

²⁰Ába lariñagun wügüri ligía.

—Maésturu, gúnfulitina láu sun le lúmagiñe ñüraügidina.

²¹Ába laríaguni Jesúsu láu ínsiñeni, ába lariñagun lun.

—Ában cátei mégeibei lun badügüni. beíba, alúgurabeí sun le búmabei, ábame bíchuguni lebégi joun gudémetiña, ábame bibíjin irísini siélu. Ábame bagíribudun, ábame bafálarunina.

²²Dan le lagáambunbalin gürígia le cátei le, ába lírudagun, ába lídin láu íruni ladüga rísciti buídu. ²³Ába larijin Jesúsu geyégu jawágun súngubei, ába lariñagun joun láni disípulugu.

—Jénreenguti lun jebélurun ríscitiña lídoun larúeijan Búngiu!

²⁴Ába laweíridun janígi disípulugu láu le lariñagubei, ábaya lariñagun joun.

—Nirájüñü, ijénreenguti lun jebélurun ja íchubalin jafíñen luágu jarísin lídoun larúeijan Búngiu! ²⁵ Méreenguntimaati lun ában caméyu lun lásügürün lídaangiñe lujúyun ában agúsa sügü láu lebélurun ában rísitei lídoun larúeijan Búngiu.

²⁶ Dan jagáambunbalin cátei le, ába laweíridun janígi, ába jálögüdagun jámagua.

—¿Cáteiti gayáraabei lasálbarun?

²⁷ Ába laríaguniña Jesúsu, ába laríñagun joun.

—Siñáti jasálbaragun gürígia joúngua, ánjein Búngiu, gayáraati, ladüga úati ni cáta siñáti lun Búngiu.

²⁸ Ábati laríñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába laríñagun Jesúsu.

—Ninárün jáu luágu furúmieguarügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni, ³⁰ lerésibiruba san weíyaasu sügü láu guetó lídan uboú le. múna, amúlenu, íbugañanu, ítunu, úguchurunu, isáanigu, lúma fulásu, láu sun leíbaajoúniwa, resíbi ligíame ibágari magúmuchaditi siélu. ³¹ Sarágu jáña ja furúmiñetiñábaña guetó, jagíaba agúmujoúni yágüta siélu, áni sarágu ja agúmujoúnibaña, jagíaba furúmiñetiña.

Ladímureraanya Jesúsu luágu loúnwén

(Mt 20.17-19; Lc 18.31-34)

³² Luáguñanu üma lun Jerusaléoun, Jesúsu jabá jabá láni disípulugu, láuñanu luweírin anígi, áni jíbiri gürígia ja afálarubaliña, láuñanu anúfudei. Ábayati ladíñurun Jesúsu jáu láni dúusu disípulugu jaweí jíbiri gürígia, ába lagúmeserun aríñagei le lúnbei lasúseredun lun joun. ³³ Ába laríñagun joun.

—Quei lubeí jaríjini, luáguñadiwa üma lun Jerusaléoun, le níba lubeí nedéregerúa, áu le Wügüri Garaüwarügti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiadirunina lun noúnwen. ³⁴ Ábame jedéregerunina joun ja mámabaña juríu lun jéjerajan náu, jabeíchubadina, jáquieragubadina, ábame jáfarunina jilágubei, luágume lürüwan wéyu, ábame násaarun lídaangiñe oúweni lúnya nabágaridun.

Jamúriajan Jacóbo lúma Juan ában fuleísei

(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedeo, ába jaríñagun lun Jesúsu.

—Maésturu, buséntiwa lun badügün ában fuleísei woun.

³⁶ Ábati laríñagun joun.

—¿Cági jabúseerubei lun nadügün jun?

³⁷ Ába jaríñagun lun.

—Lun dánme lan barúejan láu sun buweírigun, lun bañúuragüdüníwa, ában lueígiñe boúnwenren, ában lueígiñe bubaüna.

³⁸ Ába laríñagun Jesúsu joun.

—Ibídifleti jun ca lan jamúriaabéi. ¿Gayáraabéi jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

³⁹ Ába joúnabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun, ⁴⁰ ánjein lun jañúurun ában lueígiñe noúnwenren, ában lueígiñe nubaüna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri díisi disípulugu, ába jagáñidun lúma Jacóbo láu Juan. ⁴² Ába lagúarun Jesúsu joun súngubei lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña joúngua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ⁴³ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ⁴⁴ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri, ⁴⁵ ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu gürígia.

Lareídagüdüni Jesúsu Bartiméo, le maríjinbei

(Mt 20.29-34; Lc 18.35-43)

⁴⁶ Ábati jachülürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu gürígia, ñíñein ában maríjinti gíriti Bartiméo, liraü Timéo, ñun láru üma amúriaaja seínsu. ⁴⁷ Dan le lagáambunbei luágu yaráfaali lan Jesúsu le Nazarétna, ába lagúmeserun maríjinti ligía agúaraja.

—¡Jesúsu, ladügawagun Davíd, gudémená bun!

⁴⁸ Sarágu jáña adeínjatiña lun lun lámanichun, ligátima lagúaragun.

—¡Ladügawagun Davíd, gudémená bun!

⁴⁹ Ába leréderagun Jesúsu, ába laríñagun.

—Wájuma lun lun liábin nun.

Ába jagúarun lun maríjinti ligía, ába jaríñagun lun.

—Ragüba gurásu, sarába, lagúajaña bun.

50 Ába lachüürunun labíte, ába ladügün ában chubaü, ába layárafadun lun Jesúsu. 51 Ába lálügündüni Jesúsu.

—¿Ca babúseerubei nadügün bun?

Ába loúnabun maríjinti ligía.

—Maésturu, buséntina narijin.

52 Ába laríñagun Jesúsu lun.

—Gayáraati bídin, areídaguaadibu ladüga afíñeedibu nuágú.

Lídan óra ligía, ába gayára lan laríjin maríjinti ligía, ába lídin lárigi Jesúsu.

11

Lebélurun Jesúsu Jerusaléoun

(Mt 21.1-11; Lc 19.28-40; Jn 12.12-19)

1 Dan le yaráfaaña lubeí lun Jerusalén, ába jachülürün ligíbugiñe fulásu buri le Betfajé lúma Betánia, le ünabubei libiti wübü le Olivos, ába laríñagun Jesúsu joun biáma jádaangiñe láni disípulugu.

2 —Jeíba lídan liraüraü fulásu le wagíbugiñebei, dánme le jachülürün ñi, jadáriruba ában burígü güráñu le maweinjoúngili ni ában weýyaasu. Jafáragadeíme, ábame janügünü ñájoun. 3 Ánjaün álügündüwa ca lan uágu jadügei le, jaríñagame lun luágu busén láni Jesúsu, luágu láguyugüdübei lan furése.

4 Ába joúdin, ába jadáriruni burígü ligía güráñu lubádu ában béna, boúgudi lídan üma, ába jafáragaduni. 5 Ába jaríñagun jádaangiñe ja ñibaña ümadarugu joun.

—¿Ca jadügübei? ¿Cáme jafáragadei burígü le?

6 Ába joúnabuniña quei laríñaguni Jesúsu joun, ába jígoruniña lun joúdin láu. 7 Ába janügünü burígü lun Jesúsu, ába jíchugunun jabíte luágu burígü ligía, ába laweínruni Jesúsu. 8 Sarágu jáña átulerutu jabíte luágu üma, jíbiri, ába jánchuajan tilímun wéwe, ába jachágajani luágu üma lubá lásügürün Jesúsu ligíbuagugiñe.

9 Ja ubáraübaña jáma ja árigibaña, ába jagúmeserun agúaraja. ¡Glória! ¡Biníwati wügüri le ñübinbei lídan líri Wabúreme Búngiu!

10 Biníwati arúejani le ñübinbei, le lúnbei ítara lan queísi meja larúeijan wáguchi Davíd.

¡Uweíriguni lun Búngiu lídan líñun-ägei siélu!

11 Lárigiñe, ába lebélurun Jesúsu Jerusaléoun, belú ligía témpulurugun, lárigiñe laríjini sun cátei, ába lídin Betánia jáu dúusu disípulugu ladüga dárujali lan.

Líñaraguni Jesúsu tídibu ígo to mínboun

(Mt 21.18-19)

¹² Larúgan, dan le jáfuridunbei Betániagiñe, ába lalámachun Jesúsu. ¹³ Dísegíñe, ába laríjin ában tídibu ígo gabánatu. Ába lídin aríja ánjein gin tubeí, ubánaü rügүñein ladárira tuágu ladüga mámagili lan tidáani ígo. ¹⁴ Ábatí laríñagun Jesúsu lun tídibu ígo ligía.

—Magíindadügüyübabá.

Ába jagáambuni láni disípulugu.

*Larúmadagüdünun Jesúsu témpulu
(Mt 21.12-17; Lc 19.45-48; Jn 2.13-22)*

¹⁵ Lárigiñe, ába jachülürün Jerusaléoun, ába lebélurun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürígia lúma jála ja alúgurajabaña únjun. ¹⁶ Mígitrun lumútu témpulu lun ümame. ¹⁷ Ába laríñagun lídan larúfudajan joun.

—Laríñajare Búngiu tídan líburu to Lerérun. “Núban, fulásu le ñí lubei gayára lan jayúmuragun sun gürígia nun, ánjein jugúya, barü jumaaru quei jában jíwerutiña.”

¹⁸ Ába jagáambun jábutigu fádirigu jáma arúfudajatiña lilúrudun Moisés luágu le laríñagubei, ába jagúmeserun áluaja ída lúba lan jáfaruni jílagubei, ladüga janúfudetiña lueí, quei sun lan gürígia weíriti janígi luágu le larúfudajabe. ¹⁹ Dan le lagúñedunbei, ába láfuridun Jesúsu fulásurugugiñe.

*Tídibu ígo to ásaürüboun
(Mt 21.20-22)*

²⁰ Larúgan bináafin, sügüti Jesúsu jáma láni dúusu disípulugu lueígiñe méme üma ligía, ába jaríjinun tídibu ígo saüja lúmagiñe tilagüle. ²¹ Ába larítaguni Pédro, ába laríñagun lun Jesúsu.

—Maésturu, jaríjabá tun tídibu ígo to bíñaraguboun gúñaarü, saüja!

²² Ába laríñagun Jesúsu joun súngubei.

—Afíñe jumá luágu Búngiu. ²³ Ninárün jáu luágu furúmieguarügü lan le aríñaguti lun wübü le. “Gidába yágiñe, dabúba baránajoun”, ánjein úa lubeí liloúguan afíñeni tídan lanígi áni afíñe ligía luágu lagúnfuliruba lan le laríñagubei, ítara lúba. ²⁴ Ligía nariñagunbei jun luágu sun lan le jamúriajan lúma Búngiu, ánjein afíñe jubeí luágu resíbi jumáali lan, ítara lúba. ²⁵ Dan le jayúmuraguña lan lun Búngiu, ánjein níjein lubeí ladüga ában gürígia jun le mísiñeti jun, ferúduna jumeí lun gíñe ferúduna lánün Júguchi Búngiu le siélubei. ²⁶ Ánjein úa ferúduna jumá, úabei gíñe ferúduna láani Júguchi Búngiu le siélubei jifígoun.

*Lugúmadin Jesúsu
(Mt 21.23-27; Lc 20.1-8)*

27 Ába jagíribudun Jerusaléoun. Dan le eíbugeina lubeí Jesúsu témpulurugu, ába jayábin jábutigu fádirigu, arúfudajatiña lilúrudun Moisés, jáma ámu wügüriña ja weírigutiña lídan jafíñen juríu,²⁸ ába jálugüdüni.

—¿Cáteisan biríchabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

29 Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana joúnaba, naríñagubei jun ca lan áu gumádi nadügei buri cátei le.³⁰ ¿Ca oúnajabalin Juan abásteragüdaja? ¿Búngiu, ódi wügüriña?

31 Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan oúnajabalin, laríñaguba woun ca lan uágu mafíñerun wabeí lun Juan.³² ¿Ódi waríñaguba funági luágu joúnajan lan wügüriña?

Lun jamúga joúnabun ítara, janúfudetiña jaweí gürígia, ladüga subúdi jamáni sun gürígia luágu proféta lán Juan.

33 Ábatí jaríñagun lun Jesúsu.

—Ibídíñeti woun.

Ábatí gíñe laríñagun Jesúsu.

—Maríñagun nubeí gíñe jun ca lan áu gumádi nadügei cátei le.

12

*Jémpulu jawáguti ñadágimeintiña wuríbatiña
(Mt 21.33-46; Lc 20.9-19)*

1 Ábatí lagúmeserun Jesúsu adímureja joun gürígia ja ñíbaña láu jémpulu, ába laríñagun joun.

—Ñíñein meja ában wügüri, ábunaguti tídbu beíbei lufúlasunrugu. Ába ladügün baríeru láu, adüga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adüga weíyaasu.² Dan le lachülürünbei dan lun alúbajani, ába loúnajan ában lumúsun amúriaiei lufánran jámagíñe ñadágimeintiña.

³ Ábarüga járugüdüni músu ligía, ába jabúleiseiruni, ába joúnajani láridoún, míchutiña ni cáta lun.⁴ Ábaya loúnajan labúreme ichári ábanya músu, ába jíchaagun dübü luágu, bouguá jameí lábulugu, anába.⁵ Ábaya loúnajan labúreme ichári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraü jínsiñeti lun buídu, lagúmujoún óra ába loúnajani, ába larítagun luágu inébebei lan joun ladüga liraü lan. ⁷ Ába jaríñagun ñadágimeintiña jámagua. “Niján le lúnbei libijini alágan, wáfaraali jilágubei, wagía lámuga labúriña sun cátei.” ⁸ Ábatí járugüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábatí lálügüdajan Jesúsu.

—¿Cábati ladüga labúreme ichári? Liábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le taríñagubei Lerérung Búngiu nuágu? Taríñajare.

Lé meja dübü le mabúseerun jabeí ábunagutiña, ligáali furúmiñeti.

¹¹ Wabúreme Búngiu adügübalin lun furúmiñetibei lan, áni aríja wamúti quei ában cátei weíriguti.

¹² Ába jabúseerún yebe jadáürüni Jesúsu ladüga jasúbudiruni luágu jawágu lan layúsurei jémpulu le. Quei janúfudebei jaweí gürígia, ába jígiruni lúngua, ába joúdin.

Luáguti lafáyeijoún seínsu lun gumádi

(Mt 22.15-22; Lc 20.20-26)

¹³ Lárigiñe, ába joúnajoúniwa jádaangiñe fariséogu jáma jádaangiñe lánigu Heródes lúmoun Jesúsu lun jaríñagagüdüni som cátei le lúnti gayára lan jíchuguni lidúnrunme. ¹⁴ Ába jayábin, ába jaríñagun lun.

—Maésturu, subúditi woun luágu aríñaga báani inárüni, manúfudeiga lueí ni ában ladüga ni cáta lan luweírigun gürígia bun, áni barúfudajani lémeri Búngiu láu inárüni. Áríñagabá ában cátei woun. ¿Buítisan lun lafáyeijoún seínsu lun warúeite le Rómana ódi mabuídunti?

¹⁵ Subúdi lumúti Jesúsu luágu biánguañein lan jagíbu, ába laríñagun joun.

—¿Cámesan jíchaajan sádara nubá? Barüjuma ában lídaangiñe seínsu ligía nun, aríja námugei.

¹⁶ Ába janügüni lun. Dan le laríjini, ába lálügüdüniña.

—¿Cági iyáwa lúma íri le luágubei?

Ába jaríñagun lun.

—Láni urúei Rómana.

¹⁷ Ába laríñagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburi loúnabuniña.

**Álögüdajani libügürü ásaaruni lídaangiñe oúweni
(Mt 22.23-33; Lc 20.27-40)**

18 Ába joúdin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe oúweni. Ába lubeíti jaríñagun lun.

19 —Maésturu, aríñagatí meja Moisés luágu ánjein lan oúwe ában wügüri le marieiti masáaniguga táo lúmari, lúnti lan lamárieidun lamúlen túma würi to ueíboun loúwe, lun gasáanigu lan táo lun líbugaña le oúwebe. **20** Níñanu mejati sédü gamülenuguátiña, le furúmiñeti, ába lamárieidun, ába loúnwen marajüñüga. **21** Le jabíaman, ába lamárieidun túma würi tó buga lúmari líbugaña, ába gíñe loúnwen marajüñütiña, ligía méme asúsereda lúma le jürüwan. **22** Marieitiña sédügubei jagía túma, úati ni ában garaüti táo. Lagúmujoún óra, ába gíñe toúnwen würi tugúya. **23** Niján le uágubei wálögüdaja. Dánme le jásaarun jiláaña lídaangiñe oúweni lúnya gabágari jamá, ¿cábagi úmari würi tugúya jádaangiñe sédü gamülenuguátiña ja, lárigíñe mariei jamá sun jagía túma?

24 Ába laríñagun Jesúsu joun.

—Bulíeguatün ladüga libidiñe tuáguti Lerérunt Búngiu jun, ni luáguti lubáfu Búngiu. **25** Dánme le jásaarun jiláaña lúnya jabágardun, ámujalime jabágari, magámaridun jába, míchugun jamáñame jasáanigu lun mariei, queísi magámaridun jamá ánjeligu siélu. **26** Ánjeinti luágu sará jamá jiláaña lúnya jabágardun, ¿malíijan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abrahám, Lubúngiute Isáac, Lubúngiute Jacób.” **27** Ítara líña lubeíti, ánjein jamúgati jiláaňu jáña wügüriña jagía lun sun dan, maríñagunti jamúga Búngiu luágu Jabúngiute lan, ladüga máma Jabúngiute jiláguuaña Búngiu, Jabúngiute wínwangiña. Ítara líña lubeíti, jugúya weíriti jabúlieidágun.

**Gumádi le weírigutimaabei
(Mt 22.34-40)**

28 Níñein ában jádaangiñe arúfudajatiña lilúrudun Moisés le agáambubalin jadímurejan, queíti subúdi láani luágu oúnaba lániña Jesúsu buídu, ába liábin lubároun, ába lálögüdüni.

—¿Cáteisan lídaangiñe lilúrudun Búngiu weírigutimaabei?

29 Ába laríñagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügüñein Abúremtein. **30** Jínsiñelá lubeíti Babúreme Búngiu bun táo sun banígi, táo sun buwáni, láu sun bisáminan, láu sun bére.” Ligía gumádi le weírigutimaabei, **31** áni le libíaman lídan uweíriguni lenége le

furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí biáma le.

³² Ába laríñagun arúfudajati ligía lun.

—Buítí bariñaguni, maésturu. Binárün luágú ában rügüñein lan Búngiu, luágú úa lan ámu, ³³ áni lúnti jínsiñe lan Búngiu woun táo sun wanígi, láu sun wasáminan, táo sun wawáni, láu sun wére, lun giñe jínsiñe jamá wíbirigu woun queísi wínsiñegua woúngua. Gebégití sun líra ligíbugiñe sügü láu sun wadágaragüdün lun lúma sun cátei le agudúbei luágú latárü.

³⁴ Dánti le lagáambun Jesúsu loúnabun láu lichú áu, ába laríñagun lun.

—Madíseedibu lueí lílana ban larúeijan Búngiu.

Manígjaña lun jálugüdajan.

¿Ca adílgawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, laríñaga.

—¿Ída liñásan jaríñagunbei arúfudajatiña lilúrudun Moisés luágú ladügawagun lan Davíd Crístu? ³⁶ Davíd guánarügü láu lubáfu Sífiri Sándu aríñagati ítara.

Laríñajare Abúremein lun Nabúreme.

“Ñurúba núma lueígiñe noúnenren
daríme níchuguniña báganiñu bújaburugun.”

³⁷ ¿Ída lubáti ladügawagun lan Davíd Crístu ánjein wa lubálin Davíd guánarü Crístu, “Nabúreme”?

Ába jagáambuni bürübunu gürígia jagía láu ugúndani.

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Lc 11.37-54, 20.45-47)

³⁸ Ábaja laríñagun Jesúsu joun lídan larúfudajan.

—Toúnigi jumátia jaweí arúfudajatiña lilúrudun Moisés, jínsiñeti joun lun jeíbugun táo anaanguni durúrutu lúma lun labúsurúniwa joun ümada láu sarágu inébesei. ³⁹ Áluaja jamúti jalaü le jála weírigutiña tídan jalígilisin juríu, lúma lubuídun-ägei ubáraü lídan eígini. ⁴⁰ Gidá jamutu jában würiña ja jiláaña úmari jaweí, lúnti jadáuragun láu sun líra, ába jadügün afúrieiduni le migínaguti. Weíribei jasúfurirun luágú sun le jadügübei.

Tedéweejan fugiábu würi to jiláali túmari, lun Búngiu

(Lc 21.1-4)

⁴¹ Luágú ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gíbetiña rísitíña íchugutiña sarágu seínsu. ⁴² Ligía tiábin ában fugiábu würi to jiláali túmari, ába tíchugun bián gáwanün tídoun gáfu tuguya. ⁴³ Ába lagúuarun Jesúsu joun láni disípulugu lubádun, ába laríñagun joun.

—Ninárün jáu luágu gíbetima lan tíchugun würi to sügű jáu sun ja íchugubaña seínsu tídoun gáfu to, ⁴⁴ ladüga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rútumuti sun lé túmabei lun tawíwandun.

13

*Laríñagun Jesúsu luágu tagünrinchawagúba lan témpulu
(Mt 24.1-2; Lc 21.5-6)*

¹ Dan le láfuriduña lan Jesúsu témpulurugugiñe, ába laríñagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dübü le áubei tadügüwa! ¡Máma tanárime buri!

² Ába loúnabuni Jesúsu.

—¿Aríagu jíña tun tanárime témpulu to? Merédebeítia ni ában dübü ligíbuagu ában, lagünrinchaguba sun le.

*Seíni buri lubáragiñe lagúmuchun uboú
(Mt 24.3-28; Lc 21.7-24, 17.22-24)*

³ Ábatí joúdin luágu wübü le gríribei Olivos le tigíbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jaríñagun lun, jagíaguarügü.

⁴ —Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülüjali lan dan lun lagúncularun sún buri cátei le?

⁵ Ába laríñagun Jesúsu joun.

—Toúnigi jumá, mayéedagualaň ni ában, ⁶ ladüga sarágujaba ñübintiña, jaríñagame. “Áu Crístubei”, áni sarágujaba jayéedun.

⁷ ‘Jugúa, dánme le jagáambuni lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá, ladüga ñíbei wuríbu súnwandan, mámagili lagúmuchun uboú líra. ⁸ Lageíndaguba ában fulásu lúma ában, awúribuja ligíame ában ageíraü lúma ámu. Ñíbei járabaganáli lídan sarágu fulásu, ilámaü, chagáguau, áni súnme buri cátei le, lagúmesejarügígilime le lúnbei lasúfurirúniwa.

⁹ Toúnigigua jumá júngua ladüga jederegerúaba lun lúrudu, ábame jabúleiseirunún tídan buri jalígilisin juríu, janügüba lun jagúseragüdúniwa jagíbugiñe gumádimatiña lúma jagíbugiñe urúeigu, nueígiñe, ítara lúba gayára lan jadímurejan nuágu, jagíbugiñe. ¹⁰ Lubáragiñe lagúmuchun uboú, lapúrichijoúba ugánu luágutí asálbaruni lídan sun fulásu. ¹¹ Dánmeti le janügüniwa lun jederegerúniwa joun lúrudugu, magíbedalá jarítagun luágu cába lan jaríñaga, masáminaragubei jumeí. Aríñaga jumeí le laríñagun Búngiu jun lídan óra ligía, ladüga mámaba jugúya adímureja, Sífiri Sándu, ligíaba adímureja. ¹² Jederegerubaña wüguriña jamúlenu jáma jábugaña lun

jáfarúniwa jilágubei, deréga jamáñame agübürigu jasáanigu, jagáraabaguba isáanigu jawágun jagübürigu lun jederegerúniwa lun jáfaruniwa jilágubei.¹³ Jiyéreeguduba lun sun uboú nueígiñe, le asígiruti úaragu darí lúmoun lagúmujoún, lasálbaruba.

¹⁴ ‘Abürüjati proféta Daniél luágu cátei iyéreegutti le gagünrinchaguagüdadibei, dánme le jaríjini cátei ligía le ñí lubei moun lan lun ñí lan—le alijabei, gunfaráandalá—jámetia Judéabaña, lúntimétia janúrajan luágun wübü.¹⁵ Le gürígia le boúgudibei, mebélura láttia múnadoun aságara ni cáta,¹⁶ le áraabubei, magíribudalá águyu ni anügoun lanáangun.¹⁷ Fugiábugume würíña ja dageínatiña lídoun wéyu ligía jáma ja garájüñutiña ja gurágiña.¹⁸ Amúria ja jumá lúma Búngiu lun máma lan lídan lidáani lidíliga jeíbaagua,¹⁹ ladüga lidáanibei asúfuriruni quei le masúseredungili lúmagiñe ladügüni Búngiu uboú, masúseredundügüyaalime giñe lárigiñe.²⁰ Áanjein jamúga madüraagun lánme Jabúreme Búngiu dan ligía, úabei jamúga ni ában eséfuruti, ladüraagubei luágu jínsiñe lánigu lun, ja anúadaja láañabaña.

²¹ ‘Ájeinti aríñawagua jun. “Aríja jumá, niján Crístubei”, o “Nirán”, mafíñera jumá,²² ladüga jayábiba eyéejatiña aríñaga jawoúgua luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadügüba seíni lúma miláguru lun jayeedaguniña ásta ja anúadaja láañabaña Búngiu áanjein gayára.²³ Aráanseñu jumá, rúnaadün luágun jugúdi.

*Ída lúba lan ligáburi lagíribudun Crístu uboúagun
(Mt 24.29-35, 42-44; Lc 21.25-36)*

²⁴ ‘Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjálime játi.²⁵ Jeíguaduba warúguma siélugiñe, ábame ladádagaru sun siélu.²⁶ Ábameti narijíniwa, áu le Wügüri Garaúwarügüti, niábin lídan juánriñu láu oúnwenbun ubáfu lúma uweíriguni,²⁷ ábame noúnajaniña ánjeligu oúndaraña sun ja nanúadajabaña lídaangiñe gádürü larígei uboú, lúmagiñe lidíse-ágei uboú darí lúmoun lidíse-ágei siélu.

²⁸ ‘Gunfaráanda jumeí jémpulu le tuáguti tídbu ígo. Dan le ñulúgili tilímun, ába laboúchun tubána, subúdi jumúti luágu níteeli lan lidáani lubáchouga.²⁹ Ítara meme, dánme giñe jaríjini sún buri cátei le, subúdi jumeí luágu yaráfaali lan niábin.³⁰ Ninárün jáu, luágu lagünrinchawagúba lan sun ubúrugu le Jerusalén lubáragiñe joúwegun gürígia ja lánina dan le.³¹ Lagúmuchaguba siélu lúma uboú, áanjein nerérun, merédebei magúnfulirunga.

32 'Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraü, Búngiu rügüñein le Úguchili asúbudirei.

33 Lúnti lubeíti agágudúañu jumá, aríaaja, ayúmuragua lun Búngiu, ladüga ibídiñeti jun ídame lan lachülüra óra ligía. 34 Ítara lúba quei ában wügüri le ñüdünbéi luágu ában weýyasu díse, lubáragiñe láfuridun lúbiñegiñe, ába líchuguni sun cátei jájaburugun lumúsuniña áni ru ligía jawádigimari, aríñaga ligía lun le luágubei béna lun loúnigirun. 35 Áu queísi tabúreme múna tugúya, furésebei nagíribudun. Agágudúañu jumá lubeíti, ladüga ibídiñeti jun cába lan óra nachülüra, ánjein gúñounba lubeí lúmoun áriebuba lan, o lubá lan larúgan o bináafin lan, 36 ñübindügü níñein sódini, ábame nadárirunün arúmuga. 37 Le naríñagubei jun aríñaga numúti joun súngubei. Agágudúañu jumá.

14

Lalédawagúniwa lubá Jesúsu

(Mt 26.1-5; Lc 22.1-2; Jn 11.45-53)

1 Bián rügáali wéyu lubá fédu le arítaguagülei luágu meja dan le lásügürünbei láni Búngiu ánjeli áfaraguáña jarájüñü Ejíptona, máfarawaguntiña jarájüñü Israelítagu, lidáani gíñe fédu le ní lubei teigúa fein to magánatu ísi. Ábanti jáluajan jábutigu fádirigu jáma arúfudajatiña lilúrudun Moisés ída lúba lan járugüdüni Jesúsu láu eyéerawaguni lun jáfaruni jilágubei. 2 Ába jaríñagun.

—Márügüda wameí fédurugu lueí jafúudun gürígia.

Tájurudaguni ában würi Jesúsu

(Mt 26.6-13; Jn 12.1-8)

3 Betániañein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábulu, ába tiábin ában würi láu ában budeín buin láu ibíñei le jémeti, le séruti. Ába tájalachuni ligíina budeín, ába téseruni ibíñei lábulugun Jesúsu. 4 Ába jagáñidun jádaangiñe ja ñíbaña, ába jaríñagun jámagua.

—¿Cámesan leféridirúa ibíñei jémeti le? 5 Gayáraati jamúagü lalúgurun luágu sügü láu lebégi ában irúmu wadágimanu, lun jíderawagún gudémetiña.

Ába jébechunun, 6 ába laríñagun Jesúsu.

—Ígira jumoún. ¿Ca uágu jañawuriya tun? Ában cátei buíti le tadügübei nun. 7 Súnwandan ñíbaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan. 8 Adüga táali würi to le tiáraabei, jurúguaru ibíñei luágu nágubu lubá nábungoún, 9 áni ninárün jáu luágu lídan lan furúmiegarügü fulásu lídan sun uboú le ní lumuti

lapúrichijoúa ugánu le lánina asálbaruni labájüdawagúba gíñe le tadügübei würi to lun jarítagun tuágú.

*Lalúguruni Júdas Jesúsu
(Mt 26.14-16; Lc 22.3-6)*

¹⁰ Ábatí lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladügün darádu jáma lun ledéregeruni Jesúsu joun. ¹¹ Dan le jagáambubalin, ába jagúndaaragun, ába jaríñagun lun luágu jichuguba lan seínsu lun. Ába lagúmeserun Júdas álua ja ída lúba lan ledéregeruni Jesúsu joun.

*Lagúmujoún leígin Jesúsu jáma lánigu
(Mt 26.17-29; Lc 22.7-23; Jn 13.21-30, 1 Co 11.23-26)*

¹² Le furúmiñeti wéyu lídan fédu le ñí lubei teigúa fein to magánatu ísi, luwéyuri lafarún mudún le lánina fédu le páscua, ába jálugüdüni disípulugu Jesúsu.

—¿Jalíagi babúseera lun woúdin aráansera wabárua lun weígni eígni le lánina fédu?

¹³ Ába loúna jan biáma jádaangiñe láni disípulugu, ába laríñagun joun lubáragiñe joúdin.

—Jeíba ubúrugua, jadúnraguba lúma ában wügüri ñi táu ában dináa láu dúna, ¹⁴ jídinme lárigi le ñíjin lumúti lebélura, ábame jaríñagun lun tabúreme múna. “Ítara líña maésturu, ¿jagoún nege rúmu to lúnboun ñi lan leígei eígni le lánina fédu jáu láni disípulugu?” ¹⁵ Ábame larúfudun ában rúmu weíritu jun, tougiñegua múna, to aráanseñu tíña, ábameti jaráanseruni eígni woun ñi.

¹⁶ Ába jáfuridun disípulugu, ába jachülürün ubúrugun, ába jadáriruni súngubei quei lariñaguni Jesúsu joun, ába jaráanseruni eígni lánina fédu ñi.

¹⁷ Dan le lagúñedunbei, ába lachülürün Jesúsu jáu dúusu disípulugu. ¹⁸ Dánti le luágu jamá dábula eíga, ába laríñagun joun.

—Ninárün jáu luágu lalúgurubadina lan ában jídaangiñe le eígibei núma.

¹⁹ Ábatí jajírudagun, ába jagúmeserun álögüdaguei ában ában.

—¿Áu funásan?

²⁰ Ába laríñagun Jesúsu joun.

—Ában jídaangiñe jugúya dúusu le éderutu leígan fein lídan asíedu. ²¹ Anángüraadina lubeíti, áu le Wügüri Garaüwarügüti, luágu üma le uágubei taríñaga Lerérung Búngiu, áni ʃfugiábutia wügüri le alúgurutina! Buítimaati jamúga lun wügüri ligía lun magúria joúniwa lan.

²² Dan le añája lubeí eíga, ába lanügünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába laríñagun joun.

—Joújuma, nágubu le.

²³ Lárigiñe, ába lanügün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya. ²⁴ Ába laríñagun joun.

—Nítale, le añúuragüdúbalin iséri darádu, le gíñe áwiyurúabei joun sarágu gürígia lun ferúdunawa lan jafígoun. ²⁵ Ninárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

*Laríñaguni Jesúsu luágu leyéedaguba lan Pédro láu
(Mt 26.30-35; Lc 22.31-34; Jn 13.36-38)*

²⁶ Lásun jerémujani urému luágu Búngiu, ába joúdin luágun wübü le gíríbei Olívos. ²⁷ Ábati laríñagun Jesúsu joun.

—Sun jugúya janúrajaba, ígira jumáname áriebu le, ladüga taríñajare Lerérunt Búngiu. “Náfarubei joúniri mudún jilágubei, ábame jeréderun mudún chagágu.” ²⁸ Lárigiñeme násaarun lídaangiñe oúweni lúnya nabágaridun, nídiba Galiléa jubáragiñe.

²⁹ Ábati laríñagun Pédro lun.

—Gayáraati jígirunibu sun ja, nugúya, mígirun nubádibu.

³⁰ Ába laríñagun Jesúsu lun.

—Ninárün báu, áriebu meme le, lubáragiñe layúgurujan gáyu bián weíyasu, ürüwaalime weíyasu baríñagun luágu ibidiñe nan bun.

³¹ Ába laríñagun.

—Ni ánjein lun lubeí noúnwen búma, maríñagubadina luágu ibidiñe ban nun.

Ligía méme gíñe jaríñaga súngubei.

*Layúmuragun Jesúsu lun Búngiu, Getsemaní
(Mt 26.36-46; Lc 22.39-46)*

³² Ábati jachülürün lídoun ában fulásu gíriti Getsemaní, ába laríñagun Jesúsu joun láni disípulugu,

—Ñurújuma ya, neíbuga ayúmuragua lun Búngiu.

³³ Ába lanügüniña Pédro, Jacóbo, lúma Juan lúmagua. Ába ladíjeridun larítagun buídu, sandí ligía ában igárigu weíriti tídan lanígi. ³⁴ Ába laríñagun.

—Sandítina ában íruni weíriti le lánina oúweni tídan nuwáni. Reídei jumá ya, áni agágudúañu jumá.

³⁵ Ábati lídin Jesúsu lubáruaguóún mémeraü, ába labúluchagun müarugun, ába lamúriajan lúma Búngiu ánjein gayára lubeí masúfurirun láani le lúnbei lasúseredun lun lídan óra ligía. ³⁶ Ába laríñagun lídan layúmuragun.

—Núguchi, gayára bumúti sun cátei, séfu bána lueí nasúfuriruni cátei le, máma quei nabúseerun, quei babúseerun.

³⁷ Ába lídin, ába ladáriruniña disípulugu arúmuga, ába laríñagun lun Pédro.

—Simón, ¿barúmuguñasan? ¿Siñátisán buga beréderun ni ában óra agágudúañu? ³⁸ Agágudúañu jumá, ayúmuragua jugúyame lueí jeíguadun lídoun ínchajoúni lun jeféridiruni jaffíñen nuágü. Inárüni luágu benéfa lan jáni espíritu lun le buídubei, ánjein júgubu, débiliti.

³⁹ Ábaya lídin ayúmuragua lun Búngiu, aríñageinaleí méme dimúrei le laríñagubei furúmiñe. ⁴⁰ Dánya lagíribudun, ábaya ladáriruniña arúmuga ladüga luweírin lidábu jágu. Ibídiñetiti joun cába lan joúnabagüle lun. ⁴¹ Ábaya lídin lürüwan weíyaasu, ába laríñagun joun.

—¿Jarúmuguña mémesan, eméraagua jugúya? Buídürügaali, chülüja óra lun nederegerúniwa, áu le Wügüri Garaüwarügüti, jájaburugun gafígoountiña. ⁴² Sarájuma, queímoun, níteeli le lúnbei lederegerunina.

Janügüni Jesúsu adáüra

(Mt 26.47-56; Lc 22.47-53; Jn 18.2-11)

⁴³ Nígili Jesúsu adímureja, ligía lachülürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Joúnajan jábutigu fádirigu, arúfudajatiña lilúrudun Moisés, jáma ámu wügüriña weírigutiña lídan jafíñen juríu. ⁴⁴ Aríñagalíti buga Júdas joun ítara.

—Le wügüri le nachúurun, ligía, ábame járugüdüni, ábame janügüni, joúnigireime buídu.

⁴⁵ Ítara líña lubeíti, dan le lachülürünbei, ába layárafadun Júdas lun Jesúsu, ába laríñagun lun.

—Maésturu.

Ába lachúuruni. ⁴⁶ Ábati járugüdüni Jesúsu, ába janügüni adaürüwa.

⁴⁷ Níñein ában jádaangiñe ja níbaña, ába láluguchunun lefeínte, ába líbuguni ában larígei lumúsun fádiri le íñutimaabei. ⁴⁸ Ábati laríñagun Jesúsu joun mútu jagía.

—¿Jiábin táu efeín lúma wéwe lun janügünina adáüra, camá jamuga jíwerutina? ⁴⁹ Ságüñaja wéyu júma nan témpulurugu arúfudaja jun, madaü jumútina. Wel, lasúseredunbei le lun lagúñfulirun Lerérun Búngiu.

⁵⁰ Ábati jígoruni sun disípulugu Jesúsu lábugua, ába janúraján.

Wügüri nüraügili le anúrajabeí

⁵¹ Ñíñein ában wügüri ñüraügili afálaruti Jesúsu, darúgu loúgua táurügü ában sídi, ában járugüdüni. ⁵² Ába lasáfarun jaweí, ába leibáagun surúsu, ígira sídi.

Jesúsu ligibugiñe líñun-ägei lúrudu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janügüni Jesúsu ligibugiñoun fádiri le íñutimaabei, ába joúndaragun sun jábutigu fádirigu jáma arúfudajatiña lilúrudun Moisés, jáma ámu wügüriña ja weírigutiña lídan jafíñen juríu.

⁵⁴ Ábati lafálaruni Pédro Jesúsu dísegiñe chülü tübürürürugun lúban fádiri le íñutimaabei, ába leréderun ñun jáma oúnigirutiña témpulu abácharagua larügürügü wátu.

⁵⁵ Jálujati jábutigu fádirigu lúma sun líñun-ägei lúrudu lidúnrun Jesúsu lun gayáraabei lan jasíadiruni lun láfarúniwa jilágubei, madáritiña lidúnrun. ⁵⁶ Sarágu jáña yebe adímurejatiña iyéeni luágu, múaradúntiña láu le jaríñagubei.

⁵⁷ Ñíñanu yéetiña ásaarutiña aríñaga.

⁵⁸ —Agáambatiwa laríñagun. “Nagünrinchaguboun témpulu to, to jadügüboun wügüriña, ábame naráramagüdüni ában témpulu lídan ürüwa wéyu to máma jadüga wügüriña.”

⁵⁹ Ni ítara, múaradúntiña láu le jaríñagubei.

⁶⁰ Ábati lásaarun fádiri le íñutimaabei jádaangiñe sun jagía, ába laríñagun lun Jesúsu.

—¿Moúnabuntíbusan ni cáta? ¿Cáteisan le, le jaríñagubei buágu?

⁶¹ Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amürusan Crístubei le Liraü Búngiu, le lúnbei lasálbaruniña gürígia lídaangiñe jaffigoun?

⁶² Ába laríñagun Jesúsu lun.

—Ánja, áu. Áni juguya, jaríjubadina, áu le Wügüri Garaüwarügüti, ñun lueígiñe loúwenren Súnti Gabáfu, aríja jumeíme niábin lídan juánriñu siéluguñiñe.

⁶³ Ábati lajeíridagunun fádiri íñutimaati lanáangun, le ligáñi, ába laríñagun.

—¿Ca ámu wabúseerubei lun líchugun fe luágu guetó?

⁶⁴ Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súngubei lun láfarúniwa jilágubei.

⁶⁵ Ábatí buri jagúmeserun jíbiri ásueraguei, adáuragua láu ligíbu, abúleiseirei, jaríñagati.

—¡Aríñaga beígia cátei lan áfarubalibu!

Ába buri jagáyuajan súdaara luágu.

*Laríñagun Pédro luágu ibídiñe lan Jesúsu lun
(Mt 26.69-75; Lc 22.56-62; Jn 18.15-18, 25-27)*

⁶⁶ Ñíñein Pédro bürürürugu, ligía tiábin ában lumúsun fádiri le íñutimaabe. ⁶⁷ Dan le taríjini abácharagua larügürügü wátu, ába taríaguni, ába taríñagun lun.

—¿Ma gíñe buga lúmañadibu Jesúsu le Nazarétna?

⁶⁸ Ába leyéedagun Pédro, laríñaga.

—Ibídiñeti gürígia ligía nun, ibídiñegubeíti nun ca lan uágu badímureja.

Ába lígiruni fulásu le ñí lubei labácharagua lun yaráfa lan lun lebéneri baríeru, ábatí layúgurujan ában gáyu. ⁶⁹ Ábaya taríjini müsu tuguya, ába taríñagun joun ja ñíbaña.

—Ába giñétia jádaangiñe lánigu Jesúsu le.

⁷⁰ Ábaya leyéedagun. Murúsun óra lueígiñe, ábaya jaríñagun ja ñíbaña lun Pédro.

—Inárüni, amürrü ában jádaangiñe, ladüga Galiléana amürrü, ítara líña badímurejan quei jagía.

⁷¹ Ába líñaragun Pédro língua ánjein máma lubeí inárüni le laríñagubei. Ábaya laríñagun.

—Ibídiñeti gürígia le uágubei jadímureja nun.

⁷² Lídan óra ligía, ába layúgurujan gáyu libíaman weíyaasu. Ábatí larítagun Pédro luágu le laríñagubei buga Jesúsu lun. “Lubáragiñe layúgurujan gáyu bián weíyaasu, beyéedaguba náu ürüwa weíyaasu.” Dánti le larítagun luágu, ába layájun.

15

*Jesúsu ligibugiñe Piláto
(Mt 27.1-2, 11-14; Lc 23.1-5; Jn 18.28-38)*

¹ Larúgan bináafin, ába joúndaragun jábutigu fádirigu jáma arúfudajatiña lilúrudun Moisés, jáma ámu wüguriña ja weírigutiña lídan jafíñen juríu lúma sun líbiri líñun-ägei lúrudu, aríja cába lan jadüga lun lasíadirúniwa Jesúsu. Ába janügüni gürágu, ába jederegeruni lun Pilato. ² Ába lálügündüni Piláto Jesúsu.

—¿Amürrü Jarúeitebei Juríu?

Ába loúnabun Jesúsu.

—Ánja, ítara líña quei baríñaguni.

³ Ába buríti jíchugun jábutigu fádirigu sarágu lidúnrun.

⁴ Ábayati lálügündüni Piláto, ába laríñagun lun.

—¿Moúnabuntíbusan ni cáta? ¿Aríjabá átiriñein lan bidúnrun íchuguti?

⁵ Moúnabun mémeti Jesúsu ni cáta, ába laweíridun lanígí Piláto láu líra.

*Lasádirúniwa Jesúsu lun oúweni
(Mt 27.15-31; Lc 23.13-25; Jn 18.38-19.16)*

⁶ Jéchutiti Piláto ígiragüda ában adaürüti ságü fédu le lánina páscua, le jamúriajan gürígia jádaangiñe adaürütiña. ⁷ Níñeinti ában adaürüti gíriti Barabási úara jáma ámu ja áfarajabaña gürígia jilágubei lídan iñúraguni luágu gumádi. ⁸ Ábatí jayábin gürígia, ába jaríñagun lun Piláto lun ladügünü queíñaja ladüga. ⁹ Ába lálügündüniña.

—¿Buséntün lun nígiragüdüni Jarúeite Juríu?

¹⁰ Laríñagubaalin Piláto líra ladüga busén lán yebe lígiragüdüni Jesúsu, subúdi lumúti luágu ladüga lan gimúgaü jedéregerei jábutigu fádirigu. ¹¹ Fúgüda jamáña jábutigu fádirigu gürígia, jaríñaga joun lun jamúriajan lun lígiragüdüni Barabási, máma Jesúsu. ¹² Ábatí laríñagun Piláto.

—¿Cáti jabúseerubei nadügün láu le uágubei jaríñaga Jarúeite Juríu?

¹³ Ába jagúaragun.

—¡Dáguabeí luágu gurúwa!

¹⁴ Ába laríñagun Piláto joun.

—¿Cáti wuríbati ladügübei?

Ábaya jagúaragun.

—¡Dáguabeí luágu gurúwa!

¹⁵ Queíti busúen lan Piláto leréderun buídu jáma gürígia, ába lígiragüdüni Barabási, lárigiñeti loúnajan abeíchei Jesúsu, ába ledéregeruni lun ládarawagún luágu gurúwa.

¹⁶ Ábatí janügünü súdaara lídoun tübürürü lúban urúei, ába joúndarúniwa sun súdaara. ¹⁷ Ába jadáüraguagüdüni táu ában anáanguni funátu, ába jadügün ában rídi láuti jíyu, ába jíchuguni leréberugu. ¹⁸ Ába jagúmeserun agúaraja lun.

—¡Gabágarilá Jarúeite Juríu!

¹⁹ Ába jagáyuajan lábulugun láu ában wéwe, ába jásueraguni, ába jájuduragun abúsura lun. ²⁰ Lárigiñe jéjerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

*Ládarawagún Jesúsu luágu gurúwa
(Mt 27.32-44; Lc 23.26-43; Jn 19.17-27)*

²¹ Níñein ában wügüri Cirénena, gíriti Simón, lúguchi Alejándro lúma Rúfo, liábiña áraabugiñe, dan le lásügürün nígiñe, ába jafósuruni lun lanügünü lugúruwan Jesúsu.

²² Ába janügünü Jesúsu lídoun ában fulásu gíriti Gólgota, míni lan líra, Lufúlasun Lábu Ichügü. ²³ Ába jíchugun diweín láu ában

luwúyeri árani gíriti mírra tídoun lun, mátun lumútú. ²⁴ Ábatí jádaraguni luágu gurúwa, ába jájurerun súdaara ubúnuruni lun jaríjin cába lan jádaangiñe erédera táu lanáangun.

²⁵ Ladaünrún néfu bináafin, ligía jádaraguni luágu gurúwa. ²⁶ Ába labürüdüníwa lidúnrun ñi. "Jarúeite Juríu." ²⁷ Dáguatiña gíñe bián jíwerutiña luágu gurúwa úara lúma, ában lueígiñe loúnwenren, ában lueígiñe lubaüna. ²⁸ Láu líra lagúnfulira le taríñagubei Lererun Búngiu. "Abájüdükati jáma wuríbatíña."

²⁹ Dan le buríti jásügürün gürígia, ába jájinjani jachügü láu, ába janáburi, jaríñaga.

—¡Bugúya le aríñagubei luágu fibounme lan témpulu, ábaya lánme baráramagüdünun lídan ürüwa wéyu,³⁰ séfuguabá búngua, raríba lueígiñe gurúwa!

³¹ Ába gíñe jájerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—¡Séfuti ámu, ánjein ligía, siñáti lesáfuragun lúngua! ³² ¡Raríla Crístu, Jarúeite Israelítagu, lueígiñe gurúwa guetó wagíbugiñe, afíñe wamámuga luágu!

Ja dáwaguñubaña luágu gurúwa úara lúma, anába jamúti gíñe.

Loúnwen Jesúsu

(Mt 27.45-56; Lc 23.44-49; Jn 19.28-30)

³³ Amídirugu, ába labúrigadun sun uboú darí ladaünrún ürüwa rábounwéyu. ³⁴ Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígorana?

³⁵ Niñanu jádaangiñe ja ñíbaña agáambuti, ába jaríñagun.

—Agáamba jumá, lagúajaña lun proféta Elías.

³⁶ Ába leíbaagun ában jádaangiñe, ába ladüdürüagüdün ában mudúsi táu diweín garüjütu, ába líchuguni luágu ában wéwe, ába línhuni lun Jesúsu lun lachúurunun, ába laríñagun.

—Ígira wameí guetó, waríja ánjein ñübin Elías aráriragüdei.

³⁷ Ábatí ladügün Jesúsu ában agúaraguni jéreti, ába loúnwen.

³⁸ Ába tajeíridagun tubélun témpulu lídan bián murúsun íñugiñe lun ünabun. ³⁹ Dan lagáambuni jábuti súdaara Rómana le rárabei ligíbugiñe Jesúsu lagúaragun, aríjaleí ída líña lan loúnwen, aba laríñagun.

—Inárüni luágu Liraü lan Búngiu wügúri le.

⁴⁰ Niñanu gíñe würíña, aríagutiña dísegiñe, ñíñoun María Magdaléna, María to lúguchu Jacóbo le ñüraütimgilíbei, lúguchu gíñe José, ñíñoun gíñe Salomé. ⁴¹ Würíña ja, falá jamuti Jesúsu áni íderagua jamúti dán meja le Galiléañein lan. Niñanu gíñe sarágu ámu würíña ja ñübinbaña Jerusaléoun úara lúma Jesúsu.

*Lábunajoún Jesúsu**(Mt 27.57-61; Lc 23.50-56; Jn 19.38-42)*

42-43 Lubáragiñe lálüdün wéyu, ába liábin José, ában wügüri inébewati jádaangiñe líñun-ägei lúrudu, le agúrababajabaalin lagúmeserun larúeijan Búngiu táu sun lanígi, lílana fulásu le gíribei Arimatéa. Queíti luwéyuri lubeí lan aráansejani, le ában wéyu lubá wéyu le eméraaguagülei, ába lebélurun le ñíjin lubeí Piláto amúriaiei lúgubu Jesúsu, úouga ni murúsun anúfudei lídan. ⁴⁴ Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súdaara lun lálügündüni ánjein inárüni lubeí luágu jilá lan. ⁴⁵ Dan le laríñagunbei lun luágu inárüni lan, ába líchuguni Piláto lúgubu Jesúsu lun José. ⁴⁶ Ábatí lagáñijan José ában gamísá fíntu, ába larárigündüni lúgubu Jesúsu lueígiñe gurúwa, ába loúburaguni táu. Ába líchuguni lídoun ában umúajaü achigítí luágu dübü, ába ladáuruni láu ában dübü. ⁴⁷ Ába tídin María Magdaléna túma María to lúguchu José aríjei fulásu le ñí lubei labunúa Jesúsu.

16*Lásaarun Jesúsu lídaangiñe oúweni**(Mt 28.1-10; Lc 24.1-12; Jn 20.1-10)*

¹ Dan le lásügürünbei wéyu le eméraaguagülei, ába jagáñijan María Magdaléna, María to lúguchu Jacóbo, túma Salomé ibíñei lun joúdin ájurudei luágu lúgubu Jesúsu. ² Dimásu, láfunaduña larúgan, ába joúdin luágu lumúaja, ³ ábatí jaríñagun jámagua.

—¿Cábasan agídarei dübü lueígiñe lubéneri umúajaü?

⁴ Dan le jaríjinbei, úaali oúnwenbun dübü ligía lídan lilúgaarun.

⁵ Ába jebélurun lídoun umúajaü, ába jaríjin ában wügüri ñüraügili ñun ñí lueígiñe loúnwenren táu ában goúnu jarútu. Ába janúfudedagun, ⁶ ába laríñagun joun.

—Manúfudedagua jumá, jáluajañein Jesúsu le Nazarétna le ádarawagúbei luágu gurúwa, úati ya, sará lídaangiñe oúweni. Aríja jumeísan fulásu le ñí lubei líchugúa. ⁷ Jeíba, jaríñagame joun láni disípulugu, lúntima Pédro, luágu níngiran lan luágu üma lun Galiléoun jubáragiñe. Jaríjibeí ñí quei laríñaguni jun.

⁸ Ába joúdin würíña jagía anúrajeina ñígiñe ladüga lebélurun ában luweírin anúfudei joun. Maríñaguntiñati ni cáta ni ca un ladüga janúfude.

*Larúfudagun Jesúsu lúngua tun María Magdaléna**(Jn 20.11-18)*

⁹ Lárigiñe lásaarun Jesúsu lídaangiñe oúweni, dimásu bináafin, ába larúfudagun lúngua furúmiñe tun María Magdaléna, to méja ueíboun laságara sédü espíritugu wuríbatiña. ¹⁰ Ába tídin, ába

tawísaruniña ja eíbugubaña meja lúma. Dan le tadárirunbáliña, jayájuajaña ladüga lanárime íruni jádan luágú loúnwen. ¹¹ Dan le jagáambun luágú wínwanya lan, luágú aríja táani, mafíñetiña.

*Larúfudagun Jesúsu lúngua joun biáma jádaangiñe disípulugu
(Lc 24.13-35)*

¹² Lárigiñe, ába larúfudagun Jesúsu lúngua joun biáma jádaangiñe já meja eíbugubaña lúma, joúdiña áraabun. Ibídiñetí yebe joun luágú Jesúsu lan. ¹³ Ába joúdin, ába jawísaruniña ja jíbiri, ni jagía, mafíñetiña.

*Líchugun Jesúsu jadásin disípulugu
(Mt 28.16-20; Lc 24.36-49; Jn 20.19-23)*

¹⁴ Lárigiñe, ligía larúfudagun Jesúsu lúngua joun únsu disípulugu jagía dan le ñun jamá luágú dábula, ába celadeínjan joun luágú liloúguan jafíñen lúma lidére jachügü, ladüga mafíñen jamá joun ja aríjubalin lárigiñe lásaarun. ¹⁵ Ába laríñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia. ¹⁶ Ja afíñerutiña luágú, badísei jagíame, jasálbaruba, ja mafíñetiña, jeféridiruba lídaanme luwéyuri agúseragüduni. ¹⁷ Niján cátei le lúnbei jarúfuduni ja afíñebaña nuágú, lun lasúbudirúniwa luágú Búngiu lan oúnajabaliña. Jaságaruba espíritugu wuríbatiña jaweí gürígia lídan níri, jadímurejaba ámu dimúrei lueí jerérun, ¹⁸ ánjaña árügüda jéwe jájaburugu o ánjaña lan áta cátei le gáfarajati, madügünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

*Lamúdeirun Jesúsu siélun
(Lc 24.50-53)*

¹⁹ Lárigiñe ladímurejan joun, ába líñurúniwa Jesúsu siélun, ába lañúurun lueígiñe louénwenren Búngiu. ²⁰ Ába jáfuridun disípulugu, ába japúrichijani ugánu le lámina asálbaruni lídan sun fulásu. Jesúsu méme íderagua lumútiña, áni choúrugüdaleí ugánu le japúrichijabei láu miláguru lé buri jadügübei.

UGÁNU BUÍTI LE LABÜRÜJABEI LÚCAS LUÁGU JESÚSU

Labürijani Lúcas lé meja asúseredubei

¹ Lun Teófilo le weírigubei. Gíbeeña gürígia oúchutiña jabürüjani cátei lé buri luáguti wasálbarun lé meja asúseredubei wagánagua lídan lúaragun, ² áfaaguatiña jabürüjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun. ³ Áu gíñe, álögüdajaadina gíñe buídu buídu libügürü sun cátei le asúseredubei lúmagiñe lagúmeserun, áni afíñetina luágu maríban lan lun nabürüjanun gárada to bun quei lubúdubu, ⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagüriaajoún Juan le abásteragüdajabei

⁵ Dán meja le Heródes lan urúeibeí Judéa, ñíñein meja ában fádiri lánina jafíñen juríu, gíriti Zacarías, jádaangiñeti fádirigu ja lánigu Abías. Elisabét tíribei lúmari, jádaangiñetu giñe ladügawagun Aarón. ⁶ Biángubei jagía, richáguatiña ligíbugiñe Búngiu, gúnculitiña lúma, adüga jameí sun le lubeíbei darí lun siñá lan laríñawagún ni cáta wuríbati jawágu. ⁷ Masáanigutiña ladüga siñá lan tagáragüdün Elisabét, áni derébugugaaña gíñe jagía biángubei.

⁸ Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu, ⁹ ába jabúdujan segúñ jagáburi fádirigu juríu, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías. ¹⁰ Sun niján lan cupáli águdajoúa, añája gürígia boúgudi ayúmuragua lun Búngiu. ¹¹ Ábati lasáliragun ában láni Wabúreme ánjeli lun Zacarías, rára lueígiñe loúnwenren latárü le ñí lubei cupáli. ¹² Dan le laríjini Zacarías ánjeli ligía, ába laweíridun lanígi, ába lebélurun anúfudei lídoun. ¹³ Ába laríñagun ánjeli ligía lun.

—Manúfudebá, Zacarías, ladüga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan. ¹⁴ Tabuínchuba banígi láu ugúndani luágu, áni sarágujaba gíñe agúndaarutiña láu lagüriaajoún, ¹⁵ ladüga weírigubei biraü ligíbugiñe Búngiu. Mátunbei diweín ni bínu, áni ñíbei Sífiri Sándu lúma lúmagiñe lubáragiñe lagüriaajoún lun ladúndejani lídan sun cátei. ¹⁶ Ladüguba lun jagíribudun sarágu jádaangiñe Israelítagu lun jagáambuni Jabúngiute, ¹⁷ lesériwiduba

lun Búngiu láu sarágu ubáfu queí meja ladügünü Elías. Laráansejaba lubá Jesúsu láu laráandaragüduniña agübürigu jáma isáanigu, láu gíñe larúfudajan joun ja magáambadibaña lun Búngiu lun júaradun lúma queísi gürígia richáguañiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachoúruni cátei le? Áu táu sun númari, derébugugaadiwa.

¹⁹ Ába laríñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buítí le bun. ²⁰ Guetó, quei mafíñerun bubeí luágu le nariñagubei bun, berédera merérunga, siñábei badímurejan daríme lagüriañoún biraü. Lagúfuliruba cátei le lídan lidáani.

²¹ Sun dan le, añájati buga gürígia boúgudi agúrabajei Zacarías, weírititi janígi luágu lílü témpulurugu. ²² Dan le láfuridunbei, siñá ladímurejan joun, ábatí jasúbudiruni luágu salígu lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü. ²⁵ “Ladügüñein Búngiu lubuíduñ cátei le nun guelé lun lagídaruni nibúsigari jagíbugiñe gürígia.”

Lasúbudiragüduni ában ánjeli luáguti lagüriañoún Jesúsu

²⁶ Sísi játi lárigiñe, ába loúnajani Búngiu ánjeli Gabriél lídoun ában ubúrugu láni Galiléa, gíriti Nazarét, ²⁷ lun lídin bisídoun ában würi irájügiru, gíritu María. Würi tugúya, gadáraduñoun lúma ában wügüri gíriti José lun tamárieidun lúma, wügüri ligía, linébaanfan urúei Davíd. ²⁸ Ába lebélurun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würiña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagan túngua ca lan uágu labúsura tun ítara. ³⁰ Ábatí laríñagun ánjeli ligía tun.

—Manúfudebá María, fuleísei láadibu Búngiu, ³¹ badágeinada, ábame bagüriaian ában irájü, ábame bíchuguni líri Jesúsu. ³² Weírigubei, Liraü Búngiu le íñubei lúba lagúarúniwa, áni larúeigüdubei Wabúreme Búngiu quei larúeigüduni Davíd, le binádu lidúje. ³³ Lagúmadirubei linásíñun Israél lun sun dan, áni magúmuchadibei lagúmadijan.

34 Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

35 Ába laríñagun ánjeli tun.

—Liábinba Sífiri Sándu buágun, ábame loúburagunibu lubáfu Búngiu. Ligía sándubei lubeí irájü le lúnbei bagüria jani, Liraü Búngiu lúba lagúarún. 36 Tiábin bidúje to Elisabét, dageínaaru gíñe lau sun weíyaaru lan, tagáraüdüba ában wügüri irájü, ítara líña lubeíti, gó meja uáguboun jaríñaga luágu siñá lan tagáraüdun, níjein sísi játi dageínaü tuágu. 37 Úati ni cáta siñáti lun Búngiu.

38 Ábati taríñagun María.

—Lidámun Nabúremé Búngiu nugúya, adügaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

39 Lídoun dan ligía, ába tídin María furése lídoun ában ubúru gu le labádinaguabeí buri wübü Judéa, 40 ába tebélurun lúbiñloun Zácarías, ába tabúsurun tun Elisabét. 41 Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun. 42 Ábati taríñagun láu umálali le jéreti.

—Binílaadibú Búngiu sügü jáu sun jiñáriñu, binílaali gíñe biraü. 43 ¿Cátanañadina lun tiábin lúguchu Nabúremé bisídana? 44 Láu nagáambuni babúsurun, ába lánjingichagun niraü nurágeirugu láu ugúndani. 45 Gúndaatibú bugúya le afíñerubei, luágu lagúñfuliruba lan cátei le laríñagubei Wabúremé bun.

46 Ábati taríñagun María.

Rútu nuwáni uweíriguni lun Nabúremé,

47 gúndaagua tugúya nanígi luágu Búngiu le Nasálbaragüle,

48 lugúndun gudémejabujaali nun, nugúya le lidámun.

Lúmagiñe guelé, jaríñaguba sun gürígia luágu fuleíseiwaadina lan,

49 ladüga adügaali Búngiu, le Súnti Gabáfu, cátei weínamuti nun, sándezutí líri.

50 Súnwandan gudémebaña lan ja inébejabúbaña lun, lun.

51 Adúgaali oúnwenbun buri cátei, adügaali lun ni cáta jamá ja barüguabaña joúngua.

52 Gidálaaňa ja gabáfubaña lídaangiñe jaweírigun, ja ünabubaña, ába ladügüniňa lun weírigu jamá.

53 Já buga lamábaña, quimúlegüda lumútiňa, ángeinti ja rísibaña, míchugunti ni cáta joun.

54 Íderagua lumútiňa linásíiun Israél, ja esériwidubaña lun, mabúlieidun lumúti lun gudémejabu lan,

55 queí meja lidáradun jáma binádu wagübürigu—

Abrahám jáma ladügawagun—lun gudémejabu lan joun lun sun dan.

⁵⁶ Ába teréderun María ürüwa játi ñi, lárigiñe, ába tagíribudun jábiñoun.

Lagüria joún Juan le abásteragüdajabei

⁵⁷ Ába lagúnculirun dan lun tagüria jan Elisabét, ába tagüria jan ában wügürü irájü. ⁵⁸ Dan le jagáambun tubésinanigu jáma tidújeñu luágú lubuídun cátei le ladügübei Búngiu tun, ába jagúndaarun úara túma. ⁵⁹ Luágú liwídün wéyu, ába lerésibiruni circuncisión, le liseíni luágú láni lan Búngiu irájü ligía. Buséntiña yebéti jíchuguni líri lúguchi luágú, le Zacarías, ⁶⁰ ába taríñagun lúguchi.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíriti Juan.

⁶² Ába jálugüdüni lúguchi irájü láu seíni ca lan íri labúseerubei líchugun luágú. ⁶³ Ába lamúria jan ában murúsun fuláansu, ába labürüdün luágun. “Juan lírabei.” Ába laweíridun janígi súngubei láu cátei le. ⁶⁴ Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu. ⁶⁵ Ába laweíridun janígi besínagu láu cátei le, ába labájüdawagún cátei le lídan sun fulásu geyéguá jáu. ⁶⁶ Sun ja agáambubalin, ába jeréderun asáminara, ába jálugüdagun jámagua, jaríñaga.

—¿Cáteibeí funasan irájü le?

Ladüga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸ Buídulá ladímurejoún luágú Wabúreme le Jabúngiutebei gürígia ja Israelítagu,

ladüga ñübinjali woun, wagía le lánigu, áni sálba láadiwa.

⁶⁹ Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

⁷⁰ Ítara líña meja laríñaguni Búngiu jádaangiñe láni profétagu ja edéregeragubaña joúngua lun, lúmagiñe meja binádu dan,

⁷¹ luágú lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷² Ítara líña gudémejabu lan Búngiu joun binádu wagübürigu, arúfudaleí luágú mabúlieidagun lan lueí lidáradun le sándubei jáma.

⁷³ Niján lé meja laríñagubei lun wáguchi Abrahám.

74 luágu leséfurubadíwa lan jaweí wáganiňu,
 lun gayáraabei lan wesériwidun lun manúfudeiga,
 75 láu úarani, derégeguňu wagía woúngua lun, sun dan le
 wabágaridubei.
 76 Áni bugúya nisáaniraü, láni Búngiu le íñubei proféta lúba
 bagúlarúniwa,
 ladüga baráansejaba lubá Wabúreme,
 77 subúdi lámuga üma lánina asálbaruni joun lánigu,
 le áubei ferúdunawa lan jafígoun.
 78 Wabúngiute, láu lísiňejabu lúma lugúdemejabu,
 loúnajabei Crístu wámoun siélugiňe
 79 lun larúgoungadágüdün jáu ja lídaanbaña lubúriga lúma jáu ja
 luágubaña üma le oúwenibei lébeja,
 lúma lun ladúndejaní wapásun lídoun üma le anügübalíwa lídoun
 darángilaü.
 80 Aweírideina ligíati irájü ligía, afáragadagueina gíñe lídan
 láni espíritu. Ába laganoún lídan fulásu mageírawati darí
 lúmoun wéyu le lagúmeserun luwádigimari lun Búngiu jagánagua
 lumútuniňa Búngiu ja Israelítagu.

2

Lagüriajoúniwa Jesúsu (Mt 1.18-25)

¹ Lídoun buga dan ligía, ába lariňagun urúei Augústo lun
 jabájüdün sun gürígia ja Rómabaña. ² Furúmiňe meja jadügünü
 cátei le, dán meja le Cirénio lan agúmadijabei Síria. ³ Súnti
 gürígia móso joúdin jageíra lun ñi lan jabájüdüwa. ⁴ Ligía
 láfuridunbei José Nazarétgiňe, loúbawagugiňe Galiléa, ába lídin
 loúbawagun Judéa lídoun fulásu le gíribei Belén, le ñí lubei
 lagüriajoúa Davíd, quei linébaanfan lubeí Davíd José. ⁵ Ába
 lídin Belén lun labájüdün úara túma María to gadáradunboun
 lúma lun jamárieidun, áni dageínañoun. ⁶ Dánti le añája lan
 ñí Belén, ába lachülürün dan lun tagüriaajan María. ⁷ Ába
 tagüriaajani furúmiňeti tiraü ñi, ába toúburaguni tídan lágei, ába
 taroúnragüduni ñí tídan jában anímaalu ladüga úati ubáraü joun
 tídan jában chüldügütiňa.

Ánjeligu jáma oúnigirutiňa mudún

⁸ Lídan áraabu boúgudi lueí Belén, ñíñanu joúniri mudún,
 bou larúgan jáu oúnigiraňa jalügüniňa mudún. ⁹ Sódini, ába
 lasáliragun ában láni Wabúreme Búngiu ánjeli siélugiňe joun, ába
 jaríjin ában oúnwenbun larúgounga le lánina Búngiu geyégua jáu,
 ába janúfudedagun. ¹⁰ Ába laríňagun ánjeli ligía joun.

—Manúfudeda jumá, ladüga níjein ugánu buíti nanügün
 jun, lébunabei sarágu ugúndani joun sun gürígia. ¹¹ luágu

agúria joúaali lan ában asálbaragülei jun ugúñe, lageíra Davíd, Crístu le Jabúreme.¹² Jadárirubei irájü ligía joúburagu tídan lágei, roun tídan jában anímaalu.

¹³ Lídan óra ligía, ába jasáliragun sarágu ánjeligu lubádu furúmiñeti ánjeli, ába jíchugun uweíriguni lun Búngiu, jaríñaga.

¹⁴ ¡Uweíriguni lun Búngiu lídan líñutima siélu,

darángilaü müarugu jádan gürígia ja ibíjubalin lufúleisein!

¹⁵ Dánti le jagíribudun ánjeligu járigoún siélun, ába jaríñagan joúniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába joúdin furésegueina, ába jadárirunun María lúma José, lúma irájü roun tídan jában anímaalu. ¹⁷ Dan le jaríjinbalin, ába jabájüdaguni le laríñagubei ánjeli joun libügürü le. ¹⁸ Súnti ja agáambuliña, weíriti janígi láu le jaríñagubei. ¹⁹ Áni María, areídañu tíñein sun cátei le tídan tanígi, arítagua luágu. ²⁰ Ábatí jagíribudun joúniri mudún, adímu-rejeina weíri luágu Búngiu, luágu sun le jagáambubei lúma le jaríjibe, ladüga suséreti ítara quei laríñawagúniwa joun.

Larúfudúniwa Jesúsu témpulurugu

²¹ Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúncularubei lidáani jarúmadun lagübürigu Jesúsu según igáburi lídan lilúrudun Moisés, ába janügüni irájü ligía ubúrugun Jerusalén lun jederegeruni lun Búngiu. ²³ Jadügünbalin líra ladüga laríñajare tídan lilúrudun Búngiu. “Sun furúmiñeti wügüri irájü agúria joúti lúnbei Búngiu.” ²⁴ Ába lubeíti joúdin adágaragüda le uágubei laríñaga lilúrudun Búngiu. bián wagúgu o bián lan únjun.

²⁵ Lídan meja dan ligía, níñein meja ában wügüri Jerusalén gíriti Simeón. Wügüri ligía ában wügüri buíti, weíriti lederegeragun lúngua lun Búngiu, áni agúrabla lumúti liábin Crístu, le lúnbei lasálbaruniña Israelítagu. Níñein Sífiri Sándu lúma Simeón, ²⁶ áni arúfuda láali lun luágu moúnwenbei lan maríjingaleí Crístu le lúnbei loúnajani Wabúreme Búngiu. ²⁷ Ába lídin wügüri ligía témpulurugun, ladúndejan Sífiri Sándu. Dánti le janügünbalin lagübürigu Jesúsu Jesúsu témpulurugun lun jadügüni le laríñagubei lúrudu láu, ²⁸ ába loúyuajani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun noúnwen láu darángilaü, nugúya le esériwidubei bun,

ladüga gúnfuli báali le baríñagubei nun.

³⁰ Aríja náali Wasálbaragüle láu nágu,

31 Asálbaragülei le boúnajabei joun sun gürígia.

32 Ítara lúba queísi ában lámpu lun larúfuduni inárüni joun ja mámabaña juríu,
ru ligíame uweíriguni joun Israelítagu, ja bánigu.

33 Ába laweíridun lanígi José táo sun María láu le laríñagubei Simeón luágu irájü le. 34 Ábati labíniruniña Simeón, ába laríñagun tun María, to lúguchu Jesúsu.

—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jerésibiruni. 35 Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágú buwáni.

36 Níñoun gíñe ában würi proféta, gíritu Ána, würi tugúya liraü Fanuél, jádaangiñe ladügawagun Áser. Weíriyaaru würi tugúya, nüraügiru meja tamárieidunbei, sédüñein irúmu táo lúma túmari, ába loúnwen, 37 guetó, gádürü-weín-gádürü irúmu táo. Máfuriduntuti témpulurugugíñe, terédera ñi esériwida lun Búngiu áriebu wéyuagu, ayúnara lúma ayúmuragua lun Búngiu. 38 Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

39 Lárigiñeti jagúncifilirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. 40 Aweírideina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpulurugu

41 Ságüja irúmu joúdin lagübürigu Jesúsu ubúrugu Jerusalén lubá fédu le páscea, 42 áni dan le lagúncifilirunbei Jesúsu dúusu irúmu, ába joúdin súngubei Jerusalén quei le jagáburi lídan fédu ligía. 43 Dánti le jagíribudun lárigiñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José, 44 jarítagún yebe luágu níten lan jádan gürígia ja jámarigubaña luágu üma. Ítara líña jadügün ában wéyu eíbuguni, dan le jáluajani jádan jadújeňu lúma jádan jasúbudiraagun, 45 madári jamúti. Ábati jagíribudun ubúrugin Jerusalén áluaeji ñi.

46 Ürüwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügündaguaña. 47 Súnti ja agáambubalin, weíriti janígi luágu lichú láu lúma

luágu buri loúnabagüle. ⁴⁸ Dan le jaríjinbalin lagübürigu, ába laweíridun janígi, ába taríñagun lúguchu lun.

—¿Cáme badügei cátei le woun, niraü? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Núguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábatí buri tareíduni lúguchu sun cátei le tarítagunrugun. ⁵² Niján mémeti Jesúsu aweírideina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

3

Lapúrichijan Juan le abásteragüdajabe, lídan fulásu mageírawati (Mt 3.1-12; Mr 1.1-8; Jn 1.19-28)

¹ Lídan liqueínsin lirúmuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Tracónite, Lisanías gumándan Abilínia, ² Anás lúma Gáifasi, jagía fádirigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraü Zácarías, lídan fulásu mageírawati, ³ ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságüríjan luágu jafígoun, sáansi jameíme jagáburi lun ferúdunawa lan jafígoun, badísei jagíame. ⁴ Suséreti cátei le ítara queí meja labürüdüni proféta Isaías, lariñaga.

Agaambúati lumálali ában agúarajati lídan fulásu mageírawati ítara.

“Aráanseja jumoún janígi lubá liábin Wabúreme,
queísi ladárarúniwa üma surúti.

⁵ Labuínchagüdüwaba sun gudúungu,
sun wübü, lagurúaba,
üma buri le segéti, lásururuba,
üma buri le múaragunti, lúwaradaguba.

⁶ Larijúbei sun uboú Wasálbaragüle, le loúnajabei Búngiu woun.”

⁷ Ñübintiña sarágu gürígia lun Juan lun labásteragüdüniña, ába lariñaga joun.

—¡Jarásan jówe jugúya le! ¿Ca awísarubalün lun jeíbaagun lueí lanárimé lafáyeiragüle figoú le yaráfaalibe? ⁸ Ígira jumeí binádu jigáburi, abágarda jumá lun gayára lan larijín buídu luágu sáansiguaali lan jigáburi. Maríñaga jumá jídaangua.

“Linébaanfaangu Abrahám wagía”, ladüga quei nariñaguni jun, gayáraati ladügün Búngiu linébaanfaangu Abrahám lídaangiñe buri dübü le.⁹ Yaráfaali dan lun jafáyeijan luágú jifígoun queísi taráanserún jaráwa lun táchuguni tidibu wéwe. Sun ídibu le mabuídunti lin lánchugúba, ábame lagudún.

¹⁰ Ábati jaríñagun gürígia jagía lun.

—¿Cáteiti lúnbei wadügüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

¹² Ñübintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadügüni?

¹³ Laríñaga Juan joun.

—Magúburaja jumá loúgiñe le uágubei laríñaga lúrudu.

¹⁴ Aríñagatiña gíñe fiú súdaara lun.

—Ángi wagía, ¿cági lúnbei wadügüni?

Laríñaga Juan joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madügün lumúti, gufúruma jumá láu jafáyeiruaja.

¹⁵ Añájati gürígia madéraguagüdünja arítagua luágú fáguá lan Juan Crístubei,¹⁶ ába laríñagun Juan joun súngubei.

—Áu, láu dúna nabásteragüdaün, nítenbei ában le lúnbei labásteragüdünün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madúna nan ni lun nafáragaduni tagürüga ligeídin.¹⁷ Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türigu buíti, ába loúndarún türigu buíti tídoun lágei, ába lagudún ífei lídan wátu geméti le méñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun gürígia luágú wasálbaragüle.¹⁹ Erérati gíñe lun gumándan Heródes luágú laganoún túma Heródias, to lúmari Felípe, le lamúlen, lúma luágú ámu buri cátei wuríbati le ladügübei.²⁰ Lubáragiñe ladügün Heródes gásu láu, adügarügü ligía ában cátei wuríbatimaati. ládaruni Juan furísunrugun.

Labásterun Jesúsu

(Mt 3.13-17; Mr 1.9-11)

²¹ Lubáragiñe ladaürüniwa Juan, dan le labásteragüdünña gürígia, badíseiti gíñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu,²² ába laríjíniwa larárirun Sífiri Sándu luágún camá jamuga ában únjun, ába lagaambúniwa laríñagun ában umálali siélugiñe.

—Aműrü Niraü le jínsiñebi nun, gúndaatina báu.

*Linébaanfaangu Jesúsu
(Mt 1.1-17)*

²³ Queí burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraü lan José, José, liraü Elí, ²⁴ Elí, liraü Matát, Matát, liraü Leví, Leví, liraü Melquí, Melquí, liraü Jána, Jána, liraü José, ²⁵ José, liraü Matatías, Matatías, liraü Amós, Amós, liraü Nahúm, Nahúm, liraü Eslí, Eslí, liraü Nagaí, ²⁶ Nagaí, liraü Maat, Maat, liraü Matatías, Matatías, liraü Semeí, Semeí, liraü José, José, liraü Judá, ²⁷ Judá, liraü Joána, Joána, liraü Résa, Résa, liraü Zorobabél, Zorobabél, liraü Salatiél, Salatiél, liraü Néri, ²⁸ Néri, liraü Melquí, Melquí, liraü Adí, Adí, liraü Cosám, Cosám, liraü Elmodám, Elmodám, liraü Er, ²⁹ Er, liraü Josué, Josué, liraü Eliézer, Eliézer, liraü Jorím, Jorím, liraü Matát, ³⁰ Matát, liraü Leví, Leví, liraü Simeón, Simeón, liraü Judá, Judá, liraü José, José, liraü Jonán, Jonán, liraü Eliaquím, ³¹ Eliaquím, liraü Meléa, Meléa, liraü Mainán, Mainán, liraü Matáta, Matáta, liraü Natán, ³² Natán, liraü Davíd, Davíd, liraü Isaí, Isaí, liraü Obéd, Obéd, liraü Booz, Booz, liraü Salmón, Salmón, liraü Naasón, ³³ Naasón, liraü Aminadáb, Aminadáb, liraü Arám, Arám, liraü Esróm, Esróm, liraü Fáres, Fáres, liraü Judá, ³⁴ Judá, liraü Jacób, Jacób, liraü Isáac, Isáac, liraü Abrahám, Abrahám, liraü Taré, Taré, liraü Nacór, ³⁵ Nacór, liraü Serúg, Serúg, liraü Ragáu, Ragáu, liraü Pelég, Pelég, liraü Héber, Héber, liraü Sála, ³⁶ Sála, liraü Cainán, Cainán, liraü Arfaxád, Arfaxád, liraü Sem, Sem, liraü Noé, Noé, liraü Laméc, ³⁷ Laméc, liraü Matusalén, Matusalén, liraü Enóc, Enóc, liraü Jaréd, Jaréd, liraü Mahalaléel, Mahalaléel, liraü Cainán, ³⁸ Cainán, liraü Enós, Enós, liraü Set, Set, liraü Adán, Adán, liraü Búngiu.

4

*Loúchawagúniwa Jesúsu
(Mt 4.1-11; Mr 1.12-13)*

¹ Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanügüni Sífiri Sándu lídoun fulásu mageírawati. ² Reídeiti Jesúsu bián-wein wéyu ñi láu Máfia oúchaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában oúnwenbun ilámaü. ³ Ábatí laríñagun Máfia lun.

—Ánjein Liraü bubei Búngiu, salíguagüdabeí dübü le feínme.

⁴ Laríñaga Jesúsu lun.

—Taríñajare Lerérun Búngiu. “Mámarüguba táu fein jabágarida gürígia, jabágariduba gíñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanügünü Máfia Jesúsu luágun ában wübü íñuti, ába larúfuduni sun fulásu le uboúagubei lun lídan ában. ⁶ Ába laríñagun Máfia lun.

—Níchugubei sun ubáfu lúma sun uweíriguni le bun ⁷ ánjabu ájuduragua nun lun banügünina quei bubúngiute, báñibei súngubei, ladüga ibíja náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nueí, Máfia, ladüga taríñajare Lerérun Búngiu. “Judúguabá lun Búngiu le Babúreme, lúnrügülá besériwida.”

⁹ Lárigiñe, ába lanügünü Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraü bubei Búngiu, chüguabá búngua yágiñe lun ünabun, ¹⁰ ladüga taríñajare Lerérun Búngiu.

Loúnajabaña Búngiu láni ánjeligu lun joúnigiruníbu,

¹¹ janügübadibu jájaburugu lueí labúleiseirun bugúdi luágu dübü.

¹² Ába laríñagun Jesúsu lun.

—Taríñajare gíñe Lerérun Búngiu. “Moúchaguabeí Búngiu le Babúreme.”

¹³ Dánti le madárijali Máfia cába lan luwúyeri oúchawagúni ladüga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa (Mt 4.12-17; Mr 1.14-15)

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejoún luágu lídan sun fulásu geyégua.

¹⁵ Arúfudajatija tídan jalígilisin juríu lídan sun fulásu, buíti jadímurejan sun gürígia luágu.

Jesúsu lídan ubúrugu Nazarét (Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ñí lubei lagüriaajoúa, ába lebélurun tídoun jalígilisin juríu lídan wéyu le eméraaguagülei quei ligáburi yebu, ába laráramun lun lalíijan tídan Lerérun Búngiu. ¹⁷ Ába jíchugunun lilíburun proféta Isaías lun, dan le ladárarunun, ába ladáriruni le ñí lubei laríñaga ítara.

¹⁸ Níjein láni Búngiu Sífiri Sándu nuágu, ladüga anúadaja láadina lun níchuguni ugánu buíti joun gudémetiña,

oúnaja láadina lun námalijaniña ja nidíjeribaña tídan janígi, lun náfuridagüdüniña adaürütiña, lun níchugun aríjini joun maríjintiña,

lun neséfuruniña ja ouserúabaña wuríba,

19 lun nadímurejan luágu dan le fuleísejabu lan Búngiu joun gürígia.

20 Ába ladáurunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña ariaguei,²¹ ába lagúmeserun adímureja, laríñaga.

—Ugúñe guánaruü gúnfulijali cátei le jigíbugiñe.

22 Adímurejatiña sun jagía buíti luágu Jesúsu, weírititi janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraü José le?

23 Ába laríñagun Jesúsu joun.

—Subúsiti nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adüga báalibe Capernaúm, adügabeí giñe ya bageíra.”

24 Ába lasígirun adímureja, laríñaga.

—Ninárün jáu luágu úa lan ni ában proféta erésibirúati buídu lageíra. 25 Choúru numúti luágu añájein lán meja sarágu würíña ja jiláguaña jámarigu jádan Israelítagu lídan meja lidáani proféta Elías, dan le májuyun lubeí júya luágu ürüwa irúmu dimí, ába ñi lan sarágu ilámaü fulásurugu, 26 áni moúnajan lumúti Búngiu Elías túmoun ni ában jádaangiñe würíña jiláguaña jámarigu jagía ja aganoúbaña Israél, louñajei túmoun ában to aganoúboun Sarépta, yaráfa lun ubúrugu Sidón. 27 Ñíñanu meja giñe sarágu gawágutiña gumeín luágu jára ñi Israél lídan lidáani proféta Eliséo, úati ni ában jádaangiñe areídagaguagüdüti lueídügüya Naamán le Síriana.

28 Dan le jagáambunbalin sun ja ñíbaña ligílisirugu cátei le, ába jagánidun sarágu. 29 Ába jásaarun, ába jaságaruni Jesúsu bougudín lueí fulásu, ába janügüni lábulugun wübü le gagíbuagubalin fulásu lun jájuchuruni ñígiñe. 30 Ába lásügürün Jesúsu jamídaanguágiñe jámagua, ába lídin.

*Ában wügüri gawáguti espíritu wuríbati
(Mr 1.21-28)*

31 Ábatí lídin Jesúsu Capernaúm, ában fulásu le lídaanbei Galiléa, ába larúfudajan joun gürígia ñi lídan wéyu le eméraaguagülei. 32 Weírititi janígi láu ligáburi larúfudajan, ladüga láu ubáfu ladímureja.

33 Ñíñeinti ában wügüri ligílisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agüñrinchaguawa? Subúdi numútibu, áni subúdi numúti luágu amürü lan Liraü Búngiu le sándubei.

³⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

Ábati lájuchuruni espíritu wuríbati wügüri ligía múarugun jagíbugiñe súngubei, ába láfuridun lídaangiñe, mabúleiseirunga.

³⁶ Ába laweíridun janígi súngubei, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritugu wuríbatiña, ába jáfuridun!

³⁷ Adímurejoúatiti buri luágu Jesúsu lídan sun fulásu geyéguá.

Lareídaguágüdünun Jesúsu límenidi Pédro

(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígilisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareídaguágüdünun. ³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

Lareídaguagüdün Jesúsu sarágu sánditiña

(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janügüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti. ⁴¹ Sarágu jaña gíñe ja gawágutiña espíritugu wuríbatiña, ába jagídarúniwa jaweí, ába buri jagúaragun ítara.

—Amürü le Liraübei Búngiu.

Ába ladeínjan Jesúsu joun espíritugu wuríbatiña, mígirun lumútiña lun jadímurejan, ladüga subúdi jamúti luágu ligía lan Crístubei.

Lapúrichijan Jesúsu Galiléa

(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúrugu lídoun ában fulásu mageírawati. Ába jáluajani gürígia, ába jachüllürün le ñíjin lubeí, buséntiña yebe jeréderuni lueí lídin, ⁴³ ába laríñagun joun.

—Gásu gíñe níchuguni ugánu le luáguti larúeijan Búngiu joun lílana líbiri fulásu, ladüga lun líra noúnajoúá.

⁴⁴ Ítara líña lídin apúrichijeina tídan buri jalígilisin juríu, Galiléa.

5

*Esénijani le láubei miláguru
(Mt 4.18-22; Mr 1.16-20)*

¹ Luágu ában dan, ñíñein Jesúsu láru dúna le Genesarét, ábatí jayábingua sarágu gürígia darí lun jámurudaguni, ladüga busén jamá jagáambuni lerérun Búngiu. ² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³ Ábatí ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábatí lañúurun Jesúsu tídan ugúnein, ába lagúmeserun arúfudaja joun gürígia ñígíñe. ⁴ Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun áriebu, mañúguntiwa ni cáta, quei amürü lubeí aríñagubalin, wágura.

⁶ Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun. ⁷ Ábatí jadügün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünun biángubei ugúnein darí yebe lun tadíbiragun. ⁸ Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladüga ában wügüri gafígoounti nugúya.

⁹ Laríñagubaalin Simón líra ladüga laweíridun lanígi, jau sun ja úarabaña lúma, luágu añúguni le jadügübei. ¹⁰ Weíriti gíñe janígi Jacóbo lúma Juan, ja lirajüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja gürígia nun.

¹¹ Lárigiñeti játürün, ába jígiruni sun cátei, ába joúdin lúma Jesúsu lun láni jamá disípulu.

*Lareídagüdün Jesúsu ában gawáguti gumeínluágu sun lúra
(Mt 8.1-4; Mr 1.40-45)*

¹² Luágu ában dan, lídaañein ában fulásu Jesúsu, le ñí lubei ában wügüri gawáguti gumeín luágu sun lúra. Dan le laríjinbalin wügüri ligía Jesúsu, ába lájuduragun dagá ligíbu müarugun, ába layúmuragun lun ítara.

—Nabúreme, ánjabu busén, gayáraati bareídagüdünina.

¹³ Ábatí lagúruruni Jesúsu láu lújabu, ába laríñagun.

—Buséntina, areídagubá.

Quei laríñagun ítara, ába lagídarun gumeín lueí wügüri ligía,¹⁴ ábatí laríñagun Jesúsu lun lun mabájüdagun láani cátei le ni ca un. Laríñaga lun.

—Ñüdünrügübá, arúfudagua búngua lun fádiri, rúbeíme edéweejani le uágubei laríñaga lilúrudun Moisés luágu barúmadun, arija jamámugei gürígia luágu areídaguaadibu lan.

¹⁵ Eíbu dan, eíbu labúruchaguntima luágu Jesúsu, sarágu jañátija gürígia oúndaragutiña lun jagáambuni lúma lun lareídaguágüdüni jasándi. ¹⁶ Ábaja lídin Jesúsu le ñíjin lumúti úa jamá gürígia lun layúmuragun lun Búngiu.

*Lareídaguagüdüni Jesúsu ában fadáguuali
(Mt 9.1-8; Mr 2.1-12)*

¹⁷ Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñübintiña lídaangiñe lirajüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniña sánditiña. ¹⁸ Ábatí jayábin fiú wügüriña barüina ában wügüri fadáguuali tídan ában ubárari, jálugati jebélaagüdüni le ñíjin lubeí Jesúsu lun laríjini. ¹⁹ Madáritiña jalíagiñeba lan jebélura ladúga jíbe gürígia, ábatí jaweínrun tábulugun múna, ába jagídarun murúsun lueígiñe loúgiñe le ñí lubeí Jesúsu, ába jarárigüdüni sánditi tídan lubárari ligibugiñoun. ²⁰ Dan le laríjinbalin Jesúsu afíñeni le jawágubei, ába laríñagun lun sánditi ligía.

—Wügüri, ferúdunawaali bifígoun.

²¹ Ábatí jaríñagun arúfudajatiña lilúrudun Moisés jáma fariséogu joúnguarügü.

—¿Cáteisan gürígia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figoú lueídügyüa Búngiu.

²² Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? ²³ ¿Cátima méreengúnbei laríñawagun. “Ferúdunawaali bifígoun”, ódi “Sarába, beíbuga”?

²⁴ Narúfudaaliti jun luágu gayára lan ferúduna nan figoú, áu le Wügüri Garaüwarügti.

Ábatí laríñagun lun le sándibei.

—Sarába, barüboun bubárari, beíba búbiñoun.

²⁵ Lídan óra ligía, ába lásaarun sánditi ligía jagibugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu. ²⁶ Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

*Lagúarun Jesúsu lun Leví lun lánime disípulu
(Mt 9.9-13; Mr 2.13-17)*

²⁷ Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíriti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

²⁸ Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

²⁹ Lárigiñe, ába ladügün Leví ában oúnwenbun fédu lun Jesúsu, líbiñe, ñiñanuti sarágu agúburajatiña liseínsuna gumádi jámaya ámu gürígia ñun luágu dábula jáma. ³⁰ Ába jagúmeserun fariséogu jáma arúfudajatiña lillúrudun Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafíountiña?

³¹ Laríñaga Jesúsu joun.

—Ja magádiebaña, memégeirúntiña surúsia, aná ja sándibaña.

³² Máma niábiña áluaaja magádietiña ligíbugiñe Búngiu, niábiña áluaaja gafíountiña lun lasáansirún joúserun.

*Jálügüdüni Jesúsu luágu ayúnaruni
(Mt 9.14-17; Mr 2.18-22)*

³³ Ábati jaríñagun lun Jesúsu.

—¿Ída liñásan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, joútiña, gurá jagía súnwandan?

³⁴ Ába laríñagun Jesúsu joun.

—¿Gayáraati funági jayúnaragüdüniña gürígia ja jamísurajan lídoun ában maríei sun niján lan adári jáma ñi? ³⁵ Lachülüruba dan lun lídin adári, ligíameti jayúnarun.

³⁶ Rúti gíñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérígiru lun láfadajan ában anáanguni ñulújaru, ánjein ladüga ítara, lagádeiruboun to isérígiruboun, áni merédebei gíñe murúsun gamísa iséri ligía buídu tuágu anáanguni ñulújaru tugúya. ³⁷ Michugúntu gíñe diweín iséri lídoun guéru ñulújali, ánjein adügúwa ítara, tajeíridagubei diweín iséri guéru ñulújali, férídíméti diweín, féridi guéru. ³⁸ Ligía lúnti lubeí tichugún diweín iséri lídoun guéru iséri, ítara lúba lesériwidun guéru, seríwi diweín. ³⁹ Úati gíñe átutí diweín to binádu lun labúseerunun to iséri lárigiñe, laríñaguba. “Buítimaatu to binádu.”

6

*Jabúdajan disípulugu türígu lídan wéyu le eméraaguagülei
(Mt 12.1-8; Mr 2.23-28)*

¹ Luágu ában wéyu le eméraaguagülei, eíbugeina líña Jesúsu labádinagua nádú jáma láni disípulugu, átüjeina jagíati disípulugu lin türígu, ába jéferejani láu jájabu, ába jeígini lila. ² Ábati jaríñagun jádaangiñe fariséogu joun.

—¿Cásan uágu jadüga wadágimanu le moún lumuti ladügün lídan wéyu le eméraaguagülei?

³ Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lalámachunbei jáu sun ja úarabaña lúma? ⁴ Ába lebélurun tídoun lúban Búngiu, ába lanügün tídaangiñe fein to sagráuboun, jou ligía tídaangiñe, ru ligía joun ja úarabaña lúma, láu sun fádirigu rügüñanu lán yebe lúnbaña jeigin tídaangiñe fein tugúya, según lilúrudun Moisés, áni máma figoú le ladügübei Davíd ligibugiñe Búngiu.

⁵ Aríñagati gíñe joun.

—Gabáfutina, áu le Wügüri Garaüwarügüti, lun naríñagun cába lan gayára ladügniwa wéyu le eméraaguagülei.

Wügüri le jilálibei újabu

(Mt 12.9-14; Mr 3.1-6)

⁶ Lídaanya ában wéyu le eméraaguagülei, ába lebélurun Jesúsu tídoun jalígilisin juríu, ába lagúmeserun arúfudaja. Níñein ában wügüri jiláali lújabu le loúnenren, ⁷ añájati arúfudajatiña lilúrudun Moisés jáma fariséogu ariaajei Jesúsu ánjein lagáranijaba lubeí lun lídan wéyu le eméraaguagülei, lun jadárirun lidúnrun. ⁸ Subúdi lumúti ca lan jarítagubei, ába laríñagun lun wügüri le jilálibei újabu.

—Sarába, ráramabá wagibugiñe.

Ába lásaarun, ába laráramun ñi. ⁹ Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügün lídan wéyu le eméraaguagülei, buídu ódi wuríbani, lasálbarun ibágari ódi lagídarún?

¹⁰ Ábati laríaguniña Jesúsu sun ja geyégubaña láu, ába laríñagun lun wügüri ligía.

—Tulébei bújabu.

Ába látuleruni, ába lareídagun. ¹¹ Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmuchun láu Jesúsu.

Lanúadajaniña Jesúsu dúsusu apóstolugu

(Mt 10.1-4; Mr 3.13-19)

¹² Lídoun dan ligía, ába lídin Jesúsu luágun ában wübü ayúmuragua lun Búngiu. ¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴ Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraü Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

*Larúfudajan Jesúsu joun sarágu gürígia
(Mt 4.23-25)*

¹⁷ Ába larárirun Jesúsu jáu lueígiñe wübü, ába leréderagun jáu láni disípulugu lídan ában fulásu le ñí lumuti sagádi wásati, ñíñianu gíñe sarágu gürígia ñübintiña loúbawagugiñe Judéa, Jerusalén, lúma lárurugugiñe Tíro lúma Sidón. Sun gürígia ja, jayábiña lun jagáambuni lapúrichijan Jesúsu lúma lun lareídagaguagdüni jasándi. ¹⁸ Já buri asúfurirubaña jáu espíritugu wuríbatiña, areídagauátiña gíñe. ¹⁹ Álugatiña sun gürígia jagúrurun luágú Jesúsu, ladüga areídagauagüda lumútiña súngubei láu lubáfu.

*Fuleíseiatiña jáma fugiábugu
(Mt 5.1-12)*

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibei, ladüga ménreengúnbei jun lun jebélurun lídoun larúeijan Búngiu.

²¹ ‘Fuleíseiwatün, jugúya le áfaagubei ilámaü guetó, ladüga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

²² ‘Fuleíseiwatün dan le iyéreegu jumá joun gürígia nueígiñe, dan le jabúgagunün jawáriua, dan le janábagunün, dan le janügüni jíri queí ni cáta, quei cátei wuríbati, nueígiñe, áu le Wügüri Garaúwarügüti. ²³ Gúnda jumá sarágu, buin jumá láu ugúndani lídan wéyu ligía, ladüga jibíjuba ában oúnwenbun afáyeiruajaü siélu, ítara méme líña meja jadüga binádu jagübürigu gürígia ja joun profétagu.

²⁴ ‘Fugiábugu jugúya, jugúya le rísibei, ladüga ibíja jumáali sun ugúndani le lúnbei jibíjini.

²⁵ ‘Fugiábugu jugúya, jugúya le químulebei, ladüga jalámachuba.

‘Fugiábugu jugúya le éjerajabei guetó, ladüga jayájuajaba láu íruni.

²⁶ ‘Fugiábugu jugúya dan le sun jamá gürígia adímureja buítí juágú, ítara liñá meja jadímurejan binádu jagübürigu buítí jawágú profétagu yéetiña.

*Jínsiñe jamá jáganiňu jun
(Mt 5.38-48, 7.12)*

²⁷ 'Niján nerérunt jun, Jugúya le agáambubalina. Jínsiñe jamá jáganiňu jun, adüga jumá buítí joun ja iyéreejabúbaña jun,
²⁸ biní jumaña ja íñaragutün, ayúmuragua jumá jawágu ja anábagutün. ²⁹ Ánjabu láfara ában gürígia luágu ában loúba bigíbu, rúbei gíñe le ában loúba lun, le anügütu babíte bueí, rúboun gíñe bisímisin lun. ³⁰ Furúmieguarügü le amúriaajati búma, rúba lun, le anügüti bumégen, máluaajabeí lúma. ³¹ Le cátei le babúseerubei ladügűn bun, ligíjalá badüga joun ámu.

³² 'Ánjein já rügüñnanu lubeí jínsiñejabúbaña jun jínsiñe jun, ¿ca buítí jadügübei láu líra? Ásta gafíountiňa, ítara líňa jadüga.
³³ O ányaün lan adüga buítí joúnrügü ja adügubaña buítí jun, ¿ca buítí jadügübei láu líra? Ítara líňa gíñe jadügün gafíountiňa.
³⁴ Ányaün afúredeija joúnrügü ja úmagiñebaña jarítagua jibíjin som cátei, ¿ca buítí jadügübei láu líra? Afúredeijatiňa gíñe ja wuríbabaña joun wuríbatiňa jáledi, agúrabáňu jagía gíñe jabíjin som cátei jámagiñe. ³⁵ Ánjein jugúya, lúnti jínsiñe jamá jáganiňu jun, adüga jugúyame buítí, afúredeija jugúyame, magúrabajaanga ni cáta lewéñegua. Ítara lúba weíri lan jafáyeiruaja lúmagiñe Búngiu le íñugubei, áni lirájüñübadün gíñe le tímatimaati, ladüga ligía, fuleíseijabúti gíñe joun ja meteíngiradibaña lúma joun ja wuríbabaña. ³⁶ Gudémejabu jumá, quei gudémejabu lan júguchi Búngiu.

*Madímureja jumá wuríba jawágu ámu
(Mt 7.1-5)*

³⁷ 'Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburi. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. ³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladüguba jun queígueirügü jadüga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme jýyu?
⁴⁰ Úati ni ában disípulu weíriguti lueí lumáesturun, íbini ánjein lagúmucha latúriajan, chülürögübei quei lumáesturun.

⁴¹ 'Ída líňa gayára bubálin liraüraü ífei le lídaanbei lágu bíbugaña aríja, áni masándi bumúti durúsú le lídaanbei bágu?

⁴² ¿Ída líňa gayára lubeí baríñagun lun bíbugaña. "Sagánei liraüraü ífei le bágurugubei", áni masándi bumúti durúsú le bágurugubei? ¡Biánguañein bigíbu! Sagábei durúsú le

bágurugubei furúmiñe, gayára lámuga baríjini liraüraü ífei le lágorugubei bíbugaña buídu lun baságaruni.

*Luágú lin tídibu wéwe tasúbudirúa
(Mt 7.17-20, 12.34-35)*

⁴³ 'Úati tídibu wéwe buíti lun wuríba lan lin, úati gíñe tídibu wéwe wuríbatí lun buídu lan lin. ⁴⁴ Sun tídibu wéwe subúdiwati luágú lin, mátüjoóntu ígo lueígiñe jíyu, ni beíbei lueígiñe guríbiyuwa. ⁴⁵ Gürígia le buídubei, cátei buíti laríñagubei ladüga cátei lan buíti tídaanbei lanígi, gürígia le wuríbatí, cátei wuríbatí laríñagubei ladüga cátei lan wuríbatí tídaanbei lanígi. Luágú le laríñagubei gürígia lasúbudirúa ca lan tídaanbei lanígi.

*Bián ébuu
(Mt 7.24-27)*

⁴⁶ '¿Ca uágu jaríñaga luágú áu lan Jabúremebi áni madügün jumúti le nubeíbei? ⁴⁷ Naríñagaali jun ída lína lan le ñübinbei nun áni adügaleí le nubeíbei. ⁴⁸ Ítara lína quei ában wügüri le ábunagubei ában múna, achíajati julíli furúmiñe, ába lábununi wagábu labádinagua dübü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladüga luágúñoun lan ébuu derébuguti. ⁴⁹ Ánjeinti le agáambubalina áni madügün lumúti le nubeíbei, ítara lína quei ában wügüri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagünrinchagun le gumúti.

7

*Lareídagüdüni Jesúsu lumúsun ában gumándan Rómána
(Mt 8.5-13)*

¹ Dan le lásurunbei ladímurejan Jesúsu joun gürígia, ába lídin Capernaúm. ² Ñíñein ában gumándan Rómána ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen. ³ Dan le lagáambunbei gumándan ligía luágú Jesúsu, ába loúnajan fiú jádaangiñe wügüriña weírigutiña lídan jafíñen juríu lun jayúmuragun lun Jesúsu lun lídin areídagüüdei lumúsun. ⁴ Ába joúdin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ ladüga jínsiñetiwa wagía juríu lun, ligía guánarügü ábunaguagüdübarun walígilisin.

⁶ Abati lídin Jesúsu jáma, dan le yaráfaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara lína gumándan lun manügün ban bubéresegun ñüdüñ lúbiñe, luágú nege madüna lan lun bebélurun lúbiñoun, ⁷ ligía nege mídin lubeí lúngua álugabu.

Rúrugübeí dimúrei, ábame lareídagun lumúsun. ⁸ Ladüga ligía nege gíñe lábugiñeñein gumádi iñutimaati, áni añájein gíñe súdaara lábugiñe lagúmadijan. Dan lé nege laríñagun lun ában jádaangiñe lun lídin, ñüdünti, dan le laríñagun lun le ában lun liábin, ñübinti, áni dan le loúnajani lumúsun adüga som cátei, adüga lumúti. Ítara lúba nege, luágu berérun mósu lídin sándi lueí lumúsun.

⁹ Dan le lagáambunbalin Jesúsu cátei le, weíriti lanígi láu wügüri ligía, ába laríjin jawágun gürígia ja afálarubalín, aba laríñagun joun.

—Ninárün jáu, ni íbini jádan Israelítagu madárigidina afíñeni weíriti quei lafíñen wügüri le.

¹⁰ Dánti le jachülürünbei wügüriña ja ñüdünbaña álugei Jesúsu járgoún lúbiñoun gumándan, areídaguaali lumúsun.

Láguyuguágüdüni Jesúsu tiraü ában jiláali túmari

¹¹ Lárigifíe cátei le, lídiña Jesúsu lídoun ában ubúrugú gíriti Naín, úareina jáña láni disípulugu lúma, jáma sarágu gürígia. ¹² Dan le lachülürünbei yaráfa lun lubéneri ubúrugú ligía, ába laríjin joúdin ábunaja ában jiláali le ligíarügüti tiraü lúguchu to jiláali túmari. Sarágu jáña lílana fulásu ñüdün ábunaja túma. ¹³ Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴ Ába layárafadun, ába lagúrurunun gánjoun, ába jaráramagun ja anügubaña. Ába laríñagun lun jiláali.

—Irájü, ¡naríñaguña bun lun básaarun!

¹⁵ Ábatí lásaarun lé buga jilálibei, ába lagúmeserun adímureja. Ába ledéregeruni Jesúsu tun lúguchu. ¹⁶ Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülgüa ában proféta weíriguti wádoun.

Aríñagatiña gíñe.

—Ñübinja Búngiu íderaguawa, wagía le lumútuniña.

¹⁷ Ába lagaambúniwa cátei le ladügübei Jesúsu lídan sun Judéa lúma geyégua láu.

Loúnagülegu Juan le abásteragüdajabeí

(Mt 11.2-19)

¹⁸ Agáambati Juan luágu sun cátei le, abájüdagua jamúti lánigu lun. Ábatí lagúarun joun biáma jádaangiñe, ¹⁹ ába loúnajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu. ²⁰ Dan le jachülürünbei le ñí lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdajabei álüyüdabu áanjein amürü lubeí Crístubei le lúnbei liábin, o áanjein lun lubeí wagúrabun ámu.

²¹ Lídan méme óra ligía, areídaguagüdati Jesúsu sarágu gürígia lídaangiñe jasándi lúma jasúfurirun, lúma jádaangiñe espíritugu wuríbatiña, aríjagüda ligía gíñe sarágu maríjintiña. ²² Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña. ²³ Gúndaati gíñe gürígia le mefériderun lumúti lafiñen nuágu.

²⁴ Lárigiñe joúdin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali? ²⁵ Áanjein máma lubeí ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaaňanu jában urúeigu. ²⁶ Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta. ²⁷ Juan, ligía oúnagülei le uágubei taríñaga Lerérun Búngiu.

Noúnajañein noúnagüle bubáragiñe
lun laráansejani üma bubá.

²⁸ Quei naríñaguni jun, jádan sun gürígia, úagili proféta weíriguti lueí Juan, áni láu sun líra, weíriguti le ünabutimaabei lídan larúejian Búngiu sügü láu le anügarügübalin ugánu luágu arúeijani ligía.

²⁹ Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasaansiraguni jagáburi. Gürígia jagía, resíbi jamáali meja labásteragüdajan Juan, ³⁰ áńjañati jíbe-ágei fariséogu jáma arúfudajatiña lilúrudun Moisés, májatiña meja lun jadügünü le lubeíbei Juan, merésibirun jamúti lé yebe labúseerubei Búngiu ladügün luágu jafúleisein. ³¹ Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³² Ítara jáña quei irájüñü ja aňúurubaña mágidirugu ájurera, ába jagúaragun joun jíbegu. “Íňaajatiwa fídu jun, mabínajantün, erémujatiwa urému jíruti jun, mayájuntün.” ³³ Ladüga ñübinti Juan le abásteragüdajabei, lé meja meíginbei fein, mátun ligía diweín, aríñagatün luágu gawágu lan espíritu wuríbati. ³⁴ Lárigiñe, ába niábin, áu le Wügüri Garaüwarügüti, joútina

áni gurá áu. Jaríñaga luágú geígadina, gátadi, jamáda áu nege gafígoountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágú buídu lan le ladügübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágú lidábulan. ³⁷ Níñounti ában würi wuríbati témeri lídan ubúrugu ligía, dan le tagáambunbei luágú lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanágangiñe Jesúsu, lubádu lugúdi, ába tadüdürügündüni lugúdi láu tágura. Nuján ayájuaja, nuján arágajei láu tídiburi, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalín Jesúsu cátei le, laríñaga lúnguarügü. “Lun jamúga inárüni lan luágú proféta lan wügüri le, lasúbudiruñein jamúga ca lan to agúruruboun luágú lúma ca lan tuwúyeri gürígia tugúya, luágú wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun nariñaguni bun.

Laríñaga fariséo.

—Aríñagabeí nun, maésturu.

⁴¹ Laríñaga Jesúsu lun.

—Níñanu bián wügüriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítagun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun würi tugúya, ába laríñagun lun Simón.

—¿Aríagu bíña tun würi to? Belútina búbiñoun, míchutibu dúna nun lun nachíbuni nugúdi, ánjounti würi to, ágawagüda tumúti nugúdi láu tágura, ába tamábeidagündüni láu tídiburi. ⁴⁵ Machú bumútina, ánjoun tugúya, lúmagiñe nebélurun, merédegili tachújani nugúdi. ⁴⁶ Míchutibu aíli nábulugu, ánjoun tugúya, túguatu ibíñei jémeti luágú nugúdi. ⁴⁷ Ligía nariñagunbei bun luágú arúfuda láani luweírin tínsiñejabu luágú ferúdunawa lan líbe tifígoun, áanjeinti gürígia le míbetti ferúdunawa lan, míbetti ínsiñeni larúfudun.

⁴⁸ Ábati laríñagun Jesúsu tun würi tugúya.

—Ferúdunawaali bifígoun.

49 Ábati jagúmeserun amísurajoútiña ja ñúnbaña lúma ñi aríñaga jámagua.

—¿Cáteisan wügúri le, ferúduna lubeí gíñe figoú?

50 Ába laríñagun Jesúsu tun würi tugúya.

—Sálbawádibu lídaangiñe bifígoun ladüga bafíñerun nuágu, beíba darángilañu.

8

Würíña já buri meja íderaguti Jesúsu

1 Lárigiñe cátei le, ñüdünti Jesúsu lídoun sarágu ubúruugu lúma buri lirajüñü fulásu íchigei ugánu buítí luágu larúeijan Búngiu. 2 Ñüdütiña dúusu apóstolugu lúma jáma würíña ja lareídagüdübaña jádaangiñe espíritugu wuríbatiña lúma sándi. Ñíñoun María to gíriboun Magdaléna jádan, to ídaangiñeboun jáfurida sédü espíritugu wuríbatiña, ³ ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti

(Mt 13.1-9; Mr 4.1-9)

4 Sarágu jáña gürígia ñübinburitiña lídaangiñe sarágu fulásu lun jaríjini Jesúsu, dánti le oúndaraguaña, ába ladímurejan Jesúsu joun láu jémpulu. Laríñaga joun.

5 —Furíti ában ábunaguti ábunagua líla nádü, dan le afúrujeina láani, ába láburujan lídaangiñe luágun üma, ába jadügüraguni ásügürütiña, ába jeígini dunúru. 6 Líbiri, ába láburujan labádinaguóún dübü, dánti le laboúchun, ába lásaürün ladüga lumábei fulásu. 7 Ába láburujan líbiri labádinaguóún jíyu, ába láfaruni jíyu le ájüchübei úara lúma. 8 Ñíñein gíñe lídaangiñe, áburujati lídoun múa buítí, dan le laweínamudun, gin ligía, buítí lalúbajoún, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu

(Mt 13.10-17; Mr 4.10-12)

9 Ábati jálögüdüni láni disípulugu ca lan lílabei jémpulu le.

10 Laríñaga joun.

—Jugúya, subúdigüda láali Búngiu cátei arámudaguati le luágutibei larúeijan jun, ánjaña ja mebéresenbaña láu lerérung, láu jémpulu laríñawagúa cátei luáguti larúeijan joun lun ibídiñebi lan líla cátei le jaríjibeí joun, lun gíñe úa lan gunfaráanda jamáni cátei le jagáambubei.

*Lafúnraanguagüdüni Jesúsu jémpulu luáguti ábunaguti
(Mt 13.18-23; Mr 4.13-20)*

11 Ába laríñagun Jesúsu joun.

—Niján líla jémpulu ligía. Líla nádü, ligía lerérun Búngiu, 12 üma le ñíjin lubeí láburuja lídaangiñe líla nádü, jagía gürígia ja agáambubalin lerérun Búngiu, ába liábin Máfia, ába lagídaruni tídaangiñe janígi lun maffíñerun jamá, masálbarun jagíame. 13 Dübü le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jerésibiruni láu ugúndani, áni márügündünti jádan buídu, affíñetiña luágu murúsun dan, áni dan le joúchawagún, mawándun jamúti, ába jeféridiruni jafíñen luágu Búngiu. 14 Jíyu le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irísini lúma ugúndani le lánina uboú le, úati fulásu jarítagurugun lun lerérun Búngiu, siñátiti laságarún cátei buíti jádaangiñe. 15 Ánjeinti múa buíti le ñíjin lubeí láburuja líbiri líla nádü, jagía gürígia ja agáambubalin lerérun Búngiu táu anígi buítu, adüga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

*Jémpulu luáguti lámpu
(Mr 4.21-25)*

16 Ába laríñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jaríjin ja ebélurubaña jabárua. 17 Úati lubeíti ni cáta arámudaguati lun mafúnraangudun lan, úa ni cáta le ibídiñewati lun machülrürün lan dan lun lasúbudirúniwa lúma lun lafúnraangudun.

18 ‘Gagáambadi jumá lubeíti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei larítagua luágu níjein lan lúma, lagídarúaba lueí.

*Lúguchu Jesúsu jáma lamúlenu
(Mt 12.46-50; Mr 3.31-35)*

19 Ábatí tachülrürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladüga jíbe gürígia. 20 Ába laríñawagún lun.

—Nujántia búguchu jáma bamúlenu boúgudi áni buséntiña jaríjinib.

21 Ába laríñagun joun.

—Ja agáambubalin lerérun Búngiu, úara jagía lúma, jagía núguchubaña jáma namúlenu.

*Lagálumaduni Jesúsu lérouga
(Mt 8.23-27; Mr 4.35-41)*

²² Luágu ában wéyu, ába ládinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába joúdin. ²³ Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun.

²⁴ Ábatí joúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábatí láasaarun Jesúsu, ába ladeínjan lun garábali lúma lugúdi barána, ába lagálumougradun, ába darángila lan sun cátei. ²⁵ Ábatí laríñagun joun disípulugu.

—¿Ca susérebei lun jafíñen?

Ába jálugüdagun jámagua láu anúfudei lúma luweírin anígi, jaríñaga.

—¿Cátei funásan wügüri le, gumádi lubáli garábali lúma lugúdi barána áni agáamba jameí?

*Wügüri Gadárana le gawágubei espíritugu wuríbatiña
(Mt 8.28-34; Mr 5.1-20)*

²⁶ Ába jachülürün loúbawagun Gadára, le loubáfurugubei lagúnu, ligíbugiñe Galiléa. ²⁷ Dan le larárirunbei Jesúsu, ába liábin ában wügüri lílana fulásu ligía lubádun. Lüjali wügüri ligía gawágu espíritugu wuríbatiña. Madáuti anáanguni, maganoún ligía tídan múna, lídan buri jabára jiláaňa le achigítí luágu dübü lagánawa. ²⁸ Dan le laríjinbalin wügüri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera nümoun, Jesúsu Liraü Búngiu le Íñugutimaabei? Ayúmuraguatina bun lun masúfuriragüdüün báninga.

²⁹ Laríñagunbei ítara ladüga lagúmadiruñein lan Jesúsu espíritu ligía lun láfuridun lídaangiñe. Saráguja weíyaasu lárügüdüni espíritu wuríbati ligía, ábaja jagüraguni gürígia lújabu lúma lugúdi láu güríngüri lun ledéraguagüdüün, ábaja látumuraguni, ába lanúragüdüni espíritu lídoun fulásu le mageírawati. ³⁰ Ába laríñagun Jesúsu lun.

—¿Ca bíri?

Ába laríñagun.

—Lejión níríbei.

Laríñagunbei luágu ligía lan líribei ladüga gíbeeña espíritugu wuríbatiña ja ebélurubaňa lídoun. ³¹ Ába jamúria jan espíritugu jagía lúma Jesúsu lun moúnajan lániña máfiougatin. ³² Queíti níñanu jamá sarágu büíruju eíga luágu ában wübü yaráfa,

ába jayúmuragun espíritugu jagía lun lun loúnajaniña jádoun büíruju jagía, ába lánjarun Jesúsu. ³³ Ábati jáfuridun espíritugu wuríbatíñia jagía lueí wügüri ligía, ába jebélurun jádoun büíruju, ábati jáguragun büíruju jagía joúngua lueígiñe ában gudúungu, ába jáburujan lídoun lagúnu, ába jañáradagun.

³⁴ Dan le jaríjinbalin ja oúnigirubaliña büíruju cátei le asúseredubei, ába janúfudedagun, ába jeibaagun abájüdaguei ubúrugu lúma áraabu. ³⁵ Ábati joúdingua gürígia aríjei cátei le asúseredubei. Dan le jachülürünbei le ñí lubei Jesúsu, ába jadáriruni wügüri le ídaangiñebei jáfurida espíritugu wuríbatíñia ñun lubádu lugúdi Jesúsu, táo lanáangun, areídaguaali, ába janúfudedagun. ³⁶ Játí buga aríjubalin, ába jabájüdaguni luáguti lareídagun wügüri lé buga gawágubei espíritugu wuríbatíñia joun, ³⁷ ába jayúmuragun lílana fulásu ligía lun Jesúsu lun lídin ñígiñe, ladüga janúfude. Ábati ládinun Jesúsu tídoun ugúnein lun lídin, ³⁸ ába layúmuragun wügüri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

³⁹ —Giríbubá búbiñoun, ábame babájüdaguni sun le ladügübei Búngiu bun.

Ába lídin, ába labájüdaguni le ladügübei Jesúsu lun lídan sun fulásu ligía.

*Liraiü Jáiro túma würi to agúrurubarun lanáangun Jesúsu
(Mt 9.18-26; Mr 5.21-43)*

⁴⁰ Dan le lagíribudunbei Jesúsu loubáfurugun lagúnu, ába jerésibiruni gürígia láu ugúndani ladüga sun jagía agúrabañu jáñein. ⁴¹ Ábati liábin ában wügüri gírito Jáiro, le ábanbei jádaangiñe tábutigu jalígilisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴² ladüga ában rügüñoun liraü, queí buri dúusu irúmu táo, toúwe. Dan le lídinbei Jesúsu, ába jafálaruni sarágu gürígia darí lun jámurudaguni.

⁴³ Ñíñounti ában würi jádan, dúusu irúmu táo láu lésejan jítäu tídaangiñe. Gásta táali sun tiseínsun jawágu surúsiagu, siñá jamutu areídaguagüda. ⁴⁴ Ába tayárafadun lun Jesúsu lanágangiñe, ába tagúruruni táru lanáangun, lídan méme óra ligía ába tareídagun.

⁴⁵ Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdajagidibu ca lan agúrurubei buágu?

46 Ába laríñagun Jesúsu.

—Gurúwaali nuágu, ladüga sandí numuti luágu areídaguagüdaadina lan gürígia láu nubáfu.

47 Dan le tasúbudiruni würi tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfeserun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía. **48** Ábati laríñagun Jesúsu tun.

—Niraü, areídaguaadibu ladüga bafíñerun nuágu. Beíba darángilañu.

49 Nígili Jesúsu adímureja, ligía lachülürün ában lúbiñegiñe Jáiro, ába laríñagun lun Jáiro.

—Jilá biraü, mebéresejadügütayabá lun Maésturu.

50 Dan le lagáambunbalin Jesúsu le, ába laríñagun lun.

—Manúfudedabá, afíñerügübá, ábame tareídagun biraü.

51 Dan le lachülürünbei Jesúsu lúbiñoun Jáiro, mígirunti lun jebélurun ámu lúma lueídügya Pédro, Jacóbo lúma Juan jáma tagübürigu irájü tugúya. **52** Jayájuña sun ja ñibaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

53 Ába jéjerajan láu ladüga subúdi jamáni luágu jilá tan.

54 Ábati lárügüduni Jesúsu tújabu, ába laríñagun láu umálali jéreti.

—Irájü, sarába.

55 Ába táguyugun, ába tásaarun lídan méme óra ligía, ába laríñagun Jesúsu lun jíchugun eígini tun. **56** Weíriti janígi tagübürigu, ába laríñagun Jesúsu joun lun mabájüdagun jamáni le asúseredubei ni ca un.

9

*Loúnajaniña Jesúsu dúusu apóstolugu apúrichija
(Mt 10.5-15; Mr 6.7-13)*

1 Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídaguagüdün sánditiña. **2** Ába loúnajaniña apúrichijei ugánu luáguti larúeijan Búngiu lúma areídaguagüdaña sánditiña. **3** Laríñaga joun.

—Manüga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janügün. **4** Furúmieguarügü múna to ñíjin lumúti jachülüra, reídei jumá ñi darí jídin lídaangiñe fulásu ligía. **5** Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei

luágu magúndan jumá láu jagáburi lílana fulásu ligía, ígira jumáñia quei jadáriragun joúngua.

⁶ Ábatí jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti joúdin.

*Loúnwen Juan le abásteragüdajabei
(Mt 14.1-12; Mr 6.14-29)*

⁷ Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladüga ñíñanu aríñagutiña luágu saráali lan Juan lídaangiñe oúwени, ⁸ jíbiri aríñaga luágu proféta Elías lan achülaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe oúweni. ⁹ Ába laríñagun Heródes.

—Áu guánarügü oúnajabei adürürei lichügü Juan. ¿Cátei funáti le, le uágubei nagáamba labájüdawagún sarágu cátei?

Ábatí loúchun Heródes laríjini Jesúsu.

*Leígagüdün Jesúsu seíngü mílu wügüriña
(Mt 14.13-21; Mr 6.30-44; Jn 6.1-14)*

¹⁰ Dan le jagíribudun apóstolugu, ába jabájüdagun lun Jesúsu luágu sun le jadügübei. Ábatí lanügüniña lídoun fulásu mageírawati yaráfa lun Betsáida. ¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúejan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña gürígia ja, ñüdün jamámuga áluga jabára lun jeméraagun, áluaja jagíame eígini lídan buri lirájüñü aüdü lúma lídan buri fulásu yaráfati, ladüga úati ni cáta ya.

¹³ Laríñaga Jesúsu joun.

—Rújuma eígini joun.

Jaríñaga lun.

—Seíngü rügüñoun fein wáma jáma bián úduraü, ánjava gubeírugü ñüdün agáñija eígini joun sun gürígia ja.

¹⁴ Yaráfañanu joún seíngü mílu wügüriña ñi, mabájüdünga würíña jáma irájüñü. Ába laríñagun Jesúsu joun láni disípulugu.

—Ñurúguda jumáñia dimí dimí-san.

¹⁵ Ába jadügüni ítara, ába jañúurun súngubei. ¹⁶ Ábatí lanügünun Jesúsu seíngü fein lújaburugu jáma bián úduraü, ába laríjin siélun, ába líchuguni eteíngiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia. ¹⁷ Joútiña súngubei quimúle, dan le jabúdajanun ígiragutu, buíngüdatiña dúusu faníñe láu.

*Laríñaguni Pédro luágu Jesúsu lan Crístubei
(Mt 16.13-19; Mr 8.27-29)*

¹⁸ Luágu ában wéyu dan le layúmuraguña lan Jesúsu lábugua, níñanu láni disípulu gu díseraü lueí, ába laríñagun joun.

—¿Ída liñásan jarítagun gürígia nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdajabeí amürü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe oúweni amürü.

²⁰ Ábatí laríñagun joun.

—Ángi juguya, ¿cátanagi lídan jarítagun?

Laríñaga Pédro lun.

—Crístu, le loúnajabeí Búngiu lun lasálbaruniña gürígia, amürü.

*Ladímurejan Jesúsu luágu loúñwen
(Mt 16.20-28; Mr 8.30-9.1)*

²¹ Ába laríñagun Jesúsu joun láu éregu lun maríñagun jamáni cátei le ni ca un. ²² Ába laríñagun joun.

—Nasúfuriruba sarágu, áu le Wügüri Garaüwarügüti. Janügübadina wügüriña weírigutiña lídan jafíñen juríu, jábutigu fádirigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násarun lídaangiñe oúweni luágu lürüwan wéyu lúnya nabágaridun.

²³ Lárigiñe, ába laríñagun joun súngubei.

—Le busénti nánigu lan, bulíeileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queísi lanügüni ában wügüri lugúruwan, falálana. ²⁴ Ladüga le abúseeruti lesáfuragun lúngua ya uboúagu lefériderubei ibágari le magúmuchaditi, áanjein le ánjabeí lefériderubei libágari ya uboúagu nueígiñe, libíjubei ibágari le magúmuchaditi siélu. ²⁵ ¿Cági ju lan lun gürígia lagáñeiruni sun le lánina uboú, lefériderime lubára siélu o lagünrinchaguba lan lúngua? ²⁶ Le anügüti busíganu nuágu lúma luágu nerérun, áu le Wügüri Garaüwarügüti, nibúsigaribadina gíñe láu dánme le niábin quei urúei láu luweírigun Núguchi jáma ánjeligu ja sándubaña. ²⁷ Ninárün naríñaguni jun luágu añájein lan jádaangiñe ja yábaña guetó, moúnwenbaña maríjinga jameí larúeijan Búngiu.

*Lámuñedagun larijín Jesúsu
(Mt 17.1-8; Mr 9.2-8)*

²⁸ Queíburi wídü wéyu lárigiñe laríñaguni Jesúsu cátei le, ába laweínrun luágun ában wübü ayúmuragua lun Búngiu, barü lumútiña Pédro, Jacóbo, lúma Juan lúmagua. ²⁹ Dan le niján

lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun. ³⁰ Ábatí jasáliragun Moisés lúma Elías ayánuja lúma, ³¹ geyégu líña ában larúgounga weíriti jáu, jayánujaña libügürü oúweni le lúnbei lasúfuriruni Jesúsu, Jerusalén. ³² Láu sun luweírin lidábu lágu Pédro jáma líbirigu, marúmuguntiña, aríja jamúti luweírigun Jesúsu jáma bián wüguriña ja lúmabaña. ³³ Dan le adísedeinaña bián wüguriña jagía lueí Jesúsu, ába laríñagun Pédro lun.

—Maésturu, jlidan dan awánja lan ya! Adüga wamá ürüwa dibásein ya—ában bun, ában lun Moisés, túma ában lun Elías.

Ibídiñeti lun Pédro ca lan laríñagubei. ³⁴ Súnti niján lan adímureja, ába liábin ában juánriñu oúburaguña, ába janúfudedagun ladüga jadáriragun joúngua lurágeirugu juánriñu ligía. ³⁵ Ábatí jagáambun ában umálali aríñaguti lídaangiñe juánriñu ligía.

—Niraü le jínsiñebi nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáali lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

*Lareídagüdüün Jesúsu ában irájü gawáguti espíritu wuríbati
(Mt 17.14-21; Mr 9.14-29)*

³⁷ Larúgan, dan le jarárirunbei lueígiñe wübü, sarágu jáña gürígia ñüdüntiña lubároun Jesúsu. ³⁸ Ábatí lagúaragun ában wügüri jádaangiñe láu umálali jéreti, laríñaga.

—Maésturu, fuléisejabubá nun, aríjabeí niraü le ligía rügüñebi, ³⁹ níjein ában espíritu wuríbati luágu, dan le lárügüdüni, ába lagúaraguagüdüni, ába loúwejan, ába láfurijan jacútaü liyúmulugugiñe. Añawuriya lumúti, májati lígiruni. ⁴⁰ Ayúmuraguadina joun báni disípulugu lun jaságaruni espíritu wuríbati le lueí, siñá jamuti.

⁴¹ Ába loúnabun Jesúsu, laríñaga.

—¡Jugúya gürígia mafíñeraditiña, wuríbatiña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barübei biraü ñájoun.

⁴² Dán yebe le lídin irájü ligía lun, ába lájuchuruni espíritu wuríbati múarugún, ába loúwejagüdüni, ába ladeínjan Jesúsu lun espíritu wuríbati ligía, ába lareídagüdüni irájü, ába lederegeruni lun lúguchi. ⁴³ Ába laweíridun janígi súngubei láu luweírigun Búngiu.

*Ladímurejaanya Jesúsu luágu loúnwen
(Mt 17.22-23; Mr 9.30-32)*

Sun añája lan láu luweírin janígi láu le ladügübei Jesúsu, ába laríñagun joun láni disípulugu.

⁴⁴ —Agáamba jumeí cátei le buídu. nedéregerúaba, áu le Wügüri Garaüwarügti, jájaburugun náganiñu.

⁴⁵ Úati gunfaráanda jamáni disípulugu le lariñagubei, ladüga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le lariñagubei, joun.

¿Ca weírigutimaabei?

(Mt 18.1-5; Mr 9.33-37)

⁴⁶ Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷ quei lasúbudiruni Jesúsu jasáminan, ába lanügün ában irájü lubáduagun, ⁴⁸ ába lariñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti ünabugutimaabei jídan, ligía weírigutimaabei.

Le mámabei wágani, wámagiñeñeñein

(Mr 9.38-40)

⁴⁹ Ábati lariñagun Juan lun Jesúsu.

—Maésturu, aríjatiwa ában wügüri aságajati espíritugu wuríbatiña lídan bíri, ába wewéridiruni ladüga máma lan ában wádaangiñe.

⁵⁰ Lariñaga Jesúsu lun.

—Mewéridira jumeí, ladüga le mámabei wágani, wámagiñeñeñein.

Ladeínjan Jesúsu lun Jacóbo lúma Juan

⁵¹ Dan le layárafadun dan lun lanügüniwa Jesúsu siélun, ába ladügüni luweíyasun Jerusaléoun láu anígi. ⁵² Ába loúnajan loúnagülegu lubá, ába joúdin lídoun ában liraüraü fulásu láni Samaría lun jáluajan múna lubá, ⁵³ májatiña Samariána jerésibiruni ladüga jaríjin luágu leíbuga lan Jerusaléoun. ⁵⁴ Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriaian lun larárirun wátu geméti siélugiñe lun lagúmuchun jáu queí meja ladügüni proféta Elías?

⁵⁵ Ábati ladígiragun Jesúsu jawágun, ába ladeínjan joun, lariñaga.

—Ibídiñeti jun luágu wuríba lan cátei le jayúmajabe. ⁵⁶ Máma niábiña, áu le Wügüri Garaüwarügti, agúnrinchaguei jabágari gürígia, niábiña asálbarei.

Ábati joúdin lídoun ámu liraüraü fulásu.

Já yebe busénbaña jafálaruni Jesúsu

(Mt 8.19-22)

⁵⁷ Dan le luágu jamá üma, ába lariñagun ában wügüri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítíña gasígamu jýyu lun jaganoún ñi, gádibu jagía dunúru, ánjein áu le Wügüri Garaúwarügüti, úati ni jalíaba lan nabálachagüdei nichügü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen núguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi, ánjein bugúya, beíba apúrichiji ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ayoúragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárgoún, mabuídunti lun lílaname larúeijan Búngiu.

10

Loúnajaniña Jesúsu ürüwa-wein-díisi disípulugu apúrichija

¹ Lárigiñe cátei le, ába lanúadajan Jesúsu ürüwa-wein-díisi jádaangiñe lánigu, ába loúnajaniña lubá, bián bián, lídoun sun ageíraü lúma fulásu le lúnbei lídin ñi. ² Laríñaga joun.

—Inárüni, gíbettiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubeí jamúriajan lúma Búngiu lun loúnajan ñadágimeintiña jagánaguóún. ³ Jeíba, noúnajañadün quei mudún jádoun anímaalu gáñitiña. ⁴ Manüga jumá ságü júmagua, ni seínsu, ni geídi, meréderagun jugúyame ayánuja ni ca úma luágu üma.

⁵ Dánme le jebélurun tídon ában múna, busújuma furúmiñe, jaríñagame. “Darángilaü joun tílana múna to.” ⁶ Ánjein añajein lubeí gürígia jínsiñejabutiña lun darángilaü tídan muna tugúya, jerésibirubadün láu ugúndani, joúnbei abúsuruni lánina darángilaü. Ánjein úa jabeí gürígia jínsiñejabutiña lun darángilaü tídan muna tugúya, giríbugüda jumeí abúsuruni. ⁷ Reídei jumá tídan muna tugúya to ñí lubeí jerésibirúa, jou jumeíme, gurá le íchugúti jun úouga busíganu, ladüga garíchatí ñadágimeinti lun lafáyeiruaja. Masáansija jumá muna. ⁸ Dánme le jachüllürün lídoun ában ageíraü le ñí lumuti jerésibirúa, joújumei le íchugúti jun, ⁹ areídaguagüda jumáñña sánditiña ja ñítiña, jaríñagame joun

lílana fulásu ligía. “Subúdigüdáwaali luáguti larúeijan Búngiu jun.”¹⁰ Ánjaün achüllüra lídoun ában ageíraü le ñí lumuti merésibirúniwa jumá, furíjuma lídoun buri üma, jaríñagame. 11 “Ásta licáliquin jageíra le luágubei wagúdi furú wamuti lun warúfuduni jun luágú magúndan wamá láu jigáburi, áni subúdi jumeí luágú subúdigüdáwaali lan luáguti larúeijan Búngiu jun.”¹² Naríñajare jun luágú lídan lánme luwéyuri lagúseragüdüniña Búngiu gafíountiña, janárimetimaabei jabeichúniwa lílana fulásu le merésibirunbadün sügú láu jabeichún lílana ubúrugu le Sodóma.

*Lílana ageíraü buri magáambaditiña
(Mt 11.20-24)*

13 ¡Fugiábu jugúya lílana Corazín! ¡Fugiábu jugúya lílana Betsáida! Ladüga lun jamúga ubúrugu lan Tíro o Sidón ladügúwa buri miláguru le adügübei lídan jubúrugute, binárü jamúga lasáansiragua jagáburi lílana, ába jamúga jarúfuduni láu jadáüragun lídu lúma balígi. 14 Ánjein jugúya, lídaanme luwéyuri agúseruni, weíritimaabei jabeichúniwa sügú jáu gürígia Tírona jáma Sidónna. 15 Amürüti, ubúrugu le Capernaúm, ¿jarítaguatibu luágú liñurúaba lan bíri queísi líñun siélu? Larárirawagüdüwaba bíri ünabun queísi lünabun máfiougati.

16 Ába laríñagun Jesúsu joun ürüwa-wein-díisi disípulugu ja loúnajañabaña apúrichija luágú larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Núguchi le oúnajabalina.

Jagíribudun ürüwa-wein-díisi disípulugu

17 Ába jagíribudun ürüwa-wein-díisi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatiña agáamba jamútiwa dan le waságaruniña lídan bíri.

18 Laríñaga Jesúsu joun.

—Ánja, aríja numúti ligáburi leíguadun Máfia siélugiñe quei ában labírijanouga. 19 Rújadina ubáfu jun lun jadügüragun jéwe jáma águru, masúfurirunga ni cáta, lúma lun jére lan jubáfu lueí lubáfu Máfia. 20 Láu sun líra, magúndaara jumá luágú jagáambunün espíritugu, gúnda jumá luágú níjein lan jíri bürúwañu tídan lilíburun Búngiu siélu.

*Lagúndaarun Jesúsu
(Mt 11.25-27, 13.16-17)*

21 Lídan óra ligía, ába labuínchagüdüni Sífiri Sándu Jesúsu láu ugúndani, ába lariñagun.

—Núguchi, le Labúremebei siélu lúma múa, iñúragüda numúti bíri, ladüga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüduni joun ja loúguabaña ufúrendei queísi irájüñü. Ánja, Núguchi, ladüga ítara lína babúseeruni.

22 'Derége láali Núguchi sun cátei nun. Úati ni ában subúdijabuti cátana lan lueídügüya Núguchi, úati gíñe ni ában subúdijabuti cáteiñein lan Núguchi nueídügüya jáma ja úntiña nabúseera nasúbudiragüduni.

23 Ábatí ladígiragun adímureja joúnrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya,²⁴ ladüga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, marijin jamúti, busén jagía yebé meja jagáambubei guetó, magáambun jamúti.

Jémpulu luáguti Samariána le buídubei

25 Lídan ában guríriguaü, ñíñein ában arúfudajati lilúrudun Moisés, abúseeruti loúchaguni Jesúsu, ába lásaarun, ába laríñagun lun.

—Maésturu, ¿cábasan nadüga lun gayára lan nibíjini ibágari magúmuchaditi?

26 Laríñaga Jesúsu lun.

—¿Cáteigi bürüwañubei lídan lilúrudun Moisés? ¿Ída liñágia balíjan ñí?

27 Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bérre, lúma láu sun bisáminan, jínsiñe jagíame bíbirigu bun quei bínsiñegua búngua.

28 Ábatí laríñagun Jesúsu lun.

—Oúnabaadibu buídu, ánjein badüga ítara, bibíjubei ibágari magúmuchaditi.

29 Queíti busén lan arúfudajati ligía larúfuduni luágu buídu lan lálügündajan, ába laríñagun lun Jesúsu.

—¿Cátañagi níbirigubaña?

30 Ábatí loúnabuni Jesúsu, laríñaga lun.

—Ñíñein ában wügüri arágachuti Jerusaléngiñe lun ubúrugun Jericó, luágu luweíyasun ába járugüduni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jilá mémeeli. 31 Ába lásügürün ában jafádirin juríu lídaangiñe méme üma ligía, dan le laríjinbalin wügüri ligía, meberéresenti láu, ába lasígiruni leíbugun loubáfuruvgugiñe üma. 32 Sügü ligía ában jádaangiñe ladügawagun Leví ñígiñe, dan gíñe le laríjini wügüri buleíseiwaali ligía, ába gíñe lasígiruni

leíbugun loubáfurgugijñe üma, mebérresenga gíñe láu. ³³ Ábati lásügürün ában wügüri Samariána aweíyasujati lídaangiñe üma ligía, dan le laríjinbalin, ába lagúdemedagun lun. ³⁴ Ába liábin, ába lagáranijan lun bíti buri le luágubei láu aíli túma diweín, ába lagüraguni. Ába laweínragüdüni luágu lilügün burígü, ába lanügüni tídoun jában chülüdügütíña, ába ladügüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúnigibeí wügüri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe ürüwa wügüriña ja líbiribei le ueíbei líwerujoúa, lídan barítagun?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badüga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachülürün lídoun ában liraüraü fulásu le ñí lubei terésibirei ában würi gíritu Márta, túbiñe. ³⁹ Níñoun ában tamúlelu Márta gíritu María, ába tañúurun lubádu lugúdi Jesúsu lun tagáambuni le laríñagubei, ⁴⁰ ánjounti Márta, weíriti teténirun lun tubéresegun. Ába taríñagun Márta lun Jesúsu.

—Nabúreme, ¿mebéresentibusan láu tígirunina namúlelu adügei sun berésegu nábugua? Aríñagabá tun lun tíderagunina.

⁴¹ Ába loúnabunun Jesúsu, laríñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúadaja táali María lubuídun-ägei cátei le lúnbei ladügüniwa, áni úabei ni ában lun lagídaruni tueí.

11

Larúfudajani Jesúsu ayúmuraguni lun Búngiu

(Mt 6.9-15, 7.7-11)

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Laríñaga Jesúsu lun.

—Dánme le jayúmuragun lun Búngiu,
jaríñagame ítara.

Wáguchi Búngiu le siélubei,

inébewalá bíri.

Ñübinlá bidáani lun barúeijan ya uboúagu,
adügüwalá bugúndan uboúagu quei ladügün bugúndan siélu.

³ Rúboun fein buídürügtu woun lun wéyu le ugúñebi.

⁴ Ferúdunabeí wuríbati le adüga wamálibei quei ferúduna
wamániña ja adügubaña wuríbati woun.

Mígira báwa lun wáburujan lídoun wuríbani,
dísegüdarügü báwa lueí.

⁵ Aríñagati gíñe Jesúsu joun.

—Niján ában jémpulu jun. lídin jamúga ában jídaangiñe
lúbiñe ában lumáda amídi áriebu, ába laríñagun lun. “Numáda,
furédeibá ürüwa fein nun, ⁶ ladüga sun líña lachülürün ában
numáda núbíñoun áni úati ni cáta núma lun níchugun lun.”

⁷ Ába jamúgati loúnabun le ában múnadagiñe, laríñaga jamúga.
“Mebéresea bána, darúnaali nubéneri, áni roúnjadina jáu sun
nisáanigu, siñáti násaarun íchiga ni cáta bun.” ⁸ Naríñaguña jun
luágú íbini lan jamúga másaarun lan íchigoun lun ladüga lumáda
lan, lásaaruña jamúga íchigoun lun lueí lasígirun ebéresea lun.

⁹ Aríñagatina lubeíti jun. Jamúriaja, ábame líchugun Búngiu
jun, jáluaja, ábame jadárirun, jadaünja luágú béna, ábame
lánjunrenchúniwa jun. ¹⁰ Ladüga sun le amúriajati, ibíjati, le
álaujati, daríti, le adaünjati luágú béna, junrénwati lun.

¹¹ ‘¿Gayáraabei funági líchugun ában úguchili jídaangiñe dübü
lun liraü dan le lamúriajan fein lúma? ¿o líchugun lan ában jéwe
lun dan le lamúriajan úduraü? ¹² ¿o líchugun lan ában águru
lun dan le lamúriajan gañeín? ¹³ Gíchigadijadün ligía cátei buít
joun jirajüñü láu sun juríban, igúbumeti líchigei Júguchi Búngiu
le siélubei Sífiri Sándu joun ja amúriajati!

*Laríñawagún luágú níjein lan lubáfu Máfia lúma Jesúsu
(Mt 12.22-30; Mr 3.19-27)*

¹⁴ Ñíñein Jesúsu aságara ában espíritu wuríbati lueí ában
wügüri le madímuregüdün láalibei yebe espíritu ligía, dánti le
láfuridunbei espíritu wuríbati ligía, ába gayára lan ladímurejan
meréngaditi ligía. Ába laweíridun janígi gürígia láu cátei le.

¹⁵ Ñíñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja
wügüri le espíritugu wuríbatiña.

¹⁶ Jíbiri, lun joúchaguni, ába jamúriajan miláguru lúma lun
larúfundi luágú lúmagiñe lan Búngiu liábin lubáfu. ¹⁷ Queíti
subúdi láani le jarítagubei, ába laríñagun joun.

—Furúmieguarügü arúejani le afánreinraguti lun jageíndagun
jámagua, lagúnrinchaguba, ában gíñe familia fánreinguatiña
ladüga wuríbu, jagúnrinchaguba gíñe. ¹⁸ Ánjein gíñe níjein
lubeí fánreinguaü jádan Máfia jáma lánigu, zída lubági ladúrarun

lubáfu? Naríñagunbalin le, ladüga jaríñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia,¹⁹ áni áanjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu líra, jagía guánarügü arúfuda jamúti luágu buliéigua jumá.²⁰ Le inárünibei, láu lubáfu Búngiu naságaja espíritugu wuríbatiña, áni arúfuda lumúti líra luágu chülüjali lan larúeijan Búngiu lídoun fulásu le.

²¹ Ába wügüri jéreti, dan le aráanseñu lan, toúnigi lúban buídu, sun le lúbiñebei choúruti. ²² Áanjein ñübin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanügüni le labúseerun, ába lafánreinraguni jáma lumádagu.

²³ ‘Le mámabei númagiñe, náganiñein, le míderagun lumútina, güríngua lumúti le nadügübei.

*Espíritu wuríbati le agíribudúbei
(Mt 12.43-45)*

²⁴ Ába laríñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajadügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribidayá tídoun núban to ñígiñe lubeí náfurida.”²⁵ Dánti le lagíribudun, ába ladáriruni gürígia buga ligía quei ában múna to buídawaru, aráanserúa. ²⁶ Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajaliti le gádaanbalin wügüri ligía lueí buga furúmiñe.

Ugúndani le tímataati

²⁷ Dan le niján lubeí Jesúsu aríñagei cátei le, ába tagúaragun ában würi jádaangiñe gürígia, taríñaga.

—¡Fuleíseiwaru jiñáru to agúriajabalibu, fuleíseiwaru to átagüdübalibu!

²⁸ Ába laríñagun Jesúsu.

—¡Fuleíseiwaitimaatiña ja agáambubalin le lubeíbei Búngiu áni abájüda jameí!

*Amúria jatiña gürígia wuríbatiña miláguru líma Jesúsu
(Mt 12.38-42; Mr 8.12)*

²⁹ Añája méme gürígia oúndaragua geyégu láu Jesúsu, ába lagúmeserun adímureja, laríñaga.

—Wuríbatiña gürígia ja lánina dan le, áni jamúria ja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta

Jonás. ³⁰ Ítara queí meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügüri Garaüwarügti, ligíaba ában seíni joun gürígia ja lánina dan le luágu Búngiu lan oúnajabalina. ³¹ Dánme le lidáani agúseruni, dánme le lagúseragüduniña Búngiu gürígia ja lánina dan le, ábame tásaarun lurüeite Súru lun tasíadiruniña, ladüga tuguya, ñübintu lídaangiñe lidíse-ágei uboú lun tagáambuni lichú láu Salomón, áu, weírigutimaatina sügü láu Salomón áni májatün jagáambunina. ³² Lídan mémeme agúseruni ligía, ábame gíñe jásaarun já meja aganoúbaña ubúru Nínive, ábame jasíadiruniña ja lánina dan le, ladüga sáansiguati jagáburi Nínivena lárigiñe lapúrichijani Jonás ugánu le láni Búngiu joun, áni áu ában le weíriguti sügü láu Jonás, áni májatün lun jagáambunina.

Lilámpun úgubu

(Mt 5.15, 6.22-23)

Ába lasígirun Jesúsu aríñaga.

³³—Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoungadun joun ja ebélurutiña. ³⁴ Ítara líñia águu quei ában lámpu lun úgubu, áanjein buídu lubeí bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Áanjein sándi lubeí bágu, aríja ligía luágun cátei lánina uboú, camá jamuga lídaanbei lubúriga sun búgubu, wuríbabei gíñe bigáburi. ³⁵ Toúnigibá lun mabúrigadun lan bilámpun. ³⁶ Áanjein jarúgounga lubeí láu sun búgubu, úaga ni murúsun lubúriga, baríjubei sun cátei furáangu quei dan le durúngu líñia lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés

(Mt 23.1-36; Mr 12.38-40; Lc 20.45-47)

³⁷ Dan le lagúmuchunbei ladímurejan Jesúsu, ába lamísurajani ában fariséo eíga lúbiñe. Ába lebélurun Jesúsu, ába lañúrun luágu dábula. ³⁸ Ába laweíridun lanígi fariséo ligía láu magúncilirun lan Jesúsu láu igáburi le lánina lachibún újabu lubá eíginí. ³⁹ Ába laríñagun Wabúreme Jesúsu lun.

—Jugúya fariséogu ragá jumuti wéru lúma asíedu boúgudigiñe libíti, múnadagiñe jibíti, wíyetün, buin jíñia láu luweínamu águu lúma sarágu luwúyeri wuríbani. ⁴⁰ ¡Deré tagáambun jugúya le! ¿ibidiñeti jun luágu le lan adügübalin le boúgudigiñebi, ligía lan gíñe adügübalin le múnadagiñebi? ⁴¹ Jarúma jumá múnadagiñe

jibíti láu jíchugun joun gudémetiña, ítara lúba jarúma jumá gíñe boúgudigiñe jibíti.

⁴² ‘¡Fugiábugu jugúya fariséogu! Adügatün díisi fánreinti láu jíduru le ménta, rúda, lúma ámu luwuyeri nádù lun jíchugun ában fánreinti lun Búngiu, áni madügüntün gásu láu ísuruni lúma línsiñejabu Búngiu. Ligía lúnbei jadügüni, mígirunga jumeíme jadügüni le ában.

⁴³ ‘¡Fugiábugu jugúya fariséogu! Buséntün járugüdüni ubáraü le jabára ja weírigutimaabaña tídan jilígilisin, busén jugúya lun labúsurún jun láu sarágu inébesei ümada.

⁴⁴ ‘¡Fugiábugu jugúya fariséogu, biángua tigíbu!, ladüga ítara jíñia quei umúajaü le marijínti, sügü jagía gürígia ligíbuagugiñe ibídiñoun joun.

⁴⁵ Ábatí loúnabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le baríñaguni le.

⁴⁶ Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queísi ában anügüni jürüti joun ámu, áni jugúya, májatün janügün ni murúsun lídaangiñe.

⁴⁷ ‘¡Fugiábugu jugúya!, ladüga rújumuti dübü arítaguagüleime luágu jamúaja profétagu já meja jáfaragubaña binádu jagübürigu. ⁴⁸ Láu líra, arúfuda jumúti luágu gúnda jumá láu le jadügübei binádu jagübürigu, jagía áfaragubaliña, jugúya wéndegüda jumúti jamúaja.

⁴⁹ ‘Ligía laríñagunbei meja Búngiu láu lichú láu. “Noúnjaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.” ⁵⁰ Ligía lagúseragüdübaña lubeí Búngiu gürígia ja lánina dan le luágu játa profétagu ja áfarawagúbaña lúmagiñe ladügün uboú, ⁵¹ lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu joúwegun profétagu.

⁵² ‘¡Fugiábugu jugúya arúfudajatiña lilúrudun Moisés!, ladüga ragü jumaali ligélen lubéneri subúdi, mebélurun jíñia, mígirun jugúya lun jebélurun ja busénbaña jebélurun.

⁵³ Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárígiñe láfuridun lúbiñegiñe fariséo ligía, ába jagúmeserun ebéresejei láu sarágu buri álögüdajani ⁵⁴ lun jaríjin ánjaña adárira lidúnrun.

12

Larúfudajan Jesúsu luágu mabuídun lan biángua lan igíbu

¹ Ába joúndaragun sarágu mílu gürígia, gíbetiña darí lun jachúinragun joúngua. Ába lagúmeserun Jesúsu aríñaga joúntima láni disípulugu.

—Toúnigi jumátia jaweí fariséogu, ítara líña jagáburi quei ísi —biánguañein jagíbu. ² Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. ³ Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajoúba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴ ‘Naríñajare jun, numádagu, moún lumuti janúfudedun javeí gürígia ja gabáfubaña lun jáfarunün jilágubei, lárigiñe líra siñá jadügün ámu cátei jun. ⁵ Naríñagaali jun ca lan ueí lúnbei janúfudedun. Janúfude jumá lueí Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueílā janúfudeda.

⁶ ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe. ⁷ Árjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügű jáu sarágu dunúru ligíbugiñe Búngiu, áni loúnigiruñadün.

Ja meyéedagunbaña luágu Jesúsu jagíbugiñe gürígia

(Mt 10.32-33, 12.32, 10.19-20)

⁸ ‘Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba giñe luágu nánigu jamá jagíbugiñe láni Búngiu ánjeligu. ⁹ Ánjaña ja aríñagubaña jagíbugiñe gürígia luágu máma jamá nánigu, naríñaguba giñe jagíbugiñe láni Búngiu ánjeligu luágu máma jamá nánigu.

¹⁰ ‘Furúmieguarügü le aríñaguti cátei wuríbati nuágu, áu le Wügüri Garaüwarügüti, gayáraati ferúdunawa lan, árjein le anábaguti Sífiri Sándu, siñáti ferúdunawa lan.

¹¹ ‘Dánme le janügün ligíbugiñoun lúrudu lun jagúserun, o jagíbugiñoun lan tábutigu jalígilisin juríu, madíjerida jumá luágu cába lan joúnaba o cába lan jaríñaga, ¹² dánme le lachülürün óra lun jadímurejan, larúfudubei Sífiri Sándu le lúnbei jaríñaguni jun.

Ewérídijani lueí leténirún sarágu lun irísini

¹³ Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágán.

¹⁴ Laríñaga Jesúsu lun.

—¿Cági íchubalina quei agúseragüdüti o quei afánreinjati jídan?

¹⁵ Aríñagati giñe ítara.

—Toúnigigua jumá júngua lueí luweínamu águu, ladüga máma lueígiñe líbe lúmati gürígia labágarida sarágu dan.

¹⁶ Ábatí líchuguni jémpulu le joun, laríñaga.

—Ñíñein méja ában wügüri rí siti, ába líchugun lichári alúbajoúni buíti. ¹⁷ Ábatí laríñagun rí siti le lúnguarügü. “¿Cábasán funa nadüga? Ibídiñeti nun jalíaba lan nareídei sun le nalúbajabei.” ¹⁸ Ába lasáminarun, ába laríñagun. “Subúdi náali cába lan nadüga, nagünrinchaguaro sun náni lágei líla nádü, ábame nadügün ámu weínamatimaatu, ábame nareíduni nalúbajan líma sun le númabei tídan. ¹⁹ Ábameti nariñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, joúba, gurába, gúndaabá.” ²⁰ Laríñaga Búngiu lun. “Wügüri deré tagáambun, boúwe áriebu le, sun le búmabei areídañu, ¿cábasan un lerédera?” ²¹ Ítara líña lasúseredun lun gürígia le adámuridaguagüdüti irísini lánina uboú le lúngua, ába leréderun gudémeñu lídan cátei le luáguti Búngiu, líña Jesúsu.

Toúnigi lumútiña Búngiu lirájüñü

(Mt 6.25-34)

²² Ába laríñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun. ²³ Gebégitimaati ibágari sügü láu eígini, gebégi úgubu sügü táu anáanguni. ²⁴ Aríja jumá joun dunúru. mábunaguntiña, malúbajan, mágei ligía jeígin, láu sun líra, joúgüda lumútiña Búngiu. ¡Gebégitimaatün sügü jáu dunúru! ²⁵ Úati ni ában jídaangiñe gayáraati líchugun lánwoun libágari láu sun luweírin lidíjeri luágu. ²⁶ Ánjein lubeíti siñá lubei jadüguni le míbebei, ¿ca uágu jadíjerida luágu buri líbiri cátei?

²⁷ ‘Aríja jumá ída líña lan laboúchun buri fulúri. mawádigimariti, májüchagun ligía lanáangun, áni láu sun líra, quei nariñaguni jun, ni urúei Salomón láu sun luwéndegun, mawéndedunti quei ában fulúri. ²⁸ Ánjeinti ítara líña lubeí ladáüraguagüdüni Búngiu jíduru, le níjeinbei ugúñe, jarúga lagudúña, ¡ladáüraguagüdatimabadün, loúgu tafíñen jugúya le! ²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰ Ladüga lirájüñü uboú le, láriginanu buri cátei le, ánjein jugúya, níjein ában Júguchi le subúdijabúbei lun sun jemégeirun. ³¹ Áluaja jumá lun jesériwidun lun furúmiñe, ábame líchuguni sun le jemégeirubei jun.

Irísini siélu

(Mt 6.19-21)

32 'Manúfude jumá, nirajüñü, láu sun míbe jumá, gúndaati Búngiu lun líchugun ában ubáraü jun lídan larúeijan. 33 Alúgura jumeí le júmati, jíchigeime lebégi joun gudémetiña, láu líra, jadügüñoun lágei seínsu to maweíyadaditu, irísini siélu le magúmuchaditi, le ñí lubei siñá lan jebélurun jíwerutiña anügei jirísin, úa jagía jamútiri ñí lun jeígini. 34 Naríñagubalin le jun ladüga le ñí lumuti jirísin, ñíñoun gíñe janígi.

Aráanseñu jumá, agúrabaja

35 'Aráanseñu jumá lubá nagíribudun siélugiñe, durúngu jilámpun. 36 Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun. 37 Buídubei dan joun músu ja ladárirubaña jayúbudiri agágudúañu dan le lachülürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígın joun. 38 Íbini amídi áriebu lan lachülüra o lubá lan larúgan, ányaña ladáririra agágudúañu, buídubei dan joun músu jagía. 39 Subúdi jumeí luágu lun lan jamúga subúdi láni tabúreme muna cába lan óra lachülüra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegun. 40 Jugúya, aráanseñu jumá gíñe, ladüga lídaanme magáradajan jumá ligíame nagíribudun, áu le Wügüri Garaüwarügüti, uboúagun.

Músu le úarabei, lúma le müaraanbei

(Mt 24.45-51)

41 Ábatí lálügüdüni Pédro Jesúsu, laríñaga lun.

—Nabúreme, ¿woúnrügü bíchigei jémpulu le ódi joun súngubei?

42 Laríñaga Wabúreme Jesúsu lun.

—Lun furúmieguvägü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leítagüdüniña lídan dan. 43 Buídubei dan lun músu le ladárirubei liyúbudiri agúñfulira láu luwádigimari dan le lachülürün. 44 Ninárün jáu, luágu líchugubei lan liyúbudiri lun ligía lan aríja láu sun le libíjubei. 45 Ánjein arítagua músu ligía luágu lügili lan liábin liyúbudiri, ábame lagúmeserun oúseraña jíbiri músu ja lábugiñebaña laríaajan wuríba, leréderame eiga, áta, abácharuada, 46 ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírin-ägei abeíchuni luágu, lasíadireime lun lasúfuriruni le jasúfurirubei ja müaraanbaña, máfiougati.

47 'Músu le subúdijabúbei lun ca lan labúseerubei liyúbudiri áni maráanserunti, mabájüdünléí, labeichúba sarágu. 48 Ánjeinti músu le ibídiñeti lun, ába ladügün cátei lé buri lúnti labeichún lueígiñe, maweíribei labeichún. Le únti líchugúa gíbeti,

gíbebei amúriaajoúti lúmagiñe, le gíbetti ígirúti lábugiñe laríaaajan, gíbetimaabei amúriaajoúti lúmagiñe.

Jesúsu lóbunabei fánreinguaü

(Mt 10.34-36)

49 'Láu niábin uboúagun, ñíbei fánreinguaü uboúagu queísi wátu geméti. ¡Busénjadina jamúga durúnguaali lan wátu ligía! 50 Lúnti nasúfurirun le gumúti, ¡meménija nanígi lagúmuchun! 51 ¿Jarítaguatünsan luágua barü nán meja darángilaü númagua dan le niábinbei uboúagun? Manügütina darángilaü, fánreinguauü nanügübei. Jafánreinraguba ja mafíñebaña nuágu jáma ja afíñebaña nuágu, 52 lúmagiñe guetó, seíngüga tídan ában múna, jafánreinraguba ürüwa jaweí biáma, biáma jaweí ürüwa, nueígiñe. 53 Lagárabaguba úguchili luágua liraü, isáani luágua úguchili, úguchuru tuágua tiraü, isáani tuágua túguchu, ímenidi tuágua ágürü, ágürü tuágua ímenidi.

Liseíni buri dan

(Mt 16.1-4; Mr 8.11-13)

54 Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágua lájuya lan júya, áni ligía asúsereda. 55 Dánti le láfurun garábali lueígiñe suédi, ába jaríñagun luágua lárougada lan, áni ligía asúsereda. 56 ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubeí luáguti ligáburi dan le gádaanbalün jun?

Joúcha jumá lun lídan jumá dan jáma jáganiñu

(Mt 5.25-26)

57 '¿Ca uágu siñá lubei jasúbudiruni cátei le úaraguabei júngua? 58 Ánjein agúaragüda ában gürígia buágu, ába bídin lúma ligíbugiñe lúrudu, joúchabá baráanseragun búngua lúma luágua üma lubáragiñe jachülürün, manügün lámugabu ligíbugiñoun agúseragüdüti, lueí lederegerunibu agúseragüdüti lun polisia, ábame ládarunibu furísunrugun. 59 Naríñajare bun luágua máfuridunbadibu lan ñígiñe darí bafáyeiruni lagúmujoún bigáwanün.

13

Ca lan uágu lúnti lubeí lasáansirún igáburi

1 Lídoun méja dan ligía, ába jayábin gürígia abájüdagua lun Jesúsu jawágu wügüriña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu.

2 Ába laríñagun Jesúsu joun.

—¿Jarítaguatünsan luágua ladüga lan luweírin jafígoun Galiléana jagía sügü jáu ja jíbiri lílana jageíra lasúseredunbei le joun? 3 Máma lueígiñe líra, láu sun líra, naríñajare jun

luágu ánjein lan masáansirun jumá jigáburi, joúweguba gíñe sun jugúya. ⁴ Ángi díisi-wídü jagüra ja oúwegubaña dan le láburujanbei wáyelesi le Siloébei jawágún — ¿jarítaguatún luágu weíritima lan jadúnrun sügú jáu ja jíbiri ja aganoúbaña Jerusalén? ⁵ Máma líña gíñe, láu sun líra, naríñajare jun luágu ánjein lan masáansirun jumá jigáburi, joúweguba gíñe sun jugúya.

Jémpulu tuáguti tídibu ígo to mínboun

⁶ Ábati labájüdaguni Jesúsu jémpulu le joun, lariñaga.

—Ñíñein ában wügüri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu. ⁷ Ábati laríñagun lun le oúnigirubalin ichári. “Aríjabásan, ürüwaali irúmu gabügürüguia niábin áluaja ígo tuágu ídibu to, madáritina. Chaünboun, ¿cába uágu terédera ñi luágu ni cáta?” ⁸ Ába loú nabuni le oúnigirubalin ichári, ába laríñagun. “Niyúbudiri, ígirayaboún irúmu le, nañúladagüdali múa táu, awoúja áume táu. ⁹ Fágua tagíindun ítara, ánjoun magíindun, ábame táchugún.”

Lareídaguagüdünun Jesúsu ában würi sebúti tanágan lídan wéyu le eméraaguagülei

¹⁰ Luágu ában wéyu le eméraaguagülei, ñíñein Jesúsu arúfudaja tídan jaligilisin juríu, ¹¹ ñíñounti ában würi, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun. ¹² Dan le laríjinbarun Jesúsu, ába lagúarun tun, ába laríñaga tun.

—Würi, areídaguaadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buítí luágu Búngiu. ¹⁴ Ábati lagáñidun tábuti ligílisi ladüga lareídaguagüdünun Jesúsu lídan wéyu le eméraaguagülei, ába laríñagun joun gürígia ja ñíbaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jiábin lun lagáranijoún jun, máma lídan wéyu le eméraaguagülei.

¹⁵ Ába laríñagun Wabúreme Jesúsu lun.

—¡Biángua tigíbu jugúya le!, ¿ma farára jumúti sun jugúya jilügün bágasu o jilügün lan burígü lun janügün áta dúna lídan wéyu le eméraaguagülei? ¹⁶ Würi to, linébaanfan Abrahám, ragülaaru Máfia láu sándi, díisi-wídü irúmu táu láu, ¿moún lumuti funági yebe lun tareídaguagüdün lídan wéyu le eméraaguagülei?

¹⁷ Dan le laríñagunbalin Jesúsu cátei le, ába nibúsigarigua jamá sun láganíñu, ánjaña sun jíbiri gürígia, gúndaatiña láu cátei lé buri weíriguti le ladügübei Jesúsu.

*Jémpulu luáguti tíla mostása
(Mt 13.31-32; Mr 4.30-32)*

¹⁸ Ábati laríñagun Jesúsu.

—¿Ída líña ligáburi larúeijan Búngiu? ¿ca cátei úmounbei gayára lan níchuguni? ¹⁹ Ítara líña quei ában liraüraü tíla mostása le lábunubei ában wügüri lichárirugu, ába laboúchun, ába laweíridun darí lun liábin lun ábanme lan tídibu wéwe weíriti, darí lun jadügün dunúru jádibu luágu tuburébu.

*Jémpulu luáguti ísi
(Mt 13.33)*

²⁰ Ábaya laríñagun Jesúsu.

—¿Ca cátei úmounbei gayára lan níchuguni larúeijan Búngiu? ²¹ Ítara líña quei ísi le tíchugubei ában würi tídoun ürüwa líburu fulúaaru, ába terésirun súngubei.

*Béna le bürüraübei
(Mt 7.13-14, 21-23)*

²² Ába lasígiruni Jesúsu luweíyasun Jerusaléoun, arúfudajeina ligía lídan buri sun aüdü lúma lirajüñü fulásu le ídaangiñebi lásügüra. ²³ Ába laríñagun ában wügüri lun Jesúsu.

—Nabúreme, mibetíñásan ja lúnbaña jasálbarun?

Ába loúnabun Jesúsu, ába laríñagun.

²⁴ —Bürüraüti lubéneri siélu, joúcha jumá lun gayáraabei lan jebélurun lídaangiñë, ladüga quei nariñaguni jun, sarágujaba busúentiña jebélurun, siñábei. ²⁵ Lárigiñë ladáuruni tabúreme müna lubéneri, jugúya le boúgudibei jadaünjaba luágu béna, jaríñagame. “Wabúreme, darába béna wabá.” Ábame loúnabunün, laríñagame jun. “Ibídiñetün nun, ibídiñe gíñe nun jalíana jumá.” ²⁶ Ábameti jagúmeserun aríñaga. “Joújadiwa, gurá wagía búma, arúfudaja amürü woun ümadarugu.” ²⁷ Ábameti loúnabunün, laríñagame. “Aríñaga náali jun luágu ibídiñe jumá nun, ibídiñe nun jalíana jumá. Díse jumá nueí, sun jugúya le adügübei wuríbani.” ²⁸ Ligíaba jayájuajan, acúnrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa boúgudin. ²⁹ Jayábiba gürígia lueígiñë oúbaü le ñígiñë lubeí láfuara wéyu lúma lueígiñë le ñígiñë lubeí lálüda, lueígiñë núru lúma lueígiñë suédi lun jañúurun eíga lídan larúeijan Búngiu. ³⁰ Ñibañati jádaangiñë ja agúmujoúniabaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

*Layájun Jesúsu jawágu lílana Jerusalén
(Mt 23.37-39)*

³¹ Lídan méme wéyu ligía, ába jayábin fariséogu, ába jaríñagun lun Jesúsu.

—Beíba yágiñe, ladüga busénti Heródes láfarunibu jilágubei.

³² Ába laríñagun joun.

—Jeíba, jaríñagame lun wügüri bíbuti ligía. “Ugúñe lúma jarúga naságajan espíritugu wuríbatiña jádaangiñe gürigia, areídagugüda áu sánditiña, lárigiñe jarúga, lásurun nuwádigimari. ³³ Lúnti nasígiruni nuweíyasun ugúñe, jarúga, lúma lárigiñe jarúga, ladüga máma lúnti lafarúniwa ában proféta jilágubei boúgudi lueí Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chüguá jugúya dübü jawágún ja loúnajabaña Búngiu láu ugánu buítí jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarüna, májatün! ³⁵ Ígira láadün Búngiu, áni naríñajare jun luágu maríjindüguya jumáadina lan daríme lachülürün dan lun jaríñagun. “Biníwati le ñübinbei lídan líri Wabúreme.”

14

Lareídaguagüdün Jesúsu ában wügüri líjali larüna lúma liyáda

¹ Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jaríaguñein Jesúsu. ² Ñíñein gíñe ában wügüri láu sándi le ílu, ³ ábatí lálügündüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareídaguagüdün ában wügüri lídan wéyu le eméraaguagülei ódi siñáti?

⁴ Ába jeréderun maníñu. Ábatí lanügüni Jesúsu sánditi ligía, ába lareídaguagüduni, ába laríñagun lun lun lídin. ⁵ Ába laríñagun joun fariséogu.

—Furúmieguarügü jídaangiñe, ánjein eíguada lilügün bágasu o lilügün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoúbaña lídoun maríei

⁷ Dan le laríjini Jesúsu janúadajani amísurajoútiña ubáraü buri le joúnbei ja weírigubaña, ába laríñagun joun.

⁸ —Dánme le bamísurajoún lídoun ában fédu lánina maríei, málujabeí lubuídun-ágei ubáraü, ñübin líñeín ábanya amísurajoúti weírigutimáati bueí, ⁹ ábame liábin le amísurajabalün, laríñagame bun. “Rúbei bubára lun wügüri le.” Ábameti bídin láu busíganu añúura lídan lünabun-ágei ubáraü. ¹⁰ Dánme le bamísurajoún lídoun ában fédu, ñurúba lídan lünabun-ágei ubáraü, lun dánme lan le liábin le amísurajabalibú,

laríñagame bun. “Numáda, süguba lídoun ában ubáraü weírigutimaati.” Ítara lúba berésibirun inébesei jagíbugiñe sun ja ñúnbaña luágu dábula. ¹¹ Le anáanguti lúngua weíri, lünabudúba, le ünabuti lanáangun lúngua, weíríbei lanügün.

¹² Aríñagati gíñe lun wügüri le amísurajabalín.

—Dánme le bichugun ában adíneruni o fédu, mamísuraja báña bumádagu, ni bamúlenu, ni bíbugañanu, ni jíbiri bidújeñu, ni bubésinanigu ja rísitíña, ladüga jamísurajabadibú gíñe, bibíjubati bafáyeiruaja. ¹³ Dánme le badügún fédu, amísuraja báña gudémetiña, siñáguatiña úngua, danímaatiña, maríjintiña. ¹⁴ Ábame gúnda ban, ladüga siñáti jafáyeirunibú, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe oúweni.

Jémpulu luáguti oúnwenbun adíneruni

¹⁵ Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶ Ábati laríñagun Jesúsu lun.

—Ñíñein ában wügüri, íchuguti ában oúnwenbun adíneruni, ába loúnajan amísuraja sarágu gürígia. ¹⁷ Óra lun adíneruni, aba loúnajani lumúsun aríñaga joun amísurajoútiña. “Queímoun, aráanseeli sun cátei.” ¹⁸ Súngubei, ába jaríñagun luágu siñá lan joúdin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” ¹⁹ Laríñaga ában. “Agáñijaadina seíngü féru bágasu lánina wadágimanu, neíbuga oúchaña, adügabá fuleísei nun, ferúduna bána, siñáti nídin.” ²⁰ Laríñagaya ában. “Sun líña namárieidun, ligía siñá lubei nídin.” ²¹ Dan le lagíribudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun üma le ubúrugubei, banügañame gudémetiña, siñáguatiña úngua, danímaatiña, jáma maríjintiña.” ²² Lárigiñe ladügünü, ába laríñagun músu lun liyúbudiri. “Nabúreme, adüga náali le bubeíbei nun, níjein mémegua ubáraü.” ²³ Ábati laríñagun iyúbudiri lun músu ligía. “Beíba lídan sun üma boúgudin lueí ubúrugu, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban. ²⁴ Ladüga naríñajare jun luágu úabei lan ni ában jádaangiñe ja namísurajabaña eígití lídan nadíneragüdün.”

Lúnti lígirúniwa sun cátei lun lánibeí lan Crístu

²⁵ Sarágu jáña gürígia afálaruti Jesúsu, ába lagáraragun, ába laríñagun joun.

26 —Siñáti nánigubei lan le jínsiñejabutimaati lun lúguchi, o lúguchi, o lúmari, o lisáanigu, o líbugañanu jáma lamúlenu, o lítunu, o libágari guánarügü, sügü náu. 27 Le gíñe májabei lasúfurirun nueígiñe queísigubeirügü jamúga ában wügüri le anügüti lugúruwan, siñáti náni lan disípulu. 28 Ánjein arítagua ában jídaangiñe ladügün ában wáyelesi, ¿ma funági lañúuruba furúmiñe asáminara átiribei lan lagástarun lun laríjini ánjein gabáfu lubeí lun lagúmuchuni? 29 Ladüga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu, 30 jaríñagame. “Guméseti wügüri le ában wadágimanu, siñá lumuti agúmucha.” 31 Ánjein lawúribuja lubeí ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubeí lageíndagun jáu dísi mílu súdaara lúma le jáubei wein mílu? 32 Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli. 33 Ítara líña lubeíti, furúmieguarügü jídaangiñe le mígirunti sun le lúmabei lun lafálarunina, siñáti nánibei lan disípulu.

Dan le leférideruni sálu lubásuan

(Mt 5.13; Mr 9.50)

34 ‘Buíti sálu, ánjein lefériderira lubásuan, ¿cábagi un ju lan? 35 Mabuídunjali ni lun lábunawagún nádü lídan, ni lun lidérebugu múa, fíwarügaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eférideruboun

(Mt 18.10-14)

1 Luágu ában wéyu, ába jayárafadun sarágu agúburajatiña liseínsuna gumádi jáma gafígoountiña lun Jesúsu lun jagáambuni. 2 Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügüri le, resíbi lumútiña gafígoountiña, jou ligía jáma.

3 Ábati líchuguni Jesúsu jémpulu le joun, laríñaga.

4 —¿Ca jídaangiñe, lun jamúga galügüniña lan san mudún, lefériderira ában jádaangiñe, mígirun lubáñia gádürü-wein-dísi-néfu ñi, lubárua, lun lídin áluajoun mudún to eférideruboun?

5 Dan le ladárirunun, ába lanügünun légewagu láu ugúndani.

6 Dan le lachülürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladüga darína nilügün mudún gó yebe eférideruboun nueí.”

7 Naríñajare jun luágu ítara méme líña weíritima lan ugúndani siélu luágu ában gafígoounti le asáansiruti luríban ligáburi lun lafálaruni Búngiu, sügü láu jawágu gádürü-wein-dísi-néfu

gürígia richágutiňa ligíbugiňe Búngiu ja memégeirunbaňa jasáansiruni jagáburi.

Jémpulu luáguti seínsu le eféridirubei

⁸ ‘¿Ca würi to níjeinti jamúga díisi murúsun seínsu túma, leféridera ában lídaangiňe tueí, lun mébedun tan lámpu, ába tabuídajanun müna áluajei buídu darí lun tadáriruni? ⁹ Dan le tadáriruni, ába toúndaruniňa tumádagu jáma tubésinanigu, taríñaga joun. “Gúnda jumá núma, ladüga darína seínsu lé yebe nefériderubei.” ¹⁰ Naríñajare jun luágú ítara líña lan gíñe ugúndani jádan láni Búngiu ánjeligu luágú ában gafígoounti le asáansiraguti luríban ligáburi lun lafálaruni Búngiu.

Jémpulu luáguti irájü le acháragadubei

¹¹ Rúlumuti gíñe Jesúsu jémpulu le joun, laríñaga.

—Níñein méja ában wügüri jáu bián lirájüñü. ¹² Ába laríñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei. ¹³ Málüti lueígiňe, ába loúndaruni amúleñein sun lumégegun, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴ Dan le gumújali sun liseínsun, ába ladágarun ában lemégeirun eíngini lídan fulásu ligía, ába ladáiragun lúngua lídan ában oúnwenbun mégei. ¹⁵ Ábatí lídin áluaja wadágimanu lúma ában lítana fulásu ligía, ába loúnajani wügüri ligía oúnigiraňa lilügüniňa büíruju. ¹⁶ Weíriti liláma darí lun lawámadun lun lun leíngini jeígin büíruju, míchugúnwati lun. ¹⁷ Ábatí lasáminarun, laríñaga lúnguarügü. “¡Sarágu ñadágimeintiňa líbiňe núguchi ígiraguati eíngini joun, áu ya, oúwe niláma! ¹⁸ Nagíribuda le ñíjin lubeí núguchi, naríñagame lun. Núguchi, afígounjaadina ligíbugiňe Búngiu lúma bigíbugiňe. ¹⁹ Madünaali lun nanáangun núngua quei biraü, baríubana quei ában jádaangiňe ñadágimeintiňa búma.” ²⁰ Ába lárügündün úma lun lagíribudun líbiňoun lúguchi.

‘Dísegí líňa, ába laríjini úguchili irájü le, ába lagúdemeden lun. Ába leíbaagun lubároun, ába loúburuni, ába lachúuruni. ²¹ Ábatí laríñagun isáani lun. “Núguchi, afígounjaadina ligíbugiňe Búngiu lúma bigíbugiňe, madünaali lun nanáangun núngua quei biraü.” ²² Ába laríñagun úguchili joun lumúsuniňa. “Sagájumoun tubuídun-ägei anáanguni furése, daüguagüda jumeí. Daüjuma giňe ában bágü luágú lújabu túma geídi luágú lugúdi. ²³ Áfara jumeí liraüraü bágasu le dibúnetimaabei. ¡Weíga, eféduja wagíame!, ²⁴ ladüga niraü le, rúnaali yebe quei jiláali áni chülüguaya, férídijalí yebe áni daríwama.” Ába jagúmeserun eféduja.

25 ‘Súnti buga dan le, níjeinti buga íbugañaü áraabu. Dánti le lagíribudun, dan le lachülürün tubádun múna, ába lagáambuni áfaruni lúma abínajani. 26 Ábati lagúarun lun ában jádaangiñe músu, ába lálügünduni ca lan susérebei. 27 Ába laríñagun lun. “Chülüjali bamúlen, áfaragüdalá búguchi liraüraü bágasu le dibúnetimaabei, ladüga lachülürün láu magádiei.” 28 Ába lagáñidun íbugañaü, májaali lebélurun. Ába láfuridun lúguchi, ába layúmuragun lun lun lebélurun. 29 Ába laríñagun lun lúguchi. “Subúdi bumúti luágu seríwijadina lan bun sarágu dan, madüraagunganeí le bubeíbei ni ában weíyaasu, míchugidibu ni ában liraüraü gábara nun lun nefédujan jáma numádagu. 30 Guetóti, láu liábin biraü le, le achágarubalin biseínsun jáma würiña wuríbatiña, jáfaragüdabá bágasu le dibúnetimaabei!” 31 Ábati laríñagun úguchili lun. “Niraü, amürü númañadibu súnwandan, sun le náni, báni. 32 Ánjein guetó, lúnti wadügün fédu lúma lun wagúndaarun ladüga bamúlen lé yebe rúwamaalíbei quei jiláali, chülüguaya, férídijalí yebe, áni daríwama.”

16

Jémpulu luáguti oúnigiruti le múaraanbei

¹ Aríñagati gíñe Jesúsu joun láni disípulugu.

—Ñíñein méja ában iyúbudiri rísite, ñíñein gíñe ában loúniri lumégegun, ába jayábin aríñaga lun luágu lachágaruñein lan oúnigiruti ligía lirísin. ² Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladüga masígijadibu oúnigirei nílagu.” ³ Ábati leréderun oúnigiruti ligía asáminara, laríñaga lúnguarügü. “¿Cábatí nadüga guetó lárigiñe gidála lan niyúbudiri wadágimanu nueí? Méretina lun nadügün wadágimanu jürüti, áni nibúsigaritina lun namúriajan. ⁴ Subúdi náali cába lan nadüga lun ní jama erésibirutina jábiñe dánme mawádigimarijadina.” ⁵ Ába loúnajan jawágu ja adúweirubalin liyúbudiri lun jayábin lun ában ában. Ába lálügündüni le furúmiñeti, laríñaga lun. “¿Átiri badúweiruni niyúbudiri?” ⁶ Ába laríñagun lun. “Dúwei numúti san barín agülei.” Ábati laríñagun oúnigiruti ligía lun. “Nuján bigáradan, ñurúba furése, badügame ában luágurügü dimí-san.” ⁷ Lárigiñe, ábaya lálügündün ában, laríñaga lun. “Ángi amürü, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adügabá ában luágurügü gádürü-wein.” ⁸ Ába lasúbudiruni iyúbudiri luágu chu lan láu oúnigiruti ligía lídan ligáburi ladügüni cátei.

Ligía laríñagun Jesúsu.

—Gürígia wuríbatiña ja lánina uboú le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu. ⁹ Siñáti leménigidún luágu irísini lánina uboú le, aríñagatina lubeíti jun lun jayúsuruni jirísin lun jadügün buíti, lun dánme lan le lagúmuchun jibágari, jerésibirúba tídan muna to magúmuchaditu, yágüta siélu.

¹⁰ ‘Le adügüti buíti láu le murúsunrügüti, ladügüba gíñe buíti láu le gíbetti, le madügünti buíti láu le murúsunrügüti, madügünbei gíñe buíti láu le gíbetti. ¹¹ Ánjaün lubeíti madügün buíti láu buri irísini le láni uboú le, le uágubei siñá lan leménigidún, ¿cábagi afíñera juágu lun ledéregerun irísini inárüni lábugiñe jaríajan? ¹² Ánjaünti madügün buíti láu jemégen ámu, ¿cábagi íchigei le jáni guánarügü jun?

¹³ ‘Siñáti lesériwidun ában gürígia joun bián iyúbudirigu, ladüga liyéreeguduba ában lun, línsiñedame le ában lun, o úarabeí lan lun ában, lanügeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴ Agáambagu jáña fariséogu lun sun cátei le, ába jéjerajan láu Jesúsu, ladüga jínsiñe lan seínsu joun. ¹⁵ Ábati laríñagun Jesúsu joun.

—Jugúya gürígia ja arúfudagubaña joúngua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janügübei gürígia quei weíriti cátei, iyéreegutí lun Búngiu.

Lúrudu lúma larúeijan Búngiu

¹⁶ ‘Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia joúchatína lun jebélurun lídoun.

¹⁷ ‘Méreenguntimaati lun lagúmuchagun siélu lúma uboú, máma lun magúnfulirun lan liñüraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni

(Mt 19.1-12; Mr 10.1-12)

¹⁸ ‘Ánjoun lígira ában wügüri lúmari, lagámarida ámu, ladügüñein figoú le gíríbei adultériu, le gíñe agámariduti ában würi to ígiraguaaru, ladügüña gíñe adultériu.

Wügüri le rísabei, lúma Lázaro

¹⁹ Aríñagati gíñe Jesúsu.

—Níñein méja ában wügüri rísiti, anáanguni fínutu to wéndegutu ladáüraguboun, ságüja wéyu ladáagun fédu láu sarágu wéndegu. ²⁰ Níñein gíñe ában gudémeti gíriti Lázaro, sun

lúra láu gumeín,²¹ lañúurati buri múarugu tubéneri lúban rí siti ligía áluga leígini lífe eígini le eíguaduti lueígiñe lidábulan rí siti. Weíriti lasúfurirun darí lun lawánduni jayábin oúnli ejelujei lugúmein.²² Luágú ában wéyu, ába loúnwen fugiábu ligía, ába janügüni ánjeligu lúmoun Abrahám, le ñíjin jabeí jiláaña buítína, ába gíñe loúnwen rí siti, ába lábunajoún.²³ Dan le lasúfuriruña lan rí siti ligía lídan fulásu le ñíjin jabeí jiláaña wuríbatíña, ába liñúruni laríjin, ában laríjini Abrahám disegiñe, láu Lázaro lúma.²⁴ Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladüdürüagüdüni ligíbu lújabu láu dúna, ñübin lámuga éderei tuágu niñéñe, ladüga nasúfuriruña sarágu lídan wátu geméti le.”²⁵ Ába laríñagun Abrahám lun. “Niraü, jarítaguabá luágú buídu lán meja dan bun lídan bibágari, ánjein lun Lázaro, wuríbatí meja dan. Guetó, buítí dan lun ya, bugúya asúfurira.²⁶ Boúgudigiñe lueí sun le, níjein ában baráangu afánreinraguáwa júma, ja jamúga buséntíña jóúdin yágiñe lun ñíjin, siñáti, ni ja ñibaña, siñáti jayábin ñájoun.”²⁷ Ábati laríñagun rí siti. “Amúriajatina búma, Núguchi Abrahám, lun boúnajani Lázaro lúbiñe núguchi,²⁸ añájein seíngü namúlenu ñi, lun ladímurejan joun, mayábin jamámuga gíñe lídoun fulásu lánina asúfuriruni le.”²⁹ Ába laríñagun Abrahám lun. “Níjein le labürüjabei Moisés jáma profétagu jáma ñi, jadüga jamá gásu láu!”³⁰ Ába loúnabun rí siti, ába laríñagun. “Binárün, núguchi Abrahám, láu sun líra, ánjein ñüdün ában jádaangiñe jiláaña adímureja joun, lasáansiraguba jagáburi.”³¹ Laríñaga Abrahám lun. “Ánjein mája jabeí jadügün gásu láu le laríñagubei Moisés jáma profétagu, mafíñebañá giñe láu sun lásaarun ában jádaangiñe jiláaña lun lídin adímureja joun.”

17

*Luríban lafigoungüdüniwa ában gürígia
(Mt 18.6-7, 21-22; Mr 9.42)*

¹ Ába laríñagun Jesúsu joun láni disípulugu.

—Súnwandan níjeinbei lán buri cátei afigougüdüti gürígia, jáni fugiábu gürígia le afigougüdüti ámu!² Buítimaati jamúga lun lun lagurún baránajoun láu ában dübü le lamúlija awási güráñu luágú ligíina sügü láu lafigoungüdüniwa ában jádaangiñe ja ñübürigüñabaña lídan jafíñen nuágu.³ Ítara líña lubeíti toúnigi jumá.

‘Ánjein adüga bamúlen o bíbugaña wuríbani bun, wéridibeí, ánjein asáansiragua ligáburi, ferúdunabeí,⁴ ánjein adüga wuríbani bun sédü weíyaasu lídan ában wéyu, sédü weíyaasu liábin aríñaga bun luágú madügündügüya láali lan, lúnti ferúduna báni.

Lubáfu afíñeni

⁵ Ába jaríñagun apóstolugu lun Jesúsu.

—Wabúreme, rúba lánwoun wafíñen.

⁶ Ábatí laríñagun Wabúreme Jesúsu joun.

—Lun jamúga níjein lan murúsuraü afíñeni jídan—gayáraati jamúga ñüraüraü lan queísi ában tíla mostása —gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

Wesériwidun lun Búngiu máma ában cátei lun lateíngiruníwa luágu

⁷ ‘Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawoújan o loúnigirun lan anímaalu, ¿laríñaguba funági lun músu ligía. “Belúba, ñurúba eiga”? ⁸ Uá, aríñagarügübeí lun. “Aráansebeí neígin, aráanseñu amürüme lun beténirun nun sun anája lan eiga lúma áta, lárigiñeme, gayáraajalíme beígin lúma bátun.” ⁹ ¿Teínqui lumúti funági iyúbudiri músu luágu ladügünü le lubeíbei lun? Uá. ¹⁰ Jugúya giñéti, dánme lásurun jadügünü le uágubei laríñaga Búngiu jun lun jadügünü, lúnti jaríñagun. “Músu moúntiña wagía, ladüga lé rügüñein lúnbei wadügünü wadüga.”

Lareídagaguagüdün Jesúsu díisi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa. ¹² Dan le lachülürünbei lídan ában liraüraü fulásu, ába jayábin díisi wüguriña gawágutiña gumeín, lubároun. Ába jeréderun díse lueí, ¹³ ába jagúaragun lun ítara.

—¡Jesúsu, Maésturu, gudéme wamá bun!

¹⁴ Dan le laríjinbaliña Jesúsu, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun. ¹⁵ Ñíñeinti ában jádaangiñe, dan le laríjinbei luágu areídaguaali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶ Ába lájuduragun dagá ligíbu múarugu lun líchuguni eteíngiruni lun. Áni Samariána wüguri ligía. ¹⁷ Ábatí laríñagun Jesúsu.

—¿Ma díisiñanu areídagutiña? ¿Jagáñagi ja jíbiri néfu? ¹⁸ ¿Niján gubeírgü teréncha le agíribuda eteíngirei Búngiu?

¹⁹ Ábatí laríñagun lun wüguri ligía.

—Sarába, beíba, areídaguaadibu ladüga bafíñen.

*Ída lúba lan ligáburi liábin larúeijan Búngiu
(Mt 24.23-28, 36-41)*

20 Ába jálugüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, marijínbei, 21 maríñawagúnbei. “Niján”, o “Níngitan”, ladüga lídan linárün cátei, níjeinjali larúeijan Búngiu jagánagua.

22 Ábati laríñagun joun láni disípulugu.

—Lachülürüba dan lun meméniya lánme janígi lun júmabadina lan, íbini luágurügü ában wéyu, masúseredunbei lídan dan ligía.

23 Laríñawagúba jun. “Niján Crístu ya”, o “Níngitan yágüta.” Iyéenibei, mídin jumá járigi, mafálarun jumáñname. 24 Ladüga ítara quei larijín ában labírijanígä lueígiñe ában loúba siélu lun luágun le ában, ítara lúba dánme le nagíribudun uboúagun, áu le Wügüri Garaüwarügüti. 25 Lúnti nasúfurirun sarágu furúmiñe, mebéresen jagíame gürígia ja lánina dan le náu. 26 Queí meja lasúseredun lídan lidáani Noé, ítara lúba gíñe lasúseredun lídan búrime wéyu le niábingle, áu le Wügüri Garaüwarügüti. 27 Dán meja ligía, jerédera meja gürígia eiga, áta, agámarida, íchaajaña jarájüñü lun jamárieidun darí wéyu le lebélurun Noé tídoun ugúnein to árca. Ába liábin gúnran, ába jañáradagun súngubei. 28 Ítara lúba gíñe quei lasúseredun lídan lidáani Lot. jerédera gürígia eiga, áta, agáñija, alúguraja, ábunagua, adáagua múna. 29 Dan le láfuridunbei Lot ubúrugugiñe Sodóma, ába láburujan wátu geméti lúma súfurú siélugíñe, ába láfaraguniña súngubei. 30 Ítara lúba dánme le niábin, áu le Wügüri Garaüwarügüti.

31 ‘Lídaanme wéyu ligía, le gürígia le boúgudibei tueí lúban, áanjein níjein lubeí lumégegun múnada, mebéluralá aságarei. Le gürígia le áraabubei lídan óra ligía, magíribudalá lúbiñoun. 32 Jarítagua jumá luágu le asúseredubei tun lúmari Lot. 33 Le áluguti leséfuruni libágari ya uboúagu, lefériderubei ibágari magúmuchaditi, le ánjabei leférideruni libágari ya uboúagu, nueígiñe, libíjuba ibágari magúmuchaditi.

34 ‘Naríñajare jun luágu áriebu lánme ligía, ñíbaña biáma gürígia arúmuga tídan ában meme gabána, lanügüba ában jádaangiñe, ígirúame le ában segúñ jafíñen nuágu. 35 Ñíbaña biáma würíña amúlija lídan ában, tanügüba ában jádaangiñe, ígirúame to ában. 36 Ñíbaña biáma wügüriña áraabu, lanügüba ában jádaangiñe, igirúame le ában.

37 Dan le jagáambunbalin cátei le, ába jálugüdüni, jaríñaga lun.

—¿Jalíabasan lasúsereda buri cátei le, Wabúreme?

Laríñaga joun.

—Le ñí lumuti lúgubu jiláali, ñíba joúndaragua wadúbi.

18

Jémpulu tuáguti würi to jiláali túmari, lúma agúseragüdüti

¹ Ába labájüdagun Jesúsu ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu. ² Laríñaga joun.

—Níñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia. ³ Níñoun gíñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani. ⁴ Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában,⁵ quei nuján méme lan würi to ásüdagüda nichügü, nesáfuraaru, jebé lámuga tiábin, gumú líñein nugúraasun.”

⁶ Ába laríñagun Jesúsu.

—Niján laríñagubei agúseragüdüti le wuríbabei, ⁷ gúbumeti lesáfuraña Búngiu lánigu ja ayúmuragutiña lun wéyuagu, áriebu. ¿Lübei lubá líderaguniña? ⁸ Uá, madárasanbei. Láu sun le, dánme le nagíribudun, áu le Wügüri Garaüwarügüti, uboúagun, ¿nadáriruba funásan afíñeni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janügaña ámu gürígia quei ni cáta. Laríñaga.

¹⁰ —Nüdütiña bián wügüriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürígia — jíwerutiña, wuríbatiña, salúfuritiña, mítaraantina gíñe quei agúburajati liseínsuna gumádi le. ¹² Ayúnaratina bián weýyasu lídan dimáasu lun nagúncirun búma, rúnumuti gíñe díisi gáwanün lídaangiñe ságü fiádürü le ebélurubei nun, bun.” ¹³ Ánjeinti agúburajati liseínsuna gumádi, ába leréderun díse, mabúseerunti ni lun liñúruni laríjin siélun, le luweírin lú nabun lanáangun lúngua. Aboújarügüleí laníguagu láu igárigu, laríñaga. “¡Búngiu, gudémená bun, nugúya le gafígoounti!” ¹⁴ Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladüga le anáanguti lúngua weíri, ñüraübei lanügün, ánjein le ñüraübei lanáangun lúngua, weíribei lanügün.

*Labíniruniña Jesúsu irájüñü
(Mt 19.13-15; Mr 10.13-16)*

¹⁵ Anaajoúatiña gíñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeínjan

joun ja anáajabaliña irájüñü. ¹⁶ Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladüga ja ítarabaña quei jagía, jagía lílanabaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu afíñeni jarúmati líbe jaffíñen irájüñü, mebélubei lídoun.

*Layánujan ában wügüri rísciti lúma Jesúsu
(Mt 19.16-30; Mr 10.17-31)*

¹⁸ Ába lálügündüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadügüni lun gayára lan nibíjini ibágari le magúmuchaditi?

¹⁹ Laríñaga Jesúsu lun.

—¿Ca uágú baríñaga nun “buíti”? Ában rügüñein buíti, Búngiu.

²⁰ Subúdi bumúti gumádi. Maganoúabá túma würi gámaritu, máfarajabá, míwerujabá, mayéejabá luágu ni ában, inébe jamá bagübürigu bun.

²¹ Laríñaga wügüri ligía lun.

—Gúnfilitina láu sun le lúmagiñe ñüraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badügüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíribudun, ábame bafálarunina.

²³ Dan le lagáambunbalin wügüri ligía cátei le, ába lírudagun, ladüga rísciti buídu. ²⁴ Dan le laríjini Jesúsu lírudagun, ába laríñagun.

—¡Jénreenguti lun jebélurun ríscitiña lídoun larúeijan Búngiu!

²⁵ Mereenguntimaati lun lásügürün ában caméyu lídaangiñe lujúyun ában agúsa sügü láu lebélurun ában rísciti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

²⁷ Laríñaga Jesúsu joun.

—Le jásiñerubei gürígia adüga, gayára lumúti Búngiu, ladüga úati ni cáta siñáti lun Búngiu.

²⁸ Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

²⁹ Ába laríñagun Jesúsu joun.

—Ninárün jáu luágu furúmieguarügü lan le ígiruti lúban, o lagübürigu, o líbugañanu, o lamülenu, o lúmari, o lirájüñü luágu larúeijan Búngiu, ³⁰ libíjubatíma sarágu weíyaasu loúgiñe lídan uboú le, ibíjaleíme ibágari magúmuchaditi yágüta siélu.

*Ladímuerajaanya Jesúsu luágu loúnwen
(Mt 20.17-19; Mr 10.32-34)*

³¹ Ába lagúarun Jesúsu joun láni dúusu apóstolugu jábugua, ába lariñagun joun.

—Weíbuga Jerusalén guetó, le ñíba lubeí lagúñfulira sun le jabürüjabei profétagu nuágu, áu le Wügüri Garaüwarügüti.

³² Jederegerubadina joun ja mámabaña juríu, jéjerajaba náu, anába jamáname, suégua. ³³ Jabeíchubadina, lárigiñeme, ábame jáfarunina jilágubei, áni násaaruba lídaangiñe oúweni luágu lürüwan wéyu lúnya nabágaridun.

³⁴ Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímueraja joun, darúguati lanichigu cátei le lariñagubei, joun.

*Lareídagüdün Jesúsu ában Jericóna maríjinti
(Mt 20.29-34; Mr 10.46-52)*

³⁵ Dan le achülliureinaali Jesúsu ubúrugun Jericó, ñíñein ában maríjinti ñun láru üma amúria. ³⁶ Dan le lagáambunbei maríjinti ligía jásüüjan sarágu gürígia, ába lálügüdajan ca lan susérebei. ³⁷ Ába jaríñagun lun luágu niján lan Jesúsu Nazarétna ásügüra ñígíñe. ³⁸ Ábati lagúaragun, lariñaga.

—¡Jesúsu, le ladügawagun Davíd, gudémená bun!

³⁹ Ja lubá lubáabaña, ába jadeínjan lun lun lámanichun, ligiatima lagúaragun.

—¡Ladügawagun Davíd, gudémená bun!

⁴⁰ Ábati laráramagun Jesúsu, ába loúnajan anügei. Dan le yaráfaali lun, ába lariñagun lun.

⁴¹ —¿Ca babúseerubei nadügün bun?

Ába lariñagun lun.

—Nabúreme, buséntina narijin.

⁴² Lariñaga Jesúsu lun.

—¡Ibíjabeí baríjin! Areídaguaadibu ladüga bafíñen.

⁴³ Lidan meme óra ligía, ába laríjin maríjinti ligía, ába lafálaruni Jesúsu adímuerajeina buíti luágu Búngiu. Sun gürígia ja aríjubalin cátei le, ába gíñe jadímuerajan buíti luágu Búngiu.

19

Jesúsu lúma Zaquéo

¹ Ábati lebélurun Jesúsu fulásurugun Jericó, ába lásügürün ubúrugugiñe. ² Ñíñein ában wügüri rí siti, gíriti Zaquéo, jábuti agúburajatiña liseínsuna gumádi. ³ Buséntiti Zaquéo laríjini Jesúsu lun lasúbudiruni, siñáti laríjini ladüga ñüraüraüti lúgubu, áni gíbetiña gürígia. ⁴ Lúnti gayára lan laríjini, ába leíbaagun ubáraü, ába laweírun tuágun ában tídbu wéwe sicómoro yaráfa

lun le ñígiñeba lubeí lásügüra Jesúsu. ⁵ Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladüga lúnti neréderun búbiñe ugúñe.

⁶ Ábati larárirun Zaquéo furése, ába lerésibiruni Jesúsu lúbiñe láu ugúndani. ⁷ Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸ Ábati laráramun Zaquéo, ába laríñagun lun Jesúsu.

—Nabúreme, níchiga lamídan le númabei joun gudémetiña, áni ánjein íwerujaadina lubeí lueí ában gürígia láu eyéeraguni, náguyugüdüba gádürü weíyaasu sügü láu lun.

⁹ Laríñaga Jesúsu lun.

—Sálbañu jáñia tílana muna to ugúñe, ladügawagun gíñe Abrahám amürü. ¹⁰ Ligía niábinbei uboúagu, áu le Wügüri Garaüwarügüti, lun náluajaniña lúma asálbaraña já yebe féridijañabaña.

Jémpulu luáguti díisi murúsun seínsu

¹¹ Dan le añaja lubeí gürígia agáambajei laríñaguni buri Jesúsu cátei le, ába labájüdagun ában jémpulu joun, ladüga ayárafadeinaali lan lun Jerusalén áni jarítaguatiñáti luágu lagúmesera lan larúejan Búngiu dan ligía. ¹² Ábati laríñagun joun.

—Ñíñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageíra, ábayame lagíribudun. ¹³ Lubáragiñe láfuridun, ába loúnajan jawágu díisi jádaangiñe lumúsuniña, ába lederegerun ában seínsu le gebégití sarágu lun cáda ában, ába laríñagun joun. “Agárabaja jumeí seínsu le darí nagíribudun.” ¹⁴ Queíti liyéreegunbei wügüri ligía joun lílana fulásu, ába joúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. ¹⁵ Láu sun líra, resíbiwati lun urúeime, ába lagíribudun lageíroun. Dan le lachülürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷ Laríñaga urúei lun. “Buíti, ában músu buíti bugúya. Quei úara bubeí lídan le murúsunrügüti, níchigaadibu agúmadija lídan díisi fulásu.” ¹⁸ Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.” ¹⁹ Ába gíñe laríñagun lun. “Bagúmadija lídan seíngü fulásu.” ²⁰ Ábati liábin ában, ába laríñagun. “Nabúreme, niján biseínsun, areída numúti tídan ában mísue ladüga nanúfude bueí,

²¹ ladüga ában ban wügüri derégüdati, reídeitibu láu cátei le

mawádigimaritibu luágu, alúbaja amürü le ñílumuti mábunagun ban.”²² Ábati laríñagun urúei lun. “Músu wuríbati, luágu guánarügü berérun nagúseragüdábu. Quei subúdi bubálín luágu ában nan wügüri derégüdati, luágu reídei nan láu cátei le mawádigimaritina luágu, alúbaja áu le ñílumuti mábunagun nan,²³ ¿cáti uágu míchububalin niseínsun báncürügun lun jamúga lagánwoundun dan le nagíribudun?”²⁴ Ába laríñagun joun ja ñibaña. “Gidájumei seínsu lueí, rújumei lun le dísibei lúma.”²⁵ Ába jaríñagun lun. “Wabúreme, níjeinga dísi seínsu lúma.”²⁶ Ába laríñagun urúei. “Naríñajare jun luágu sun lan le adügati buíti láu le lúmabei, libíjuba lánwoun, ánjein le madügünti ni cáta buíti láu murúsun le lúmabei, lagídarúaba murúsun ligía lueí.”²⁷ Játi náganiñu, já yebe mabúseerúnbaña lun urúei nan, barüjumaña ñajoun, áfaragua jumáña jilágubei nigíbugiñe.”

Lebélurun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárigiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá.²⁹ Dan le chüllü méemeeli lídoun buri fulásu le Betfajé lúma Betánia, yaráfa lun wübü le gíriblei Olivos,³⁰ ába laríñagun joun biáma jádaangiñe láni disípulugu.

—Jeíba lídan liraüraü fulásu le wagíbugiñebei, dánme le jachülürün ñi, jadáriruba ában burígü güránu le maweinrúngili. Jafáragadeíme, ábame janügüni ñajoun.³¹ Ánjaün álögüdüwa ca lan uágu jafáragadei, jaríñagame luágu busén láani Jabúreme.

³² Ába joúdin, ába jadáriruni ítara quei laríñaguni Jesúsu joun.

³³ Dánti le añája lubeí afáragadei burígü, ába jálugüdüniña labúriña, jaríñaga joun.

—¿Ca uágu jafáragadei burígü le?

³⁴ Ába joúnabuniñu.

—Ladüga busén láani Wabúreme.

³⁵ Ábati janügüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun.³⁶ Quei awáansereina lan Jesúsu, átulejeina jamoún janáangun luágu üma lubá.³⁷ Dan le jayárafadun lun larárirún wübü le Olivos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jaríjibei.³⁸ Jaríñaga.

—¡Biníwati urúei le ñübinbei lídan líri Wabúreme Búngiu! ¡Níjein ñurúguäü siélu, lúma uweírigu lun Búngiu!

³⁹ Ábati jaríñagun fariséogu ja ñibaña jádan gürígia lun.

—Maésturu, aríñagabá joun bániñu lun jámanichun.

40 Laríñaga Jesúsu joun.

—Ninárün jáu luágu ánjaña lan ámanichaja ja, lagúarajaba lán buri dübü nuágü.

41 Dan le layárafadun lun Jerusalén, dan le laríjini ubúruugu ligía, ába layáujujan jawágu lílana fulásu ligía, laríñaga.

42 —¡Lun jamúga gunfaráanda jumáni ugúñe luágu áu lan ümabei lun ñurúguaü jun, buítí jamúga! Májatün.

43 Ligía lachülüruba lubeí wéyu buri wuríbatí jun, jadügame jáganiñu ában baríeru geyégua láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbaü.

44 Jagünrinchagubei jufúlasun le gumúti, mígirunbaña ni ában dübü ligíbuagu dübü, jáfarúaba sun jugúya, ladüga mebéresen jumá láu óra le liábinbei Búngiu asálbaraü.

Larúmadagüdünun Jesúsu témpulu

(Mt 21.12-17; Mr 11.15-19; Jn 2.13-22)

45 Ábati lebélurun Jesúsu témpulurugun, ába laságaruniña ja alúgorajabaña jáma ja agáñijabaña ñi. **46** Laríñaga joun.

—Laríñajare tídan Lerérunt Búngiu. “Núban, fulásu le ñí lubei gayára lan jayúmuragun gürígia nun”, ánjein jugúya, barüjumaaru quei jában jíwerutiña.

47 Ságü buri wéyu larúfudajan Jesúsu témpulurugu, añájati jábutigu jafádirigun juríu jáma arúfudajatiña lilúrudun Moisés, jáma gíñe lábutigu fulásu áluaja ída lúba lan jáfaruni jilágubei, **48** madáritiña ída lúba lan jadügünü ladüga weíri lan joúrabajoúniwa sun gürígia lun jagáambuni lerérun.

20

Lirícha Jesúsu témpulurugu

(Mt 21.23-27; Mr 11.27-33)

1 Luágu ában wéyu, dan le témpuluruguñein lubeí Jesúsu arúfudaja joun gürígia, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügüriña weírigutiña lídan jafíñen juríu, **2** ába jaríñagun lun.

—Aríñagabeí woun ca lan biríchabei lun badügünü cátei le. ¿Ca ichugubalin ubáfu le bun?

3 Ábati laríñagun Jesúsu joun.

—Nálügüdáadün gíñe ában cátei, oúnaba jumána. **4** ¿Ca oúnajabalín Juan abásteragüdaja? ¿Loúnajan Búngiu ódi joúnajan wügüriña?

5 Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu mafíñerun wabeí lun. **6** Ánjawa aríñaga luágu joúnajan lan wügüriña, jachámuraguba gürígia

dübü wawágun, ladüga choúru jamúti luágu proféta lán meja Juan.

7 Ábati jaríñagun luágu ibídiñe lan joun ca lán meja oúnajabalín Juan abásterágüdaja. 8 Ábati laríñagun Jesúsu joun.

—Maríñagun nubeí gíñe jun ca lan áu ubáfu nadügei buri cátei le.

*Jémpulu jawáguti ñadágimeintiña wuríbatiña
(Mt 21.33-44; Mr 12.1-11)*

9 Ába lagúmeserun Jesúsu adímureja joun gürígia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügüri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. 10 Dan le lachülürün lidáani alúbajani, ába loúnajan ában lumúsun anügei lufánran, ába jabúleiseiruni ñadágimeintiña músu ligía, ába joúnajani lárigóún, míchugunga ni cáta lun. 11 Ábayati loúnajan ábanya músu, ába gíñe janábuni, buleísei jameí, oúnaja jameí, míchugunga ni cáta lun. 12 Ábaya loúnajan ábanya, ábaya gíñe jabúleiseiruni, ába jabúguni ñígiñe.

13 ‘Ába laríñagun labúreme ichári lúnguarügü. “¿Cábasán funa nadüga? Noúnajaali niraü le jínsiñebei nun, dánme le jaríjini, fáqua inébebei joun.” Ába loúnajani. 14 Dan le jaríjinbalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” 15 Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábatí ladüga labúreme ichári? 16 Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

17 Ába laríaguniña Jesúsu, ába laríñagun joun.

—¿Cáti lílabei le bürüñubei tídan Lerérun Búngiu le ñí lubei laríñaga.

Lé meja dübü le mabúseerun jabeí ábunagutiña, ligíaali furúmiñeti?

18 Furúmieguarügü le achúgeraguti luágu dübü ligía lagünrinchaguba, léti uágunti láburuja, labúrechagúbei. Áu dübü ligía.

*Luáguti liseínsuna gumádi
(Mt 21.45-46, 22.15-22; Mr 12.12-17)*

¹⁹ Lídan meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járugüduni Jesúsu, ladüga jasúbudiruni luágu jawáguti lan jémpulu le laríñagubei, madügün jamúti ladüga janúfude jaweí gürígia. Ábati jagúrabajan ámu dan. ²⁰ Ábati joúnajan gürígia ja ásügürütiña joúngua camá jamuga jarúmatiña lun jaríaaajani Jesúsu, lun jaríñagagüduni cátei le gawáguti gayára lan jíchugun lidúnrun lun jederegeruni lun gumádimati. ²¹ Ligía jálugüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabe, manúfudetibu gíñe lueí ni ában, ladüga ni cáta lan luweírigun gürígia bun, áni láu inárüni barúfudajei lémeri Búngiu. ²² Aríñagabá ában cátei woun. ¿buíti lun lafáyeijoún seínsu lun warúeite César ódi mabuídunti?

²³ Ába lasúbudiruni Jesúsu luríban jarítagun, ába laríñagun joun.

—¿Ca uágu jabúseera jíchugun sádara nubá? ²⁴ Arúfuda jumá ában lídaangiñe seínsu ligía nun. ¿Cá iyáwa lúma íri le bürüñubei luágu?

Jaríñaga lun.

—Láni César.

²⁵ Ábati laríñagun joun.

—Le láni César rújumei lun César, le láni Búngiu rújumei lun Búngiu.

²⁶ Siñá jamútiti áburugüda tídoun jasádaran láu lé buri laríñagubei jagíbugiñe gürígia, weírirügütí janígi láu loúnabagüle joun. Ába jámanichun.

Álugüdajani lübülgürü ásaaruni lídaangiñe oúweni

(Mt 22.23-33; Mr 12.18-27)

²⁷ Lárigiñe, ába joúdin saduséogu aríjei Jesúsu. Jaríñajare saduséogu luágu másaarunbaña lan jiláaña lídaangiñe oúweni lúnya jabágaridun. Ábati jaríñagun lun Jesúsu.

²⁸ —Maésturu, laríñajare Moisés woun tídan lilíburun, luágu ánjein lan oúwe ában wügüri, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadügawagun lámuga líbugaña le oúwebei. ²⁹ Wel, ñíñanu mejáti sedü wügüriña gamúlenuguátiña, ába lamárieidun le furúmiñeti, ába loúnwen marájüñüga. ³⁰ Ába lamárieidun le jabíaman túma buga lúmari íbugañaü, ába gíñe loúnwen marájüñüga. ³¹ Ábati lamárieidun le jürüwan túma, chüliú lúmoun le jasédün, jilágu meme jagía, marájüñüga táu. ³² Ába gíñe toúnwen würi tugúya. ³³ Aríñagabá ában cátei woun.

dánmeti le jásaarun lídaangiñe oúweni lúnya jabágaridun, ¿cábati úmari würi to jádaangiñe, quei maríei tubeí jáma sédüğubei?

34 Ába laríñagun Jesúsu joun.

—Lídan uboú le, maríeitiña wügüriña jáma würiña, ³⁵ ánjein lídaanme dan le lúnbei liábin, úabeí agámariduni siélu jádan ja garíchabaña lun ásaaruni lídaangiñe oúweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarajüñü lun maríei, ³⁶ ladüga moúnwendügüyaña gürígia siélu, ítaraañame quei ánjeligu, lirajüñü jañáme Búngiu ja saráaña lídaangiñe oúweni. ³⁷ Moisés guánarügü arúfuda lumúti luágu níjein lan ásaaruni lídaangiñe oúweni lídan le labürüjanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacób. ³⁸ Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubu, ladüga máma Jabúngiute jiláaña Búngiu, Jabúngiute ja wínwangiñabaña. Wínwangiña lanügüniña Búngiu sun gürígia.

39 Ábatí jaríñagun arúfudajatiña lilúrudun Moisés.

—Buítí baríñaguni, Maésturu.

40 Ába málügüdagun jamáali lan.

¿Ladügawagunsan Davíd Crístu?

(Mt 22.41-46; Mr 12.35-37)

41 Ába laríñagun Jesúsu joun.

—¿Ída liñásan jaríñagunbei luágu ladügawagun lan Davíd Crístu? ⁴² Laríñajare Davíd guánarügü tídan líburu to gíriboun Sálmos.

Ariñagati Búngiu lun Nabúreme. “Ñurúba lueígiñe noúnwenren, ⁴³ daríme níchuguniña báganiñu bújaburugun.”

44 ¿Ída lubáti ladügawagun lan Davíd Crístu, áni aríñagati Davíd guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Mr 12.38-40; Lc 11.37-54)

45 Ñíñanu sarágu gürígia agáambajei Jesúsu, ába jagáambun laríñagun joun láni disípulu.

46 —Toúnigigua jumá júngua jaweí arúfudajatiña lilúrudun Moisés, ganígitia jeíbugun táo anáanguni durúrutu, busén jagía lun labúsurún joun láu inébesei ümadarugu, áluaja jameí ubáraü le jabára weírigutiña tídan ligílisi, lúma lubuídun-ägei ubáraü lídan eígini. ⁴⁷ Gidá jamutu gíñe jában würiña ja jiláaña úmari jaweí, lúnti jadáuragun láu, ába jadügün furíeigi migínaguti. Weíribei jasúfurirun luágu sun le jadügübei.

21

*Seínsu le týchugubei ában fugiábu würi témpulurugu
(Mr 12.41-44)*

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² aríja lumúti gíñe týchugun ában würi jiláali túmari, gudémetu, bián gáwanün tídoun gáfu. ³ Ába laríñagun Jesúsu.

—Ninárün jáu luágu gíbetima lan týchugun fugiábu würi to sügü jáu súngubei, ladüga sun jagía, lídaangiñe le ígiragubei jáma jíchiga, ⁴ ánjoun tugúya, láu tugúdemegun týchigei sun le túmabei lún yebe tawínwandun.

*Laríñagun Jesúsu luágu tagünrinchawagúba lan témpulu
(Mt 24.1-2; Mr 13.1-2)*

⁵ Jadímurejaña fiú gürígia tuágu témpulu, luágu tubuídunmeraü láu lubuídun buri tidübüri lúma buri cátei le jíchugubei gürígia lun tawéndedun. Ábatí laríñagun Jesúsu.

⁶ —Lachülürüba wéyu lun lagünrinchawagún sun le jaríagubei tuágu témpulu to guetó, merédebei ni ában dübü ligíbuagu dübü.

*Seíni buri lubá lagúmuchun uboú
(Mt 24.3-28; Mr 13.3-23)*

⁷ Ábatí jálügüdüni, jaríñaga lun.

—Maésturu, ¿ídámé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafíñera jumá joun, mafálara jumáñia. ⁹ Dánme le jagáambun ladímurejoún luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun uboú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu. ¹¹ Níbei oúnwenbun buri járabaganáli, ilámaü, sándi, lídan ámuñgueinarügü fulásu, laríjúba buri cátei janúfunati siélu lúma oúnwenbun buri seíni.

¹² ‘Lubáragiñe lasúseredun sun le, járügenba, eíbaajoúa jugúyame. Janügüba agúsera tídan jalígilisin juríu, jádarawagúba furísunrugun, barüwa jugúyame jagíbugiñoún urúeigu jáma gumádimatiña, nueígiñe, lun jagúseragüdünen, ¹³ ligíame jidáani lun jadímurejan luágu nufúleisein. ¹⁴ Aráanse jumeí jarítagun lun madíjeri jumá cába lan jaríñaga jueígiñegua, ¹⁵ níchuguba dimúrei lúma lichú áu jun le lásiñerun ni ában

jádaangiñe jáganiñu asígenera ni oúnaba. ¹⁶ Jalúgurubadün jagübürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷ jiyéreeguduba joun sun gürígia, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni áanjaün meme derégüdagua lídan jaffiñen nuágu, jibíjibeí ibágari magúmuchaditi.

²⁰ Dánme jaríjin geyégu jamá lan súdaara ubúrugu Jerusalén, subúdi jumeí luágu yaráfaali lan lagúnrinchagun ubúrugu ligía. ²¹ Jámeti gürígia ja Judéabaña, lúnti janúrajan luágun buri wübü, ja ubúrugubaña Jerusalén, lúnti jáfuridun ñígiñe, ja áraabubaña, magíribuda jamá ubúrugun. ²² Luwéyuri buríbei jafáyeirun gürígia luágu wuríbati le jadügübei, dánme le lagúnlfulirún sun le bürüwañubei tídan Lerérung Búngiu. ²³ ¡Fugiábugume würíña ja dageínatiña lídan dan ligía, o ja lan garájüñütiña ja gurágiña! Ladüga ñíbei sarágu igárigu uboúagu, larúfudubei Búngiu luweírin ligáñi luágu jafígoun gürígia ja juríu. ²⁴ Níbaña oúwegutiña wuríburugu, jíbiri janáawaguba adáürawagua lídoun ámu ageíraü, ábame jagúnrinchaguni ja mámabaña juríu ubúrugu Jerusalén daríme lagúmuchun dan le íchugübei joun lun jadügüni.

*Ligáburi ída lúba lan liábin Crístu
(Mt 24.29-35, 42-44; Mr 13.24-37)*

²⁵ ‘Lasáliragubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu uboúagu, ábame janúfudedagun luágu lanárime lajúujan lúma laboúnjan lugúdi barána. ²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladüga járugüdüba lan warúguma ámu üma. ²⁷ Ábameti larijín niábin, áu le Wügüri Garaüwarügüti, lídan juánriñu láu sun nubáfu lúma oúnwenbun nuweírigun. ²⁸ Dánme le lagúmeserún buri cátei le asúsereda, ragüjuma dügüdaguaü, iñúra jumeíme jichügü, ladüga madíseelime jasálbarun.

²⁹ Rúlumuti gíñe jémpulu le joun.

—Aríja jumoún tídbu ígo, o furúmieguarügü tídbu wéwe. ³⁰ Dan le jaríjin laboúchun tubána, subúdi jumúti luágu yaráfaali lan lidáani lubáchouga. ³¹ Dánme gíñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² ‘Ninárün jáu luágu lagúnrinchawagúba lan sun ubúrugu le Jerusalén lubáragiñe joúwegun gürígia ja lánina dan le. ³³ Lagúmuchaguba siélu lúma uboú, ánjein nerérun, ladúraruba lun sun dan.

³⁴ ‘Toúnigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri

luágu buri cátei lánina ibágari le, márügündün lámugaün wéyu nagíribudagüle uboúagun lídan magáradajan jumá,³⁵ quei ában sádara to adárurutu. Ladüga ítara lúba liábin wéyu ligía jawágun sun ja aganoúbaña lídan sun fulásu ya uboúagu.³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibijin ubáfu lun jawánduni sún buri cátei le lúnbei lasúseredun, lun giñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, áriebu, ábaja lídin erédera luágu wübü le Olívos. ³⁸ Ábaja chülgügiñe jamá gürígia témpulurugun ságü bináafin lun jagáambuni.

22

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíptona, máfaragun lumútiña jígirama Israélitagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibídiñouna joun gürígia, ladüga janúfude jaweí.

³ Ábati lagáñeiruni Máfia larítagun Júdas Iscarióte, le ában jádaangiñe láni Jesúsu dúusu apóstolugu, ⁴ ába lídin adüga darádu jáma jábutigu jafádiriñegu juríu jáma jábutigu tisúdaaraná témpulu lun lederegeruni Jesúsu joun. ⁵ Ába jagúndaaragun, ába jaríñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan lederegeruni joun dánme le úa jamá gürígia.

Lagúmujoún leígin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachülrün fédu le ídaanbei teigúa fein magánatu ísi, ní lubei giñe ladágarawagüdüwa mudún le lánina fédu. ⁸ Ába laríñagun Jesúsu lun Pédro lúma Juan.

—Jeíba aráanserei eíginí le lánina fédu.

⁹ Ába jálügündüni.

—¿Jalíagi babúseera waráanseruni?

¹⁰ Laríñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülfü tídoun muna to ñíjin lumúti lebélura. ¹¹ Jaríñagame lun tabúreme muna. “Laríñajare Maésturu. ¿Jigón rúmu to ní lubei gayára lan neíginí eíginí le lánina fédu jáu náni disípulugu?” ¹² Ábame

larúfudun ában rúmu weíritu jun toúgiñegua múna, aráanseñu tíñia, jaráansereime eígini ñi.

¹³ Ába joúdin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñi.

¹⁴ Dan le lachülürünbei óra, ába lañúurun Jesúsu jáu láni disípulugu luágu dábula,¹⁵ ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe noúnwen! ¹⁶ Ladüga naríñajare jun luágu meígindüguya náali lan eígini lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanügün ában wéru táu diweín lújaburugu, ába leteíngiruni Búngiu, laríñaga.

—Barüjumei le, fánreingua jumeí jídaangua, ¹⁸ naríñajare jun luágu mátundüguyaadina lan diweín daríme liábin larúeijan Búngiu.

¹⁹ Lárigiñe, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, ariñageina.

—Núgubu le, le lúnbei ledéregerún juágu. Lúmagiñe guetó, adüga jumeí le, jarítaguagüleme nuágu.

²⁰ Ítara meme gíñe, lárigiñe jeígin, ába lanügüni wéru táu diweín, ába laríñagun.

—Niján nítá le lúnbei láwiyurun lídaangiñe núgubu juágu, lun lañúurun iséri darádu.

²¹ 'Niján wügüri le lúnbei ledéregerunina wáma ya luágu dábula, ²² luáguñadina üma le lúnbei nanügüni, áu le Wügüri Garaüwarügüti, áni ƒugiábutia wügüri le lúnbei lalúgurunina!

²³ Ábati jagúmeserun álögüdagua jádaangua cába lánfuna alúgurei.

Ladímujoún luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá. ²⁵ Ába laríñagun Jesúsu joun.

—Lidan arúejani lánina uboú le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawaguáti jawágu luágu wügüriña jamá ja gadügatiña fuleísei joun gürígia. ²⁶ Ánjein lídan narúeijan, mítaraanti, lubáragiñe líra, le weírigutimaabei le tímatimaati jídan lúnti lanáangun lúngua quei le ünabutimaabei, le agúmadijabei, lúnti ítara lan quei le esériwijabei. ²⁷ ¿Cági weírigutimaabei, le añúurubei eiga luágu dábula, ódi le esériwijabei? ¿Ma le añúurubei luágu dábula? Áni áu, ítara níñia jídan quei le esériwijabei.

²⁸ 'Jugúya úarabañája núma lídan noúchawagun, ²⁹ ligía níchugunbadün lun jarúeijan quei líchugunina Núguchi lun narúeijan. ³⁰ Jeígiba, gurá jugúyame luágu nidábulan yágüta

siélu lídan narúeijan, ñurú jugúyame luágu buri lála urúei lun jagúseragüdüniña jadügawagun dúusu lirájüñü Israél.

*Laríñaguni Jesúsu luágu leyéedaguba lan Pédro láu
(Mt 26.31-35; Mr 14.27-31; Jn 13.36-38)*

³¹ Aríñagati gíñe Wabúreme Jesúsu.

—Simón, Simón, amúriaajaali Máfia üma lúma Búngiu lun gayáraabei lan loúchagunün quei lawánijoún türigu,
³² ibíja lumúti, áni ayúmuraguaadina buágu lun Búngiu lun mefériderun báani bafíñen nuágu lídaanme óra ligía. Áni dánme le bagíribudun nun, rúba dügüdaguaü joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan noúnwen búma.

³⁴ Laríñaga Jesúsu lun.

—Pédro, ugúñe méme, beyéedaguba náu ürüwa weíyaasu lubáragiñe layúgurujan gáyu, baríñaguba luágu ibídiñe nan bun.

Layárafadun lórate oúchawaguni

³⁵ Ábati laríñagun Jesúsu joun.

—Dan le noújanbalün maságüteiga, ni láu lágei seínsu, ni geídi, ¿ñíñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságüteti, barüloun, barü ligíame lágei seínsu, le mefeínteti, alúguraloún labíte lun lagáñijan lefeínte, ladüga wuríbati dan le. ³⁷ Naríñajare jun luágu lagúncularuba lan le taríñagubei Lerérun Búngiu nuágu. “Ába jabájüdüni jádan wuríbatiña.” Sun le bürüwañubei nuágu lagúncularuña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buítí.

Layúmuragun Jesúsu Getsemaní

(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wübü le Olivos quei ligáburiñaja, ába joúdin láni disípulu lúma. ⁴⁰ Dan le jachülürün lídan fulásu ligía, ába laríñagun joun.

—Jayúmuragua, mefériderun jumámugei jafíñen nuágu.

⁴¹ Ába ladísedun Jesúsu jaweí murúsunraü, ába lájuduragun ayúmuragua lun Búngiu, ⁴² laríñaga.

—Núguchi, ánjabu busén, séfu bána lueí oúnwenbun asúfuriruni le lúnbei nasúfurirun, madügüwalá le nabúseerubei, le la babúseerubei adügüwa.

⁴³ Ábati liábin ában ánjeli siélugiñe lun líchugun érei lun.
⁴⁴ Dan létilma laweíridun ligárigu, ligíatima layúmuragun láu érei, lédedejati lísüga lueí camá jamuga oúnwenbun lédedejan jítäu, műarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni. ⁴⁶ Ábati laríñagun joun.

—¿Ca uágu jarúmuga? Sarájuma, jayúmuragua, mefériderun jumámugei jafíñen nuágu.

Janügünü Jesúsu adáüra

(Mt 26.47-56; Mr 14.43-50; Jn 18.2-11)

⁴⁷ Nígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni. ⁴⁸ Ábati laríñagun Jesúsu lun.

—Júdas, ¿láu ában chúuti balúgurana, áu le Wügüri Garaüwarügti?

⁴⁹ Játí lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táo efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. ⁵¹ Ába laríñagun Jesúsu.

—Ígira jumáña, buídürügaali.

Ábati lagúruruni Jesúsu larígei músu ligía, ába lareídagun. ⁵² Ába laríñagun joun jábutigu fádirigu, joun wügüriña weírigutiña lídan jafíñen juríu, lúma joun jábutigu tisúdaaran témpulu, ja ñübinbaña anügei.

—¿Jiábin nuágu táo efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadügüni jugúndan náu, óraali lun lagúmadijan le labúremebei lubúriga.

Lariñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati járugüdüni Jesúsu, ába janügünü lúbiñoun fádiri le íñutimaabei, ábati lafálaruni Pédro disegiñe. ⁵⁵ Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan. ⁵⁶ Queíti taríjini ában músu ñun larügürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

⁵⁷ Ába leyéedagun Pédro, laríñaga.

—Ibídiñeti wügüri ligía nun.

⁵⁸ Murúsun lueígiñe, ábaya laríjini ában, ába laríñagun.

—Jánigu gíñe amürü.

Ába laríñagun Pédro.

—Máma jánigu áu.

⁵⁹ Queí buri ában óra lárigiñe, ábaya laríñagun ában.

—Inárüni luágú lúmañajañein lan wügúri le ladüga Galiléana giñe.

⁶⁰ Ábati laríñagun Pédro.

—Ibídíñeti nun ca lan uágu badímureja.

Lidan meme óra ligía, dan le nijángua lan Pédro adímureja, ába layúgurujan ában gáyu. ⁶¹ Ába ladígiragun Wabúreme Jesúsu aríja luágún Pédro, ába larítagun Pédro luágú lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu ürüwa weíyaasu.” ⁶² Ábati láfuridun Pédro, ába layájun láu igárigu.

Jéjerajan láu Jesúsu

(Mt 26.67-68; Mr 14.65)

⁶³ Ja wügúriña ja oúnigirubalin Jesúsu, ába jéjerajan láu, bei jameí. ⁶⁴ Ába jagüraguni lágu, ába jagáyuajan ligíbuagun, aríñageina jagía.

—¡Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába joúndaragun wügúriña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janügüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amürusan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágú áンja lan, mafíñebadün nun, ⁶⁸ áńjaün nálügüdagua, moúnabun jubádina, mígiragüdün jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügúri Garaúwarügütí, lueígiñe loúnwenren Búngiu le Súnti Gabáfuti.

⁷⁰ Ábati jálugüduni súngubei.

—¿Amürü lubeíti Liraübei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto

(Mt 27.1-2, 11-14; Mr 15.1-5; Jn 18.28-38)

¹ Ábatí jásaarun sun líñun-ägei lúrudu, ába janügünü Jesúsu ligíbugiñoun Piláto, ² ába jagúmeserun íchiga lidúnrun, jaríñaga.

—Darí wamaali wügüri le achágaraaguágüdaña gürígia, laríñajare luágu moun lan lun wafáyeijan seínsu lun urúei Rómana, aríñagati gíñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

³ Ábatí laríñagun Piláto lun.

—¿Amürusan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábatí laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügüri le.

⁵ Ábatima jaríñagun jére.

—Lachágaraaguágüdüñanu sun gürígia Judéana láu ligáburi larúfudajan, lagúmesera Galiléagiñe, niján mémegua adügei chüluñ ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügündajan áanjein Galiléana lubeí wügüri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladüga ñíñein Heródes Jerusalén lídan dan ligía.

⁸ Ába lagúndaaragun Heródes dan le laríjini Jesúsu, ladüga agáambañajaali lan luágu áni lüja labúseerun laríjini, agúrabatiti laríjin ladügün ában miláguru. ⁹ Ába lálügündaguni luágu sarágu cátei, moúnabunti Jesúsu ni cáta. ¹⁰ Ñíñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun.

¹¹ Ábatí loúseruni Heródes jáu lisúdaaranigu quei ni cáta, éjeraja jagía láu. Ábatí jadáüraguagüduni táu anáanguni wéndegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasádirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábatí loúndaruniña Piláto jábutigu fádirigu jáma lúrudugu, jáma buri ámu gürígia, ¹⁴ ába laríñagun joun.

—Jugúya anügübalin wügüri le nun, jaríñaga luágu chagáguagüda lániña gürígia, álügündagua náali jígíbugiñe,

áni aríja jumúti luágu madári nan ni murúsun dúru luágu lídaangiñe le jaríñagubei luágu. ¹⁵ Madáriti gíñe Heródes lidúnrun, giríbugüdalá woun. Aríja jumáali luágu madügün lan ni cáta le lúnti lafarún jilágubei lueígiñe, ¹⁶ nabeíchagüdali lubeíti, lárigiñeme, ábame nígiragüduni.

¹⁷ Gagáburititi Piláto lúnja lígiragüdün ában adaürüti fédurugu, ¹⁸ ába jagúarajan súngubei lídan ában.

—¡Áfarabeí le! ¡Ígiragüdabeí Barabás!

¹⁹ Barabás ligía, ladaürüña lueígiñe ligía lan ában jádaangiñe ja iñúragubaña joúngua luágu gumádi, lúma lueígiñe láfarajan.

²⁰ Busénti yebe Piláto lígiragüduni Jesúsu, ábaya ladímurejan joun, ²¹ ligiatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laríñagun Piláto joun luágu lürüwan weíyaasu.

—¿Cáti wuríbati ladügübei? Madárítina ni cáta le lúnti lafarún jilágubei lueígiñe. Nabeíchagüdali, ábame nígiragüduni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei. ²⁴ Ábagubeíti ladügüni Piláto le jabúseerubei, ²⁵ ábati lígiragüduni wügüri le jabúseerubei, le adaürübei lueígiñe iñúraguni lúma áfarajani, ábati lederegeruni Jesúsu joun lun jadügüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le joúdiña lan láu Jesúsu lun ládarawagún luágu gurúwa, ába járugüdün ában wügüri Cirénena gíriti Simón, liábiña áraabugiñe, ába janügagüduni gurúwa lun, ába lídin láu lárigi lárigi Jesúsu.

²⁷ Sarágu jáña gürígia afálaruti jáma sarágu würiña jádan ayájuajeina, agúarajeina láu íruni luágu. ²⁸ Ába ladígiragun Jesúsu jawágun, ába laríñagun joun.

—Würiña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ ladüga liábinba buri wéyu dánme le laríñawagún. “Fuleíseiwatiña ja siñábei jagáraüdun jáma gíñe ja marájüñüjañábaña, jáma ja mättagüdajanbaña.” ³⁰ Ábameti jaríñagun gürígia lun wübü íñuti. “Áburujabá wawágun”, aríñaga jagíame lun wübü ünabuti. “Darúguabá wáu.” ³¹ Ladüga ánjein adügajabalín sun le láu tídibu wéwe le düdüğili, ¿cábagi madügün jamá láu le mábeijali? (Ítara líña ladímurejan luoúgua, le madúnrunbei, lúma jawágu ja gadúnrunbaña.)

³² Barütiña gíñe biáma gadúnruntiña lun jafarún úara lúma Jesúsu. ³³ Dan le jachülürünbei lídoun fulásu le gíríbei Lufúlasun

Lábu Ichügü, ába jádaraguni Jesúsu luágú gurúwa jáma gíñe biáma wuríbatiña jagía, ában lueígíñe loúnwenren, ában lueígíñe lubáüna. ³⁴ Dánti le añája lan ádaraguei Jesúsu luágú gurúwa, ába laríñagun.

—Núguchi, ferúduna báña ladüga ibídiñeti joun ca lan jadügübei.

Ába jájurerun súdaara ubú nuruni lun jaríjin cába lan un jádaangiñe terédera lanáangun Jesúsu. ³⁵ Níñanu gürígia aríagua, níñanu gíñe lúrudugu jéjerajaña láu, jariñaga.

—Sálbati ámu, sálbagualá gíñeti língua, áanjein inárüni lubeí luágú ligía lan Crístubei le lanúadirubei Búngiu lun lasálbaruniña gürígia.

³⁶ Éjerajatiña gíñe súdaara láu, láu jayárafadun íchiga tagübüri diweín lun lun látunun, ³⁷ jaríñaga buri lun.

—Áanjein Jarúeite bubeí juríu, sálbaguabá búngua.

³⁸ Níñeinti ában abürüjoúni loúgiñe lichügü, laríñajare ñi. “Niján Jarúeite Juríu.”

³⁹ Ába lanábuni ában jádaangiñe wuríbatiña ja dáwagubaña luágú gurúwa ñi Jesúsu, laríñaga.

—Áanjein bugúya lubeí Crístubei, sálbaguabá búngua, sálba báwame.

⁴⁰ Ába ladeínjan le ában lun loúba, laríñaga lun.

—¿Manúfudetibusan lueí Búngiu, bugúya le lábugiñebi ában meme súfuri lúma? ⁴¹ Wagía, garíchativa lun wasúfurirun ladüga wafáyeijaña luágú wadüga, áanjeinti wügüri le, madügünti ni cáta wuríbati.

⁴² Ábati laríñagun.

—Jesúsu, barítaguame nuágú dánme le lagúmeserun barúeijan.

⁴³ Laríñaga Jesúsu lun.

—Ninárün báu luágú númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

⁴⁴ Amídirugu, ába labúrigadun sun fulásu darí ladaünrun ürüwa rábounwéyu. ⁴⁵ Ába labúrigadun wéyu, ába tajeíridagun tubélun témpulu tamídan túmagua. ⁴⁶ Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

⁴⁷ Dan le laríjinbalin jábuti súdaara Rómana le asúseredubei, ába ladímurejan weírigu luágú Búngiu, laríñaga.

—Inárüni, madúnrunti buga wügüri le.

⁴⁸ Sun gürígia ja níbaña, ja aríjubalin le asúseredubei, ába joúdin nígiñe, áfarajeina jameí janíguagu, le jagárigu. ⁴⁹ Ánjaña

sun lumádagu Jesúsu jáma giñe würíña ja ñübinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

50 Ñíñein ában wügüri gíriti José, lídaangiñeti fulásu le gíribei Arimatéa, le jafúlasun juríu. Buítí ligáburi wügüri ligía, richáguati ligibugiñe Búngiu, lídaañein líñun-ágei lúrudu le jáni juríu. 51 Agúrabañu líñein larúeijan Búngiu, magúndaanti lubeíti láu cátei le ladügübei líñun-ágei lúrudu láu Jesúsu. 52 Ábatí lídin lúmoun Piláto, ába lamúriajani lúgubu Jesúsu lúma. 53 Lárigiñe laráriragüduni lueígiñe gurúwa, ába loúburaguni táu ában gamísá, ába lácharuni lídoun ában umúajaü achigíti luágu ában dübü le ñí lubei úagili lan ni ában abunúti. 54 Wándaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

55 Ába jafálaruni würíña já meja ñübinbaña lúma Jesúsu Galiléagiñe José, aríja jameí umúajaü, aríja jameí buídu ída líñia lan líchugún lúgubu Jesúsu lídoun umúajaü. 56 Dan le jagíribudunbei jábiñoun, ába jaráanseruni ibíñei buri le íchugúbei jawágu jiláaña, ábatí jeméraagun lídan wéyu le eméraaguagülei quei laríñaguni lilúrudun Moisés.

24

Lásaarun Jesúsu lídaangiñe oúweni

(Mt 28.1-10; Mr 16.1-8; Jn 20.1-10)

1 Wéyu dimáasu, ába jagíribudun würíña luágun umúajaü, bináafingua, barüina jameí ibíñei le jaráanserubei jámagua. 2 Dan le jachülürünbei, mámaali lídan lubára dübü le lidaü umúajaü. 3 Ába jebélurun lídoun umúajaü ligía, madári jamúti lúgubu Wabúreme Jesúsu ñi. 4 Súnti añája lan ñí arítagua jageí lánfuna, ligía jaríjin bián wügüriña rára jarúgabu táu anáanguni mirítu. 5 Queíti jelemuchun láu jagíbu ünabun, buin láu anúfudei, ába jaríñagun wügüriña jagía joun.

—¿Ca uágu jáluajei le wínwanbei jádan jiláaña? 6 Úati ya, saráali lídaangiñe oúweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügüri Garaüwarügüti, 7 luágu lederegerúaba lan jájaburugun gafígoountiña, ábame jádaraguni luágu gurúwa, ábame lásaarun lídaangiñe oúweni luágu lúrüwan wéyu.

8 Ábatí jarítagun luágu dimúrei le laríñagubei Jesúsu.

9 Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. 10 Ja anügübalin ugánu le joun apóstolugu, María Magdaléna, Juána, María to lúguchi Jacóbo, jáma ja jíbiri

würíña. ¹¹ Dan le jaríñagunbalin buri cátei le joun apóstolugu, ába janügünü quei lílülün áu, mafíñetiña joun.

¹² Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísá rügüñoun ñi, úaali úgubu. Ába lídin lúbiñoun láu luweírin anígi láu cátei le laríjubei.

*Luágú üma lun Emaúsun
(Mr 16.12-13)*

¹³ Luágú méme wéyu ligía, joúdiña biáma jádaangiñe lánigu Jesúsu lídoun ában liraüraü fulásu gíriti Emaús, ürüwa óra eíbuguni Jerusaléngiñe, ¹⁴ adímurejeina jáña luágú sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágú Jesúsu lan. ¹⁷ Ábatí laríñagun joun.

—¿Cásan le uágubei jadímureja, sun eíbugeina jumá?

¹⁸ Ába jaráramagun láu íruni jagíbuagu, ába loúnabun ában jádaangiñe, gíriti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amürü rügüñein jádaangiñe ja ñibaña ibídiñejabu lun?

¹⁹ Ábatí laríñagun joun.

—¿Cági asúseredubei?

Jariñaga lun.

—Luáguti Jesúsu le Nazarétna, ában meja proféta láu ubáfu luágú le ladügübei lúma luágú lerérun ligíbugiñe Búngiu lúma jagíbugiñe sun gürígia. ²⁰ Ábatí jederegeruni jábutigu wafáfidiñegu jáma walúrudungu lun siádiwa lan lun oúweni lúma lun ládarawagún luágú gurúwa. ²¹ Rúwamutí yebe wafíñen luágú ligíaba lan eséfurei linásiñun Israél. Ürüwa wéyu guetó lueigíñe lasúseredun cátei le. ²² Láu sun líra, weírigüda jamáali jádaangiñe würíña ja wámabaña wanígi láu joúdin luágun umúajaü lubá buga larúgan, ²³ queíti madári jamáni lúgubu ñi, ába jayábin abájüdagua woun luágú aríja jamá ánjeligu ñi, aríñaga jamá joun luágú wínwan lan Jesúsu. ²⁴ Ába joúdin jádaangiñe wíbirigu aríjei umúajaü, ába jadáriruni ítara quei jaríñaguni würíña jagía, maríjin jamúti Jesúsu.

²⁵ Ábatí laríñagun Jesúsu joun.

—¡Loúguati gíñe gunfaráanda jumá, lüti gíñe lubá jafíñerun luágú lé meja jaríñagubei profétagu! ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

²⁷ Ábati lagúmeserun afúnraanguágüei sun le taríñagubei Lerérunt Búngiu luágu joun, lagúmesera túmagiñe buri lilíburun Moisés túmoun sun jalíburun profétagu.

²⁸ Dan le jachülürün lídoun fulásu le ñíjinbaña lubeí, ába ladügün Jesúsu camá jamuga lasígiraali leíbugun. ²⁹ Ába jéredun luágu lun leréderun jáma, jaríñaga lun.

—Reídeibá wáma, ladüga ladáruduña áni gúñemémeeli.

Ábati lebélurun Jesúsu lun leréderun jáma. ³⁰ Dánti le ñurújali jáma luágu dábula, ába lanügúnun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jaríñagun jámagua.

—¿Ma sandítiba tásüdün wanígi le wagúndan dan le adímurejeina lubeí woun luágu üma, aríñagaleí tíla Lerérunt Búngiu woun?

³³ Ábati magúrabajaanjaña lan, ába járugüdün üma lun jagíribudun ubúrugun Jerusalén le ñí lubei jadáriña únsu apóstolugu oúndaragu jáma gíñe jíbiri lánigu. ³⁴ Ába jaríñagun ja oúndaraguñubaña ñí joun.

—Inárüni luágu saráali lan Wabúreme Jesúsu lídaangiñe oúweni lúnya labágardun, aríja láali Simón.

³⁵ Ábati jabájüdaguni bián wügüriña jagía le asúseredubei joun luágu üma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulu
(Mt 28.16-20; Mr 16.14-18; Jn 20.19-23)

³⁶ Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítagun luágu pántu lan jaríjubei. ³⁸ Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubeí liloúguan afíñeni le tídan janígi? ³⁹ Aríja jumeí nújabu lúma nugúdi, áu méme le. Gurújumana, pántu, mágürögüti, mábu ligía, anáti áu.

⁴⁰ Dan laríñaguni líra, ába larúfuduni lújabu lúma lugúdi joun. ⁴¹ Queíti mafíñen mémegiña lan ladüga ugúndani lúma luweírin anígi le jawágubei, ába laríñagun Jesúsu joun.

—¿Níjeinsan eíginí júma ya?

⁴² Ába jíchugun murúsun úduraü süti lun lúma síruudu, ⁴³ ába lanügúni, ába leíginí jagíbugiñe sun jagía. ⁴⁴ Lárigiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürüwañubei nuágu tídan lilíburun Moisés, tídan jalíburun profétagu, lúma tídan líburu to gíriboun Sálmos.

⁴⁵ Ábati gunfaráandagüda lánun Lerérun Búngiu joun, ⁴⁶ ába laríñagun joun.

—Bürüwañu líña luágu lúnti lan loúnwen Crístu, ába lánme lásaarun lídaangiñe oúweni lúnya labágaridun luágu lürüwan wéyu, ⁴⁷ lúnti lan gíñe lapúrichijoún lídan líri joun sun gürígia uboúagu lun jasáansiruni joúserun lun ferúdunawa lan jafigoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Noúnajabeí Sífiri Sándu, le uágubei laríñaga Núguchi Búngiu jun, ítara líña lubeíti, reídei jumá ya ubúrugu Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun

(*Mr 16.19-20*)

⁵⁰ Ábati lanügüniña Jesúsu boúgudin lueí ubúrugu chülű Betánia, ába liñúruni lújabu, ába ln ferúdunawa laabíniruniña. ⁵¹ Dánti labíniruniña, ába lamúdeirun jaweí, ába lanügüniwa siélun. ⁵² Lárigiñe jájuduragun lun, ába jagíribudun járgoún ubúrugun Jerusalén, ¡ma jagúndan! ⁵³ Súnwandánti témpulurugúñanu lan íchiga uweíriguni lun Búngiu.

UGÁNU BUÍTI LE LABÜRÜJABEI JUAN LUÁGU JESÚSU

Liábigüle Búngiu Irájü uboúagun queísi Wügüri Garaüwariügüti

¹ Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía. ² Lidan lubeíti lagúmeserunbei sun cátei, lúmañein Búngiu Úguchili Búngiu Irájü. ³ Lidaangiñe ladügei Búngiu sun cátei, úati ni cáta adügüti le máma ladüga. ⁴ Ligía íchugubei ibágari lun sun cátei, áni ligía arúgoungadagüdübei jáu gürígia. ⁵ Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügüri loúnajan Búngiu, gíriti Juan, le ñübinbei lun líchugun fe luágu Búngiu Irájü le lúnbei liábin uboúagun lun larúgoungadágüdü játu gürígia. ⁷ Juan, lúnti líchugun fe luágu, lun gayáraabei lan jafíñerun sun gürígia luágu cátei le lúnbei laríñaguni dánme le liábin. ⁸ Máma Juan le lúnbei larúgoungadágüdü játu gürígia, ában wügüri ligía le oúnajoúbei lun ladímurejaba lan luágu. ⁹ Búngiu Irájü, le queísigubeirügübei ában lámpu le tímatimaati lun larúgoungadágüdü játu sun gürígia, lachülürüña meja uboúagun lídan dan ligía.

¹⁰ Ñübinti uboúagun, áni láu sun lidaangiñe lan ladügei Búngiu uboú, manügün jamúti lirajüñü uboú quei Búngiu Irájü. ¹¹ Lageíroun yebe liábin, merésibirun jamúti lílana lageíra. ¹² Láu sun líra, añájein erésibiruti, ába jafíñerun luágu, ába líchugun ubáfu joun lun lirajüñubaña lan Búngiu. ¹³ Mítaraantiñatia quei jasáanigu agübürigu ja gürígiabaña, ja agüriajoútiña quei furúmierügü gürígia o láu lan lugúndan ában wügüri, lirajüñü Búngiu jagía.

¹⁴ Ligírati meja le Dimúreibe, le méme Búngiu Irájübei, ñübinti lun ítara lúba lan quei furúmierügü gürígia, ába laganoúniwa wádan. Aríja wamúti luweírigun, uweíriguni le ladünabe Liraü Búngiu le ábanrügüti, le buínbei láu areíni lúma inárüni. ¹⁵ Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja üma, weírigutima lan sügü náu, ladüga níjeinjali lán meja lubáragiñebi nagüriajoún.

¹⁶ Sun wagía ibíjaadiwa sarágu abíniruni lidaangiñe luweírin lirísin. ¹⁷ Lúmagiñe Moisés lerésibirúa lilúrudun Búngiu, ángeinti ínsiñeni lúma inárüni, lidaangiñe Jesucristu liábin. ¹⁸ Úagili ni

ában aríjiti Búngiu, Liraü le ábanrugübei le yaráfabei tun lanígi, ligía arúfudubalin woun ída líña lan Búngiu.

Ladímurejan Juan le abásteragüdajabei luágu lufúleisein Jesu-crístu

(Mt 3.11-12; Mr 1.7-8; Lc 3.15-17)

¹⁹ Ába joúnajan juríu ja Jerusalénnna fádirigu jáma wügüriña jádaangiñe ladügawagun Leví álögüdei Juan cáteiñein lan.

²⁰ Ába laríñagun joun furáangu.

—Máma áu Crístu.

²¹ Ábayati jálögüdüni.

—¿Cátabuti? ¿Proféta Elías amürü?

Laríñaga joun.

—Uá, máma áu.

Ábaya jaríñagun lun.

—¿Amürü proféta ligíra le lúnbei liábin?

Ába laríñagun joun.

—Máma gíñe áu.

²² Ábati jaríñagun lun.

—¿Cátabuti? Mósutia wanügüni boúnabagüle joun ja oúnajabaliwa. ¿Cági gayáraabei baríñagun woun buoúgua?

²³ Ába loúnabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumoún janígi lubá liábin Wabúreme queísi ladárarúniwa üma surúti.”

²⁴ Ja ñüdünbaña adímureja lúma Juan, lánigu jadámurin fariséogu, ²⁵ ábati jaríñagun lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdaja?

²⁶ Ába laríñagun joun.

—Áu, láu dúna nabásteragüdaja, níjein ában ibídiñeti jun jagánagua, ²⁷ liábinba nárigiñe, wügüri ligía, madünatina ni lun jamúga nafáragaduni tagürüga ligeídin.

²⁸ Sun cátei le, lídan fulásu le gíribei Betábara lasúsereda, luágu oúbaü le ñígíñe lubeí láfuara wéyu libítí dúna Jordán, le ñí lubei labásteragüdaja Juan.

Wügüri le loúnajabei Búngiu lun loúnwen luágu jafígoun gürígia

²⁹ Larúgan, ába laríjin Juan liábin Jesúsu ayárafadeina lun, ába laríñagun joun lánigu.

—Niján le loúnajabei Búngiu lun loúnwen luágu jafígoun gürígia queísi meja lafarúniwa mudún lídan dan ligíra luágu jafígoun gürígia. ³⁰ Luáguñaja nadímureja dan le naríñagunbei. “Liábinba ában wügüri nárigiñe le weíriguti sügü náu, ladüga

níjeinjali lán meja lubáragiñe nagüriaajoún.”³¹ Ni áu, ibídiñetí meja wügüri ligía nun, abásteragüdajádina láu dúna lun jasúbudiruni Israelítagu.

³² Aríñagati gíñe Juan.

—Aríja numúti Sífiri Sándu camá ában únjun, larárirun siélugiñe, ába laráramagun lábulugu.³³ Ibídiñetí yebe nun cátei lan wügüri ligía, aríñagarügaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu ítaga wügüri, ligía wügüri ligía le abásteragüdajabeí láu Sífiri Sándu.”³⁴ Aríja náaliti, geféen áu luágua ligía lan Liraübei Búngiu.

Furúmiñetiña láni Jesúsu disípulugu

³⁵ Larúgan, ñíñeinya Juan jáma biáma jádaangiñe lánigu.

³⁶ Dan le laríjinbei Juan lásügürün Jesúsu, ába laríñagun.

—Niján wügüri le lanúadirubei Búngiu lun lagídaruni jafígoun gürígia.

³⁷ Ába jagáambuni biáma lánigu Juan laríñagun ítara, ába jafálaruni Jesúsu.³⁸ Ábati ladígiragun Jesúsu láridoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigoúgu jaríjei.

Ába joúdin, ába jaríjini jalía lan lagánawa, ába jásügürüni líbiri wéyu ligía lúma, ladüga queíburijali lan gádürü rábounwéyu óra ligía.

⁴⁰ Andrés, le lamúlen Simón Pédro, ligía ában jádaangiñe biáma ja agáambubalin le laríñagubei Juan ába jafálaruni Jesúsu.

⁴¹ Lubáragiñe ámu cátei, ába lídin Andrés álugei Simón Pédro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanügüni Andrés Simón le ñíjin lubeí Jesúsu, ába laríaguni Jesúsu Simón ligíbuagun, ába laríñagun lun.

—Simón, amürü le liraü Jonás, guetó Céfasba bíri, míni lan íri le. Pédro, o dübü.

Lanúadiruniña Jesúsu Felípe lúma Natanaél lun lánime disípulugu

⁴³ Larúgan, ába larítagun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

⁴⁴ Felípe ligía, Betsáidana le ñí lubei gíñe lagánawa Andrés láu sun Pédro. ⁴⁵ Ábati lídin Felípe áluajei Natanaél, ába laríñagun lun.

—Aríja wamáali wügüri le uágubei labürüja Moisés tídan líburu to lánina lilúrudun Búngiu, le gíñe uágubei jabürüja profétagu—Jesúsu le liraü José le Nazarétna.

⁴⁶ Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

⁴⁷ Dan le laríjin Jesúsu layárafadun Natanaél, ába laríñagun.

—Nitén ában ladügawagun Israél le tímataati, úati yéguaü lídan.

⁴⁸ Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹ Ábati laríñagun Natanaél lun.

—Maésturu, amürü Liraübei Búngiu, amürü jarúeitebei Israelítagu.

⁵⁰ Ába laríñagun Jesúsu lun.

—¿Baffíñerunbei nun ladügarügü naríñagun bun luágu aríja nánibü tábugiñe tídibu ígo? Baríjubati cátei weínamatimáati lueí le.

⁵¹ Aríñagati gíñe Jesúsu.

—Ninárün jáu, luágu jaríjubei lan siélu junréñu, añájame láni Búngiu ánjeligu aweínja lúma arárija noúgiñe, áu le Wügüri Garaüwarügüti.

2

Ában maríei lídan fulásu le gíríbei Caná, le lídaanbei Galiléa

¹ Ürüwa wéyu lárigiñe, ñíñein ában maríei lídan ában fulásu gíriti Caná, le lídaanbei Galiléa. Ñíñounti lúguchu Jesúsu, ² amísurajoúati gíñeti Jesúsu jáu sun láni disípulugu lídoun maríei ligía. ³ Ába tagúmuchun diweín, ába taríñagun lúguchu Jesúsu lun.

—Gumújatia diweín.

⁴ Ába laríñagun Jesúsu tun.

—¿Cági uágu baríñagei le nun, núguchu? Machüllügili dan lun nídejan lídan cátei le.

⁵ Ába taríñagun joun ja éjejeragubaña.

—Adüga jumeí sun le laríñagunbei jun.

⁶ Ñíñoun sísi dináa láutu dübü tíbe to jayúsuruboun juríu lun jachíbagun joúngua según jagáburi. Ságü ában dináa tugúya, barütu wein o darándi gálun dúna. ⁷ Ába laríñagun Jesúsu joun éjejeragutiña.

—Buíngüda jumoún sun dináa to láu dúna.

Ába jabuínchagüdünun buídu buídu. ⁸ Ábatí laríñagun Jesúsu joun.

—Dabú jumati murúsun tídaangiñe, ábame janügüni lun le aríjubei láu fédu.

Ába jadügüni ítara. ⁹ Ábatí loúchuni le aríjubei láu fédu dúna ligía salíguia lun diweínme, ibídiñoun lun jalíagiñeti lan, ja rügüñanu éjejeragubaña asúbudirei, ladüga jagía lan adáburubalin dúna. Ábatí lagúarun le aríjubei láu fédu lun le amárieidubei, ¹⁰ ába laríñagun lun.

—Sun gürígia seríwi jamútu tubuídun-ágei diweín furúmiñe, dánti le guráaña amísurajoútiña gíbe, ligía jójejeragun diweín to furúmieguarügü, áanjeinti amürü, ába bareídunun tubuídun-ágei diweín dari guetó baságaroun.

¹¹ Cátei le, le ladügübei Jesúsu lídan fulásu le gíribei Caná le lídaanbei Galiléa, ligía furúmiñetibeí miláguru le áubei larúfudei luweírigun, ába jafíñerun láni disípulugu luágu.

¹² Lárígüne cátei le, ába lídin lídoun fulásu le gíribei Caper-naúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

*Labúgaguniña Jesúsu alúgurajatiña témpulurugugiñe
(Mt 21.12-13; Mr 11.15-18; Lc 19.45-46)*

¹³ Ábatí lídin Jesúsu ubúrugu Jerusalén ladüga yaráfaali lan jafédun juríu le lánina pásqua. ¹⁴ Ñi ladáriraña ja alúgurajabaña bágasu, mudún, únjun, jáma buri ja ñúnbaña lídan jabára le ñi lubei jasáansija seínsu joun gürígia. Lídan tübürürü témpulu ladáriraña sun gürígia ja. ¹⁵ Dan le laríjinbalin Jesúsu cátei le, ába ladügün ában labejagüle láu gúrudu, ába labúgaguniña sun jagía lídaangiñe tübürürü témpulu jáu sun jalügüniña mudún jáma bágasu. Chagálei jaseínsun ja asáansijabaña seínsu, garábagualeí jadábulan. ¹⁶ Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manüga jumoún lúban Núguchi lun jalúguraagüleme!

¹⁷ Ábatí jarítagun láni disípulugu luágu laríñawagún tídan líburu to Lerérun Búngiu. “Jángitina táu búban táu sun nanígi.”

—¹⁸ Ábatí jaríñagun juríu lun.

—¿Ca miláguru barúfudubei woun lun wasúbudiruni áanjein garícha bubeí lun badügüni cátei le?

—¹⁹ Ába laríñagun Jesúsu joun.

—Güríngua jumoún témpulu to, naráramagüdáyaboun lídan ürüwa wéyu.

20 Ába jaríñagun juríu lun.

—Bián-wein-sísi irúmu janügün adügoun témpulu to, ¿lun biyáraaboun lan aráramagüda lídan ürüwa wéyu?

21 Lúgubu guánarü Jesúsu témpulu to uáguboun ladímureja joun. **22** Ligía dan lubeí le lásaarun lídaangiñe oúweni, ába jarítagun luágu dimúrei lé meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsiti le tídaanbei janígi gürígia lun Jesúsu

23 Dan le Jerusalén lubeí Jesúsu lídan fédu le lánina páscua, sarágu jáña afíñerutiña luágu dan jaríjinbaalin miláguru buri le ladáagubei lun larúfuduni luágu ligía lan Crístubei. **24** Ánjeinti Jesúsu, míchaagunti lúngua jájaburugun ladüga subúdi lániña cátañañanu lan. **25** Mabúseerunti laríñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

1 Ñíñein ában wügüri lánina jadámurin fariséogu, ába jádaangiñe jábutigu juríu, gíriti Nicodémo. **2** Ába lídin Nicodémo ayánuja lúma Jesúsu gúñoun, ába laríñagun lun.

—Maésturu, subúdi wamúti luágu Búngiu lan oúnajabalibu arúfudaja woun, ladüga úati ni ában lun gayára lan larúfuduni lubáfu láu miláguru quei badügüni ánjein úa lubeí Búngiu lúma.

3 Ába laríñagun Jesúsu lun.

—Ninárün báu luágu le lan magüriaajoúnwayati, siñáti lebélurun lídoun larúeijan Búngiu.

4 Ába laríñagun Nicodémo lun.

—¿Ída lubági lagüriaajoúnwaya ában wügüri weíriyaali? ¿Gayáraati funági lebélurunya turágeirugun lúguchu lúnya tagüriaian?

5 Ába laríñagun Jesúsu lun.

—Ninárün báu luágu le lan magüriaajoúnti lídaangiñe dúna lánina abásteruni, lúma lídaangiñe Sífiri Sándu, siñáti lebélurun lídoun larúeijan Búngiu. **6** Le agüriaajoúbei jádaangiñe agülbürigu ja gürígiabaña, ítara líña ligáburi queísi jagáburi gürígia, le agüriaajoúbei lídaangiñe Sífiri Sándu, ítara líña ligáburi queísi ligáburi Sífiri Sándu. **7** Maweíridalá banígi luágu naríñagun bun luágu lúnti lánya jagüriaajoúnwa sun gürígia. **8** Ítara quei láfurun garábali le ñígüne lumúti labúseera, agáambabei lamúri, ibídiñeti

bun jalíagiñe lan liábin ni jalíoun lan lídin, ítara jáña gíñe sun ja agüriajoúbaña lídaangiñe Sífiri Sándu.

⁹ Ábayati laríñagun Nicodémo lun.

—¿Ída lubásan cátei le?

¹⁰ Ába laríñagun Jesúsu lun.

—Ába oúnwenbun maésturu Israélna amürü, ¿ibídiñeti cátei le bun? ¹¹ Ninárün báu luágu le lan wasúbudirubei, ligía lan wadímurejabei, geféen wagía luágu le aríja wamáalibe, jugúya fariséogu, mafíñetün luágu le waríñagubei jun. ¹² Ángein mafíñen jubeí nun dan le nadímurejan jun luágu buri cátei le lánina uboú, ¿ída lubági jaffíñera luágu le lánina siélu?

¹³ 'Úagili ni ában amúdeiruti siélun, lárigiñe ába larárirun nígiñe lun gayára lan geféen lan luágu nueídügüya, áu le Wügüri Garaüwarügüti, le gábanbei siélu. ¹⁴ Ítara queí meja liñúrunun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara liñá giñe niñurúaba lan luágu gurúwa ¹⁵ lun sun lan le afíñeruti nuágu, mídin lámuga máfiougati, siélun lámuga lídin abágarida ában ibágari le magúmuchaditi.

Lísiñejabu Búngiu joun gürígia

¹⁶ 'Weíriti jínsiñe gürígia ja uboúagubaña lun Búngiu darí lun loúnajanina, áu le Liraü le ábanrügüti, lun noúnwen luágu jafígoun, lun sun lan ja afíñerutiña nuágu, mídin jamámuga máfiougati, siélun lámuga joúdin, abágarida ában ibágari le magúmuchaditi. ¹⁷ Moúnajan lumútina Búngiu áu le Liraü uboúagun lun níchugun jadúnrun gürígia, loúnajanina lun jasálbarun ja uboúagubaña nuágu.

¹⁸ 'Le afíñeti nuágu, áu le Liraü Búngiu, barü lumuti Búngiu quéisi madúnrunti, ángein le mafíñeti, gadúnrunjali ligíbugiñe Búngiu ladüga mafíñen lan nuágu, áu le Liraü Búngiu le ábanrügüti. ¹⁹ Ja mafíñebaña, gadúnrunjaña ligíbugiñe Búngiu ladüga dán buga le niábinbei uboúagun lun narúgoungagüdün láu, gúndaatimaatiña lílana ubóu láu lubúriga sügü láu larúgounga, ladüga cátei lan wuríbati jadáagubei. ²⁰ Sun ja adügübaña cátei wuríbati, iyéreeguti larúgounga joun, ába jadísedun lueí larúgounga ligía, lueí lasúbudirúniwa cátei wuríbati le jadügübei. ²¹ Ja adügübalin lugúndan Búngiu, jínsiñeti joun lun lídan jamá larúgounga lun larijíniwa luágu jarúma lan le jadügübei, láu lubáfu Búngiu.

Ladímurejaanya Juan luágu Jesúsu

²² Lárigiñe sun cátei le, ába lídin Jesúsu jáu láni disípulugu Judéoun, ába leréderun átiri dan ñi, abásteragüdaja. ²³ Ñíñein gíñe Juan abásteragüdaja lídan fulásu le gíribei Enón, yaráfa

lun Sálím, ladüga ñíñein lan sarágu dúna, ába buríti jayábingua gürígia, ába jabásterun. ²⁴ Lubáragiñe ladaürün Juan lasúsereda sun cátei le.

²⁵ Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni. ²⁶ Ábati joúdin aríñaga lun Juan.

—Aríjabásan maésturu, wügüri lé buga bümabei luágu óubaü le ñígiñe lubeí láfurida wéyu libítí dúna Jordán, le ligíra lé meja uágubei badímureja woun, guetó labásteragüdajaña gürígia áni jafálaruñeiti sun gürígia.

²⁷ Ába laríñagun Juan joun.

—Siñati níjein lan ni cáta lúma ni ában gürígia ánjein máma lubeí líchugun Búngiu lun. ²⁸ Agáamba jumúti lubeígia naríñagun jun furáangu luágu máma lan áu Crístubei, luágu áu lan ában le oúnajoúbei lubá. ²⁹ Lidan ában maríei, adári ligía táubei ladári. Léti lumáda adári, le ñíbei agáambei, oúnwenbun lugúndan láu lagáambuni ladímurejan. Ítara níña gíñeti, oúnwenbun nugúndan luágu Jesúsu, ³⁰ ligía lúnti laweírigudúntima, áu lun nünabuduntima.

Le ñübinbei siélugiñe

³¹ Jesúsu, le ñübinbei siélugiñe, joúgiñeñein sun gürígia. Áu, múaruguna áu, áni lérügüñein lánina uboú gunfaráanda nan. Ánjein le ñübinbei siélugiñe, joúgiñeñein sun gürígia, ³² luágu gíñe le aríja láalibeí lúma le agáamba láalibeí ladímureja, míbetiña afíñerutiña luágu le laríñagubei. ³³ Ánjeinti le afíñeruti, lachoúrurubei luágu inárüni lan le laríñagubei Búngiu, láu lafíñerun. ³⁴ Le loúnajabeí Búngiu, lerérun Búngiu ladímurejabeí, ladüga mébejati líchuguni Búngiu láni Espíritu lun. ³⁵ Jínsiñeti Liraü Búngiu lun, rúlaali gíñe sun cátei lújaburugun. ³⁶ Le afíñebeti luágu Liraü Búngiu, gabágariti le magúmuchaditi, ánjeinti le májabeí lafíñerun luágu Liraü Búngiu, mabágaribei líbe ibágari ligía áni mebélurunbei siélun, láburujarügüba ligáñi Búngiu luágu.

4

Jesúsu túma würi to Samariána

¹ Abi jagáambun fariséogu luágu gíbetima jamá lánigu Jesúsu sügü jáu lánigu Juan, áni gíbetima gürígia ñübintiña lun, lun jabásterun, ² láu sun máma lan Jesúsu abásteragüdajabaliña, lánigu abásteragüdajabaña. ³ Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴ Lidan weíyaasu ligía lásügürübatí loúbawagugiñe Samária.

⁵ Ítara liñáti lachülürün lídoun ában fulásu lídan Samária gíriti

Sícar, yaráfa lun múa lé meja lígirubei Jacób lun José le liraü, le ában jádaangiñe binádu wagübürigu. ⁶ Ñíñein wélu le únbei jagúara luwélun Jacób, queíti buchá lan luágú Jesúsu eíbuga, ába lañúurun láru wélu ligía. Queí buri amídirugu óra ligía. ⁷ Tiábijati ában würi Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸ Añángüratí buga láni disípulugu agáñija eígini ubúrugu.

⁹ Ábati taríñagun würi Samariána to lun Jesúsu.

—¿Ída liñági bamúriajanbei dúna núma, lárigiñe juríu ban, nugúya Samariána?

(Mínsiñeguatiñati juríu joúngua jáma Samariána.) ¹⁰ Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdibeí jamúga cátei lan le amúriajabei dúna búma, bamúriaajaña jamúga núma, ába jamúga níchugun ában luwúyeri dúna le gayáraati líchugun ibágari bun, bun.

¹¹ Ába taríñagun lun.

—Úagubeíti cába lan áu badábura dúna áni julíliti wélu le, ¿ída lubáti bíchuguni luwúyeri dúna ligía nun? ¹² Jacób, lé meja binádu wadügawagun, ígirubalin wélu le woun, guráti meja dúna lídaangiñe jáu sun lirajüñü jáma lilügüniña. ¿Weírigutibu funági sügü láu Jacób?

¹³ Ába laríñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ áanjein le átuti lídaangiñe dúna le níchugubei, mamágürabudundügüyaali, ladüga dúna le lúnbei níchuguni lun, géseséenbei lídan lun líchugun ibágari magúmuchaditi lun.

¹⁵ Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶ Ába laríñagun Jesúsu tun.

—Beíba oúgei búmari le úmabei bamárieida, ábame biábin.

¹⁷ Ába taríñagun lun.

—Mámaritina le maríeitina lúma.

Ábati laríñagun Jesúsu tun.

—Binárün láu baríñagun luágú mámari ban le maríeiti búma, ¹⁸ ladüga seíngüjáña wügüriña úmatiña bagánawa, áni mamárieiduntibu lúma wügüri le úmabei bagánawa guetó. Aríñagaadibu inárüni.

¹⁹ Dan tagáambubalin würi to cátei le, ába taríñagun lun.

—Afíñetina luágú proféta ban. ²⁰ Binádu wagübürigu ja Samariána, judúguatiña meja lun Búngiu ya luágú wübü lígita,

ánjein jugúa juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

21 Ába laríñagun Jesúsu tun.

—Afíñebá nun luágu nítebei lan dan lun jájuduragun lun Búngiu mídinga jugúa luágun wübü lígita, ni jídin Jerusalén.

22 Jugúa Samariána, ibídiñeti jun ca lan un jájuduragua, áanjein wagia, subúdi wamúti ca lan un wájuduragua ladüga lídaangiñe warásan wagia juríu liábin asálbaruni. **23** Lachülüruba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburi jájuduragun lun. lúnti jadügüni táo sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le lálujabeí Búngiu jámagiñe gürígia. **24** Espíritu Búngiu, ja ájuduragubaña lun, lúnti jadügüni láu sun janárün, mebéresenga láu cátei le arijúati.

25 Ába taríñagun lun.

—Subúditi nun luágu liábinba lan Mesías le gíribei Crístu, dánmeti liábin, lafúnraanguagüdübei sun cátei woun.

26 Ába laríñagun Jesúsu tun.

—Áu Mesías ligía.

27 Ligíati jachülürün láni disípulugu, ába laweíridun janígi láu jadáriruni Jesúsu adímureja túma ában würi, úati ni ában ganígití lun lálügüdaján ca lan tabúseerubei o ca lan uágu layánuja túma. **28** Ábati tígirunun würi tugúa tidína, ába tídin ubúrugu oúgaña gürígia, ába taríñagun joun.

29 —Jigoúgu jaríja ában eyéri aríñaguti sun cátei le adüga náalibei nun. ¿Mámadügü funásan ligía Crístubei?

30 Ábati joúdingua ubúrugugiñe lun le ñíjin lubeí Jesúsu.

31 Añájati buga disípulugu ayúmuragua lun Jesúsu lun leígin.

32 Laríñaga joun.

—Níjein cátei lun neígini le ibídiñeti jun.

33 Ábati jagúmeserun disípulugu álügüdagua jámagua, ába jaríñagun.

—¿Máfuna barüjaña eígini lun?

34 Ába laríñagun Jesúsu joun.

—Nadügüni lugúndan le oúnajabalina, agúmucheí luwádigimari, ligía neíginbei. **35** Jugúa aríñagatün. “Níjeingua gádürü játi lubá alúbajani.” Áanjein áu, naríñajare jun. Aríja jumeí nádü, dánjali lun lalúbajoún. **36** Le ñadágimeinbei alúbaja, ibíja lumúti lafáyeiruaja, áni cáteiti le lalúbajabeí, gürígia, lun jabíjini ibágari le magúmuchaditi siélu, lun lagúndaarun le ábunagubei úara lúma le alúbajabeí. **37** Quei le lubeíbei laríñawagún. “Ámu le ábunagubei, ámu le alúbajabeí.” **38** Oúnaja

náadün alúbaja le ñí lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le láni Samária afíñerutiña luágú Jesúsu láu taríñagun würi tugúya joun luágú aríñaga láni sun le adüga táalibei tun. ⁴⁰ Dánti le jachülürünbei Samariána le ñí lubei Jesúsu, ába jayúmuragun lun lun leréderun jáma. Ába leréderun bián wéyu ñi, ⁴¹ ábaya jafíñerun sarágu gürígia dan le jagáambunbalin le lariñagubei. ⁴² Ábatí jaríñagun tun würi tugúya.

—Mámarügaali luágú le baríñagubei woun wafíñera, ladüga agáamba wamáali gíñe lúmagíñe, áni subúdi wamúti luágú ligía lan Crístubei le lasálbaja ubóu.

Lareídaguagüduni Jesúsu liraü ában ñadágimeinti lúma urúei

⁴³ Bián wéyu lárigíñe, ába láfuridun Jesúsu Samáriagiñe, ába lasígiruni luweýasun loúbawagun Galiléa, ⁴⁴ míndinti lageíra quei laríñaguni Jesúsu guánarü luágú madügüniwa lan gásu láu ában proféta lídan guánarü lageíra. ⁴⁵ Dan lachülürünbei Galiléa, resíbi jamúti lílana fulásu buídu, ladüga ñüdün jamá gíñe lídan fédu le lánina pásqua Jerusalén áni aríja jamúti sun le ladügübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñí lubei lasáliraguagüda dúna lun diweínme. Ñíñeinti ában wügüri weíriguti, ñadágimeinti lúma urúei, níjein ában liraü sánditi lídan fulásu le gíribei Capernaúm. ⁴⁷ Dan lagáambunbei wügüri ligía luágú ñübinjali lan Jesúsu Judéagiñe lun Galiléoun, ába lídin aríjei, ába layúmuragun lun lun lídin lúbiñe lun lareídaguagüduni liraü, ladüga madíseeli lan lun loúnwen.

⁴⁸ Ába lariñagun Jesúsu lun.

—Jugúya, áanjaün maríjin miláguru, mafíñetün.

⁴⁹ Lariñaga wügüri ligía lun.

—Queímoun furése lubáragiñe loúnwen niraü.

⁵⁰ Ábatí lariñagun Jesúsu lun.

—Giríbubá búbiñoun, areídagua biraü.

Ába lafíñerun wügüri ligía luágú le lariñagubei Jesúsu lun, ába lídin. ⁵¹ Dan layárafadun tun lúban, ába jayábin lumúsuniña lubároun, ába jaríñagun lun.

—Magádieeli biraü.

⁵² Ába lálügüduniña ca lan óra lagúmesera liraü areídagua, ába jaríñagun lun.

—Gúñaarü ladaünrün ában rábounwéyu lagídara abíruaü lueí.

⁵³ Ába larítaguni luágú ligía lan óra lariñagun Jesúsu lun luágú areídaguaali lan liraü, ába lafíñerun luágú Jesúsu jáu sun lufámilian.

⁵⁴ Ligía libíaman miláguru le ladügübei Jesúsu dan le lagíribudunbei Judéagiñe lun Galiléoun.

5

Lareídagüdüni Jesúsu wügüri adádagaraali le Betésdana

¹ Lárigiñe cátei le, jadügüña juríu ában fédu, ába lagíribudun Jesúsu Jerusaléoun luágu fédu ligía. ² Ni Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³ Sarágu jáña sánditiña roun ni múarugu, níñanu maríjintiña, meíbuguntiña, jáma derégüdaña, jagúrabajañein lánjingichagun dúna. ⁴ Ladüga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareídagun furúmiegarügü sándi le luágubei. ⁵ Níñeinti ában wügüri, darándi-wídü irúmu láu láu sándi, ⁶ dan laríjinbalin Jesúsu wügüri ligía roun, subúdileí átiri lan dan láu ítara, ába laríñagun lun.

—¿Buséntibu bareídagun?

⁷ Ába loúnabun le sándibei.

—Úati cába lan anúgana lídoun dúna dan le lánjingichagun. Ságü nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárari, beíba.

⁹ Lídan óra ligía, ába lareídagun, ába labúdunun lubárari, ába lagúmeserun eíbuga. Queíti lidáani lubeí eméraaguni wéyu ligía, ¹⁰ ába jaríñagun juríu lun le areídagubei.

—Wéyu le eméraaguagülei ugúñe, moún lumuti banügünun bubárari buoúgua.

¹¹ Ába laríñagun joun.

—Le areídagüdübalina aríñagubei nun. “Budáboun bubárari, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibídiñetiti lun ca lan areídagüdübalin, ladüga gíbetiña gürígia ni áni ñüdünja bugáti Jesúsu. ¹⁴ Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguaadibu lubeí, mafígounjadügyabá lueí ladágarun ámu cátei janárimetimaati buágu.

¹⁵ Ábatí lídin, ába lawísaruniña juríu luágu Jesúsu lan areídagüdübalin. ¹⁶ Ligía lébubei jeíbaajani juríu Jesúsu lun jáfaruni jilágubei ladüga buri ladáaguni cátei líbe le lídan wéyu le eméraaguagülei. ¹⁷ Ába laríñagun Jesúsu joun.

—Ñadágimeinti Núguchi chüllü lúmoun dan le, áu ñadágimeintina gíñe.

¹⁸ Ligíatimaati jabúseerunbei juríu jáfaruni jilágubei, mámarügü ladüga lájalachaguni lúrudu le lánina wéyu le eméraaguagülei, ladüga gíñe líchaagun lúngua quei Búngiu láu laríñagun luágu Lúguchi lan.

Lugúmadin Liraü Búngiu

¹⁹ Ábati laríñagun Jesúsu joun.

—Ninárün jáu, luágu siñá lan nadügün, áu le Liraü Búngiu, ni cáta láu náni núnqua, le rügüñein narijubei ladügün Núguchi, nadüga. Sun le ladügübei Búngiu Úguchili, adüga numúti gíñe, áu le Búngiu Irájü, ²⁰ ladüga jínsiñetina lun Búngiu, arúfuda lumúti sun le ladügübei nun, áni larúfuduba cátei weínamatimaati nun, le lúnti laweíridun janígi láu. ²¹ Ítara quei lásaaragüdüniña Búngiu Úguchili jiláaña lídaangiñe oúweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun. ²² Magúseragüdünti Búngiu ni ában, rúrugi lumúti sun ubáfu nun, áu le Liraü, lun nadügün, ²³ lun sun lan gürigia íchigei ában méme inébesei le jíchugubei lun Búngiu Úguchili nun. Le míchuti inébesei nun, áu le Búngiu Irájü, míchuti gíñe inébesei lun Búngiu Úguchili le oúnajabalina.

²⁴ 'Ninárün jáu, luágu le lan eténiruti lun le naríñagubei lun, afíñe ligía luágu le oúnajabalina, gabágariti le magúmuchaditi, masíadirúnwabei giñe, sügüjali lídaangiñe féridi lídoun ibágari le magúmuchaditi. ²⁵ Ninárün jáu luágu nítebei lan dan, áni niján dan ligía, dánme le jagáambuni jiláaña numálali, ja ñüdünbaña láu le nubeíbei, gabágaribaña. ²⁶ Ladüga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari, ²⁷ rújali gíñe ubáfu nun lun nagúseragüdüniña gürigia ladüga Wügüri Garaúwarügtü áu. ²⁸ Maweíridalá janígi luágu le, ladüga lachülürüba dan lun jagáambuni sun jiláguaaña numálali, ²⁹ ábame jáfuridunga lídaangiñe jamúaja. Já meja arúfudubalin luágu nánigu jamá láu jadügüní buítí uboúagu, jásaaruba lun jaganoún lúma Búngiu lun sun dan, ánjañati ja arúfudubalin luágu lánigu jamá Máfia láu jadügüní wuríbani, jásaaruba lun jasíadirúniwa lun mafiougati lun sun dan.

Larúfuduni Jesúsu lagúmadijan

³⁰ 'Siñáti nadügün ni cáta láu náni núnqua. Quei laríñawagúniwa nun, ítara líña nagúseragüdünti, áni buítí ligáburi nagúseragüdünti ladüga moúchun nan lun nadügüní le nabúseerubei, lueídügya le labúseerubei Núguchi le oúnajabalina. ³¹ Ánjein áuba lubeí geféen nuoúgua, moúnti le naríñagubei. ³² Níjein ámu le geféenbei luágu náni fuleísei, áni subúditi nun luágu le lan laríñagubei nuágu, gebégit. ³³ Jugúya

oúnajatün álögüdei Juan nuágú, áni le loúnabagülebei jun, inárüni.³⁴ Áu magúrabuntina ladímuřejan ni ában wügüri luágu nufúleisein, narítaguagüda rügüñaadün luágu le laríñagubei Juan nuágú lun gayáraabei lan jaffíñerun nuágú lun jasálbaruba lan.³⁵ Ítara liñá meja Juan quei ában lámpu le durúnguati, ru ligía larúgounga, áni jugúya aráanseñu jíñá méjati lun jerésibiruni larúgounga ligía luágu murúsun dan.³⁶ Níjein ában cátei luágu nufúleisein buítimaati sügü láu le laríñagubei Juan. Lé buri cátei le nadügübe, le méme buri uágubei laríñaga Núguchi nun lun nadügüni, arúfuda lumúti luágu Núguchi lan oúnajabalina le tímatimaati.³⁷ Núguchi le oúnajabalina, arúfuda láali luágu áu lan Liraü le oúnajoúbei lun nasálbaruniña gürígia uboúagu, láu sun magáambun jumágili lan lumálali Búngiu, marijin jumeí.³⁸ Mebélugili lerérun jídoun, ladüga mafíñetün nuágú, áu le loúnajabe.³⁹ Atúriaia jumútu Lerérun Búngiu láu sarágu goúnigi, ladüga agúraba jumá jadáriruni ibágari le magúmuchaditi tídan, láu sun líra, líburu tugúya adímurejaboun nuágú,⁴⁰ áni májatün jiábin nómoun lun jibíjini ibágari ligía.

⁴¹ 'Málujantina lun janügünina gürígia weírigu. ⁴² Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³ Áu, lueígiñe loúbadina Núguchi niábin, áni jugúya, merésibirun jumútina, ánjein ñübin ámu láu láni lúngua, ligíaba jerésibira. ⁴⁴ ¿Ída lubásan jafíñerun nuágú, resíbitüngu uweíriguni júmagiñegua, málujan jumúti uweíriguni le lúmagiñeti Búngiu le ábanrügüti? ⁴⁵ Marítagua jumátia luágu níchuguba lan jidúnrung ligíbugiñe Núguchi, Moisés guánarügüba íchiga jidúnrung, le guánarügü uágubei jíchigei jeménigin. ⁴⁶ Ladüga, lun jamúga afíñe jumá luágu le laríñagubei Moisés, jafíñeruña jamúga gíñe nun, ladüga abürüjati Moisés nibügürü. ⁴⁷ Ánjein mafíñen jubeí luágu le labürüjabe, ¿ída lubáti jafíñerun luágu le nariñagubei jun?

6

*Leíagüdün Jesúsu seíngü mílu wügüriňa
(Mt 14.13-21; Mr 6.30-44; Lc 9.10-17)*

¹ Lárigiñe, ába lídin Jesúsu loubáfurugun dúna le Galiléa, le méme gíñe dúna le góribei Tibérias. ² Sarágu jáñá gürígia afálarei ladüga jaríjini buri miláguru le ladáagubei, láu lareídagüdüniña sánditiña. ³ Ábatí laweínrun Jesúsu luágún ában wübü, ába lañúurun ñi jáma láni disípulugu. ⁴ Yaráfaaliti páscura, le jafédun juríu. ⁵ Dan laríjinbei Jesúsu luágu sarágu jáñá lan gürígia afálaruti, ába laríñagun lun Felípe.

—¿Jalíabasan wagáñija eígini joun sun gürígia ja?

⁶ Laríñagunbalin líra lúnrugü lagáambun cába lan laríñaga Felípe, Jesúsu, subúdi láali cába lan ladüga. ⁷ Ábatí laríñagun Felípe lun.

—Ni bián-san fiádürü fein loúguaboun lun tafánreinjoúniwa murúsun murúsun jádan sun gürigia ja.

⁸ Ábatí laríñagun Andrés, ában gíñe jádaangiñe disípulugu, le lamúlen Simón Pédro, lun.

⁹ —Niján ában irájü ya, nújein seíngü fein lúma, jáma bián úduraü, loúguabei líra joun sarágu gürigia.

¹⁰ Ábatí laríñagun Jesúsu.

—Aríñaga jumá joun súngubei lun jañúurun.

Ñíñanuti jawára seíngü mílu wügüriña boúgudin jaweí würiña jáma irájüñü. Queíti ñíñein lan sarágu sagádi lídan fulásu ligía, ába jañúurun. ¹¹ Ábatí lanügünun Jesúsu fein lújaburugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñúnbaña. Ligía méme ladüga jáu úduraü, ruínaleí sun le jabúseerubei joun. ¹² Dan le quimúleña, ába laríñagun Jesúsu joun láni disípulugu.

—Abúdaja jumeí sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein. ¹⁴ Dánti le jaríjinbalin gürigia miláguru le, le ladügübei Jesúsu, ába jaríñagun.

—Inárüni luágu niján lan proféta lé meja lúnbei liábin uboúagun.

¹⁵ Queíti lasúbudiruni Jesúsu luágu busén jamá janügüni láu érei lun jadügüni urúeime, ába lídin lábugua luágun wübü.

Leíbugun Jesúsu ligíbuagu dúna

(Mt 14.22-27; Mr 6.45-52)

¹⁶ Dan le lagúñedunbei, ába jarágachun láni Jesúsu disípulugu lárunk duna, ¹⁷ ába jádinagun tídoun ában ugúnein, ába jagúmeserun ánjiñuragua lun jachülürün Capernaúm. Búrigaaliti, machültüti Jesúsu jámoun. ¹⁸ Ába lagúmeserun garábali áfuragua jére, ába lérougadun. ¹⁹ Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eßugeina ligíbuagu duna, ába janúfudedagun. ²⁰ Ába laríñagun joun.

—Manúfudededa jumá, áu le.

²¹ Ábatí jerésibiruni láu ugúndani tídan ugúnein, ába jachülürün lídoun fulásu le ñíjin lubeí joúdin lídan murúsun óra.

Jáluajani gürigia Jesúsu

²² Larúgan, ába jaríjin gürígia ja eréderubaña loubáfuru-gu luágu ñüdünja jamá buga disípulugu tídan ugúnein to ñiboun áni tugúya rügüñoun ñi, áni mídin lan Jesúsu jáma. ²³ Súnti dan ligía, ába tiábingua ugúnein ubúrugugiñe Tibérias lun lídoun ában fulásu yaráfa lun le ñí lubei jeígoun fein lárigi leteíngirun Jesúsu tuágú. ²⁴ Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába joúdin Capernaúm álauajei.

Jesúsu, fein to lánina ibágari

²⁵ Dan le jachülrürünbei loubáfuru-gu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

²⁶ Ába laríñagun Jesúsu joun.

—Ninárün jáu luágu ladüga lan jeígin darí lun jaquímuledun jálua-jana, máma ladüga gunfaráanda jumáni laníchigu buri miláguru. ²⁷ Madíjerida jumá luágu eíginí le gagúmuchaditi le lúntibei júgubu, álauaja jumeí eíginí tun juwáni, le íchugubei ibágari magúmuchaditi. Ligía eíginí le lúnbei níchuguni jun, áu Wügüri Garaúwarügüti, ladüga rúlaali Búngiu Úguchili ubáfu nun lun níchuguni ibágari ligía.

²⁸ Ábatí jaríñagun lun.

—¿Ída lubásan wadüga lun woúdin láu le lubeíbei Búngiu?

²⁹ Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabeí.

³⁰ Jaríñagati lun.

—¿Cábagi seíni gayára barúfudun woun lun wafíñerun buágu? ¿Cági cátei badügübei? ³¹ Binádu wagübürigu joútiña meja fein to gíriboun maná lídan fulásu mageírawati, quei taríñaguni Lerérung Búngiu. “Joúguda lumútiña Búngiu fein to siélugiñetu.”

³² Ába laríñagun Jesúsu joun.

—Ninárün jáu luágu máma lan Moisés íchugubarun fein siélugiñetu tugúya joun, Núguchi íchugubei fein joun áni ligía gíñe íchugubarun fein siélugiñetu jun to tímatimaatu. ³³ Ladüga fein to líchuguboun Búngiu, tugúya to aráriruboun siélugiñe áni rúti gíñe ibágari joun lílana uboú.

³⁴ Ábatí jaríñagun lun.

—Rúboun fein tugúya woun súnwandan.

³⁵ Ába laríñagun Jesúsu joun.

—Áu fein to íchuguboun ibágari. Le ñübinti númoun, malámadügüyaarume luwáni, le afíñeruti nuágu, mamágürabudügüyaaru giñe luwáni. ³⁶ Quei le nubeíbei jun, jugúya mafiñetün láu sun aríja jumáadina lan. ³⁷ Sun

gürígia ja líchugubaña Núguchi nun, ñübintiña nun, játi ñübintiña númoun mabúgun nubáña.³⁸ Máma niábiña siélugiñe lun nadügüni nugúndan, le náni núngua, niábiña lun nadügüni lugúndan le oúnajabalina.³⁹ Léti labúseerubei Núguchi le oúnajabalina, lun mefériderun nan ni ában jádaangiñe ja líchugubaña nun, lun sarágüdarügü nániña lídaangiñe oúweni lídaanme lagúmujoún wéyu.⁴⁰ Le labúseerubei le oúnajabalina, lun sun lan ja anügütina quéisi Liraü Búngiu, afíñe jagía nuágu, lun gabágari jamá le magúmuchaditi, áni násaaragüdübaña lídaangiñe oúweni lídan lagúmujoún wéyu.

⁴¹ Ába jagúmeserun juríu adímureja wuríba luágu Jesúsu ladüga laríñagun luágu ligía lan fein to aráriruboun siélugiñe.

⁴² Ába jaríñagun.

—¿Ma funági Jesúsu le liraü José le? Subúdi wamúti lúguchi túma lúguchu. ¿Ída liñáti laríñagunbei luágu siélugiñe lan larárira?

⁴³ Ábatí laríñagun Jesúsu joun.

—Madímuereja jumá nuágu.⁴⁴ Siñáti liábin ni ában númoun ánjein máma lubeí lanügün Búngiu Úguchili le oúnajabalina, áni násaaragüdübei lídaangiñe oúweni lídan lagúmujoún wéyu.⁴⁵ Laríñajare tídan líburu to jerérun profétagu. “Larúfudajaba Búngiu joun súngubei.” Sun lubeíti ja agáambubalin Búngiu Úguchili, furéndeji jagía lúmagiñe, ñübintiña númoun.

⁴⁶ ‘Máma jamúgatia luágu níjein lan aríjiti Búngiu Úguchili. Áu le ñübinbei lúmagiñe Búngiu, áu rügüñnein aríjei.⁴⁷ Ninárün jáu luágu le lan afíñeti nuágu, gabágariti le magúmuchaditi.⁴⁸ Áu fein to íchuguboun ibágari.⁴⁹ Joútiña binádu jagübürigu fein to maná lídan fulásu mageírawati áni láu sun luwúyeri jiláguatiña.⁵⁰ Áu, tuágu fein to aráriruboun siélugiñe nadímuereja, lun ja lan eígitu, lúmounbaña Búngiu.⁵¹ Áu méme fein wínwantu tugúya to aráriruboun siélugiñe, le eígitu tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, núgubu guánarü, níchugubei lun gayáraabei lan jabágaridun gürígia lun sun dan lúma Búngiu.

⁵² Ábatí jeréderun juríu adímureja jámagua, ába jaríñagun.

—¿Ída lubásan leígagüdüni le lúgubu guánarü woun?

⁵³ Laríñaga Jesúsu joun.

—Ninárün jáu luágu áanjaün lan meígin lídaangiñe núgubu, áu Wügüri Garaüwarügti, mátun jumeime níta, mabágaribadün.⁵⁴ Le eígitu núgubu, gurálei níta, gabágariti tímatimaati le magúmuchaditi, áni násaaragüdübei lídaangiñe oúweni lídan lagúmujoún wéyu.⁵⁵ Ladüga eíginí le tímatimaati núgubu, uníñein le tímatimaati níta.⁵⁶ Le eígitu núgubu, gurálei níta,

lídaañein ában núma, áu lúma. ⁵⁷ Úguchili le oúnajabalina, gabágariti, áni áu, gabágaritina gíñe lídaangiñe, ítara méme líña, le awínwanduti nídaangiñe, gabágaribei nídaangiñe. ⁵⁸ Tuágu fein to aráriruboun siélugiñe nadímureja. Mítaraantu fein to quei maná le jeígubei binádu jagübürigu, láu lan sun luwúyeri jiláguatiña, le eígití tídangiñe fein to, labágariduba tímatimaati lun sun dan lúma Búngiu.

⁵⁹ Lidan adámuridaguni tídan jalígilisin juríu to Capernaúmboun, ñi larúfudajei Jesúsu cátei le.

Dimúrei lánina ibágari magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adüga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbatí láburujan líra jun? ⁶² ¿Cába jamúga funáti asúsereda ánjana jamúga jaríja, áu Wügüri Garaüwarügüti, awárira nárigoún siélun lé meja ñí nubei furúmiñe? ⁶³ Náni Espíritu, ligía íchugubei ibágari tímatimaati, núguburügü, siñáti líderagunün. Áni sún buri cátei le nariñagubei jun, máma luáguti eíginí le lúnti jurágeirugu, luáguti eíginí le túnti juwáni, le íchugubei ibágari magúmuchaditi. ⁶⁴ Áni añájeingua jídaangiñe, mafíñetiña.

Ladüga lúmagiñe furúmiñeti dan, subúdi láña Jesúsu cátaña lan mafíñebaña, lúma cátei lan le lúnbei lalúguruni. ⁶⁵ Ába laríñagun.

—Ligía nariñagunbei jun luágu siñá lan liábin ni ában númoun ánjein máma lubeí Núguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün gíñe jídin nueí?

⁶⁸ Ába louñabun Simón.

—¿Cábagi úmoun woúdin? Dimúrei buri le baríñagubei, lánina ibágari tímatimaati le magúmuchaditi. ⁶⁹ Wagía afíñeediwa, áni subúdi wamúti luágu amürü lan Crístubei le Liraü Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, njiein ában jídaangiñe láni Máfia.

⁷¹ Dan laríñagunbalin Jesúsu líra, luáguñein Júdas, le liraü Simón Iscarióte, ladüga ligíaba lan alúgurei, láu sun ában lan jídaangiñe dúusu disípulugu ligía.

Mafíñeruntiña lamúlenu Jesúsu luágu

¹ Lárigiñe sun cátei le, ába eibugañaja lan Jesúsu loúbawagu Galiléa, mabúseerunti leréderun Judéa ladüga ñi buséntiña juríu jáfaruni jilágubei. ² Queíti yaráfaali lan ában lídaangiñe jafédun juríu le gíribei tufédun dibásein, ³ ába jaríñagun lamúlenu lun.

—Meréderabá ya, beiba Judéoun aríja jamámugei gíñe bánigu ja níbaña cátei lé buri badügübei. ⁴ Dan le busén lan ában gürígia lasúbudirúniwa, madügün lumúti buri cátei arámudaguarügü. Queíti adüga ban cátei líbeina le, adügabeí ligibugiñe sun uboú.

⁵ Ni íbini lamúlenu mafíñetiña luágu. ⁶ Ábati lariñagun Jesúsu joun.

—Machülügili dan lun nídin Jerusalén luágu fédu ligía, ánjein jun, buítí furúmierügü óra. ⁷ Siñáti jiyéreegudún joun ja lámina uboú le, anáti áu, iyéreegutina joun, ladüga geféentina luágu wuríba lán buri cátei le jadügübei. ⁸ Jeiba lídan fédu, áu mídinbadina guetó, machülügili nidáani lun nídin.

⁹ Lárigiñe lariñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe joúdin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijoúniwa. ¹¹ Ítara líña jáluajani juríu lídan fédu ligía, ába jaríñagun.

—¿Jageí funásan wügüri le?

¹² Sarágu jañáti adímurejatiña luágu jádan gürígia. Ñíñanu aríñagutiña luágu ában lan wügüri buítí ligía, jíbiri aríñaga. “Mabuídunti, yéegua lumútiña gürígia.”

¹³ Úati ni ában adímurejati furáangu luágu, ladüga janúfude jaweí juríu.

¹⁴ Lamídounjali fédu lúmagua, ligía lebélurun Jesúsu témpulurugun, ába lagúmeserun arúfudaja. ¹⁵ Ába laweíridun janígi juríu, ába jaríñagun.

—¿Ída liñásan lasúbudirunbei le sarágu cátei, matúriaanga ligía?

¹⁶ Ába lariñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina. ¹⁷ Ánjein níjein lubeí ában le aráanseti lun ladügüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja. ¹⁸ Le adímurejabei luágu láni lúngua, ladügüni lun janügüni gürígia weíri, le oúchubei lun lanügüniwa le

oúnajabalín weíri, ligía aríñagubalin inárüni, áni máma ligía biángua tigíbu.

¹⁹ ¿Ma inárüni luágu rúlaani Moisés lúrudu jun? Láu sun líra, úati ni ában jídaangiñe úaraduti lúma lúrudu ligía. ¿Ca uágu jabúseera jáfarunina jilágubei?

²⁰ Ába jaríñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába laríñagun Jesúsu joun.

—Luágurügü ában cátei le nadügübei lídan wéyu le eméraaguagülei laweírida janígi sun jugúya. ²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun binádu lagübürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraaguagülei. ²³ Ánjein adüga jubálin líra íbini lídan lan wéyu le eméraaguagülei lueírugü jadüraaguni lilúrudun Moisés, ¿cáti uágu jagáñida núma lueígiñe nareídaguagüduni lúgubu ában wügüri dayárugubei lídan wéyu le eméraaguagülei? ²⁴ Masáminara jumá luágu cátei quéisi larijíniwa, samína jumá luágu quéisi lubei.

Ladímujejan Jesúsu luágu ladügawagún

²⁵ Ábati jagúmeserun jádaangiñe ja aganoúbaña Jerusalén álögüdaja.

—¿Másan niján le jáluajabei lun jáfaruni jilágubei? ²⁶ Nijánga adímureja ligíbugiñe guríriguaü, áni úati ni ában aríñaguti ni cáta lun. ¿Léfunasan afíñe jamá gumádimatiña luágu wügüri lan le Crístubei? ²⁷ Subúditu woun jalíagiñe lan liábin le, ánjeinti dánme le liábin Crístu, ibídiñebi ni ca un jalíagiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába laríñagun rein.

—¡Subúdi jumútina lubeíti, subúdi jumeí jalíagiñe lan niábin! Máma láu náni núngua niábin, ában le inárünibei luágu níjein lan, ligía oúnajabalina, áni ibídiñeti jun. ²⁹ Áu, subúdi numúti ladüga lúmagiñe lan niábin, áni ligía oúnajabalina.

³⁰ Ába yebéti jabúseerun jadáürüni, úati ni ában agúuruti luágu ladüga machülügili lan dan lun loúnwen. ³¹ Sarágu jáña afíñerutiña luágu, ába jaríñagun.

—Dánme le liábin Crístu, ¿ladüguba funági ámu miláguru sügü láu wügüri le?

Joúnajan fariséogu polisia adáürei Jesúsu

³² Ába jagáambuni fariséogu le jaríñagubei gürígia luágu Jesúsu, jagáa jáma jábutigu fádirigu, ába joúnajan polisia témpulurugugiñe lun jadáürüni. ³³ Ábatí lariñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina. ³⁴ Jaluajabadina, madári jubádina, ladüga siñábei lan jídin le ñíjinbadina lubeí.

³⁵ Ábatí jagúmeserun juríu álögüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagánaguabaña gürígia ja güriégu, lun larúfudajan joun güriégu? ³⁶ ¿Ca míni lan láu lariñagun woun. “Jaluajabadina, madári jubádina ladüga siñábei lan jídin le ñíbadina lubeí”?

Líseesen dúna wínwanti

³⁷ Le lagúmujoún wéyu lídan fédu ligía, ligíatima weírigubei. Lídaanti wéyu ligía, ába laráramun Jesúsu, ába lariñagun láu umálali reínti.

—Le mágürabutu luwáni, ñübinlá númoun, gurála. ³⁸ Le afíñeti nuágu, láwiujaba dúna wínwanti tídaangiñe lanígi, quei taríñaguni Lerérun Búngiu.

³⁹ Laríñaguña Jesúsu láu líra luágu ja lan afíñerutiña luágu, jerésibirubei lan Sífiri Sándu, dan ligía, miábiningili Sífiri Sándu ladüga magíribudungili lan Jesúsu larigoún siélun lídoun luweírigun.

Fánreinguaü jádan gürígia

⁴⁰ Ñíñanu jádaangiñe gürígia, dan le jagáambunbalin cátei le, ába jaríñagun.

—Inárüni luágu niján lan proféta lé meja lúnbei liábin.

⁴¹ Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴² Taríñajare Lerérun Búngiu luágu ladügawagunbei lan urúei Davíd Crístu, áni Beléngiñetibei lan, fulásu meme le ñígiñeti lubeí Davíd.

⁴³ Ába lubeíti jafánreinragun gürígia lueígiñe Jesúsu. ⁴⁴ Ñíñanu yebe abúseerutiña jadáürüni, úati ni ában adügüti.

Mafíñetiña gumádimatiña luágu Jesúsu

⁴⁵ Ába jagíribudun polisia ja tánína témpulu jarigoún jámoun fariséogu jáma jábutigu fádirigu. Ába jaríñagun joun polisia.

—¿Ca uágu manügün jubálin?

⁴⁶ Ába jaríñagun polisia.

—¡Úagili ni ában adímurejati quei ladímurejan wügüri le!

⁴⁷ Ábatí jaríñagun fariséogu joun.

—¿Ígiraguagüdaadün gíñe júngua lun leyéedunün? ⁴⁸ ¿Níjein funági ában jádaangiñe wábutigu o jádaangiñe lan fariséogu afíñeruti luágu? ⁴⁹ Ánjaña gürígia ja, ja afálarubalin wügüri ligía, ja ibídiñejabubaña lun lúrudu, iñarawagúaña.

⁵⁰ Nicodémo, le ñüdünbei adímureja lúma Jesúsu gúñoun, ligía ában jádaangiñe fariséogu, ába laríñagun joun.

⁵¹ —Según walúrudun, siñáti wasíadiruni ában wügüri magáambunga wameí furúmiñe lun wasúbudiruni ca lan lidúnrunbei.

⁵² Ábati jaríñagun lun.

—¿Galiléana gíñe amürü, badímurejaanbei luágu lufúleisein? Atúriajaboún Lerérunt Búngiu, basúbudirubei luágu úagili lan ni ában proféta Galiléana.

⁵³ Ába joúdin cáda ában jábiñoun.

8

Würi maríeitu to aganoúboun luma ámu wügüri

¹ Ánjeinti Jesúsu, ába lídin luágun wübü le góribei Olivos.

² Larúgan bináafin, ába lagíribudun témpulurugun, ába jayábin sun gürígia lubádun, ába lañúurun, ába lagúmeserun arúfudaja joun. ³ Ábati janügün arúfudajatiña lilúrudun Moisés jáma fariséogu ában würi jadáriragun lúma ámu wügüri lueí túmari. Ába jíchugunun jamídaangua ja ñibaña jámagua, ⁴ ába jaríñagun lun Jesúsu.

—Maésturu, nuján würi to, wadáriragun lúma ámu wügüri lueí túmari. ⁵ Laríñajare lilúrudun Moisés jawágu jíbe würíñja ja, lun jáfarawagún jilágubei láu dübü. ¿Cági baríñagubei?

⁶ Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labürüjan múarugu láu lújabu. ⁷ Queíti jasígirun álügündaguei, ába laráramun, ába laríñagun joun.

—Furúmiñeguarügü jídaangiñe le mafíounti, chüleí furúmiñeti dübü tuágu.

⁸ Ábaya lélemuchun, ába lasígirun abürüja múarugu. ⁹ Jagía, le jagáambubalin le laríñagubei, ába jasándiragun joúngua luágu gafígon jamá, ába jáfuridunga ában ában, jagúmesera jámagiñe ja weínamutimáajañabaña. Dánti le furíjaña súngubei, ába ladáriragun Jesúsu lúngua lábugua túma würi tugúya quei teréderunbei ñi. ¹⁰ Ábati liñúraguni Jesúsu lichügü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asiadirutibu lun boúnwen?

¹¹ Ába taríñagun lun.

—Uá, úati ni ában.

—Ábatí laríñagun Jesúsu tun.

—Ni áu, masíadirun nubádibu, beíba, madügadügüyabá figoú.

Jesúsu lilámpun uboú

¹² Ábaya ladímurejan Jesúsu joun gürígia, ába laríñagun.

—Áu lilámpunbei uboú, le afálarutina, libíjubei larúgounga le anügübei gürígia lídoun ibágari magúmuchaditi, áni meíbugunbei lídan lubúriga.

¹³ Ábatí jaríñagun fariséogu lun.

—Aműrü, badímurejaña buíti buoúgua, mebégiti líra.

¹⁴ Ába laríñagun Jesúsu joun.

—Le naríñagubei gebégití, láu sun áu lan adímurejabei buíti nuoúgua. Áu, subúdi numúti jalíagiñe lan niábin lúma jalíñounba lan nídin, ánjein jugúya, ibídiñeti jun jalíagiñe lan niábin ni jalíñounbadina lan. ¹⁵ Jugúya, jasáminarun nuágu queísi luwúyeri lasáminarun uboú, áu, magúseragüdüntina ni ában. ¹⁶ Ánjana jamúga agúseragüda, nadügüñein jamúga láu úarani, ladüga mámarügüba áu agúseragüda, Núguchi le oúnajabalina lagúseragüdüba gíñe núma. ¹⁷ Bürüwati lídan jilúrudun luágu dan lan geféen jamá bián gürígia luágu ában méme cátei, lúnti lan lafiñerún joun. ¹⁸ Ítara liñáti áu ában le geféenbei luágu náni fuleísei, Núguchi le oúnajabalina, ligía gíñe ában le geféenbei nuágu.

¹⁹ Ábatí jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Núguchi, ibídiñeti giñe jun, lun jamúga subúdi jumánina, subúditi jamúga giñe Núguchi jun.

²⁰ Lídan laríñagubalin Jesúsu cátei le, larúfudajaña témpulurugu lídan fulásu le ñí tubeí buri gáfu to lágei seínsu. Madáürün lumúti ni ában ladüga machülügili lan lidáani lun loúnwen.

Laríñajare Jesúsu joun luágu siñá lan jeídin ñíjinba lubeí lídin

²¹ Ábaya laríñagun Jesúsu joun.

—Áu, neíbuga, jugúya jáluajabadina, joúweguba gafígounga, siñáti jídin le ñíjinba lubeí nídin.

²² Ábatí jaríñagun juríu.

—¿Láfaragua funa lúngua, laríñagunbei luágu siñá lan woúdin le ñíjinba lubeí lídin?

²³ Ábatí laríñagun Jesúsu joun.

—Jugúya, ünabuna jugúya, ánjein áu, yágütana íñu áu. Láni uboú le jugúya, ánjein áu, máma láni uboú le áu. ²⁴ Ligía naríñagunbei jun luágu joúweguba lan gafígounga, ladüga ánjein mafíñen jubeí luágu áu lan áu, joúweguba ítara.

25 Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe binárü. 26 Gayáraati jamúga naríñagun gíbetti jun luágu luríban jigáburi lun nadeínjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina naríñaga joun ja lílana uboú.

27 Ánjein jagía, úati gunfaráanda jamáni láu luágu lan Búngiu ladímureja Jesúsu joun. 28 Ligía laríñagunbei joun.

—Dánme le jiñúrunina, áu Wügüri Garaüwarügüti, ligíame jasúbudiruni luágu áu lan le uágubei naríñaga luágu áu lan, áni madügün nan ni cáta luágu náni núngua, lueídügüya le larúfudajabei Núguchi nun. 29 Ladüga númañein le oúnajabalina, mígirun lágidina Núguchi nábugua, ladüga adüga náni le áubei lagúndaara súnwandan.

30 Dan le laríñagunbalin Jesúsu le, ába jafíñerun sarágu luágu.

Lirájüñü Búngiu jáma lidámuniña figoú

31 Ába laríñagun Jesúsu joun juríu ja ánjarubaña lun lerérun.

—Ánjaün asígira lun jídin surúñu láu le nubeíbei jun, jiábinba lun náni jumá disípulugu le tímatimaati. 32 Ábame jasúbudiruni inárüni, ábame lafúnraanguagüdünün inárüni.

33 Ába jaríñagun lun.

—Linébaanfaangu Abrahám wagía, áni merédegiwa idámunime ni ca un. ¿Ída liñáti baríñagunbei luágu furáangujadiwa lánme?

34 Ába laríñagun Jesúsu joun.

—Ninárün jáu, luágu sun lan ja adáagubaña figoú, lidámun figoú jagía. 35 Ában idámuni, máma jádaangiñeti familia, ánjeinti ában isáani, jádaangiñeti familia súnwandan. 36 Ánjaün lubeíti nafúnraanguagüda, áu le Búngiu Irájü, lídaangiñe idámuni lun figoú, furáangubadün le tímatimaati. 37 Subúdi náali luágu linébaanfaangu jumá Abrahám, láu sun líra, buséntün jáfarunina, ladüga mája jumá lun le nubeíbei jun. 38 Áu nadímurejan luágu le larúfudubei Núguchi nun, jugúya jadügüni le jafúnrendeirubei lúmagiñe júguchi, le Máfia.

39 Ába jaríñagun lun.

—Abrahám wáguchibei.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadügüñein jamúga le ladügübei. 40 Láu sun aríñaga náali lan inárüni le larúfudajabei Búngiu nun jun, buséntün jáfarunina.

¡Madügünti meja Abrahám ni cáta líbe líra! ⁴¹ Le méme ladügübei júguchi, ligía jadügübei.

Ábatí jaríñagun lun.

—Mámatia wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubeí júguchibei, jínsiñetina jamúga jun ladüga lúmagiñe Búngiu niábin, áni anája ya. Máma láu náni núngua niábin, Búngiu oúnajabalina. ⁴³ ¿Ca uágu lásiñerunbei gunfaráanda jumáni le naríñagubei? Ladüga mabúseerun jumá jagáambuni náni ugánu. ⁴⁴ Máfia júguchibei, lánigu jugúya, áni buséntün jadügüni lugúndan. Gáfarajadigubeiñein Máfia lúmagiñe furúmiñeti dan. Márügündünti lueígiñe inárüni, maríñagunti gíñe inárüni. Lidan le laríñagun iyéeni, ladímurejaña quei ligáburi, ladüga yéeti áni ligía lúguchibei iyéeni. ⁴⁵ Ánjeinti áu, quei inárüni lubeí naríñagubei, mafíñetün nun. ⁴⁶ ¿Ca jídaangiñe gayáraabei larúfuduni luágu gafígoun nan? Ánjeinti inárüni lubeí naríñagubei, ¿cáti uágu mafíñen jubeí nun? ⁴⁷ Le lánigu Búngiu, agáamba lumúti lerérun Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Níjeinjali meja Crístu lubáragiñe Abrahám

⁴⁸ Ábatí jaríñagun juríu lun.

—Wanárün láu waríñagun luágu máma ban ámu jaweí jagüburi Samariána, luágu gíñe níjein lan ában espíritu wuríbati bídan.

⁴⁹ Ába laríñagun Jesúsu joun.

—Úati espíritu wuríbati nídan. Le nadügübei, níchuguña inébesei lun Núguchi, jugúya, íchiga minébeni nun. ⁵⁰ Máluaajaantina inébesei núngua, láu sun níjein lan ában áluga lumúti ninébese, áni ligía le agúseragüdübei. ⁵¹ Ninárün jáu luágu le lan adügüti gásu láu le nubeíbei, moúnwenbei lan.

⁵² Ábatí jaríñagun juríu lun.

—Anáti guetó, choúru wamáali luágu níjein lan espíritu wuríbati bídan. Jiláti Abrahám, jilágu profétagu, áni aríñagagibu luágu le lan adügüti gásu láu le bubeíbei, moúnwenbei lan. ⁵³ ¿Cátabuñadíbugi lúmoun wáguchi Abrahám? Jiláti Abrahám, jilágu profétagu. ¿Ída liñáti banáangun búngua?

⁵⁴ Ába laríñagun Jesúsu joun.

—Ánjana íchiga uweíriguni nuoúgua, málabeí, ánjeinti Núguchi, le méme uágubei jaríñaga luágu ligía lan Jubúngiutebei, ligía íchugubei uweíriguni nuágu. ⁵⁵ Jugúya, ibídiñeti Búngiu jun, anáti áu, subúditi nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúditi Búngiu nun

le tímatimaati, áni adüga numúti le lubeíbei. ⁵⁶ Abrahám lé meja binádu júguchi, gúndaati meja láu lasúbudiruni luágu lachülüruba lan nuwéyuri lun niábin uboúagun queísi asálbaragülei, buin líña láu ugúndani dan laríjini wéyú ligía.

⁵⁷ Ábati jaríñagun juríu lun Jesúsu.

—Úagubeigili ni dimí-san irúmu báu, ¿aríñagatibu luágu aríja báni Abrahám?

⁵⁸ Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dübü lun jachüraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

9

Lareídagüdüin Jesúsu ában wügüri maríjinti

¹ Lídan le lásügürün Jesúsu lídaangiñe ában fulásu, ába laríjin ában wügüri maríjinti lúmagiñe lagüriaajoún. ² Ába jaríñagun láni disípulugu lun.

—Maésturu, ¿cásan uágu lagüriaajoúnbei wügüri le maríjinga? ¿Ladügasan jafígoun lagübürigu, o ladüga lifígoun guánarü?

³ Ába laríñagun Jesúsu joun.

—Máma ladüga lifígoun, máma gíñe ladüga jafígoun lagübürigu, lasúseredunbei ítara lun larijoúniwa le luáraabei Búngiu adüga láu lareídagun wügüri ligía. ⁴ Lúnti nadügüni luwádigimari Búngiu le oúnajabalina sun wínwangidina lan, jiláadina ligíame, siñáme nadügüni. ⁵ Sun dan anája lan ligíbuagu uboú le, áu lilámpunbei uboú.

⁶ Lárigiñe laríñaguni Jesúsu cátei le, ába lásumerun múarugun, ába ladügün murúsun gubégubeti láu larüre, ába lájuruduni luágu lágu le maríjinbei. ⁷ Ába laríñagun lun.

—Beíba achíbei bigíbu lídan dúna le gíribei Siloé —míni lan líra, Oúnajoúti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali. ⁸ Játí lubésinanigu jáma gürígia já meja aríjubalin amúriaaja, ába jaríñagun.

—¿Másan nijáñaja le añúurubei amúriaaja seínsu?

⁹ Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügüri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügüri le gíribei Jesúsu, ligía adügübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügüri ligía?

Laríñaga joun.

—Ibidiñeti nun jageí lan.

Jálügüdaguni fariséogu maríjinti le areídagaguagüdüwalibei

¹³ Ábati janüguni wügüri lé meja maríjinbei jagíbugiñoún fariséogu. ¹⁴ Queíti lídan lan wéyu le eméraaguagülei ladügei Jesúsu gubégubeti le áubei lareídagaguagülei maríjinti ligía, ¹⁵ ába giñe jálögüdüni fariséogu wügüri ligía ída líña lan gayáraajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶ Ábati jaríñagun jádaangiñe fariséogu.

—Le wügüri le adügübalin cátei le, siñáti loúnagüle lan Búngiu ladüga minébenti wéyu le eméraaguagülei lun.

Jariñagati jíbiri.

—¿Ída liñáti ladáaguni buri miláguru le, ánjein gafígoun lubeí?

Ába lubeíti ñi lan fánreinguaü jádan. ¹⁷ Ábaya jálögüdüni lé meja maríjinbei.

—Ángi bugúya, ¿cági baríñagubei luágu wügüri le, queísi bugúya lubeí le laríjagüdübei?

Ába laríñagun.

—Nugúya, nariñagun luágu ában lan proféta.

¹⁸ Mákatiña yebe fariséogu jafíñerun luágu maríjin lán meja wügüri ligía áni aríjaali lan guetó, darí lun jagúarun joun lagübürigu, ¹⁹ ába jaríñagun joun.

—¿Nijánsan jiraü le uágubei jaríñaga luágu maríjin gubeíñein lan lúmagiñe lagüriaajoún? ¿Ída liñáti aríjaali lubeí guetó?

²⁰ Ába jaríñagun lagübürigu.

—Subúdi wamúti luágu waraü lan le, áni maríjin lan dan le lagüriaajoúnbei, ²¹ ibidiñeti woun ída líña lan aríjaali lubeí, ni ca lan areídagaguagüdübalin lágu. Álögüda jumeí, weíriyaali, gayáraati loúnabun lueígiñegua.

²² Anúfudeiti aríñagagüdübalin líra joun lagübürigu wügüri ligía, ladüga aríñagaaña lan fariséogu luágu sun lan ja

afíñerutiña luágú Jesúsu lan Crístubei, jabugúba lan tídaangiñe jalígilisin juríu. ²³ Ligía jaríñagunbei lagübürigu. “Álügüda jumeí, weíriyaali.”

²⁴ Ábayati jagúarun juríu lun wügüri lé meja maríjinbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúditi woun luágú gafígoun lan wügüri líra.

²⁵ Ábatí laríñagun joun.

—Ibídiñeti nun ánjein gafígoun lubeí lúmoun mafígoun lan. Le nasúbudirubei, luágú maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladügübei báu? ¿Ída liñásan ladüga lun laríjagüdünibú?

²⁷ Ába laríñagun joun.

—Aríñaga náali jun, mebérereseguntün náu, ¿cáti uágú jabúseera naríñaguniya jun? ¿Ódi buséntün gíñe jafálaruni?

²⁸ Ábatí janábuni, ába jaríñagun lun.

—Bugúya, falá bumuti larúfudajan wügüri ligía, ánjein wagía, larúfudajan Moisés wafálarubei. ²⁹ Subúditi woun luágú adímureja lán meja Búngiu lun Moisés, ánjein le, ibídiñegubeíti woun jalíagiñeti lan.

³⁰ Ábatí laríñagun wügüri ligía joun.

—¡Ámuti gíñe cátei le! ¡ibídiñeti jun jalíagiñeti lan, áni aríjagüda lána! ³¹ Subúditi woun luágú magáambun lániña Búngiu gafígountiña, ja rügüñhanu ájuduragubaña lun jáma ja adügübalin lugúndan, lagáamba. ³² Magáambuñajagili luágú ni ában aríjagüduti ában gürigia le agüriaajoúti maríjinga. ³³ Lun jamúga máma lan lúmagiñe Búngiu liábin wügüri le, siñáti jamúga ladügün ni cáta.

³⁴ Ábatí jaríñagun lun.

—¿Bugúyan le agüriaajoúbei buin láu figoú, buséntibu barúfudajan woun?

Ába jabúguni tídaangiñe jalígilisin.

Ja maríjinbaña luágú cátei lánina Búngiu

³⁵ Ába lagáambuni Jesúsu luágú bugá jamaani maríjinti meja ligía, dánti le ladúnragun lúma, ába laríñagun lun.

—¿Afíñetibu luágú Liraü Búngiu?

³⁶ Ába laríñagun wügüri ligía lun.

—Aríñagabeí nun cátei lan, afíñe námuga luágú.

³⁷ Ába laríñagun Jesúsu lun.

—Aríja báali, áu le úmabei badímureja.

³⁸ Ába lájuduragun ligíbugiñe Jesúsu, ába laríñagun.

—Afíñetina, Nabúreme.

³⁹ Ába laríñagun Jesúsu.

—Niábinbei ñájoun uboúagun lun néfegechagüdüni jágu ja ibídiñejabubaña lun cátei lánina Búngiu, lun gíñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, marijin jamá ni cáta.

⁴⁰ Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líñia lan gíñe wágu lun cátei le luáguti Búngiu?

⁴¹ Laríñaga Jesúsu joun.

—Lun jamúga ibídiñe lan cátei lánina Búngiu jun, madúnruntün jamúga luágu jifígoun, quei jaríñagun luágu subúdi jumáni, gadúnruntün.

10

Jémpulu luáguti loúnigiruniña Jesúsu lánigu queísi ában oúnigiruti mudún

¹ 'Ninárün jáu luágu le lan mebéluti lídaangiñe lubéneri jabárierun mudún, lun lebélurun lídaangiñe ámu oúbaü, jíweruti. ² Ánjeinti le ebélurubei lídaangiñe béna, ligía le oúnigirubaliña mudún. ³ Ába lánjunrenchuni le oúnigirubalin béna béna lun, lun lebélurun, subúdi jamúti gíñe mudún lumálali. Ába lagúajan joun láu jíri, ába laságaraguniña baríerurugugiñe. ⁴ Lárigiñe laságaraguniña súngubei, ába lídin eíbugeina jabá jabá, ába jafálaruni ladüga subúdi jamáni lumálali. ⁵ Mídintiña lárigi ában le ibídiñeti joun, anúrajarügütiña lueí ladüga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu joúniri mudún buíti

⁷ Ábayati laríñagun Jesúsu joun.

—Ninárün jáu, áu béna le ñígiñe lubeí gayára lan jayábin gürígia lun lánigu jamá Búngiu. ⁸ Ja ñübinbaña nubáragiñe, ítara jáña queísi jíwerutiña mudún ladüga iyéeni lan jarúfudajabei, madügütiña lánigu Búngiu gásu jáu. ⁹ Áu bénabei, le ebéluruti nueígiñe, lasálbarúaba. Ítara lúba quei ában mudún le ebéluruti furí ligía baríerurugugiñe, darí ligía sagádi lun leígin.

¹⁰ 'Jíweruti, liábin rügüña lun líwerujan, lun láfarajan lúma lun lagünrinchagun, ánjein áu, niábiña lun jibíjin ibágari, áni lun jibíjini gíbe. ¹¹ Áu, ítara níñia queísi ában joúniri mudún le buíti, le gayáraati líchuguni libágari jawágu lilügüniña mudún. ¹² Ánjein le ñadágimeinrügüti luágu fáyeiti, dan le laríjin liábin

anímaalu le jabísá mudún, ába lígiruniña mudún, ába leíbaagun, ladüga máma lan oúnigiruti buiti ligía, máma gíñe lilügüniña mudún. Ábati liábin jabísá mudún, ába lawáraüdaguagüdüniña. 13 Wügüri ligía eíbaaguati ladüga luwádigimariña lan luágurügü fáyeiti, meberesegúnti jáu mudún.

14-15 'Áu oúnigirutibei buiti. Ítara quei nisúbudin lun Núguchi áni subúdi Núguchi nun, ítara líña gíñe jasúbudin nánigu nun, subúdi jamána gíñe queísi subúdi jamáni mudún joúniri. Rúnumuti nibágari jawágu queísi líchuguni oúnigiruti mudún libágari jawágu lilügüniña mudún. 16 Añájein gíñe ámu gürígia ja lúnbaña nánigu jamá ja mámabaña juríu, lúnti gíñe nanügüniña lun nánigu jamá. Jagáambubadina, ábame jeréderun súngubei lídan ában lúma ában oúnigiruti.

17 'Jínsiñetina lun Núguchi, ladüga níchugubei nibágari luágu uboú, ligía ábayame nibíjini. 18 Magída lubeí ni ában gürígia nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Núguchi nun.

19 Dan le jagáambubalin juríu dimúrei buri le, ábaya jafánreinragun. 20 Sarágu jáña jádaangiñe aríñagutiña.

—¿Cásan uágu jadüga gásu láu, níjeingusan espíritu wuríbati lídan áni lülüjali láu?

21 Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdün espíritu wuríbati maríjintiña?

Merésibirun jamáni juríu Jesúsu

22 Dan ligía lidáani luríbouga, ladügüñati fédu le lánina tedéregerún témpulu Jerusalén lun Búngiu. 23 Níñeinti Jesúsu eíbugañaja témpulurugu luágu corredór le gíribei Láni Salomón corredór. 24 Ába jagúriridagun juríu láu, ába jaríñagun lun.

—¿Darísan ídaba bígirawa láu machoúruni? Ánjein amürü lubeí Crístubei, aríñagabeí furáangu.

25 Ába laríñagun Jesúsu joun.

—Aríñaga náali, mafíñetün nun. Sún buri cátei le nadáagubei láu lugúmadin Núguchi, arúfuda lumúti furáangu. 26 Jugúya, mafíñetün ladüga máma jumá jádaangiñe nilügüniña mudún quei bugája naríñaguni jun. 27 Subúdi jamúti nilügüniña mudún numálali, subúdi numútiña gíñe, áni falá jamutina. 28 Rútina ibágari magúmuchaditi joun áni mefériderubaña, úabei gíñe agídarutiña nújaburugugiñe. 29 Núguchi le weíribei jaweí súngubei, ligía íchugubaliña nun, áni úati ni ában lun lagídaruniña lújaburugugiñe. 30 Áu lúma Búngiu Úguchili ában méme wagía.

31 Ábayati jabúdajan juríu dübü lun jachüraguni luágun.
32 Ába laríñagun Jesúsu joun.

—Gíbeeli cátei buíti nadüga jigíbugiñe láu lubáfu Búngiu, ¿cábagi lídaangiñe uágu jíchaagua dübü nuágu?

33 Ába jaríñagun juríu lun.

—Míchaagunbadiwa dübü buágu luágu ni cáta buíti badüga, ladüga anába báali lan Búngiu láu berérun. Wügüri rügüñadibu, áni bíchaaguña búngua quei Búngiu.

34 Ábatí laríñagun Jesúsu joun.

—Bürüwati lídan jílúrudun luágu aríñaga lan Búngiu. “búngiu buri juguya”. 35 Subúditi woun luágu siñá lan leyéedawagún láu le taríñagubei Lerérunt Búngiu, áni aríñagatu líburu tugúya luágu wa lániña Búngiu gürígia ja erésibirubalin lerérunt lun jíchuguni joun gürígia, quei búngiugu. 36 Áanjeinti anúadaja lubálina Búngiu, ába loúnajanina uboúagun, ¿ída liñáti jaríñagunbei luágu anába náni láu nariñagun luágu Liraü nan Búngiu? 37 Ájein madügün nan cátei lé buri ladügübei Núguchi, mafíñera jumá nun, 38 ájein nadüga, íbini mafíñerun jumá nun, afíñe jumá luágu buri cátei le nadügübei, subúdi jumámugei luágu níjein lan Núguchi nídan, áni anájein lan gíñe lídan Núguchi.

39 Ábaya jálugun jadáüruni, ába leséfurun jaweí.

40 Ábatí lagíribudun Jesúsu loubáfurugun dúna Jordán, ába leréderun ñi lídan fulásu le ñí lubeí meja labásteragüdaja Juan.

41 Sarágu jáña gürígia ñüdüntiña aríjei, ába buri jaríñagun.

—Láu sun madügün lan Juan ni ában miláguru, inárüni sun le laríñagubei luágu wügüri le.

42 Ába jafíñerun sarágu gürígia luágu Jesúsu lídan fulásu ligía.

11

Loúnwen Lázaro

1 Ñíñein ában wügüri sánditi, gíriti Lázaro, lílana fulásu le gíribei Betánia, le tageíra María túma Márta to tibugaña. 2 María tugúya, to lítu Lázaro le sándibei, tugúya to éseruboun ibíñei luágun lugúdi Jesúsu, ába tarágajani láu tídiburi. 3 Ábatí joúnajan bián ítunu ja, aríñaga lun Jesúsu.

—Jesúsu, sándiñeintia bumáda.

4 Dan lagáambunbalin Jesúsu cátei le, ába laríñagun.

—Mámabei oúweni lébeja cátei lídaangiñe sándi le, lúntibei laríjíniwa luweírigun Búngiu, lúma gíñe lun laríjíniwa luweírigun Liraü Búngiu lídaangiñe sándi ligía.

5 Láu sun weíri lan jínsiñe Márta, María, lúma Lázaro lun Jesúsu, 6 dan le jaríñawagúnbei lun luágu sándiñein lan Lázaro, reídeigili bián wéyu lídan fulásu le ñí lubei. 7 Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málügili lueígiñe jálugun juríu jáfarunibu láu dübü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eíbuga ában gürígia wéyuagu, machúgeragúnbei, ladüga laríjubei lan larúgounga le yábei uboúagu, ¹⁰ ánjein eíbuga áriebu, lachúgeraguba ladüga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neíbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguarügü arúmuguni ladímueraja. ¹⁴ Ábati laríñagun Jesúsu joun, furáangu.

—Jilá Lázaro. ¹⁵ Gúndaatina láu úa nan ñi, ladüga buítimaati ítara jun, afíñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jíbiri disípulugu.

—Queímoun gíñe, jilá wamámuga úara lúma.

Jesúsu ásaaragüdübei lídaangiñe oúweni, ligía íchiga ibágari

¹⁷ Dan le lachülürünbei Jesúsu, gádürüjali wéyu lueígiñe labunún Lázaro. ¹⁸ Lidíse Betánia lueí Jerusalén quei bián quilómetros dimí. ¹⁹ Sarágu jáñati jádaangiñe juríu ñüdüntiña Jerusaléngiñe bisídoun Márta túma María lun jíchugun ñurúguau joun luágu loúnwen jamúlen. ²⁰ Dan tagáambunbei Márta luágu níteeli lan Jesúsu achülüreina, ába táfuridun lubároun, ánjoun María, ába teréderun múnada. ²¹ Ába taríñagun Márta lun Jesúsu.

—Lun jamúga ya ban, moúnwenti jamúga namúlen, ²² áni subúditi nun luágu líchugubei lan Búngiu sun le bamúriaian lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵ Ábati laríñagun Jesúsu tun.

—Áu le ásaaragüdübalíña jiláaña, rúneí jabágari joun lárigóún. Le afíñeti nuágu, gayáraati loúnwen, labágaridayaba, ²⁶ áni sun le wínwangilibei áni afíñeti nuágu, labágariduba gíñe lúma Búngiu súnwandan. ¿Afíñetibú?

²⁷ Taríñaga lun.

—Ánja, Nabúreme, afíñetiña luágu bugúya lan Crístubei le Liraü Búngiu, lé meja lúnbei liábin uboúagun.

Layájun Jesúsu lubádu lumúaja Lázaro

²⁸ Lárigiñe taríñaguni Márta le, ába tídin oúgoun María, ába taríñagun tun joúnguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu. ³⁰ Mebélugiliti Jesúsu ubúrugun, lídaañein fulásu le ñí lubei tadárirei Márta. ³¹ Dan le jaríjinbei juríu ja ñíbaña múnada túma María ámalijoun tásaarun ába táfuridun furésegueina, ába joúdin tárigi, jarítagun luágu teíbuga lán yebe luágu umúajaü ayájua.

³² Dánti le tachüllürünbei María le ñíjin lubeí Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, moúnwenti jamúga namúlen.

³³ Dan le laríjin Jesúsu tayájun María jáma juríu ja ñübinbaña túma, ába lírudagun tídan lanígi, ³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu. ³⁶ Ábatí jaríñagun juríu.

—¡Aríja jumá luweírin meja línsiñe lun!

³⁷ Ñíñanu jádaangiñe aríñagutiña.

—Niján le aríjagüdübalin wügüri le maríjinbei, ¿siñáti jamúga funásan ladügün lun moúnwen lan Lázaro?

Lásaarun Lázaro lídaangiñe oúweni

³⁸ Ábaya tírudagun lanígi Jesúsu, ába layárafadun lun umúajaü. Umúajaü ligía ában jýu luágu dübü, ñíñein ában dübü lidaüme.

³⁹ Ába laríñagun Jesúsu.

—Gidájumei dübü.

Ába taríñagun Márta lun.

—Mósutia jíngiaali lan ladüga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan afíñe nuágu, baríjubei lan luweírigun Búngiu?

⁴¹ Ábatí jagídaruni dübü, ába laríjin Jesúsu siélun, ába laríñagun.

—Núguchi, teínqui numútibu luágu bagáambunina. ⁴² Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jaffíñerun luágu amürü lan oúnajabalina.

⁴³ Lárigiñe laríñaguni cátei le, ába lagúaragun.

—¡Lázaro, furíba ñígiñe!

⁴⁴ Ába láfuridun jiláali láu lújabu lúma lugúdi gürágu táu gamísá, lúma ligíbu táu ában gamísá. Ába laríñagun Jesúsu joun.

—Farára jumeí, ígira jumeí lun lídin.

Elédeguni lun lárügüdüniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja ñüdünbaña túma María, aríja jameí le ladügübei Jesúsu, ába jafíñerun luágú. ⁴⁶ Ñíñanu jádaangiñe, ába joúdin jámoun fariséogu, ába jabájüdaguni le ladügübei Jesúsu joun. ⁴⁷ Ábatí jayábin fariséogu jáma jábutigu fádirigu, ába joúndaragun jáma jíñun-ágei agúmadijatiña, ába jaríñagun.

—¿Cábasan wadüga? Ladáaguñatia wügüri le sarágu miláguru. ⁴⁸ Ángeinti wígira ítara, jafíñeruba sun gürígia luágú, ábameti jayábin gumádimatiña Rómana, ábame jagúmuchaguagüdünun walígilisin láu sun warásan.

⁴⁹ Ñíñein ában jádaangiñe, gíriti Gáifasi, ligía jábutibei fádirigu lídan irúmu ligía, ába laríñagun joun.

—Ibídiñeti ni cáta jun, ⁵⁰ maríjin jumeí luágú buítima lan woun lun loúnwen ábanrügü wügüri jawágu jíbiri, máma lun lagünrinchawagún sun warásan.

⁵¹ Máma láu láni Gáifasi lúngua laríñagei líra, ladüga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágú loúweba lan Jesúsu jawágu juríu, ⁵² áni máamarügü jawágu juríu, lun giñe loúndaruniña sun lirajüñü Búngiu ja díseguabaña jawáriuagua. ⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubeí meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíriti Efraín, yaráfa lun fulásu mageírawati. Ába leréderun ñi jámaláni disípulugu.

⁵⁵ Yaráfaaliti jafédun juríu le gíribei páscua, sarágu jáña gürígia ñüdün Jerusalén lun jadügüni igáburi le lánina jarúmadun lubáragiñe fédu ligía. ⁵⁶ Jálua jañeinti Jesúsu, dánti le témpulurugúñanu lan, ába jálüğüdajan jámagua.

—¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dimúrei lun le lan asúbudiruti jalíañein lan Jesúsu, lun lan laríñaguni, barü jamámugei adáüra.

12

*Tájurudaguni ában würi lugúdi Jesúsu
(Mt 26.6-13; Mr 14.3-9)*

¹ Sísi wéyu lubáragiñe páscua, ába lídin Jesúsu Betánia, le ñí lubei lagánawa Lázaro le lásaaragüdübei jádaangiñe jiláaña lúnya labágaridun. ² Ába jadügün ában adíneruni ñi luágu láni fuleísei, Márta, tugúya éjeeraguboun, Lázaro ában jádaangiñe ja ñúnbaña luágu dábula lúma Jesúsu. ³ Ábati tanügün María ában paénti ibíñei le séruti, ába tájurudaguni lugúdi Jesúsu láu, ába tarágajani láu tídiburi, ába lejémougadun ibíñei ligía sun ñi múnada. ⁴ Ába laríñagun Júdas Iscarióte, le liraü Simón, ában jádaangiñe láni Jesúsu disípulu, le méme lúnbei lalúguruni.

⁵ —¿Ánsan malúgurún lubei ibíñei le luágu ürüwa-san fiádürü lun jíderawagún gudémetiña?

⁶ Laríñagunbei Júdas ítara, máma luágu berése lan jáu gudémetiña, laríñagunbei ítara ladüga jíweru lan, áni queíti ligía lan gámabarun lágei seínsu, ábaja líwerujan lídaangiñe le íchugúbei tídoun. ⁷ Ábati laríñagun Jesúsu lun.

—Ígiraboún, taráanseruñadina lubá lachülürün luwéyuri ná bunúniwa. ⁸ Súnwandan ñíbaña lan gudémetiña jídan, ánjeinti áu, mámaba súnwandan júma nan.

Elédeguna lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsu Betánia, ába joúdin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jiláaña. ¹⁰ Ába giñéti juáradun jábutigu fádirigu lídan ában lun giñe jáfaruni Lázaro, ¹¹ ladüga sarágu jáña lan juríu adíseduntiña jaweí lun jafíñerun luágu Jesúsu, lídaangiñeti Lázaro.

Lebélurun Jesúsu ubúrugun Jerusalén (Mt 21.1-11; Mr 11.1-11; Lc 19.28-40)

¹² Sarágu jáña gürígia ñüdüntiña Jerusalén lubá fédu le páscua, larúgan, ába jasúbudiruni luágu lachülüruba lan Jesúsu ñíjin ubúrugun. ¹³ Ábati játüjan tubána fáluma, ába jáfuridun lubároun Jesúsu agúarajeina.

—¡Uweíriguni lun Búngiu! ¡Biníwati le ñübinbei lídan líri Wabúreme! ¡Biníwati lurúeite Israél!

¹⁴ Ába ladárirun Jesúsu ában burígü, ába laweínruni quei laríñagun tídan Lerérun Búngiu.

¹⁵ Manúfudebá, ubúrugu le Sión,
níten burúeite waríñu luágu ában burígü.

¹⁶ Úati yebe gunfaráanda jamáni láni disípulu, cátei le wéyu ligía, lárigiñe, dan le belújali Jesúsu lídoun luweírigun yágüta

siélu, ába jarítagun luágu bürüwa lan sun cátei le luágu, áni ítara líñia lan lasúseredun lun.

¹⁷ Ja gürígia ja ñíbaña dan le lagúarun Jesúsu lun Lázaro lídaangiñe lumúaja, ába lásaaragüduni lídaangiñe oúweni, abájüdagua jamúti le jaríjubei. ¹⁸ Ligía lébubei jáfuridun gürígia erésibirei Jesúsu, ladüga jagáambun luágu miláguru le ladügübei. ¹⁹ Ábati jaríñagun fariséogu jámagua.

—Aríja jumáali luágu, siñá lan ladügüniwa ni cáta, sun gürígia añágüran lúma.

Jálujani güríegu Jesúsu

²⁰ Ñíñanu güríegu jádan gürígia ja ñüdünbäña Jerusalén lun jájuduragun lun Búngiu, ²¹ ába jayábin güríegu jagía lúmoun Felípe, le Betsáidana, ñi Galiléa, ába jaríñagun lun.

—Buséntiwa waríjini Jesúsu.

²² Ába lídin Felípe, ába laríñaguni lun Andrés, ába joúdin biángubei jagía abájüdagui lun Jesúsu. ²³ Ábati laríñagun Jesúsu joun.

—Chüllüja óra lun líchugúniwa uweíriguni nun, áu le Wügüri Garaüwarügüti. ²⁴ Ninárün jáu luágu ánjein lan máburujan ában lágu türígu múarugun lun loúnwen, ában mémebei águu, ánjein oúwe, lalúbajoúba sarágu lídaangiñe. ²⁵ Le jínsiñejabuti lun libágari, lefériderubei, ánjein le mebéresenti láu libágari lídan uboú le, lareídubei lubá ibágari le magúmuchaditi, siélu. ²⁶ Le busénti lesériwidunina, lúnti lafálarunina, áni le ñí numuti, ñíbei gíñe le esériwidubalina. Le esériwidutina, líchuguba Núguchi uweíriguni lun.

Ladímuréjan Jesúsu luágu loúnwén

²⁷ 'Níjein ában oúnwenbun líbe samínaü nuágu guetó. ¿Cábasan naríñaga? ¿Naríñaga funa. "Núguchi, sálba bána lídaangiñe le lúnbei lasúseredun nun guetó"? Uá, lun líra niábin. ²⁸ Núguchi, iñurúalá bíri nídaangiñe.

Ábati lagaambúniwa ában umálali siélugiñe le aríñagubei.

—Iñúra náali níri bidaangiñe, áni niñúruyabei.

²⁹ Ábati jaríñagun gürígia ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

³⁰ Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein. ³¹ Niján dan ligía lun lagúserawagüdün uboú, áni guetóba lefériderirei Máfia, le agúmadijabei lídan uboú le, lubáfu. ³² Dánmeti le niñurúniwa múarugugíñe, nanügübaña súngubei nómoun.

33 Láu líra laríñaguñein luágu loúweba lan luágu ában gurúwa.

34 Ába jaríñagun gürígia lun.

—Agáambaadiwa lalijoún tídan walíburun to lánina lilúrudun Moisés luágu labágariduba lan Crístu lun sun dan. ¿Ída liñáti baríñagunbei luágu liñurúaba lan Wügüri Garaüwarügüti? ¿Cáteigi Wügüri Garaüwarügüti ligía?

35 Ábati laríñagun Jesúsu joun.

—Níchiga mémebei larúgounga jun luágurügü murúsun dan. Eíbuga jumá lídan larúgounga ligía sun anájagua lan júma lun gayáraabeí lan jachüllürün le ñíjin lubeí jabúseera jachüllürün, márügündün lámugaün lubúriga, ladüga le eíbuguti lídan lubúriga, ibídiñeti lun jalíñouñein lan. ³⁶ Afíñe jumá lubeíti nuágu sun anájagua lan júma lun lirajüñü jumá larúgounga.

Lárigiñe laríñaguni Jesúsu sún buri cátei le, ába lídin, ába larámudagun jaweí.

Lébuna mafíñen jamá juríu luágu Jesúsu

37 Láu sun adüga lan Jesúsu sarágu miláguru jagíbugiñe, mafíñetiña luágu. ³⁸ Láu líra jagúnculirei le laríñagubei proféta Isaías.

¿Cásan afíñerubei luágu wáni ugánu?

¿Ca un larúfudei Wabúreme Búngiu lubáfu?

39 Quei mafíñerun jabeí, ába lasúseredun le ámu dimúrei le laríñagubei Isaías tídan labürüjan, joun.

40 Darú lumuti Búngiu jaríjin, derégüda loun janígi,
lun maríjin jamá láu jágu,
úame gunfaráanda jamá,
mayábin jagíame nun lun nareídagüagüduniña.

41 Laríñagunbalin Isaías le luágu Jesúsu ladüga aríja láali lan luweírigun.

42 Láu sun líra, sarágu jáña jádaangiñe juríu afíñerutiña luágu Jesúsu ásta jádaangiñe ábutigu, áni maríñagun jamúti boúgudi, le janúfude jaweí fariséogu, lueí jabúguniña tídaangiñe jaligilisin.
43 Ladüga gúndaatimaatiña láu inébesei le jíchugubei gürígia sügü láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

44 Ába laríñagun Jesúsu láu umálali jéreti.

—Le afíñeti nuágu, máma rügüñein nuágu lafíñera, afíñeti gíñe luágu Núguchi le oúnajabalina. ⁴⁵ Le gíñe aríjtina, laríjíñein gíñe le oúnajabalina. ⁴⁶ Áu lámpubei, niábinbei uboúagun lun sun lan ja afíñetiña nuágu, merédera jamámuga lídan lubúriga. ⁴⁷ Ánjein le agáambuti nerérun áni madügünti gásu láu, máma áu asíadirubalin, ladüga máma niábiña lun nasíadiruniña gürígia uboúagu, niábiña asálbaraña. ⁴⁸ Le mebéresenti náu, madügün

ligía gásu láu nerérun, níjein lúnti lasádiruni. dimúrei buri le aríñaga nálibei, ligíaba asíadirei lídaanme lagúmujoún wéyu. ⁴⁹ Ladüga madímurejaantina luágú náni núngua, Núguchi le oúnajabalina, ligía aríñagubalin le lúnbei naríñaguni nun lúma le lúnbei narufudajani. ⁵⁰ Áni subúdi numúti luágú barü lan lugúmadin Núguchi ibágari magúmuchaditi joun ja adügúbalin le lubeíbei. Le lubeíti naríñagubei, naríñaguni quei laríñaguni Núguchi nun.

13

Lachibuni Jesúsu jagúdi láni disípulugu

¹ Ábanrügaali wéyu lubá fédu le páscua. Subúdi láali Jesúsu luágú chülüja lan óra lun lígiruni uboú le lun lídin lúmoun Lúguchi. Súnwandan meja jínsiñe jamá lánigu ja uboúagubaña lun, guetó larúfuduñeinti línsiñejabu lídan luweírin-ágei.

²⁻⁴ Dálaalíti Máfia larítagun tídoun lanígi Júdas Iscarióte lun lederegeruni Jesúsu joun láganíñu. Jesúsu, láu sun subúdi láni luágú lúmagiñe lan Búngiu liábin, luágú lúmounba lan gíñe Búngiu lagíribuda, luágú gíñe rúlaali lan Úguchili sun cátei lújaburugun, ába larúfuduni luweírin-ágei ünabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáüragun, ába lagürün ában tuáya liránaagua. ⁵ Ába líchugun dúna lídoun ában dabárasi, ába lachibuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachibaali lan lugúdi Simón Pédro, ába laríñagun lun.

—Nabúreme, ¿bachíbaalisan nugúdi?

⁷ Ába laríñagun Jesúsu lun.

—Guetó, úati gunfaráanda báni le nadügübei, gunfaráanda bubeí lárígíñe.

⁸ Ába laríñagun Pédro lun.

—¡Machíbun bubeí nugúdi!

Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába laríñagun Simón Pédro lun.

—Mámarügülá nugúdi bachíba, chibábei gíñe nújabu lúma nigíbu.

¹⁰ Laríñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladüga jarúmati líbiri lúgubu. Jugúya, jarúmatün, mámarügülá líña sun jugúya.

¹¹ Le laríñagunbei luágú máma lan sun jagía jarúmatiña, ladüga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáürunun gamísá to larágachuboun, ábaya lañúurun luágu dábula, ába laríñagun joun.

—¿Gunfaráanda jumútisan le nadügübei jun? ¹³ Jugúya agúajatün nun Maésturu, líma Nabúreme, áni richátün ladüga áu ligía, ¹⁴ áanjeinti chibá nubálín jugúdi láu sun Jumáesturun nan áni Jabúreme, lúnti gíñe jachíbuni jugúdi júmagua. ¹⁵ Rújadina ában jémpulu jun lun jadügünü líbe méme le nadügübei. ¹⁶ Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalín. ¹⁷ Áanjein gunfaráanda jumá buri cátei le áni adüga jumeíme, gúndaabadün.

¹⁸ ‘Mámatia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatimaati. Áni lúnti lagúncularún le tídaanbei Lerérunt Búngiu. “Garábagua le eígubei núma, nuágún.” ¹⁹ Naríñaguñein le jun lubáragiñe lasúseredun, lun dánme lan le lasúseredun, afíñe jumámuga luágu áu lan Crístubei. ²⁰ Ninárün jáu luágu le lan erésibiruti le noúnajan, resíbi lumútina gíñe, áni le erésibirutina, resíbi lumúti gíñe le oúnajabalina.

*Ladímurejani Jesúsu luágu ledéregerubei lan Júdas
(Mt 26.20-25; Mr 14.17-21; Lc 22.21-23)*

²¹ Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregerubadina lan ában jídaangiñe.

²² Ábati jagúmeserun disípulugu ariagua jawoúguoún, ibídiñounga joun ca lan jádaangiñe uágubei ladímureja Jesúsu.

²³ Áu Juan, le abürübárun gárada to, ában jádaangiñe disípulugu, le weíribei ínsiñe lun Jesúsu, loúbagiñeñádina lídan adíneruni, ²⁴ ába ladügün Simón Pédro seíni nun lun nálügündüni Jesúsu ca lan jádaangiñe uágubei ladímureja. ²⁵ Ábati nayárafaduntima lun Jesúsu, ába naríñagun lun.

—Nabúreme, ¿cáteisan lúnbei ledéregerunibu?

²⁶ Ába laríñagun Jesúsu nun.

—Nadüdüragüda murúsun fein, le únti níchigoun, ligíaba edéregerana.

Ábati ladüdüragüdün murúsun fein, ába líchugunun lun Júdas Iscarióte, le liraü Simón. ²⁷ Quei lárügündünun Júdas fein tugúya, ítará lebélurun Máfia tídon lanígi. Ábati laríñagun Jesúsu lun.

—Le lúnbei badügünü, adügabeí furése.

²⁸ Úati gunfaráanda láni ni ában jádaangiñe ja eígibaña luágu dábula ca lan uágu laríñagei Jesúsu líra lun. ²⁹ Quei Júdas lubeí táubei lágei seínsu, sun jaríñagun yebéti laríñaguña Jesúsu lun lun lagáñjani le jabúseerubei lubá fédu, o lun lan líchugun seínsu

joun gudémetiña. ³⁰ Lárigiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Lárigiñe láfuridun Júdas, ába laríñagun Jesúsu.

—Larijúa nuweírigun, áu le Wügüri Garaüwarügüti, guetó, arijúame luweírigun Úguchili nuágu. ³² Ánjeinti arúfuda nubálín luweírigun Búngiu, larúfidubei gíñe Búngiu nuweírigun, áni ladügüübei madíse. ³³ Nirájüñü, úaadináme júma sarágu dan. Jáluajabadina, le méme nariñagubei joun juríu nariñagayaali jun guetó. Siñábei jídin le ñíjinba lubeí nídin. ³⁴ Níchigaali iséri gumádi le jun. lun jínsiñegua jumá júngua. Ítara quei jínsiñenun, lúnti gíñe jínsiñegua jumá júngua. ³⁵ Ánjaün jínsiñegua júngua, jasúbudirubei sun gürígia luágu náni jumá disipulugu.

Ladímurjani Jesúsu luágu leyéedaguba lan Pédro luágu

(Mt 26.31-35; Mr 14.27-31; Lc 22.31-34)

³⁶ Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñíjinbadina lubeí guetó, lachüllerüba wéyu lun bafálarubadina lan.

³⁷ Laríñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸ Laríñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu ürüwa weíyasu lubáragiñe layúgurujan gáyu.

14

Jesúsu, ligía ümabei lun lúmoun Úguchili

¹ 'Merédera jumá láu líbe samínaü, afíñe méme jumá luágu Búngiu, afíñe méme jugúyame nuágu. ² Níjein sarágu ubáraü tídan lúban Núguchi lun jaganoún gürígia ñi, lun jamúga máma lan ítara líña, ariñaga náali jamúga jun. Neíbuga lubeíti aráanseja ában ubáraü jubá. ³ Lárigiñeme nídin, aráanse neíme ubáraü ligía, ábame nagíribudunya lun nanügünün númagua, lun ñi jumá le méme ñí numuti. ⁴ Subúdi jumúti jalíñounbadina lan, subúdi jumúti gíñe üma.

⁵ Laríñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni üma?

⁶ Laríñaga Jesúsu lun.

—Lun lachülürüniwa lúmoun Búngiu, áu ümabei, áu inárüni, áu ibágari. Nueígiñe rügүñein gayára lan lachülürüniwa lúmoun Búngiu Úguchili. ⁷ Lun jamúga subúdi nan jun buídu, subúdi jumúti jamúga gíñe Núguchi, subúdi jumáaliti lúmagiñe guetó, ladüga aríajaja jumáali láu jaríjinina.

⁸ Laríñagati Felípe lun.

—Arúfudabeí Úguchili woun, buíduruñaalime woun.

⁹ Laríñaga Jesúsu lun.

—Felípe, lüjadina júma, ¿ibídiñegidina bun? Le aríjitina, laríjíñein gíñe Búngiu Úguchili, ¿cáti uágu baríñaga nun lun narúfuduni Búngiu Úguchili jun? ¹⁰ ¿Mafíñetibusan luágu anájein lan lídan Búngiu Úguchili, níjein lan gíñe Búngiu Úguchili nídan? Lé buri cátei le naríñagubei jun, máma lan láu náni núnqua naríñagei, Búngiu Úguchili le aganoúbei nídan, ligía adügübalin luwádigimari guánarü. ¹¹ Afíñe jumá nun luágu anájein lan lídan Búngiu Úguchili, áni lan níjein gíñe Búngiu Úguchili nídan, íbini luágurügü cátei lé buri nadügübei, afíñe jumá nun. ¹² Ninárün jáu, luágu le lan afíñeti nuágu, ladügübei lan cátei lé buri nadügübei, ladügüba buri cátei weínamutimaati, ladüga áu, neíbuga le ñíjin lubeí Núguchi. ¹³ Sun le jamúriajan lídan níri, nadügübei, arúfuda námugei luweírigun Núguchi. ¹⁴ Nadügübei furúmieguarügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ 'Ánjein jínsiñe nubeí jun, gúnfuli jumá láu le nubeíbei, ¹⁶ ábame nayúmuragun lun Núguchi lun loúnajan ámu jun newéñegua lun líderagunün, lun gíñe líchugun gurásu jun. Ligíaba Sífiri Sándu le subúdijabúbei lun sun inárüni, jumabei súnwandan. ¹⁷ Ja lánigu uboú le, siñáti jerésibiruni Sífiri Sándu ligía, ladüga siñá lan jaríjini ni jasúbudiruni, ánjein jugúya, subúdi jumáali, ladüga níjein júma áni leréderuba jídan. ¹⁸ Mígirun nubádün jábugua, nagíribudayaba lun júma nan. ¹⁹ Málujadina ánjana maríjin jamá gürígia, ánjein jugúya, jaríjubadina, áni gabágaribadün ladüga wínwañu níña lan. ²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Núguchi, jugúya nídan, áu gíñe jídan. ²¹ Le subúdijabuti lun nugúmadin áni úaragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Núguchi lun le jínsiñejabuti nun, jínsiñebi gíñe nun, arúfidagua áume núnqua lun.

²² Ába laríñagun Júdas (mámatia le Iscarióte).

—¿Cásan uágu barúfudaguba lubeí búngua woun, máma joun gürígia ja lánigu uboú le?

²³ Laríñaga Jesúsu lun.

—Le jínsiñejabuti nun, adügati gásu láu le nubeíbei, áni línsiñeduba lun Núguchi, ábame wayábin, áu lúma Núguchi, agánawa lúma. ²⁴ Le mínsiñejabuti nun, madügünti gásu láu le nubeíbei. Dimúrei le nariñagubei, máma náni, láni Núguchi le oúnajabalina.

²⁵ ‘Naríñaguñein sun le jun láu anájagua lan júma, ²⁶ Sífiri Sándu le lúnbei loúnajani Núguchi lídan níri lun líderagunün, larúfudajaba jun, larítaguagüdübädün gíñe luágu sun le aríñaga náalibei jun.

²⁷ ‘Neíbuga júmagiñe, nígiraali ñurúguaü júma—ában luwúyeri ñurúguaü le áurügübei gayára lan níchiguni. Mítaraanti queísi ñurúguaü le líchugubei uboú. Magíbedalá jisáminan, manúfude jugúyame. ²⁸ Agáamba jumáali nariñagun luágu neíbuga lan, áni nagíribidayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu neíbuga lan lúmoun Núguchi, ladüga ligía íñugutimaati nueí. ²⁹ Ligía aríñaga gíñe nubálín le jun, lun dánme lan lasúseredun, afíñe jumámuga.

³⁰ ‘Madímurejaanjadina sarágu júma, ladüga níteeli le agúmadijabei lídan uboú le. Láu sun mabáfu lan nuágu, ³¹ lúnti ítara lúba lan lun lasúbudiruni uboú luágu jínsiñe lan Núguchi nun, áni adüga náni le lubeíbei nun. Sarájuma, queímoun yágiñe.

15

Tídibu beíbei lúma tilímun

¹ Laríñaga Jesúsu.

—Ítara níña quei ában tídibu beíbei le tímatimaati, Núguchi, ítara líña quei le oúnigirubarun nádü. ² Chaün lumuti furúmieguarügü lídaangiñe nilímun le míinti, atírimuja lumúti le gínbbei, jarúmagüdaleí lúntima lagíindun. ³ Jugúya, jarúmaadün lárigi narúfudajan jun. ⁴ Lídan méme jumá ában núma quei lídaañadina lan ában júma. Ában límu siñáti lagíindun áanjein mámañein lubeí luágu ídibu, ítara jíña gíñe, siñáti jagíindun áanjein máma lubeí badüleñu jíña nuágu.

⁵ ‘Áu ídibubei, jugúya límu. Le badüleñuti nuágu, badüleñu áu luágu, lagíinduba gíbe, siñáti jadügün ni cáta úouga áu. ⁶ Le merédeti badüleñu nuágu, lágurúba boúgudin, ábame lamábeidun queí buri límu le abúdajoúbei lun lagudúniwa.

⁷ ‘Ánjaün asígira badüleñu nuágu, mabúlieidun jumeíme le narúfudajabei, gayáraabei jamúriaajani le jabúseerun, áni jibíjubei. ⁸ Ibíjati Núguchi inébesei dan le gíbe lan jagíindun, áni arúfuda jumúti luágu náni jumá disípulugu ja tímatimaatiña láu líra. ⁹ Jínsiñetün nun ítara quei nínsiñe lun Núguchi, ítara méme jumá lubeíti lídan ínsiñeni le nánibei jun. ¹⁰ Ánjaün ñüdüñun láu le

nubeíbei, lídan mémebadün ínsiñeni le nánibei jun, ítara quei nídin láu le lubeíbei Núguchi, áni lídan mémeñadina ínsiñeni le lánibei nun.

¹¹ ‘Nadímurejánbei jun ítara lun gayára lan jasúbusiruni úgundani le níchugubei, le gumúti. ¹² Niján nugúmadinbei. lun jínsiñegua jumá júngua quei jínsiñe nun. ¹³ Luweírin-ägei ínsiñeni le gayáraabei gáni láni gürígia, lun líchuguni libágari jawágu lumádagu. ¹⁴ Numádagu jugúya, ánjein jadüga le nubeíbei. ¹⁵ Manügün náadün quei músu, ladüga ibídiñeti le ladügübei liyúbudiri músu lun, nanügüünün quei numádagu ladüga subúdigüda náali sun le laríñagubei Núguchi nun jun. ¹⁶ Máma jugúya anúadajabalina, áu anúadajabalün, áni rújadina dimúrei jun lun jagíindun gíbe, lun gíñe ladúrarun jin. Ítara lúba líchuguni Núguchi sun le jamúriajan lúma lídan níri jun. ¹⁷ Ítara líñia lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun uboú

¹⁸ ‘Ánjaün iyéreeguda lun uboú, subúdi jumeí luágu áu lan iyéreegudubei lun furúmiñe. ¹⁹ Lun jamúga lánigu jumá uboú, jínsiñetün jamúga joun gürígia ja lánigu uboú quei jínsiñe jánigu joun. Anúadaja numútün jádaangíñe ja lánigu uboú, ligía jiyéreegunbei lun uboú ladüga mámaadün lan láni uboú. ²⁰ Jarítagua jumá luágu le naríñagubei jun. “Úati músu íñuguti lueí liyúbudiri.” Ánjein eíbaaja jamáadina lubeí, jeíbaajabadün gíñe, ánjein giñeti madügün jabeí gásu láu narúfudajan, madügünbaña gíñe gásu jáu. ²¹ Jadügübei sun le jun, nueígiñe, ladüga ibídiñeti lan le oúnajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figoú ligía. ²³ Ja iyéreejabúaña nun, iyéreeguti gíñe Núguchi joun. ²⁴ Madúnruntiña jamúga lun jamúga madügün nan ni cáta le úagili adügüti jagánagua, guetó arija jamáali buri cátei ligía áni láu sun líra iyéreegugidina joun, iyéreegu gíñe Núguchi joun. ²⁵ Wel, lasúseredunbei le ladüga lúnti lan lagúñfulirun dimúrei le bürüwañubei lídan jalúrudun. “Ába niyéreegudun joun, mébunouga.”

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei noúnajani luágu loúbadina Núguchi, ligíaba adímureja luágu náni fuleísei. ²⁷ Jugúya, jadímurejaba gíñe luágu náni fuleísei, ladüga númañadün lan lúmagiñe furúmiñeti dan.

16

¹ 'Nariñaguñein buri cátei le jun lun moúnwen lan jafíñen nuágu. ² Jabúgagubadün tídaangiñe jalígilisin, wuríbabei dan jun daríme lun ánjaün lan láfaragua furúmierügü gúrígia jilágubei, larítaguba luágu lesériwiduñein lan Búngiu láu líra. ³ Jadügübei líra ladüga masúbudirun jamágili lan Núguchi, masúbudirun jamána. ⁴ Naríñaguñein le jun, lun dánme lan le lachülürün dan ligía, lun jarítagun luágu aríñaga náali lán meja jun.

Le ladügübei Sífiri Sándu

'Maríñagun numúti meja le jun lúmagiñe binárü ladüga meja júmañadina lan, ⁵ ánjein guetó, neíbuga lúmoun le oúnajabalina. Málügündün lumútina ni ában jídaangiñe jaliñounbadina lan, ⁶ jírurügütün luágu naríñaguni cátei lé buri jun. ⁷ Inárüni naríñagubei jun. buítimaati jun lun nídin, ladüga ánjana mídin, miábinbei Sífiri Sándu júmoun lun líderagunün, áni ánjana ñüdün, noúnajabe. ⁸ Dánme liábin, ladáriraguagüdübaña gúrígia ja uboúagubaña joúngua luágu gafígoun jamá, luágu gíñe níjein lan ában üma le lánina úarani, luágu gíñe lagúseragüdübaña lan Búngiu. ⁹ Larúfudubei joun luágu gafígoun jamá láu mafíñen jamá nuágu, ¹⁰ lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubeí Núguchi dánme le nígirunün. ¹¹ Lichuguba fe joun luágu lagúseragüdüun Búngiu, ladüga agúseragüda láali Máfia, le agúmadijabeí lídan uboú le.

¹² 'Gíbegili lúnti naríñaguni jun, jásíñerubei gunfaráanda guetó. ¹³ Dánme liábin Sífiri Sándu le lánina inárüni, larúfudajabeí sun inárüni jun, ladüga madímurejanbei luágu láni lúngua, le lagáambubei, ligíaba lariñaga. Lasúbudiragüdübei cátei lé buri lúnbei lasúseredun jun. ¹⁴ Lichuguba inébesei nun, ladüga lerésibiruba lídaangiñe ninárün, ábame lasúbudiragüdüni jun. ¹⁵ Sun le lúmabei Núguchi, náni gíñe, ligía naríñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ 'Málüjadina, ánjana maríjin jumá, múrusunmeya dan lárigiñe, ábayame jaríjinina, ladüga neíbuga le ñíjin lubeí Núguchi.

¹⁷ Ábati jálugüdagun jádaangiñe láni disípulugu jámagua, ába jaríñagun.

—¿Cásan míni lan le? Lariñaga woun luágu málujali lan ánjein maríjin wamá, múrusunya lánme dan lárigiñe, ábayame lan waríjini, ladüga leíbuga lan le ñíjin lubeí Lúguchi. ¹⁸ ¿Ca míni lan láu "murúsun dan lárigiñe le"? Úati gunfaráanda wamáni ca lan uágu ladímureja.

¹⁹ Ába lasúbudiruni Jesúsu luágu busén jama jálugüdaguni, ába laríñagun joun.

—Aríñagatina jun luágu málujadina lan ánjana maríjin jumá, murúsun lánme dan lárige, ábaya lánme járínina. ¿Ligia le uágubei jálugüdagua júmagua? ²⁰ Ninárün jáu luágu jayájuba lan, jírugua jugúyame, ánañati gürígia ja láni uboú le, jagúndaaruba. Láu sun líra, íbini járu jumá, lasáansiraguba járun lun ugúndanime. ²¹ Dan le tagúriaian lan ában würi, súfuritu ladüga chülüja lan lórate igári, lásun agúriaioúali lan irájü, marítagunjaro luágu igári, ladüga ugúndani le tasándirubei luágu agúriaajaru lan ában irájü uboúagu. ²² Ítara líña gíñe, jugúya jírutün guetó, narijayabadün, ábameti tabuinchun janígi láu ugúndani, ában ugúndani le úati gayáraati lagídaruni jueí.

²³ Lídaanme wéyu ligía, málugüdün jumádiname luágu ni cáta. Ninárün jáu luágu líchugubei lan Núguchi sun le jamúriajabei lídan níri lúma, jun. ²⁴ Chülü lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucristu, le ásiiragúbalin uboú

²⁵ Aríñaga náali buri cátei le jun láu jémpulu, inítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili. ²⁶ Lídaanme wéyu ligía, jamúriajaba lúma lídan níri, maríñaguntina luágu nayúmuraguba lan lun Núguchi juágu, ²⁷ ladüga ligía guánarü jínsiñetün lun. Jínsiñetün lun ladüga jínsiñe nan jun, afíñeedün gíñe luágu lúmagiñe lan Búngiu niábin. ²⁸ Lúmagiñe Búngiu Úguchili náfurida, ába niábin lídoun uboú le, guetó nígiraali uboú le, neíbugaya lúmoun Núguchi.

²⁹ Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu. ³⁰ Arija wamáali guetó luágu subúdi lan sun cátei bun, moún lumuti bálugüdün luágu ni cáta ladüga subúdi báni jarítagun gürígia. Luágu líra wafíñera luágu lúmagiñe lan Búngiu biábin.

³¹ Ába laríñagun Jesúsu joun.

—¿Afíñedünti guetó? ³² Iníteeli óra, áni guetó guetó, dánme le jachágaragun sun jugúya, cáda ában luágu loúbadina, ábame jígirunina nábugua, láu sun máma lan nábuguañadina ladüga níjein Núguchi núma. ³³ Naríñagunbalin sun le jun, lun jadárirun ñurúguaü lídan jafíñerun nuágu. Jasúfuriruba uboúagu, ganígi jumá, ¡siríguá náali uboú!

¹ Lárigiñe laríñaguni Jesúsu sun cátei le, ába laríjin siélun, ába laríñagun.

—Núguchi, chüllüja nidáani, rúba inébesei luágu Biraü, ru lámuga giñe Biraü inébesei bun. ² Rújadibu ubáfu lun Biraü jawágua sun gürígia lun líchugun ibágari magúmuchaditi joun ja bíchugubaña lun. ³ Niján lébunabei ibágari le magúmuchaditi, lun jasúbudirunibu gürígia amürü le Búngiu ábanrögüti, le inárüti, lúma lun jasúbudirunina, áu Jesucristu le boúnajabe.

⁴ ‘Rújadina uweíriguni bun ya uboúagu, gumú nan giñe le uágubei boúnajana. ⁵ Guetóti Núguchi, rúbei uweíriguni le méme méá nánibei nun biñüwarü lubáragiñe meja ñi lan uboú.

⁶ ‘Subúdigüda náali joun ja baságarubaña lídaangiñe uboú lun bíchuguniña nun, cátabu lan. Bánigu meja, ába bíchuguniña nun, ñüdüntiña láu le bubeíbei. ⁷ Guetó, subúdi jamáali luágu sun lan le bíchugubei nun búmagiñe lan liábin, ⁸ rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, afíñeeña giñe luágu amürü lan oúnajabalina.

⁹ ‘Ayúmuraguatina bun jawágua, mayúmuraguntina jawágua lánigu uboú, nayúmuragun jawágua ja bíchugubaña nun, ladüga báni jamá. ¹⁰ Sun le náni, báni, le báni, náni, arijúati nuweírigun jawágua.

¹¹ ‘Áu, merédeedina uboúagu, ánjein jagía, jeréderuba. Áu, neíbuga bümoun. Núguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma. ¹² Dán meja le jáma nan uboúagu, toúnigi numútiña meja ja bíchugubaña nun láu bubáfu, meférideruntina ni ában jádaangiñe lueídügü Júdas, lun lagúncularun le bürüwañubei tídan Berérun.

¹³ ‘Guetó, neíbuga le ñíjin bubeí, luágu anájagua lan uboúagu aríñaga numúti buri cátei le lun jabuinchun láu ugúndani méme le nuágubei. ¹⁴ Rúnaali berérun joun, ába jeyéreegudún lun uboú, ladüga máma jamá lánigu uboú ítara queísi máma lan lánigu uboú áu. ¹⁵ Mamúriaantina búma lun baságaruniña uboúagugiñe, namúriajan búma lun batoúnigiruniña lueí Máfia. ¹⁶ Ítara quei máma lan láni uboú áu, máma giñe láni uboú jagía. ¹⁷ Derégeguagüda báña joúngua bun, láu lubáfu berérun le inárütibe. ¹⁸ Quei boúnajanina jádoun lánigu uboú láu ugánu lánina asálbaruni, ítara giñe noúnajaniña jádoun lánigu uboú láu ugánu ligía. ¹⁹ Áni derégeguatina núngua bun jawágua, lun giñe jedéregeragun joúngua bun le tímatimaati.

²⁰ ‘Máma rügüñein jawágua namúriaja búma, amúriajatina giñe jawágua ja lúnbaña jafíñerun nuágua dánme le jagáambuni ugánu lánina asálbaruni jámagiñe. ²¹ Amúriajatina búma lun lídan jamá

ában sun jagía, lun ában méme jamá cátei wáma quei áu búma, amürü núma, lun lídan jamá ában buídu buídu, lun lafíñerun uboú luágú boúnajan nan. ²² Rúnaali uweíriguni le méme bichugubei nun joun, lun ában méme jamá cátei quei ában méme wamá cátei áu búma, ²³ áu jádan, amürü nídan, lun jayábin lun ában mémebaña lan buídu buídu, subúdi lámugei uboú luágú boúnajan lan áu, áni jínsiñe jamá bun sarágu quei nísiñe bun.

²⁴ 'Núguchi, amürü íchugubaliña nun, buséntina lun númabaña lan le ñí numuti, lun jaríjini uweíriguni le bichugubei nun, ladüga jínsiñegubeiñadina bun lubáragiñe ladügúniwa uboú. ²⁵ Núguchi richáguati, ibídíñetibu lun uboú, subúditibu nun, subúdi jamáali gíñe wügúriña ja luágú boúnajan lan áu. ²⁶ Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíñe ñi nan já dan.

18

Janügüni Jesúsu adáüra

(Mt 26.47-56; Mr 14.43-50; Lc 22.47-53)

¹ Lárigiñe laríñaguni Jesúsu cátei le, ába láfuridun jáu láni disípulugu lun joúdin loubáfurugun dúna le cedrón. Ñíñein ában fulásu lé buri ñí lumuti tídibu olivos, ñíjin lubeí lebélura Jesúsu jáu láni disípulugu. ² Subúdi lumúti gíñe Júdas le alúgurubalin Jesúsu, fulásu ligía, ladüga oúndaraguañajaali Jesúsu ñi jáma láni disípulugu. ³ Ába lubeíti lachülürün Júdas ñíjin jáu sarágu súdaara jáma polisia ja tánina témpulu, joúnajan jábutigu fádirigu jáma fariséogu. Gárumatetiña, barütiña gíñe lámpu lúma töchi. ⁴ Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵ Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligía le jáluajabei.

Ñíñeinti Júdas le edéregerubalin jáma. ⁶ Dan laríñagunbei Jesúsu joun luágú ligía lan le jáluajabei, ába jeíguadunga müarugún janagoún. ⁷ Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸ Ábati laríñagun Jesúsu joun.

—Aríñagaadinatia jun luágú áu lan. Ánjein áu lubeí jáluajabei, ígira jumáña ja lun joúdin.

⁹ Lasúseredunbei líra lun lagúfulirun le laríñagubei Jesúsu guánarügü. “Meféridirúnti ni ában jádaangiñe ja líchugubaña Núguchi nun.” ¹⁰ Ábati laságarunun Simón Pédro lefeínte, ába líbuguni larígei ában lumúsun fádiri le íñutimaabei gíriti Málco. ¹¹ Ába laríñagun Jesúsu lun Pédro.

—Dáboun befeínte tárigoún. ¿Jarítaguatibu funági luágu moun lan nasúfuriruni oúchawagúni le líchugubei Núguchi lun nasúfuriruni?

*Jesúsu ligíbugiñe fádiri le íñutimaabei
(Mt 26.57-58; Mr 14.53-54; Lc 22.54)*

¹² Ábati janügünü súdaara, lúma gumándan, jáma japolisán juríu, Jesúsu adáüra, ába jagüraguni. ¹³ Lárigiñe, ába janügünü lúbiñoun Anás. Anás ligía limédamurubei Gáifasi, fádiri le íñutimaabei lídan irúmu ligía. ¹⁴ Gáifasi ligía, le méme meja aríñagubei joun juríu luágu buítima lan joun lun loúnwen ában wügüri jawágu sun mútu.

*Leyéedagun Pédro luágu subúdi láni Jesúsu
(Mt 26.69-70; Mr 14.66-68; Lc 22.55-57)*

¹⁵ Ába woúdin, áu Juan lúma Simón Pédro, lárigi lárigi Jesúsu. Áu, subúditina lun fádiri le íñutimaabei, ábati nebélurun lúma Jesúsu lídoun tübürürü lúban fádiri, ¹⁶ áanjeinti Pédro, ába leréderun boúgudi luágu béna. Ligía náfuridunbei, ába nadímurejan túma to oúnigirubalin béna, ába nebélaagüdüni Pédro. ¹⁷ Ábati táliögüdüni oúnigirutu béna Pédro.

—¿Ma bugúya ában jádaangiñe láni gürígia le disípulugu?
Laríñaga Pédro.

—Uá, máma áu.

¹⁸ Queíti dilíga lubeí, fúguatiñati músu jáma polisia wátu, rára jañáti ñi abácharagua. Ñíñein gíñe Pédro jáma, abácharagua larügürügü wátu.

*Lálügüdaguni fádiri le íñutimaabei Jesúsu
(Mt 26.59-66; Mr 14.55-64; Lc 22.66-71)*

¹⁹ Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan gíñe larúfudajabei. ²⁰ Laríñaga Jesúsu lun.

—Boúgudi nadímureja ligíbugiñe sun uboú, súnwandan narúfudajan tídan ligílisi lúma témpulurugu le ñí lubei joúndaragua sun juríu, madügüngidina lubeíti ni cáta arámudaguati. ²¹ ¿Ca uágü bálügüdana? Álügüda báña ja agáambubalina, jagíalá aríñagei le uágubei nadímureja joun. Subúdi jamúti le nariñagubei joun.

²² Dan laríñaguni Jesúsu cátei le, ába liábin ában jádaangiñe polisia ja tánina témpulu, ába lagáyuajan ligíbuagun, ába laríñagun lun.

—¿Ítara lúba boúnabuni fádiri le íñutimaabei?

²³ Laríñaga Jesúsu lun.

—Ánjein aríñaga nubeí wuríbati, aríñagabeí jalíañein lan luríban, ánjeinti buídu lubeí le nariñagubei, ¿ca uágu bagáyuaja nuágú?

²⁴ Ábati loúnajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu

(Mt 26.71-75; Mr 14.69-72; Lc 22.58-62)

²⁵ Sun dan le, nijáqua Pédro abácharagua larügürügü wátu, ába jaríñagun lun.

—¿Másan amürü ában jádaangiñe láni gürígia le disípulu?

Ába leyéedagun Pédro, ába laríñagun.

—Uá, máma áu.

²⁶ Ábati lálügündüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ñí lumuti tídibu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

Jesúsu ligíbugiñe Piláto

(Mt 27.1-2, 11-14; Mr 15.1-5; Lc 23.1-5)

²⁸ Ábati janügünü Jesúsu lúbiñlegiñe Gáifasi lun lúbiñoun gumándan. Arúgadeina liñáti, mebélutiñáti juríu palásiurugún lueí marúma jamá, siñáme gádan lániña adíneruni le lánina páscura. ²⁹ Ligía láfuridunbei Piláto lun ladímurejan jáma, ába laríñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madügün lan wuríbani, medéregerun wamúti jamúga bun.

³¹ Ábati laríñagun Piláto joun.

—Barüjumei, agúseragüda jumeí quei laríñaguni jilúrudun guánarü.

Jaríñaga juríu lun.

—Wagía juríu, maríchatiwa lun wáfarun ni ában jilágubei.

³² Ítara líña lagúñfulirún le laríñagubei Jesúsu luágu ligáburi ída lúba lan loúnwen. ³³ Ábaya lebélurun Piláto palásiurugun, ába lagúarun lun Jesúsu, ába laríñagun lun.

—¿Amürü Jaruéitebei Juriú?

³⁴ Ába laríñagun Jesúsu lun.

—¿Luágu báni búngua bálügündaja luágu líra, ódi ladüga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásifun jáma jábutigu fádirigu, jagía edéregerubalibu nun. ¿Cági bidúnrunbei?

³⁶ Ábatí laríñagun Jesúsu lun.

—Narúeijan máma lánina uboú le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábatí laríñagun Piláto lun.

—¿Urúei lubeíti amürü?

Laríñaga Jesúsu lun.

—Urúei áu quei baríñaguni. Agüria joúatina, ñübin áu lídoun uboú le lun naríñaguni le inárünibei. Sun ja gagáambadibaña lun inárüni, agáamba jamúti le naríñagubei.

³⁸ Laríñaga Piláto lun.

—¿Cáteiti inárünibei?

Lasíadirúniwa Jesúsu lun oúweni

(Mt 27.15-31; Mr 15.6-20; Lc 23.13-25)

Lárigiñe ladüguni Piláto álügündajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügüri le. ³⁹ Quei jéchu jumá lun nígiragüdün ában adaürüti jun lídan fédu le láni pásqua, ¿buséntün lun náfuridagüdüni Jesúsu le jarúeitebei juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19

¹ Ábatí lanüguni Piláto Jesúsu, ába loúnajan abeíchagüdei, ² ába jíchugun ában súdaara ába rídi láuti jíyu leréberugu Jesúsu, ába jadáüraguagüdüni táu ában anáanguni colóru gúchu. ³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyuajan ligíbuagun.

⁴ Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábatí laríñagun Piláto joun.

—¡Niján wügüri ligía!

⁶ Dan jaríjinbalin jábutigu fádirigu jáu sun polisia, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barüjumeiti, dágua jumeí luágu gurúwa, ladüga áu, madáritina ni murúsun dúru luágu.

⁷ Ába jaríñagun juríu lun.

—Wagía galúruduntiwa áni segün walúrudun, lúnti loúnwen ladüga laríñagun luoúgua luágu Liraü lan Búngiu.

⁸ Dan lagáambunbalin Piláto le, ábatima lanúfudedun. ⁹ Ábaya lebélurun palásirugun, ába laríñagun lun Jesúsu.

—¿Jalíanasan amürü?

Moúnabunti Jesúsu ni cáta.

¹⁰ Ábati laríñagun Piláto lun.

—¿Moúnabun bumútina? ¿Ibídiñetísan bun luágu gabáfu nan lun nígiragüdünibü, gabáfu áu lun nádaraguagüdünibü luágu gurúwa?

¹¹ Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weíritima lubeí lidúnrun le edéregerubalina bun sügü báu.

¹² Lúmagiñe óra ligía, ába lálugun Piláto ída lúba lan lígiragüduni Jesúsu. Ába jagúaragun juríu lun.

—¡Ánjein bígiragüda, máma amürü lumáda urúei Rómana! ¡Furúmieguarügü le aríñaguti luoúgua luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan aságarei Jesúsu, ába lañúurun luágu jalaü le agúseragülei, ubáraü le únbei jaríñaga Dübü, Gabáta lídan jerérun juríu. ¹⁴ Queí buri amídirugujaali, le ában wéyu lubá pásqua. Ábati laríñagun Piláto joun juríu.

—¡Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa?

Jariñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, aba ledéregeruni Piláto joun lun ládarawagún luágu gurúwa, ába janügni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barüinaleí lugúruwan lun lídin lídoun fulásu le únbei jaríñaga Lufúlasun Lábu Ichügü, Gólgota lídan jerérun juríu. ¹⁸ Ni jádaraguei luágu gurúwa, dágua jagía bián wügüriña úara lúma, ában lueígiñe cáda loúba. ¹⁹ Ába loúnajan Piláto íchigagüda ában abürüjoúni luágu gurúwa, laríñaga ñi.

“Jesúsu Nazarétna, Jarúaite Juríu”. ²⁰ Sarágu jáña jádaangiñe juríu alíijati abürüjoúni ligía ladüga fulásu le ñí lubei jádaraguei Jesúsu luágu gurúwa, madíseti ubúrugugiñe, áni abürüjoúati abürüjoúni ligía lídan buri dimúrei hebréo, güríegu, lúma latín. ²¹ Ligía jaríñagunbei jábutigu jafádirin juríu lun Piláto.

—Mabürüdabá ñí “Jarúaite Juríu”, bürüba “Le aríñagubei luágu Jarúaite lan Juríu.”

²² Ába laríñagun Piláto joun.

—Le bürünaalíbei bürünaalíbei, ítara lúba.

²³ Lárigiñe jádaraguni súdaara Jesúsu luágu gurúwa, ába janügünun lanáangun, ába jadügün gádürü fánreinti táu, ába fánreinti lun cáda súdaara. Ába gíñe janügünun lisímisin, quei májüchawagún tubeí, ában rügüñoun fiésu íñugiñe lun ünabun, ²⁴ ába jaríñagun súdaara jámagua.

—Majeíridagua wamoún, ájurera wamá tuágu, aríja wamámuga cába lan agáñiroun.

Ítara líña lagúñfulirun le taríñagubei Lerérunt Búngiu. “Fánreingua jamútú nanáangun jádaangua, ájurera jagía tuágu nisímisin cába lan agáñiroun.” Ítara líña lubeiti jadüguni súdaaragu.

²⁵ Ñíñoun lúguchu Jesúsu yaráfa lun gurúwa túma tamúlelu, María to lúmari Cléofas, túma María Magdaléna. ²⁶ Dan laríjinbarun Jesúsu lúguchu rára nubádu, áu le disípulu lé jínsiñebi lun sarágu, ába laríñagun tun lúguchu.

—Núguchu, nirán biraü.

²⁷ Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Loúnwen Jesúsu

(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúñfulijali lan láu sun le lúnbei ladüguni luágu wasálbarun, ába laríñagun, lun lagúñfulirún le taríñagubei Lerérunt Búngiu.

—Mágürabujadina.

²⁹ Ñíñein ában fúdu táu diweín garüjütu, ába jadüdüragüdüñ ában mudúsi tídan diweín tugúya, ába jíchuguni luágu ában wéwe, ába jiñúruni luágun liyúma. ³⁰ Ába látunun Jesúsu diweín garüjütu tugúya, ába laríñagun.

—Gúñfulija sun cátei.

Ába larábachun ligíina, ába loúnwen.

Límiruni ában súdaara louba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu gürígia luágu gurúwa lídan wéyu le

eméraaguagülei, ladüga weíriti wéyu ligía. Ligía jamúriaajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gíñe lagídarún jágubu ñígiñe. ³² Ábatí joúdin súdaara, ába jájalachuni lúruna furúmiñeti, jalá jameí lúruna le ában le dáwaguñubei luágu gurúwa úara lúma Jesúsu. ³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáali lubeí lúruna.

³⁴ Ába liábin ában súdaara, ába límiruni Jesúsu loúbawagun táu ában efeín, ába láfuridun jítäu lúma dúna ñígiñe. ³⁵ Áu Juan, le abúrjubalin le, ában le aríjubalin, áni aríñaga numúti inárüni, subúdi numúti luágu aríñaga náni inárüni lun gíñe jafíñerun jugúya. ³⁶ Ladüga lasúseredunbei buri cátei le, lun lagúncularun le taríñagubei Lerérungu. “Májalachúnwabei ni ában ábuu luágu.” ³⁷ Aríñagati gíñe tídan Lerérungu. “Jaríjubei le jímiragubei.”

Lábunajoún Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, ñíñein ában wügüri Arimatéana, gírito José, falá lumuti meja wügüri ligía Jesúsu, láu sun arámudaguarügü lan ladüga lanúfude jaweí juríu, ába lamúriaajani lúgubu Jesúsu lúma Piláto. Ába líchuguni lun, ába lanügüni José lúgubu Jesúsu. ³⁹ Ába gíñe liábin Nicodémo, lé meja ñüdünbei ayánuja lúma Jesúsu gúñoun, ába liábin láu sarágu ibíñei. ⁴⁰ Ábatí janügüni José lúma Nicodémo lúgubu Jesúsu, ába joúburaguni táu gamísia to túaguatu láu ibíñei ligía según jagáburi juríu lubá jábunajan. ⁴¹ Ñíñein ában fulúri-ägei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñíñein ában umúajaü iséri le mayúsuringili. ⁴² Ñíjin jíchigei lúgubu Jesúsu, ladüga yaráfa lan umúajaü ligía, ladüga gíñe agúñeeeli lan, gumése wéyu le eméraaguagülei.

20

Lásaarun Jesúsu lídaangiñe oúweni

(Mt 28.1-10; Mr 16.1-8; Lc 24.1-12)

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachülürünbei ñi, úaali dübü le lidaü umúajaü ñi. ² Ába tídin eíbaagueina le ñíjin wabeí áu lúma Simón Pédro, ába taríñagun woun.

—Barüjama Jesúsu lídaangiñe lumúaja, ibídiñeti woun jalía lan jíchigei.

³ Ábatí wáfuridun, ába woúdin luágun umúajaü. ⁴ Úara woúdin biángubei wagía eíbaagueina, furésentina lueí Pédro, ába nachülürün furúmiñe luágu umúajaü. ⁵ Ába nélemuchun aríja

ñíjin, gamísá rügüñoun narija ñi, mebélutina. ⁶ Lárigiñe, ába lachülürün Simón Pédro, ába lebélurun lídoun umúajaü. Gamísá to aúboun lagürawagua Jesúsu, tugúya rügüñoun gíñe larija ñi. ⁷ Gamísati to aúboun loúbarawagúa lichügü Jesúsu, máma lídaañoun ában túma tó buri áuboun lagürawagúa, joúburagu tíña, tábugua. ⁸ Ába giñéti nebélurun, ába naríjini le asúseredubei, ába nafíñerun luágu saraáli lan Jesúsu lídaangiñe oúweni. ⁹ Ligáaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe oúweni. ¹⁰ Ábatí wagíribudun wábiñoun.

*Larúfudagun Jesúsu lúngua tun María Magdaléna
(Mr 16.9-11)*

¹¹ Ánjounti María, ába teréderun boúgudi ayájuaja lubádu umúajaü. Sun nuján lan ayájua, ába télemuchun aríja lídoun umúajaü, ¹² ába taríjin bián ánjeligu, jarútu jadáüragun, ñun le ñí lubeí buga lúgubu Jesúsu, ában lichügugiñe, ában lugúdigiñe. ¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barüjama Nabúreme, ibídiñeti nun jalía lan jíchigei.

¹⁴ Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵ Ábatí laríñagun Jesúsu tun.

—¿Ca uágu bayájuaja? ¿Ca báluajabe?

Sun taríñaguti le oúnigirubalin fulúri-ägei adímurejabeí tun, ába taríñagun lun.

—Ánjein banügün lubeí, aríñagabeí nun jalía lan bíchigei, barü námugei.

¹⁶ Ábatí laríñagun Jesúsu tun.

—¡María!

Ába tagáraragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdabá nuágu, ladüga maweínrungidina le ñíjin lubeí Núguchi. Beíba, baríñagame joun náni disípulugu luágu neíbuga lan le ñíjin lubeí Núguchi, le gíñe Júguchi, Nubúngiute le gíñe Jubúngiute.

¹⁸ Ábatí tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñaguni joun.

*Larúfudagun Jesúsu lúngua joun disípulugu
(Mt 28.16-20; Mr 16.14-18; Lc 24.36-49)*

¹⁹ Wéyu méme ligía gúñoun, oúndaragu jáña disípulugu, darúgu béna jáu ladüga janúfude jaweí juríu. Ába lebélurun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁰ Lárigiñe laríñaguni líra, ába larúfuduni lújabu lúma loúba joun. Ába jagúndaaragun disípulugu láu jaríjini Jesúsu. ²¹ Ábaya laríñagun Jesúsu joun.

—Níjeinlá darángilaü jídan. Ítara quei loúnajanina Núguchi, ítara líña gíñe noúnajanün.

²² Ábati láfurun jawágun, ába laríñagun joun.

—Resíbi jumeí Sífiri Sándu. ²³ Ánjein ferúduna jumá jafígoun ámu, ferúdunawaali, ánjein úa ferúduna jumáni, reídeijali, úouga ferúdunawa lan.

Laríjini Tomás Jesúsu lárigiñe lásaarun lídaangiñe oúweni

²⁴ Tomás, ában jádaangiñe dúusu disípulugu le únbei jaríñaga Mátodou, úatiti jáma dan le liábinbei Jesúsu. ²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraüraü nújabu lídoun júyu le lárigi gürábu, da nújabu lídoun loúba, siñábei nafíñerun.

²⁶ Wídü wéyu lárigiñe, oúndaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebélurun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁷ Ába laríñagun lun Tomás.

—Dábei liraüraü bújabu ñájoun, aríja beíme nújabu, da beíme bújabu lídoun noúba. Masígirabá láu liloúguan afíñeni, afíñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, afíñeedibu guetó, ladüga aríja báadina lan, gúndatiña ja afíñerubaña, maríjinga jamána.

Ca lan lébubei tabürüjoún líburu to

³⁰ Adügayati Jesúsu ámu sarágu miláguru jagíbugiñe láni disípulugu, le úabeí bürüñu tídan líburu to. ³¹ Labürüdünbei buri le lun jafíñerun luágu Jesúsu lan Crístubei, le Liraü Búngiu, lun gíñe láu lan jafíñerun, gabágari jumá queísi lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu láru dúna le gíribei Tibérias. Niján ligáburi ladügünü.

² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirajüñü Zebedeo, jámaya bián jádaangiñe láni Jesúsu disípulugu. ³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába joúdin, mañúguntiña ni cáta áriebu ligía. ⁴ Dan le arúgadeina lan, ába jaríjini Jesúsu ñi láru dúna, ibídiñetí yebe joun disípulugu luágu Jesúsu lan. ⁵ Ábatí laríñagun joun.

—Numádagu, ¿mañúgungidünsan?

Jariñaga lun.

—Ni cáta.

⁶ Ábatí laríñagun Jesúsu joun.

—Fíjuma lueígiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan. ⁷ Ábatí nariñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun. ⁸ Ja jíbiri disípulugu, ába joúdin lárun béya táu ugúnein, adúrujeina jamoún séni buin jáu úduraü, quei ában rügüñein lan san bádun jadíse lueíbéya. ⁹ Dan le jarárirun múarugun, ába jadárirun wátu geméti láu eñéguraü, láu ában úduraü ligíbuagu túma fein. ¹⁰ Ába laríñagun Jesúsu joun.

—Barüjuma fiú jádaangiñe úduraü ja sun liñábei jañúguniña.

¹¹ Ába ládinun Simón Pédro tídoun ugúnein, ába ladúrujanun séni lárun béya buin jáu úduraü weínamutiña, san dimí-san ürüwañanu, láu sun jíbe, majeíridaguntu séni. ¹² Ábatí laríñagun Jesúsu joun.

—Jigoúgu, játa bacháti.

Úati ni ában jádaangiñe disípulugu álüğüdüti cátei lan, ladüga subúdi jamáni luágu Jesúsu lan. ¹³ Ába liábin, ába lanügünun fein lújaburugu, ába líchugunun joun, ligía méme ladüga láu úduraü.

¹⁴ Ligía lürüwan larúfudagun Jesúsu lúngua joun láni disípulugu lárigi lásaarun lídaangiñe oúweni lúnya labágaridun.

Ladímuréjan Jesúsu lúma Simón Pédro

¹⁵ Lárigiñe játun bacháti, ába laríñagun Jesúsu lun Simón Pédro.

—Simón, Liraü Jonás, ¿jínsiñetinasan bun sügű jáu ja?
Laríñaga Pédro lun.

—Ánja, Nabúreme, subúditi bun luágú jínsiñe ban nun.
Ába laríñagun Jesúsu lun.

—Toúnigi báñati nánigu queísi ában joúniri mudún buíti.
¹⁶ Ábaya lálügündüni luágú libíaman weíyaasu.

—Simón, liraü Jonás, ¿jínsiñetinasan bun le tímatimaati?
Laríñaga Pédro lun.

—Ánja, Nabúreme, subúditi bun luágú jínsiñe ban nun.
Laríñaga lun.

—Toúnigi báñati nánigu.

¹⁷ Ábaya lálügündüni luágú lürüwan weíyaasu.

—Simón, liraü Jonás, ¿jínsiñetinasan bun?

Ába lírudagun Pédro ladüga lálügündüni Jesúsu luágú lürüwan weíyaasu ánjein jínsiñe lubeí lun, ába laríñagun lun.

—Nabúreme, subúsiti sun cátei bun. Subúsiti bun luágú jínsiñe ban nun.

Ába laríñagun Jesúsu lun.

—Toúnigi báñati nánigu queísi ában joúniri mudún buíti.

¹⁸ Ninárün báu, luágú dan lán mejá ñüraütimagidibu, ábaja badáüragun, ába bídin le ñíjin lumúti babúseera, dámme le weíyaadibu, iñúrarügübalime barüna, ábame ladáüraguagüdünibu ámu, ábame lanügünibu le ñíjin lumúti mabúseerun ban bídin.

¹⁹ Láu laríñaguni Jesúsu cátei le, lasúbudiragüdüñein ída lúba lan ligáburi loúnwen Pédro, lun líchugun uweíriguni lun Búngiu láu. Lárigiñe, ába laríñagun lun.

—¡Falábana!

Disípulu le jínsiñegubei

²⁰ Dan ladígitragúnbei Pédro, ába laríjinina, áu Juan, anángüran lan járigi, áu le jínsiñebi sarágu lun Jesúsu, le méme añúurubei loubagiñe Jesúsu lídan adíneruni, le gíñe álüğüdübalin Jesúsu cába lan wádaangiñe edéregerei. ²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amürü, falábana.

²³ Ábatí leíbaagun dimúrei jádan jíbiri lánigu Jesúsu luágú moúnwenbadina lán nege, maríñagunti Jesúsu luágú

moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achoúrurubalin buri cátei le, abürüja náaru gíñe gárada to jalíijaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladüga Jesúsu, áanjein jamúga abürüjoúa ában ában, afíñetina luágu mábara tan jamúga buri líburu to abürüjoútu láu lídan sun uboú.

CÁTEI LÉ BURI MEJA JADÜGÜBEI APÓSTOLUGU

Loúnajani Búngiu Sífiri Sándu

¹ Lun teófilo.

Abürüyatina bun tídan furúmiñetu nigáradan luágu sun le ladügübei Jesúsu, lúma le larúfudajabei, lúmagiñe dan le lagúmeserunbalin luwádigimari ² darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei uboúagu lárigiñe lásaarun lídaangiñe oúweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúrugu Jerusalén, laríñaga joun.

—Agúraba jumá lagúncularun dimúrei le líchugubei Núguchi jun, le uágubei nariñaga jun. ⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu málüjadün lan giñe áanjaün badísei láu Sífiri Sándu.

Lamúdeirun Jesúsu siélun

⁶ Dan le oúndaragujaña lubeí lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laríñaga Jesúsu joun.

—Siñati jasúbudiruni ídame lan o cába lan dan ladügei Núguchi cátei le buri, ligía rügüñein gayára laríñagun ídame lan ladügei. ⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loúbawagu Judéa, Samária, chülü lúmoun lidíse-ägei fulásu uboúagu.

⁹ Lárigiñe laríñaguni Jesúsu cátei le, sun añája lan aríaguei, ába liñurúniwa lun lanügüniwa siélun, ába liábin ában juánriñu, ába ladáuragun láu, ába marijin jamáali lan. ¹⁰ Níñanu aríagua siélun sun amúdeireina lan Jesúsu, ligía jasáligagun bián wügúriña, jarútu jadáüragun jarúgabu, ¹¹ ába jaríñagun joun.

—Wügúriña Galiléana, ¿ca uágú jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanúadirún Matías lewéñeguame Júdas

¹² Ábati jagíribudun disípulugu lueígiñe wübü le gíribei Olivos lun ubúrugun Jerusalén, lidíse ában kilómetro. ¹³ Dan le jachülürünbei ubúrugun, ába jamúdeirun tídoun rúmu to ñí lubei jagánawa. Ñíñein Pédro jádan, Jacóbo, Juan, Andrés, Felipe, Tomás, Bartolomé, Matéo, Jacóbo le liraü Álfeo, Simón le lídaanbei adámurini le gíribei Cananista, lúma Júdas le lamúlen Jacóbo. ¹⁴ Oündaraguátiñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würíña.

¹⁵ Luágu ában wéyu lídan dan ligía, ába laráramun Pédro jagíbugiñe sun afíñetiña ja ñíbaña—jawára san-wein gürígia—ába lariñagun joun.

¹⁶ —Nidújeñu, lúnti buga lagúnfulirun le laríñagubei Sífiri Sándu liyúmulugugiñe Davíd tídan Lererun Búngiu, lídan le ladímurejánbei luágu Júdas, le adúndejabáliña ja anügúbalin Jesúsu adáura. ¹⁷ Ában meja jádaangiñe wánigu, Júdas, áni seríwiti lun Jesúsu úara wáma. ¹⁸ Ába lídin, ába lagáñijan ában fulásu láu seínsu le afáyeirúbei lun luágu wuríbani le ladügübei. Ába láburujan láu lábulugu ünabun, ába lafáünchün, ába láfuridun sun litíripan. ¹⁹ Dan le jagáambunbalin gürígia ja aganoúbaña Jerusalén, ába jagúajan lun fulásu ligía, Acéldama, míni lan lídan jererun, Fulásu Láni Jítaü.

²⁰ Ába lasígirun Pédro aríñaga.

—Bürüwaňu lína dimúrei buri le luágu Júdas tídan líburu to gíriboun Sálmos. Lariñajare ñi.

Reídeitá lúban málouga,
úa jamá aganoútiña tídan.

Ariñagati gíñe ñi.

Rúalá lubára lun ámu.

²¹ ‘Ítara lína lubeíti, lúnti wanúadajan ában wügüri wádaangiñe lé meja wámati sun dan le wáma lubeí Jesúsu, ²² lúmagiñe dan le labásterágüdünbalin Juan Jesúsu darí lúmoun dan le lamúdeirúnbei siélun, lun lewéñegua lan Júdas. Wügüri ligía, líchuguba fe úara wáma luágu lásaarun Jesúsu lídaangiñe oúweni lúnya labágaridun.

²³ Ábati jíridun bián jádaangiñe. José, le méme gíribei Barsabási, le méme gíñe gíribei Jústo, lúma Matías. ²⁴ Ába jayúmuragun lun Búngiu ítara.

—Wabúreme, amürü le subúdijabúbei tun janígi sun gürígia, arúfudabei woun ca lan jádaangiñe bián wügüriña ja anúadira bálibei ²⁵ lun lesériwidunibu queísi apóstolu lewéñegua Júdas. Ladüga féridi láali Júdas lubára ladüga lafigounjan, áni ñüdünja lídoun fulásu le ladünabeí.

²⁶ Ábati jíchaajan ubúnuruni, ába láburujan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

¹ Dan lachülürünbei luwéyuri fédu le Pentecostés, oúndaragu jána sun lánigu Jesúsu lídan ában fulásu. ² Sódini ába lagaambún ában ireíni ñübinti siélugiñe quei dan le láfurun ában garábali jéreti, ába lagaambún tídan sun muna to ñí jabei. ³ Ábati lasáliragún buri cátei joun camá ligémeri wátu, afánreinjoúañu lun ñi lan ában murúsun loúgiñe lábulugu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei lueí jerérung quei ladímuregüduniña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnculitiña lídan jafíñen, ñübintiña lídaangiñe sun fulásu uboúagu. ⁶ Dan le jagáambunbalin ireíni ligía, ába joúndaragunga gürígia, ibídiñeja joun cába lan jasáminara ladüga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérung guánarü. ⁷ Ába laweíridun janígi, ába jaríñagun jámagua.

—¿Ma funági Galiléana ja adímurejabaña? ⁸ ¿Ída liñáti wagáambubaliña adímureja lídan lerérun cáda ában wádaangiñe?

⁹ Añájein gürígia Pártiana ya, Médiana, Elámna, Mesopotámiana, Judéana, Capadóciana, Póntona jáma Ásiana, ¹⁰ Fríjiana, Panfiliana, Ejíptona lúma lídaangiñe buri fulásu África le yagüroun mémebei lueí Ciréne. Añájein giñe Rómana aganoútiña ya, añájein jádaangiñe, juríu ladüga juríu jamá jagübürigu, jíbiri, barü jamaali ligáburi jafíñen juríu. ¹¹ Añájein giñe gürígia Crétana jáma Arábiana, sun wagía agáamba wamútiña adímureja luágú luweírigun Búngiu lídan werérun guánarü.

¹² Weíriti janígi súngubei, ibídiñeja joun cába lan jasáminara, ába buri jálugüdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jaríñagun.

—Bacháruañanúrígü jáñia.

Le laríñagubei Pédro joun gürígia ja ñíbaña

¹⁴ Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügúriña Judéana jáma sun ja aganoúbaña Jerusalén, agáamba jumeí le lúnbei naríñaguni jun buídu, subúdi jumámugei ca lan lílabei cátei le jaríjubei. ¹⁵ Mabácharuántiña

wüguriñā ja quei jarítagun, néfugubeigili bináafin guetó. ¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñagunbei.

¹⁷ Lídoun buríme lagúmujooun wéyu, líña lariñagun Búngiu, noúnajabeí náni Espíritu jádoun sun gürígia, nadímurejaba jayúmulugugiñe jisáanigu.

Nayáwadaguba joun irájüñü,
lúma joun weíyaaña mútu.

¹⁸ Noúnajabeí gíñe náni Espíritu jádoun ja esériwidubaña nun lídoun buri wéyu ligía, wüguriñā jáma würíñā, ábame nadímurejan jayúmulugugiñe.

¹⁹ Narúfuduba buri cátei garíyawaseti siélu, narúfuduba seíni uboúagu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu,

láfuarame játi funáti quei jítaü, lubáragiñe lachülürün luwéyuri Wabúreme, le lúnbei ában lan wéyu weíriti, le marijíngilíbei líbe.

²¹ Áni sun ja amúria jatiña asálbaruni lúmagiñe Búngiu, jasálbaruba.

²² 'Agáamba jumeí lubeíti le lúnbei nariñaguni, jugúya wüguriñā Israelítagu. Jesúsu le Nazarétna, ában meja wüguri le larúfudubei Búngiu jigíbugiñe quei wüguri úaraguati láu buri cátei weínamuti, miláguru, lúma buri seíni le ladügübei Búngiu jagánagua lídaangiñe, quei le jisúbudin. ²³ Láu sun líra, dan le lederegerúnbei jun, quei ligáburi aráansejani le larítagubei Búngiu lúmagiñe furúmiñeti dan, ába jáfaruni jilágubei láu jederegeruni joun wüguriñā wuríbatína lun jádaraguni luágu gurúwa. ²⁴ Ába leséfuruni Búngiu lídaangiñe lubáfu oúweni, sarágüda lumúti lánya labágaridun, ladüga siñá lan gabáfu lan oúweni luágu. ²⁵ Laríñajare urúei David, dan le ladímurejan luágu Jesúsu.

Subúdi numúti luágu númerai lan Nabúreme Búngiu súnwandan, noúbagiñen ein lun úa lan ni cáta lun lebélaagüdü anúfudei nídoun.

²⁶ Ligía lébubei téjerajan nanígi,

ába nadímurejan luágu ugúndani le nídaanbei.

Láu sun wüguri nan garaúwarügti,

jeménigitina buágu luágu nabágaridayaba lan,

²⁷ ladüga mígirun bubóun nuwáni lídan jabára jiláaña,

mígirun amúrüme lun lañáladun núgubu, áu le báni le jínsiñebi bun.

28 Arúfuda bumúti üma le anügübei gürígia lídoun ibágari magúmuchaditi nun,

áni babuínchagdübadina láu ugúndani láu abúnja lan nubádu.

29 'Nidújeñu, cátei furáanguti le, luágu jilá lan meja wadúje Davíd, bunáwa ligía, gayáragili waríjini lumúaja chülü lúmoun wéyu le. 30 Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfan liábin Crístu, le lúnbei lañúurun luágu lála. 31 Adímurejati lubeiti Davíd luágu lásaarun Crístu lídaangiñe oúweni, luágu gíñe merédeboun lan luwáni lídan jabára jiláña, mañáladun ligíame lúgubu. Ítara lína ladímuñrejan Davíd luágu Crístu camá jamuga aríagu líña lun, áni ítara líña lasúseredun. 32 Sarágüda lumúti Búngiu Jesúsu méme le lídaangiñe oúweni, sun wagía geféentiwa luágu líra. 33 Nurúgüda lumúti Búngiu lueígiñe loúnwenren láu sarágu uweíriguni, ába lerésibiruni Sífiri Sándu lúmagiñe Búngiu queísi laríñaguni Búngiu lun, lun gayáraabei lan loúnajani méme Sífiri Sándu ligía joun sun lánigu uboúagu. Ligía cátei le aríja jumáalibei lúma le agáamba jumáalibei guetó. 34 Máma Davíd amúdeirubei siélun, aríñagati Davíd guánarügü.

Laríñajare Búngiu lun Nabúremene.

"Ñurúuba lueígiñe noúnwenren,

35 daríme níchuguniña báganiñu lábugiñoun bubáfu."

36 'Lúnti jasúbudiruni sun jugúya linásíñun Israél luágu Jesúsu méme lan le, le jádaragubei luágu gurúwa, adüga láali lan Búngiu lun ligíaba lan Wasálbaragüle, ligíame gíñe Wabúremene.

37 Dan jagáambunbalin cátei le, ába lebélurun igárigu tídoun janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadüga?

38 Ába laríñagun Pédro joun.

—Sáansi jumeí jigáburi ligíbugiñe Búngiu, badísei jugúyame cáda ában lídan líri Jesucrístu, ferúdunawa lámuga jíffigoun, ru lámugei Búngiu Sífiri Sándu jun. 39 Ladüga aríñagaali Búngiu luágu líchugubei lan giñe Sífiri Sándu jun, lúma joun jadügawagun, lúma joun ja aganoúbaña díse, lúma joun sun ja lagúarubaña Búngiu lun lánigu jamá.

40 Láu buri dimúrei le lúma buri ámu, ladímuñreja Pédro joun, ába laríñagun joun.

—Séfu jumá lueí asúfuriruni le lúnbei liábin jawágún gürígia wuríbatíñu ja.

41 Ítara liñáti ába jabásterun, ja adügubaña gásu láu lerérunt, ába jayábin queí buri ūrüwa mílu gürígia lun jafíñerun luágu Jesucrístu wéyu ligía. 42 Ába jederegeragun joúngua lun jafúnrendeiruni le jarúfudajabeí apóstolugu joun, aganoúa

jagía lídan úarani jámagua, ayúmuragua jagía buri lun Búngiu, oúndaragua jagía lun jeíginun fein to arítaguagülei luágu loúnwen Jesúsu, queísi meja laríñaguni joun apóstolugu lun jadügünü.

Jabágari furúmiñetiña lánigu Crístu

⁴³ Súngubei láuñanu luweírin anígi luágu buri seíni lúma buri miláguru le ladügübei Búngiu jádaangiñe apóstolugu. ⁴⁴ Sun ja afíñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajeí buri jafúlasun lúma le jámati, ába jafánreinjani lebégi según lemégeirun cáda ában. ⁴⁶ Ságü wéyu joúndaragun témpulurugu lun jájuduragun lun Búngiu. Lárigiñe, ába joúndaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina Ságü wéyu, lídan ában láu ugúndani lúma gudémegu. ⁴⁷ Ábaja jadímurejan weírigu luágu Búngiu, ábatí jínsiñe jamá joun gürígia, ábatija anáajeina lániña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaünrün ürüwa rábounwéyu, le lórate ayúmuraguni lun Búngiu. ² Ságü wéyu, ñíñein lan ában wügüri meíbugunti lúmagiñe lagüriajoún, barüwarügütíja añúura lubádu tubéneri témpulu le gíribei “Béna Buídumeraüti” lun lamúriaian seínsu jáma ebélurutiña témpulurugun. ³ Dan le laríjinbaliña meíbugunti ligía Pédro lúma Juan jebélura lan témpulurúgun, ába lamúriaian seínsu jáma. ⁴ Ábatí jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun. ⁶ Ába laríñagun Pédro lun.

—Maseínsutina, níchigaali le númati bun. lídan líri Jesucristu le Nazarétna, sarába, beíbuga.

⁷ Ábatí lárügündüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute.

⁸ Ábatí lachúbarun lun laráramun, ába leíbugun. Ába lebélurun jáma témpulurugun, eíbugeina, achúbajeina, adímurejeina luágu luweírigun Búngiu. ⁹ Ába jaríjini sun gürígia eíbuga lúma adímureja luágu luweírigun Búngiu. ¹⁰ Weírititi janígi luágu le asúseredubei lun, quei subúdi jabálin wügüri ligía, subúdi jameí luágu ligía lan léñaja añúurubei amúriaia tubéneri témpulu le gíribei “Béna Buídumeraüti”.

Lapúrichijan Pédro témpulurugu

¹¹ Mígiragüdün lumútiñati meíbugunti le areídagubei Pédro lúma Juan, súnti gürígia, ába jeíbaagun láu luweírin janígi luágun tubáranda témpulu le gíribei Salomón, le ñí jabei. ¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírida janígi? ¿Ca uágu jaríaguawa camá jamuga wagía areídagaguagüdúbalin wügüri le, eíbugagüdei láu wabáfu o láu lan wagúnfulin lúma Búngiu? ¹³ Máma líña, Búngiu, le Jabúngiute binádu wagübürigu Abrahám, Isáac lúma Jacób, ligía areídagaguagüdúbalin wügüri le lun líchuguni líñun-ägei uweíriguni lun Jesucristu le Liraü, ligíra lé meja jederegerubei joun lúrudugu, áni dan lálugan Piláto lígiragüduni, májatün. ¹⁴ Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati. ¹⁵ Ítara líña jáfaruni le íchugubalin ibágari tímatimaati. Ába lásaaragüduni Búngiu lídaangiñe oúweni, áni geféentíwa luágu líra. ¹⁶ Niján wügüri le jaríjubei áni subúdi jumeí, láu lubáfu méme Jesúsu ligía, lerésibira érei. Wafíñen luágu Jesúsu, ligía areídagaguagüdúbalin buídu buídu quei jaríjini.

¹⁷ ‘Subúdi náali, nidújeñu, luágu ibídiñe lán meja jun ca lan jadügübeí dan le jáfarunbálin Jesúsu, jugúya jáma jábutinu. ¹⁸ Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu. ¹⁹ Ligía lubeíti, ígira jumeí binádu jigáburi, giríbu jumá lun Búngiu, chibáwa lámuga jifígoun. ²⁰ Ábameti gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun. ²¹ Láu sun, lúnti lan leréderun Jesucristu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaeñabaña joúngua lun, lídan meja dan le binádu. ²² Ítara líña lubeíti aríñagati meja Moisés joun binádu wagübürigu. “Loúnajaba Wabúreme Búngiu ában proféta jidaangiñe guánarügü quei loúnajanina. Ánja jumá lun sun le lúnbei laríñaguni jun, ²³ ladüga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

²⁴ ‘Ítara líña lubeíti, sun profétagu lúmagiñe Samuél dari lárigiñe, adímurejatiña libügürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladügübeí Búngiu jáma binádu wagübürigu dan le laríñagunbei lun Abrahám. “Nabínirubaña sun gürígia ja uboúagubaña láu ában jádaangiñe binébaanfaangu.” ²⁶ Ába lanúadajani Búngiu Liraü lun loúnajani jun furúmiñe, jugúya

juríu, lun labínirunün cáda ában jídaangiñe, láu laságarunün lídaangiñe luríban jigáburi.

4

Pédro lúma Juan jagibugiñe gumádimatiña

¹ Ñígíña Pedro lúma Juan adímureja joun gürígia, ligía jayábin jafádirigun juríu, jáma jábutigu súdaara ja oúnigirubárun témpulu, jáma ja lídaanbaña jadámurin saduséogu. ² Gáñitiña ladüga jarúfudajan Pédro lúma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe oúweni lúnya jabágaridun ladüga sará lan Jesúsu. ³ Ábatí janügüniña adáüra, ába jádaruniña furísunrugun darí larúgan quei dárüjali lubeí. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járügü wügüriña, queí buri seíngü mílu.

⁵ Larúgan, ába joúndaragun jábutigu juríu, wügüriña weírigutiña lídan jafíñen, jáma arúfudajatiña lilúrudun Moisés, Jerusalén. ⁶ Ñíñein gíñe Anás le fádiri le íñutimaabei, Gáifasi, Juan, Alejándro jáma sun ja jádaangiñebaña lufámilian Anás. ⁷ Ábatí joúnajan anügei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídagaguagüdei wügüri le?

⁸ Buin líña Pédro láu Sífiri Sándu, ába laríñagun joun.

—Jábutigu juríu jáma wügüriña weírigutiña lídan wafíñen. ⁹ quei jálögüdüníwa luágu buíti le adügübei lun ában wügüri sánditi, ída líña lan lareídawaguágüdün, ¹⁰ buséntiwa lun jasúburiduni, juguya jáma sun gürígia ja Israelítagu, luágu láu lan lubáfu Jesucristu le Nazarétna niján lubeí wügüri le ya jigibugiñe areídaguañu. Láu lubáfu Jesucristu, le meme jádaragubei luágu gurúwa, le lásaaragüdübei Búngiu lídaangiñe oúweni, lareídagua. ¹¹ Jesúsu le, ligía queísi dübü le áubei jíchiga mebéreseni, juguya le queíbaña ábunagutiña muna, áni ñübinjali Jesúsu lun ligíaba lan quei dübü le mégeiwatimaabei lídan bunáguau. ¹² Úati ámu lun lasálbaruníwa lueídügüya Jesucristu, ladüga míchuti Búngiu ámu íri uboúagu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pédro lúma Juan manúfudeiga ni murúsun, áni subúdi jameí luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábatí jasúburiduni luágu jádaangiñetiña lan já meja eíbugubaña lúma Jesúsu. ¹⁴ Queíti ñíñein lubeí wügüri le areídagaguágüdübei jáma, rára ligía, siñáti jaríñagun lúrudugu ni cáta. ¹⁵ Ábatí joúnajaniña lúrudugu

Pédro lúma Juan lúma wügüri le areídaguaalibe boúgudin lueí jadámurin lun gayáraabei lan jayánujan jámagua.¹⁶ Jaríñagati.

—¿Cábasan wadiúga jáu wügüriña ja? Sun ja aganoúbaña Jerusalén subúdi jamúti luágú adüga jamáali lan miláguru le, áni siñáti wayeedagun láu.¹⁷ Lun mabúruchagun lan ugánu luágú cátei le lídan sun fulásu, wewéridiraña lun madímurejandügüya jamá ni ca un lídan líri Jesúsu lúmagiñe ugúñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jaríñagun Pédro lúma Juan joun.

—Samína jumá júngua ánjein buídu lubeí ligíbugiñe Búngiu lun ladügün le jubeíbei, ígira le lubeíbei Búngiu.²⁰ Wagía, siñáti wámanichun láu cátei le aríja wamáalibe lúma le agáamba wamáalibe.

²¹ Ábayati jewéridiruniña gumádimatiña, ába jígiragüduniña. Madáritiña ída lúba lan jadügün ni cáta jáu ladüga adímurejatiña buri gürígia buítí luágú Búngiu luágú cátei le asúseredubei.²² Wügüri le areídagubei láu miláguru ligía, sügú láu bián-wein irúmu láu.

Jamúriajan afíñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába joúdin le ñí jabeí jíbirigu, ába jabájüdaguni sun le jaríñagubei jábutigu fádirigu jáma wügüriña weírigutiña joun.²⁴ Dan jagáambubalin, ába jayúmuragun sun jagía lun Búngiu, ába jaríñagun.

—Wabúreme, amürü Búngiubei le adügübalin siélu, uboú, barána lúma sun cátei.²⁵ Amürü, aríñagatibu láu lubáfu Sífiri Sándu liyúmulugugiñe Davíd lé mejá esériwidubei bun.

¿Ca uágu jagáñida ja mámabaña juríu,
samína jagía lun jadügüni cátei le siñábei jadügüni?

²⁶ Iñúraguatiña lurúeitegu uboú joúngua,
oúndaraguátiña lábutigu fulásu
lun jadügün wuríbani lun Wabúreme Búngiu lúma lun Crístu le
lanúadajabei.

²⁷ ‘Áni suséreti ítara, oúndaraguatiña Heródes luma Póncio Piláto lídan ubúrugu le, jáma ja mámabaña juríu, lúma jáma Israelítagu lun jadügün wuríbani lun Biraü Jesúsu le sándubei, le banúadajabei.²⁸ Láu líra, adüga jamúti sun le baráansejabei lun lasúsereduba lan.²⁹ Guetóti, Wabúreme, aríjabeí jasádiruníwa, rúba anígi woun, wagía le esériwidubalib, lun wadímurejan buágu manúfudeiga,³⁰ gayára lámuga gíñe wareídaguágüdün

sánditiña, adüga wagíame miláguru lídan líri Biraü Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei joúndaragua, ába jabuínchun sun jagia láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súngua luágu

³² Sun ja afíñerubaña, ában lábu jarítagun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súngua luágu. ³³ Ába jasígirun apóstolugu adímureja luágu lásaarun Wabúreme Jesúsu lídaangiñe oúweni láu sarágu ubáfu, ábatí labíniruniña Búngiu sun jagia sarágu. ³⁴ Úati ni ában jádaangiñe emégeiruti ni cáta ladüga sun ja gafúlasunbaña o gában, ába buri jalúgurunun, ába janügüni tebégi, ³⁵ ába jaderegeruni joun apóstolugu lun lafánreinjoún jádan ja emégeirutiña. ³⁶ Queíburi, ñíñein ában jádaangiñe ladügawagun Leví jádan, gíriti José, agüriaajoúti luágu uboúju le gíribei Chípre, ába jáchuni apóstolugu Bernabé, míni lan líra, "Le Íchigubei Gurásu". ³⁷ Wügüri ligía, ába lalúguruni lufúlasun, ába lanügüni seínsu edéregera joun apóstolugu.

5

Jafígoun Ananías túma Safíra

¹ Ñíñein gíñe ában wügüri gíriti Ananías, túma Safíra, to lúmari, ába gíñe jalúgurun ában fulásu. ² Wügüri le, ába lanügün lídaangiñe seínsu, ába lídin láu líbiri joun apóstolugu, lafámura camá jamuga ligía rügüñein libíjin luágu fulásu. Áni subúsititi sun cátei tun lúmari. ³ Ábatí laríñagun Pédro lun.

—Ananías, ¿ca uágu bígira lun lagáñiruni Máfia barítagun lun layéejagüdünibú lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badügüni le babúseerunbei láu? ¿Ca uágu basáminara badügüni cátei le? Búngiu bálugubei bayéedagun, máma wügüriña.

⁵ Dan lagáambuni Ananías cátei le, ába láburujan oúwe. Súnti ja asúbudirubalin cátei le, ába janúfudedagun. ⁶ Ábatí jayábin wügüriña, ába joúburaguni Ananías, ába janügüni ábuna.

⁷ Queíburi ürüwa óra lárigiñe, ába tebélurun lúmari Ananías, ibídiñoun ni cáta tun luágu le asúseredubéi. ⁸ Ába laríñagun Pédro tun.

—Aríñagabeí nun, ¿luágu ebégi le jaríñagubei jalúgurei fulásu?

Ába taríñagun.

—Ánja, luágu ebégi ligía.

⁹ Ábatí laríñagun Pédro.

—¿Ca san uágu jebélura lídoun úaraduni lun joúchaguni láni Búngiu Espíritu ítara? Añatén ja anügübalin búmeri ábuna, janügadibu gíñe.

¹⁰ Lídan méme óra ligía, ába táburujan oúwe lubádu lugúdi Pédro. Dan jebélurun wügüriña, jadárioun jiláaru, ába jaságarunun, ába jábununun loúbagiñe túmari. ¹¹ Súnti gürígia ja afíñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábatí buri joúndaragun sun afíñetiña lídan fulásu témpulurugu le gíribei “Barandá Salomón”. ¹³ Úati meja ni ában jádaangiñe ja mámabaña afíñetiña lun joúndaragun jáma afíñetiña ladüga janúfude, láu sun jínsiñe jamá sun afíñetiña joun gürígia, sarágu. ¹⁴ Eíbu wéyu, eíbu jayábin gürígia lun jaffínerun luágu Jesucristu, dándu wügüriña queisi würíña. ¹⁵ Quei jadügüña lan apóstolugu sarágu miláguru, ába jaságaraguniña gürígia sánditiña ümadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu. ¹⁶ Nübintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatiña, sun jagía areídaguátiña.

Jeíbaajoún Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janügüniña apóstolugu, ába jadáürüniña. ¹⁹ Ába ladáraruni ában láni Wabúreme Búngiu ánjeli tubéneri furísun áriebu ligía, ába láfuridagüdüniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja níbaña luágu iséri ibágari le líchugubei Jesucristu joun gürígia.

²¹ Dan jagáambuni cátei le, ába joúdin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába joúndaruniña líñun-ágei lúrudu, ja súnbaña Israelítagu weírigutiña, ába joúnajan anügaña apóstolugu furísunrugugiñe. ²² Dan jachülürünbei polisia furísunrugu, madári jamútiña ñi. Ába jagíribudun, ²³ ába jaríñagun.

—Darúñu líña wadárirunun furísun, ñíñanu súdaara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádirigu lúma jábuti súdaara ja oúnigirubarun témpulu cátei le, ába jálögüdagun joúngua cába

lánfuna ídan lébeda cátei le. ²⁵ Lídan óra ligía, ligía liábin ában wügüri, ába laríñagun joun.

—Ja wügüriña ja jádarubaña furísunrugun, aňájein témpulurugu arúfudaja joun gürígia.

²⁶ Ábati lídin jábuti oúnigirutiña jáu súdaara, ába janügüniña láu buídu, ladüga janúfude lueí jachámuragun gürígia dübü jawágun. ²⁷ Dan jachülürün jáu, ába jíchuguniña ligíbugiñe líñun-ägei lúrudu, ába laríñagun fádiri íñutimaati joun.

²⁸ —Wéridi wamáadün lun marúfudajandügüya jumá lídan líri Jesúsu, áni ¿ca jadüga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügüri ligía.

²⁹ Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadügünü le lubeíbei lubáragiñe le jabeíbei wügüriña. ³⁰ Le Jabúngiute binádu wagübürigu, ligía ásaaragüdübalin Jesúsu, le méme jáfarubei láu jádaraguni luágu ában gurúwa. ³¹ Rúlaali Búngiu uweíriguni lun, ñurúgüdaleí lueígiñe loúnwenren, adüga láali Ábutime láma Asálbaragülei, gayára lámuga jígiruni Israelítagu binádu jagáburi, lun gíñe ferúdunawa lan jafígoun. ³² Geféentiwa luágu líra, geféenti gíñe Sífiri Sándu le líchugubei Búngiu joun ja ñüdünbaña láu le lubeíbei.

³³ Dan jagáambunbalin líñun-ägei lúrudu cátei le, ába jagáñidun, ába yebe jabúseerun jáfaraguniña jilágubei. ³⁴ Ñíñein ában fariséo jádan lúrudugu, gíriti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janügüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúrudu.

³⁵ Ába laríñagun joun gumádimatiña.

—Wügüriña Israélna, toúnigi jumátia láu le lúnbei jadügünü jáu wügüriña ja. ³⁶ Jarítagua jumátia luágu ñíñragua lán meja Teudás lúngua aríñaga luágu ában lan wügüri weíriguti ligía, ába jafálaruni gádürü-san wügüriña, áni afarúati jilágubei, súnti ja afálarubalin, ába jawáragadagun, ába lagúmuchun sun cátei. ³⁷ Lárigiñe, lídan lidáani jabájüdúniwa gürígia, ligía liñúragun Júdas le Galiléana lúngua, sarágu jáña afálaruti lídan labúseerun yebe lagárabagun luágun gumádi. Áfarúati gíñe, ába gíñe jawáragadagun sun ja afálarubalin. ³⁸ Ígira jumáña lubeíti wügüriña ja, memétera jumá jámoun. Ladüga ánjein jáni lubeí wügüriña cátei le jarúfudajabei láma le jadügübei, lagúmuchaguba, ³⁹ ánjein láni lubeí Búngiu, siñá jubei agünrinchagua. Toúnigi jumá, mageíndagua jumá láma Búngiu.

⁴⁰ Ába jánjanrun súngubei láu le lariñagubei. Ábatí jebélaagüduniña apóstolugu, ába jabeíchuniña, ába jaríñagun joun lun jebé lan jadímurejan lídan líri Jesúsu. Lárigiñe, ába jígiragüduniña, ⁴¹ Ába jáfuridun apóstolugu jámagiñe lúrudugu, gúndaañu láu laríjiniña Búngiu queísi gürígia gadünamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tídan buri muna ságü wéyu, aríñaga jagía luágu Jesúsu lan Crístubei le agúrabajoúbei.

6

Jálua joúniwa sédü ídejatiña

¹ Lídan dan ligía, quei agíbedeina jamátima afíñetiña luágu Jesucristu, ába jagúmeserun ja adímurejabaña güríegu adárira jadúnrun ja adímurejabalin jerérun juríu, ába jaríñagun luágu mibíjin jamá würiña güríegu ja jiláañabaña úmari eígini dan le lafánreinjoúniwa, ságü wéyu. ² Ábatí joúndaruniña dúusu apóstolugu afíñetiña, ába jaríñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eígini. ³ Ligía lubeíti nidújeñu, áluga jumá sédü wügüriña jidaangiñe ja gafíñerúati jawágu, ja chúbaña áu, ja derégeguatiña joúngua lun Sífiri Sándu le gumúti, lun jadügünü wadágimanu le. ⁴ Wagía, wedéregerubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súngubei lídan cátei le, ába janúadiruní Estéban, le ában wügüri buín lína láu afíñeni luágu Jesucristu áni derégeguañu lína língua lun Sífiri Sándu le gumúti, Felipe, Prócoro, Nicanor, Timón, Parménas lúma Nicolás le Antioquiana, lé meja afálarubalin ligáburi jaffíñen juríu. ⁶ Ába janügüuniña le ñíjin jabeí apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía afíñetiña Jerusalén furése, ába giñe jafíñerun sarágu fádirigu juríu luágu Jesucristu.

Ladáürün Estéban

⁸ Adáaguatíja Estéban, le ábanbei wügüri le buínbeti láu ubáfu lúma abíniruni lúmagíñeti Búngiu, miláguru lúma seíni jádan gürígia. ⁹ Ábatí jagúmeserun gürígia asígeneja luágu, gürígia jagía, tídaangiñetiña jalígilisin juríu to gíriboun “Idámunigu Joúnguaaña”, jáma Cirénena, Alejandríana, Cilíciana jáma Ásiana. ¹⁰ Siñáti joun lúma Estéban, ladüga láu lichú áu le líchugubei Sífiri Sándu lun ladímureja. ¹¹ Ábatí jafáyeirun wügüriña lun jaríñagun luágu agáamba jamáani adímureja wuríba luágu Moisés lúma luágu Búngiu. ¹² Ábatí jafúdagüduniña gürígia, jáma

arúfudajatiña lilúrudun Moisés, jáma wügüriña weírigutiña lídan jafíñen juríu, ába járugüduni Estéban, ába janügünü ligibugiñoun líñun-ágei lúrudu. ¹³ Ába giñe jálugun yéetiña lun jaríñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jaríñaga.

—Agáamba wamúti laríñagun luágu lagünrinchaguboún lan Jesúsu Nazarétna témpulu, sáansi leíme igáburi le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímuřejan Estéban luágu lufúleisein

¹ Ábatí laríñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagübürigu, agáamba jumána. Weíriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán. ³ Ába laríñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.” ⁴ Ábatí láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanügünü Búngiu Abrahám lídoun fulásu le ñí lubei wagánawa guetó. ⁵ Míchuti ni murúsun múa lun lídan fulásu le, aríñagarügti lun luágu lachülürüba lan dan lun lánibeí lan ageíraü le jáu sun ladügüwagun, láu sún meja marájüñügili lan Abrahám lídan dan ligía. ⁶ Aríñagati Búngiu lun luágu jaganoúba lan ladügawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu. ⁷ Aríñagati giñe Búngiu lun. “Nagúseragüdübaña lílana fulásu le anügübaliña idámunime, lárigiñeme lásügürün gádürü-san irúmu, ábame jáfuridun ñígíñe, ábame jesériwidun nun lídan fulásu le.” ⁸ Adügati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagüriajoúnbei liraü Abrahám le Isáac, ába lerésibiruni circuncisión luágu wídü wéyú láu, ítara giñe ladüga Isáac lun Jacób le liraü, adügaleí Jacób, le méme gíribei Israél, joun dúusu lirajüñü, ja jagübürigubaña dúusu türíbu ja gíribaña Israelítagu guetó.

⁹ ‘Lirajüñü Jacób ja, ja binádubaña wagübürigu, ába jagímagajan lun José le jamúlen, ába jalúguruni lun lanügün Ejíptoun quei idámuni. Ñíñein Búngiu lúma José,¹⁰ ába leséfuruni lídaangiñe sun lidíjeri láu líchugun gunfaráandaü lun. Ába

lagáñeiragüdüni lufúleisein Faraón, le lurúeite Ejípto lun, ába líchuguni José ábutime ñi Ejípto lúma tídan lúban Faraón.

11 'Ábatí ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagübürigu cába lan jeíga. 12 Ába lagáambun Jacób luágu níjein lan eígní Ejípto, ába loúnajaniña lirajüñü, ja binádu wagübürigu, ñi. Ligía furúmiñetibei jaweíyasun. 13 Le libíaman joúdin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. 14 Ábatí loúnajan José anúgei Jacób le lúguchi jáu sun lufámilian, Ejiptoun, ürüwañanu-wein-queínsi gürígia jagía. 15 Ítara líña lídinbei Jacób agánawa Ejípto, le ñí lubei loúwe, ñí lubei giñe joúwegua binádu wagübürigu. 16 Átiri irúmu lárigiñe, ába lanügúniwa jábu ñígíñe lídoun fulásu le gíribei Síquem, ába jabunún lídan umúajaü lé meja lagáñijabei Abrahám jámagiñe lirajüñü Hamor ñi Síquem.

17 'Dan le layárafadúnbei dan lun lagúfulirun dimúrei le líchugubei Búngiu lun Abrahám, gíbeeña ladügawagun Israél Ejípto. 18 Ábatí lagúmeserun ában urúei agúmadija Ejípto le ibídiñejabubei lun José. 19 Ába layéeraguniña urúei ligía warásan juríu, amúdiragua láña binádu wagübürigu, águragüdáña jasáanigu ja figígiña joun lun joúwegun, gumúgua lámuga warásan. 20 Lídan dan ligía, ligía lagüriajoún Moisés, ában irajü buídumeraüti, ába jagüriajani lagübürigu jábiñe luágu ürüwa játi. 21 Dan lachülürünbei dan lun jáguruni, ába jáguruni, ába tabúduni liraü urúei Ejíptona, ába tagüriajani quei tiraü. 22 Ligía lafúnrendeirubalin Moisés lichú jáu Ejíptona, áni gabáfutiti lídan le laríñagubei lúma le ladügübei.

23 'Dan le bián-weínjali irúmu láu Moisés, ába lálugun lídin aríjaña lirásan ja ladügawagun Israél, ja ñibaña Ejípto. 24 Ába laríjin ában Ejíptona amúdiragua ában jádaangiñe, ába lídin Moisés íderaguei lidúje, ába leséfuruni láu láfaruni Ejíptona ligía jilágubei. 25 Moisés, jarítaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. 26 Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. "Ában mémetia mútu jugúya, ¿ca uágu jageíndagua júmagua?" 27 Ábatí láraruni wügüri le áluajabeí wuríbu lúma le ában, ába laríñagun lun. "¿Ca íchubaribü ábutime lúma agúseragüdütíme wádan? 28 ¿Buséntibü giñe báfarunina quei báfaruni Ejíptona ligíra gúñaarü?" 29 Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián

irájüñü ñi.

³⁰ ‘Bián-wein irúmu lárigiñe, ába lasáliragun ában ánjeli lun lídan fulásu mageírawati, yaráfa lun wübü le gíribei Sinaí, liábin lun quei wátu geméti lídan ában búbugati. ³¹ Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagübürigu, Lubúngiute Abrahám, Lubúngiute Isáac lúma Jacób.” Ábatí lagúmeserun Moisés adádagara láu anúfudei, májaali ni lun laríjin ñíjin. ³³ Ába laríñagun Búngiu lun. “Gidáboun bigeídin lueígiñe bugúdi, ladüga fulásu le ñí bubei rára, fulásu sándutí. ³⁴ Aríja náali jasúfurirun numútuniña Ejípto, agáamba náali jagúajan láu igárigu, neséfuraaña lubeíti. Jigábu lubeíti, noúnajadibu Ejípto.”

³⁵ ‘Láu sun mebéresen jamá láu Moisés, álüğüda jameí ca lan íchubalin ábutime lúma agúseragüdütime, oúnaja lumúti Búngiu quei ábuti lúma quei eséfujati, adímurejeina Búngiu lídaangíñe ánjeli le asáliragubei lun lídan búbugati. ³⁶ Moisés aságarubaliña binádu wagübürigu Ejíptogiñe, adüga ligía miláguru buri lúma buri cátei weíriguti lídan fulásu ligía, lídan Barána Funáti, lúma lídan fulásu mageírawati, luágu bián-wein irúmu. ³⁷ Moisés meme le, ligía aríñagubei joun Israelítagu. “Loúnajaba Búngiu ában proféta jun jádaangiñe guánarügü jibíriña, quei loúnajanina. Adüga jumá gásu láu.” ³⁸ Lídan le añája lubeí Israelítagu adámurigu lídan fulásu mageírawati, Moisés méme le, ába ladímurejan lúma ánjeli luágu wübü le Sinaí, ába lásgüragüdüni lerérun ánjeli ligía joun binádu wagübürigu. Ligía le erésibirubalin ugánu le adúrarubei lun sun dan lúmagiñe Búngiu lun lásgüragüdüni woun.

³⁹ ‘Májatiña meja binádu wagübürigu jagáambuni Moisés, mebéreseruntiña láu, busénrugü jagía jagíribudun Ejíptoun. ⁴⁰ Ábatí jaríñagun lun Aarón. “Buséntiwa lun badügün búngigu woun lun joúdin wabá wabá, ladüga ibídiñeti woun ca lan susérebei lun Moisés, le aságarubaliwa Ejíptogiñe.” ⁴¹ Ábatí jadügün ában tiyáwa bágasu lun jasándunme, ába jáfarun anímaalugu lun jadágaragüdüni tun jasándun, ába jadügün fédu lun jagúndaarun láu cátei le jadügübei láu jájabu. ⁴² Ábatí ladíreirun Búngiu jaweí, ába lígiruniña lun jájuduragun joun warúguma ja siélubaña. Ítara líña labürüdün tídan jalíburun profétagu.

Jugúya Israelítagu, ¿áfaratün funági anímaalugu lun jadágaragüdüni nun lídan bián-wein irúmu le jáubei lídan fulásu mageírawati?

⁴³ Madügün jumúti líra, lubáragiñe lira, barü jumuti jisándun Molóc tídan lágei to jadügüboun lun,

túma tiyáwa warúguma to gíriboun Renfán, to gíñe janügüboun quei jisándun,
iyáwaü buri ja jadáagun guánarügü lun jájuduragun joun.
Ligía naságarubadüñ lubeí jageíragíñe, noúnajaünme yagüroun
méme lueí Babilónia.

⁴⁴ 'Lidan fulásu mageírawati, ñíñoun méja lúban Búngiu to gadíñurúwadiboun jáma binádu wagübürigu, ñí lubei lerédera Búngiu jáma. Adüga lumútú Moisés lúban Búngiu tugúya queísi larúfuduni Búngiu lun lun ladügúnun. ⁴⁵ Nújeingua méja muna tugúya jáma jadügawagun binádu wagübürigu, ába janügúnun jámawagua lídoun fulásu le ñí lubei wagánawa guetó, dán meja le lagáñeirubalin Josué wuríbu jawágu mítu ja mámabaña juríu já meja aganoúbaña ya. Ítara liña, nújeingua lubeí lúban Búngiu tugúya lídan fulásu le darí lidáani Davíd. ⁴⁶ Darítí urúei Davíd fuleísei ligíbugíñe Búngiu, ába labúseerún yebe ladügún ában témpulu lun laganoún Lubúngiute Jacób ñi, ⁴⁷ Salomón adügúbarun témpulu tugúya, ⁴⁸ láu sun, maganoún lan Búngiu le weírigutimaabei tídan buri ligílisi to jadüga gürígia, queí meja lariñaguni proféta.

⁴⁹ Siélú nálabei le ñí lubei nañúura lun narúeijan, uboú, le ñí lubei neméraaguagüdei nugúdi.

¿Cába tuwúyeri muna jadüga nun? líña lariñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadüga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítára jína quei ja ibídiñejabúbaña lun Búngiu. Súnwandan májatün lun Sífiri Sándu, ítara jína quei binádu jagübürigu. ⁵² ¿Ca jádaangiñe profétagu moúserun jabáña binádu jagübürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagíñe ánjeligu, míndintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacünrinjan jári luágu Estéban, le jagáni lun. ⁵⁵ Ánjein Estéban, buin lína láu lubáfu Sífiri Sándu, ába larijin siélun, ába larijini luweírigun Búngiu, lúma Jesúsu rára lueígiñe loúnwenren Búngiu.

⁵⁶ Ába lariñagun joun.

—¡Aríja jumá! Aríagu nína lun siélú darágu, lúma Jesúsu le Wügüri Garaüwarügti, lueígiñe loúnwenren Búngiu.

⁵⁷ Ába jadáuruni jarígei láu jájabu lueí jagáambuni, ába jayábin sun jagía luágún, agúarajeina. ⁵⁸ Ába jaságuruni ubúrugugiñe, ába

jígirunun geféentiña janáangun lábugiñe laríaajan ában wügüri gíriti Sáulo, ába jachámuragun dübü luágun Estéban.⁵⁹ Súnti añaja lan achámuragua dübü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figoú le.
Lárigiñe laríñaguni le, ába loúnwen.

8

Leíbaajaniña Sáulo ja afíñebaña luágua Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eíbaajoúni jawágun ja afíñebaña luágua Jesucristu, Jerusalén. Ába janúragun lídoun buri lirajüñü fulásu Judéa lúma Samária le míbetiña gürígia ñii, apóstolugu rügüñanu manúrajan.² Ába jayábin wügüriña ja derégeguatiña joúngua lun Búngiu, ába jábununi Estéban láu sarágu íruni luágua loúnwen.³ Ábati lasígirun Sáulo eíbaajaña afíñetiña, ábaja lebélurun tídoun sun múna lun laságaruniña wügüriña jáma würíña adúruujeina, ába loúnajaniña furísunrugun.

Lapúrichijoún ugánu buítí luáguti asálbaruni Samária

⁴ Apúrichija jamúti ja anúrajabaña Jerusaléngiñe ugánu buítí luágua chülü lan Jesucristu lun lasálbaruniña sun gürígia, sun le ñí lumuti joúdin.⁵ Ába lídin ában jádaangiñe, gíriti Felípe, lídoun ában ubúrugu Samária, ába lagúmeserun adímureja joun ja ñibaña luágua Crístu.⁶ Ábaja joúndaragun gürígia, ru jagía jarígei lun le ladímurejabeí Felípe, aríja jameí buri gíñe miláguru le ladáagubeí.⁷ Ladüga sarágu buri gürígia ja gawágutiña espíritugu wuríbatiña, areídaguátiña, ába buri jáfuridun espíritugu wuríbatiña jagía agúarajeina jádaangiñe, areídagua jagía sarágu derégüdaña jamá, meíbuguntiña.⁸ Súnti gürígia lídan fulásu ligía, gúndaatiña luágua cátei le.

⁹ Ñíñein ában wügüri lídan fulásu ligía, gíriti Simón, gabíñarajati meja, lüñajaali ayééjaña gürígia Samariána láu laríñagun joun luágua máma lan furúmieguarügü gürígia ligía.¹⁰ Agáambaja jamútítija sun gürígia buídu, jámagiñe ja gadémegutiña dagá jámoun ja weírigutiña, ába jaríñagun.

—Ibíja lumúti gürígia le oúnwenbun lubáfu Búngiu.

¹¹ Adügatiñatíja gásu láu, ladüga lüñajaali ayééjaña láu labíñarajan.¹² Dan le jaffíñerunbei luágua ugánu le líchugubeí Felípe joun luágua larúeijan Búngiu lúma luágua Jesucristu, dándu wügüriña quei würíña, ába jabásterún.¹³ Simón meme ligía

ába gíñe lafíñerun, ába gíñe labásterún, ába lagúmeserun afálarei Felípe, le luweírin lanígi láu buri oúnwenbun buri miláguru lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáali lan Samariána lerérun Búngiu, ába joúnajani Pédro lúma Juan ñi. ¹⁵ Dan le jachülürünbei, ába jayúmuragun jawágu affíñetiñi ja Samariána lun liábiba Sífiri Sándu jádoun, ¹⁶ ladüga miábingili lan Sífiri Sándu lídoun ni ában jádaangiñe, badíseirügügiñi ládan líri Wabúreme Jesúsu. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñübin lan Sífiri Sándu jádoun gürígia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu. ¹⁹ Ába laríñagun joun.

—Rújumei gíñe ubáfu le nun, lun dánme lan níchuguni nújabu luágu furúmieguárügi, lun gíñe lerésibiruni Sífiri Sándu.

²⁰ Ábati laríñagun Pédro lun.

—Beíba máfiougatin láu sun biseínsun, ladüga jarítaguatibu luágu gayára lan lagáñijoún cátei le ledéweejan Búngiu. ²¹ Maríchatibú, mafánran buguya ládan wesériwidun lun Búngiu, ladüga múaraantu banígi ligíbugiñe Búngiu. ²² Ígirabeí buríban le, ayúmuraguabá lun Búngiu, lun ferúduna lánibú luágu luríban barítagun. ²³ Ladüga aríja numúti luágu buin tíñi lan banígi láu wuríbani, áni ragüñu liñálibu Máfia.

²⁴ Ábati laríñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

²⁵ Lárigiñe jíchugun fe luágu Jesucristu lúma jadímurejani lerérun Búngiu ládan fulásu ligía, ába japúrichijani apóstolugu ugánu buíti luáguti lasálbaruniña Jesucristu gürígia lídaangiñe jafígoun ládan sarágu lirajüñü fulásu Samaría, luágu jaweíyasun járigoún Jerusaléoun.

Felípe lúma wügüri le Etiopíana

²⁶ Lárigiñe cátei le, ába laríñagun láni Wabúreme Búngiu ánjeli lun Felípe.

—Aráansebá, beíba luágun sur lídaangiñe ūma le arárirubei Jerusaléngiñe lun ubúrugun Gáza.

Ligía ūma le ásügürübei lídaangiñe fulásu mageírawati.

²⁷ Ába laráanserun Felípe, ába lídin. Luágu leíbuguniwágu, ába ladárirun ában wügüri Etiopíana lubá lubá. Wügüri ligía siñáti garaü lan, ában wügüri weíriguti, ligía gíñe gamánijaribeí láu sun tiseínsun Candáce to lurúeite Etiopía. Liábiñati wügüri ligía Jerusaléngiñe lárigi lídin ájuduragua lun Búngiu.

28 Lagíribuduñáti lageíroun, ñun tídan ában cárü, alíjeinaloún lilíburun proféta Isaías. 29 Ábatí laríñagun Sífiri Sándu lun Felípe.
—Yaráfabá tuágun cárü túra.

30 Ába leibaagun tuágun cárü, ába lagáambuni lalíijaña lan tídan lilíburun Isaías, ába laríñagun lun.

—¿Gunfaráanda bumútisan le balíjabe?

31 Ába laríñagun wügüri ligía lun.

—¿Ída lubági gunfaráanda náani, úaga cába lan afúnraanguágüdei nun?

Ába laríñagun lun Felípe lun ládinun lúmoun lun lañúurun loubagiñe.

32 Niján buri dimúrei le lalíjabe.

Quei mudún, lanügüwa lun lafarún jilágubei, ítara quei leréderun mudún maníñu jagíbugiñe ja ásarubalín líyu, ítara líña gíñe mariñagun lan ni cáta.

33 Ünabuti lanügün, áni michugúnwati lirícha lun, siñábei ladímuñrejoún jawágu ladügawagun, ladüga gumúja lan labágaridun uboúagu.

34 Ába laríñagun wügüri ligía lun Felípe.

—Adügabeí fuleísei nun, aríñagabeí nun, ¿cáteisan le uágubei laríñagei wügüri le abürüjabeí dimúrei le, luoúgu, ódi luágu ámu?

35 Ábatí lagúmeserun Felípe arúfudajei Lerérun Búngiu lun, lúmagiñe le ñígíñe lubeí lagúmesera alíja, ába líchuguni ugánu luáguti Jesúsu lun. 36 Dánti le jásügürünbei lídaangiñe ában fulásu le ñí lubei dúna, ába laríñagun wügüri ligía.

—Nijántia dúna, ¿siñátisan nabásterun?

37 Laríñaga Felípe lun.

—Ánjein afíñiñe bubeí luágu Jesucristu táu sun banígi, gayáraati babásterun.

Laríñaga wügüri ligía lun.

—Afíñetina luágu Jesucristu lan Liraübei Búngiu.

38 Ábatí laráramagüdünun cárü, ába jarárirun biángubei jagía dúnarugún, ába labásterágüduni Felípe. 39 Dan jamúdeirun dúnarugugíñe, ába lanügüni láni Búngiu Espíritu Felípe ñígíñe, ába marijin láali lan wügüri ligía. Ába lasígiruni leíbugun, gúndaañu. 40 Ába ladáriragun Felípe lúngua Azoto, ába lídin lídaangiñeina fulásu apúrichijeinaleí ugánu luáguti Crístu darí lachülürün Cesareá.

9

Lerésibiruni Sáulo Crístu queísi lasálbaragüle

¹ Sun dan ligía, merédeti lasíadiruniña Sáulo afíñetiña luágu Jesucristu. ² Ligía lídinbei lúmoun fádiri íñutimaati lídan jafíñen

juríu amúria ja gárada láutu ubáfu lun lídin tídan buri jalígilisin juríu to Damás coboun álua ja afálarubalin lémeri Crístu lun lanügüniña adáüragua Jerusalén, dándu wügüriña quei würiña.³ Luágua leíbuguniwágu, dan yaráfaali lun Damásco, sódini ába ladúnraagun ában larúgounga siélugiñe, geyégua láu.⁴ Ábati láburujan Sáulo múa rugún, ába lagáambun laríñagun ában umálali lun.

—Sáulo, Sáulo, ¿ca uágu beíbaajana?

⁵ Ábati laríñagun Sáulo.

—¿Cátabusan Nabúreme?

Ába laríñagun umálali ligía.

—Jesúsu áu, le méme beíbaajabe. ⁶ Sarába, belúba ubúrugun, laríñawagúba bun ñi cába lan badüga.

⁷ Wügüriña ja úarabaña lúma Sáulo lídan luweíyasun, ába jaráramun láu luweírin janígi ladüga agáamba jamúti umálali, áni maríjin jamúti le adímurejabe. ⁸ Ába láasaarun Sáulo múa rugugíñe, dan le léfegechúnbalin lágu, maríjinjali. Ábati járugüdüni lújabu, ába janügüni ubúrugun Damásco. ⁹ Ába leréderun ürüwa wéyu ñi maríjinga, meígin líña, mátun ni cáta.

¹⁰ Ñíñein ában afíñeti luágua Jesucristu ñi Damásco gíriti Ananías, le únbei layawadagua Wabúreme Jesúsu, ába laríñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesúsu lun.

—Beíba guetó guetó luágua üma le gíribei Surúti, danme le bachülürün lúbiñe Júdas, bálugüdjame luágua ában wügüri Társona gíriti Sáulo. Badárirubei ñi ayúmuragua lun Búngiu,¹² áni ayáwadaguaali ában wügüri gíriti Ananías lun, ába líchuguni lújabu luágua lun gayára lan laríjin.

¹³ Dan lagáambunbalin Ananías cátei le, ába laríñagun.

—Nabúreme, gíbeeñátia abájüdagutiña nun luágua wügüri ligía lúma luágua sun wuríbani le ladáagubei joun ja afíñebaña buágu, Jerusalén. ¹⁴ Guetó, liábiña ñájoun láu ubáfu jámagiñe jábutigu fádirigu lun ladáüraguniña sun ja bánigubaña.

¹⁵ Ába laríñagun Jesúsu lun.

—Beíba, ladüga anúadira náali wügüri ligía lun ladímurejan nuágu joun gürígia ja mámabaña juríu lúma joun jarúeitegu, lúma gíñe joun Israelítagu. ¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñí lubei Sáulo. Ába lebélurun múnadoun, ába líchuguni lújabu luágua, ába laríñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu üma le ñígiñe lubeí biábin, lun gayáraaya lan baríjin, lun gíñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueígiñe lágu, ábaya laríjin. Lídan óra ligía, ába labásterún. ¹⁹ Lárigiñe, ába leigin, ábaya lejéredun, ába leréderun átiri wéyu jáma afíñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraübei Búngiu. ²¹ Súnti ja agáambubalín, ába laweíridun janígi, jaríñagati.

—¿Másan niján wügüri léñaja eíbaajabáliña ja afálarubalin Jesúsu Jerusalén? ¿Ma ligía méme le ñübinbei ya lun lanáanguniña adáüra, lun lederegeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürígia lídaangiñe jafígoun, darí lun labúlieidaguágüdün jáu juríu buri ja aganoúbaña Damásco.

Leséfurun Sáulo jaweíjuríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdün le jabúseerubei jadügün lun Sáulo. Wéyuagu, áriebu, jagúrabajanja juríu luágu béra le áfuridagülei le láni ubúrugu Damásco lun jáfaruni jilágubei.

²⁵ Ába jíchuguni afíñetiña lídoun ában faníñe weíriti, ába jarárigüduni áriebu lueígiñe baríeru le geyégubei láu ubúrugu, ába leséfurun.

Sáulo ubúrugu Jerusalén

²⁶ Dan le lachülürünbei Sáulo Jerusalén, ába yebe lálugun ládaragun lúngua jádoun afíñetiña, sun jagía, janúfudetiña lueí, ladüga mafíñetiñá yebe luágu afíñejali lan luágu Jesucristu. ²⁷ Ába lanügünü Bernabé jagíbugiñoun apóstolugu.

Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúrugu Damásco.

²⁸ Ábati jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña gúriégu, asígeneja ligía jáma, ába jabúseerun jáfaruni jilágubei.

³⁰ Dan le jasúbudirúnbalin afíñetiña cátei le, ába janügünü Sáulo ubúrugun Cesaréa, ñígiñe ába joúnajani Társoun.

³¹ Lídoun buri dan ligía, buítí joúserúniwa afíñetiña luágu Jesucristu ja aganoúbaña Judéa, Galiléa, lúma Samária. Ába

jedérebugudún lídan jafíñen luágu Jesucristu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebelujaña lubeí Pédro lídan buri fulásu lun líderaguniña ja afíñeneabaña luágu Jesucristu, ába gíñe lídin aríjaña lánigu Búngiu ja ubúrugubaña Lída. ³³ Ni ladárira ában wügürü gíriti Enéas, wídu irúmu láu gabánarugu láu derégüdaü. ³⁴ Ába laríñagun Pédro lun.

—Enéas, areídaguagüda lumútibu Jesucristu. Sarába, aráanseboún bigábana.

Ába lásaarun Enéas óra ligía. ³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jafíñen, ába jafíñerun luágu Jesúsu.

Táguyugun Dórcas

³⁶ Lídan meja dan ligía, niñoun meja ában afíñetu aganoútu Jópe, gíritu Tabíta, lídan jerérun güriégu, gíritu Dórcas. Würi tuguya, súnwandan táu adüga buíti, íderagua tuguya gudémetiña. ³⁷ Lídoun dan ligía, ába tasándirun Dórcas, ába toúnwen, lárigiñe jágawagüdünun, ába jaríwachaguagüdünun. ³⁸ Yaráfati Jópe lun Lída le ni lubei Pédro, queíti jagáambuni afíñetiña luágu níjein lan ni, ába joúnajan bián wügürüña aríñaga lun.

—Queímoun Jópe, oúfuda.

³⁹ Ábatí lídin Pédro jáma. Dan le lachülürünbei, ába janügüni tídoun rúmu to ni tubei jiláaru, ába jagúriridágun sun würíña ja jiláguaañábaña úmari láu, ayájuaja tárigi, arúfudajoún buri dínugu túma simísi tó buri tájüchaguboún Dórcas dán meja moúnwengiru, lun. ⁴⁰ Ába láfuridagüdünína Pédro sun ja niibaña, ába lájuduragun, ába layúmuragun lun Búngiu. Ábatí laríjin tuágun jiláaru, ába laríñagun tun.

—Tabíta, sarába.

Ábatí téfegechuni tágu, dan taríjini Pédro, ába tiñúragun túngua. ⁴¹ Ába lárügüdüní tújabu, ába lásaaragüdünun. Lárigiñe, ába lagúarun joun würíña jagía jáma jíbiri afíñetiña ja niibaña, ába larúfudunun joun, wínwañu. ⁴² Ába lagaambún cátei le lídan sun ubúrugu Jópe, ába sarágu jamá afíñerutiña luágu Jesucristu. ⁴³ Ába leréderun Pédro sarágu dan lídan ubúrugu ligía, lúbiñe Simón le aráansejabei úraü.

¹ Ñíñein ában wügüri ubúru gu Cesáreá gíriti Cornélio, gumándan joun súdaara ja Italiána. ² Wügüri ligía jáu sun lufámlian, derégeguatiña joúngua lun Búngiu, judúguatiña lun Búngiu láu sun máma jamá juríu. Rúti buri gíñe sarágu seínsu lun jíderawagún juríu, áni súnwandan layúmuragun lun Búngiu. ³ Luágú ában wéyu, queí buri ladaünrún ürüwa rábounwéyu, ába lasáliragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjaleí buri cátei le badügübei lun bíderaguniña gudémetiña. ⁵ Oúnajabá lubeíti wügüriña ubúru gu Jópe lun joúguni Simón, le gíñe gíribei Pédro, lun liábin bun. ⁶ Lúbiñe Simón le aráansejabeí úraü, le gábanbei láru barána.

⁷ Dan le ñüdünjali ánjeli le adímurejabeí lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdaara ligía, ában wügüri derégeguati lúngua lun Búngiu, leménigira Cornélio. ⁸ Ába labájüdaguni sun cátei joun, ába loúnajaniña ubúru gu Jópe.

⁹ Larúgan amídirugu, sun ayárafadeina jamá wügüriña ja lun Jópe, ába lamúdeirun Pédro luágun tábulugu muna le fadábei, ayúmuragua lun Búngiu. ¹⁰ Weírijaliti liláma óra ligía, busénjali leígin. Dan le añája lan aráanserei leígin, ába lasáliragun ában cátei lun ítara. ¹¹ aríja lumúti lánjunrenchun siélun, ába tiábin ában cátown camá jamuga gamísá weíritu gürágu lueígiñe gádürü tarígei, tiábin arárireina múarugun. ¹² Tídan gamísá tugúya, ñíñanu sun jawúyeri anímaalu, gádürügu tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

¹⁴ Ába loúnabun Pédro.

—Uá, Nabúreme, meígnajágidina ni cáta le wanügübei quei mabuídunti segúnlilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

¹⁶ Ürüwañein weíyaasu lasúseredun cátei le, lárigiñe, ábaya tamúdeirun gamísá tugúya siélun. ¹⁷ Súnti niján lan Pédro láu luweírin arítaguni luágu, asáminara ca lan lanichigubei cátei le laríjubei, ligía jachülürün luwügüriñan Cornélio, álögüdajeína tuágu lában Simón. ¹⁸ Dan jachülürün tubéneri muna, ába jálögüdajan rein áanjein ñí lubei lagánawa ában gíriti Simón le

gíñe únbei jaríñaga Pédro. ¹⁹ Queíti buga nijágu lan Pédro asáminara luágu cátei le asáliragubei lun, ába laríñagun Sífiri Sándu lun.

—Añája ürüwa wügüriña álugabu, ²⁰ raríba, oúfudabá, beíba jáma láu afíñeni ladüga áu lan oúnajabalíñia.

²¹ Ábati larárirun Pédro le ñíjin jabeí wügüriña ja loúnajabaña Cornélio, ába laríñagun joun.

—Áu le jáluajabei. ¿Ca gabügürübalün?

²² Ába jaríñagun.

—Loúnajan gumándan le gíribei Cornélio wagía, ában wügüri surúti, derégeguati lúngua lun Búngiu, jínsiñeti joun sun juríu. Ñübinti ában ánjeli aríñaga lun lun loúnajan oúgabu lun bídin lúbiñe, lun lagáambuni le lúnbei baríñaguni lun.

²³ Ábati lebelaagüduniña Pédro, ába jeréderun lúma ñi áriebu ligía. Larúgan, ába lídin Pédro jáma, ñüdüntiña gíñe jádaangíñe afíñetiña ja aganoúbaña Jópe jáma.

²⁴ Larúgan, ligía jachülürün Cesaréa, le ñí lubei Cornélio agúrabajaña jáu lidújeñu jáma jabuídun-ägei lumádagu ja lamísurajabaña. ²⁵ Dan lachülürün Pédro, ába láfuridun Cornélio erésibrei, ába lájuduragun ligíbugiña láu sarágu inébesei. ²⁶ Ába liñúraguni Pédro, ába laríñagun lun.

—Ráramabá, wügüri giñe áu bíledi.

²⁷ Súnti niján lan adímureja lúma, ába lebélurun, ába ladárirun sarágu gürígia adámuriñu ñi. ²⁸ Ábati laríñagun Pédro joun.

—Subúsi jumúti luágu mája lan waffíen wagía juríu lun joúndaragun juríu jáma ja mámabaña juríu quei jugúya, ni lun webélurun tídoun jában lueí wasálirun mabuídunga ligíbugiña Búngiu. Wel, aráfuda láali Búngiu nun luágu mabúseerun lan lun nouseruniña ja mámabaña juríu queísi gürígia mabuíduntiña. ²⁹ Ligía nánjanrunbei niábin dan le boúnajanbei nuágu. Buséntina jamúgati nasúbudiruni ca lan lébubei joúnajan nuágu.

³⁰ Ábati loúnabun Cornélio.

—Ürüwa wéyu guetó, queíburi óra le, ñáñadina núbiñe ayúmuragua lun Búngiu ladaürün ürüwa rábounwéyu, queísi wéchun, ligía lasáliragun ában wügüri nun táo ában dáüguü mirítu. ³¹ Ába laríñagun nun. “Cornélio, agáamba láali Búngiu bayúmuragun, jaritaguualiti luágu buri cátei le badügübei lun bideraguniña gudémetiña. ³² Oúnajabá lubeíti wügüriña ubúrugu Jópe oúgei Simón le gíñe gíribei Pédro, lúbiñe ábanya Simón aráansejati úraü, le gábanbei láru barána, ñi lagánawa.”

³³ Ába lubeíti nouénajan oúgabu furése, áni buítiti badüga biábin. Guetóti awánja sun wagía ya ligíbugiña Búngiu,

buséntiati wagáambuni le lariñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

34 Ábati lagúmeserun Pédro adímureja, ába lariñagun.

—Subúdi náali guetó luágú ában lan lábu lanügüniña Búngiu sun gürígia. 35 Resíbirügü lumútiña sun ja inébejabúbaña lun áni adúga jameí le buídubei, dándu juríu quei ja mámabaña juríu. 36 Adímurejati Búngiu joun ladügawagun Israél, adímurejeina ugánu luáguti gayára lan jaráandarun gürígia luma Búngiu lídaangiñe Jesucristu, le Jabúremebi sun gürígia. 37 Juguya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía. 38 Subúdi jumúti luágú rúlaani Búngiu lubáfu Sífiri Sándu lun Jesúsu Nazarétna, luágú meja giñe ladáagun buíti, lúma lareídagaguagüduniña ja asúfurirubaña lábugiñe lubáfu Máfia. Ladügünbalin buri meja cátei le, ladüga ñíñein lan Búngiu lúma. 39 Wagía geféentiwa luágú sun cátei le ladügübei Jesúsu Jerusalén lúma lídan sun líbiri jageíra juríu. Lárigiñe, ába jáfaruni jilágubei láu jádaraguní luágú ában gurúwa. 40 Sarágüda lumúti Búngiu lídaangiñe oúweni luágú lürüwan wéyu, ába larúfudaguágüduni lúngua wínwañu woun. 41 Marúfudagúnti lúngua joun sun gürígia, lueídüguya woun, wagía le anúadaja láañabaña Búngiu lúmagiñe binárü quei geféentiña luágú lásaarun lídaangiñe oúweni. Joútiwa lúma, gurá wagía lúma lárigiñe lásaarun lídaangiñe oúweni lúnya labágaridun. 42 Ába loúnajaniwa apúrichija joun gürígia luágú, lun giñe waríñaguni luágú rúlaali lan Búngiu Jesúsu méme le lun lagúseragüduniña ja wínwangiñabaña jáma ja jiláguaañábaña dánme le lagíribudun uboúagun. 43 Adímurejaña meja giñe sun profétagu luágú Jesúsu lúmagiñe binárü, luágú sun lan ja afíñebaña luágú, resíbi jamáni ferúdun luágú jafígoun.

Jerésibiruni ja mámabaña juríu Sífiri Sándu

44 Ñígili Pédro adímureja, ligía liábin Sífiri Sándu jadoun ja agáambabajalin ladímurejan. 45 Játi juríu ja afíñetiña luágú Jesucristu ja ñübinbaña úara lúma Pédro, ába laweíridun janígi láu liábin Sífiri Sándu jadoun ja mámabaña juríu. 46 Agáamba jamútiña adímureja dimúrei le mámabei jerérun, adímureja jagía luágú luweírigun Búngiu. 47 Ábati lariñagun Pédro.

—¿Majoúabei funági lun jabásterún gürígia ja, quei resíbi jamáali lubeí Sífiri Sándu queígubeirügü wagía?

48 Ába líchugun dimúrei lun jabásterun lídan líri Jesucristu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun títana ligílisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afíñetiña ja Judéabaña luágu ánjaña lan gíñe ja mámabaña juríu lun láni Búngiu ugánu luáguti Wasálbaragüle, Jesucristu. ² Dánti le lagíribudun Pédro Jerusaléoun, ába jachúrajani juríu ja afíñetiña, ³ jaríñaga.

—¿Cámesan bídin aríjaña ja mámabaña juríu, áni jou amürü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúruguñadina Jópe, ayúmuragua lun Búngiu, ligía naríjin ában cátei lasáliragun nun camá jamuga ában gamísá weíritu tarárirun siélugiñe, gürágu lueígiñe gádürü tarígei, tiábin chülü le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürürgua tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joúbei.” ⁸ Ába naríñagun. “Uá, Nabúreme, ladüga meígiñajágidina ni cáta le wanügübeí quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdün Búngiu, maríñagabá luágu luágu mabuídun lan.” ¹⁰ Ürüwañein weíyaasu lasúseredun cátei le, lárigiñe, ábaya tamúdeirun siélun. ¹¹ Lidan óra ligía, ligía jachüllerün ürüwa wügüriña tídoun múna to ñí nubei, oúnajouútiña Cesaréagiñe álugana. ¹² Ába laríñagun Sífiri Sándu nun lun nídin jáma láu afíñeni. Nüdüntiñá giñe sísi afíñetiña ja núma. Dan wachüllerün Cesaréa, ába webélurun sun wagía lúbiñoun ában wügüri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügüriña lun joúdin ubúruju Jópe oúgei Simón le giñe gíribei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun queí meja liábin wádoun furúmiñe. ¹⁶ Ábati narítagun luágu lé meja laríñagunbei Wabúreme. “Inárüni luágu badíseigüda lan Juan láu dúna, ángein Búngiu, labásteragüdübädün láu Sífiri Sándu.” ¹⁷ Ángeinti ru lubálin Búngiu líbe le líchubei woun, wagía le afíñeelebei luágu Jesucristu, joun, ¿cátanañadináti lun neréderubei lan le labúseerubei Búngiu ladüga?

¹⁸ Dánti le jagáambuni afíñetiña ja Jerusalénbaña cátei le, ába jámanichun. Ába jadímurejan luágu luweírigun Búngiu, ába jaríñagun.

—¡Rújali lubeí giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin ibágari magúmuchaditi!

Ligílisi to Antioquiana

¹⁹ Dan le láfarúnbei Estéban, ába gíñe jagúmeserun eíbaajaña ja jíbiri afíñetiña, ába janúrajan jíbiri chüli Fenícia, Chípre, luma Antioquia. Ñí jíchigei ugánu luáguti lasálbaruniña Jesucristu gürígia lídaangiñe jafígoun joúnrügü juríu, máma joun ámu gürígia. ²⁰ Ánjeinti afíñetiña ja Chíprena jáma Cirénena, ába jachülürün Antioquia, ába gíñe jadímurejan joun ja mámabaña juríu, ába jíchuguni ugánu luáguti Wabúreme Jesucristu joun lun jasálbarun. ²¹ Ñíñein lubáfu Búngiu jáma afíñetiña jagía, sarágu ja mámabaña juríu, ába jígiruni binádu jafíñen, ába jafíñerun luágú Jesucristu.

²² Dan lachülürünbei ugánu le lábun jagáambun afíñetiña ja Jerusalénbaña, ába joúnajani Bernabé Antioquíoun. ²³ Dan lachülürünbei Bernabé, ába laríjini luágú binílaña lan Búngiu gürígia ja mámabaña juríu, ába lagúndaarun sarágu. Ába labímejaniña súngubei lun jafálaruni Wabúreme Búngiu táo sun janígi. ²⁴ Bernabé, ában meja wügüri buíti, derégeguati lúngua lun Sífiri Sándu le gumúti, buin líña gíñe láu afíñeni luágú Jesucristu, ítara líña lagáñeirun sarágu gürígia lun Jesucristu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanügünü Antioquíoun. ²⁶ Ába jeréderun ñi jáma tílana ligílisi ában irúmu, aráfudaja joun sarágu gürígia. Ñí Antioquia lagúaráu joun afíñetiña “Cristiánugu” furúmiñe.

²⁷ Lídan dan ligía, ába joúdingua já buri profétagu Jerusaléngiñe lun Antioquíoun. ²⁸ Ában jádaangiñe, gíriti Ágabo, ába laráramun jádan afíñetiña, ába laríñagun láu le lasúbudirágüdübei Sífiri Sándu lun luágú liábiba lan ában oúnwenbun ilámaü lídan sun uboú, áni suséreti lídan lidáani larúejian Cláudio. ²⁹ Ábati joúndaragun afíñetiña ja Antioquiana lun joúnajan seínsu joun afíñetiña ja Judéabaña según le jayáraati íchiga. ³⁰ Ítara líña jadügünü, ába joúnajani seínsu ligía lúma Sáulo joun tábutigu jalígilisin afíñetiña Judéana.

12

Loúnwen Jacóbo lúma ladaürün Pédro

¹ Lídan dan ligía, ába lagúmeserun urúei Heródes eíbaajaña jádaangiñe afíñetiña. ² Ába láfaragüdüni Jacóbo le lamúlen Juan táo efeín, ³ queíti laríjin láu gúnda jamá juríu láu cátei le, ába gíñe lanügünü Pédro adáüra. Lídan buri wéyu le fédu le ídaanbei teigúa fein magánatu ísi lasúsereda cátei le. ⁴ Lárigiñe

lanüguni Heródes Pédro adaúra, ába ládaruni furísunrugun jáu dísi-sísi súdaaragu oúnigira gádürü gádürü, larítagun lún yebe laságaruni jagíbugiñe lílana fulásu lárigiñe fédu lun lagúserun.
 5 Níñein lubeíti Pédro furísunrugu toúnigiañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

6 Áriebu le lubáragiñe wéyu lé yebe lúnbei laságaruni Heródes Pédro jagíbugiñoun gürígia, larúmuguña Pédro jamídaangua bián súdaara, gürágu ligía láu bián güríngüri, jámaya bián súdaara luágu béna oúnigira. 7 Sódini, ligía lasáliragun ában láni Wabúreme ánjeli, ába larúgoungadún furísunrugu. Ába lagúuruni ánjeli ligía loúbawagu, ába lagáguduni, ába laríñagun lun.

—Sarába furése.

Ábatí láburujan güríngüri lueígiñe lújabu Pédro, 8 ába laríñagun ánjeli ligía lun.

—Murúbei bubélitin, daübounme bigeídin.

Lárigiñe ladüguni Pédro sun líra, ába laríñagun ánjeli ligía lun.

—Daüboun babíte, falábana.

9 Ába láfuridun Pédro lárigi ánjeli ligía, ibídiñoun lun áanjein inárüni lubeí lúmoun máma lan inárüni cátei le ladügübei ánjeli ligía. Genégetimáati lun camá gewénediñein. 10 Ába jásügürün jáu furúmiñetiña oúnigirutiña, sügú jamaña jabíaman, dánti le jachülürün luágun béna le gürábu le ümadagiñebi, ába lánjunrenchun lúngua. Ába jáfuridun, lárigiñe jánjiñuragún ában üma, ába lígiruni ánjeli ligía Pédro lábugua. 11 Ligáali lárügüdagun Pédro lúngua, ába laríñagun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma lueí sun lé yebe jabúseerubei juríu jadügün náu.

12 Asáminareína ligía Pédro luágu cátei le, ába lídin túbiñoun María to lúguchu Juan Márcos, le ñí jabei sarágu gürígia adámuriñu ayúmuragua lun Búngiu luágu. 13 Dan lacaüjan luágu lubéneri bürürü, ába táfuridun ában irájü músu, gíritu Róde, arija ca lan agúajabei. 14 Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírin tugúndan, ábarüga teíbaagun múnadoun awísaja luágu niján lan Pédro bénabu. 15 Ábatí jaríñagun tun.

—¡Lüüjaali báu!

Ába taríñagun joun luágu choúru tan luágu ligía lan. Ába jaríñagun.

—Máma ligía, fáguá láfurugu.

16 Niján mémeti Pédro acaünja luágu béna. Dan jánjunrenchuni, ába laweíridun janígi dan le jaríjini. 17 Ába

líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

—Abájüdagua jumeí cátei le lun Jacóbo lúma joun jíbiri afíñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladüga ibídiñeti joun ca lan susérebei lun Pédro. ¹⁹ Ába loúnajan Heródes áluajei, quei madári jamáni, ába lálügüdaguniña súdaara já buga oúnigirubalin, lárigiñe, ába láfaraguágüdüniña jilágubei. Lárigiñe, aba láfuridun Heródes Judéagiñe, ába lídin agánawa Cesaréa.

Loúnwen Heródes

²⁰ Weíriti ligáñi Heródes jáma gürígia ja aganoúbaña Tíro lúma Sidón, ánjein jagía, ába jebélurun lídoun ában arítaguni lun joúnajan wügüriña lun jadímurejan lúma luágu jafúleisein. Dan le jachülrün, ába jagáñeiruni Blásto, ában wügüri íñuguti láni Heródes, lun líderaguniña adílhei sun cátei, ladüga lageíragiñe Heródes jabíja eígini. ²¹ Ába lagúaragüdüni Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígíñe lubeí lagúmadija, ába ladímurejan joun. ²² Ábati jagúmeserun gürígia agúaraja.

—¡Máma wügüri adímurejabei, búngiu adímurejabei!

²³ Lidan óra ligía, ába lasándiragüdüni láni Búngiu ánjeli Heródes, ladüga lanáangun lúngua luágu jerérunt gürígia, míchu lumúti linébese Búngiu lun, ába jeígini jéweraü, ába loúnwen.

²⁴ Abúruchagueínatimá ligíati ugánu le láni Búngiu, apúrichijoúati lídan sun fulásu.

²⁵ Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barüína jameí Juan Márcos jámagua.

13

*Jagúmeseruni Bernabé lúma Sáulo jawádigimari apúrichijeí
Lerérunt Búngiu*

¹ Tídan ligílisi to Antioquíaboun, ñíñanu profétagu jáma maésturugu. Wügüriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agüriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumeí Bernabé lúma Sáulo nun lun wadágimanu le únbei nanúadiraña.

³ Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába joúnajaniña luágu jawádigimari.

Japúrichijan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába joúdin Seléucia, ñígiñe, jádina lun joúdin luágun uboúju le Chípre. ⁵ Dan jachülürün lídan ubúrugu le gíribei Salamína, líbiri méme Chípre, ába jagúmeserun apúrichijeí lerérun Búngiu tídan jalígilisin juríu. Ñüdünti gíñe Juan Márcos jáma, íderaguaaña. ⁶ Eibuga jamúti sun uboúju ligía chüliú lúmoun fulásu le gíribei Páfos. Ni jadárira ában juríu gíriti Barjesús, gariyajati wügüri ligía, ye ligía, lariñaga luágu proféta lan. ⁷ Gariyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladüga busén lan lagáambuni lerérun Búngiu. ⁸ Ánjein gariyajati ligía, le méme gíribei Elímas, sigéne lumútiña lueí yebe lafíñerun gumádimati luágu le jaríñagubei lun luágu Jesucristu. ⁹ Sáulotí, le méme gíribei Pablo, buin líña láu lubáfu Sífiri Sándu, ába laríaguni Elímas, ¹⁰ ába laríñagun lun.

—¡Yéetibu, buin bíña láu wuríbani, liraü Máfia amürü, lágani sun le buídubei! ¿Ca uágu meréde lubeí beyéejan luágu lémeri Búngiu le surúbei? ¹¹ Guetó láburuja ligáni Búngiu buágun, berédera maríjinga luágu átiri dan.

Lídan óra ligía, ába labúrigadún láu, ába láluajan cába lan árüjei lújabu, ladüga maríjinjali lan. ¹² Dan laríjini gumádimati cátei le, ába lafíñerun luágu Jesucristu, weíriti lanígi láu le jarúfudajabeí luágu Wabúreme Jesucristu.

Páblo lúma Bernabé ubúrugu Antioquía

¹³ Ába láfayarun Páblo jáma líbirigu Páfosiñe lun ubúrugun Pérga, le lídaanbei fulásu gíriti Panfilia. Ánjein Juan Márcos, ába lígiruniña, ába lagíribudun Jerusaléoun. ¹⁴ Lárigiñe, ába jásügürün Pérgigiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídon jalígilisin juríu, ába jañúurun ñi. ¹⁵ Lárigiñeti talijooúniwa líburu to lánina lilúrudun Moisés túma buri líburu to jabürüjaboun profétagu, ába joúnajan ábutigu aríñaga joun.

—Wadújeñu, ánjein níjein lubeí dimúrei lun jaríñaguni joun gürigia ja, aríñaga jumeí guetó.

¹⁶ Ábati lásaarun Páblo, ába ladügün seíni joun láu lújabu lun jámanichun, ába laríñagun.

—Agáamba jumá, wügüriña Israelítagu júma jugúya le ájuduragubei lun Wabúngiute. ¹⁷ Búngiu le Jabúngiute Israelítagu, anúadaja lumútiña meja binádu wagübürigu lun lánigubaña lan, ába ladügüniña ábanme oúnwenbun násifíun dán meja le añájagua lan agánawa quei terénda Ejípto, lárigiñe, ába laságaruniña lídaangiñe fulásu ligía láu lubáfu. ¹⁸ Awánda

lumúti Búngiu luríban jagáburi lídan fulásu mageírawati queí buri bián-wein irúmu. ¹⁹ Lárigiñe, ába lagúmuchaguagüduni sédü násiñun ja aganoútiña Canaán lun líchuguni jafúlasun joun binádu wagübürigu luára gádürü-san-dimí irúmu. ²⁰ Lárigiñe, ába líchugun gürígia lun jagúseragüduniña darí lúmoun lidáani proféta Samuél. ²¹ Ábatí jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein irúmu, Saúl ligía, liraü Cis, ladügawagun Benjamín. ²² Lárigiñe, ába lagídaruni Búngiu aruéijani lueí Saúl, ába líchuguni lun Davíd, le uágubei laríñaga. “Darína Davíd, liraü Isaí, ában wügüri le áubei nagúndaara, áni ladügübei sun le nabúseerubei.” ²³ Jádaangiñe ladügawagun Davíd ligía liábin Jesúsu le loúnajabei Búngiu lun jasálbarun Israelítagu, queí meja laríñaguni. ²⁴ Lubáragiñebei liábin Jesúsu uboúagun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame. ²⁵ Dan le layárafadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loubagiñe, madünatina ni íbini lun nafáragadunun ligeídin.”

²⁶ ‘Nidújeñu, jugúa le jarajüñübei ladügawagun Abrahám, júma jugúa le mámabei ladügawagun Abrahám, inébejabutün lun Búngiu, wagía gürígia ja únbaña loúnajoúa ugánu le luáguti Wasálbaragüle. ²⁷ Já meja gürígia ja aganoúbaña Jerusalén jáu sun jábutigu, ibídiñetí yébe joun ca lan Jesúsubei, úa ligía gunfaráanda jamáni jerérunt profétagu, láu sun aliijoúa lan jerérunt tídan jalígilisin ságü luwéyuri eméraaguni, jagía guánarügüti gúnculi jamúti le bürüwañubei láu jasíadiruni Jesúsu lun loúnwen. ²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun láfaragüduni jilágubei. ²⁹ Dánti le adüga jamáali sun le taríñagubei Lerérun Búngiu luágu, ába jarárigüduni lueígiñe gurúwa, ába jichuguni lídoun lumúaja. ³⁰ Ába lásaaragüduni Búngiu lídaangiñe oúweni lúnya labágaridun. ³¹ Arúfudaguati Jesúsu lúngua wínwañu luágu sarágu weíyaasu joun ja ñübinbaña lúma luágu luweíyasun Galiléagiñe lun Jerusaléoun, jagíati geféenbaña luágu joun gürígia guetó.

³² ‘Wíchiguñein lubeíti ugánu le jun, luágu darádu lé meja ladügübei Búngiu jáma binádu wagübürigu ³³ gúnculi láali woun, wagía le jadügawagun, láu lásaaragüduni Jesúsu, queí laríñaguni tídan lilíburun, lídan libíaman Sálmo. “Niraü amürü, rúnaali ubáraü le bun ugúñe.” ³⁴ Aríñaga láali meja Búngiu luágu lásaaragüduni Jesúsu lídaangiñe oúweni lun mañáladun lan lúgubu, dan laríñagun tídan líburu to Lerérun. “Níchugubei abíniruni le uágubei naríñaga lun Davíd bun, gayáraati

beménigidun luágu.”³⁵ Lariñaga gíñe Davíd lídan ábanya Sálmo. “Mígirunbadibu lun lañáladun lúgubu Biraü le jínsiñebi bun.”³⁶ Davíd, seríwiti méja joun ja lánina lidáani quei laríñaguni Búngiu lun, lárigiñe, ába loúnwen, ába labunún le ñí lubei jabunúa lagübürigu, ába lañáladun lúgubu.³⁷ Ánjeinti Jesúsu, sarágüda lumúti Búngiu lídaangiñe oúweni, mañáladunti lúgubu.³⁸ Nidújeñiu, lúnti lubeíti jasúbudiruni luágu lídaangiñe lan Jesúsu ferúdunawa lan wafígoun. Ligía ugánu wanügübei jun.³⁹ Lídaangiñeti gíñe, chibáwaali lubeí sun wafígoun, sun wagía le afíñebi luágu, gidáwa ligía wadúnrun ligíbugiñe Búngiu, cátei lé meja siñá lubei lilúrudun Moisés adüga.⁴⁰ Toúnigi jumá lubeíti lueí láburujan ligáni Búngiu juágun queísi jaríñaguni profétagu dan le jaríñagunbei.

⁴¹ Jugúya le éjerajabei náu, weírilá janígi, áni gumúgua jumá, ladüga áu le Búngiubei, nadüguba cátei weínamuburiti, daríme lun mafíñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímuřejan joun luágu buri cátei le lewéñegua dimáasu.⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu jafíñen lun jafálaruni jafíñen juríu, ába jafálaruni Páblo lúma Bernabé. Ába jadímuřejan Páblo lúma Bernabé jáma, ába jaríñagun joun lun jasígrun eménigira luágu lareíden Búngiu.

⁴⁴ Lewéñegua dimáasu, le luwéyuri eméraaguni, ába joúndaragun jíbe-ágei lílana fulásu lun jagáambuni lerérun Búngiu.⁴⁵ Láu jaríjin juríu sarágu gürígia agáambajei lerérun Búngiu, ába jeméendüjan, ába jagúmeserun asígenerei Páblo, anába jameí líri Jesúsu.⁴⁶ Ábatí jadímuřejan Páblo lúma Bernabé manúfudeiga, ába jaríñagun.

—Lúnti yebe wíchuguni ugánu lúmagíñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madüna jumáni ibágari le magúmuchaditi, ítara líña weíbugubeíti apúrichija joun ja mámabaña juríu.⁴⁷ Ladüga ítara líña laríñaguni Wabúreme woun.

Níchuguñadibu lun bíchuguni larúgounga joun ja mámabaña juríu,
lun gayáraabeí lan jasálbarun ja aganoúbaña lídan lagúmujoún fulásu uboúagu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafíñerun sun ja lúnbaña jafíñerun luágu Jesucristu, ja lúntiñabaña ibágari le magúmuchaditi.⁴⁹ Ítara líña lapúrichijoún lerérun Búngiu lídan sun fulásu ligía.⁵⁰ Ába

jadímu'rejan juríu jáma würíña gúnfulitiña, inébewa jagía, lúma jáma wügüriña weírigutiña ñi ubúrugu, ába jínchajániña lun jeíbaajaniña Páblo lúma Bernabé darí lun jabúguniña lídaangiñe fulásu ligía. ⁵¹ Ábati jáfuruduní calíqui lueígiñe jagúdi, arúfudei luágu mabuídun lan joúserun lílana fulásu ligía, ába joúdin ubúrugun Icónio. ⁵² Gúndaañu jáña afíñetiña Antioquía luágu jabágari lúma Crístu, weíriti jedéregeragun joúngua lun Sífiri Sándu.

14

Páblo lúma Bernabé ubúrugu Icónio

¹ Ába jebélurun Páblo lúma Bernabé tídoun jalígilisin juríu ubúrugu Icónio, ába japúrichijan, buíti jadímu'rejan darí lun jafíñerun sarágu, dándu juríu quei máma juríu, luágu Jesucristu. ² Juríu ja mafíñebaña luágu Jesucristu, ába jínchajániña ja mámabaña juríu, amísiñedagüdaña afíñetiña joun. ³ Ligía jeréderunbei Páblo lúma Bernabé sarágu dan ñi, ába jadímu'rejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru. ⁴ Fánreinguañu jáña lílana ubúrugu ligía, jíbiri jámagiñeñanu juríu, jíbiri jámagiñe apóstolugu. ⁵ Játi juríu jáma ja mámabaña juríu, ába jebélurun lídoun ában arítaguni jáma gumádimatiña lun jeíbaajaniña apóstolugu lúma lun jachámuragun dübü jawágun. ⁶ Ánjein Páblo lúma Bernabé, ába jasándiruni, ába joúdin lídoun buri fulásu le gíribei Lístra lúma Dérbe, biáma fulásu le láni méme fulásu le Licaónia, lúma geyégua láu, ⁷ apúrichija jamúti gíñe ugánu luáguti Wasálbaragüle Jesucristu ñi.

Jachámuragun dübü luágu Páblo lídan fulásu le Lístra

⁸ Ñíñein ában wügüri meíbugunti, Lístra, ñun líña ladüga ítaragubeíñein lan lúmagiñe lagüria'joún, meíbugungubeíti. ⁹ Lagáambajañein wügüri ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügüri ligía luágu gayára lan lareídagu. ¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügüri ligía arárama, ába lagúmeserun eíbuga. ¹¹ Dan jaríjini gürigia cátei le ladügübei Páblo, ába jagúmeserun agúaraja lídan jerérun Licaóniana, jaríñaga.

—¡Raríjaña búngiugu quei jagáburi wügüriña wámoun!

¹² Jaríñaga luágu Bernabé búngiu Júpiter, luágu Páblo búngiu Mercúrio, ladüga ligía lan adímurejabei. Nújein lúban jabúngiute Júpiter boúgudiñoun lueí ubúrugu, ¹³ ába liábin lufádirin Júpiter

nígiñe barüína wügüriña bágasu lúma buri fulúri luágun lubéneri ubúru, busénti yebéti ligía jáma buri gürigia lun jáfaruniña bágasu jagía lun jadágaragüdün joun Pábilo lúma Bernabé. ¹⁴ Dan jasúbudiruni Pábilo lúma Bernabé cátei lan jabúseerunbei gürigia ja jadügün, ába jajeíridagunun janáangun le luweírin lubéresen cátei le joun, ába jádaragun joúngua jádoun gürigia agúarajeina.

¹⁵ —¡Wügüriña! ¿cámesan jabúseera jadüguni cátei le? Wügüriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wínwanbei, le adügübalin siélu lúma uboú, barána lúma sun cátei le lídaanbei. ¹⁶ Lídan meja dan le sügüjalibe, ígira lumútiña meja Búngiu gürigia lun jadüguni le jabúseerubei, ¹⁷ láu sun, arúfuda láani joun gürigia cáteiñein lan láuja buídu le ladügübei joun. Rúti júya woun lúma alúbajani buítí, ru ligía eígní buídurügütí woun, belúgüda lumúti ugúndani tídoun wanígi.

¹⁸ Láu sun aríñaga jamáni Pábilo lúma Bernabé sun cátei le joun, jénreengu mémegili jeréderuniña gürigia lueí jáfaruniña bágasu jagía lun jadágaragüdün joun.

¹⁹ Ábatí jachülürün juríu Antioquíagiñe lúma Icóniogiñe, ába jagáñeiruni jarítagun gürigia lun jachámuragun dübü luágun Pábilo. Lárigiñe, ába jadúruguduní bougudín lueí fulásu, sun jaríñagun luágu jiláali lan. ²⁰ Dan le jagúriridágún afíñetiña láu Pábilo, ába lásaarun, ábaya lebélurun fulásurugún. Larúgan, ligía lídin lúma Bernabé ubúrugen Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñí jabeí sarágu gürigia afíñerutiña luágu Jesucristu, ába jagíribudun, ába joúdin Lístra, Icónio lúma Antioquia. ²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasigirun derégüdagú lídan jafíñen, aríñageina jagía joun luágu lúntí lan wasúfurirun sarágu lun gayára lan webélurun lídoun larúejan Búngiu. ²³ Rútiña gíñe ábutigu lídan cáda jadámurin afíñetiña. Lásunti jayúmuragun lúma jayúnarun, ába jedéregeruniña lábun laríaajan Búngiu le uágubei jafíñera.

Lagíribudun Pábilo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachülürün Panfília. ²⁵ Ába japúrichijaní ugánu luáguti Jesucristu ubúru Pérge, líbiri méme Panfília, ábatí joúdin Atálioun. ²⁶ Ñígiñe jádina, ában joúdin Antioquíoun, le fulásu le ñíjin lubeí joúnajoúa lábugiñe laríaajan Búngiu adügei wadágimanu le jagúmuchubei guetó. ²⁷ Dan jachülürün Antioquia, ába joúndaraguniña tánigu jalígilisin afíñetiña, ába jabájüdaguní sun cátei le ladügübei Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafíñerun luágu

Jesucristo lun jasábarun. ²⁸ Ába jeréderun Pablo lúma Bernabé sarágu dan jáma afíñetiña ñi.

15

Adámuridagúni Jerusalén

¹ Ligía jayábin wügüriña Judéagiñe lun Antioquíoun, ába jagúmeserun aráfudaja joun afíñetiña luágu lun lan jasálbarún, mósu lan jerésibiruni wügüriña circuncisión, quei laríñaguni lilúrudun Moisés. ² Barüti Pablo lúma Bernabé ában sigénei weíriti jáma luágu cátei ligía, lagúmujoún óra, ába loúnajoún Pablo, Bernabé, jámaya ámu wügüriña Jerusaléoun lun joúdin aráanserei cátei le jáma apóstolugu jáma tábutigu ligílisi to ñíboun.

³ Ja tánigu ligílisi to Antioquíaboun oúnajabaliña, lídaanti javeíyasun, ába jásügürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafíñen lun jafálaruni Crístu. Ába jagúndaaragun sun afíñetiña láu ugánu le.

⁴ Dan jachülürünbei Pablo lúma Bernabé Jerusalén, ába jerésibiruniña tilana ligílisi, jáma apóstolugu, jáma tábutigu ligílisi, ába jabájüdagun Pablo lúma Bernabé joun luágu sun le adüga láalibei Búngiu jádaangiñe. ⁵ Ñíñanu jádaangiñe jadámurin fariséogu ja afíñetiña luágu Crístu, ába jaráramun, ába jaríñagun.

—Lúnti jerésibiruni wügüriña afíñetiña ja mámabaña juríu circuncisión, lúnti gíñe jagúfulirun lúma lilúrudun Moisés.

⁶ Ábatí joúndaragun apóstolugu jáma tábutigu ligílisi lun jatúriajaní cátei le. ⁷ Lárigiñe sarágu dimúrei, ába láasaarun Pédro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun gíñe gayáraabei lan jafíñerun luágu Jesucristu. ⁸ Búngiuti, le subúdijabúbei tun anígi, aráfuda lumúti luágu resíbi lániña ja mámabaña juríu láu líchuguni Sífiri Sándu joun quei líchuguni woun. ⁹ Manügün lumútiwa Búngiu ámu javeí, jarúmagüda lumútu gíñe janígi láu jafíñen luágu Jesucristu. ¹⁰ ¿Cáti uágu laloúguada jafíñen guetó luágu le adüga láalibei Búngiu, ru jugúya ában ijürügu jawágun afíñetiña ja, le wásiñerubei wagía guánarügü anúga—ni wagía ni binádu wagübürigu? ¹¹ Afíñetiwa luágu sálbaadiwa lan láurügü wafíñerun luágu Jesucristu, madügünga wagía ni ámu cátei lun wabíjini, sálbaadiwa láu lareíni Wabúreme Jesucristu. Ítara méme líña gíñe jasábarun ja mámabaña juríu.

¹² Ábatí jámanichúnga, ába jagáambuni sun le jaríñagubei Bernabé lúma Pablo joun luágu buri seíni lúma miláguru le ladügübei

Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába laríñagun Jacóbo.

—Nidújeňu, agáamba jumána. ¹⁴ Abájüdaguaali Simón Pédro woun ída líña lan fuleísei lániña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabürüjabeí profétagu tídan Lerérun Búngiu.

¹⁶ Gumúguuali jarúeijan ladügawagun Davíd, queísigubeirügü tagúmuchaqun ában múná eíguadutu.

Lachülürüba wéyu nun, áu le Búngiu, lúnyame naríjin jawágun ladügawagun Davíd,

ábame níchuguni ubáfu lun ában jádaangiñe lun larúeijan jádan.

¹⁷ Nadügübei líra lun gayáraabeí lan jayábin sun jíbiri gürígia lun jáluajanina queísi Jabúreme,

lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ Ligía naríñagunbei luágu moun láni wíchugun sarágu lúrudu jawágun ja mámabaña juríu, ja ígirubalín binádu jafíñen lun jafálaruni Búngiu, ²⁰ buídürügüti láu labürüjoún joun lun jebé lan jeígin eígin le adágarawagüdüti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigíwarügütiña lugúndun máfuridunti játa jádaangiñe, meígin jagíame játa anímaalu. ²¹ Buíti lun jagúnfulirun lúma buri cátei le lun jíchugun inébesei joun juríu, ladüga lúmagiñe bugája binádu dan, añájein gürígia apúrichijati lilitúrudun Moisés lídan ságü fulásu, aliijoúati lúrudu luágu tídan buri jalígilisin juríu ságü luwéyuri eméraaguni.

²² Ábati jarítagun apóstolugu jáma tábutigu ligílisi jáma sun tílana ligílisi janúadajan wügüriña jádaangiñe, lun joúnajaniña Antioquía úara lúma Páblo lúma Bernabé. Ába janúadiruni Júdas, le gíribei Barsabási, lúma Sílas, bián wügüriña weírigutiña jádan afíñetiña. ²³ Ába joúnajan ában gárada jáma, láriñajare tídan gárada tugúa.

“Wagía le apóstolugu, tábutigu ligílisi, jáma sun jíbiri afíñetiña, mábuga wáña joun wadújeňu lueígiñe Jesucristu ja mámabaña juríu ja aganoúbaña Antioquía, Síria, lúma Cilicia. ²⁴ Agáambaadiwa luágu añájein lan gürígia ñüdüntiña yágiñe ibídiňoun woun ebéreseja jun láu jadímurejan, áni dájaña ámu arítaguni jídoun láu jaríñagun jun luágu mósu lan jerésibiruni wügüriña circuncisión, queísi laríñagun lilitúrudun Moisés. ²⁵ Ligía wúwaradúnbei lídan warítagun lun wanúadajan gürígia wádaangiñe lun joúdin aríjaün úara

jáma wadújeñu Bernabé lúma Páblo ja jínsiñebaña woun sarágu,²⁶ ja rújamaalíbei jabágari lídoun pelíguru lueígiñe Wabúreme Jesucristu.²⁷ Woúnajañanu lubeíti Júdas lúma Sílas jun, jadímurejaba júma lun jafúnraanguagüduni sun cátei le tídaanbei gárada to woúnajaboun jun, jun.²⁸ Maríbaanti larijín lun Sífiri Sándu lúma woun, míchugúniwa lan ámu ijürügu jun lueídügüya murúsun cátei le, le lunbei jadügüni.²⁹ lun meígin jumá úwi le jáni anímaalu ja adágarawagüdütiña joun sándu, meígin jugúyame jítaü, ni úwi le jáni anímaalu ja tigíwarügütiña, madáagun jugúyame cátei buri jama gürígia ja mamárieidúntiña júma. Ánjaün areídagua júngua lueí buri cátei le, buídubei jadüga. Buídu lámuga lídin jun.”

³⁰ Lárigiñeti joúnajoún luágu jaweíyasun, ába joúdin Antioquía. Dan le jachülürünbei ñi, ába joúndaraguniña afíñetiña, ába jíchugunun gárada joun.³¹ Dánti le jalíijanbarun afíñetiña, ába jagúndaarun sarágu luágu gurásu le tíchugubei joun.³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afíñetiña láu jadímurejan joun, ru jagía idérebugu lun jafíñen.³³ Lárigiñe jásügürün átiri dan ñi, ába jayoúragun afíñetiña joun lubá jagíribudun jámoun já meja oúnajabaliña Jerusalén.³⁴ Ánjeinti Sílas, ába leréderun.³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichijkei ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába laríñagun Páblo lun Bernabé.

—Queímounya aríjaña afíñetiña lídan sun ubúrugu buri le ñi lubei apúrichija wamáali lan ugánu luágu Crístu, aríja wamámuga ída jáñia lan.

³⁷ Busénti yebe Bernabé janügüni Juan Márcos jámagua,³⁸ májati Páblo janügüni ladüga meja ígira lúaña lan Panffilia, masígiti jáma lídan wadágimanu.³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanügüni Bernabé Márcos, ába joúdin Chípore,⁴⁰ ába lanügüni Páblo Sílas. Lárigiñe jedéregeruni afíñetiña Páblo lúma Sílas lújaburugun Búngiu, ába joúdin,⁴¹ ába jásügürün Síriagiñe lúma Cilíciagiñe, íchaajeina gurásu joun afíñetiña ligílisirugu.

16

Lídin Timoteo úara jáma Páblo lúma Sílas

¹ Ába jachülürün Páblo lúma Sílas lídoun buri fulásu le Dérbe lúma Lístra, le ñi lubei jadárira ában afíñeti gíriti Timotéo, tiraü ában würi juríu afíñetu luágu Jesucristu, güriégu lúguchi.

² Afíñetiña ja aganoúbaña Lístra lúma Icónio, buíti jadímurejan luágu. ³ Busénti Pábilo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladüga güriégu lan lúguchi. ⁴ Súnti fulásu le ñígiñe lumúti jásügüra, jasúbudirágüduni cátei le jaríñagubei apóstolugu jáma tábutigu ligílisi ja Jerusalénbaña joun afíñetiña, ába jéredun jawágu lun jagúfulirun lúma jagúmadin. ⁵ Ába lubeíti jedéraagüdün tílana ligílisi lídan jafíñen, ába jagánwoundun afíñetiña ságü wéyu.

Lasáliragun ában wügüri Macedóniana lun Pábilo

⁶ Májati Sífiri Sándu lun jíchugubei lan ugánu luágu Crístu Ásia. Ábatí jásügürün labádinaguagiñe Fríjia luma Galácia, ⁷ ába jachülürün luágu fadáguü le Mísia. Ñígiñe yebe jarítagua lun jebélurun loúbawagun Bitínia, májati láni Jesúsu Espíritu le méme Sífiri Sándu lun jadügünü. ⁸ Ábatí joúdin surúrugu Mísioun, ába jarárirun Tróas. ⁹ Ni lasáliragua ában wügüri Macedóniana lun Pábilo, áriebu, rára ayúmuragua lun, laríñaga lun. “Queímoun Macedónia íderagua bámugawa.” ¹⁰ Lárigiñe lasáliragun wügüri ligía lun Pábilo, ába waráansejan lun woúdin Macedónia láu wafíñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Pábilo lúma Sílas ubúrugu Filípos

¹¹ Ábatí wáfayarun Tróasgiñe, ába woúdin sügülügü luágun uboúju le Samotrácia, larúgan, ligía wachüllürün Neápolis. ¹² Ñígiñe ába woúdin Filípos, Filípos lábugiñeñein lagúmadijan Róma, ligía gíñe ubúrugu le weírigutimáabei luágu loúba Macedónia. Reídeitiwa átiri wéyu ni. ¹³ Luágu ában wéyu le luwéyuri eméraaguni, ába wáfuridun boúgudin lueí ubúrugu, lárunk dúna, lídan ában fulásu le ni lubeíja layúmurawagúa lun Búngiu. Ába wañúurun ni, ába wíchuguni ugánu luáguti Crístu joun würíña ja oúndaragubáña ni. ¹⁴ Níñoun ában jádaangiñe, gíritu Lídia, ubúruguna Tiatíra, tifísiute alúguraja gamísa fínutu to gúchu tágú. Judúguatu würi tugúya lun Búngiu, tagáambajañádiwa, ába lánjunrenchunun Búngiu tanígi lun tadügün gásu láu le laríñagubei Pábilo. ¹⁵ Ába tabásterun jáu sun tílana túban, lárigiñe, ába tayúmuragun woun ítara.

—Ánjein afíñe jubeí luágu afíñe nan le tímatimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

¹⁶ Luágu ában dan, dan le woúdiña lan lídoun fulásu le ni lubeíñaja layúmurawagúa lun Búngiu, ába wadúnragun túma ában irájü gawágutu ában espíritu wuríbati le íchugubei ubáfu

tun lun tasábiujan. Ában idámuni irajü tugúya, ibíjatutíja sarágu seínsu joun tabúriña láu tasábiujan.¹⁷ Ába tagúmeserun irajü to afálarawa, wagía lúma Pábilo, agúarajeina tugúya ítara.

—Gürígia ja, jesériwiduña lun Búngiu le iñubei, jadímurejaña luágú üma lánina asálbaruni lídaangiñe figoú jun.

¹⁸ Gíbeti wéyu táu adügei cátei le darí lun tebérasedun lun Pábilo, ába lagáragun, ába laríñagun lun espíritu le tídaanbei.

—Lídan líri Jesucristu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágú siñáali lan jagáñeirun seínsu tueígiñe, ába járugüduni Pábilo lúma Sílas, ába janügüniña jagíbugiñoún ábutigu lamídaangua ubúrugu.²⁰ Ába jarúfuduniña jagíbugiñe gumádimatiña, ába jaríñagun.

—Wügüriña juríu ja, jachágaraguñein wabúrugute,²¹ jarúfudajaña igáburi le wásiferubei erésibira ni adüga ladüga Rómana wagía.

²² Ábatí jiñúragun gürígia joúngua jawágu, ába jarágachaguágüduniña gumádimatiña, ába jíchugun dimúrei lun jabeichúniwa láu wéwe.²³ Lárigiñe sarágu abeichúni, ába jádaruniña furísunrugún, ába jaríñagun lun oúnigiruti adaürütiña lun goúnigi lánina buídu.²⁴ Dan libíjini oúnigiruti lúrudu le, ába ládaruniña lídoun lagúmujoún tarígeirugu furísun, ába legélenchuni jagúdi.

²⁵ Queí buri luágun amídi áriebu, níñanu Pábilo lúma Sílas ayúmuragua lúma erémuja urému lun Búngiu, ja jíbiri, agáambaja.²⁶ Sódini, ába liábin ában oúnwenbun járabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güríngüri le jawágubei adaürütiña.²⁷ Ába lagágudun oúnigiruti, dan laríjin luágú júnren líña lan sun tubéneri furísun, ába laságarunun lefeínte lún yebe láfaragun lúngua, sún yebe laríñagun luágú nüdüngua jamá adaürütiña.²⁸ Ába lagúaragun Pábilo lun.

—Máfaraguabá búngua, awánja ya sun wagía.

²⁹ Ábatí lamúriaian oúnigiruti lámpu, ába lebélurun eíbaagueina, adádagareina láu anúfudei, ába lágoragun lúngua lubádu jagúdi Pábilo lúma Sílas.³⁰ Ába laságaruniña furísunrugugiñe, ába laríñagun joun.

—Wügüriña, ¿ca cátei lúnbei nadügüni lun nasálbarun?

³¹ Ába jaríñagun lun.

—Afíñebá luágú Wabúreme Jesucristu, ábame basálbarun jáu sun tilana búban.

³² Ába jíchuguni ugánu luáguti Crístu lun jáu sun ja lúbiñebaña.

³³ Lídan méme óra ligía, láu sun áriebujali lan buídu, ába

lachíbuni bíti buri le jawágubei, ábatí labásterun jáu sun lufámilian. ³⁴ Lárigiñe, ába lanügüniña lúbiñoun, ába líchugun eígini joun, ¡máti lugúndan jáu sun lufámilian láu jaffíñerun luágu Búngiu!

³⁵ Larúgan bináafin, ába joúnajan gumádimatiña polisia aríñaga lun oúnigiruti lun lígiragüdüniña Pábilo lúma Sílas.

³⁶ Ábatí laríñagun oúnigiruti lun Pábilo.

—Oúnajaaña gumádimatiña aríñaga nun lun nígiragüdünün, gayáraajali lubeíti jídin darángilañu.

³⁷ Ába laríñagun Pábilo joun polisia.

—Láu sun Rómana wamá, beíjamutiwa jagíbugiñe gürígia, míchigunga dan woun lun wadímurejan waweígiñegua, dágua jamáwa furísunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Nübin jamá aságarawa.

³⁸ Ába jabájüdaguni polisia cátei le joun gumádimatiña, ába janúfudedagún gumádimatiña dan le jasúbudiruni luágu Rómana jamá Pábilo lúma Sílas. ³⁹ Ábatí joúdin amúria ja ferúdun jáma, ába jaságaruniña, ába jayúmuragun joun lun jáfuridun nígiñe ubúrugugiñe. ⁴⁰ Dan le jáfuridunbei furísunrugugiñe, ába joúdin túbiñe Lídia, lárigiñe jaríjiniña afíñetiña lúma jíchugun idérebugu joun, ába jasígiruni jaweíyasun.

17

Chagáguau ubúrugu Tesalónica

¹ Lídan jaweíyasun Pábilo lúma Sílas, sügütiña Anfípolisgiñe lúma Apolóniagiñe, nígiñe, ába jachüllerün ubúrugun Tesalónica le ní tubei ában jalígilisin juríu. ² Quei léchun Pábilo, nídünti tídan ligílisi tugúya, adímurejati jáma ürüwa dimáasu, ságü luwéyuri eméraaguni. ³ Arúfudajati joun quei taríñaguni Lerérung Búngiu luágu lúnti lán meja lasúfurirun Crístu, lárigiñeme lan loúnwen, aba lánme lásaarun lídaangiñe oúweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lunbei liábin asálbaraña gürígia.

⁴ Ábatí jaffíñerun jádaangiñe juríu, ába júaradun lúma Pábilo lúma Sílas. Afíñetiña gíñe sarágu ja mámabaña juríu ja judúguatiña lun Búngiu, jáma sarágu würíña weírigutiña. ⁵ Juríu ja mafíñebaña luágu Jesúsu lan Crístubei le lunbei liábin, magúndaantiña láu cátei le, ába joúndaragun wügüriña wuríbatiña ja eíbugañajadügubaña ümada, ába jachágaraguágüdüniña gürígia ní ubúrugu. Ába jaságarajanun lúban Jasón, áluyaña Pábilo lúma Sílas lun jaságaruniña lun jedéregeruniña jájaburugún gürígia. ⁶ Queíti madári jamániña ní,

ába janügüni Jasón jáma átiri jádaangiñe afíñetiña jagíbugiñoún gumádimatiña lídan ubúrugu ligía, ába jagúaragun aríñaga.

—Wügüriña ja, ja ebéresejabaña lídan sun fulásu, chülüjaña gíñe ñajoun, ⁷ resíbi láaña Jáson lúbiñe. Sun jagía dürügu jamúti lilúrudun Urúei César, ladüga aríñagatiña luágu níjein lan ámu urúei, ában nege gíriti Jesúsu.

⁸ Dan jagáambuni gumádimatiña jáma sun jíbiri gürígia cátei le, ába jachágaragun. ⁹ Jáson jáma ja jíbiri, ába jafáyejan, ába jígirawagüdüniwa.

Páblo lúma Sílas ubúrugu Beréa

¹⁰ Furése furése, dan le labúrigadun, ába joúnajaniña afíñetiña Páblo lúma Sílas ubúrugun Beréa. Quei jachülürün ñi, ába joúdin tídon jalígilisin juríu. ¹¹ Juríu ja ñíbaña, buítimaati jagáburi jaweí ja Tesalónicaabaña, resíbi jamúti ugánu luáguti Crístu láu ugúndani, ságüti wéyu jalíjanun Lerérung Búngiu lun jaríjini ánjein inárüni lubeí le aríñawagúbei joun. ¹² Sarágu jána lubeíti afíñerutiña jádaangiñe, afíñe jagía gíñe sarágu ja mámabaña juríu, dándu würíña weírigutiña quei wügüriña. ¹³ Dan le jasúbudirunbalin juríu ja Tesalónicaabaña luágu lapúrichijaañein lan gíñe Páblo Lerérung Búngiu Beréa, ába joudin achágaraguágüdaña gürígia ñi. ¹⁴ Ába joúnajani afíñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja ñüdünbaña láu Páblo, ába jáfayajan lúma chülu ubúrugu Aténas. Lárigiñe, ába jagíribudun barüína jagía dimúrei lun Sílas lúma Timotéo lun joúdin lárigi Páblo lídan lufúresen.

Páblo ubúrugu Aténas

¹⁶ Sun niján lan Páblo Aténas agúrabajei Sílas lúma Timotéo, medéraaguágüdünti larítagun láu laríjini ubúrugu ligía buin jáu bürübün sándu. ¹⁷ Ligíaja ladímurejaanbei tídan jalígilisin juríu lúma jáma ja mámabaña juríu ja ájuduragubaña lun Búngiu, adímurejaligía buri ságü wéyu jáma gürígia ja ümadarugubaña, ñí lubei jadámuridagua. ¹⁸ Ñíñanu jádaangiñe wügüriña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jariñaga jíbiri.

—¿Cáfunasan laríñagubei wügüri le woun, líbebei ladímurejan?

Jariñaga jíbiri.

—Camátia ladímurejaña jawágu ámu búngiugu.

Jariñagunbeiti ítara ladüga lapúrichijan Páblo joun luágu Jesúsu lúma luágu ásaaruni lídaangiñe oúweni. ¹⁹ Ábati janügüni lídoun ában fulásu gíriti Areópago, le ñi lubeíja joúndaragua lun jagáambagun joúngua, ába jaríñagun lun.

—¿Gayáraati wasúbudiruni cátei lan iséri cátei le barúfudajabe? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ñi, marítaguntiña luágú ámu cátei lueídüguya luágú jaríñagun lúma jagáambun cátei iséri.

²² Ábati laráramun Pábilo jamídaangua ñi Areópago, ába laríñagun.

—Wügúriña Aténasna, aríja numúti luágú afíñe jumá jawágu jisándun, ²³ ladüga dan le aríaajeina nubálín fulásu buri le ñí lubei jájuduragua joun jisándun, darítina ában latárü le ñí lubei bürüwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

²⁴ ‘Ligía Búngiu le adügúbalin uboú lúma sun cátei le uboúagubei, ligía labúremebi siélu luma uboú. Maganoúnti tídan ligílisi to jadüga gürígia, ²⁵ memégeirun lumúti gíñe le gayáraabei jadügünü gürígia luágú lufúleisein, ligía guánarügü íchugubei ibágari lúma garábali, lúma sun cátei woun, sun wagía.

²⁶ ‘Lídaangiñe ábanrügü wügúri ladügaña sun néchaanigu lun jaganoún lídan sun fulásu, aráanseleí dan le lúnbei jabágariduni lúma fulásu le lúnbei ñiba lan jagánawa. ²⁷ Adüga lumúti Búngiu sun líra lun gayáraabei lan jáluajani gürígia, gayára lámuga jadáriruni láu jáluajani, láu sun inárüni lan luágú madíse lan Búngiu lueí cáda ában wádaangiñe. ²⁸ Ladüga lídaangiñeti Búngiu awánjein lubeí, gabágari wagía, eíbuga wagía ligíbuagu uboú le, quei jaríñaguni poétagu jídaangiñe. “Lirájüñü Búngiu wagía.” ²⁹ Queíti lirájüñü wabeí Búngiu, moún lumuti wanügünü Búngiu quei ában sándu le gólu, o pláta o dübü le jadüga wügúriña quei jarítagun luágú ítara líña lan Búngiu. ³⁰ Meberesegúnti méja Búngiu láu cátei le jadügübei gürígia lábugiñe libidiñe joun, ánjein guetó, aríñagati joun sun gürígia lídan sun fulásu lun jasáansiruni joúserun. ³¹ Ladüga anúadajaali Búngiu ában wéyu lun ligíaba lan wéyu lagúseragüdüniña gürígia ja uboúagubaña láu ísuruni láu ában wügúri le anúadaja láalibei, wügúri ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe oúweni lúnya labágaridun.

³² Dan le jagáambubei luágú ásaaruni lídaangiñe oúweni, níñanu jádaangiñe, ába jéjerajan láu, jíbiri ába jaríñagun.

—Lídaanbagúbei ámu dan wagáambei badímurejan luágú buri cátei le.

³³ Ábati lígiruniña Pábilo. ³⁴ Ába jafíñerun jádaangiñe luágú Jesucristu, ába jafálaruni. Níñein Dionísio jádan, lé meja ában jádaangiñe ábutigu lídan fulásu le gíríbei Areópago, túma gíñe ában würi gíritu Dámaris, jámaya ámu gürígia.

¹ Lárigiñe cátei le, ába láfuridun Páblo Aténasgiñe, ába lídin ubúrugu Corínto. ² Ni ladárira ában juríu gíritu Aquíla, túma lúmari to gíriboun Priscila, Póntona jagía. Málügili lueígiñe jayábin Itáliagiñe, jayábinbei niígiñe ladüga líchugun urúei Cláudio dimúrei lun jáfuridun sun juríu Rómadiñe. Ába lídin Páblo aríjaña, ³ queíti ában lan lifisiute jáma –tadáawagun quiámpu–ába leréderun jáma lun jawádigimardun lídan ában. ⁴ Ságüti wéyu le lidáani eméraaguni, lídin Páblo tídan jalígilisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucristu.

⁵ Dan jachülrürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérunt Búngiu. Ariñagati joun juríu furáangu luágu Jesúsu lan Crístubei le jagúrabajabeí lun lasálbaruniña lídaangiñe jafígoun. ⁶ Ánjaña juríu, ába jasígeneruni le lubeíbei, anábagua buri jameí. Ábatí láfurudunun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tidaangiñe jalígilisin juríu, ába lídin lúbiñoun ában wügüri gíriti Jústo, wügüri ligía, judúguati lun Búngiu, ni toúbagiñe ligílisi lagánawa. ⁸ Críspo, le tábuti jalígilisin juríu, ába laffíñerun luágu Wabúreme Jesucristu, jáu sun títana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsu, ába jaffíñerun, ába jabásterún. ⁹ Ábatí lasáliragun Wabúreme Jesúsu lun Páblo luágu ában áriebu, ába laríñagun lun.

—Manúfudebá, bapúrichija méme, mámanichabá, ¹⁰ ladüga anájein búma, úabei ni ában agúruruti buágu lun ladügún wuríbani bun. Añájein sarágu gürígia lídan ubúrugu le ja lúnbaña nánigubaña lan.

¹¹ Reídeiti lubeíti Páblo ában irúmu dimí ni Corínto arúfudajeí Lerérunt Búngiu joun lílana fulásu.

¹² Lídan dan le Galión lan gumándanbei Acáya, ába joúndaragun juríu lun járugüduni Páblo. Ába janügüni ligibugiñoun lúrudu lun lagúserawagüdün. ¹³ Ába jaríñagun lun gumándan.

—Wügüri le, leréde arúfudaja joun gürígia lun jájuduragun lun Búngiu láu ában igáburi le müaraanbei lúma lúrudu.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wuríbani o díru jürüti ladügübei wügüri le, níchaaguña jamúga núngua lun nagáambunün, jugúya juríu, ¹⁵ quei luágu lan dimúrei buri, lúma íri, lúma jilúrudun,

aráanse jumeí júngua, ladüga mabúseeruntina nagúseragüdün luágu buri cátei le.

¹⁶ Ába labúgaguniña ñígiñe. ¹⁷ Ábatí járugüduni sun güriégugu Sóstenes le tábuti jalígilisin juríu, ába jabúleiseiruni ñi guánarügü ligíbugiñe gumándan. Meberesegúnti Galión láu líra.

Lagíribudun Páblo Antioquíoun, lagúmeseruni lürrüwan luweýasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layoúragun joun afíñetiña, ába lídin Síria úara túma Priscila lúma Aquíla. Ába láasaruni lídiburi lídan ubúruju Céncrea lubáragiñe ládinun, lun lagúncularun láu ában méja darádu le ladügübei lúma Búngiu. ¹⁹ Dan le jachülrün ubúruju Éfeso, ába lígiruniña Páblo Priscila lúma Aquíla lun jeréderun ñi lídan ubúruju ligía. Lubáragiñe lígiruni Páblo Éfeso, ába lídin ligílisirugu adímureja jáma juríu. ²⁰ Ába jamúriaian lúma lun leréderun méme ñi jáma, májati. ²¹ Ábatí layoúragun joun, laríñaga joun.

—Mósu ñi nan Jerusalén lubá fédu le lúnbei ladügün, nagíribudayaba aríjaün ánjein busén Búngiu.

Ába ládinun, ába lídin Éfesogiñe. ²² Türüti Cesaréa, ñígiñe ába lídin Jerusalén abúsura joun tílana ligílisi, lárigiñe, ába larágachun Antioquíoun. ²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríja ában ában, íchaajeina dügüdaguaü joun afíñetiña.

Lapúrichijan Apólos ubúruju Éfeso

²⁴ Lídan dan ligía, ába lachülrün ában juríu gíriti Apólos ubúrugun Éfeso, Alejandríana juríu ligía. Gapúrichijati, áni subúdi lumúti gíñe Lerérun Búngiu buídu buídu. ²⁵ Subúditi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, ináruni, láu sun loúgua lan lasúbudirun luágu, le rügüñein larúfudajabei Juan le abásteragüdajabei luágu Jesúsu le lúnbei liábin lárigiñe, lasúbudira. ²⁶ Luágu ában wéyu, dan le ladímurejaña lan Apólos tídan jalígilisin juríu láu sarágu ichoúruni, ába jagáambuni Priscila lúma Aquíla. Dan lagúmuchun lapúrichijan, ába janügüni Priscila luma Aquíla jábiñoun lun jafúnraanguagüdünítima luáguti Jesúsu le Wasálbaragülebei lun, luma luáguti cátei le larúfudajabei. ²⁷ Dánti le labúseerunbei Apólos lídin loúbawagun Acáya, lúmagiñeñanu afíñetiña Éfeso lun lídin, ába joúnajan ában gárada joun afíñetiña ja ñíbaña Acáya lun jerésibiruni buídu. Dan lachülrünbei Apólos Acáya, íderagua lumútiña ja lafiñeragüdubaña Búngiu luágu Jesúsu, láu lareíni, ²⁸ arúfuda

lumúti joun gürígia láu richaü le siñá jamuti asígenera, luágu marícha lan le jarúfudajabeí juríu, arúfudaleí joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúrugu Éfeso

¹ Sun niján lan Apólos ubúrugu Corínto, ligía lásüğürün Páblo labádinaguagiñe buri fulásu, ába lachülürün Éfesoun ñi lubeí ladárira sarágu afíñetiña. ² Ába laríñagun joun.

—¿Resíbi jumútisan Sífiri Sándu dan le jafíñerunbei luágu Jesucristu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Abati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

⁴ Laríñaga Páblo joun.

—Labásterágüduniña méja Juan gürígia, arúfudei luágu sáansi jamáali lan joúserun, aríñagati gíñe joun luágu lúnti lan jafíñerun luágu le lúnbei liábin lárigiñe —luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu. ⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe. ⁷ Jawáraañanu dúusu wügüriña jádan súngubei.

⁸ Ürüwañein játi láu Páblo abásija tídoun jalígilisin juríu le ñi lubeíja lapúrichija, adímureja ligíaja furáangu luágu larúeijan Búngiu, afíñegüda láña gürígia luágu. ⁹ Níñanu gíñe, edéreragüdütu janígi, májatiña jafíñerun, adímurejarügü jagía wuríba luágu lémeri Crístu jagíbugiñe gürígia. Abati ladíreirun Páblo jawéi, ába lanügüniña ja afíñebaña luágu Jesucristu tídoun ában lescuélá to ñí lubeí larúfudaja ában wügüri gíriti Tiránonno, ábaja ladímurejan ságü wéyu joun, ñi. ¹⁰ Ítara lína lasígirun luágu bián irúmu, súnti ja aganoúbaña loúbawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu. ¹¹ Adügati buríti Búngiu oúnwenbun buri miláguru lídaangiñe Páblo, ¹² darí lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatiña jádaangiñe.

¹³ Ñíñanu juríu eíbugañajadügütiña, aságajatiña gíñe espíritugu wuríbatiña jaweí gürígia, álugatiñá yebe jayúsuruni líri Wabúreme Jesúsu lun jaságajaniña, jaríñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

¹⁴ Ñíñanu sédü lirajüñü ában juríu gíriti Escéva, jábuti méja fádirigu, jádan ja adügübalin buri cátei le. ¹⁵ Níjein ában jadügüni, ába loúnabuniña espíritu wuríbati ligía.

—Subúdi numúti Jesúsu, subúditi gíñe nun cátei lan Páblobei, ánjein jugúa, ¿cátaün?

¹⁶ Ába lachüragun wügüri le láubei espíritu wuríbati lúngua jawágun, gabáfuti sügü jáu súngubei, ába labúleiseiruniña buídu, ába jeíbaagun nígiñe surúsú lúma láu buri bíti jawágu.

¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíriti linébedun líri Wabúreme Jesúsu joun.

¹⁸ Sarágu gíñe buri jádaangiña ja afíñerubaña, ába jayábin agúfeserei buri cátei wuríbati lé meja jadügübei, ¹⁹ sarágu gíñe buri jádaangiña já meja gabíñarajadibaña, ába janügünun jalíburun buri, ába jágudunun jagíbugiña súngubei. Dan jabájüdünbalin tebégi líburu buri tugúya, gebégitu queí buri dimí-san mílu murúsun seínsu le pláta. ²⁰ Ítara líña abúruchagueína lan ugánu luáguti Jesúsu, arúfudeinaleí lubáfu lun lasáansiragüduni jagáburi gürígia.

²¹ Lárigiña sun cátei le, ába laráanserun Páblo lun lídin aríjaña afíñetiña Macedónia luma Acáya, lubá lasígiruni luweíyasun Jerusaléoun. Aríñagati gíñe luágu lárigiña lanme lídin Jerusalén, lídiba lan gíñe Róma. ²² Ábati loúnajan biáma jádaangiña ja íderagubalin lubá, Macedónia, wügüriña jagía, Timotéo luma Erásto, ligía, ába leréderun átiriraüya dan Ásia.

Chagáaguaü ubúrugu Éfeso

²³ Lídan dan ligía, níñein ában oúnwenbun achágaraguní Éfeso jaweígiñeti ja afálarubalin lémeri Crístu, ²⁴ lídaangiñeti ában wügüri gíriti Demétrio, ladáawagun cátei láuti pláta lifisiutebei. Wügüri ligía, adáaguati tirajüñü ligílisi láu pláta to tilígilisin sándu to gíriboun Diána, belútiti sarágu seínsu joun ja ñadágimeinbaña lúma. ²⁵ Ábati loúndaruniña ja ñadágimeinbaña lúma úara jáma ámu ja ñadágimeintiña ámu físiu le lenége jafísute, ába laríñagun joun.

—Wügüriña, subúdi jumúti luágu ñulú lan wabágari láu físiu le, ²⁶ agáamba jumáali, aríja jumeí ída líña lan lídin Páblo aríñaga luágu máma jamá búngiugu sándu ja jadügübaña wügüriña,

áni gíbeeña gürígia jafíñeragüdün, mámarügü ya Éfeso, lídan gíñe líbe-ägei Ásia. ²⁷ Ñoúnguati cátei le, ladüga gayáraabei weférideruni wabísinis, gayáraabei gíñe teférideruni tilígilisin búngiu Diána tuweírigun, ábame tanügün búngiu Diána to únbound jájuduragua sun gürígia Ásia lúma lídan sun uboú quei ni cáta.

²⁸ Dan le jagáambunbalin cátei le, ába jagáñidun buídu, ába jagúaragun.

—¡Weírigutu Diána to jabúngiute Éfesona!

²⁹ Ñíñeinti ában oúnwenbun achágaraguní lídan sun ubúrugu ligía. Ába járugüduni Gáyo lúma Aristárco, biáma wügüriña Macedóniana ja úarabaña lúma Páblo, ába jadúruguduniña chülü tuágun múna to ñi lubeíja joúndaragua. ³⁰ Álugatí yebe Páblo lebélurun lun ladímurejan joun gürígia ñi lun ladílirun sun cátei, mígirun jamúti afíñetiña lun lebélurun. ³¹ Ñíñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélurun lan ñíjin. ³² Ñiti lídan adámurini, jíbiri agúaragua ában cátei, jíbiri agúaragua ámu, ladüga chagáguaña gürígia, jíbe-ägei, ibídiñeti joun ca lan lébubei jadámuridagun. ³³ Ñíñanu jádaangiñe gürígia, ába jafúnraanguágüduni cátei le lun Alejándro, le jádajabeí juríu ligíbugiñoún guríriguaü lun ladímurejan luágu jafúleisein. Ába ladügün Alejándro seíni láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírigutu Diána to jabúngiute Éfesona!

³⁵ Dánti le gálumagüda láaña abürüjati le láni ubúrugu ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígilisin búngiu Diána, túma tiyáwa to áburujaboun siélugiñe. ³⁶ Quei úa lan ni ában lun lasígeneruni cátei le, gáluma jumá, madüga jumá ni cáta masáminarunga jumeí buídu. ³⁷ Wügüriña ja, ja janügübaña ñájoun, míwerujan jamágiru jilígilisin, madímurejan jagía wuríbati tuágu jubúngiute. ³⁸ Ánjein níjein lubeí cátei uáguti labúseera Demétrio jáma ja ñadágimeinbaña lúma líchugun jadúunrun, ligía níjein lubeí agúseragüduti lúma agúseragülei, gayáraati jídin ligíbugiñoun lúrudu lun ladímurejan cáda ában lueígiñegua. ³⁹ Ánjein ámu lubeí cátei jamúriajabeí, lúnti laráanserún lídan ában adámurini le richáti, ⁴⁰ ladüga gayáraabei laríñawagúniwa luágu wagúbuaña lan wuríbani ladüga cátei le asúseredubei ugúñe,

ibídiñebi woun cába lan woúnabagüle ánjawa álügündüwa luágu chagáguaü le.

⁴¹ Lárigiñe laríñaguni cátei le, ába lagúmuchaguagüduni adámuridaguni.

20

Luweíyasun Páblo Macedónioun lúma Grécion

¹ Dan le lagúmuchunbei chagáguaü Éfeso, ába loúnajan Páblo jawágu afíñetiña lun jayábin lun, gayára lámuga líchugun gurásu joun, ábatí loúburuniña, ába layoúragun joun, ába lídin Macedónioun. ² Luágu luweíyasun, chülüğueina líña jámagiñe afíñetiña lídan buri fulásu le ídaangiñebei lásügüra, ru ligía sarágu dügündaguau joun láu lerérun. Ítara líña lachüllürün lídoun ageíraü le Grécia. ³ Reídeiti ürüwa játi ñi Grécia, ladiná yébe ugúnein lun lídin Síria, ligía lagáambun luágu jelédeguña lan juríu lubá. Ábagubeíti laráanserun lun lagíribudun múarugugíñe, sügüína ligíaya Macedóniagiñe. ⁴ Gíbetiña wügüriña ñüdüntiña úara lúma. Sópater, le liraü Pyrrhus, Beréagiñe, Aristárco lúma Segundo, Tesalónicagiñe, Gáyo, Dérbegiñe, Timotéo gíñe, lúma gíñe Tíquico lúma Trófimo, Ásiana. ⁵ Afíñetiña ja, ába joúdin wabá, ába jagúrabuníwa ubúrugu Tróas. ⁶ Wagía, lárigiñe fédu le teigín fein to magánaboun ísi, ába wáfuridun Filíposgiñe tídan ugúnein, seíngü wéyu lárigiñe, ligía wátürün Tróas, le ñi lubei wúwarada jáma ja ñüdünbaña wabáragiñe, ába weréderun ñi sédü wéyu.

Bisída láni Páblo ubúrugu Tróas

⁷ Samúdi gúñoun, ába joúndaragun afíñetiña lun jeígin fein le jarítaguagüle luágu loúnwen Cristu, Páblo arúfudajabeí joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebu. ⁸ Íñuñanu lídan lürüwan túbanana muna to ñi lubei joúndaragua, ñíñein sarágu lámpu durúngu. ⁹ Ñíñein ában irájü agáambaja, ñun líña luágu funédere, Eútico líríbei. Queíti lílubei lapúrichijan Páblo áriebu ligía, ába ladábudun lágu irájü ligía, ába larúmugun ñi, ába leíguadun lídaangíñe lürüwan túbanana muna, múarugun. Dan le jarárirunbei lun jiñúraguni, jiláali. ¹⁰ Ábatí larárirun Páblo, ába laroúnrun ligíbuagu irájü ligía, ába loúburuni. Ába laríñagun joun afíñetiña.

—Madíjeri jumá, gabágariyaali.

¹¹ Ábayati lawárirun Páblo, ába jafánreinragunun fein, ába jeígin. Ábatí lasígirun adímureja darí larúgadun, ligíaali lídin. ¹² Irájüti buga ligía, ába janügüni águyu wínwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába gíñe woúdin, ába wádinun tídoun ugúnein, ába woúdin chülü Asón, le ñí lubei lúnti lan wabúduni Páblo quei wadáradun, ladüga busén lan lídin Asón múarugugíñe. ¹⁴ Dan le wadúnragun lúma ñí Asón, ába ládinun wáma, ába woúdin Mitiléne. ¹⁵ Larúgan, ába wáfuridun ñígíñe, sügüína wagía ligíbugiñe uboúju Quío, ában wéyu lárigiñe, ligía wachüllürün uboúju Sámos. Ába weméraagun ubúrugu Trojílio, larúgan, ligía wachüllürün ubúrugu Miléto. ¹⁶ Mátürüntiwa ubúrugu Éfeso luágu waweíyasun ladüga mabúseerun lan Páblo leréderun sarágu dan ageíraü Ásia, busénti lachüllürün Jerusalén furése lun ñí lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachüllürünbei, ába laríñagun joun.

—Subúdi jumúti ída líña lan nigáburi lúmagiñe furúmiñeti wéyu nachüllürün Ásioun. ¹⁹ Sun dan le jagánaguañadina lubeí, seríwitina lun Búngiu láu ünabuni, láu sarágu águiraü, súfuri áu sarágu láu cátei lé buri jabúseerubei juríu jadügün nun. ²⁰ Merédeți napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaü lúma júbiñe. ²¹ Dándu joun juríu quei joun ja mámabaña juríu, aríñagaadina luágu lúnti lan jasáansiruní joúserun ligíbugiñe Búngiu, lúma lun jafíñerun luágu Wabúreme Jesucristu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñí, ²³ lé rügüñein nasúbudirubei, luágu sun lan ubúrugu le ñí lumuti nídin, aríñagati Sífiri Sándu nun luágu nadaürüba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebéreresa, ni nibágari guánarügü, mebégiti ni cáta nun, adügarügü náali ligía le uágubei loúnajana Búngiu láu ugúndani darí lúmoun lagúmujoún, lun nadímurejani ugánu buíti luágu línsiñejabu Búngiu.

²⁵ ‘Guetó, choúru numúti luágu maríjindüguya láadina lan ni ában jídaangiñe, jugúa lé meja únbei napúrichija luágu larúeijan Búngiu. ²⁶ Ligía nariñagunbei jun ugúñe luágu masándiragun nan núngua láu dúru lueígiñe ni ában jídaangiñe, ²⁷ ladüga subúdigüda náali sun laráansejan Búngiu jun, marámuduntina ni cáta jueí. ²⁸ Toúnigigua jumá lubeíti júngua, toúnigi jumáñname afíñetiña ja líchugubaña Sífiri Sándu lun joúnigiruniña, ja tánigu lilíglisin Búngiu, ja lagáñijabaña láu líta Liraü guánarügü. ²⁹ Subúdi numúti luágu dánme lan nídin, jayábinba lan ámu áluga jagünrinchaguni jafíñen, quei lebélurun geígusi

jádoun mudún áfaraguaña. ³⁰ Ñíbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña afíñetiña. ³¹ Toúnigi jumá lubeíti, jarítagua jumeí luágú ürüwa lan irúmu náu ewéridijaün wéyuagu áriebu, ayájua buri áu.

³² 'Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafíñen lúma lun líchugun ubáraü jun siélu jádan ja derégeguáaÑabaña joúngua lun. ³³ Mabúseerun nágili ni liseínsun ni ában, ni lanáangun, ³⁴ lubáragiñe líra, subúdi jumúti luágú ñadágimein nan lun nibíjini le nemégeirubei lúma le jemégeirubei ja númabaña. ³⁵ Súnwandan narúfudajan jun luágú ítara líña lan luwádigimariníwa lun jíderawagún ja níjeinbei jemégeirun, luágú gíñe lúnti lan larítawagún luágú dimúrei le laríñagubei Wabúreme Jesúsu dan le laríñagunbei. "Gúndaatimáati le íchugubei sëgü láu le erésibirubei."

³⁶ Lárigiñe laríñaguni Pábilo cátei le, ába lájuduragun, ába layúmuragun lun Búngiu jáma súngubei. ³⁷ Ába jayájun súngubei láu igárigu, ába joúburuni Pábilo, ába jachúuruni. ³⁸ Jírutiñati ladüga laríñagun joun luágú maríjindügüya jamáali lánme. Ába joúdin íchaajei tuágu ugúnein.

21

Luweiyasun Pábilo ubúrugun Jerusalén

¹ Dan le wígiruniña afíñetiña, ába woúdin sügülögü lídoun fulásu le gíríbei Cos, larúgan, ában woúdin Ródas, ñígiñe Ródasgiñe woúdin lun Pátara. ² Ni Pátara wadárira ában ugúnein teíbuga Fenícia, ába wádinun tídoun, ába woúdin. ³ Dan wásügürün, ába waríjini uboúju le Chípre, ába wígiruni lueígiñe wabaüna, ába wasígirun dari wachülürün Síria. Queíti taráriguágüdüba lan ugúnein lídan ubúrugu le gíríbei Tíro, ába warárirun ni. ⁴ Áluaja wamútiña afíñetiña ja ñíbaña, ába weréderun sëdù wéyu jáma ni. Ába lawísaruniña Sífiri Sándu luágú lasúfuriruba lan Pábilo Jerusalén, ába jaríñagun lun lun mídin lan. ⁵ Dan lásügürün sëdù wéyu ligía, ába woúdin. Sun afíñetiña jáu jámarigu jáma jasáanigu, ñüdüntiña íchaajawa chüllü boúgudi lueí ubúrugu, ni býaybu ába wájuduragun ayúmuragua lun Búngiu. ⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñioun.

⁷ Ába wagúmuchuni waweiyasun baránaja lúmagiñe ubúrugugiñe Tíro dari Tolemáida, le ni lubei wabúsura joun afíñetiña, ába weréderun ában wéyu jáma ni. ⁸ Larúgan, ába láfuridun Pábilo wáma, wagía le lúmabei, ába wachülürün ubúrugu Cesaráea. Ni woúdin lúbiñe Felípe le apúrichijabalin

ugánu luáguti Jesucristu, ába gíñe jádaangiñe sédü wügüriña já meja anúadajoúbaña Jerusalén lun jeténirun lun le jemégeirubei afíñetiña, ába weréderun lúma. ⁹ Gasáaniguti Felipe gádürü wügüriña irájüñü ja mafuridungiña, ibíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachülürün ában proféta Judéagiñe, gíriti Ágabo, ¹¹ liábiña aríjawa. Ába lanügüni lubélitin Pábilo, ába lagüraguni lugúdi guánaru lúma lújabu láu, ába laríñagun.

—Laríñajare Sífiri Sándu luágu ítara lúba lan jagüraguni juríu labúreme béliti le ubúrugu Jerusalén, ábame jederegeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Pábilo lun mídin lan Jerusalén. ¹³ Ába laríñagun Pábilo.

—¿Ca uágu jayájua, írudagüdána? Aráansetina mámarügü lun nagürawagún Jerusalén, aráansetina darí lun noúnwén lueígiñe Nabúreme Jesúsu.

¹⁴ Quei siñá wamani larítagun agáñeira, ába wígiruni, ába waríñagun lun ladügüniwa lugúndan Búngiu.

¹⁵ Dan le gumújali webélujan ñi, ába waráanserun, ába woúdin Jerusalén. ¹⁶ Ñüdutiña jádaangiñe afíñetiña wáma Cesaréagiñe, ñíñein ában Chíprena jádan, gíriti Mnasón, lüjali lueígiñe lafíñerun luágu Jesucristu, lúbiñeba wagánawa.

Bisida láani Pábilo Jacóbo

¹⁷ Dan wachülürün Jerusalén, ába jerésibiruníwa afíñetiña láu ugúndani. ¹⁸ Larúgan, ába woúdin lúma Pábilo aríjei Jacóbo, ñíñanu gíñe sun tábutigu ligílisi Jerusalén. ¹⁹ Ába labúsurun Pábilo joun, ába labájüdaguni sun cátei le ladügübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñagun lun Pábilo.

—Wadúje, aríjabásan, añájein sarágu mílu juríu afíñerutiña luágu Jesucristu, áni sun jagía, aríñagatiña luágu lúnti lan lasígirúniwa lilúrudun Moisés. ²¹ Aríñawagúaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madügün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. ²² ¿Cábasan wadüga? Joúndaragubátia juríu dánme le jasúbudiruni luágu chülüjjadibu lan, lun jadügün wuríbani bun. ²³ Niján cátei le lúnbei badügüni. Añájein gádürü wügüriña ya wádan, gásu jagúfulirun ában darádu lúma Búngiu. ²⁴ Barübaña búmagua, ábame barúmadaguágüdüñ búngua jáma

ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jadáradun, lárigiñeme gayáraajalíme jásaragüdüni jádiburi. Ítara lúba jaríjini sun juríu luágú iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdubu. ²⁵ Ánjeinti jawágu ja mámabaña juríu áni afíñejaña luágú Búngiu, abürüjaadiwa joun lun madíjeri jamá luágú buri cátei le, lúnrügü meígin jamá úwi le dagágüdawaali joun sándu, ni jítäu, ni anímaalu le tigíwarügüti, lun gíñe úa lan ni ában agámariduti würi to mamárieiduntu lúma.

Járügüdüni Páblo adáüra tídan témpulu

²⁶ Ábati lanügüniña Páblo gádürü wügüriña jagía, larúgan, ába larúmadaguagüdün língua jáma, ába lebélurun témpulurugun awísaja ídaba lan lagúmuchá jawéyuri gádürü wügüriña jagía lun jarúmadun, léme lidáani jadágaragüdüni cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédu wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába járügüdüni Páblo, ²⁸ ába jagúaragun.

—¡Wügüriña Israelítagu, íderagua jumáwa! Niján wügüri le eíbugubalin sun fulásu arúfudaja joun sun gürígia wuríba luágú wanásifun, luágú lilúrudun Moisés, lúma tuágú témpulu to, belúgüdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladüga meja jaríjini Páblo ubúrugu lúma Trófimo le Éfesona, jarítaguatíñati luágú barülaani témpulurúgun.

³⁰ Ába jachágaragun sun lílana fulásu, ába jayábin gürígia eíbaagueina. Ábati járügüdüni Páblo, ába jadúruguduní boúgudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachülürün ugánu lun gumándan luágú chagáguaña lan sun lílana ubúrugu Jerusalén. ³² Ábati loúndaraguniña gumándan lisúdaaranigu jáma jábutigu, ába lachülürün eíbaagueina le níjin jabeí gürígia. Dan jaríjini gumándan jáma súdaaragu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagüraguágüdüni láu bián güríngüri, lárigiñe, ába lálügütajan cátei lan, lúma ca lan lidúnrunbei. ³⁴ Ámuñegueinarügüti cátei jaríñagun gürígia, siñátiti gunfaráanda lan gumándan ni cáta ladüga ireíni le jadügübei, ába lanügagüdüni jábiñoun súdaara. ³⁵ Dan le jachülürünbei luágú testépute móuna, ába janügüni

súdaara Páblo oýyuajeina lueí jáfaruni gürígia jilágubei,³⁶ ladüga jayábiña súngubei járigi agúarajeina.

—Jilála!

Ladímurejan Páblo lueígiñegua

³⁷Dan lé yebe jádaraali lan Páblo múnadoun, ába laríñagun lun gumándan le jáubei súdaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu?³⁸ ¿Máma lubeí bugúya Ejíptona lé meja adügübei ában mabúchajaü luágu ában dan, ába lánügün gadürü mílu wügüriña gáfarajatiña lídoun fulásu mageírawaguti?

³⁹Laríñagati Páblo lun.

—Máma áu, juríu áu, Társona, ában fulásu weíriguti Cilicia. Adügabá fuleísei nun lun bígirunina lun nadímurejan joun gürígia.

⁴⁰Ába líchugun gumándan üma lun, ába laráramun Páblo luágu estépu, ába líchugun seíni láu lújabu joun gürígia lun jámanichun. Dan le manígaali, ába ladímurejan joun lídan hebreo, le jerérun juríu, ába laríñagun.

22

¹ —Nidújeñu jáma jagübürigu, agáamba jumeí le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

³ —Juríu áu, le gumúti, ubúrugu Társo loúbawagu Cilicia nagüriajoúa, ya Jerusalén naweírida. Lábugiñe larúfudajan Gamáiel natúriaia, úarati larúfudajan lúma jalúrudun binádu wagübürigu. Joúchatina súnwandan lun nesériwidun lun Búngiu táu sun nanígi, queígubeirügü ligáburi jadügüni jugúya ugúñe wéyu.⁴ Áu, eíbaaja numútiña meja lánigu Crístu darí náfaraguniña jilágubei, bariúgua áu wügüriña furísunrugun.⁵ Geféenti fádiri iñutimaati jáu sun jábutigu juríu luágu rújama gárada nun joun wapaísana ja Damáscoaña. Ñüdüntina ñi áluajaña afíñetiña luágu Crístu lun nanügüniña ñájoun lun nasúfuriragüdüniña.

Labájüdaguní Páblo luáguti lasáansiragun ligáburi

⁶ ‘Dan luáguñadina lubeí üma, yaráfaadina lun nachülrün Damásco, queíburi amídirugu, sódini ligía ladúnraagun ában oúnwenbun larúgounga siélugiñe náu,⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?”⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme

beíbaajabeí.”⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabeí nun.¹⁰ Ábati nariñagun. “¿Cábagi nadüga, Nabúreme?” Ába laríñagun nun. “Sarába, beíba luágu buweýasun Damásco, ñíba laríñawagúa sun le lúnbei badügünü bun.”¹¹ Queíti maríjingüda láadina lubeí buga larúgounga ligíra, ába járugüdüní ja númabaña nújabu darí wachülürün Damásco.

¹² ‘Niñein ában wügüri Damásco gíriti Ananías, gúnfuliti buídu lúma lilúrudun Moisés, sun juríu ja aganoúbaña Damásco adímurejatiña buídu luágu wügüri ligía.¹³ Ába liábin Ananías aríjana, dan lachülürün, ába laráramun nubádu, ába laríñagun nun. “Nidúje Sáulo, ibíjayabeí baríjin láridoú.” Lidan méme óra ligía, ába léfegechun nágu, ába narijini.¹⁴ Ábati laríñagun nun. “Anúadaja láadibu Jabúngiute binádu wagübürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali,¹⁵ ladüga bíchuguba lan fe luágu Jesúsu joun sun gürígia, abájüdaguabeíme le aríja báalibeí lúma le agáamba báalibeí.¹⁶ Guetóti, ¿ca uágu badárasaja? Sarába, badiseibá jeménigünu luágu Wabúreme lun lachíbun biffigoun.”

Labájüdagun Pábilo luágu loúnajoún apúrichija joun ja mámabaña juríu

¹⁷ ‘Dan nagíribudun ubúrugun Jerusalén, luágu ában wéyu dan le nídin témpulurugu ayúmuragua, ába lasáliragun Nabúreme Jesúsu nun,¹⁸ ába laríñagun nun. “Furíba yágiñe Jerusaléngiñe, oúfuda, ladüga madügünbaña juríu gásu láu le baríñagunbei nuágu lídan fulásu le.”¹⁹ Ábati nariñagun lun. “Nabúreme, subúdi jamúti luágu ñüdü nán buri méja tídan sun jalígilisin afíñetiña anáajaña ja afíñebaña buágu furísunurugun, bei buri náña.²⁰ Dan le láfarúnbei Estéban jilágubei, le báñigu lé meja adímurejabeí buágu, ñíñadina, gúndaatina láu jáfaruni, áu oúnigirubárun janáangun ja áfarubalín.”²¹ Ába laríñagun Nabúreme nun. “Beíba, ladüga noúnajadibu díse, apúrichija joun ja mámabaña juríu.”

Pábilo lújaburugu gumándan

²² Agáamba jamúti chüllü lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchati lun labágaridun!

²³ Queíti jasígirun agúaraja, achüjoun buri janáangun, achüja callíqui íñun le jagáñi,²⁴ ába laríñagun gumándan lun ladarúniwa Pábilo jábiñoun súdaara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia

luágu ítara. ²⁵ Dan le gürágua jamáali lun jabeíchuni, ába laríñagun Páblo lun jábuti súdaara le ñíbei.

—¿Garíchatünsan lun jabeíchun ában wügüri Rómana, magúserunga ligía?

²⁶ Dan le lagáambuni jábuti súdaara cátei le, ába lídin aríñaga lun gumándan.

—Toúnigibátia láu le lúnbei badügüni, Rómanatia wügüri le.

²⁷ Ábatí lídin gumándan luágun Páblo, ába laríñagun lun.

—¿Inárüni luágu Rómana ban?

Laríñaga Páblo lun.

—Ánja.

²⁸ Ábatí laríñagun gumándan.

—Fáyeitina sarágu seínsu lun Rómana nan.

Laríñaga Páblo.

—Áanjein áu, ñi nagüriaajoúa.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómana lan Páblo, ába lanúfudedagun lueígiñe lagüraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loúndaraguágüduniña jábutigu fádirigu jáma lúrudugu juríu ja íñutimáabaña, ábatí laságaruni Páblo, ába líchuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülü lúmoun Wéyú le.

² Ábatí loúnajan Ananías, fádiri le íñutimaabei, lun jagáyuajan ja yaráfabáña ñi luágun liyúma Páblo. ³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdünina quei laríñaguni lúrudu, ¿cáti uágu bagáyuagüda nuágu, adüraaguei lúrudu?

⁴ Ába jaríñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladüga taríñajare Lerérun Búngiu. “Madímu-rejaanbadibu wuríba luágu ában agúmadijati bagéira.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagübürigu, áni jagúseragüdüñadina ladüga afíñe nan luágu jásaaruba lan jiláaña lídaangiñe oúweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini.

⁸ Ladüga jaríñajare saduséogu luágu másaarunbaña lan jiláaña lídaangiñe oúweni, úatiña nege gíñe ánjeligu, ni espíritugu, áanjañati fariséogu, afíñetiña luágu sun cátei le. ⁹ Jareínchati súngubei, ába jásaarun jádaangiñe arúfudajatiña lilúrudun Moisés ja ñibaña, áni fariséogu gíñe jagía, ába jaríñagun.

—Wügüri le, úati ni cáta wuríbatí ladüga, áni ánjeindügü ában lubei espíritu adímurejabei lun o ában lan ánjeli, toúnigi wamátia lueí wadárirún oúcha weréderuni luwádigimari Búngiu.

¹⁰ Weírijali sigénei dari lun lanúfudedun gumándan lueí jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janügüni jábiñoun súdaara.

¹¹ Le ában áriebu, ába lasáliragun Wabúreme Jesúsu lun Páblo, ába laríñagun lun.

—Manúfudebá, Páblo, ladüga ítara quei rújadibu lan fe nuágu ya Jerusalén, bíchuguba gíñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta dari jáfaruni. ¹³ Joúgiñe bián-wein wügüriña ja aríñagubalin cátei le. ¹⁴ Ábati joúdin jámoun jábutigu fádirigu lúma jámoun wügüriña weírigutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta dari wáfaruni Páblo jilágubei. ¹⁵ Guetóti, jugúya jáma ja jíbiri lúrudugu íñutimaatiña amúria ja jumá lúma gumándan lun lanügüni jun jarúga, jaríñagame lun luágu lun lántima jálugüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachülürün.

¹⁶ Ába lachülürün cátei le lábun lagáambun tiraü lítu Páblo, ába lídin jábiñoun súdaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súdaara, ába laríñagun lun.

—Barübei irájü le lúmoun gumándan, níjein cátei lun laríñaguni lun.

¹⁸ Ába lanügüni jábuti súdaara lúmoun gumándan, ába laríñagun lun.

—Wáti adaürüti Páblo nun, ába lamúriaian núma lun nanügünü irájü le bun ñájoun, níjein nege cátei lun laríñaguni bun.

¹⁹ Ába lárügündüni gumándan lújabu irájü ligía, ába lanügünü lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriaian búma lun banügünü Páblo jagíbugiñoun lúrudugu íñutimaatiña lún nege jálugüdünitima luágu lidúnrun. ²¹ Maffíerabá joun, añajein joúgiñe bián-wein jawügüriña arámudagu jabá ümada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügüñein boúnabagüle.

²² Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajoún Páblo lun gumádimati le Félix

²³ Ába lagúarun gumándan joun bián jádaangiñe jábutigu súdaara, ába laríñagun joun lun jaráanserun bián-san súdaara lun jóúdin Cesaréa eíbu, úara jáma ürüwa-wein-díisi ja jawágutiña gabáyu, jáma bián-san ja táutiña efeín, lun joúdin ladaünrünefú gúñoun. ²⁴ Aráansegüdáti gíñe gabáyu lun laweínjaniña Páblo, ru ligía dimúrei lun jachülüragüdüni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun. ²⁷ Niján wügüri le, le noúnajabeí bun, daüjamaali yebe juríu áni jáfaraali yebe jilágubei, dan le nasúbudirúnbalin luágu Rómána lan, ába nídin jáu nísúdaaranigu, ába neséfuruni. ²⁸ Queíti nabúseerun nasúbudiruni ca lan lidúnrunbei jarúma, ába nanügünü jagíbugiñoun lúrudugu juríu íñutimaatiña. ²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürün. ³⁰ Quei lachülürün lábun nagáambun luágu jaráansejaña lan juríu lun jáfaruni jilágubei, ligía lébubei noúnajani bun madárasajaanga. Aríñagaadina gíñe joun ja íchugubaña lidúnrun lun búma lan jaráanserei le jánibeí lúma.”

³¹ Ábati janügünü súdaara Páblo quei laríñawagúniwa joun, áriebu, chülpü Antípatris. ³² Larúgan, ligía jagíribudun súdaara ja eíbubaña, súdaara ja jawágubaña gabáyu, ába jasígiruni javeýasun láu Páblo. ³³ Dan le jachülürünbei Cesaréa, ába jedéregerunun gárada lun gumádimati, derége jameí gíñe Páblo. ³⁴ Lárgiñe lalíijanun gumádimati gárada, ába lálügündajan jalíana

lan Páblo, dánti le lasúbudirúnbalin luágua Cilíciana lan, ³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábatí líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachülürün Ananías, fádiri le íñutimaabe, ubúrugun Cesaréa jáu wügüriña jádaangiñe juríu weírigutiña, lúma ában wügüri le subúdijabuti lun lúrudu, gíriti Tértulo. Ába jayábin lúmoun gumádimati lun jíchugun lidúnrun Páblo. ² Dan le lanügúniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágua bareíni, gumádimati, lüjadiwa láu darángilaü ya wageíra, buiti leíbugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teínqui wamútibú luágua. ⁴ Lun magídarun wamáni bidáani sarágu, amúriajatina búma lun badügün murúsun fuleísei woun lun bagáambuníwa luágua murúsun óra. ⁵ Niján wügüri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichügüdinabei jadámurin nazarénugu. ⁶ Álugati gíñe lawíyedagüdünun témpulu ligíbugiñe Búngiu láu lebelaagüdün ában wügüri le mámabei juríu tídoun. Ába wárügüduni, ába yebe wabúseerun wagúseragüduni láu ligáburi walúrudun, ⁷ ába leméterun gumándan Lísias ñíjin, ába lagídaruni waweí láu érei, ⁸ ába laríñagun luágua ja lan íchugubaña lidúnrun lúnti lan jayábin bómoun. Gayáraati bálügüdaguni Páblo, subúdi bámugei inárüni luágua sun cátei le, le waríñagubei luágua.

⁹ Juríu buri ja ñibaña, aríñagatiña gíñe luágua inárüni lan sun le laríñagubei Tértulo. ¹⁰ Ába ladügün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladüga subúdi náani luágua lúmagiñe lan sarágu irúmu bagúseragüdajan lídan fulásu le. ¹¹ Gayáraati bálügüdajan ánjein inárüni lubeí le lúnbei naríñaguni bun. Dúusurügügili wéyu lueígiñe nachülrün ubúrugun Jerusalén lun nájuduragun lun Búngiu, ¹² madárirúnwatina asígeneja ni ca úma, ni achágaraguágüdaña gürígia témpulurugu, ni tídan buri tibiri jalígilisin juríu, ni lídan buri ámu fulásu ubúrugu. ¹³ Gürígia ja, siñáti jarúfuduni luágua inárüni lan ni ában lídaangiñe sun cátei le jaríñagubei nuágu. ¹⁴ Ában cátei naríñagubei bun, luágua nesériwiduña lan lun Jabúngiute nagübürigu quei larúfudajani Jesucristu, le uágubei jaríñaga luágua marícha

lan. Afíñetina luágu sun le bürüwañubei tídan buri líburu to lánina lilúrudun Moisés lúma lé meja jabürüjabei profétagu. 15 Níjein gíñe eménigini le jawágubei nuágu luágu Búngiu, luágu lásaaragüdubaña lan jiláaña, dándu ja buídubaña quei ja wuríbabaaña. 16 Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürígia.

17 ‘Lárigiñe átiri dan náu eíbugei ámu buri fulásu, ába nagíribudun nageíroun lun nederegerun seínsu joun gudémetiña Jerusalén lúma lun nadágaragüdün lun Búngiu. 18 Nadügüñein yebe cátei le témpulurugu lárigiñe narúmudaguagüdün núnqua quei le igáburi, ligía jadárirunina átiri juríu loúbawaguna Ásia ñi témpulurugu, úatiña sarágu gürígia ñi, ni chagáguau. 19 Jagía lúnbaña jayábin arúfudagua joúngua ya lun jaríñaguni le lúnbei jaríñaguni ánjein níjein lubeí lúnti jaríñaguni nuágu, 20 jaríñaguni lan ja yábaña ánjein darí jabeí nidúnrun dan le ligíbugiñe nubeí líñun-ägei lúrudu juríu. 21 Siñáti jaríñagun ni cáta nuágu, lueídügya luágu lan ában wéyu dan le jádaañadina lubeí, ába nagúaragun ariñaga. “Jagúseragüdüñadina ugúñe lueígiñe afíñe nan luágu jásaaruba lan jiláaña lídaangiñe oúweni lúnya jabágaridun.”

22 Subúsiti sarágu luágu larúfudajan Jesúsu lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüduni adámurini, ariñageina ligía.

—Nagúseragüdubei wügúri le dánme le lachülürün gumándan Lisías.

23 Ábati laríñagun Félix lun jábuti súdaara lun lasígirun Páblo daüwañu, lun furáangu lan lun gayára lan joúdin lumádagu ariíjei, eténira lun.

24 Átiri wéyu lárigiñe, ábaya lachülürün Félix túma Drusíla to lúmari, to juríu, ubúrugun Cesaréa, ába lagúaragüdün luágu Páblo lun ladímurejan lun luágu Jesucristo. 25 Dan le ladímurejaanbei Páblo lun luágu ibágari le surúbei, lúma luágu ágüdaagúni únguaü lueí le wuríbabai, lúma luáguti wéyu le lúnbei lagúseragüduniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

26 Agúrabatí yebe giñe Félix lun líchugun Páblo seínsu lun lun lígiragüduni, ligía, dan méme lubeí wájali luágu lun layánujan líma. 27 Sëgüti bián irúmu ítara, ábati lagúmuchun lagúmadijan Félix, ába lárügüduni Pórcio Féstoa lufúlasun. Queíti busén lan Félix leréderun buídu jáma juríu, ába lígiruni Páblo daüwañu.

25*Páblo ligíbugiñe Féstō*

¹ Ábati lachülürün Féstō lun lárügüdüní lufúlasun queísi gumádimati, ürüwa wéyu lueígiñe, ába lamúdeirun Cesaréagiñe lun ubúrugun Jerusalén. ² Ába jachülürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Féstō. ³ Ába jamúriajan fuléisei lúma lun loúnajan anügei Páblo Jerusalén. Le jaráansejanbei, lún yebe jáfaruni jilágubei luágu üma. ⁴ Ába loúnabun Féstō luágu Cesaréa lan ladaürüwa Páblo, áni jarítagua lan lídin ñi madíse. ⁵ Ába laríñagun joun.

—Ligía lúnti lubeí joúdin ja weírigutimaabaña jídaangiñe Cesaréa úara núma, áni ánjein adügaali lubeí wügüri ligía dúru, gayáraabei jaríñaguni.

⁶ Wídu rügüñein o díisi lan wéyu láu Féstō Jerusalén, ába lagíribudun ubúrugun Cesaréa. Larúgan, ába lárügüdüní lufúlasun lun lagúseragüdün, ába loúnajan luágu Páblo. ⁷ Dan le lebélurunbei Páblo, ába jagúriridágun juríu ja ñübinbaña Jerusaléngiñe láu, ába jíchugun sarágu lidúnrun le jürtü, áni siñáti jarúfuduni luágu inárüni lan ni cáta lídaangiñe le jaríñagunbei. ⁸ Ábati laríñagun Páblo lídan ladímurejan lueígiñegua.

—Madügüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Féstō leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünibú ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñí lubei lúnti lan nagúserún. Queísi basúbudiruni buídu, madügüngidina dúru joun juríu. ¹¹ Ánjein adügaadina lubeí dúru le garíchatí lun nafarún jilágubei lueígiñe, meberesegúntina noúnwen, ánjein úa lubeí ni cáta lánina inárüni lídan sun le aríñawagúbei nuágu, úati ni ában garíchatí lun lederegerunina joun juríu. Amúriatatina lun César lan agúseragüdána.

¹² Lárigijieti layánujan Féstō jáma lánigu cába lan ladüga láu Páblo, ába laríñagun lun.

—Amúriaaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Féstō. ¹⁴ Quei reídei jabeí átiri wéyu ñi, ába labájüdaguni Féstō luáguti lagúserun Páblo lun urúei Agrípa, laríñaga lun.

—Níjein ában wügüri lígirun Félix dáüwañu ya. ¹⁵ Dan le Jerusalén nubeí, rútiña jábutigu fádirigu jáma wügüriña juríu weírigutiña lidúnrun nigibugiñe, amúria jatiña núma lun nasíadiruni. ¹⁶ Ába naríñagun joun luágu magáburi láani lúrudu Rómana lun lasíadirun ában gürígia lun oúweni maríjinga láña ja íchugubaña lidúnrun ligibugiñe, lun gayára lan ladímurejan lueígiñegua. ¹⁷ Ligía, lídan lubeí le jayábinbei ya úara núma, meférideruntina dan, larúgan, ába nárügündüni nufúlasun lídan agúseragülei, ába noúna jan luágu wügüri ligía. ¹⁸ Ja ñübinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítagua. ¹⁹ Lé buri cátei le jaríñagubei luágu, luágu múa radun lán nege jáma luágu ligáburi jafíñen, lúma luágu ában nege wügüri gíriti Jesúsu —jiláti nege, laríñajare Páblo luágu wínwanya lán nege. ²⁰ Queíti ibídiñe lan nun cába lan nadüga lídan ában cátei líbe le, ába nálügündüni Páblo áanjein busén lubei lídin Jerusalén lun lagúserún luágu cátei le ñi. ²¹ Quei lamúria jan lun urúeiba lan Augústo César agúseragüdeí, ába naríñagun lun lasígirun dáüwañu daríme gayára lan noúna jani lun Augústo César.

²² Ábati laríñagun Agrípa lun Fést.

—Buséntina gíñe nagáambuni wügüri ligía.

Ába laríñagun Fést lun.

—Bagáambubei jarúga.

²³ Larúgan, dan le jachülürünbei Agrípa túma Bereníce, ába jebélurun láu oúnwenbun uweíriguni múnadoun, jáma jábutigu súdaara jáma wügüriña weírigutiña ñi ubúrugu. Ába loúna jan Fést luágu Páblo, ²⁴ ába laríñagun.

—Urúei Agrípa, jáma wügüriña ja adámurigubaña wáma ya, niján wügüri le. adímurejaña sarágu jádaangiñe juríu wuríba nun luágu, dándu Jerusalén quei ya Cesárea, áni añajagua aríñaga nun láu sarágu éregu luágu lúnti lan loúnen. ²⁵ Laganoún nun camá madügüngili ni cáta le lúnti lafarún jilágubei lueígiñe, áni queíti ligía guánarügü lan amúria jabeí lun urúeiba lan Augústo César agúseragüdeí, noúna jali lun. ²⁶ Queíti úa lan cába lan cátei uágu nabürüja lun Augústo luágu wügüri le, ligía nanügübalin jíglbugiñoún, bigibugiñountimá urúei Agrípa, lun bálügündaguni, níjein lámuga cába lan nabürüja. ²⁷ Ladüga garábaguati nun lun noúna jan ában adaürüti, mawísajaanga áu ca lan lidúnrunbei.

26

Ladímurejan Páblo lueígiñegua ligibugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

²—Oúnwenbun nugúndan gayára lan nadímurejan nueígiñegua bigibugiñe, urúei Agrípa, luágu sun cátei le aríñaga jamáalibeí juríu nuágú, ³gúndaatimáatina ladüga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúrugu Jerusalén, lúmagiñe irájügídina. ⁵ Lüja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñüraü, adámurini létima derégüdabei lídan luwúyeri wafíñen, wagía juríu. ⁶ Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaňa lídaangiñe oúweni lúnya jabágaridun, queí meja lariñaguni joun binádu wagübürigu. ⁷ Dúusugubei família le jadügawagunbei lirajüñü Israél agúrabatiña jaríjini lagúnculirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárira juríu nidúnrun, urúei Agrípa. ⁸ ¿Mafíñetün funági luágu gayára lan lásaaragüdüniña Búngiu jiláaňa?

Labájüdagun Páblo luágu meja leibaajaniña afíñetiña

⁹ ‘Nugúya guánarügü, jarítaguatina méja luágu lúnti lan neíbaajaniña ja afálarunbalin Jesúsu Nazarétna, ¹⁰ áni ítara líña nadügünü ubúrugu Jerusalén. Láu ubáfu le jichugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasíadirúniwa lun joúnwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucristu. Adáagua numúti meja cátei le tídan sun jalígilisin afíñetiña, áni weíriti meja nigáñi joun darí lun neíbaajaniña chülü lídoun buri ubúrugu le díseti.

Labájüdagunya Páblo luágu lasálbarun

¹² ‘Ligía yebe cátei le gabügürübalina ubúrugun Damásco ában dan, joúnajan jábutigu fádirigu. ¹³ Luágu üma, nurúeite, amídirugu, ába narijin ában larúgounga siélugíñeti, jéreti sügü lau larúgounga wéyu, ába ladúnraagun geyégua náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebreo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladüga bágasu dan le líchaagun quíqui luágun cátei gágiriti.”

15 Ábati nariñagun. “¿Cátabusan, Nabúreme?” Ába laríñagun nun. “Jesúsu áu, le guánarügü beíbaajabei. 16 Sarába, ráramabá, ladüga narúfudagunbei núngua bun lun besériwidun nun, lun geféen ban luágu le arija báalibeí guetó lúma le lúnbei narúfuduni bun. 17 Neséfurubadibu jaweí juríu lúma jaweí ja mámabaña juríu, ja únbaña noúnajabu guetó. 18 Noúnajañadibu jámoun lun bägegechagüduni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun giñe meréde méme jamá lábugiñe lubáfu Máfia, lun lábugiñe jamá lubáfu Búngiu. Noúnajañadibu joun, afíñe jamámuga nuágu, ferúdunawa lámuga jafígoun, ibíja jamámuga alágan jádan ja jarúmagüda láaňabaña Búngiu láu jafíñerun nuágu.”

Labájüdagun Páblo luágu luwádigimari

19 ‘Ítara líña lubeíti, urúei Agrípa, ába nadügüni le laríñagunbei Jesúsu nun lídan le lasáliragunbei nun. 20 Furúmiñe, ába napúrichijan joun ja Damáscoabaña, aríñagatina joun lun jaságüríjan luágu jafígoun, lun jagíribudun lun Búngiu, lun jadügün cátei buíti, arijúa lámuga luágu sáansiguuali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. 21 Ligía lébubei járügüdünina juríu témpulurugu, ába jálugun jáfarunina jilágubei. 22 Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírigubaña queísi ja ünabugubaña, chülü lúmoun óra le. Maríñaguntina ni cáta joun gürígia boúgudin lueí le uágubei jaríñaga Moisés jáma profétagu luágu lasúsereduba lan— 23 luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu ibágari magúmuchaditi, luágu giñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafíñeragüduni Agrípa luágu Jesucristu

24 Lídan le laríñagunbalin Páblo cátei le buri lídan ladímurejan lueígiñegua, ába lagúaragun Féstó.

—¡Lülüjaali báu, Páblo! Lülügüdá sarágu atúria jani báu.

25 Ába loúnabun Páblo, ába laríñagun.

—Málülünti náu, gumádimati, inárüni le naríñagunbei.

26 Niján urúei Agrípa le subúdijabúbei lún buri cátei le buídu, ligía gayára lubeí nadímurejan ligíbugiñe, furáangu, ladüga choúru náni luágu subúdi láani giñe sun cátei le asúseredubei lun Jesúsu, ladüga máma cátei le adügüti arámudaguarügü.

27 ¿Afíñetibú luágu le jaríñagubei profétagu, urúei Agrípa? Subúdi numúti luágu afíñe ban.

28 Ába laríñagun Agrípa lun.

—¿Jarítaguatibusan luágu bafíñeragüdübادина lan luágu Jesucristú ítaru ufúresen?

²⁹ —Furése yébe, o darasa yébe, amúriajatina lúma Búngiu, mámarügü buágu, jawágu gíñe sun ja aňájabaňa agáambana ugúñe, lun jayábin lun jafíñerun quei nugúya, úouga güríngüri jawágu.

³⁰ Lárigiñe laríñaguni Páblo cátei le, ába lásaarun urúei, sará gíñe gumádimati úara túma Bereníce jáma sun ja ñúnbaňa ñi, ³¹ ába jadíñurun ñígíñe lun jadímurejan luágu cátei le. Jaríñagatí buri jámagua.

—Wügüri le, madügünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

³² Ába laríñagun Agrípa lun Féstó.

—Lun jamúga mamúriajan lan wügüri le lun lagúseragüdüni Augústo César, gayáraati jamúga lígirawagüdüün.

27

Loúnajoún Páblo ubúrugun Róma

¹ Lidan le jaráanserunbei lun joúnajaníwa Itálioun, ába lederegerún Páblo jáma ja jíbiri adaürütiña lábu laríjin ában súdaara gíriti Júlio, ligía gumándanbei lun jadámurin súdaara le gíribei “lisúdaaranigu Urúei Augústo.” ² Ába wádinagun tídoun ában ugúnein ñübintu Adramítio gíñe lun Ásioun. Ñíñein gíñe Aristárco wáma, le Tesalónicana, Tesalónica ában ubúru luáni Macedónia. ³ Larúgan, ligía wachülürün Sidón, lidan fulásu ligía, buíti loúseruni Júlio, le gumándan, Páblo, ígira lumúti lun bisida lániña lumádagu lúma lun jeténirun lun.

⁴ Lidan wáfuridun Sidóngiñe, ába woúdin ünabugiñe libíti uboúju Chípre ladüga wabánrouñein lan garábali. ⁵ Ába wájiñuraguni barána ligíbugiñe lubéyaari Cilicia lúma Panfília, ába wachülürün lídoun fulásu le gíribei Míra, ában ubúru luáni Lícia.

⁶ Ñi ladárira gumándan ában ugúnein Alejandríana teíbuga Itália, ába ládinagüdüniwa lun wasígiruni waweíyasun.

⁷ Áfayajatiwa jámaru luágu sarágu wéyu, láu lénreengun wachülära ligíbugiñe ubúru le gíribei Gnido. Queíti wabánroun mémegili lubeí garábali, ába wáfayajan ünabugiñe libíti uboúju Créta, sügüína wagía ligíbugiñe Salmón, ⁸ wasígira láu méme lénreengun láru láru, ába wachülürün lídoun ában ubúru gíriti Buíti Fulásu, yaráfa lun ubúru Laséa.

⁹ Féridijadiwa sarágu dan, dénchajaliti áfayajani baránaja ladüga yaráfaali lidáani luríbouga, sügüjali jafédun juríu le lánina ferúdun figoú. Ligía lewéridirunbaliña Páblo, laríñaga joun.

10 —Aríja numúti luágu denchábei lan weíyasu le, áni weférideruboun ugúnein, férídime sun tíla, gayáraabei gíñe weférideruni wabágari.

11 Lubáragiñe ladügün gumándan gásu láu le laríñagunbei Pábilo, ába lídin láu le lubeíbei tabúreme ugúnein lúma le abúgajabe. 12 Queíti mabuídun lubeí fulásu ligía lun lásügürün luríba dan ñi, ába jarítagun jíbe-ágei luágu buídutima lán yebe lun wáfuridun ñígíñe, lun waríjin ánjein gayára wachülürün Feníce, ában fulásu láni uboúju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

13 Queíti lagúmeserun suédi jámaru, ába jarítagun luágu gayáraabei lan jasígiruni weíyasu, ábatí joudin, ába jasígirun láru láru Créta. 14 Máluti lueígiñe jáfayarun, ába láfurun ában nodísi jéreti, 15 ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanügüniwa. 16 Ába wásügürün ünabugiñe libíti ában liraüraü uboúju gíriti Cláuda, le ñí lubei mére lan láfujan garábali, ába wádinagüdünun tisálufun wagúne to atoújeina waboún, láu ában lénreengun. 17 Lárigiñe wiñúrunun ugúneirugun, ába lásügüragüdüníwa gúrudu tábugiñegiñe ugúnein lun jagüragunun, derébugu támuga. Queíti janúfudebei lueí joúdin adágara luágu sándala le gíribei Sírte, ába jagídaraguní bíra, ába jígiraguagüdün joúngua lun lanügüniwa garábali. 18 Larúgan, quei jére mémegili lubeí dan, ába jagúmeserun achágajei tíla ugúnein baránajoún, 19 luágu lürüwan wéyu, ába jachágajani lídaangiñe tumégegun ugúnein baránajoún láu jájabu guánarügü. 20 Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wafíñen luágu weséfuruba lan.

21 Queíti sügüjadiwa lubeí sarágu dan meíginga, ába laráramun Pábilo wádan, ába laríñagun.

—Wügúriña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dáñu le, áni féridi wameí wálagu. 22 Gagúraasun jumá, úabei ni ában jídaangiñe oúweti, láu sun teférideruba lan ugúnein. 23 Chülüjali ában láni Búngiu ánjeli númoun áriebu to, loúnagüle Búngiu le Nabúreme le gíñe únbei nesériwida, 24 laríñajare ánjeli ligía nun. “Manúfudedabá, Pábilo, ladüga barúfudaguba búngua ligíbugiñe urúei César Augústo, áni badügaba leséfuraña Búngiu sun ja tídaanbaña ugúnein búma lueí oúweni.” 25 Gagúraasun jumá lubeíti, ladüga jeménigitina luágu Búngiu, áni choúru numúti luágu ítara lúba lan quei laríñaguni ánjeli luágu nun, 26 láu sun, wadágaruba lan luágun ában uboúju.

²⁷ Bián dimáasu wáu luágu waweíyasun, lubáranarugúñadiwa Ádria, labánreinja mémeñadiwa garábali, ligía, amídi áriebu, ába jasándirun mádulungu luágu achüllüreina wáña lan luágun múa. ²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguoún mémeraü, gádürü-wein-dísi ugúdi. ²⁹ Léti janúfude lueí jabúguchun luágu dübü, ába jágurun gádürü oúnguru tiyúnagiñe ugúnein, ába jagúrabajan larúgadun láu idíjeri. ³⁰ Súnti dan le, añaja mádulungu asáminara lun jeséfuragun joúngua láu jeíbaagun tídaangiñe ugúnein, ába jagúmeserun aráriragüdoún salúfu dúnarugun, jadüga camá jágura oúnguru tígirigiñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdaara tugúrudun salúfu, ába jígiragüdünun dúnarugun.

³³ Lubá larúgan, ába laríñagun Páblo joun súngubei lun jeígin, laríñaga joun.

—Bián dimáasu guetó lueígiñe marúmugun jumá buídu, meígin sarágu, ladüga idíjeri le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanügün ában fein lújaburugu, ába líchugun eteíngiruni lun Búngiu jagíbugiñe súngubei. Ábati lagúbachagunun, ába leígin. ³⁶ Ába járugüdün ja jíbiri gurásu, ába gíñe jeígin. ³⁷ Bián-sáñadiwa ūrüwa-weindísi-sísi gúrígia tídan ugúnein. ³⁸ Dánti le joújáña quimúle, ába jáguruni türígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ñí jabeí mádulungu joun, ába jaríjin ában beídi gebéyaariti, ába joúchun lun janügünun ugúnein ñíjin. ⁴⁰ Ába jíbuguni lagürüga oúnguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüní lúgubu bíra, ába tagúmeserun ugúnein ayárafafójua lun láru béya. ⁴¹ Ába tídin lídoun ában fulásu le ñí lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun aboúchagua tiyúnagiñe, le lére lugúdi barána. ⁴² Ába yebe jabúseerun súdaara jáfaraguniña adaürütiña jilágubei lueí janúrajan áfulijeina. ⁴³ Ánjein le gumándan, quei busén lubei leséfuruni Páblo, mígirunti lun jadügüni súdaara le jarítagubei. Ábati laríñagun lun lan jachúbaragun ja gáfulijadíbaña baránajoun furúmiñe lun jachülürün múarugun, ⁴⁴ jáme jíbiri, joúdinme ligíbuagu buri

fuláansu lúma buri tífe ugúnein. Ítara líña jachülürün súngubei múarugun séfuñu.

28

Páblo luágú uboúju le gíribei Málta

¹ Dan le séfujadiwa sun wagía láru béya, ligía wasúbudiruni luágú Málta lan líribei uboúju ligía. ² Buítí joúseruniwa gürígia ja aganoúbaña ñi, ába jáfuragun ában oúnwenbun wátu quei diliğa lubeí áni niján júya ájuya, ába jamísurajaniwa sun wagía lun wabácharagun. ³ Ábatí labúdajan Páblo wátu mábeití, líchuguñein yebe wáturugun, ligía táfuridun ában jéwe tanúrajaña lueí lára wátu, ába tárügündün luágú lújabu, ába tágürüni. ⁴ Dan le jaríjinbarun lílana fulásu jéwe to dawágú luágú lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránagiñe, mabúseeruntí Búngiu lun labágaridun.

⁵ Ába láfuridunun Páblo jéwe wáturugun, masúseredunti ni cáta lun. ⁶ Agúrabatiñá yebe súngubei láludun lújabu, o láburujan lan oúwe. Lílüwagu jagúrabajan, dan le jaríjinbei luágú masúseredun lan ni cáta lun, ába lasáansirun jarítagun, ába jagúmeserun ariñaga luágú ában lan búngiu Páblo.

⁷ Yaráfa lun fulásu ligía, ñíñein lufúlasun ában wügüri le weírigutimaabei lídan sun uboúju ligía, Públío líribei, resíbi lumútiwa líbiñe, seríwi láwa buídu luágú ürüwa wéyu. ⁸ Roun liñáti lúguchi Públío láu sándi, abíruaü, lúma denési. Ába lídin Páblo aríjei, lásun layúmuragun lun Búngiu luágú, ába líchuguni lújabu luágú, ába lareídagun. ⁹ Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídagun. ¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachülürün dan lúnya wádinagun lun wasígiruni waweíyasun, ába jíchuguni sun le wemégeirubei woun lun waweíyasun.

Lachülürün Páblo ubúrugun Róma

¹¹ Lárigiñe ürüwa játi wáu luágú uboúju ligía, ába wádinagun tídoun ában ugúnein to eréderuboun ásügürei luríbouga ñi luágú uboúju ligía. Alejandríana ugúnein tugúya, ñíñanu jayáwa bián sándu luágú tigíbu ugúnein tugúya, Cástor lúma Pólux.

¹² Ába wachülürün ubúrugu Siracúsa, ába weréderun ürüwa wéyu ñi, ¹³ ñígiñe wasígira láru láru darí wachülürün ubúrugu Régio. Larúgan, ába láfujan suédi, luágú libíaman wéyu ába wachülürün lídoun liraüraü aüdü le gíribei Puteóli. ¹⁴ Ni wadárira átiri afíñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrugun Róma. ¹⁵ Agáambaña afíñetiña ja Rómabaña wawágu luágú awánte lan,

ába joúdin wabároun, jíbiri chülü lúmoun fulásu le góribei Fóro, le luágubei ūma góriti Ápio, jíbiri, dúnguatiña wáma lídan fulásu le góribei Ürüwa Jában Chüldügütiña. Dan le laríjinbaliña Páblo, ába líchugun eteíngiruni lun Búngiu, ába lárügündün gurásu.

¹⁶ Dan le wachüllerünbei Róma, ába ledéregeruniña gumándan adaürutiña lun jábuti oúnigirutiña, ánjeinti Páblo, ígira lumúti lun leréderun lábugua láu ában súdaara oúnigirei.

Lapúrichijan Páblo Róma

¹⁷ Ürüwa wéyu lárigiñe lachüllerün Páblo, ába loúnajan jawágu juríu weírigutiña ja Rómabaña, dan le adámuriguaaña, ába laríñagun joun.

—Nidújeñu, láu sun madügün nan ni cáta wuríbati joun juríu, ni lun le uágubei jéchuda binádu wagübürigu, derégawatina dáüwañu joun Rómana ubúruju Jerusalén. ¹⁸ Lárigiñe jálugüdagúnina, álugatiña yebe jígiragüdünina ladüga madári jamá nidúrun le lúnti náfarúniwa jilágubei lueígiñe, ¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásifun nun. ²⁰ Ligía lubeíti lébubei noúnajan juágu lun naríjinün lúma lun nadímurejan jun, ladüga lueígiñe cátei le uágubei weménigida wagía Israelítagu anája lubeí gürágu láu güríngüri le.

²¹ Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili góriñe ni ában wapaísanu jádaangíñe ja nübinbaña nígiñe aríñaguti wuríbati woun buágu. ²² Buséntiwa jamúga wagáambuni ca lan barítagubei, ladüga subúdi wamúti luágu adímurejoúa lan wuríba luágu iséri adámurini le, le lánina lémeri Jesúsu, lídan sun fulásu.

²³ Ábati jíridun ában wéyu lun, ába jachüllerün sarágu gürígia le ní lubei lagánawa Páblo. Ába ladímurejan joun lúmagiñe bináafin darí gúñoun luágu larúejian Búngiu. Loúchun lun lafíñeragüdünina luágu Jesúsu lan asálbaragüleibeí le jagúrabajabeí láu layúsuruni lilúrudun Moisés lúma le jabürüjabei profétagu. ²⁴ Jíbiri, afíñetiña luágu le laríñagubei Páblo, jíbiri mafíñetiña. ²⁵ Queíti múaradun jamá jámagua luágu jarítagun, ába jagúmeserun nüdüngua, ábati laríñagun Páblo joun.

—Ligía laríñagunbei Sífiri Sándu joun binádu wagübürigu lídaangíñe proféta Isaías.

²⁶ Beíba, baríñagame joun gürígia ja juríubaña.
Jugúya, jagáambuba ában ugánu sarágu dan, úabei gunfaráanda jumáni laníchigu dimürei le jagáambubei.

Jaríjuba sarágu cátei, meféenbadün luágu,

²⁷ ladüga deréeru janígi gürígia ja, áni wuríbati jagáambun,

darú jamuti jágu, lueí jaríjini laníchigu cátei le jaríjubei,
úati gíñe gunfaráanda jamáni cátei le jagáambubei,
derétu gíñe janígi,

máluajan jamútina lun nareídagaguagüdünun jawáni.

²⁸ Subúdi jumeí luágu oúnaja láali lan Búngiu ugánu luáguti
Jesúsu le méme Wasálbaragülebei joun ja mámabaña juríu, áni
jagía, jánjaruba lun.

²⁹ Dan le laríñagunbei Páblo ítara, ába joúdingua juríu,
adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajoútu,
resíbi lumútiña sun ja ñüdünbaña aríjei. ³¹ Apúrichijati luágu
larúeijan Búngiu láu furáangu, arúfudaja ligía luágu Wabúreme
Jesucristu, mebérezejanga ni ában lun.

LIGÁRADAN PÁBLO JOUN RÓMANA

Labürijan Páblo joun tílana ligílisi to Rómaboun

¹ Anája áu, Páblo, nabürüjañoun gárada to jun, jugúya lánigu Búngiu ja aganoúbaña ubúrugu Róma. Aban esériwiduti lun Jesucristu áu, anuadira lumútina Búngiu lun lánibadina lan apóstolu, ába loúnajanina lun nasúbudiragüduni ugánu luáguti Wasálbaragüle le aráanse láalibei jaba gürígia. ² Sabúdigüda lumúti Búngiu ugánu le lúmagiñé meja binárü jádaangiñé profétagu, bürüwati le jadímurejabei tídan Lerérung Búngiu. ³ Nübinti asálbaruni ligía woun lídaangiñé Wabúreme Jesucristu. Gürígia uboúaguna Jesucristu, Búngiu méme gíñe. Queisi gürígia, jádaangiñeti méja lufámlian Urúei Davíd Jesucristu, ⁴ arufudúati luágu Liraü lan Búngiu láu luweírin miláguru le ladügübei láu lásaaragüduni Jesucristu lídaangiñé oúweni. ⁵ Fuleísei lumútiwa Búngiu lídaangiñé Jesucristu lun loúnajaníwa lídan líri lun wasúbudiragüdün joun gürígia luágu queísi Wasálbaragüle lídan sun fulásu, gayára lámuga jafíñerun luágu, adüga jameíme le lubeíbei. ⁶ Anjúnjein jagánagua gürígia jagía, jugúya le únbei lagúara Búngiu lun lánigu jumá Jesucristu.

⁷ Nabürüjaña lubeíti jun, jugúya le aganoúbei ubúrugu Róma, ja jínsiñebaña lun Búngiu, wa ligía jun lun jabágaridun ában ibágari derégeguáñu júngua lun. Ibíja jumá abíniruni lúma darángilaü lúmagiñé Wáguchi Búngiu lúma lúmagiñé Wabúreme Jesucristu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírin neteíngiruni Nubúngiute lídaangiñé Jesucristu juágu, sun jugúya, lugúndun adímurejoúati luágu jafíñen luágu Jesucristu lídan sun fulásu. ⁹ Áni Búngiu, le únbei nesériwida táu sun nanígi apúrichijeí ugánu luáguti Liraü, geféenti luágu luweírin nayúmuragun juágu súnwandan lídan nayúmuragun lun. ¹⁰ Amúria jatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjinün lun níderagunün lídan jafíñen, lúntima derégüdagu jumá, ¹² lun gíñe wíchugun gurásu wádaangua láu afíñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeébugun lúma Búngiu, queísi naríjini jawáanserun jíbiri afíñetiñá lídan buri ámu fulásu. ¹⁴ Lúnti níderaguniña sun gürígia, dándu ja chülüguatiñá queísi

ja machülaaguntiña, dándu chu táu queísi ibídiouguá táu.
 15 Lueígiñe lubeíti noúbadina, buséntina gíñe lun napúrichijani ugánu luáguti Wasálbaragüle jun, jugúya le aganoúbei ubúrugu Róma.

Lubáfu ugánu lánina asálbaruni

16 Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja afíñebaña luágú, juríu furúmiñe, lárigiñe, ja mámabaña juríu. 17 Arúfuda lumúti ugánu ligía woun ída líña lan larícharaguagüduniña Búngiu gürígia ligíbugiñe, lun gayáraabei lan lerésibiruniña queísi lánigu. luwúyeri igáburi ligía, láurügü lafiñerúniwa luágú, libijúa. Ítara líña taríñaguni Lerérerun Búngiu. “Le gürígia le richáguabei ligíbugiñe Búngiu láu lafiñerun luágú, libíjubei ibágari magúmuchaditi.”

Jadúnrun gürígia ligíbugiñe Búngiu

18 Aríja wamúti láburujan lanárimé ligáñi Búngiu siélugiñe jawágun sun gürígia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban. 19 Subúdi jamúti le gayáraabei lasúbudirúniwa luágú Búngiu buídu buídu lugúndun ligía guánarügü arúfuda láali joun, 20 le marijínbei luágú Búngiu, gayáraati lasúbudirúniwa láu buri cátei le ladügübei. Arijúaali furáangu lúmagiñe lagúmeserun uboú luágú Búngiu lan ligía, luágú gíñe Súnti Gabáfu lan ligía lun súnwandan. Gadúnrunjaña lubeíti luágú jaríban, 21 lugúndun láu sun subúdi jamáni Búngiu ítara, míchugugiña inébesei lun queísi Búngiu, meteíngirun jameí. Queísi libídiouniga láu ligáburi jarítagun luágú Búngiu, féridi jamúti murúsun larúgounga luágú Búngiu lé meja jabíjibe. 22 Láu sun aríñaga jamá luágú chu lan jáu, ibídiouguati jáu, 23 lubáragiñe jájuduragun lun Búngiu le weírigubei, le moúwedadibei, jájuduraguarüga joun jayáwa gürígia ja goúwedaditína, lúma gíñe joun jayáwa dunúru, jówe jáma anímaalu ja gádürürgua tugúdi.

24 Ligía ígira láña lubeí Búngiu láu luríban ayúmajani le gádaanbaliña, darí lún buri jadügün cátei buri nibúsigarídünati jámagua. 25 Ítara líña ligáburi jabágaridun lugúndun mafíñerun jamá luágú inárüni luáguti Búngiu, jafíñera luágú iyéeni, jájuduragua láu inébesei lún buri cátei le ladügübei Búngiu lubáragiñe jamúga jájuduragun lun Búngiu, le gadünabeí inébesei súnwandan. Ítaralá.

26 Ligía ígira láña lubeí Búngiu lun jadáagun cátei nibúsigarídünati, ásta würíña adáagutiña cátei jáma würíña jáledi lubáragiñe jamúga jagámaridun wügüri queísi lubúdubu.
 27 Ítara méme gíñe ígira jamáali wügüriña jayúsurun würíña

lun jayúsurgan joúngua. Adáaguatiña wügüriña cátei buri nibúsigarídünati jámagua, ábatí jasúfuriruni lafáyeiruaja jawíye jawoúguia.

²⁸ Queísiti mabúseerúnjaña lan jíchuguni lilúgaarun Búngiu lun, ígira láañati láu lagübüri jasáminan, lun jadügüni le moún lubei jadügüni. ²⁹ Buin jáña láu sun luwúyeri maríchaü, salúfuri, wuríbani, meménijabuni, iyéreejabúni, gimúgaü, áfarajadi, lanígiwa wuríbu, ayéeraguní, ibíbuni, marásualugu. ³⁰ Adímurejatiña wuríba jawágú jíbiri gürígia, iyéreegutí Búngiu joun, minébenejabutiña, barüguatiña joúngua, pántatiña. Gachügütiña lun jaságarun iséri buri cátei wuríbati, mabájüdün jamútiña jagübürigu, ³¹ ibídiouguati jáu, magúnculirun jamúti jerérun, mínsiñejabutiña ni ca un, úati ferúduna jamá, magúdemejaabutiña. ³² Subúdi jamúti le laríñagubei Búngiu buídu buídu, subúdi jamúti luágu ja lan adügütí buri cátei le, lúnti lan joúnwen lueígiñe. Láu sun líra, adüga méme jamúti, dari lun gúnda jamá dan l jasáminan, lun jadügüni lee jaríjin ámu gürígia adügei.

2

Agúseragüdáti Búngiu láu inárüni

¹ Ligía gadúnrun lubeí le adímurejabei luágu le ladügübei ámu, cáteiñein lan, lugúndun dan le ladímurejan luágu wuríbani le ladügübei ámu, líchuguña guánarügü dúru luoúguia, lugúndun líbe méme gíñe cátei wuríbati ligía ladügübei. ² Subúdi wamúti luágu láu lan inárüni lagúseragüda Búngiu dan le lasíadiruniña ja adügúbalin buri cátei l jasáminan, lun jadügüni lee. ³ Bugúyati le adímurejabei jawágú ja adügúbalin buri cátei wuríbati le, áni ligía méme gíñe badügübei, ¿jarítaguatibu funági luágu beséfuruba lan lueí ligáñi Búngiu? ⁴ ¿Odi mebérresentibú láu lareíni Búngiu le magúmuchadibei lúma lugúraasun, ibídiñouna bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun afígounja? ⁵ Derétu banígi, májatibu basáansiruni bigáburi. Ligía abúnja lubeí agánwoundagüda lafáyeija bifígoun lubáme luwéyuri lagúseragüdün Búngiu dánme liábin lun líchuguni lisíadin le richábei, ⁶ dánme le lafáyeiruni cáda ában según le ladügübei. ⁷ Líchuguba ibágari magúmuchaditi joun ja áluajabalín uweíriguni, inébesei, lúma cátei lé buri magúmuchaditi yágüta siélu láu jadügüni le buídubei súnwandan ya uboúagu. ⁸ Anjaña sun gürígia ja magáambadibaña lun Búngiu, ja májababaña lun jafálaruni linárün Búngiu, jafálarei wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adügúbalin le wuríbabei,

joun juríu furúmiñe, lúma gíñe joun ja mámabaña juríu. ¹⁰ Ánjeinti joun sun ja adügübalin le buídubei, líchuguba Búngiu uweíriguni, inébesei, lúma darángilaü, juríu furúmiñe, lúma gíñe joun ja mámabaña juríu. ¹¹ Lugúndun ában lan lanügüniña Búngiu sun gürígia. ¹² sun ja afígounjabaña masúbudirunga jameí lilúrudun Búngiu le ledéregerubei joun gürígia lídaangiñe Moisés, jagúserawagüdüba boúgudin lueí lúrudu ligía, tídiba jawáni máfiougatin. Játí afígounjabaña láu sun subúdi jamáni lilúrudun Búngiu, jagúserawagüdüba láu lúrudu ligía, tídiba gíñe jawáni máfiougatin. ¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin. ¹⁴ Játí mámabaña juríu, ja ibídiñejabubaña lun lilúrudun Búngiu, gayáraagili jadügüni le lubeíbei Búngiu láurügü laríñagun jarítagun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürüñu tídan janígi, arúfuda tumúti janígi líra, áni laríñagubei jarítagun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucristu, larítaguba luágu sún buri cátei le, ladüga lagúseragüdübei gíñe ásta cátei lé buri arámudagüabei tídan wanígi. Ítara lúba según ugánu luáguti asálbaruni le napúrichijabeí.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüni Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. ¹⁹ Jarítaguatibu búngua luágu gayára lan badúndejan maríjintiña lídoun üma buítí lúma luágu gayára lan bíchugun larúgounga joun ja eíbugubaña lídan lubúriga. ²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni üma joun ja isériginabaña lídan jafíñen, queísi barítagun luágu ibíja báani sun subúdi lúma inárüni lídan lilúrudun Moisés. ²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja? ²² Ánjein aríñaga bubeí luágu moún lumuti lan jagámaridúniwa jámari gürígia maríeitiña, ¿cámegi badügei? Ánjein iyéreegu lubeí cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísin jalígilisin? ²³ Pántatibu láu lilúrudun Búngiu, ába bíchugun minébesei lun Búngiu láu magúnfulirun báani. ²⁴ Tinárün Lerérung Búngiu dan le taríñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adüga jumúti juguya juriu igáburi le circuncisión lé meja liseíni lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manügünti circuncisión ni cáta jun, queígubeirügü madügüniwa lan. ²⁶ Gürígia ja mámabaña juriu, ánjein jadüga buri cátei le lubeíbei lilúrudun Búngiu, janügüba queísi lánigu Búngiu láu sun merésibirun jamáni circuncisión. ²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, juguya le resíbi jumálibei circuncisión, ja magúnfulirunbalin Lerérun Búngiu, láu sun jun lan labürüdüwa. ²⁸ Le juríubei le tímatimaati, máma boúgudigiñerügü libiti juriu lan, máma gíñe láurügü wadügün cátei le boúguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítagun gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juriu jamá? ¿o cági lubuíduña lerésibirúniwa circuncisión? ² Sarágu, áni gíbeti gíñe lóbuna. Furúmiñeti cátei, rúlumuti Búngiu lerérun joun juriu. ³ Ánjaña ñi jádaangiñe juriu, müúraantiña lúma Búngiu, ¿magúnfulirunbei funági Búngiu láu lerérun ladüga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia uboúagu. Taríñajare Lerérun Búngiu.

Babájüduba queísi richáti lídan le baríñagubei, áni buídubei báfurdun dánme le bagúserawagüdün.

⁵ Ábanya álüğüdajani. ánjein seríwi lubeí luríban wagáburi lun larúfuduni luágu richágu lan Búngiu, ¿cábagi waríñaga? ¿Maríchati funági Búngiu lugúndun larúfuduni ligáni luágu luríban wagáburi? (Nadímurejañatia queísi gürígia.) ⁶ ¡Máma líña! Lugúndun lun jamúga müúran lan Búngiu, ¿ída líña jamúgagi lagúseragüduniña gürígia?

⁷ Ánjein gíñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá? ⁸ ¿Lúnti lubeí jamúga ladügün wuríbani lun larijoúniwa le buídubei? Niján cátei le jariñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasádirúniwa.

Sun wagía gadúnruntiwa ligíbugiñe Búngiu

9 ¿Ída liñági? ¿Buítimaatiwa wagía juríu sügü jáu gürígia ja mámabaña juríu? ¡Uá! Lugúndun arúfuda wamáali luágu dández lan juríu queísi máma juríu lábugiñeñanu lubáfu figoú. 10 Tariñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrugi,

11 úati ni ában ánjaruti lun gunfaráanda lan,
úati ni ában áluajati Búngiu.

12 Yuríguaaña súngubei, ñüdünjaña lídoun féridi.

Úati ni ában adügütí le buídubei, ni íbini ában.

13 Eyéeraguatiña láu jayúma,
júnren líña jayúma lun jadímurejan lagübüri dimúrei le
mínsiñeguti

queísi limínsiñegun líjeme umúajaü júnren lárigiñe líchugúniwa
jiláali ñíjin.

Yúsú jamúti jayúma lun jagádeirun jíri gürígia furése queísi
láfarajan lupeísini jéwe.

14 Anábajani rügüñein jadímurejan lau jeyéreejabu.

15 Furéseti jagúdi lun joúdin áfaraja.

16 Barüti jagáburi güríguau lúma igárigu,

17 áni ibídiñeti üma lánina darángilaü joun.

18 Marítagungubeítiña luágu lanúfudewa lueí Búngiu.

19 Subúdi wamúti luágu sun lan le laríñagubei binádu
lilúrudun Búngiu, joun lan ja lábugiñebeña lúrudu ligía laríñagei,
sun jasúbudiruni gürígia jagía luágu gafígoun jamá. Ítara líña
lubeíti, gadúnrun jamá sun gürígia ligíbugiñe Búngiu, dández
juríu queísi ja mámabaña juríu. 20 Lugúndun úabei ni ában
eréderuti richágu ligíbugiñe Búngiu lueígiñerügi ladügünü le
lubeíbei lúrudu, lúnrugi lasúbudiragüdüni lúrudu woun luágu
gafígoun wamá lesériwida.

Lídaangiñe afíñeni liábin asálbaruni

21 Guetóti arúfuda láali Búngiu woun ída lúba lan ligáburi
gayára lan weréderun richáguañu ligíbugiñe boúgudin lueí
lúrudu lé meja líchugubei lídaangiñe Moisés. Gayáraati
wasúbudiruni líra láu walíjanun lilíburuna to meme lilúrudun
Moisés, túma jalíburun profétagu. 22 Láu wafíñerun luágu
Crístu, gayára lan weréderun richáguañu ligíbugiñe Búngiu, áni
ában lan ladügünü Búngiu líra joun sun gürígia, 23 lugúndun
afígounjaña sun gürígia áni siñáti lagúndaarun Búngiu jáu.
24 Láu lareíni Búngiu, resíbi lumútiña sun gürígia queísi
lánigu, mafáyeijaanga jagía luágu, lugúndun fáyeijali Crístu luágu
wafígoun lun gayáraabei lan weréderun richáguañu ligíbugiñe
Búngiu. 25 Adügati Búngiu lun lénbunabei lan ferúdun Crístu láu
loúnwen luágu wafígoun, áni lídaangiñe wafíñerun luágu queísi

Wasálbaragüle liábin ferúdun woun. Láu loúnwen Crístu queísi afáyeiragülei luágu figoú, ába larúfuduni Búngiu luágu úaragua lan áni iyéreeguti figoú lun. Ába lachíbuni líta Crístu jafígoun gürígia já meja aganoúbaña lídan dan le sügújalibe, le uágubei mafáyeijagüdün láaňabaña lan,²⁶ chibá lumuti gíñe jafígoun ja aganoúbaña lídan buri dan le, lun larúfuduni luágu úaragua lan, áni sun ja afíñebaña luágu Jesucristu queísi Jasálbaragüle barü lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan gürígia luágu lubuídun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídun wagúñfulirun lúma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafíñerun luágu Crístu, gumúguia lóbuna wanáangun woúngua. ²⁸ Subúdi wamáali lubeíti buídu luágu resíbi láani Búngiu gürígia le afíñeti luágu Crístu queísi gürígia richáguati, mebérresegúnga ánjein gúnfulijali lubeí lúma lilúrudun Moisés lúmoun magúñfulirungili lan.

²⁹ ¿Juríu rügüñanu funági Gabúngiutei Búngiu? ¿Ma funági gíñe Jabúngiute ja mámabaña juríu? Jabúngiute gíñe, ³⁰ lugúndun ában rügüñein Búngiu, le erésibirubaliña sun gürígia ja afíñebaña luágu Jesucristu queísi Jasálbaragüle, mebérresenga ligía ánjein resíbi jabálin circuncisión lúmoun merésibirun jamáni. ³¹ ¿Wayúsuruñein lubeíti afíñeni luágu Crístu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábatí waríñaga luágu Abrahám, le binádu wáguchi, wagía juríu? ² Lun jamúga lueígiñe lan ladügün cátei buíti lerésibirei Búngiu queísi ában gürígia richáguati, gébunati jamúga lapántajan, máma ligíbugiñe Búngiu. ³ Taríñajare Lerérun Búngiu. “Afíñetí meja Abrahám luágu Búngiu, luágu lafíñen lerésibirei queísi wügüri richáguati.” ⁴ Dan le ladügün gürígia ában wadágimanu, fáyeiti le libíjubei lebégi luwádigimari, máma edéweejani. ⁵ Ánjeinti gürígia le asálbaruti lídaangiñe lifígoun láurügü lafíñerun luágu Búngiu le erésibirubaliña gafígountiña, lerésibirubei Búngiu queísi ában gürígia richáguati luágu lafíñen, anáti líra, edéweejani. ⁶ Davíd guánarügü adímurejati luágu jagúndan gürígia ja lerésibirubaña Búngiu queísi richáguatiña luágurügü jafiñen, mebérresenga ligía ca lán meja jadügübei. ⁷ Laríñajare Davíd.

Gúndaatiña gürígia ja ferúduna lubáña Búngiu jaríban, áni chibáwa ligía jafígoun.

8 Gúndaati gürígia le lanügübei Búngiu queísi gürígia mafígounjaangili.

9 ¿Joúnti rügüñein funásan ja erésibirubalin circuncisión, ódi joúnti gíñe ja merésibirunbalin? Joúnti sun jawúyeri gürígia ugúndani ligía. Aríñagaadiwa luágu resíbi láani Búngiu Abrahám queísi wügüri richáguati, luágu lafíñen. 10 ¿Ída bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe, lubáragiñe. 11 Lárigiñe larúfuduni Abrahám lafíñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügüri richáguati ladüga lafíñen luágu. Ítara líña gíñe liábin Abrahám lun jáguchibei lan sun ja afíñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña. 12 Jáguchi gíñe ja resíbi jamáalibei circuncisión Abrahám, ja afíñebaña luágu Búngiu queísi lafíñerun Abrahám lúmagiñe lubáragiñé meja lerésibiruni circuncisión.

Gúnfultiti Búngiu láu lerérur

13 Aríñagatí meja Búngiu lun Abrahám luágu líchugubei lan uboú lun jáu sun linébaanfaangu queísi jalágaante, máma ladüga lagúñfuliruni Abrahám lilúrudun Búngiu líchugúa dimúrei le lun, ladüga lafíñerun luágu Búngiu, ába lerésibiruni Búngiu queísi ában wügüri richáguati. 14 Lun jamúga já rügüñanu lan íchugubalin jeménigi luágu jagúñfulirun líuma lilúrudun Búngiu erésibira alágan, málati lubeíti jamúga jafíñerun ja eménigidubaña luágu jafíñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan linárün cátei, mabáfutiña gürígia lun jagúñfulirun líuma lilúrudun, 15 barürügü lumúti lilúrudun Búngiu ligáñi jawágun gürígia luágu magúñfulirun jamáni. Ánjein le ñí lumuti úa lan lúrudu, úati gíñe díru luágu ladüraawagún.

16 Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti afíñeni. Mámarügü joúnti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, joúnti gíñe sun ja mámabaña juríu áni máma gíñe lábugiñeanu lúrudu ligía, ába jafíñerun luágu Búngiu queísi lafíñerun Abrahám luágu. 17 Ligíbugiñe Búngiu, ñübinti lubeíti Abrahám lun wáguchibei lan sun wagía le afíñebeti luágu Búngiu, queísi taríñagun Lerérur Búngiu. “Adüga náadibu lun jáguchi ban sarágu mútu.” Gabáfuti Búngiu lun ladügüni líra

queísi gabáfu lan lun líchugun ibágari joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaü lan ladüga weíyaali lan, weíya tugúya Sára, afíñeti dán meja le laríñagubei Búngiu lun luágu ítara lúba lan jíbe ladügawagun queísi warúguma. ¹⁹ Meféridirun lumúti lafíñen luágu dimürei le laríñagubei Búngiu lun, láu sún meja yaráfaali lan lun lagúñfulirun san irúmu, áni weíyaaru gíñe Sára lun tagáraüdün. ²⁰ Maloúguadunti lafíñen luágu dimürei le laríñagubei Búngiu lun, weíritimáarügti lafíñen. ²¹ Rúti uweíriguni lun Búngiu láu ában ichoúruni le tímatimaati luágu gabáfu lan Búngiu lun ladügüni sun le uágubei laríñaga. ²² Ligía lerésibirunbalin Búngiu queísi wügüri richáguati, luágu lafíñen.

²³ Cátei le, luáguti lerésibiruniña Búngiu gürígia luágu jafíñen, máamarügü luágu Abrahám labürüjoúa, ²⁴ labürüjoúña gíñe wawágu. Lugúndun luágu wafíñen, resíbi lumútiwa gíñe Búngiu queísi richáguatiña, wagía le afíñebi luágu le ásaaragüdúbalin Wabúreme Jesúsu lídaangiñe oúweni. ²⁵ Jesúsu le edéregerúabei lun loúnwen luágu wafígoun, ába lásaarun lídaangiñe oúweni lun larúfuduníwa richáguañu ligíbugiñe Búngiu.

5

Niján lóbubei weréderun madúnruna

¹ Queísiti resíbi láadiwa lubeí Búngiu láu wafíñerun luágu, lídaanjadiwa dan lúma, lídaangiñe Wabúreme Jesucristu.

² Ladüga Crístu, biníwadiwa lubeí láu wafíñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírigun Búngiu.

³ Áni máma rügüñein líra, gúndaatiwa gíñe lídan wasúfurirun ya uboúagu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburi, áni láu líra, gayára lan weménigidun lun gafánraanbadiwa lan lídan luweírigun Búngiu yágüta siélu. ⁵ Áni máburujanbei warüna lurúma eménigini le, ladügübei Búngiu le aríñaga láalibei woun ladüga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalíbei woun.

⁶ Ladüga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figoú le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei. ⁷ Máma cátei ménreengunti lun loúnwen ában gürígia jawágu ámu gürígia, ni íbini lueígiñe ában gürígia le buídubei, láu sun níjein lan gürígia gayáraati jamúga loúnwen lueígiñe ában gürígia le buíti le

tímatimaati. ⁸ Ánjein Búngiu, ába larúfuduni luweírin línsiñejabu woun láu loúnajani Jesucristu le Liraü lun loúnwen wawágu, láu sún meja gafígoungidiwa lan. ⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei láburujan jawágun gafígoountiña lídaanme luwéyuri agúseruni. ¹⁰ Lugúndun ánjein ru lubáliwa Búngiu lídan dan lúmagua láu loúnwen Liraü dán meja le láganigídiwa, choúrutimaati luágu lasálbarubadiwa lan le gumúti, luágu Liraü le wínwañubei lúma, siélu. ¹¹ Áni máma rügúññein cátei le, gúndaatiwa gíñe lúma Búngiu lídoun buri dan le, lídaangiñe Wabúreme Jesucristu, le ídaangiñebi lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrugi wügüri le gíribei Adán lebélura figoú uboúagun, ába lanügüni figoú oúweni lúmagua queísi lafáyeija, ítara líñá gíñe joúweguba lubeí sun gürígia lugúndun afígounjatiña súngubei. ¹³ Lubáragiñé meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígoンjaña uboúagu, láu sun úagili lan lúrudu ligia lun gayáraabei lan jadüraaguni. ¹⁴ Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígooun láu sun máma lan ladüga magáambadi jamá jafígoounbei queísi ladügüni Adán le magáambadibei lun lerérunt Búngiu lun. Lueígiñe ában oúbaü, Adán liyáwa Crístu le lúnbei liábin, ladüga biángubei jagía barütiña som cátei joun gürígia.

¹⁵ ¡Ámuñgueinarugi gíñe cátei le janügübei joun gürígia! Barüti Adán oúweni joun sun gürígia láu lafígounján, ánjeinti Crístu, barüti asálbaruni joun sun gürígia, áni weíriti asálbaruni le líchugubei Búngiu láu lareíni woun lídaangiñe Crístu sügü láu lifígooun Adán. ¹⁶ Weíriti gíñe le líchugubei asálbaruni sügü láu le líchugubei lifígooun Adán woun. Ladügarugi ában figoú, chülüti oúweni joun sun gürígia, ánjeinti ladüga loúnwen Crístu wawágu, ferúdunawati sun wafígooun le gíbebei, resíbi lumútiwa Búngiu queísi gürígia richáguatiña. ¹⁷ Ánjein gabáfu lubeí oúweni jawágu sun gürígia ladüga lidúnrun ábanrugi wügüri—Adán, choúrutimaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei ibágari magúmuchaditi lúma Búngiu, jarúeijaba úara lúma Crístu, ladüga ábanrugi wügüri ligia.

¹⁸ Ítara queísi líchuguniña Adán sun gürígia lábugiñe lisíadin Búngiu lun joúnwen láu ladügüni le áubei magúndan lan, ítara líñá gíñe lagídaruniña Crístu gürígia lábugiñegiñe asíadiruni ligia, rúleí ibágari magúmuchaditi joun láu ladügüni lugúndan Búngiu

lun loúnwen jawágu. ¹⁹ Ladüga lubeíti lumágaambadi ábanrügü wügüri, ñübintiña sun gürígia lun jafígounjaba lan, ítara méme gíñe, ladüga lagáambadi ábanrügü wügüri, gayáraati jayábin sun gürígia lun richágu jamá ligibugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoúbei. Láu sun gíbe lan figoú uboúagu, weíritimaabei lareíni Búngiu lun lachíbuni sun figoú ligía. ²¹ Ítarati queísi gabáfu lán meja figoú lun lanügüni oúweni, ítara gíñe gabáfuti lareíni Búngiu lun ladügüniña gürígia richágu ligibugiñe, lúma lun líchugun ibágari magúmuchaditi joun lídaangiñe Wabúreme Jesucristu.

6

Jiláñu wáña lun figoú, wínwañu lun wesériwidun lun Crístu

¹ ¿Cábatí waríñaga? ¿Wasígiruba afígounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figoú, ¿ída lubáti gayára lan wasígirun afígounja? ³ ¿Íbídiñeti jun luágu láu lan lídan wamá ában lúma Crístu láu wabásterun, queísigubeirügü jamúga lídañadiwa lan gíñe ában lúma lídan loúnwen, lun mabáfujali lánme figoú wawágu? ⁴ Láu wabásterun, queísigubeirügü jamúga bunáwa wamá úara lúma Crístu, áni reídeitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe oúweni láu luweírin lubáfu, sarágüda láadiwa gíñe lun isérijali lan wabágari.

⁵ Lugúndun ánjein ñübin wabeí lun lídaanbadiwa lan ában lúma Crístu lídan ában oúweni líbe loúnwen, ítara wába gíñe lídan lásaarun lídaangiñe oúweni. ⁶ Subúdi wamúti luágu dáwagua lan binádu meja wagáburi lúma Crístu luágu gurúwa lun lagünrinchawagún lubáfu figoú lé meja wawágubei, lun merédediwa lan queísi idámuni esériwida lun figoú queísi wayúbudiri. ⁷ Lugúndun le jilálibei, furíjali lídaangiñe figoú. ⁸ Ánjein jiláadiwa lubeí lúma Crístu, gayáraati wafíñerun luágu wabágariduba lan gíñe lúma, ⁹ lugúndun subúdi wamúti luágu sará lan Crístu ában weíyaasu lídaangiñe oúweni, moúnwendügüyaali, mabáfujali oúweni luágu. ¹⁰ Dan le loúnwenbei Crístu, ába lagúmuchaguagüdüni lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei. ¹¹ Jugúa gíñe, rúguá jumá júngua queísi jiláguaaña lun figoú, áni wínwañu lun jesériwidun lun Búngiu, lídan ában lúma Crístu Jesúsu le Wabúreme.

¹² Ligía, mígira jumá lubeí lun gabáfu méme lan figoú juágu, afósuraün lun jadügüni luríban jayúmajan. ¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi

gürígia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadügüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeíti wabágardun lídan figoú ladüga líra? ¡Siñátil! ¹⁶ ¿Ibídiñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui níñia lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le jagáambubei, táo sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwýyeri figoú, guetó lúnti jiábin lun lidámun jumá buri cátei le buídubei, lun jabágaridun ában ibágari derégeguáñu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebérerseguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanügübeí buri cátei ligía jun le áubei buri nibúsigari jumá guetó? Ni cáta buíti, féridi rügüñein lanüga jun. ²² Ánjeinti guetó, mámaadün lábugiñe lugúmadin figoú, lidámujadün Búngiu, barütiti cátei le arúmani tun janígi lúma ibágari magúmuchaditi jun. ²³ Lugúndun oúweni lafáyeijabei figoú, ánjeinti edéweejani le líchugubei Búngiu woun, ibágari le magúmuchaditi ladüga lídaañadiwa lan ában lúma Wabúreme Jesucristu.

7

Ában jémpulu lídaangiñeti maríei

¹ Nidújeňu, jugúa le subúdijabúbei lun lúrudu, subúdi jumáali luágu dán rügüñein lan wínwangili ában gürígia, ligía lábugiñeñein lan lúrudu. ² Quei jamúga, ában würi to maríeitu, rúlumutu lúrudu lábun lagúmadijan túmari sun dan le wínwangili lan, ánjein oúwe túmari, boúgudijaru lueí lúrudu le íchugubarun lábugiñe lagúmadijan túmari. ³ Ánjoun lubeíti agánawa lúma ámu wügüri sun wínwangili lan túmari, tadügüña figoú le gíribei adultériu, ánjein oúwe túmari, gidáaru lábugiñiegíñe lúrudu ligía, áni gayáraati tamárieidun lúma ámu wügüri, madügüntu adultériu.

⁴ Ítara giñe jugúya, nidújeñu, láu loúnwen Crístu, furíjadün lábugiñegiñe lagúmadijan lilúrudun Moisés queísi würi to jiláali túmari, ába tagámaridun ámu. Guetó, lánijadün Crístu, le saráalibeí lídaangiñe oúweni, lun gayáraabei lan jesériwidun lun Búngiu le gumúti. ⁵ Lubáragiñe meja werésibiruni Crístu, seríwiti meja lilúrudun Moisés lun lagáguduni luríban ayúmajaní wádan, áni ligía cátei le anügübalwa lídoun oúweni. ⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táo sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le bürúwabeí.

Igáburi lánina figoú le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdúbalin figoú nun. Ibídiñeti jamúga nun luágu figoú lan lawámadirun jamégen ámu ánjein jamúga maríñagunti lúrudu. “Mawámadirabeí jamégen ámu.” ⁸ Ladüga méme gumádi le, ába lagáguduni igáburi lánina figoú le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figoú. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítagun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaaÑadina lan üma lun féridi. ¹⁰ Ítara líña, lúrudu le jamúga lúnbei yebe líchugun ában ibágarí buíti nun, arúfudarügü lumúti nidúnrun lúma lafáyeiruaja. ¹¹ Lugúndun lárügündün igáburi lánina figoú le nídaanbei lueígiñe lúrudu ligía, ába leyéeragunina lun nadügüní le wuríbabei, ába lanügünina lídoun féridi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti. ¹³ ¿Ligía funásan cátei buíti le anügübalina lídoun féridi? ¡Máma líña! Nifígoun anügübalin neféridirun nun, áni ítara líña larúfuduni luágu figoú lan, láu cátei le buídubei, le méme lúrudubei, lanügana igáburi lánina figoú le nídaanbei lídoun féridi, áni ítara líña larúfuduni lilúrudun Búngiu luágu wuríba lan figoú le tímatimaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügúri garaüwarügüti, alúgurúañu níña queísi idámuni lun lubáfu figoú. ¹⁵ Úati gunfaráanda náani ca lan susérebei nun, madügün numúti cátei buiti le nabúseerubei nadügün, nadügei cátei le iyéreegubei nun. ¹⁶ Ánjein le lubeí mabúseerun nubeí nadügün ligía nadüga, úaraguati nisáminan lúma lilúrudun Búngiu luágu cátei

le buídubei, áni láu líra, arúfuda numúti luágu barünaani lúrudu quei cátei buíti. ¹⁷ Mámaadina lubeíti áu adügübalin cátei wuríbati le nadügübei, igáburi lánina figoú le nídaanbei, ligía adügübalin. ¹⁸ Subúdi numúti luágu úa lan ni cáta buíti nídan boúgudin lueí Búngiu, áu queísi wügüri garaüwarügüti. Buséntina jamúga nadügüni le buídubei, siñáti nadügüni. ¹⁹ Madügün numúti cátei buíti le nabúseerubei nadügün, nasígirarüga adügei wuríbati le mabúseerun nubeí nadügün. ²⁰ Ánjein lubeíti le lubeí cátei le mabúseerun nubeí nadügün ligía nadüga, lídan linárün cátei, máma áu le láni Búngiu adügübalin, igáburi lánina figoú le nídaangilibe, ligía adügübalin.

²¹ Niján cátei le asúseredubei nun. dan le busén nan nadügüni le buídubei, wuríbati rügüñein nadárira nídan. ²² Lídan nisáminan, jínsiñeti lilúrudun Búngiu nun, ²³ áni aríjatina luágu níjein lan cátei nídan, ageíndaguti lúma nisáminan, cátei ligía, igáburi lánina figoú le nídaanbei, le gámabalina adaürüwañu.

²⁴ ¡Fugiábu áu! ¿Cába eséfurana lídaangiñe igáburi lánina figoú le nídaanbei, le anügübalina lídoun oúweni? ²⁵ Búngiu gubeírígü, lídaangiñe Wabúreme Jesucristu. ¡Teínqui níña lun Búngiu! Gunfaráanda numúti lubeíti luágu áu lan láu náni núngua, úouga lubáfu Crístu nuágu, buséntina jamúga nagúncirun lúma lilúrudun Búngiu, siñá numuti ladüga igáburi lánina figoú le nídaanbei, seríwirügütina lun figoú queísi lidámun.

8

Wabágarí lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesúsu. ² Rúlaali Crístu láni Espíritu woun, áni Espíritu ligía, rúti iséri ibágari woun, furígüda láadiwa lábugiñegiñe lubáfu figoú le anügübalwa lídoun oúweni. ³ Mabáfuti meja lilúrudun Búngiu lun lagídaruníwa lábugiñegiñe lubáfu figoú ladüga turíban wanígi, wagía gürígia garaüwarügütina. Ába ladügüni Búngiu le lásiñerubei lilúrudun adüga láu loúnajani Liraü uboúagun queísi gürígia garaüwarügüti le gíñe gayáraati lafígonjan (láu sun, mafígonjan lan). Ába loúnwen Liraü Búngiu, le Jesucristubei, luágu wafígon, ába lagúmuchaguagüdüni lubáfu figoú wawágu láu loúnwen. ⁴ Ladügünbalin Búngiu líra, lun gayáraabei lan wadügüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sífiri Sándu.

⁵ Ja abágaridubaña queísi jagúndan queísi gürígia garaüwarügütina, luágu rügüñein cátei le lánina uboú jarítagua, ányaña ja abágaridubaña queísi lugúndan Sífiri Sándu, luágu cátei

le lánina siélu jarítagua. ⁶ Dan le jabágaridun gürígia queísi jagúndan, marítagunga jagía luágú Búngiu, barü lumútiña lídoun oúweni, áanjeinti dan le jabágaridun queísi lugúndan Sífiri Sándu, barü lumútiña lídoun ibágari tímatimaati lúma darángilaü. ⁷ Ja arítagubaña luágú cátei le lánina uboú le, láganiñu Búngiu lugúndun mája jáña, áni siñá ligía jíchaagun joúngua lábun lilúrudun. ⁸ Ligía, ja lubeí abágaridubaña láu jagúndan queísi gürígia garaüwarügütiña, siñáti jadügünü lugúndan Búngiu.

⁹ Áanjeinti jugúya, mabágaridunjadün lídan jugúndan queísi gürígia garaüwarügütiña, jabágariduña lídan ában lúma láni Búngiu Espíritu, queísi aganoúa lubeí jídan. Le úabei láni Crístu Espíritu lúma, máma lánigu Crístu. ¹⁰ Áanjein wínwan lubeí láni Crístu Espíritu jídan, wínwanboun juwáni lun sun dan ladüga tarúfudúniwa richáguañu ligibugiñe Búngiu, láu sun loúweba lan júgubu ladüga figoú le lídaanbei uboú le. ¹¹ Áanjein wínwan lubeí láni Espíritu jídan, Búngiu méme le ásaaragüdübalin Jesucrístu lídaangiñe oúweni, líchuguba ibágari iséri lun júgubu le goúwedadibeí, lídaangiñe láni Espíritu le jídaanbei.

¹² Ítara líña lubeíti, nidújeñu, lúnti wagúncularun lúma Sífiri Sándu le wádaanbei, máma lúma wagúndan queísi gürígia garaüwarügütiña. ¹³ Lugúndun áanjaün abágaridarügi queísi jugúndan, queísi gürígia garaüwarügütiña, jeférideruba, mídinbadün siélu, áanjein jáfara igáburi lánina figoú le jídaanbei jilágubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejobaña láni Búngiu Espíritu, lirajüñü Búngiu. ¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdünün lueí laburujan ligáñi Búngiu juágun, Espíritu le jerésibirubei, ligía le adügübalün lun lirajüñü jumá Búngiu. Ligía gayára lubeí wagúaruni Búngiu Wáguchi. ¹⁶ Geféenti láni Búngiu Espíritu woun luágú lirajüñüjádiba lan Búngiu. ¹⁷ Áni ladüga lirajüñü wamá Búngiu, garíchatiba gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Áanjein súfuri wabeí luágú Crístu ya uboúagu, gafánraanbadiwa lídan luweírigun yágüta siélu.

¹⁸ Jarítaguatina luágú ni cáta lan le wasúfurirubei ya uboúagu lúmoun uweíriguni le lúnbei wabíjini siélu. ¹⁹ Láuñein sarágu ayúmajani lúma eménigini sun uboú le ladügübei Búngiu, agúrabeí dan le lúnbei jerésibiruni lirajüñü Búngiu jalágaante. ²⁰ Níjein mégeiti luágú sun uboú, máma jamúga ladüga labúseerun, ladüga ítara líña lan labúseeruni Búngiu, ²¹ láu sun líra, súnwandan níjein lan eménigini luágú leséfuruba lan uboú lídaangiñe asúfuriruni lúma agádeiruni le gádaanbalin lun

gafánraanbei lan lídan jaweírigun lirájüñü Búngiu. ²² Subúdi wamúti luágu chülü lan lúmoun dan le, sun uboú le ladügübei Búngiu ayájuati láu igárigu camá ában würi to agáridutu. ²³ Áni máma rügüñein uboú asúfurira, súfuritiwa gíñe, wagía afíñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítowiá ában oúnwenbun igári, áni agúraba wamúti dan le lúnbei wayábin lun lirájüñüjadíwa lánme Búngiu le tímatimaati, dánme le liséridun wágubu. ²⁴ Ligía lágüdaja wasálbarun. Merésibirun wamágili sun ubuíduni le lúnbei wabíjini queísi lirájüñü Búngiu, agúrabajatiwa werésibiruni yágüta siélu. Ánjein jamúga ibíja wamáaliti sun le lúnbei wabíjini queísi lirájüñü, móbunaali jamúga wagúrabajan. Magúrabajaantiña gürígia jerésibiruni cátei le ibíja jamáalibei. ²⁵ Queíti merésibirun wamágili lubeí sun le lúnbei wabíjini queísi lirájüñü Búngiu, lúnti wagúrabuni láu gurásu.

²⁶ Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúdubu. Lídan óra ligía, ába líderaguníwa Sífiri Sándu lun waríñaguni luweírin cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wádaangiñe, ába loúnabuníwa Búngiu lugúndun ayúmuraguati Espíritu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfurirumi, lun lanügün buíti woun, wagía le jínsiñejabúbei lun, wagía le wájali lan lun lánigu wamá queísi larítaguni. ²⁹ Lugúndun ja lasúbudirubaña Búngiu lúmagiñe lubáragiñe ladügüni uboú luágu lánigubaña lan, fánrein lumútiña lun ítara jamá queísi Liraü, lun Liraü lan íbugañaü joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírigun queísi lirájüñü.

³¹ ¿Cábatí waríñaga luágu buri cátei le? Queísi lueígiñeñein lubeí wafúleisein Búngiu, ¿cábägi jabáfu wáganiñu wawágu? ³² Mamájaanti Búngiu lun líchuguni Liraü guánarügü lun loúnwen luágu wafúleisein, lubáragiñe líra, ába lederegeruni lun loúnwen waweígiñe, sun wagía, ¿ída lubáti míchugun láani sun líbiri cátei woun queísi líchuguni Liraü woun? ³³ ¿Cági gayáraabeí líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña.

³⁴ ¿Cáteiti gayáraabei lasíadiruníwa lun férider? Crístu guánarügü oúwebei wawágu, ába lásaarun lídaangiñe oúweni, guetó níjein nún lueígiñe loúnwenren Búngiu Úguchili ayúmuragua wawágu. ³⁵ ¿Cábati gayára lagídaruníwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o eíbaajoúni, o ilámaü, o manáanguni, o pelíguru, o oúweni? ¡Uá! ³⁶ Laríñajare tídan Lerérerun Búngiu.

Yaráfatiwa lun woúnwen bueígiñe ságü wéyu,
ítara líña joúseruniwa wáganiñu queísi mudún anügütiña lun
jafarún.

³⁷ Lídan sun cátei le, ibíja wamúti luweírin lubáfu Crístu, le jínsiñejabúbei woun, lun wagáñeirun lídan sun lénreengúnga.

³⁸ Choúru numúti lubeíti luágu úa lan ni cáta lun lagídaruníwa lueí línsiñejabu Búngiu –ni oúweni, ni ibágari, ni ánjeligu, ni máfianu, ni cátei le guetóbei, ni le lúnbei liábin, ³⁹ ni le siélubei, ni le uboúagubei, ni buri ámu cátei le ladügübei Búngiu – siñáti lagídaruníwa lueí línsiñejabu le larúfudubei woun lídan Wabúreme Jesucristu.

9

Anúadaja láaña Búngiu Israelítagu lun lánigu jamá

¹ Inárüni le lúnbei naríñaguni guetó jawágu nirásan, áu queísi ában afíñeti luágu Crístu, áni meyéejantina, aríñaga tumúti nanígi nun to úaraguaboun lúma Sífiri Sándu luágu inárüni lan.

² Weíriti nírun, áni súnwandan níjein lan gáriti tídan nanígi jawágu nirásan. ³ Buséntina jamúga lun gíñe lábugiñe nan líñiaragun Búngiu, díseñu lueí Crístu, ánjein jamúga ítara lúba lubeí gayára lan jerésibiruni Jesucristu queísi jasálbaragüle lun jasálbarun. ⁴ Linébaanfaangu Israél jagía, áni resíbi lumútiña Búngiu queísi lirájüñü. Reídeití meja Búngiu jádan láu sun luweírigun áni rúlumuti gíñe darádu buri joun lúma lilúrudun lídaangiñe Moisés. Arúfudati igáburi joun lun jesériwidun lun, ligílisirugu, áni joun laríñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadünamabei lun liñurúniwa líri lun sun dan.

Ítaralá.

⁶ Mámaticia luágu jamúga reídei lan lerérerun Búngiu joun ladügawagun Israél magúnfulirunga, ladüga máma sun Israelítagu lánigu Búngiu le tímatimaati. ⁷ Máma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.” ⁸ Arúfuda lumúti líra woun luágu úa lan ni ában liraü Búngiu luágurügü lirásan, ja rügñanu lirájüñü ladüga jafíñerun luágu lerérerun, jagía anügübaña

queísi lirájüñü ja tímatimaatiña. ⁹ Lugúndun niján dimúrei le líchugubei Búngiu lun Abrahám. “Niábinba dánme le lachülürün dan ligía, ábame tagáraüdün Sára ában irájü.”

¹⁰ Áni máma rügüñein líra, niján ábanya jémpulu luágu lanúadajan Búngiu. Biángubeí meja tirájüñü Rebéca ában jáguchi, le binádu wadúje Isáac, ¹¹⁻¹³ áni dán meja le magúriaajoúngiña, madügüngiña gíñe ni cáta ni buiti ni wuríbatí, ába laríñagun Búngiu tun Rebéca. “Lumúsunbei amúleñein le íbugañaü.” Úaraguati gíñe líra lúma le aríñawagúbei tídan Lerérung Búngiu. “Jínsiñetí meja Jacób nun, áanjein Esaú, iyéreeguti nun.” Ítara líña gufírümawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, meberesenga ligía ca lan jadügübei.

¹⁴ ¿Cábatí waríñaga? ¿Waríñaguba luágu múaran lan Búngiu? ¡Siñáti! ¹⁵ Lugúndun laríñajare lun Moisés. “Gareínibadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerún o wáfaagun, lugúdemejabu Búngiu woun, lídaañein lugúndan. ¹⁷ Tídan Lerérung Búngiu, bürüwaňu líña dimúrei le laríñagubei lun urúei Ejíptona. “Nadügünbálibu urúeime lun narufuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégüdaloún lanígi le únti labúseera ledéreragüdünun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladügün cátei boúguditi lueí lugúndan Búngiu?” ²⁰ Wel, ¿cátabuñadibugi lun balégejan lúma Búngiu? ¿Laríñaguba funági soúdieru lun le adügübalin. “¿Cáme badügana ítara?” ²¹ Garíchatí le adáagubei soúdieru lun ladügüni le labúseerun láu lubúñe soúdieru, gayáraati ladügün ában soúdieru le díseguați layúsurun, lúma ában le ayúsurúti lun furúmiegarügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larufuduni luweírin ligáñi jawágu gürígia ja gadünabaña jagünrinchawagún. Áfaaga lumúti jaríban láu sarágu gurásu darí guetó ²³ lúnrügü gayára lan larufuduni luweírin luweírigun woun, wagía le únbaña gudémejabu lan, ja gíñe laráanserubaña lúmagiñe binárü lun gafánraanbadiwa lan lídan luweírigun. ²⁴ Wáti Búngiu woun, jíbiri jádaangiñe juríu, jíbiri jádaangiñe ja mámabaña juríu, ²⁵ queísi laríñagun Búngiu tídan lilíburun Oséas.

Já meja mámabaña nánigu, naríñaguba joun. “Nánigu”, gürígia méja ja mínsiñebaña nun, naríñaguba joun. “Jínsiñetün nun”.

26 Áni lídan méme fulásu le ñí lubei laríñawagúa joun. “Máma nánigu jugúya”,
ñíba laríñawagúa joun. “Lirájüñü Búngiu le wínwanbei”.

27 Ánjeinti jawágu Israelítagu, ja méme juríubaña, laríñajare Isaías. “Láu sun gíbe jamá ladügawagun Israél quei ságoun láru béya, biánraürögübaña jádaangiñe eréderu lun jasálbarun,
28 lugúndun lagúnfulirubei Búngiu lerérunt ligíbuagu uboú lun lagünrinchaguniña ja magáambadibaña lun, lídan ában igáburi le gumúti, le gíñe furéseti.” 29 Queísi méja laríñagun méme Isaías.

Lun jamúga meja mígirun lan Súnti Gabáfu jádaangiñe wadügawagun woun,
wayábiña jamúga lun ítara wamá queísi ubúrugu buri Sodóma lúma Gomórra.

Juríu lúma ugánu luáguti Crístu

30 ¿Cábatí waríñaga? Luágu ja lan mámabaña juríu, ja mibíjinbalin lilúrudun Búngiu lun jasúbudiruni le buídubei lúma le wuríbabei, jagía anügübaña quei richáguatiña ligíbugiñe Búngiu ladüga jafíñerun luágu. 31 Ánjañati ladügawagun Israél, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúrudu ligía agúnfulira, machülüntiña lun richáqua jamá ligíbugiñe Búngiu. 32 ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafíñen, jadügeirüga láu cátei le guánarügü jadügübei. Ligía jachúgeragunbei luágu Jesucristu queísi “dübü le achúgeraguágülei”, ladüga siñá lan jafíñerun luágu queísi Jasálbaragüle. 33 Laríñajare tídan Lerérunt Búngiu. Rútina ában wügüri le queísigubeirügübei dübü le achúgeraguágülei Sión, dübü gíñe le eíguadagüdüti gürígia.

Ánjeinti le afíñeruti luágu, maságüríjanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmuragun lun Búngiu jawágu Israelítagu, ja méme juríubaña, lun jasálbarun. ² Aríñagatina luágu jafúleisein luágu níjein lan ában oúnwenbun gúnfuli jádan lun Búngiu, máma queísi laríñagun subúdi jagúnfulin. ³ Ibídiñeti joun ída líña lan ligáburi líchuguniña Búngiu gürígia richáquañu ligíbugiñe, láu igáburi le jabúseerubei jáluajan jeréderun richáquañu ligíbugiñe Búngiu, madügüngä jameí le labúseerubei. ⁴ Lugúndun Crístu lébejabei lagúnfulirúniwa lilúrudun Moisés, áni adügati lun sun lan ja afíñebaña luágu, jeréderun richáquañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguatiña láu jagúnfuliruni lilúrudun, laríñajare Moisés.

“Gürígia ja agúñfulirutiña lúrudu le gumúti, jabágariduba luágu lúrudu.”⁶ Luáguti lerésibiruniña Búngiu gürígia queísi richáguatiña ligíbugiñe luágu jafíñen, laríñajare. “Maríñagabá tídan banígi. ¿Cába amüdeira siélun?” —queísigubeirügü barárigüdüñein lan Crístu le Wasálbaragüle siélugiñe.⁷ Maríñagabá giñe. “¿Cába arárira le ñíjin jabeí jiláaña?” —queísigubeirügü bamúdeiragüdüñein lan Crístu jádaangiñe jiláaña ítara. Úati ni cáta lun wadügüni lueídüguya lun wafíñerun luágu.⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein gíñe ugánu ligía tídan banígi.” Ugánu le, elun?” —queísigubeirügü barárigüdüñein lan Crístu le ligía ugánu le lánina afíñeni luágu Crístu le Wasálbaragüle, le wapúrichijabei.⁹ Ánjabu aríñaga láu biyúma luágu Jesúsu lan Babúremebei, afíñen amürü tídan banígi luágu sarágüda láani Búngiu lídaangiñe oúweni, basálbaruba.¹⁰ Láu bafíñerun luágu Jesucristu táu sun banígi, lerésibirabu Búngiu queísi ában gürígia richáguati ligíbugiñe, láu bíchugun fe luágu láu biyúma, basálbara.

¹¹ Taríñajare Lerérunt Búngiu. “Úati ni ában gürígia le afíñeruti luágu Jesucristu lun laságürijan luágu lárigiñe.”¹² Ában jáu juríu jáma ja mámabaña juríu, Wabúreme Jesucristu, ligía Jabúremebei súngubei, áni fuleísei lumútiña sun ja agúarubaña lun lun líderaguniña.¹³ Ítara líña quei laríñawagún tídan Lerérunt Búngiu. “Sun ja aguáruti líri Wabúreme, jasálbaruba.”¹⁴ ¿Ída lubáti gayára lan jagúaruni lun lasálbaruniña ánjein mafíñerungiña lubeí luágu? ¿Ída lúba giñéti gayára lan jafíñerun luágu, ánjein magáambungiña lubeí luágu? ¿Ída lubáti gayára lan jagáambun luágu, ánjein uá jabeí apúrichijati ugánu luáguti asálbaruni joun?¹⁵ ¿Ída lubáti giñe gayára lan japúrichijan gürígia joun ánjein uá cába lan oúnajaña apúrichija? Queísi laríñawagún tídan Lerérunt Búngiu. “¡Ma lubuídun jachüllürün ja anügübalin ugánu luáguti aráandaruni lúma Búngiu, apúrichija jameí ugánu buíti luáguti asálbaruni!”

¹⁶ Másutiña gürígia ja agáamba jamáalibeí ugánu luáguti asálbaruni ebéresera láu. Queísi laríñaguni Isaías tídan lilíburun. “Wabúreme, míbettiña afíñerutiña luágu ugánu luáguti asálbaruni le wapúrichijabei.”¹⁷ Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

¹⁸ Ába nariñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Taríñajare Lerérunt Búngiu.

Agaambúaali jamálali lídan sun fulásu,

chülijali jerérun lídoun lagúmujoún larígei uboú.

¹⁹ Ába nariñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei laríñajare Búngiu liyúmulugugiñe Moisés.

Naméendidagüdübädün jadüga ában rása ja máma náni, nagáñidagüdübädün jadüga ában rása ja ibídiñegidina joun.

²⁰ Aríñagati gíñe Búngiu liyúmulugugiñe Isaías.

Dari jamutina ja máluaajaanbalina, arúfudaguatina núngua joun ja málügüdajánbaña nuágu.

²¹ Ábaya laríñagun jawágu Israelítagu. “Sun wéyu náu agúaja joun gürígia magáambaditiña, mabuídun.”

11

Israelítagu ja sálbabaaña

¹ Aríñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámlian Benjamín. ² Barü lumútiña Búngiu Israelítagu queísi lánigu lúmagiñé meja binärü, guetó, mamájaanti joun. ¿Magáambun jumúti le taríñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Laríñaga. ³ “Nabúreme, áfaragua jamá profétagu jilágubei, güríngua Jameí buri báni latárü, áu rügáali erédera jádaangiñe báni, áni buséntiña gíñe jáfarunina jilágubei.” ⁴ Ába laríñagun Búngiu lun. “Anuádajaadina sédü mílu wügüriña nubárua ja májuduragúngiñabaña ligibugiñe liyáwa búngiu le Baal.” ⁵ Ítara méme gíñe lídoun buri wéyu le, reídeijaña átiri jádaangiñe juríu ja anúadaja láañabaña Búngiu láu lareíni. ⁶ Ángejinti láu lubeí lareíni Búngiu lanúadirubaña, mámaali láu cátei le liyáraati gürígia guánarügü adüga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabe, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afíñeni luágu Búngiu, ába lígiruniña Búngiu táo tidére janígi. ⁸ Queísi taríñagun Lerérun Búngiu. “Adüga lumútiña Búngiu lun deré lan jachügü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülijali lídoun dan le.” ⁹ Aríñagati Davíd.

Garábagua lámuga jefédujan lun sádarame, lun jáburujan tídoun, lun jasúfurirun.

¹⁰ Darú lámuga jágu, maríjin jamámuga, sebúrgua lámuga gíñe janágan lábugiñe janügün lun sun dan.

Jasálbarun ja mámabaña juríu

¹¹ Nálügündajaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líñal! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu. ¹² Ánjeinti seríwi lubeí dúru le jadügübei juríu buítume lun uboú, áni ánjein buítí lubeí lanügübei jeféridirun joun ja mámabaña juríu, ¡sarágume buídutimaabei lan dánme le jasálbarun sun juríu!

¹³ Níjein gíñe ában cátei lun nariñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíriti nubéresen láu nuwádigimari, ¹⁴ lun gayára lan jabúseerun nirásan jáyeijanün, lun gíñe jasálbarun. ¹⁵ Ánjein ladüga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe oúweni. ¹⁶ Ánjein derégewa tubeí furúmiñetu fein to adügütu tídaangiñe fulúwaaru añóundawagutu lun Búngiu, derégewatú gíñe sun fulúwaaru ñoúnwaguatu to ídaangiñeboun tiábin fein tugúya. Ánjein gíñe derégewa lubeí tilagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queísi tilímun olivo tímatimaati, chaünwatiña, gidáwatiña jagánaguagiñe lumútuniña Búngiu ladüga mafíñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olivo to áraabuna. Ítara líña jiábin lun gabára jumá lídan tilagüle lúma lídan tibágari olivo, resíbi jugúyame labínirun Búngiu, queísi lumútuniña. ¹⁸ Marítagua jumátia luágu buídutimá jumá lueí límu le ñígubeibeí méja. Ánjaün arítagua luágu buídutima jumá, jarítagua jumá luágu máma lan jugúya ágüdajabalín ílagülaü, luágu ílagülaü lan ágüdajabalün.

¹⁹ Fáguia jaríñaguba. “Ánja, ába jagídarúniwa juríu lun wíchugún jawéñegua luágu olivo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun mafíñen jamá luágu Wasálbaragüle, jugúya, gabára jubeí ladüga jafíñen luágu. Manáangua jumá lubeíti júngua, duárirügü jumá. ²¹ Lugúndun ánjein úa lubeí ferúduna láníña Búngiu juríu já meja lanúadajabaña lun lánigu jamá, úabeí gíñe ferúduna lánün, jugúya le mámabei juríu, ánjaün ñübin lun mafíñen jumá. ²² Aríja jumeí lubeíti luweírin lareídun Búngiu, derégüdatí gíñe. Derégüdatí joun ja mafíñebaña, areídatí joun ja afíñebaña. Lúnti jasígirun lídan lareíni láu sun jafíñen luágu, ánjein madügün jumá ítara, jagídarúba gíñe. ²³ Ánjaña ñübin

juríu lun jafíñerun luágu Crístu, jíchugúayaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járigoún. ²⁴ Jugúya le mámabei juríu, chaünwatün tueígiñe ában olívo to áraabuna, ába jíchugún tuágun olívo to buítu, gúbume ladügüwa joun juríu ja tilímunbaña olívo buítu ja tímatimaatiña, jíchugúayaba járigoún tuágun olívo to ñígiñe lubeí jagídarúa, naríñaguña luágu lachülürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujoún

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálugüdagun júngua luágu buri cátei le. luágu deréraügüda láaru lan Búngiu janígi Israelítagu murúsun lun Jasálbaragüle darírugü dánme le gumújali jerésibiruni ja mámabaña juríu Crístu. ²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Sióngiñe,
ábame lagídarun wuríbani jádaangiñe juríu.

²⁷ Nijánba nidáradun jáma,
dánme le nagídaruni jafígoun.

²⁸ Luágu ugánu le luáguti asálbaruni, barüwatiña juríu queísi láGANIÑU Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagübürigu juríu.

²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña. ³⁰ Jugúya, magáambaditün meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnrügü gudémejabu lan Búngiu joun queísi gudémejabu lan jun. ³² Ígira lumútiña Búngiu súngubei lun magáambun jamáni, lun gayáraabei lan gudémejabu lan joun.

³³ ¡Luweírin lareídun Búngiu, lúma lichú láu! Siñáti wasúbudiruni larítagun, siñá gunfaráanda wamáni lémeri.

³⁴ ¿Cági gunfaráandabalin larítagun Búngiu? ¿Cági arúfudajabei lun? ³⁵ ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe? ³⁶ Úati ni ában, lúmagiñe Búngiu liábin sun cátei, ligía gíñe ágüdajabalín sun cátei, áni lúngua gíñe ladügei. ¡Uweíriguni lun Búngiu lun sun dan! Ítaralá.

12

Ibágari le derégewati lun Búngiu

¹ Amúriajatina lubeíti júma, nidújeñu, lun jedéregeragun júngua le gumúti lun Búngiu queísi gürígia abágardutiña lun jesériwidun lun, jarúmañu lan jibágori ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadügünü lugúndun weíriti lareíni woun. ² Jebé jabágardun queísi lirájüñü uboú le, lubáragiñe líra, sáansi jumeí ligáburi jisáminan, sáansi lámuga gíñe ligáburi jabágaridun. Ítara lúba jiábin lun jasúbudiruni le lugúndaanbei Búngiu jun—le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luoúgua weíri sügű láu le ligíabei. Lubáragiñe líra, cáda ában lúnti lasúbudiragun lángua, según afíñeni le rúlaalíbei Búngiu lun. ⁴ Lugúndun ítara quei gíbe lán buri umégeguni luágu ábanrügü úgubu, áni máma ában méme lifisiute sun umégeguni ligía, ⁵ ítara wáña gíñe, wagía afíñetiña, láu sun gíbe wamá, ában rügűñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucristu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímuñeran wayúmulugugiñe, lúnti wadügünü según afíñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lángua lun arúfudajani. ⁸ Le gíchigaditi dügüdaguaü joun ámu, lúnti líchaagun lángua lun ladügünü. Le edéweejati, lúnti magúrabun lan láguyun lun, le ábutibei, lúnti lagúmadijan láu sarágu duári, le íderaguti gudémetiña, lúnti ladügünü láu ugúndani.

Ligáburi jabágardun lánigu Crístu

⁹ Jínsiñe jamá jidújeñu lueígiñe Jesucristu jun láu ínsiñeni le ináruniti. Iyéreegulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jiñúragüdüni jíri jidújeñu.

¹¹ Mamágualigu jumá lídan luwádigimari Wabúreme, seríwi jumeí táu sun janígi.

¹² Abágarda jumá gúndaañu láu eménigin le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

¹³ Íderagua jumáñia afíñetiña lídan jemégeirun, resíbi jumáñia ja bisídabalün láu ugúndani.

¹⁴ Amúria jumá labínirun Búngiu jawágun ja oúserutün wuríba, amúria jumá abíniruni joun, máma wuríbani.

15 Gúnda jumá jáma ja gúndaabaña, jayájua jáma ja ayájubaña.

16 Abágarda jumá lídan úaraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

17 Mafáyeira jumá wuríbani luágu wuríbani lun ni ában. Áfaagua jumá lun jadügünü le búidubei jagíbugiñe súngubei. **18** Adüga jumeí sun le juáraati lun jabágaridun lídan dan jáma súngubei. **19** Nidújeñu jínsiñetiña nun, máguyugüda jumeí wuríbani, ígira jumeí lun Búngiu lan afáyeigüda luágu. Taríñajare Lerérunt Búngiu. “Áu lúnbei nafáyeigüduniña gürígia luágu jaríban, líña Jabúreme.” **20** Aríñagati gíñe Búngiu. “Ánjein lamá lubeí bágani, rúba eígini lun, ánjein mágürabu lubeí, rúba dúna lun, lugúndun láu badügünü líra, lebeluruba busíganu lun luágu luríban louserunib.” **21** Mígiraguagüdabá búngua lun lagáñeirunibu wuríbani lun báguyugüdün wuríbani luágu wuríbani, lubáragiñe líra, gáñibeí wuríbani láu buídu le badügübei.

13

1 Lúnti jíchaagun súngubei júngua lábun jalúrudun gumádimatiña, lugúndun ítara líña laráansejan Búngiu lun ñíbei lan lúrudu, áni gumádimatiña ja lídaanbaña jabára, labúseerun Búngiu añájein lubeí ñi. **2** Gürígia lubeíti le awügürijoúti lun gumádi, múaraanti láu le laríñagubei Búngiu, áni ja awügürijoútiña ítara, gadúnruntiña luágu líra áni jafáyeiruba luágu. **3** Máma lúnñanu jíchugun gumádimatiña anúfudei joun ja adügübalin le buídubei, aná joun ja adügübalin le wuríbabei. ¿Buséntibu babágaridun manúfudeiga lueí lúrudu? Buídulá boúserun, ábame buídu ban lurúma lúrudu, **4** lugúndun lesériwiduña lun Búngiu luágu bufúleisein. Ánjein wuríba boúserun, lúnti janúfudeban, ladüga máma luágu ni cáta gabáfu lan lúrudu lun lafáyeijagüdün luágu dúru, quei lesériwiduña lubeí lun Búngiu lun lafáyeijagüdün luágu dúru. **5** Ligía lúnti lubeí úaragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítagun. **6** Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

7 Ru jumeíme le jáni cáda gürígia joun. Fáyei jumeí le lagúburajabeí gumádi luágu jufúlasun, lúma buri ámu cátei líbe líra, fáyei jumeí le lúnti jafáyeiruni luágu cátei le ñübinbei jun boúgudigiñe lueí jageíra. Gagáambadi jumá joun gumádimatiña, ru jugúyame inébesei joun queísi lubúdubu. **8** Máni jumá dúweiti ni ca úma, lueídüguya lídúweitina ínsiñeni le jadúweirubei júmagua. Le jínsiñejabuti lun gürígia líledi, adüga láali sun

le lubeíbei lilúrudun Búngiu láu ladügünü líra. ⁹ Taríñajare Lerérunt Búngiu. "Magámaridabá gürígia maríeitiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun." Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. "Jínsiñelá gürígia bíledi bun queísi bínsiñegua búngua." ¹⁰ Le jínsiñejabúbei, madügünti wuríbatí lun ni ában, ánjawá lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburi wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatimaajali óra lun lagíribudun Wasálbaragüle uboúagun sügü láu dán meja le wafíñerunbei luágu ugánu luáguti asálbaruni. ¹² Belújali áriebu buídu, yaráfaali larúgadun, ligía lúnti lubeí wígiruni wadügünü cátei wuríbatí le adügübei lábugiñe lubúriga, lun wadáürunun wadáüragun queísi súdaara ja lábugiñetiña larúgounga. ¹³ Eíbuga wamá queísi lubúdubu ítara queísi gürígia ja buidubaña, úouga ni cáta luágu jagáburi lun jarámudagun lueí jaríjin gürígia. Mabágarida wamá lídan bacháruaü, lúma buri lanáime fédu, ni lídan salúfuri lúma iwíyeni, ni lídan gáganiguaü lúma gimúgaü. ¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagübüri ayúmajani.

14

Madímurejabá luágu bidúje lueígiñe Jesucristu

¹ Ánjein débili lubeí ában gürígia lídan lafíñen, resíbi jumeí, maríñagunga ni cáta lun luágu cátei le machoúrunbei luágu.

² Queí buri, añájein derégüdati jafíñen, jarítaguatiña luágu gayára lan jeígin afíñetiña furúmieguarügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jafíñen, meígintiña úwi. ³ Le eígití furúmieguarügü cátei, moún lumuti ünabu lan lanügünü le meíginbalin, le gíñe májabei leígin furúmieguarügü cátei, moún lumuti gíñe ladímurejan luágu le eíginbalin, lugúndun resíbi láali Búngiu gürígia ligía queísi lánigu.

⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdüní buídu.

⁵ Nijánya ában jémpulu. Añájein gürígia weíriti janügünü ában wéyu lueí ámu wéyu, añájein jíbiri, afíñetiña luágu ában lan lábu sun wéyu. Cáda ában lúnti lachóururuni le uágubei larítagua.

⁶ Le areídubei som wéyu, ladügüñein lun líchugun inébesei lun

Búngiu. Le eígibei furúmieguarügü cátei, leígini lun líchugun inébesei lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladüga liloúguan lafíñen, lun líchugun inébesei lun Búngiu ladügei, rúti gíñe eteíngiruni lun Búngiu luágu cátei le gayáraabei leígin segúnlafíñen.

⁷ Naríñagubalin líra lugúndun úa lan ni ában wádaangiñe abágariduti lun guánarügü, úa ni ában oúweti lun guánarügü.

⁸ Ánjawa abágarida, wabágariduña lun wadügünü lugúndan Búngiu, ánjawa oúwe, woúnweña segúnlugúndan Búngiu. Ítara líña lubeíti, dándu lídan ibágari queísi lídan oúweni, láni Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucristu? ¿Ca uágu banügei quei ni cáta? Búngiu rügünein lun lagúseragüdün, áni sun wagía, waráramuba ligíbugiñe lun wagúserun, ¹¹ queísi taríñagun Lerérun Búngiu.

Inárunti ítara quei gabágari nan, líña laríñagun Búngiu, luágu jájuduraguba lan sun gürígia nigíbugiñe,

áni jasúbudirubadina súngubei ligíbugiñe guríriguaü.

¹² Cáda lubeíti ában wádaangiñe, lagúseruba luoúguia lúma Búngiu.

Machúgeraguagüdabeí bidúje

¹³ Ligía, moún lubeí wadímurejan jawágu wadújeñu lueígiñe Jesucristu. Lubáragiñe líra, derébugulá jarítagun lun madügün jumá ni cáta le gayáraati lachúgeraguagüduni jíbiri, o láburugüduni lan lídoun figoú. ¹⁴ Subúdi numúti luágu úa lan ni cáta le leígibei gürígia lun lawiyeduni ligíbugiñe Búngiu, áni choúru numúti líra, áu queísi afíñeti luágu Jesucristu. Láu sun líra, ánjein jarítagua lubeí ában gürígia luágu marúman lan ában cátei, marúmaanti lun, áni figoú lun lun leígini. ¹⁵ Ánjeinti bañawurija lafíñen bidúje láu cátei le beígibei, mámaali bagáburiduña láu ínsiñejabuni. Madügabá lun lefériderun ában gürígia le ueígiñebei loúwe Crístu, ladügarügü beígin ítaga cátei. ¹⁶ Míchiga jumá lubeíti lúgaaru lun ladímurejoún wuríba luágu cátei le gayáraabei jadügünü queísi afíñetiña luágu Crístu. ¹⁷ Larúeijan Búngiu máma cátei luáguti le eigíbei o atúbei, luáguti ában ibágari le lánina ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buítí gíñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wámagua lun wawáanserun lídan cátei le lánina Búngiu. ²⁰ Magürinchaguabeí luwádigimari Búngiu lídan libágari ában gürígia láu cátei le beígibei. Inárungi luágu jarúma lan sun eígini ligíbugiñe Búngiu, le wuríbabei,

lun leigín cátei le áburugüdutiña ámu gürígia lídoun figoú. ²¹ Buíti lun meígin ban úwi, matún bínu, madüğün ni cáta le achúgeraguagüduti bidúje, o láburugüduni lan lídoun figoú, o ledébiliragüduni lan lafiñen. ²² Afíñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei laríñagun luágu buídu lan cátei le ladügübei, masándiragunga ligía lúngua láu dúru! ²³ Ánjeinti le eígibei ában cátei láu machoúruni luágu buídu lan leígini queísi afíñeti luágu Crístu, gadúnrunti ladüga leigíni, lugúndun meígin lumúti láu afíñeni. Sun le wadügübei, ánjava arítagua luágu fágu lan moun láani wadügünü, figoú woun.

15

Gúndaagüdabá gürígia bíledi, máma amiüri guánarügü

¹ Wagía le jérebei lídan wafíñen, lúnti gagúraasun wamá jabá ja loúguagíñabaña afíñe, lúnti warítagun luágu le buídubei joun, mámarügü luágu wíchugun ugúndani woúniwagua. ² Cáda ában wádaangiñe, lúnti lagúndaaraguagüduni gürígia líledi láu le buídubei lun gürígia ligía, lúma láu le gayáraati lagánwoundagüduni lafíñen. ³ Ni Crístu, míchugunti ugúndani lúniwagua, lubáragiñe líra, suséreti le abürüjoúbei tídan Lerérun Búngiu lun. “Núguchi, áburujati janábajan ja anábubalibu nuágun.” ⁴ Sun le aríñawagúbei tídan Lerérun Búngiu lúmagiñe binärü, lun larúfudajoún woun labürüjoúa, bürüwatí meja dimúrei buri ligía lun wanügün gurásu lúma dügüdaguaü lídaangiñe, gayára lámuga weménigiduntima luágu Búngiu. ⁵ Búngiu le íchugubei gurásu lúma dügüdaguaü, íderagualaün lun jabágaridun lídan dan jáma jíbirigu, queísi ladügünü Jesucristu. ⁶ Ítara lúba, sun lan wagía lídan ában, láu ábanrügü umálali, wíchuguba uweíriguni lun Búngiu, le Lúguchi Wabúreme Jesucristu.

Agáambatiña ja mámabaña juríu luágu Wasálbaragüle

⁷ Resíbigua jumá lubeíti júniwagua quei gíñe lerésibiruníwa Crístu, lun liñurúniwa líri Búngiu. ⁸ Le nariñagubei, luágu liábinbei lán meja Crístu lun lesériwidun joun juríu, lun lagúndulirun dimúrei le íchugúbei joun binádu wagübürigu, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan ja mámabaña juríu uweíriguni lun Búngiu luágu lareídun, quei taríñaguni Lerérun Búngiu.

Ligía níchuguba lubeí uweíriguni bun jagánaguagiñe ja mámabaña juríu,

nerémujaba gíñe luágu buweírigun.

¹⁰ Taríñajare gíñe Lerérun Búngiu.

Gúnda jumá, jugúya le mámabei juríu, úara jáma ja lánigubaña Búngiu.

11 Taríñajare gíñe.

Rújuma sun ja mámabaña juríu inébesei lun Búngiu, adímureja jamá sun gürígia luágu luweírigun.

12 Laríñajare gíñe Isaías tídan Lerérun Búngiu.

Liábiba ában ladügawagun Isaí, le lúnbei lagúmadiruniña ja mámabaña juríu.

Jagía, jeménigiduba luágu.

13 Búngiu, le íchugubalin eméniginí woun, buíngüdalaün láu ugúndani lúma darángilaü lídan jaſíñerun luágu, lun buíñu jumá láu eméniginí, láu lubáfu Sífiri Sándu.

14 Nidújeñu, choúruguatina núngua luágu buin jíña lan láu areíduni lúma subúdi luágu wafíñen luágu Crístu, luágu gíñe gíchigadi jumá dimúrei buítí joun jíbirigu. 15 Tídan gárada to, abürüjaadina jun láu sun furáangu luágu buri cátei le lun mabúlieidun jumáni. Nadügüñein luágu wadágimanu le rúalaalíbei Búngiu nun láu lareíni, 16 lun nesériwidun lun Jesucristu jagánagua ja mámabaña juríu. Seríwi le nadügübei, napúrichijani ugánu lúmagiñeti Búngiu luágu Wasálbaragüle lun nanügubaña lan ja mámabaña juríu lun Búngiu, lun lerésibiruniña queísi gürígia ja jarúmaaru janígi láu luwádigimaridun Sífiri Sándu jádan.

17 Ítara líña lubeíti, áu queísi ában afíñeti luágu Jesucristu, gébunati gúnda nan lídan nesériwidun lun Búngiu, 18 luágu rügüñein buri cátei le ladügübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsú láali Crístu nerérun lúma náfaagun, 19 luweírin buri seíni lúma buri miláguru le nadügübei láu lubáfu Sífiri Sándu nídan, lun lanügünüña ja mámabaña juríu lúmoun. Láu igáburi le, joústagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe darí loúbawagun Ilírico. 20 Ítara líña áfaaguadina lan lun napúrichijani ugánu luáguti Wasálbaragüle le ñí lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ñí lumuti chülüjali lan ámu láu ugánu luágu, nubáragiñe, 21 lubáragiñe líra, súnwandan busén nan nagúnculiruni dimúrei lébei le taríñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

22 Ladüga nesériwiduña lan lun Crístu lídan ámu fulásu, siñágili lubeí nídin bisídaün, láu sun gíbeeli lan weýyasu nabúseerun nadügünü. 23 Guetóti, quei gumúnaali lan

nuwádigimari lueígiñe oúbaü le, áni quei lúmagiñe lan binárü nabúseera nídin aríjaün, ²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ángein guetó, neíbuga Jerusalén, barüína cátei joun wadújeñu lueígiñe Jesucristu ñi. ²⁶ Lugúndun wadújeñu ja Macedóniabaña jáma ja Acáyabaña jarítaguaaña joúndarun seínsu jádaangua lun joúnajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadügüni cátei le, áni richátiña, lugúndun dúwei jamúti joun le tímatimaati, lugúndun ítara quei jafánreinraguni afíñetiña ja juríu jarísin le lánina siélu jáma ja mámabaña juríu, lúnti giñéti jíderaguniña afíñetiña ja mámabaña juríu afíñetiña ja juríu luágu jemégeirun ya uboúagu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naünme dánme le násügürün. ²⁹ Choúru numúti luágu dan lánme nachüllürün júmoun, nachüllürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucristu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jaweí mafíñetiña ja Judéabaña, lun gíñe buídu lan lerésibirúniwa íderawaguni le nanügübei joun wadújeñu ja Jerusalénbaña, ³² lun gúndaabadina lan dánme le nachüllürün júmoun eméraagua murúsun, ángein ligía lubeí lugúndaabei Búngiu. ³³ Júmalá Búngiu le íchugubei darángilaü. Ítaralá.

16

Mábugaü lun cáda ában

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencréaboun, jun. ² Dánme le tachüllürün júmoun, resíbi jumoún buídu lídan líri Wabúreme, queísi lúnti lan ladügün jádan idújeñu lídan afíñeni. Íderagua jumoúnme lídan furúmiegarügü cátei le temégeirun, lugúndun tugúya, saráguaña tíderagun, íderagua táadina gíñe.

³ Mábuga níña tun Priscila, lúma lun Aquíla ja nidújeñu lídan nesériwidun lun Jesucristu. ⁴ Jagía, rújamuti jabágari guánarügü lídoun lénreengúnga lun jasálbaruni nibágari, teíñqui níña lubeíti joun, áni mámarügü áu, sun gíñe wadújeñu ja tilana jalígilisin ja mámabaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscila lúma Aquíla. Mábuga níña lun numáda Epenéto le jínsiñebi nun, le furúmiñebi afíñeruti luágu Crístu ubúrugu Acáya. ⁶ Mábuga

níña tun María to ñadágimeinjáruboun sarágu jagánagua, jugúya Rómana. ⁷ Mábuga níña joun nupaísanu Andrónico lúma Junías já meja níbirigubaña furísunrugu, buíti jadímuréjan láni Crístu apóstolugu jawágu, jagía gíñe afíñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, woúba lídan wawádigimari luágu Jesucristu, lúma lun Estáquis, numáda le jínsiñebi nun. ¹⁰ Mábuga níña lun Apéles, le arúfuda lálibei lafíñen luágu Crístu sarágu weíyaasu, mábuga níña gíñe joun títana lúban Aristóbulo. ¹¹ Mábuga níña lun nupaísanu Herodión lúma joun títana lúban Narciso ja afíñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügúri le buídubei igáburi le tímatimaati ligibugiñe Crístu, mábuga níña gíñe tun lúguchu, to gíñe ítarajaruboun quei ában úguchuru nun. ¹⁴ Mábuga níña joun Asíncrito, Flegónite, Hérmas, Patróbas, Hérmes, lúma joun wadújeñu ja jámabaña. ¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun títana lilígilisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdubaña gürígia, ru jagía achúgeraguágülei lun jafíñen. Múaraanti le jadügübei lúma le arúfudajouíbei jun. Díse jumá jaweí gürígia jagía, ¹⁸ lugúndun gürígia jagía, mesériwiduntiña lun Wabúreme Jesucristu, joúngua guánarügü jesériwida. Jeyeedañati gürígia ja ünabugutiña láu buri liñúlun lúma lubuídun lagaambún jerérun. ¹⁹ Subúdi jamúti sun gürígia luágu ñüdün jumá láu le lubeíbei Búngiu, ligía gúnda nubeí, buséntina gíñe lun furése jumá lun jadügüni le buídubei, máma lun le wuríbabei. ²⁰ Búngiu le íchugubalin darángilaü, lagáñeiragüdübädün luágu Máfia, furése. Binílaün Wabúreme Jesucristu.

²¹ Mábuga líña Timotéo jun, le noúba lídan wadágimanu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abürüjabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganoúña tídan lúban to gíñe lafúrederúboun joun sun títana ligílisi. Mábuga líña gíñe Erásto jun, le ágüdajabalín liseínsun fulásu, lúma gíñe wadúje Cuárto.

²⁴ Binílaün Wabúreme Jesucristu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesei lun Búngiu, le gayáraabei ladügünün lúntima derégüdagu jumá lídan jafíñen, según ugánu luáguti asálbaruni le napúrichijabei, lúma arúfudajani luágu Jesucristu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun uboú, láu sun abürüja jamá meja profétagu luágu. ²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jaffíferun luágu, gagáambadi jagíame lun Búngiu.

²⁷ ¡Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucristu, lun sun dan! Ítaralá.

FURÚMIÑETU LIGÁRADAN PÁBLO JOUN CORÍNTONA

Labürijan Pablo joun tilana ligilisi Corínto

¹ Áu Páblo, wálaadina Búngiu láu lugúndan lun ábanbadina la láni Jesucristu apóstolu, le méme gíribei ában le loúnajan. Nabürüjañoun gárada to, úara lúma wadúje Sóstenes, jun, ² jugúya le wadújeñu lueigiñe Jesucristu ja tilanabaña lilígilisin Búngiu to ubúruguboun Corínto, ja lánigubaña Búngiu ladüga lídaañadün lan ában lúma Jesucristu. Wájali Búngiu jun lun jederegeragun júngua lun le gumúti, queísi wájali lan joun sun ja agúarubalin líri Wabúreme Jesucristu lídan sun fulásu lun jederegeragun joúngua lun. Jesucristu Jabúremebei, ligía gíñe Wabúremebei. ³ Resíbi jumeí abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucristu.

Abíniruni le wánibei lídaangiñe Jesucristu

⁴ Súnwandan neteíngiruni Búngiu juágu, luágu abíniruni le rúalaíbei jun láu lareíni, lídaangiñe Jesucristu. ⁵ Ladüga lídaañadün lan ában lúma Crístu, rújali Búngiu sun luwúyeri irísini le lánina siélu jun, rújali ában oúnwenbun subúdi jun luoúgua, lun gayáraabei lan jadímuřejan luágu láu ában lichú áu. ⁶ Ítara líña geféen jumá luágu inárüni lan le waríñagubei jun luágu Crístu. ⁷ Láu igáburi le, úati ni cáta jemégeirun lídaangiñe le líchugubei Crístu, sun anjünja lan agúrabajei wéyu le lúnbei lagíribudun Wabúreme Jesucristu uboúagun. ⁸ Lágüdajabadün Búngiu derégüdagu lídan jafíñen darí lúmoun lagúmujoún, lun úa lan ni ában íchuguti jidúnrun luágu ni cáta dánme le liábin Wabúreme Jesucristu. ⁹ Súnwandan lagúñfuliruni Búngiu lerérun, áni ligía agúarubei jun lun lídan jumá ában lúma Jesucristu, le Liraü, le Wabúreme.

Fánreinguaü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucristu, lun júaradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani. ¹¹ Naríñagunbalin le, nidújeñu, lugúndun aríñagaña ja jádaangiñebaña lufámilian Cloé luágu níjein lán nege múařani jagánagua. ¹² Ámuñegueinarügú lán nege cátei laríñagun cáda ában jídaangiñe, añájein nege jídaangiñe, aríñagatiña. “Áu, lánigu Páblo áu”, jaríñaga jíbiri. “Áu, lánigu Apólos áu”, jaríñaga jíbiri. “Áu, lánigu Pédro áu”, jaríñaga jíbiri.

“Áu, lánigu Crístu áu”. ¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágú gurúwa luágú jufúleisein? ¿Ódi lídan níri jabástera? ¹⁴ Teínqui níña lun Búngiu luágú mabásteragüdün nan ni ában jídaangiñe lueídüguya Críspo lúma Gáyo, ¹⁵ ítara, úati ni ában lun laríñagun luágú lídan lan níri labástera lun nánigu lan. ¹⁶ Narítaguñein guetó luágú badíseigüda náani gíñe Estéfanas jáu sun tilana lúban, marítaguntina ánjein badíseigüda nubeí ámu. ¹⁷ Moúnajan lumútina Crístu abásteragüdaja, loúnajañadina apúrichijei ugánu luáguti lasálbaruniña gürígia, máma láu apúrichijani le weíriguburiti, lueí lagídarun lídaangiñe laníchigu loúnwen Crístu luágú gurúwa.

Arijúati lubáfu Búngiu lúma lichú láu lídan Crístu

¹⁸ Ítara líña ugánu luáguti loúnwen Crístu luágú gurúwa quei libídiouniga áu joun ja lúnbäña jeféridirun, ánjein woun, wagía le lúnbei wasálbarun, subúdi wamúti luágú lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia. ¹⁹ Bürúwati tídan Lererun Búngiu.

Nagürinchagubei lichú áu le lánina uboú le,
nadügübei jafúrendei furéndeitiña lun ni cátame ánjein máma
lubeí númagiñe liábin.

²⁰ ¿Cáti un ju lan le chúbei áu, o le arúfudajabei, o le lan gasígenejadibalín buri cátei le lánina uboú le? Úati ju lan lun ni cáta, adüga láali Búngiu lichú láu uboú le lun libídiounigame áu. ²¹ Láu lichú láu, adügati lun masúbudirun jamáni ja lánigubaña uboú láu lichú áu le jawágubei. Láu gíñe lichú láu, ába laráansejan lun lasálbaruniña ja afíñebaña luágú lárigiñe jagáambuni ugánu luágú loúnwen Crístu jawágu, láu sun barü jamaani jíbiri gürígia ugánu le quei libídiouniga áu.

²² Buséntiña juríu jaríjin miláguru lun jaffíñerun luágú Crístu, ja mámabaña juríu, buséntiña lun láubei lan lichú áu arúfudajani lun gayáraabei lan jerésibiruni. ²³ Ánjein wagía, wapúrichija luágú Crístu le ádarawagúbei luágú gurúwa. Jayábiti juríu, siñáti jerésibiruni ában asálbaragülei le oúwebeí láu ában luwúyeri oúweni le busíganudünati líbe líra, játi mámabaña juríu, janügüni quei libídiouniga áu. ²⁴ Láu sun líra, añájein jádaangiñe juríu jáma ja mámabaña juríu ja agáambubalín lagúarun Búngiu joun lun lánigu jamá. Jagía, gayáraati jaríjini lubáfu Búngiu lídan loúnwen Crístu, lúma lichú láu lun lasálbaruniwa ítara. ²⁵ Joun lirájüñü uboú, libídiouniga áu laráansejan Búngiu, wel, weíriti lichú láu Búngiu sügú láu le chútimaabei áu uboúagu. ²⁶ Nidújeñu, lúnti jasúbudiruni luágú wájali lan Búngiu jun, láu sun míbe jamá jídaangiñe chúti jáu según uboú, áni míbetiña gíñe jídaangiñe weírigutiña, o jádaangiñetiña lan

família íñugutiña. ²⁷ Anúadaja láña Búngiu ja ibídiouguabaña áu según uboú lun líchugun busíganu joun ja chúbaña áu, láu jaríjini luágu ni cáta lan lichú jáu ligíbugiñe Búngiu. Anúadaja láña gíñe ja lanügubaña uboú quei mabáfutiña lun líchugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu. ²⁸ Anúadaja láña Búngiu ja maweírigunbaña uboúagu, ja áubaña mebéresenwa lan, ja ni cátabaña, lun larúfuduni luágu ni cáta lan ja anáangubaña joúngua uboúagu. ²⁹ Úati lubeíti ni ában gayáraati lanáangun lúngua ligíbugiñe Búngiu. ³⁰ Rúláadün Búngiu guánarügü jugúya afíñetiña lídoun ában lúma Jesucristu. Ladüga cátei líra, ibíjatiwa lichú áu lúmagiñe Crístu, gayáraati lerésibiruníwa Búngiu queísi richáguatiña, derégeguañu woúngua lun, sálbañu. ³¹ Ítara líña lubeíti adüga wameí quei taríñagun Lerérun Búngiu. “Le busénti ladímurejan luágu uweíriguni, adímurejalá luágu luweírin cátei le adüga láalibe Wabúreme Crístu woun.”

2

Ugánu luáguti Crístu le ádarawagúbei luágu gurúwa

¹ Nidújeñu, dán meja le nídinbei lun nadímurejan jun luágu linárün Búngiu, adüga numúti mayúsurunga dimúrei buri íñuguti. ² Dan lé meja júma nubeí, máluguntina meja napúrichijan luágu ámu cátei lueídüguya luágu Jesucristu le ádarawagúbei luágu gurúwa. ³ Ába narúfudagun núngua jun queísi ában wügüri gudémeguti, adádagareina láu anúfudei lueí jamúga níjein lan mégeiti lídan nuwádigimari luágu Wabúreme. ⁴ Dán meja le nadímurejanbei jun, ába napúrichijani Lerérun Búngiu jun, málujantina nagáñeirunün láu buri dimúrei le jadímurejan wügüríñha chu táu. Lubáragiñe líra, láurügü lubáfu láni Búngiu Espíritu nadímureja jun, ába jasúbudiruni luágu inárüni lan le nariñagubei jun. ⁵ Ítara líña jafíñerun lídaangiñe lubáfu Búngiu, máma lídaangiñe lichú jáu gürigia.

Arúfudaguati Búngiu lúngua lídaangiñe láni Espíritu

⁶ Láu sun líra, adímurejatiwa luágu ában luwýyeri lichú áu joun ja weínamujañábaña lídan jafíñen. Ánjeinti lichú áu ligía, máma lánina uboú le, máma gíñe jáni ja agúmadijabaña ya uboúagu, ja madíseelibei ánjañame gumúgua. ⁷ Luágu lichú láu Búngiu wadímureja, le áubei laráanseja lúmagiñe lubáragiñe ladügünü uboú lun lasálbaruníwa lun sun dan, gafánran wamámugal lídan sun luweírigun Crístu. Ligía rügüñein meja asúbudirei aráansejani ligía, guetó, subúdigüda láali woun. ⁸ Játi gumádimatiña lánina uboú le, siñáti gunfaráanda jamáni laráansejan Búngiu lubá wasálbarun, lugúndun lun jamúga

gunfaráanda jamáni, mádaragun jamúti jamúga Crístu luágu gurúwa. ⁹ Ítara líña queísi taríñaguni Lerérun Búngiu.

Marijiñaja jamágili gürígia cátei buítí lé buri laráansejabei Búngiu joun ja jínsiñejabúbaña lun,

magáambuñajagiña gürígia luágu cátei buítí líbeina líra, marítaguntiña ída lúba lan.

¹⁰ Ába lasúbudiragüduni láni Búngiu Espíritu, le méme Sífiri Sándu, luáguti buri sun lubuídun cátei ligía woun, wagía afíñetiña. Aríaaja lumúti Sífiri Sándu sun cátei, áni subúdi lumúti lujúlin-ägei larítagun Búngiu.

¹¹ ¿Ca jádaangiñe gürígia gayáraabei lasúbudiruni ca lan tídaanbei lanígi ában gürígia, lueídüguya espíritu le lídaanbei gürígia ligía? Ítara líña gíñe, láni rügüñein Búngiu Espíritu asúbudirei sun cátei le lánina Búngiu. ¹² Wagía afíñetiña, máma ában espíritu le lánina uboú werésibirubei, Sífiri Sándu le ñübinbei lúmagiñe Búngiu, ligía werésibirubei, lun gunfaráanda wamáni le rúalaalíbei Búngiu woun láu lareíni. ¹³ Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnrendeirun láu lichú wáu, le jáni gürígia. Ítara líña, laú lubáfu Sífiri Sándu, wafúnraanguagüdei linárün Búngiu joun gürígia ja ibíjubalin Sífiri Sándu.

¹⁴ Gürígia le mibíjinbalin Sífiri Sándu, májati lun larítagun Búngiu le larúfudajabei láni Búngiu Espíritu jádaangiñe gürígia, lugúndun libídiouniga áu lanügüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan. ¹⁵ Áanjeinti gürígia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü uboú, siñáti gunfaráanda jamáni cáteiñein lan gürígia le eíbugubei lídan larúgounga le líchugubei Sífiri Sándu. ¹⁶ Queísi laríñawagun tídan Lerérun Búngiu. “¿Ca gunfaráanda jamálibei lisáminan Búngiu? ¿Ca gayáraabei larúfudajan lun Búngiu?” Láu sun líra, wagía afíñetiña, níjein lisáminan Crístu wádan ladüga ibíja wamáali Sífiri Sándu.

3

Luwádigimari Páblo lun Búngiu lídan ában jáma jíbiri

¹ Láu sun líra, nidújeñu, dán meja le júmañadina lan, siñáti méja nadímurejan jun queísi joun gürígia ja lagúmadirubaña Sífiri Sándu, adímurejatina meja jun queísi joun gürígia ja míchaagugiñábaña joúngua lábugiñoun lagúmadijan Sífiri Sándu le gumúti —queísi joun irájüñü—luágu buri cátei le luáguti Crístu. ² Ába níchugun arúfudajani le ménreengunti jun, queísi líchugúniwa úri lun ában irájü le gurágili lewéñegua

eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlin-ägei larítagun Búngiu gunfaráanda, áni chüllü lúmoun dan le, siñá meme jumágili,³ lugúndun gagáburigidün queísi jagáburi lirajüñü uboú. Níjeingua ligía gimúgaü jídan, gáñiguaü, fánreinguaü, máma jígiraguagüdüña júngua lun labúgurunün Sífri Sándu, áni jadügüñein le jadügübei sun mútu.⁴ Lugúndun láu laríñagun ában. “Lánigu Páblo áu”, laríñagaya ában. “Áu lánigu Apólos”, jadügüña queísi gürígia ja lánigu uboú le.

⁵ ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaanginébaña jiábin afíñera luágu Crístu. Wadágimanu le líchugubei Wabúreme lun cáda ában wádaangiñe, ligía wadügübei.⁶ Áu ábunagubalin Lerérunt Búngiu queísi nádü tídoun janígi, Apólos áturaguei nádü ligía láu larúfudajan méme jun luágu Crístu. Búngiu aweíridagüdübalin nádü, ligía edérebugüdübalin jafíñen.⁷ Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdübarun nádü.⁸ Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában segúnu luwúyeri lesériwidun lun.⁹ Íbirigu wagía lídan wadágimanu esériwida lun Búngiu, jugúya, ítara jíñia quei múa le luwádigimaridubei Búngiu.

Ítara jíñia gíñe queísi ában múa to lábunaguñounboun Búngiu.¹⁰ Fuleísei láadina Búngiu láu líchugun ubáfu nun lun nuwádigimaridun úara lúma. Niábiti queísi ában wügüri le subúsijabúbei lun labunún wagábu buídu—áu le íchugubalin ébuu lun jafíñen. Ámuti gürígia ábunagubei ligíbuagu ébuu ligía—jagía maésturugu ja arúfudajabaña luágu Jesucristu jun, nárigi. Cáda ában, lúnti goúnigi lan ída líña lan lábunagun ligíbuagu ébuu ligía.¹¹ Rúaali ébuu lun jafíñen, áni siñáti líchugúniwa ámu ébuu. Ébuu ligía, Jesucristu guánarügü.¹² Gayáraati lábunagun gürígia ligíbuagu ébuu ligía laú cátei gebégití le siñábei lágidúniwa, queísi gólu, pláta, lúma dübü gebégití, o gayáraati lábunagun láu cátei le mebégibei sarágu, le gayáraabei lágidúniwa, quei fuláansu, murísi o mabúru.¹³ Lachüllürüba wéyu lun loúchuni Búngiu jawádigimari sun gürígia uboúagu lun laríjini ída líña lán meja, ánjein gebégi lubeí lúmoun mebégi lan. Loúchagubei wawádigimaridun quei láu wátu geméti, aríja lámugei ánjein gayára lubeí lawándun, ánjein gebégi lubeí.¹⁴ Ánjein buídu lubeí wawádigimaridun luágu Búngiu áni madúnamati lun lagünrinchawagúniwa, queísi siñá lan tagünrinchawagúniwa múa to adügütü láu cátei derébuguti, werésibirubei wafáyeiruaja lúmagíñe Búngiu.¹⁵ Ánjein mabuídu lubeí wawádigimaridun luágu Búngiu, lagünrinchawagúba

sun wawádigimari, wefériderubei sun cátei, wawánirügüba wasálbara, quei le séfuguarügüti lúngua lídaangiñe wátu geméti.

¹⁶ ¿Ibidiñetísan jun luágú lilígilisin lan Búngiu jugúya, áni agánawa lan Sífiri Sándu jídan? ¹⁷ Ánjoun lagünrinchagua ában gürigia lilígilisin Búngiu tugúya, lagünrinchagubei gíñe Búngiu gürigia ligía, lugúndun Búngiu jabúremebi tílana lilígilisin, áni jugúya guánarügü tílanabei ligílisi tugúya.

¹⁸ Mayéeragua jumá júngua. Le arítaguti luágú sábiu lan segúnlíchú áu le lánina uboú le, lúnti labúlieiduni lichú áu ligía, lun lanügúniwa queísi ában ibídioouga táo segúnluboú, gayára lámuga lerésibiruni lichú áu le tímataati le líchugubei Búngiu. ¹⁹ Lugúndun lichú áu le lánina uboú le, ában libídouniga áu lun Búngiu. Taríñajare Lerérun Búngiu. “Áburugüda lumútiña Búngiu ja chúbaña áu segúnluboú le tídoun lisádaraana jabíbun guánarügü.” ²⁰ Aríñagatu gíñe. “Subúdi lumúti Wabúreme Búngiu luágú mála lan jasáminan sábiugu.” ²¹ Ligía moún lubei lun janáangun júngua luágú arúfudajati le jafálarubei, ladüga gürigia rügúñadiwa sun wagía, áni rúlaali Búngiu sun cátei jun lun lesériwidun jun. ²² Rúlaadina jun láu sun Apólos lúma Pédro, lun warúfudajan jun. Rúlaali gíñe sun cátei le uboúagubei jun lun jayúsuruni. Rúlumuti gíñe ibágari lúma oúwени jun. Sun le asúseredubéi jun ugúñe lúma sun le lúnbei lasúseredun jun, jáni. ²³ Jáni sun cátei ladüga lánigu Crístu jugúya, áni Crístu láni Búngiu.

4

Jawádigimari apóstolugu

¹ Lúnti lubeíti janügüníwa queísirügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabej jun. ² Le lubeíti ibíjiti ában wadágimanu, lúnti ladüguni buídu lun larúfuduni luágú gadüna lan lun leménigidun liyúbudiri luágú. ³ Ánjein luágú noúbadina, maweírinti nebéreserun luágú ída líña lan janüguni nesériwidun lun Búngiu, ni jugúya ni furúmieguarügü le uboúaguna. Ni áu guánarügü, siñáti naríñagun ánjein buídu lubeí nesériwidun lun, o ánjein níjein lubeí mégeiti luágú, ⁴ láu sun madúnrun nan luágú ni cáta lurúma narítagun, máma lueígiñe líra lun madúnrunbadina lan, Nabúreme agúseragüdübalina. ⁵ Magúseragüda jumá lubeíti luágú buri cátei lubáragiñe dan, agúra jumá lagíribudun Wabúreme Jesucristu uboúagun lun laságaruni cátei le arámudaguabej lídoun larúgouna. Lasúbudiragüdübei Wabúreme tarítagun cáda ában anígi, ca lan ueígiñe wadügei sun le adüga wamáalibei. Ábame ladímurejan Búngiu buíti luágú gürigia le buídubei adüga.

6 Nidújeñu, adímurejaadina nuoúguá lúma luágua Apólos queísi ában jémpulu jun lun gayáraabei lan jafúnrendeirun lídaangiñe le naríñagubei wawoúguá. Le lúnbei jafúnrendeiruni, lun manügün jumá ában gürígia weíri lueí le lúnbei lanügüniwa, queísi bürüwaňu lan, lun gíñe manáangun lan ni ában lúngua luágua ában arúfudajati le lafálarubei, áni lanügeime le ában quei ni cáta. 7 ¿Cági adügübalibú buídu javeí jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubeí íchugubalin sun cátei bun, ¿cáti uágu banáangua búngua camá jamuga ibíjarügü bumúti le búmabei láu báni búngua?

8 Jaganoún camá jamuga rísijadün lídan cátei lánina Búngiu, ibíja jumáali sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagía. ¡Buítí jamúga lun urúeigu jumá le tímatimaati lun jamúga gafánran wamá lídan jarúeijan! 9 Laganoún nun luágua ígira láadiwa lan Búngiu wagía apóstolugu lídan lagúmujoún ubáraü. Ítara wáña queísi gürígia ja siádiwañabaña lun oúweni, ñübinjadiwa lun ábanbadiwa lan aríawasei lun jaríaguniwa sun lílana uboú, dándu ánjeligu queísi gürígia. 10 Baríwatiwa queísi ibídiougua táo lueígiñe wesériwidun lun Crístu, sun jarítaguňu jumá juoúguá luágua chu lan jáu lídan cátei lánina Crístu. Según jugúa, wagía débilitiwa, jugúa jéretün. Barü jamutiwa gürígia quei ni cáta, ánjein jugúa, inébetün joun. 11 Chülü lúmoun wéyu le, áfagaadiwa ilámaü, mágürabu, lúma manáanguni, wuríbatí joúseruniwa gürígia, mábantiwa, ¹² weíriti wawádigimari láu wájabu lun wágüdaagun woúngua darí lun labúcharun wawágu. Anába jamútiwa gürígia, ába woúnabun láu abíniruni. Eíbaajoúatiwa, awánda wamúti. 13 Adímurejatiña wuríba wawágu, rútiwa dimúrei buítí joun láu gurásu. Chülü lúmoun wéyu le, oúsera jamútiwa camá ífei láni uboú, quei cátei le mabúseerun jamáali gürígia.

14 Máma nabürüjañein le jun lun janügün busíganu, nabürüjañein jun lun narúfudajan jun queísi joun nisáanigu jínsiñetiña nun. 15 Láu sun jamúga añájein lan díisi-mílu maésturugu arúfudajatiña jun luágua Crístu, áu rügüñein júguchi lídan jafíñen luágua, ladüga áu lan anügübalin ugánu jun luágua Wasálbaragüle lun gayáraabei lan jafíñerun luágua. 16 Amúriajatina lubeíti júma lun jáyeijani nigáburi.

17 Ligía noúnajaanbalin Timotéo lun líderagunün luágua cátei le. Jínsiñeti nun sarágu, ítara líña queísi ában niraü lídan Jesucrístu, gayáraati neménigidun luágua. Larítaguagüdübadün luágua ligáburi nabágaridun queísi afíñeti luágua Crístu, lun jáyeijani. Niján luwúyeri igáburi le narúfudajabeí tídan sun ligílísi lídan sun fulásu. 18 Añájein jídaangiñe, buin jáña láu anáanguni únguaü, jarítaguatiña luágua mídinbadina lan bisídaün ladüga nanúfudei

lun nagágibudagun júma. ¹⁹ Bulíeiguatiña, agúrabatina nídin aríjaün madíse, ánjein busén Wabúreme. Ábameti narijini ca lan jayáraabei barüguá túngua ja adüga lun jesériwidun lun Búngiu, máamarügü le jaríñagubei. ²⁰ Lugúndun dan le larueijan Búngiu tídan wanígi, máma láurügüti dimúrei, níjein lubáfu wádan lun wadüguni lugúndan. ²¹ ¿Cáteiti jímein jubeí, lun nabeíchunün dánme le nachülürün, ódi lun nídin aríjaün láu ínsiñeni lúma uálini?

5

Lagúserawagüdüin ában le adügübei figoú

¹ Agaambúaali luágu níjein lan ában jídaangiñe lagámariduñoun lúmari lúguchi. Ában oúnwenbun iwíyei líra, le majoúabei lun ni jádan ja ibidiñejabubaña lun Búngiu. ² ¡Áni laú sun líra, anáanguagidün júngua! ¡Lúntirügü jamúga jírudagun luágu líra! Gürígia le adügübalin lanárimé iwíyei le, lúnti labugún jídaangiñe. ³ Láu sun úa nan júma le ñí jubei, anájein júma narítagunrugu, áni darínaali lidúnrún le adügübalin figoú le, camá jamuga ñiñadina júma lun nagúseragüduni. ⁴ Guetó, le lúnbei jadüguni, lun joúndaragun lídan líri Wabúreme Jesucristu, ñíbadina júma narítagunrugu, ñíbei gíñe lubáfu Wabúreme Jesúsu júma. ⁵ Lúnti lubeíti jederegeruni wügüri ligía lun Máfia láu jaságaruni lidaangiñe jidámurin, lun lagúnrinchawagún lúgubu, sálba támuga luwáni dánme le lagíribudun Wabúreme Jesúsu uboúagun.

⁶ Moún lumuti janáangun júngua luágu le jadügübei. ¿Magámbun jumágili cátei le. résigüda lumútu murúsun ísi sun fulúwaaru to idounboun líchugúa? Ítara méme gíñe, murúsun figoú jagánagua gayáraati lagádeirunün súngubei. ⁷ Gidájumei lubeíti sun iwíyei le lánina binádu igáburi le ígirubei jídan, le ítarabei quei ísi le pasáali. Ábame jarúma jumá le tímatimaati. Ítara júba quei fein to eigíboun lídan fédu le páscua, to adügüboun táu fulúwaaru to sún umuti tañoúndawagún, to magánatu ísi. Jarúmaali wadáriragun woúngua ligíbugiñe Búngiu ladüga derége láani Búngiu Crístu lun loúnwen luágu wafigoun queí meja ladágaragüduniwa mudún lídan fédu le páscua luágu figoú. ⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme inárüni. Igáburi ligía, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti woúserun wuríba, ni lun wasígirun láu tiwíye wanígi. Sun igáburi ligía, ítara líña quei ísi pasáali.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri.

10 Máma meja naríñaguña jun lun jadísedun le gumúti jaweí sun lirájüñü uboú le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun uboúagugiñe. 11 Le nabúseerubei naríñagun jun, lun meméterun jumá lúmoun ni ában le aríñaguti luágu idújei lan lueígiñe Jesucristu áni salúfuriti, o meménijabuti, o judúguati joun sándu, o marásualuguti, bachárua o jíweru. Moún lumuti ni lun jeígin lúma idújei le ítarati. 12-13 Máma áu lúnbei nagúseragüduniña ja boúgudibaña lueí Crístu, Búngiuba agúseragüdaña. Wagía, lúnti wagúseragüduniña wadújeñu lueígiñe Jesucristu ánjein jadügüña lubeí wuríbati. Ligía gidájumei lubeí gafígoounti le jagánaguagiñe.

6

Wuríbu buri jagíbugiñe agúseragüdütiña ja máma afíñetiña

1 Dan le níjein lan cátei lúnti laríñaaajan ában jídaangiñe líri ámu, ¿cági uágu jídin jámoun agúseragüdütiña ja ibidiñebei Crístu joun, lubáragiñe jamúga jídin jámoun lánigu Búngiu? 2 ¿Odi ibidiñeti jun luágu jagúseragüdubaña lan lánigu Búngiu lánigu uboú? Ánjeinti jagúseragüdubaña lubeí lánigu uboú, ¿siñá jumuti buri cátei ñübürítí le aráansera? 3 ¿Ibidiñeti jun luágu wagúseragüdubaña lan gíñe ánjeligu? ¡Gúbuméti gayára lan wagúseragüdün luágu buri cátei lánina ibágari le! 4 Ánjein níjein lubeí buri wuríbu jagánagua luágu buri cátei le lánina ibágari le, ¿cámegi jídin aríñaaaja joun ja mafíñebaña luágu Jesucristu, ja málabei lichú áu le jádaanbei ladüga máma lan lúmagíñeti Búngiu? 5 Naríñaguñein le lun janügün busíganu. ¿Úati funági íbini ában chu táo jídan le gayáraati laráanseruni ában cátei jádan lidújeñu lueígiñe Jesucristu? 6 ¿Lúnti lídin ában idújei aríñaaaja líri lidúje joun agúseragüdütiña ja mafíñetiña luágu Crístu?

7 Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le adügübei jun sügü láu jageíndagun ladüga. Buítimaati lun jígirun lun líwerujoún jueí. 8 Ánjein jugúya, lubáragiñe líra, adügatün maríchaü, íweruja jugúya, íbini jaweí jidújeñu guánarügü.

9-10 ¿Ibidiñeti jun luágu ja lan adügübaña wuríbani, mafánranbaña lan lídan larúeijan Búngiu? Sun ja agámaridubaña mamárieidunga, ja ájuduragubaña joun sándu, ja agámaridubaña ja maríetiña, ja wügüriña ja agámaridutiña wügüriña jáledi, jíwerutiña, meménijabutiña, bacháruatiña, marásualugutiña, ja anügübalin láni ámu láu jabíbun—sun ja adügübaña wuríbani líbe buri le, siñábei jebélurun lídoun larúeijan Búngiu siélu. 11 Añájein jídaangiñe, ítara jañá meja, ánjein guetó, chibáwaali

jifígoun, derégeguadün júngua lun Búngiu, áni resíbi láadün queísi lánigu ladüga le ladügübei Wabúreme Jesúsu juágu, lúma sun le ladügübei láni Búngiu Espíritu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladüguni gürígia le labúseerun ladüga.” Inárüni líra, áni máma sun cátei lun buídu lan lanügün. Gayáraati ladüguni gürígia le labúseerun, wel, moún lumuti lígiraguagüdün lúngua lun lagúmadiruni layúmajan. ¹³ Inárüni le aríñawagúbei luágu ladüguni lan Búngiu eígini lun weígini, adügaleí warágeirugu lun ladüguni wadágimanu láu weígin. Inárüni, áni lagúmuchaguagüdübei Búngiu biángubei cátei le, mamégeirun wamáalime. Ánjeinti wágubu, madügünti lun wadügün salúfuri láu, ladügün wágubu lun Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu. ¹⁴ Ítara quei lásaaragüdüni Búngiu Crístu lídaangiñe oúweni láu sun lúgubu, lásaaragüdübadiwa gíñe láu sun wágubu, láu lubáfu.

¹⁵ ¿Ibídiñetisan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanügeiméti núgubu le líbiribei lúgubu Crístu lun nadüguni líbirime túgubu ában jóru? ¡Madügün nubeí! ¹⁶ ¿Ódi ibídiñeti jun luágu dan lan le leméterun ában gürígia túmoun ában jóru, biángubei jagía ñübintiña lun ítara jabá lan quei ában méme úgubu? Taríñajare Lerérunt Búngiu. “Jayábinba biángubei lun ítara jamá quei ábanrugi.” ¹⁷ Ánjein dan le liábin ában gürígia lun lídan lan ában lúma Crístu, ában liábin láni Crístu Espíritu lun ában lan lúma láni gürígia ligía espíritu lun ábanrugi jamá espíritu.

¹⁸ Anúraja jumá lubeíti lueí salúfuri. Mítaraanti salúfuri queísi ámu figoú, furúmiñeguarügü ámu figoú le jadüga gürígia, boúgudin lueí jágubu ladüga dáñu, ánjein le agámariduti mamárieidunga, ladüguni figoú luágu lúgubu guánarugi. ¹⁹ ¿Ibídiñeti jun luágu lúban lan Sífiri Sándu wágubu, le líchugubei Búngiu woun lun laganoún wádan? Máma wagia labúriñabei wágubu, Búngiu labúremebi. ²⁰ Agáñija lumútiwa Búngiu séru lun lánigu wamá. Ligía lúnti lubeí wíchugun inébesei lun Búngiu dándu láu wágubu quei láu wáni espíritu lugúndun láni Búngiu biángubei.

7

Dimúrei buri luáguti maríei

¹ Guetó noúnabaali lé buri uágubei jálögüdana tídan jigáradan to jabürüjaboun nun. Inárüni luágu buídu lan lun wügüri lun magámaridun lan, ² quei níjein lubeí sarágu salúfuri, buítimaati lun lagámaridun wügüri, lun gíñe tagámaridun würi, súnwandan

láu amárieiduni. ³ Lúnti lagúnlifirun wügüri túma lúmari queísi úmari, lúnti gíñe tagúnlifirun würi lúma túmari. ⁴ Máma úmari to würi labúremeboun túgubu guánarügü, láni gíñe túmari. Máma gíñe úmari le wügüri labúremeboui lúgubu guánarügü, táni gíñe lúmari. ⁵ Mamájara jumá lun jesériwidagun júniwagua, áanjaün gubeírügü adüga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Lárigiñe líra, lúntiya jayúsuragun júngua, lueí lásiñerun jágüdaagun júngua, ábame lafigoungüdünün Máfia láu jeméterun jámoun ámu jaweí jámarigu.

⁶ Máma naríñaguña luágu lúnti lan jagámaridun, gayáraarügti jáluajan úmari lun jamárieidun jáma áanjaün busén. ⁷ Áu, buséntina jamúga lun sun lan gürígia gayára lan jágüdaagun joúngua lun magámaridun jamá queísi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigiñabaña, jáma ja jiláañabaña úmari, aríñagatina joun luágu buídu lan jamúga lun jeréderun mámariga queísi áu, ⁹ áanjein siñá lubei jágüdaagun joúngua, buíti lun jagámaridun (súnwandan láu amárieiduni) sügü láu lun jeréderun láu ában luweírin ayúmajani le siñábei jawánduni.

¹⁰ Ánjaña ja maríeijañaña, aríñagatina joun lun mígirun táani würi túmari. Gumádi le, lídan lubúdubu máma nugúmadin, lugúmadin Wabúreme. ¹¹ Láu sun líra, áanjein tígira würi túmari, lúnti teréderun mámariga, o taráandarun lan lúma túmari. Moún lumuti gíñe lígirunun wügüri lúmari.

¹² Joun jíbiri, aríñagatina queísi dimúrei le náni, máma láni Wabúreme, luágu áanjein lan mafíñen tubeí lúmari ában le afíñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma. ¹³ Áanjein gíñe mafíñen lubeí túmari ában würi to afíñetu luágu Crístu, áni gagúndaanti lun lasígirun agánawa túma, moún lumuti tafánreinragun lúma. ¹⁴ Úmari le mafíñebeti, derégewaali lun Búngiu láu lídañañein lan ában túma lúmari to afíñetu luágu Crístu, úmariti to mafíñetu, derégewaaru gíñe lun Búngiu láu lídañañoun lan ában lúma túmari le afíñebeti luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafíñebaña, ítara, derégewaunu jáña lun Búngiu. ¹⁵ Áanjein busén lubeí úmari le mafíñebeti luágu Crístu lun lígirunun lúmari, o würi to mafíñeboun lun tígiruni túmari, ígiragua jamá. Lídan oúbaü líra, moún lumuti jafósuruniña úmarigu ja afíñebaña úmarigu ja mafíñebaña lun jeréderun jáma, lugúndun wájali Búngiu woun lun wabágaridun lídan darángilaü. ¹⁶ Ában gíñe cátie, ¿cági basúbudirubei, amürü würi, áanjeindügü gayára lubeí basálbaruni búmari láu beréderun

lúma? ¿O cágí basúbudirubei, amürü wügüri, áneindügü gayára lubeí basálbarunun búmari láu beréderun túma?

¹⁷ Lídan sun luwúyeri, lúnti labágaridun cáda ában quei líchuguni Wabúreme lun, áni quei lubeí meja gíñe, dan le lagúarunbei Búngiu lun lun lánigu lan. Ítara líña nariñaguni tídan sun ligílisi. ¹⁸ Ánjein agúara Búngiu lun ában gürígia le resíbi láalibei circuncisión, lé meja liseíni lidáradun Búngiu jáma lánigu, lúnti leréderun ítara, ánjein gíñe agúara lun ában le merésibirungili circuncisión, moún lumuti lerésibiruni. ¹⁹ Mebéresenwati ánjein resíbi lubeí circuncisión lúmoun merésibirún lán, le busénwabe, lun lagúncularúniwa lugúmadin Búngiu. ²⁰ Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan. ²¹ Ánjein meja idámuni bubeí dan le lagúarunbei Búngiu bun, madíjeribá luágu líra, ánjeinrugi liñati gayára lubeí báfuridun lídaangiñe idámuni ban, adügabéi. ²² Lé meja idámunibei lun labúreme ya uboúagu dan le lagúarúnbei lun lun lafiñerun luágu Crístu, gidáali lueí lubáfu figoú lun lesériwidun lun Wabúreme Jesucristu, ítara méme gíñe, lé meja mámabei idámuni lun ában gürígia uboúagu dan le lagúarúnbei lun, lidámunjali Crístu, ligájali Labúreme. ²³ Agáñija láadün Búngiu luágu oúnwenbun ebégi, mígira jumá lun janügünün wügüriñia lidámunme jagúndan, lidámun jumá lugúndan Búngiu. ²⁴ Ítara líña lubeíti, nidújeñu, madíjeri jumá cátañañadün lan boúgudigiñe jibíti, reídei jumá ligíbugiñe Búngiu lídan méme igáburi lé meja gádaanbalün dan le lagúarunbei jun.

²⁵ Jawágu gürígia ja mámarigiñabaña, úati ni ában gumádi núma le jamúga lúmagiñeti Wabúreme, nariñagaali le narítagun, áu queísi ában le gadünatí lun lafiñerúniwa luágu, luágu lareíni Wabúreme le rújalibei murúsun lídaangiñe lichú láu nun. ²⁶ Lídan narítagun, lúnti leréderun gürígia quei lubeí, ladüga buri lidére dan le gádaanbaliwa. ²⁷ Ánjein gámari bubeí, málugabá bígiragun, ánjein mámari bubeí, málugabá bagámaridun. ²⁸ Ánjabu amárieida, máma figoú, ánjoun gíñe amárieida ában irájü, máma gíñe figoú, láu sun líra, ñíbei asúfuriruni joun ja gámaribaña, áni buséntina jamúga masúseredun lan líra.

²⁹ Nidújeñu, niján le nabúseerubei nariñagun. Murúsun rügáali dan wabá lun wesériwidun lun Búngiu. Lúmagiñe lubeíti guetó, ja gámaribaña, lúnti jesériwidun lun Búngiu tát sun janígi camá jamuga mámaritiña. ³⁰ Moún lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagidaruníwa lueí wadügüni le lúnbei wadügüni quei esériwidutiña lun Búngiu, ladüga loúguati dan.

31 Masáminara jumá sarágu luágu lubuídun cátei lánina uboú le, le jáníbei lun jayúsuruni, ladüga uboú le, le waríjibe, lagúmuchuña, lúnti jarítagun luágu cátei le magúmuchadibei.

32 Buséntina lun madíjeri lan jarítagun luágu ni cáta. Dan le mámari lan ában wügüri, larítagun luágu buri cátei le luáguti Búngiu lúma lun lesériwiduni buídu. 33 Ánjeinti dan le gámarijali, larítagun luágu buri cátei le lánina ibágari le, lúma lun lesériwidunun lúmari buídu, 34 biánguañein cátei lun leténirun lun—lun lesériwidun lun Búngiu lúma lun latoúnigirunun lúmari. Amuti gíñe toúserun würi maríeitu tueí to mámariboun. To mámariboun, tarítagun luágu buri cátei le luáguti Wabúreme Búngiu, lun derégeguñu tan túngua lun Búngiu dándu láu túgubu queísi táu tanígi. Ánjounti to gámariboun, tarítagun luágu buri berésegu lánina ibágari le, lúma lun tesériwidun buídu lun túmari.

35 Naríñaguñein le jun luágu jáni fuléísei, máma naríñaguñein lun mamárieidun jumá. Naríñaguñein lun jabágaridun lídan ában igáburi le buíti, esériwideina lun Wabúreme, derégeguñu júngua lun, marítagunga sarágu luágu cátei lánina ibágari le.

36 Agübürigu ja arítagubaña luágu buídutima lan lun tamárieidun jaraü lugúndun taweýaaduña lan, áni ánjein buítima lubeí líra, lúnti jadüguni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figoú líra. 37 Ánjein añájein lubeí ámu agübürigu, derégüdaguatiña lídan jarítagun luágu moún lumuti lan lun tamárieidun jaraü, áni memégeiruati lun tíchugúniwa, áni gayáraati jadüguni le jabúseerunbei, buíti jadüga lun míchugun jamánun jaraü lun tamárieidun. 38 Ja lubeíti íchugutu jaraü lun tamárieidun, buíti jadüga, ja míchuguntu, buítimaati jadüga.

39 Würi to maríeitu, lábugiñeñoun leréreejan túmari, lurúma lúrudu, sun wínwangili lan, ánjein oúwe túmari, gayáraati tamárieidun lúma le tabúseerun, afíñeti rügáali ligía luágu Crístu.

40 Láu sun líra, buítimaabei dan tun ánjounya mamárieidun. Ligía narítagunbei, áni afíñetina luágu ligía lan gíñe larítagunbei láni Búngiu Espíritu.

8

Eígini buri le adágawagüdüti joun sándu

1 Guetó nadímureja luágu eígini le adágawagüdüti joun sándu. Inárüni luágu subúdi wamáni luágutí buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburi.

2 Le arítaguti luágu níjein lan lasúbudirun, ibídiñegilirügü líña ni

cáta lun queísi lubúdubu. ³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luáguti lubeíti leigín eígini le adágarawagüdüti joun sándu, inárüni luágu ni cáta jamá sándu uboúagu, máma jamá búngiugu ladüga subúdi wamúti luágu ában rügüñein lan Búngiu. ⁵ Añájein mútu uboúagu, jarítaguatiña luágu añájein lan bürübunu búngiugu jáma abúremeigu siélu lúma uboúagu, ⁶ ándeinti woun, wagía le afíñebeí luágu Crístu, ában rügüñein Búngiu, le Wáguchibei. Ligía adügübalin sun cátei, áni ligía le únbei wesériwida táu sun tarúman wanígi. Ában rügüñein gíñe Wabúreme, le Jesucristu, le Ídaangiñebei ladügüwa sun cátei, áni ligía le ídaangiñebei wibíjai ibágari magúmuchaditi.

⁷ Másutiña ja afíñebeña luágu Crístu gayára jafíñerun luágu ni cáta jamá sándu, añájein já meja jéchubaña ájuduragua joun sándu, jou jamágili eígini ligía queísi cátei adágarawagüdüti joun búngiugu. Queíti loúgu lubeí jafíñen luágu gayára lan jeígni afíñetiña eígini ligía, ába mabuídun lan lasándiraguagüduniña joúngua ligíbugiñe Búngiu láu jeígni eígini ligía. ⁸ Inárüni le jaríñagubei luágu máma lan cátei le weígibei gayáraagüdübalin lerésibiruniwa Búngiu, mabuíduntimaabadiwa ligíbugiñe Búngiu lueígiñe weígin, maríbaduntima wagíame lueígiñe meígin wáma. ⁹ Gayáraati jeígin eígini le adágarawagüdüti joun sándu, lúntirügü goúnigi jumá lueí jeíguadagüduniña jidújeñu lueígiñe Crístu ja loúguabaña jafíñen ánjein buídu lubeí lúmoun mabuídun lan. ¹⁰ Quei jamúga guetó, amürrü le subúdijabúbei luágu gayára lan beígin furúmieguarügü eígini, bañúura eíga lídan ában fulásu le joúnti sándu, laríjabu ában idújei le débiliti lafíñen luágu buri cátei le, ñi, lanürgüba gurásu buágu lun gíñe leígin lídaangiñe eígini le, le adágarawagüdüti joun sándu. ¹¹ Ítara, ladüga bisúbudin, férídigunga bumúti bidúje le débilibeí lídan lafíñen le gíñe ueígiñebei loúwe Crístu. ¹² Dan lubeíti le jañáwarijani jarítagun idújeñu ja débilitaña lídan jafíñen, jadügüña lun jafígounjan jidújeñu, áni jugúya guánarügü jafígounjaña gíñe. ¹³ Ligía, ánjein lubeí náburugüda nidúje lídoun figou ladüga cátei le neígibei, buítimaati lun meígindüguya nan úwi lueí nafigounjagüduni.

9

Lirícha buri ában apóstolu

¹ Áu, furáangutina lun nadügünü le nabúseerubei, garíchatina gíñe queísi ában apóstolu, aríja náali Wabúreme Jesúsu, áni jugúya guánarügü asálirubaña lídaangiñe nuwádigimariidun luágu Wabúreme. ² Fáguá manügün jabádina jíbiri queísi apóstolu, ándeinti jugúya, gásu janügünina queísi apóstolu,

lugúndun láu afíñe jumá luágu Crístu, arúfuda lumúti líra luágu inárüni lan luágu ában nan apóstolu.

³ Niján noúnabagülebei joun ja adímurejabaña nuágu. ⁴ Garíchatina lun nerésibiruni sun le íchugúbei nun lun neígini lúma lun nátuni queísi nafáyeiruaja luágu nuwádigimari luágu jáni fuleísei. ⁵ Garíchatina gíñe lun namárieidun túma ában würi to afíñetu luágu Crístu, lun gíñe nanügúnun númagua luágu nuweíyasun quei ladügünü Pédro jáma ja jíbiri apóstolugu, jáma gíñe ja lamúlenu Wabúreme. ⁶ ¿Ódi jarítaguatün luágu áu rügüñlein lan lúma Bernabé marícha lun werésibirun wágüdaja júmagiñe lun gayára lan wígiruni wawádigimaridun láu wájabu lun wapúrichijani Lerérung Búngiu? ⁷ Queísigubeirügü, máma súdaara guánarügü afáyeirubalin cátei lé buri layúsurubei, le ábunagubei beíbei, joúti tídaangiñe, le oúnigirubei bágasu, guráti lídaangiñe míligi le lamíligijabei. ⁸ Áni marítagua jumátia luágu naríñaguñein lan le queísirügü jarítagun gürígia, lugúndun aríñaga lumúti gíñe lilúrudun Moisés. ⁹ Laríñajare tídan lilíburuna lúrudu. “Magüraguabeí liyúma bágasu le lánina wadágimanu lueí leígin lídaangiñe ílaü le láferejabei.” Máma laríñaguñein Búngiu líra jawágurügü bágasu, ¹⁰ laríñaguñein gíñe queísi ában jémpulu woun. Luágu wáni fuleísei labürüdüwa lúrudu le, lugúndun dándu le awoújabalin múa, queísi le éferejabalin líla nádü, lúnti jadügünü láu eménigini luágu jerésibirubei lan jafánran lídaangiñe alúbajani. ¹¹ Queísi bunágu wamáali lubeí Lerérung Búngiu tídan janígi, ¿gíbeti funági laríjín jun lun walúbajan murúsun cátei júmagiñe lun wágüdaagun woúngua? ¹² Ánjein garícha jabeí ámu lun líra júmagiñe, garíchatimáatiwa.

Mayúsu wamúti iríchaü le wawágubei. Lubáragiñe líra, awánda wamáali sun le wemégeirubei lueí lejénreendun jun agáambei wapúrichijani Lerérung Búngiu, ladüga wamúriajan wágüdaja júmagiñe. ¹³ Subúdi jumúti luágu ja lan ñadágimeinbaña ligílisirugu, lídaangiñe le ligílisirugubei jawínwanda. Ja eténirubaña lun latárü le ñí lubei líchugúa adágaragüdüni, joútiña úwi jádaangiñe anímaalu ja adágarawagüdübaña ñi. ¹⁴ Ítara líña gíñe laríñaguni Wabúreme Jesúsu lun ja lan apúrichijabalín ugánu luágu, lun gíñe jádaangiñe lan ja agáambubalin ugánu ligía jawínwanda. ¹⁵ Áu, mayúsugidina ni ában lídaangiñe iríchaü le, máma gíñe nabürüjañein le jun lun jíchugun som cátei nun. ¡Jímein numúti noúnwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

¹⁶ Máma cátei lúnti napántajan luágu láu napúrichijani ugánu

luáguti asálbaruni jun, lugúndun mósu nadügüni. ¡Fugiábu áu áanjein mapúrichijan nan ugánu le! ¹⁷ Lun jamúga mínsiñe lan nun lun napúrichijan, láu sun luwúyeri mósu nadügüni ladüga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajatina, ¹⁸ afáyeiruajaü ligía, lun gayára lan napúrichijan luágu Wasálbaragüle, magúburajanga ni cáta, márügündünganeí nirícha lun nawínwandun lídaangiñe nuwádigimari queísi apúrichijati.

¹⁹ Láu sun mábuti nan uboúagu lun nagáambuni, rúguadina núngua jadámunme súngubei, lun nagáñeirun sarágu gürígia lun Crístu. ²⁰ Dan le jagánagua nan juríu, ába nadügün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúrudu ligía lun nagáñeiruniña, láu sun mámañadina lan lábugiñe lúrudu ligía. ²¹ Lun nagáñeiruniña ja mámabaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubeí lilúrudun Crístu. ²² Dan le jáma nan ja loúguabaña afíñe luágu cátei le gayáraabei jadügüni afíñetiña, madügüntina ni cáta le uágubei jarítagua luágu mabuídun lan ladügüniwa, lun gayára lan nagáñeiruniña. Rúguadina núngua queísi cáda jawúyeri gürígia lun añájein lan nasálbarun lídan furúmieguarügü luwúyeri. ²³ Nadügüñein sun le lun lasúbidirúniwa ugánu le lánina asálbaruni, lun gafánraanbadina lan lídan buídu le lanügübei ugánu le.

²⁴ Subúdi jumúti luágu gíbe jamá eíbaagutiña lídan ában eíbaaguni, áni ában rügüñein jádaangiñe agáñeira. Eíbaagua jumá lubeíti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun. ²⁵ Sun ja aráansejabaña lun jebélurun lídoun juráraü, joúchatiña lun madügün jamá ni cáta le gayáraabei lásiñeragüdüni jájurerun. Áni jadügüni lun jagáñeirun ában rídi le láuti ubánaü. Ánjeinti wagía, wáfaaguña lun wibíjin ában rídi siélu le lúnti ladúrarun lun sun dan. ²⁶ Áu, neíbaaguña lídan ibágari le, rúñuneí naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyuajabei garábalirugu, ²⁷ lubáragiñe líra, áfara numúti lugúndan núgubu, fósuneí lun lagáambunina, lueí lubeígia neféridiruba lan lárigiñé buga arúfudajadina lan joun ámu luágu lubuídun üma lun wachülürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguagüdünen luágu lé meja asúseredubei joun binádu wagübürigu lídan lé meja lídan jamá

fulásu mageírawati, luágu ñíñein lán meja Búngiu lídan ában juánriñu joúgiñe lun loúnigiruniña. Séfuti gíñe lanügünüña súngubei dan le jájiñuragunbalin Barána Funáti. ² Ítara lína queísi ában abásteruni joun láu jásügürün labádinaguagiñe barána, lúma juánriñu joúgiñe. Lídaañanu ában lúma Moisés lun jafálaruni ladüga ligía lan abúgurubaliña. ³ Joútiña gíñe sun jagía lídaangiñe ában méme eígini le líchugubei Búngiu joun, siélugiñe, ⁴ rúati gíñe dúna joun súngubei lídaangiñe ában dübü lun játun. Ñíñein Crístu jáma luágu sun jaweýasun lun fuleísei lániña láu dúna lun játun. ⁵ Láu sun líra, madügün jamúti jíbeägei lugúndan Búngiu, ába lamágundarun Búngiu jáma. Ligíati joúwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadügünü. ⁷ Ligía májuduragua jumá lubeí joun sándu queí meja jadüga jádaangiñe, queísi taríñaguni Lererun Búngiu luágu jefédujan joun sándu. “Ába jañúurun gürígia eíga lúma áta, lárigiñe, ába jásaarun eféduja.” ⁸ Moún lumuti wadügün salúfuri queí meja jadüga jádaangiñe, ába larúfuduni Búngiu luágu wuríba lan le jadügübei láu loúwegüduniña mílu gürígia jádaangiñe lídan ában wéyu. ⁹ Moún lumuti gíñe wáluajani lében lugúraasun Búngiu woun láu luríban wagáburi, quei jadügünü jádaangiñe, ába joúwegun láu lágüragüduniña joun jéwe. ¹⁰ Mamágundara jumá gíñe lúma Búngiu quei jadüga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agübürigu, ába labürüdün tídan Lererun Búngiu queísi jémpulu woun, wagía le wínwanbei lídan lagúmujoún dan le, lun wasúbudiruni buídu luágu mínsiñe lan figoú lun Búngiu. ¹² Le lubeíti jarítaguabei luágu derégüdagua lan leíbugun lúma Búngiu, toúniligá, máburujalá lídoun figoú. ¹³ Oúchawaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin oúchawaguni le jásiñerun awánda. Lubáragiñe líra, dánme liábin oúchawagúni, larúfudubei gíñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu. ¹⁵ Nadímurejaña jun queísi joun gürígia gunfaráandatiña, samína jumá júngua ánjein buídu lubeí le nariñagubei jun, lúmoun mabuídun lan. ¹⁶ Dan le werésibirun, dan le wátun lídaangiñe uníñein le uágubei Wíchiga eteíngiruni lun Búngiu, arráfuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weígin tídaangiñe fein to

wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun oúweni luágu gurúwa ligía. ¹⁷ Queísi jou wabeí tídaangiñe ában méme fein, arúfuda lumúti líra luágu lídaañadiwa lan ában láu sun gíbe wamá.

¹⁸ Aríja jumá lun násifun le linásiñun Israél. Ja eígibaña lídaangiñe eígní lé buri adágarawagüduti lun Búngiu luágu latárü, lídaañañu lan ában jámagua, lúma lúma Labúreme latárü. ¹⁹ Máma nariñaguña luágu wínwan jamá sándu, maríñaguntina gíñe luágu weírigutima lan úwi le adágarawagüdubei joun sügü láu ámu úwi. ²⁰ Le nariñagubei, luágu dan lan le jadágaragüdün ja ibidiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu. ²¹ Siñáti játun lídaangiñe licópun Wabúreme Jesucristu úara lúma játun lídaangiñe jacópun máfianu. Siñáti gíñe jeígin luágu lidábulan Wabúreme Jesucristu úara lúma jeígin luágu jadábulan máfianu. ²² ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági lueí Búngiu lun manúfudebadün lan lueí ligáñi?

Lúnti jínsiñejabu jamá lánigu Crístu

²³ Inárüni le aríñawagúbei luágu gayára lan jadügüni gürígia le jabúseerun, láu sun líra, máma sun cátei buiti láburuan. Gayáraati jadügüni gürígia le jabúseerun, láu sun, máma lan sun cátei lun líderaguniña ámu gürígia lun joúdin jabáruaguouún lúma Crístu. ²⁴ Lúnti warítagun luágu le buídubei joun ámu gürígia, máamarügü lan wawoúguoun warítagua.

²⁵ Niján le lúnbei jadügüni luágu úwi. Joújuma lídaangiñe sun cátei le alúgurajoúbei mágidirugu, málügüdajanga juguya ánjein dágüdawa lubeí joun sándu lúmoun madágarawagüdün lan, ²⁶ maríbadalá jarítagun luágu, gayáraati jeígní, lugúndun láni Wabúreme múa láu sun le lídaanbei.

²⁷ Ánjaün lamísuraja ában gürígia le mafíñeti luágu Crístu lun jídin eiga lúma, gayáraati jídin ánjaün busén. Joújumei le íchugúti jun, málügüdajanga ni cáta, mebéresen jumá ánjein dágüdawa lubeí eígní ligía joun sándu furúmiñe, lúmoun madágaragüdünwa lan. ²⁸ Ánjein aríñawagua jun luágu dágüdawaali lan eígní ligía joun sándu, meíga jumeí, lueí jadügün dáñu lun le aríñagubalin jun, lueí gíñe laríbadun larítagun. ²⁹ Nadímurejañatia luágu larítagun le ában, máma luágu barítagun.

Gayáraati jamúga funa laríñagun mútu. “¿Cásan uágu lúnti lubeí lafálaruni ában gürígia le larítagun ámu? ³⁰ Ánjein gayára lubeí níchugun eteíngiruni lun Búngiu luágu le neígibei, ¿cábagi

uágu jadímu'reja nuágu lueígiñe neígini?" ³¹ Ánjaün lubeíti eíga o áta o jadügün furúmiegu'rügü cátei, adüga jumeí súngubei lídan ában luwúyeri le íchugubei inébesei lun Búngiu. ³² Míchiga jumá lóbuna eíguaduni lun ni ában, ni joun juríu, ni joun ja mámabaña juríu, ni joun ja lánigu Búngiu. ³³ Au, joúchatina lun nagúndaaragüdüniña súngubei lídan sun cátei, máma rügüñein nuoúgua narítagua, jarítaguatina gíñe jawágu jíbiri lun gayáraabei lan jayábin lun jafíñerun luágu Jesucristu lun jasálbarun.

11

¹ Áyeija jumeí nigáburi queísi náyeijani ligáburi Crístu.

Würíñña lídan joúndaragun afíñetiña

² Nidújeñu, gúndaatina jáu luágu súnwandan lan jarítagun nuágu, lúma luágu falá jumani arúfudajani le níchugubei jun. ³ Guetó, níjein ámu arúfudajani le nabúseerubei lun gunfaráanda jumáni, luágu Crístu lan lichügüdinabeí cáda wügüri, wügüri tichügüdina lúmari, ítara quei Búngiu lan lichügüdinabeí Crístu. ⁴ Nibúsigarídünati lun ladáuragun ában wügüri láu lábulugu dan le layúmuragun lun Búngiu, eteíngirei lídan jadámurin afíñetiña, o dan lan le lariñagun ugánu le ladímu'rejan Búngiu liyúmulugugiñe wügüri ligía, ladüga láu líra, larúfuduñein luágu níjein lan ában wügüri weírigutimaati lanügüni lueí lídan adámurini ligía, áni Crístu rügüñein weírigu jádan sun wügüriña. ⁵ Nibúsigarídünati gíñe lun madáuragun tan würi láu tábulugu dan le tayúmuragun lun Búngiu, eteíngirei lídan jadámurin afíñetiña, o dan lan le ladímu'rejan Búngiu tiyúmulugugiñe, ladüga láu líra tarúfuduñein tamájarun lun tanügüni wügüri weírigu sügü táo, wuríbati líra, queísigubeirügü jamúga lasarún tídiburi queísi wügüri. ⁶ Ánjoun madáuragun ában würi láu tábulugu, buítimaati lun tásaruni sun tídiburi, áni áanjein busíganudüna lubeí tíbuguni würi tídiburi o tásaruni lan tábulugu, darúguatá láu tábulugu. ⁷ Moún lumuti ladáuragun wügüri láu lábulugu lídan jadámurin afíñetiña lugúndun liyáwa Búngiu ligía, áni arúfuda lumúti luweírigun Búngiu. Ánjounti würi, arúfuda tumúti luweírigun wügüri, ⁸ lugúndun dan le ladügünbalin Búngiu wügüri, máma tídaangiñe würi ladügei, würi ladügüboun lídaangiñe wügüri. ⁹ Adüga lumútu Búngiu würi lun wügüri, máma wügüri tun würi. ¹⁰ Ligía lúnti lubeí tadáuragun würi láu tábulugu lídan jadámurin afíñetiña queísi liseíni derégüdaguaü lábugiñe lagúmadijan wügüri, lúma lun jagúndaarun ánjeligu láu tagúfurumadun. ¹¹ Láu sun líra, lídan wabágari queísi afíñetiña, mégei lumútu wügüri würi, mégei tumúti gíñe würi wügüri. ¹² Queísi inárüni lubeí luágu

lídaangiñe lan wügüri tadügüwa würi, ítara líña gíñe inárüni lan luágu würi lan íchugubalin wügüri uboúagu, áni sun cátei lúmagiñe Búngiu liábin.

¹³ Ítara líña lubeíti, samína jumá júngua ánjein buídu lubeí lun tayúmuragun würi lun Búngiu lídan adámurini madáuragunga láu tábulugu. ¹⁴ Jéchutiwa wagía gürígia lun warítagun luágu busíganu lan lun migínagu lan lídiburi wügüri. ¹⁵ Ánjoun würi, ában uwéndeni tun lun migínagu lan tídiburi, ligía líchugúnbei ídiburi migínaguti tun lun tadáuragun láu tábulugu. ¹⁶ Ánjein níjein lubeí busénti lasígenajan luágu cátei le, lúnti lasúbudiruni luágu ni lan wagía, ni já buri jíbiri tílana lilígilisin Búngiu masúbudiruntiwa ámu igáburi lueí líra.

Luríban jagáburi afíñetiña dan le jeígin luágu lidábulan Wabúreme Jesucristu

¹⁷ Nabürüja jun guetó luágu ában cátei le siñábei naríñagun luágu buídu lan jadügünü, lugúndun genége lumúti luágu adüga lán buri joúndaragun dáñu jun lubáragiñe jamúga ladügün buíti. ¹⁸ Furúmiñeti cátei, aríñawagúati nun luágu dan lan le joúndaragun, níjein lan fánreinguaü jídan, áni afíñetina luágu níjein lan inárüni lídan le aríñawagúbei. ¹⁹ ¡Fágua lúnti ñi lan fánreinguaü jídan lun lasúbudirúniwa cátaña lan afíñetiñabaña ja tímataatiña! ²⁰ Láu buri fánreinguaü le, dan le joúndaragun lun jeígin luágu lidábulan Wabúreme Jesucristu, siñáti jeígin láu ában igáburi le íchugubei inébesei lun, ²¹ lugúndun dan le lachüllürün óra lun jeígin, meígintün nege lídan ában. Lubáragiñe líra, cáda ában, ába loúfudajan eígei eígnini le lanügübei. Ja siñábei janügün gíbeti, ába jeréderun láu jaláma. Jayábiti jídaangiñe, ába játun sarágu darí lun jabácharuadun. ²² ¿Mábantün funági lun jeígin lúma lun játun ñi? Láu igáburi le, barü jumutiña tílana lilígilisin Búngiu quei ni cáta, rújumaña ja úabei ni cáta jáma lídoun busíganu. ¿Cábagi naríñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu loúnwen Wabúreme

²³ Lúmagiñe guánarügü Wabúreme Jesucristu nerésibirei igáburi le warítaguagüle luágu loúnwen, lé meja níchugubei jun. Queísi le nubeíbei jun, luágu le lan áriebu le lalúgurúnbei Wabúreme, ába lanügünun fein lújaburugu, ²⁴ lásun líchugun eteíngiruni lun Búngiu tuágu, ába lagúbachagunun lun lafánreinragunun jádan lánigu, ába laríñagun. “Joújuma, núgubu le, le nedéregerubei luágu jufúleisein. Adüga meme jumeí cátei le, jarítaguagüleme nuágu.” ²⁵ Ítara gíñe, lásun jeígin, ába lanügüni cópu táo diweín lújaburugu, ába laríñagun. “Cópu le táo diweín to, liseíni iséri lidáradun Búngiu júma, le achoúrurúabei láu níta le lúnbei láwiyurun lídaangiñe núgubu juágu. Ságüme

játuni, adüga jumeí lun jarítagun nuágun.”²⁶ Ítara líña lubeíti, daríme le lagíribudun Wabúreme uboúagun, ságüme jeígin fein, gurá jugúa diweín to jarítaguagüle luágu Jesúsu, jarúfuduñein luáguti loúnwen Jesúsu wawagu.

Ligáburi leigín eígini le arítaguagülei luágu Jesúsu

²⁷ Furúmieguarügü le eígitu fein tugúa, guráloun diweín to láni Wabúreme Jesucristu lídan ában igáburi le míchuti inébesei lun Búngiu, ladügüña figoú ladüga líchuguña lan minébesei lun lúgubu Wabúreme lúma líta. ²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun. ²⁹ Lugúndun ánjein erésibira marítagunga luágu laníchigu lánina lúgubu Wabúreme, labeíchubei Búngiu. ³⁰ Ligía añájein lubeí sarágu jídaangiñe, sánditiña, débilitiña, jilágu jíbiri. ³¹ Ánjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara. ³² Dan le labeíchuníwa Wabúreme, ladügüñein líra lun wasúbudiragun woúngua, gayára lámuga wasáansiraguni wagáburi lueí wefériderunme úara jáma lirajüñü uboú.

³³ Ítara líña lubeíti nidújeñu, dan le joúndaragun lun jerésibirun, agúrabagua jumá júngua. ³⁴ Ja lamátiña, joújama jábiñe, mabeíchun lámugaña Búngiu luágu luríban ligáburi joúndaragun. Lé buri líbiri cátei naráanserubei dánme le nídin aríjaün.

12

Ubáfu buri le líchugubei Sífiri Sándu lun cáda afíñeti

¹ Nidújeñu, níjein buri cátei nabúseerun lun jasúbudiruni luágutí buri ubáfu le líchugubei Sífiri Sándu lun cáda afíñeti luágu Jesucristu.

² Subúdi jumúti buídu luágu dan lán meja le mámagidün lánigu Crístu, ádajoúatün meja lun jeíbugun járigi sándu ja mariñagadibaña. ³ Ligía nabúseerunbei naríñagun jun guetó lun gayára lan jasúbudiruni ánjein lubáfu lubeí Sífiri Sándu ádajabálin ában gürígia lun ladímurejan lúmoun lubáfu lan espíritu wuríbati. Siñáti lásajani Sífiri Sándu ában gürígia lun lanábaguni Jesúsu láu laríñagun luágu máma lan Liraü Búngiu, espíritu wuríbati ádajabalin lun ladügüni líra. Áni láu rügüñein lubáfu Sífiri Sándu gayára lan laríñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le afíñebi luágu Jesucristu, áni ában méme Sífiri Sándu íchugubalin. ⁵ Níjein sarágu luwúyeri ligáburi esériwiduni lun Wabúreme Jesucristu láu ubáfu buri le líchugubei Sífiri Sándu

woun, áni lun méme ában Abúremein wesériwida. ⁶ Lídan gíñe sarágu luwúyeri wayúsurei ubáfu buri le rúaalibei woun, áni ában méme Búngiu le íderagubaliwa lun wayúsuruni ubáfu ligía. ⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri afíñetiña. ⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi. ⁹ Jíbiri resíbitiña ában afíñeni weíriti lúmagiñe méme Sífiri Sándu ligía, jíbiri resíbitiña ubáfu lun jareídaguagüdün sánditiña. ¹⁰ Añájein resíbitiña ubáfu lun jadügün miláguru, jíbiri resíbitiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubeí ádajabalín ában gürígia lun ladímurejan o ámu lan luwúyeri espíritu, jíbiri ibíjatiña ubáfu lun jadímurejan ámuñegueinarügü luwúyeri dimúrei lueí jerérun. Añájein ibíjatiña ubáfu lúmagiñe Sífiri Sándu lun jafúnraanguagüdün le aríñawagübei lídan buri dimúrei teréncha ligía. ¹¹ Sún buri cátei le, ában méme Sífiri Sándu le ábanrügübei, ligía adügübalin, le afánreinjabalin ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súngubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladüga. Ítara líña gíñe le únbei wagúara lúgubu Crístu, cáda ában afíñeti ában lídaangiñe lumégegun lúgubu Crístu. ¹³ Sun wagía afíñetiña –juríu, máma juríu, idámuni, máma idámuni, furúmiegarügü le wawúyeribeí –láu wabásterun, ába ladügüníwa Sífiri Sándu lun ában wamá jáma sun jíbiri afíñetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegun lun jasúbudiruni luágu ítara wáña lan queísi lumégegun lúgubu Crístu. Wágubu, máma rügüñein ában umégeni luágu, gíbeti umégeguni luágu. ¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma lueígiñe líra lun mámabei lan líbiri úgubu, ¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma lueígiñe líra lun mámabei lan líbiri úgubu. ¹⁷ Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun? ¹⁸ Rúlaali Búngiu cáda lumégegun úgubu le ní lumuti labúseera. ¹⁹ Lun jamúga ában rügüñein lan umégeni luágu úgubu, moústarunti jamúga úgubu ligía. ²⁰ Láu sun gíbe lan lumégegun úgubu, ában rügüñein úgubu.

²¹ Siñáti laríñagun águu lun újabu. “Memégeirun numútibu”, siñáti gíñe laríñagun ichügü lun ugúdi. “Memégeirun numútibu.” ²² Lubáragiñe líra, lé buri lumégegun úgubu le laganoúnbei camá débiliti, ligátima buri mégeiwabei, ²³ lé buri lumégegun úgubu le wanügübei quei ni cáta, ligátima wadáüraguagüdübei láu uwéndeni. Le buríti líbiri lumégegun wágubu le arámudaguabei, ligátima woúserunbei láu goúnigi, ²⁴ le madügünwabei lún buri líbiri lumégegun wágubu. Ítara líña laráanseruni Búngiu úgubu lun le lán buri líbiri umégeguni le anügübei quei ni cáta, ligátima lan weírigu, ²⁵ lun níjein lan ában úarani luágu úgubu lídan le luwádigimaridun sun umégeguni lídan ában, láu ában toúnigi joúniwagua. ²⁶ Ánjein asúfurira ában lídaangiñe lumégegun úgubu, súfuriti gíñe buri le líbiri, ánjein gíñe oúserúa ában lídaangiñe buídu, ába lagúndaarun lé buri líbiri lídan ában.

²⁷ Ítara méme líña gíñe, lúgubu Crístu jugúya, cáda ában jidaangiñe, lumégegun úgubu ligía. ²⁸ Rújali Búngiu wadágimanu jun tidan lilígilisin lun juwádigimaridun luágu ában queísi luwádigimaridun lumégegun úgubu. Furúmiñetiña, apóstolugu líchuguniña Búngiu lun jesériwidun joun jíbiri afíñetiña, jabíaman, profétagu, jürüwan, arúfudajatiña luágu cátei láni Búngiu, lárigiñe, ja adáagubaña miláguru, lárigiñe, ja areídaguagüdübaña sánditiña, ja ídejabaña, ja láubaña gumádi, jáma ja ibíjubaña ubáfu lun jadímurejan dimúrei buri le teréncha. ²⁹ ¿Apóstolugu funági súngubei? ¿Profétagu funági súngubei? ¿Arúfudajatiña súngubei? ¿Ódi sun jagía adáaguatiña miláguru? ³⁰ ¿Gabáfutiña súngubei lun jareídaguagüdüun sánditiña? ¿Adímurejatiña súngubei dimúrei buri teréncha? ¿Gayára jamúti súngubei míni lán buri dimúrei ligía aríñaga? Uá. ³¹ Buítí lubeíti lun jáfaagun lun jibíjini lubuídun-ágei buri ubáfu lúmagiñe Búngiu, áni níjein ában cátei lun jáfaagun lun jibíjini, buítimaati sügü láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

¹ Ánjawa jamúga gabáfu lun wadímurejani sun luwúyeri dimúrei le adímurejoúbei uboúagu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaünjati, o quei lan ában asíedu le areínchuti. ² Ánjein jamúga gayára ladímurejan Búngiu wayúmulugugiñe, subúdi wameí sún buri lujúlilin-ágei inárüni arámudaguati áni níjein sun luwúyeri subúdi wáma, áni weíri ligía wafíñen darí jamúga lun gayára

lan wagídaruni ában wübü lídaangiñe lubára láu afíñeni ligía, sun líra áni mínsiñejabutiwa, ni cáta wagía. ³ Ánjein wíchiga sun le wámabei murúsun murúsun joun gudémetiña darí lagúmuchun, madügunga wameí láu ínsiñejabuni, mesériwinti woun lun ni cáta. Lun jamúga weíri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati gíñe woun.

⁴ Le jínsiñejabúbei gagúraasunti, areídati, áni magí mugati, mapántati, manáangun ligía lúngua. ⁵ Manárimeguti, máma rügüñein luoúgua larítagua, magáñidunti, máguyugüdünti wuríbani luágu wuríbani. ⁶ Magúndaarunti láu jafígoun ámu, lagúndaarun dan le janügün gürígia ában üma le richábei. ⁷ Awánda lumúti sun cátei, afíñeti buídu jawágu súngubei, afíñeti luágu gayára lan leménigidun jawágun gürígia lun jarúfuduni lubuídun jagáburi, úati ni cáta lun gayára lan lagídaruni línsiñejabu.

⁸ Lachülüruba dan, dánme le lagíribudun Jesucristu uboúagun, lun madímurejan lánme Búngiu jayúmulugugiñe gürígia, madímurejoún ligíame dimúrei buri teréncha, memégeirunwalime gíñe subúdi. Ánjeinti ínsiñeni, leréderuba lun sun dan. ⁹ Guetó, murúsun rügüñein wasúbudirun, murúsun rügüñein gíñe wafúraanguagüdüni dimúrei le ladímurejabe Búngiu wayúmulugugiñe. ¹⁰ Ánjeinti dánme le lagíribudun Jesucristu, wasúbudirubei sun cátei le gumúti. Murúsun ubáfu le wabíjibe guetó, memégeirunwabei, lagúmuchaguba.

¹¹ Dán meja le irájüñügidiwa, queí meja irájüñü wadímureja, queí meja irájüñü wasáminara, quei gíñe meja irájüñü warítagua, ánjeinti dan le wügüriñajadiwa, ába wígiruni le jáni irájüñü. ¹² Guetó, loúguati wasúbudirun luágu Búngiu lúma luágu luwádigimari, waríjini camá buri cátei le marijínti buídu tídan ában isúbusein. Lachülüruba wéyu lun waríjini Búngiu furáangu. Guetó, loúguati wasúbudiruni buri cátei, wasúbudirubei Búngiu le gumúti lídanme wéyu ligía queísi lasúbudiruníwa Búngiu guetó. ¹³ Afíñeni, eménigini lúma ínsiñeni ladúraruba lun sun dan, áni ínsiñeni, weíritimaabei lídaangiñe ürüwagubei.

14

Ladímurejoún dimúrei teréncha

¹ Ítará líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá gíñe lun líchugun Búngiu ubáfu le líchugubei joun afíñetiña lídaangiñe Sífiri Sándu jun, léntima ubáfu lánina ladímurejan Búngiu jayúmulugugiñe gürígia. ² Buítimaati lun jáluanan ladímurejan Búngiu jiyúmulugugiñe sügü

láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügüñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati lueí jasúbudin gürígia.

³ Ánjeinti le iyúmulugugiñébei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dügüdaguaü joun lúma gurásu. ⁴ Le adímurejati dimúrei teréncha, lúngua rügüñein líderagua lídan leíbugun lúma Búngiu, ánjeinti le iyúmulugugiñébei ladímureja Búngiu, awáansegüda lumútiña lánigu Búngiu lídan jeíbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügú láu ladímurejoún dimúrei teréncha, ánjein gubeírugü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jeíbugun lúma Búngiu. ⁶ Ligía lubeíti nidújeňu, ánjana nüdün bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeírugü gíñe adímureja jun lídan werérun luágu cátei le lasúbudiragüdüni Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña quei ában jémpulu. ílagu buri ligía, mabágariti, queí buri fidu, gidára, ánjein wásiñera asúbudira furáangu ca lan nóta afarúbei, ibídiñebi woun ca lan urému le wagáambajabei. ⁸ Ánjein mínwirun fidu ában ínwiruni furáangutí wuríburugu, úabe ni ában aráanseruti lun lídin ageíndagua. ⁹ Ligía méme gíñe asúseredubei wáma. ánjawa maríñagun dimúrei le gayáraati gunfaráandawa lan, ¿ída lubági lasúbudirúniwa ca lan waríñagubei? ¡Wadímurejaña lun garábal! ¹⁰ Gíbetti luwúyerigu dimúrei uboúagu, áni sún buri dimúrei ligía richáti joun ja gunfaráandabalin, ¹¹ ánjein úa lubeí gunfaráanda náni dimúrei le áubei ladímurejoúa nun, teréñchabadina lun gürígia le adímurejabei nun, áni teréñchabei gíñe gürígia ligía nun. ¹² Ligía, quei weíri lubeí jayúmajan lun jibíjin lídaangiñe ubáfu le líchugubei Sífiri Sándu joun afíñetiña, áfaagua jumá jibíjini ubáfu buri le gayáraabei lawáanseragüdüniña tílana ligílisi.

¹³ Gürígia lubeíti le adímurejati dimúrei teréncha, lúnti lamúriaajan lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía. ¹⁴ Ánjana ayúmuragua lun Búngiu láu dimúrei teréncha, inárüni luágu

nayúmuraguña lan láu náni espíritu, líla le naríñagubei, ibídiñeti nun. ¹⁵ ¿Cáteiti lúnbei wadügünü? Lídan adámurini gayáraati wayúmuragun láu dimúrei teréncha, lúnti gíñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti gíñe werémujan láu dimúrei gunfaráandawati. ¹⁶ Ánjein badímurejaña lubeí lun Búngiu luágu luweírigun láu dimúrei teréncha, gürígia ünabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei. ¹⁷ Gayáraati ában lan eteíngiruni buítí le bíchugubei lun Búngiu láu dimúrei teréncha, míderagun lumútiña jíbiri gürígia láu líra. ¹⁸ Teínqui numúti Búngiu luágu gayára lan nadímurejan dimúrei teréncha sügü jáu sun jugúya, ¹⁹ áni jímein numúti naríñagun seíngü dimúrei le gunfaráandawati lídan joúndaragun tílana ligílisi, lun gayára lan jafúnrendeirun númagiñé, lubáragiñé naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame queísi weínamujaña lídan ligáburi jasáminarun. ²¹ Lariñajare tídan líliburun lúrudu. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñé teréncha, ni ítara, mebéresenbaña náu, líña laríñagun Jabúreme Búngiu.” ²² Ubáfu lubeíti lun ladímurejoúniwa ámuñegueinarügü dimúrei, seríwiti liseíname lubáfu Búngiu joun ja mafíñebaña, máma joun ja afíñebaña. Ánjeinti ubáfu lun ladímurejan Búngiu jayúmulugugiñé gürígia, seríwiti liseíname lubáfu Búngiu joun afíñetiña luágu Jesucristu, máma joun ja mafíñebaña. ²³ Dan lubeíti le oúndaragua jamá sun tílana ligílisi, ánjein jadímurejaña lubeí sun jugúya dimúrei teréncha, ába jebélurun mafíñetiña jánwoun, o gürígia lan ja ibídiñegilibei luágu ubáfu le joun, ¿ma jaríñaguba luágu lülüjali lan jáu? ²⁴ Ánjein ladímurejaña lubeí Búngiu jiyúmulugugiñé, ába lebélurun ában le mafíñeti, ladáriraguba língua luágu gafígoun lan dánme le lagáambuni le jaríñagubei. ²⁵ Ítara lúba lafúnraangudun cátei arámudaguati le tídaanbei lanígi, ábame lájuduragun íchiga inébesei lun Búngiu, ariñaga ligíame luágu níjein lan Búngiu júma le tímatimaati.

Adüga jumeí sun cátei lídan lubúdubu

²⁶ Nidújeñu, nján lubeíti igáburi le lúnbei joúseruni lídan jidámurin. Dan le joúndaragun lun jájuduragun lun Búngiu, añájeinbaña jídaangiñé láu urému o arúfudajani, o cátei le lasúbudiragüdün Búngiu jun, o adímurejani lídan dimúrei teréncha, o lafúnraanguagüdüniwa adímurejani ligía, sun líra adüga jumeí lun méme jawáanserun tílana ligílisi lídan cátei le luáguti Búngiu. ²⁷ Dan le ladímurejoún lídan dimúrei

teréncha, biámarügü jamá gürígia adímureja, o ürüwa, áni ában ábanlá gíñe jadímurejan, lúnti gíñe niżein lan ában lun lafúnraanguagüdüni le jaríñagubei. ²⁸ Ánjein úa lubeí ni ában le gayára lumúti afúnraanguagüda, buítimaati lun madímurejoún lan lídan dimúrei teréncha lídan adámurini, ladímureja cáda ában lúmagua lúma lun Búngiu. ²⁹ Ánjein gíñe luáguti lubeí ladímurejan Búngiu jayúmulugugiñe gürígia, biámarügü o ürüwa jamá gürígia adímureja, ja jíbiri lun jaríjin ánjein lúmagiñeti lubeí Búngiu le aríñawagúbei lúmoun máma lan lúmagiñeti. ³⁰ Ánjein asúbudiragüda Búngiu ában cátei lun ámu gürígia le ñun umúti lun líchuguni lun guríriguaü, lúnti lámanichun le adímurejabei lun líchugun dan lun, lun ladímurejan. ³¹ Ítara, sun juguya le iyúmulugugiñebi ladímureja Búngiu, gayáraabei jadímurejan ában ában lun jafúrendeirun súngubei, ragü jugúyame gurásu. ³² Ja iyúmulugugiñebaña ladímureja Búngiu, lúnti jágüdaagun joúngua darí lachülürün jadáani lun jadímurejan, ³³ lugúndun Búngiu le íchugubalin ugánu ligía joun, lánina darángilaü, máma lánina chagáguau.

Queísi jagáburi jíbiri wadújeñu lídan wafíñen dan le jadámuridagun, ³⁴ moún lumuti jadímurejan würíña lídan jadámurin afíñetiña lugúndun majoúati lun cátei le. Lúnti gagáambadi jamá queísi laríñaguni lilúrudun Búngiu. ³⁵ Ánjein busén jabeí jasúbudirun ában cátei, álögüda jameí jámari jábiñe, lugúndun mabuídunti laríaajoún lun tadtímurejan ában würi lídan jadámurin afíñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügígidün gíñe juguya erésibirei. ³⁷ Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucristu cátei le nabürüjabei jun. ³⁸ Ánjein manügün lan ítara, reídeilá lídan libídiouniga láu.

³⁹ Ítara líña lubeíti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejoún lídan dimúrei teréncha, ⁴⁰ adügarüga jumeí sun cátei lídan lubúdubu.

15

Lásaarun Crístu lídaangiñe oúweni

¹ Guetóti nidújeñu, buséntina lun jarítagun luágu ugánu lé meja apúrichija náalibeí jun luágu Jesucristu le Wasálbaragüle. Niján ugánu ligía le jerésibirubei, le gíñe ídaanbei derégüdagü lan jafíñen. ² Sálbatün gíñe lun sun dan ladüga jafíñen luágu ugánu

le, ánjein jafálara le uágubei napúrichija jun, ánjein gíñe láu lubeí jinárün jafíñera.

³ Furúmiñeti cátie, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queísi taríñaguni Lerérunt Búngiu luágu lúnti lan lasúseredun.

⁴ Lárigiñe meja loúnwen, ába labunún, ába lásaarun lídaangiñe oúweni luágu lúrúwan wéyu queísi taríñaguni Lerérunt Búngiu luágu le lúnbei lasúseredun. ⁵ Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu.

⁶ Lárigiñe, ába larúfudagun lúngua joun sügü jáu seíngü-san afíñetiña ja oúndarañubaña lídan ában, áni añájeingua sarágu jádaangiñe, wínwangiña chülü lúmoun dán le, ja jíbiri, jilágua.

⁷ Lárigiñe, ában larúfudagun lúngua lun Jacóbo, lárigiñe, joun sun apóstolugu.

⁸ Agúmujoúni, járigiñe súngubei, ába gíñe larúfudagun lúngua nun, láu sun ítara níña lan quei ában le agúriaajoúti lídan ában igáburi le múaraanti, ⁹ lugúndun áu lan ni cáttatimáabei jádan apóstolugu, madünatina ni lun nanügún quei apóstolu, lugúndun eíbaaja numútiña méja títana lilígilisin Búngiu.

¹⁰ Áu le áubei guetó lugúndun lareídun Búngiu nun, áni merédeti lareíni nun maságarunga ni cáta buíti nídaangiñe, lubáragiñe líra, ñadágimeinjaaadina sügü jáu jíbiri apóstolugu, láu sun máma lan áu ñadágimeinbei, Búngiu le númabei láu lareíni, ligía ñadágimeinbei nídaangiñe. ¹¹ Mebéresentina ca lántima ñadágimeinjaaña, jagía lan o áu lan, niján ugánu le wapúrichijabeí luágu lásaarun Crístu lídaangiñe oúweni, áni niján gíñe uágubei jafíñera.

Jásaarun jiláaña lídaangiñe oúweni

¹² Queísi wapúrichijan luágu saráali lan Jesucristu lídaangiñe oúweni, ába jerésibiruni, ¿ída liñáti añájein lubeí jídaangiñe aríñagatiña luágu másaarun jamá jíbiri jiláaña? ¹³ Ánjein másaarun jabeí jíbiri jiláaña, másaarunti lubeí gíñe Crístu lídaangiñe oúweni, ¹⁴ áni ánjeinti másaarun lubeí Crístu lídaangiñe oúweni, málati ugánu le wapúrichijabeí luágu asálbaruni, málati gíñe afíñeni le juágubei. ¹⁵ Ánjein ítara líña lubeí, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe oúweni, ánjein máma lubeí inárüni luágu sará jamá jiláaña, máma gíñe inárüni luágu sarágüda láani Búngiu Crístu lídaangiñe oúweni. ¹⁶ Lugúndun ánjein másaarun jabeí jiláaña, ni Crístu, másaarunti gíñe lídaangiñe oúweni, ¹⁷ áni ánjeinti jiláñugili lubeí Crístu, mesériwinti jafíñen lun ni cáta, lídaangidün jifígoun ligíbugiñe Búngiu. ¹⁸ Áni ánjein ítara líña lubeí, féridiñu jáña gíñe ja oúwegubaña láu jafíñen

luágu Crístu. ¹⁹ ¡Ánjein lúntirügü lubeí ibágari le weménigi luágu Crístu, fugiábu wagía jádaangiñe súngubei!

²⁰ Le inárunitibei, saráti Crístu lídaangiñe oúweni lúnya labágaridun, ligía furúmiñetibei ásaaruti lídaangiñe oúweni lun moúnwendügüyaali lan, áni ítara lúba jásaarun sun lánigu. ²¹ Ítara quei lídaangiñe lan ában wügüri lagúmesera oúweni uboúagu, lídaangiñe gíñe ában wügüri lagúmesera jásaarun jiláaña. ²² Ítara quei joúwegun súngubei ladüga lídaangiñe lan Adán jayábin, ítara lubá gíñe gabágariya jamá súngubei lárigiñe oúweni ladüga lánigu jamá Crístu. ²³ Lúnti lásaarun cáda ában lídan lidáani, furúmiñeti meja ásaaruti, Crístu, lárigiñeme, dánme le lagíribudun Crístu uboúagun, ligíame jásaarun lánigu lídaangiñe oúweni. ²⁴ Ligíabati liábin lagúmuchagüle sun cátei, ábame lagünrinchaguni Crístu sun líbiri luwúyeri aruéijani, ubáfu, lúma érei le uboúagubei, ábame ledéregeruni aruéijani lun Búngiu Úguchili. ²⁵ Larúejaba Crístu daríme gáñeigüda láali Búngiu wuríbu lun jawágu sun láganiňu, ²⁶ oúweni, ligíaba lagúmujoún ágani agüñrinchawagúti. ²⁷ Rúlaali Búngiu sun cátei lábugiñoun lubáfu Crístu, dan le taríñagun Lererun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu. ²⁸ Dánmeti le reídeijali sun sun cátei lábugiñe lubáfu Crístu, ábame leréderun Crístu, le Liraü Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiürügüba urúei, le Súnti Gabáfu.

²⁹ Añájein jídaangiñe, abásterutiña jewéñegua ja oúwetiña mabásterunga. ¿Cámegi jadügei lira? Ánjein másaarun jabeí jiláaña, ¿cámegi ju lan jabásterun jewéñegua?

³⁰ Ánjein siñá jásaarun jiláaña, málati wapúrichijan súnwandan lúnrügü weíbaajoún lueígiñe. ³¹ Ságü wéyu yaráfa wamá lun woúnwen, ináruniti líra nidújeňu, queísi ugúndani le nasándirubei juágu queísi afíñetiña luágu Wabúreme Jesucrístu. ³² Ageíndaguatiña wügüriña ja ítarabaña quei anímaalugu janárimetiña ya Éfeso núma, ladüga mínsiñe lan cátei le napúrichijabejoun, ¿cági nagáñeirubei láu líra? Ánjein jamúga inárüni lubeí luágu úabei lan ibágari lárigiñe oúweni, richátiña jamúga ja aríñagubaña. “Joúwama, guráwama, lugúndun jarúga woúwegua.”

³³ Mayeedúa jumá. Aríñawagúati. “Féridigüda jamúti jagübüri umádagu lubuídn igáburi.” Inárüni líra. ³⁴ Darígu jumá júngua, giríbu jumá lun ában ibágari le surúti, mafígojua jumá. Añájein jídaangiñe, ibídiñeti Búngiu joun. Naríñaguñein le lun janügün busíganu.

Ída lúba ligáburi jásaarun jiláaña

³⁵ Fágua níjeinbei álögüdajati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágú?” ³⁶ Libídiouniga láu álögüdajani líra. Dan le labunún ában ílaü, gásu lañáladun lábugiñe múa furúmiñe lubá gayára lan laboúchun. ³⁷ Máma nádü le lúnbei lájüchün abunúbei, ílaü abunúbei, furúmieguárügü le luwúyeribe. ³⁸ Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü. ³⁹ Máma ában lábu sun úgubu, ámu luwúyeri jágubu gürígia, ámu jágubu anímaalu, ámu jágubu dunúru, ámu jágubu úduraü. ⁴⁰ Níjein gíñe buri cátei siéluna queísi wéyu, játi, warúguma, queísigubeirügü níjein lan uboúaguna, ámu lubuídunmeraü buri le siéluna lueí le uboúaguna. ⁴¹ Ámu larúni wéyu lueí larúni játi, ámu gíñe jarúni warúguma, áni jádaanguanarügü warúguma, ámuñegueinarügü jarúni jawáriuagua. ⁴² Ítara líña gíñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le moúnwenjali. ⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti. ⁴⁴ Labunúa ában úgubu le ídaanbei wabágarida ya uboúagu, lásaarame ában úgubu le ídaanbei wabágarida yágüta siélu. Ánjein ibíja wabeí wágubu lánina uboú, wibíjibeí gíñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügüri, ában meja wügüri wínwanti”, ánjeinti Crístu, le gíribei gíñe lagúmujoún Adán, ában espíritu ligía le íchugubei ibágari. ⁴⁶ Furúmiñe ibíja wamúti ibágari le uboúaguna, lárigiñe, ábame wibíjini ibágari le lánina siélu. ⁴⁷ Lé meja furúmiñeti wügüri le adügübei láu múa, uboúaguna meja, libíaman wügüri le Wabúreme Jesucristu, siéluna. ⁴⁸ Sun gürígia uboúagu ítara líña jágubu quei lúgubu Adán le adügübei láu múa, sun lánigu Crístu, jabíjuba jágubu quei lúgubu Crístu, le siélunabei. ⁴⁹ Wágubu guetó, líbe lúgubu Adán, le lánina uboú, lachülürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le nariñagubei, nidújeñu, luágu siñá lan jebélurun gürígia láu jágubu le uboúaguna lídoun larúeijan Búngiu siélu, lugúndun cátei le goúwedadibei siñáti gabára lan lídan fulásu le ñí lubei úa lan oúweni. ⁵¹ Buséntina lun jasúbudiruni cátei lé meja arámudaguabei le. Máma sun lánigu Crístu lun joúweguba lan, jasáansirawagúba súngubei, ánjein wínwangiña lubei dánme lagíribudun Jesúsu o jiláaña lan, ⁵² lídan murúsun óra, furése furése quei ában léfegechun lúma lámurudun águu, dánme le lagaambúniwa lumálali fidu, le liseíni lagúmujoún sun cátei. Línwiruba fidu, ábame jásaarun

lánigu Crístu ja jiláañabaña lun moúnwendügüyaaña lan, ja moúnwengiñabaña, ábame jasáansirawagún lídan méme óra ligía. ⁵³ Wágubu le wawágubei le gayáraabei lañáladun, lasáansiraguba lídoun ában luwúyeri le siñábei lañáladun, wágubu le goúwedadibei, lasáansiraguba lídoun le moúwedadibei. ⁵⁴ Dánme le sáansiguaali wágubu le goúwedadibei lídoun le moúwedadibei, ábameti lagúnlifirun le bürüwañubei tídan Lerérung Búngiu. “Gumúa lubáfu oúweni, féridilá wuríbu. ⁵⁵ Oúweni, ¿jigeígi bubáfu lun bagúmuchaguagüdüníwa? ¿Jigeígi agáñeiruni lé nege lúnbei badügünü?” ⁵⁶ Figoú lóbunabei oúweni, áni binádu lilúrudun Moisés, ligía arúfudubalin woun cátei lan figoúbei lun wayúmajani. ⁵⁷ Teínqui wáña lun Búngiu luágu lagáñeiragüdüníwa luágu sún buri cátei le, láu lubáfu Wabúreme Jesucristu.

⁵⁸ Ligía lobeíti nidújeñu jínsiñetiña nun, ítara méme jumá derégüdagu lídan jafíñen, meréderagunga, ñadágimein súnwandan, gánwoun gueínarügü lídan luwádigimari Wabúreme, lugúndun subúdi jumúti luágu máma lan luágu ni cáta jadügei wadágimanu le jadügübei lídan ában lúma Wabúreme Jesucristu.

16

Loúndarún seínsu joun idújeñu lueígiñe Jesucristu

¹ Luágu loúndarún seínsu joun wadújeñu lueígiñe Jesucristu ja gudémebaña yágüta Jerusalén, adüga jumeí quei narúfudajani tídan sun ligílisi loúbawagu Galácia. ² Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachülürün, merédedünme oúndaragua seínsu. ³ Dánmeti le nachülürün, noúnajabaña gürígia ja janúadajabaña ubúruju Jerusalén, ábame níchugun gárada joun lun janügünü seínsu le joúndarubei joun wadújeñu ja ñíbaña. ⁴ Ánjein gíñe lun lobeí nídin, joúdiba núma.

Laráansejan Pablo lubá luweíyasun

⁵ Lídan nuweíyasun, násügürüba loúbawagugiñe Macedónia lun neréderun átiri wéyu ñi, nachülüruba lobeíti ubúruju Corínto lárigiñe. ⁶ Fáqua neréderagun júma átiri dan, o násügürüni lan sun juyáabun ñi, gayáraabeiti jíderagunina lídan nuweíyasun léme ñíjin lumúti nídin lárigiñe nebélujan júmoun. ⁷ Mabúseerúntina chülgügarügü nan aríjaün, buséntina neréderagun átiri dan júma, ánjein busén Wabúreme. ⁸ Neréderuba ya ubúruju Éfeso darí luwéyuri Pentecostés, ⁹ lugúndun níjein ában oúnwenbun cháansi nuágu lun nadímurejan luágu Wabúreme Jesucristu ya, áni buídubei lanügün. Añájein gíñe gíbetiña gürígia mabúseerúntiña lun

nuwádigimaridun luágu Wabúreme ya, ligía siñábei lubeí nígiruni Éfeso guetó.

¹⁰ Dánme le lachülürün Timotéo, joúcha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucristu queísi áu. ¹¹ Manüga jumeí quei ni cáta. Dánme le gumúlaali lidáani júma, jíderagueime lun gayára lan lagíribudun númoun láu ában ugúndani tídan lanígi luágu lubuídun lidáani júma. Nagúrabajañein ya Éfeso jáu sun jíbiri wadújeñu lueígiñe Jesucristu ja lúnbaña jayábin úara lúma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénreenguti lídin guetó, lídiba dánme le gayára lan.

Lagúmujoún buri mábugaü

¹³ Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun üma le gádaanbalün, derégüdagu jumá lídan jafíñen. Agáburida jumá quei wügüriña ja awáanserubaña lídan le inárünibei, manúfudeiga, jére jumá, gáñei jumámuga luágu wuríbani. ¹⁴ Sun cátei le jadügübei, adüga jumeí láu ínsiñejabuni.

¹⁵ Nidújeñu, subúdi jumúti luágu Estéfanas lan jáma sun títana lúban furúmiñebaña loúbawagua Acáya ígirutiña binádu jagáburi lun jerésibiruni Crístu, luágu gíñe derégeguaaña lan joúngua lun jesériwidun joun wadújeñu lídan afíñeni lídan furúmieguarügü cátei le jayáraati. ¹⁶ Buséntina lubeíti lun gíñe jíchaagun júngua joun, lúma joun sun ja ídejabaña, ñadágimein jagía ítara. ¹⁷ Gúndaatina láu jayábin Estéfanas, Fortunáto, lúma Acáico ñajoun. Weíriñajati nisáminan juágu, áni siñáti jiábin sun juguya, ¹⁸ ába jíchugun wügüriña jagía gurásu nun láu janügün ugánu nun juágu. Afíñetina luágu janügüba lan gíñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaratiña.

¹⁹ Mábuga jáña títana ligílisi buri to loúbawaguboun Ásia jun. Mábuga jáña gíñe Aquíla túma Priscila jáma sun ja oúndaragubaña jábiñe jun, queísi afíñetiña luágu Crístu. ²⁰ Mábuga jáña sun idújeñu ja yábaña jun. Chúguia jumá júngua lídan líri Wabúreme, arúfuda jumámugei luágu lídañadiwa lan ában wámagua.

²¹ Áu Páblo, noúnajañein mábugaü le jun le nabürüjabei láu nújabu lúma niléturan.

²² Le mínsiñejabuti lun Wabúreme Jesucristu, reídeilá lábugiñe líñaragun Búngiu. ¡Giríbubá furése uboúagun, Wabúreme!

²³ Binílaün Wabúreme Jesucristu. ²⁴ Oúnaja numúti nínsiñejabu lídan Jesucristu jun, sun juguya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹ Áu Páblo, ában láni Jesucristu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucristu, nabürüjañoun gárada to jun, jugúra le tílanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya. ² Resíbi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucristu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucristu! Ligía Wáguchibei le gudémejabubei woun, aráanseñu lína lun líchugun gurásu woun furúmieguarügü óra. ⁴ Rúti gurásu woun lídan sun wasúfurirun, lun giñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun. ⁵ Lugúndun ítara quei luweírin wasúfurirun luágu líri Crístu, ítara giñe werésibirun ában oúnwenbun gurásu lúmagiñe. ⁶ Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun giñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷ Derégüdati wafíñen juágu luágu jasígiramémeba lan derébuguñu lídan jaffíñen, láu sun weíri lan jasúfurirun. Subúsiti woun luágu láu sun lan jasúfurirun luágu líri Crístu queísi wasúfurirun, jerésibiruba lan giñe gurásu lúmagiñe Búngiu queísigubeirügü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchawagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun ñígiñe. ⁹ Sandíguadiwa yebe woúngua queísi gürígia ja síadiwaña lun joúnwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragüdüniña jiláaña, máma lun wawoúngua lan weménigida. ¹⁰ Séfu lumútiwa Búngiu dán buri meja ligía le yaráfa wabeí lun woúnwén, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadíwa

lan, ¹¹ ánjawa jíderagua láu jayúmuragun lun Búngiu wawágu. Áni ángaña ayúmuragua sarágu gürígia wawágu lun Búngiu, sarágubaña íchugutiña eteíngiruni lun Búngiu luágu fuleísei lániwa láu leséfuruníwa.

Ca lan uágu lasáansiraguei Pablo larítagun luágu luweíyasun ubúrugun Corínto

¹² Níjein ában cátei agúndaaragüdütíwa. lariñagun warítagun woun luágu gagáburi wamá ában igáburi jarúmati, furáangu, ya uboúagu, jagánaguatima. Ideragua láadiwa Búngiu láu lareíni lun buídu lan wagáburidun ítara, madügüntiwa ni cátei láu lichú wáu guánarügü. ¹³ Lídan le wabürüjanbei jun tídan wagáradan, úati ni cáta arámudaguati ñi le jásiñerun alíja o gunfaráanda. ¹⁴ Guetó subúdiraüjadün luágu gayára lan jagúndaaragun wáu quei jumáesturungu, chüllü lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanme wéyu le lagíribudagüle Jesucristu uboúagun.

¹⁵ Queísi méja afíñe nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdünün láu bisida nánün bián weíyasu — ¹⁶ jarítagutiná yebe nachülaagun aríjaün lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachülaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun. ¹⁷ Madügün numúti. ¿Jálügüdaguñasan júngua ca lan ueígiñe madügün nubálin? ¿Masáminarun numúti funásan quei lubúdubu dan lé meja naríñagubei jun luágu nadügübei lan cátei le? ¿Jarítaguatün luágu ítara níña lan queísi lirajüñü uboú ja aríñagubaña ában cátei áni magúnfuliruntiña láu jeréruntiña?

¹⁸ Geféenti Búngiu luágu mariñagun wamá ában cátei jun magúnfulirunga wagía láu. ¹⁹ Sun wagía —Silváno, Timotéo, áu —apúrichijatiwa jun luágu Jesucristu, le Liraü Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jeréruntiña, Crístu, súnwandan ladügüni le lariñagubei. ²⁰ Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigun, ayúmuragua wagía lun, ába waríñagun “ítaralá” lun warúfuduni wafíñerun luágu ladügüwaba lan lídan líri Jesucristu. ²¹ Búngiu adügübei lun derégüdagu wamá, wagía júma, lídan wafíñen luágu Jesucristu, ligía anúadajabaliwa lun wesériwidun lun. ²² Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibei lasúbudiraja le lúnbei werésibiruni queísi lánigu Búngiu. Queísi

ítara líña lubeí, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaün luágu nuweíyasun ñájoun Macedóniou queí yebe narítaguni lugúndunrügü mabúseerun nan nírudaguagüdünün láu ában ébechuni, geféenti Búngiu luágu líra. Ánjein máma lubeí líña, aráansetina lun noúnabun láu nibágari guánarügü. ²⁴ Máma jamúgatia wabúseeruña waríñagun jun. “Nijánba jafíñera”, derégüdaguaadün lídan jafíñen, busénrugiütiwa wíderagunün lúntima lagánwoundun jagúndaarun.

2

¹ Ligía mídinya nubeí bisídaün lun nírudaguagüdünün.
² Lugúndun ¿ída lubásan gayára lan jamúga nagúndaarun lárigiñe níchuguni íruni joun gürígia ja agúndaaraguagüdübalina? Siñáti jamúga. ³ Ligía nabürüjanbei jun ítara, lun gayára lan jaráanseruni cátei le mégeibeí jídaangua lubáragiñe nachülürün júmoun, dánme lámuga nachülürün, mibíjin námuga íruni júmagiñe, jugúa le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga gíñe ugúndani. ⁴Dán meja le nabürüjanbarun gárada tugúa jun, weíriti meja nidíjeri juágu darí lun nayájun lídan le nabürüjabarun. Máma meja lun nírudaguagüdünün nabürüjoun jun ítara, nabürüjanun lun jasúbudiruni luweírin nínsiñejabu jun.

Ferúdun lun lé meja afígounjabei

⁵ Le rújalibei íruni láu luríban leménerun, máma rügüñein nun líchiga íruni, rúlumuti gíñe jun lídan ában luwúyeri. Naríñagunbei “lídan ában luwúyeri” lun maweírin lan naweíridaguagüduni jun. ⁶ Abeíchuni lé meja jaríñagubei lídan jadámurin lun líchugúniwa luágu gürígia ligía, buíduruñaali. ⁷ Guetó, lúnti ferúduna jumáni, ru jugúyame gurásu lun lueí ladügün sarágu íruni wuríbati lun. ⁸ Ligía nayúmuragunbei jun lúnya jarúfuduni jínsiñejabu lun. ⁹ Abürüyatina jun luágu cátei le lun gíñe nasúbudiruni ánjein aráanse jubeí lun jadügün le nubeíbei jun. ¹⁰ Guetóti, le únti ferúduna jumá furúmieguarügü cátei, ferúduna nubeí gíñe, ánjein gíñe níjein lubeí cátei le lúnti ferúduna náni gürígia ligía luágu, ferúduna numúti ligíbugiñe Crístu, jueígiñe. ¹¹ Lídan ában cátei líbe líra, mabúseerúntiwa wíchugun lúgaaru lun Máfia lun lanügün ában gürígia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítagun Páblo ubúrugu Tróas

¹² Dán meja le nachülürünbei ubúrugu Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúrem. ¹³ Madárangilaanti narítagun lugündun madári náni wadúje Tito Tróas lun nagáambun lúma juág. Ligía nayoúragunbei joun wadújeñu ja Tróasbaña, ába nídin loúbawagun Macedónia lun nadúnragun lúma Tito ñi.

Gáñeitiwa láu lubáfu Crístu

¹⁴ Buíti lasálirun sun cátei. Teínqui wamúti Búngiu le anügübalíwa lídoun sun fulásu, amáchareina wagía lábugiñe lagúmadijan Wábuti Jesucristu, le súnwandanbei lagáñeiragüdüniwa lídan sun lénreengúnga. Yúsú lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lirímichúniwa líjeme cupáli. ¹⁵ Lugúndun ítara wáña quei cupáli le láguñabaei Crístu lun Búngiu, ñüdüntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálbarun, jáma gíñe ja lúnbaña merésibirun jamáni ugánu ligía lun jeféridirun. ¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídagüagüdüti. ¿Cáti gabáfubei lun lasúbudiragüdüni ugánu luáguti Crístu? ¹⁷ Wagía le loúnajabei Crístu, gabáfutiwa, ladüga mítaran wamá queísi arúfudajatiñä yéetiña jagánagua, ja asáansiragubalin linárün Búngiu quei jabúseerun lun jaríjin cába lan jagáñeira lídaangiñe. Lubáragiñe líra, apúrichija wamúti Lerérur Búngiu quei lubeí, ligibugiñe Búngiu, wagía queísi loúnajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawoúgua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruniwa, o wamúriajan lan gárada júmagiñetu joun ámu mútu, quei jadüga jíbiri mútu? ² Uá, lugúndun jugúya afíñetiña, ítara jíñä queísi ában gárada to adímurejatu luágu lubuídun wawádigimaridun jagánagua, ítara jíñä quei ában gárada to bürüwañutu tídan wanígi, to gayáraaboun jalíijanun sun gürígia, asúbudiragüdei cátawa lan. ³ Ítara jíñä queísi ában gárada to labürüjan Crístu guánarügü, to wedéregeruboun, ában gárada jugúya to abürüjoúboun láu láni Búngiu le wíñwanbei Espíritu, máma láu tínta, áni tídan janígi ladügei Espíritu ligía wadágimanu, máma luágu dübü.

⁴ Gayáraati waríñagun luágu buídu lan wesériwidun lun Crístu ladüga wadügünü jeménigiňu luágu Búngiu lun líchuguni ubáfu woun lídaangiňe Jesucristu. ⁵ Mabáfutiwa lun ni cáta láu wáni woúngua, sun le wayáraabei adüga, lúmagiňe Búngiu liábin. ⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mitaraanti quei lé meja binádu, lé meja lánina lúrudu bürüwati le lúnbei lagúncularuwa láu, lánina ában ibágari le erésibirúti lúmagiňe Sífiri Sándu. Lúrudu ligía, le lilúrudun Moisés, arúfudarügü lumúti wafígoun ligíbugiňe Búngiu, figoú ligía, oúweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abürüjoúati luágu dübü. Dan le lerésibirubalin lúrudu ligía lúmagiňe Búngiu lun líchuguni joun Israelítagu, ñíñein ában oúnenbun larúgounga lúmagiňeti Búngiu ligíbuagu darí lun siñá lán meja jaríaguni gürígia jagía ligíbu Moisés, lugúndun weíriti lámiridun ligíbu. Láu sun líra, ába eñegucheina lan larúgounga ligía murúsun murúsun. Ánjein láu lubeí sarágu uweíriguni liábin lúrudu ligía le asíadijabei gürígia lun oúweni, ⁸ ¡weíritimaati luweírigun ugánu le lanügübei Sífiri Sándu woun luágu Wasálbaragüle! ⁹ Ánjein weíri lubeí luweírigun meja lúrudu le esériwidubei lun larúfuduni wadúnrunt ligíbugiňe Búngiu woun, ¡weíritimaati luweírigun ugánu luágu Wasálbaragüle le adügübalíwa richágu ligíbugiňe Búngiu! ¹⁰ Ni cáta luweírigun lilúrudun Moisés ligíbugiňe luweírigun Wasálbaragüle. ¹¹ Ánjeinti weírigu lubeí meja darádu le lúnbei ladúrarun murúsunrügü dan, weíritimaati luweírigun darádu le lúnbei ladúrarun lun sun dan.

¹² Ladüga níjein lan eménigini le wawágu, luágu siñá lan leférideruni ugánu luáguti Crístu luweírigun, wapúrichijánbei furáangu. ¹³ Madügüntiwa queí meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun. ¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiňe líburu to lilúrudun Moisés, bélu méme tugúya to luáguboun jasáminan, mígitun tumútiňa lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle. ¹⁵ Chüllü lúmoun dan le, dan le jalíjanun líburu buri to labürüjaboun Moisés, darúguatu ában bélu láu jachügü lueí gunfaráanda jamá. ¹⁶ Ánjeinti dan le lígiruni ában gürígia binádu

ligáburi lun leíbugun lúma Crístu, ába tagídarún bélu tugúya
lueí. ¹⁷ Wabúreme Crístu, ligía Espíritu le íchugubei ibágari.
Láu Espíritu ligía (le méme Sífiri Sándu) wádan, sálbatiwa,
máfaagunga wagía lun wagúñfulirun láu lilúrudun Moisés.
¹⁸ Ligía sun lubeí wagía afíñetiña luágú Crístu, gidáwaaru
bélú lueí wasáminan, subúdi wamúti Crístu furáangu, láu
sun luweírigun. Ítara wáñá quei ában isúbusein to arúfudubalin
luweírigun Wabúreme Crístu, áni láu wasígirun íchigei warítagun
luágún, sáansiguagüda lumútiwa láni Espíritu murúsun murúsun
lun ítara wamá queí ligía.

4

¹ Máburujalá lubeíti warüna, lugúndun rúlaali Búngiu
wadágimanu le lábun waríaajan, láu lareíni. ² Mayúsuruntiwa
ibíbuni lun wafíñeragüduniña gürígia luágú Crístu, rúwamuti
wanágan luágún cátai le adügübei arámudaguarügú, le
nibúsigarídünabe. Masáansiragun wameí Lerérén Búngiu,
inárüni rügüñein waríñaga. Ítara líña jasúbudiruni sun gürígia
cátawa lan ligíbugiñe Búngiu. ³ Ánjein mafúraangun lubeí
werérun luáguti Wasálbaragüle, joún rügüñein ja lúnbaña
jeféridirun mafúraangun lan. ⁴ Quei mafíñen jabeí luágú
werérun, darúlaali Máfia, le lubúngiutebei uboú le, jaríjin
lun siñá lan larúgoungadagüduni ugánu luáguti Crístu le
weírigubei, le liyáwabei Búngiu wínwanti, jasáminan. ⁵ Dan le
wapúrichijanbei, máma wawoúgua wapúrichija, luágú Jesucristu
wapúrichija, queísi Wabúreme, waríñagati wawoúgua luágú
esériwidutiñarügú lan wagía jun, luágú wínsiñejabu lun Jesúsu.
⁶ Lugúndun Búngiu, le méme íchugubalin lámpu siélu lun
lagídarúniwa lubúriga, ligía gíñe adúnraaguagüdúbalin lilámpun
tídan wanígi, lun gayáraabei lan wasúbudiruni luweírigun
Búngiu le waríjabei lídan Jesucristu.

Abágardiduni láu eménigi luágú Búngiu

⁷ Larúgounga le wibíjubei luágú luweírigun Búngiu le lídaanbei
Crístu, ítara líña quei ában irísini woun. Barü wamuti irísini
ligía lídan fugiábu wágubu, le ítarabei quei ában soúdieru,
lun larijíniwa luágú lúmagiñe lan Búngiu liábin oúnwenbun
ubáfu le wawágubei, máma wámagiñe. ⁸ Ítara, láu sun súfuri
wamá sun luwúyeri lénreengúnga, súnwandan larúfudun Búngiu
ában üma woun lun wáfuridun lídaangiñe furúmieguarügú
lénreengúnga. Níjein dan, weíriti wadíjeri luágú cába lan
wadüga, máburujaanti warüna, lugúndun íderagua lániwa
Búngiu. ⁹ Eíbaajoúatiwa, mígitun lumútiwa Búngiu joun
wáganiñu. Gayáraati jájuchuruníwa, ígira jamáwa múarugu quei
jiláaña, siñáti jagúmuchaguagüdüníwa. ¹⁰ Le nílumuti woúdin,

buséntiña wáganiñu jáfaraguníwa jilágubei queí jáfaruni láganiñu Jesúsu jilágubei. Lúnti ítara lúba lan lun gayáraabei lan larijíniwa lubáfu Crístu le wínwanbei wádaangiñe. ¹¹ Wagía, sun awánja lan abágarida, yaráfañu wáña lun woúnwen furúmieguarügü wéyu lueígíñe Jesúsu, lun gayára lan larijíniwa libágari Jesúsu wádaangiñe. ¹² Ítara líña lubeíti, láu yaráfañu wamá lun oúweni lun wíchuguni ugánu jun luágu Wasálbaragüle, resíbi jumúti ibágari magúmuchaditi.

¹³ Laríñajare Davíd tídan Lerérun Búngiu. “Afíñetina, ligía nadímurejánbei”, ítara giñeti afíñetiwa luágu Búngiu láu méme ligáburi afíñeni le meja luágubei Davíd. Ligía wapúrichijánbei luágu. ¹⁴ Lugúndun subúdi wamúti luágu Búngiu lan le ásaaragüdúbalin Jesúsu lídaangiñe oúweni, lásaaragüdúbalíwa lan gíñe lúnya wabágaridun, úara lúma Jesúsu, ábame lanügüníwa úara júma ligíbugiñoun. ¹⁵ Luágu jáni fuleísei nasúfurirei sun cátei lun gayára lan jagíbedun ja ánjarubaña lun lareíni Búngiu joun, gíbe jamámuga gíñe íchugutiña eteíngiruni lun luágu lareíni. Ítara lúba iñurúañu lan líri Búngiu.

¹⁶ Ligía máburujan lubeí warüna. Ouwedeina líña wágubu murúsun murúsun, wawáni, tedérebuguduña ságü wéyu. ¹⁷ Ni cáta le wasúfurirubei lídan ibágari le, lídan le wasáminarun luágu oúnwenbun ugúndani le lúnbei wibíjini yágüta siélu dánme le ñi wamá lúma Crístu lídan luweírigun. Maweírinti lidáani wasúfurirun woun ya uboúagu dan le wasáminarun luágu lúntibei lan dan magúmuchaditi wagúndan siélu. ¹⁸ Marítaguntiwa sarágu luágu cátei lánina uboú le, ladüga murúsuraü lan dan ladúrarun. Le uágubei wíchigei warítagun, luágu cátei lánina siélu, ladüga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan woúnwen lubáragiñe lagíribudun Jesucristu uboúagun, gayáraati loúnwen wágubu quei teíguadun ában muna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Úgubume ligía, mámabei lánina uboú quei ában muna adügütu láu újabu, ábanbei úgubu lánina siélu. ² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³ Láume iséri úgubu ligía wawágu, mítaranbádiwa quei uwáni to úati úgubu táu. ⁴ Sun awánja lan abágarida láu úgubu le wawágubei, darítiwa mégeiti luágu, sandíguia wagía woúngua láu idíjeri. Máma jamúga wabúseeruña woúnwen lun weréderun quei uwáni úouga úgubu táu, le wabúseerubei, lun lasáansiragun wágubu le

gagúmuchadibei furése furése lídoun wágubu le magúmuchadibei, moúnwenga wagía. ⁵ Búngiu aráanserubaliwa lun gabágari wamá le magúmuchaditi, áni rúlaali Sífiri Sándu woun queísi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan uboúagu abágariida lídan wágubu, boúgudiñadiwa lan tueí wában yágüta siélu, máma lan lúmañadiwa Wabúreme. ⁷ Ya uboúagu, siñáti waríjini Crístu, gayáraarügti wafíñerun luágu. ⁸ Gúndaatiwa láu furúmieguarügü cátei le gádaanbaliwa, láu sun jamúga jímein wamáni lun wígiruni ibágari le ya uboúagu lun woúdin agánawa lúma Wabúreme Jesucristu siélu. ⁹ Ligía wáfaagunbei lun wadügünü lugúndan Wabúreme súnwandan, ya wagía yebe uboúagu, yágüta wagía yebe siélu. ¹⁰ Lugúndun sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbatí lé meja wadügübei dán meja le uboúagugidiwa.

Ugánu lánina darángilaü

¹¹ Ligía, quei subúdi wabálín lanúfudewa lueí lagúseragüdüün Wabúreme, áfaaguatiwa lun wafíñeragüdüniña sun gürigia. Subúdi láali Búngiu cátawa lan, áni agúrabatina lun gíñe subúdi jumáni. ¹² Máma wadímurejañaya buídu wawoúgua, wíchuguña ában cháansi jun lun jasándiragun júngua gúndaañu wáu, lun gayára lan joúnabuniña arúfudajatiña jagánagua ja apántajabaña luágu lubuíduñu jarúfudagun joúngua boúgudi jabíti, áni tídan janígi mabuíduntiña. ¹³ Ánjein weíri lubeí wesériwidun lun Búngiu darí lun warijín camá lülüñnein wáu, ladüga luweírin wínsiñejabu lun Búngiu lasúsereda. Ánjein genége lubálín luágu wesériwiduña lan lun Búngiu láu ában lidíli ichügü, ladüga luweírin wínsiñejabu jun wadügei. ¹⁴ Mósu nesériwidun lun Crístu táo sun nanígi lárigiñe larúfuduni luweírin línsiñejabu woun láu loúnwen lídan wafúlasun súngubei. Queísigubeirügü jamúga jilá jamá sun gürigia úara lúma dán meja le loúnwenbei. ¹⁵ Jiláti Crístu jawágu súngubei, lun sun lan ja ánjabaña lun jerésibiruni ibágari lídaangiñe, mámaali lámuga joun guánarügü jabágarida, lun jabágaridun lun Crístu le oúwebei jawágu, sará ligía lídaangiñe oúwени. ¹⁶ Ligía manügün wabeí ni ában quei janügün lirajüñü uboú gürigia, según boúgudi jabíti. Luágu méja ában dan, barü wamuti meja Crístu quei janügüni lirajüñü uboú, mítaranjaali guetó. ¹⁷ Le lubeíti lídaanbei ában lúma Crístu, ábanjali gürigia iséri, gumúja sun cátei le lánina binádu ligáburi, labágariduña ában iséri ibágari lúma Crístu.

¹⁸ Adüga lumúti Búngiu sun cátei le. Gáganiguatiwa meja lúma ladüga wafígoun, ába loúnajani Crístu lun lachíbuni

wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüduniña sun gürígia lúma. ¹⁹ Le naríñagubei, láu loúnwen Crístu lídan wafúlasun, arúfudati Búngiu ában üma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürígia. ²⁰ Wayábiña lubeíti queísi wügüriña ja loúnajabaña Crístu, queísigubeirügi jamúga layúmuragun Búngiu guánarügi jun wádaangiñe. Ayúmuraguatiwa lubeíti jun lueígiñe loúbadina Crístu. aráandara jumá lúma Búngiu. ²¹ Madügünti Crístu ni ában figoú, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachülürün abágardidei ibágari lánina ísuruni le labúseerubei Búngiu lun wabágaridun.

6

¹ Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuídu jígáburi luágu máma lan luágu ni cáta jerésibirei lareíni Búngiu jun.

² Laríñajare Búngiu tídan Lerérun.

Nagáambubei bagúajan nun lídan nidáani lun fuleíseijabu nan joun gürígia,

níderagubadibu lídan nuwéyuri lun nasálbarun gürígia.

Chülüjali lidáani Búngiu lun fuleíseijabu lan joun gürígia, niján buri wéyu le luwéyuribei Búngiu lun lasálbaruniña gürígia.

³ Áfaaguatiwa lun úaragua lan wagáburi lúma wapúrichijan, lueí jamúga jeréderúniwa gürígia lueí jagáambuníwa. Mabúseerúntiwa jamúga wanügün minébesei lun luwádigimari Búngiu láu wagáburi, ⁴ busénrugiútiwa warúfuduni lídan sun cátei luágu esériwidutiña lan lun Búngiu wagía, láu luweírin wagúraasun lun wawánduni asúfuriruni, mégei, lúma lénreengúnga. ⁵ Beíjamaadíwa, dáüjamáwa, ínchajoúatiña gürígia lun jeíbaajaníwa, jéreti wawádigimari lun Búngiu darí lun wasándirun oúnwenbun lubúcha uágu. Reídeijadiwa marúmugunga, áfaaga wagía ilámaü. ⁶ Arúfuda wamúti gíñe luágu esériwidutiña lan lun Búngiu wagía láu larúman wabágari, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatisati, ⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídu ibágari, dándu lun woúdin jabároun wáganiñu quei lun waráramuniña dan le jayábin wabároun. ⁸ Níjein dan ibíjatiwa inébesei, níjein dan anábawaguatiwa. Níjein dan adímurejoúati buídu wawágu, níjein dan adímurejoúati wuríbatí. Níjein dan, oúsera jamútiwa quei yéetiña, níjein dan quei

wüguriña ja aríñagutiña inárüni. ⁹ Níjein dan, oúsera jamútiwa quei ibídiñewatiña, níjein dan quei subúdiwatiña buídu, níjein dan, agúrabaňu wáña lan woúnwen, awánjagua wínwanlu, ígitati Búngiu lun wasúfurirun, lun wafúnrendeirun lídaangiñe, ¹⁰ moúnwentiwa lídaangiñe asúfuriruni ligía. Láu sun níjein lan cátei lun lírudaguagüdüníwa, níjein gíñe ugúndani lúmagiñe Búngiu tídan wanígi. Láu sun gudéme wamá segúnbou, aríñagatiwa joun gürígia luágú irísini inárüni le gayáraabei jadáriruni lídan Jesucristu, láu sun úa lan ni cáta wáma segúnbou jarítagun lánigu ubou, ibíja wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírin jínsiñe nun. ¹² Masáansiragúnti wínsiñejabu jun, láu sun afíñetina luágú sáansigua lan jínsiñejabu woun. ¹³ Ayúmuraguatina jun quei layúmuragun ában úguchili joun lirajüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴ Magámarida jumá gürígia ja mafíñetiña luágú Crístu, lugúndun janüguba ában ibágari le múaraanti. Mamádaguati ísuruni lúma wuríbani, siñáti gíñe gamádagua lan larúgounga lúma lubúriga. ¹⁵ Siñáti níjein lan úarani lídan Crístu lúma Máfia, siñáti gíñe lúaradun ában afíñeti luágú Crístu lúma ában le mafíñeti. ¹⁶ Siñáti gadúnama jamá sándu tídan lúban Búngiu, áni lúban Búngiu le wínwanbei wagía, quei laríñagun Búngiu guánarügü.

Naganoúba jagánagua, eíbuga áume jagánagua,
áuba Jabúngiute, jagíame nánigu.

¹⁷ Ligía gíñe laríñagunbei Wabúreme Búngiu.

Furíjuma jagánaguagiñe ja mafíñebaña nuágú, díse jumá javeí,
líña Jabúreme.

Mádaragua jumá júngua lídoun le wíyebei.

Ábame nerésibirunün,

¹⁸ ábame ában nan úguchili jun,

jugúyame nirajüñü, líña laríñagun Jabúreme, le Súnti Gabáfu.

7

¹ Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwiyeni wawáriua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladüga luweírin inébesei le wawágubei lun Búngiu.

Lasáansiragun jagáburi Coríntona

² ¡Rújuma ában ubáraü woun tídan janígi! Madügüngidiwa dáñu lun ni ában, maríbadagüdün wagía ni ában, mayéedagun.

³ Máma nariñaguñein le lun níchugun jidúnrun, lugúndun queí buga nariñaguni jun, tídañañadün nanígi, lídaañañadiwa ában ínsiñejabúni le mébejati, lídan yebe ibágari o lídan yebe oúweni. ⁴ Weíriti nafíñen lúma nugúndan jáu, labádinagua sun le nasúfurirubei, sandítina dügüdaguaü, áni buin niña gíñe láu ugúndani, jueígiñe.

⁵ Lúmagiñé meja wachülürün Macedóniou, meméraagúngidiwa, darírugütiwa lénreengúnga lídan sun fulásu geyéguá wáu, geyéguati wuríbu wáu, weíriti wadíjeridun juágu.

⁶ Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachülürün Títo, ⁷ áni mámarügü láu lachülürün, lugúndun gíñe gagúraasun lan juágu. Aríñagati woun luágu luweírin jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírin jabúseerun lun joúdin láu nerérun jun. Ábatima nagúndaarun láu líra.

⁸ Láu sun jírugua jumá tadüga gárada to nabürüjaboun jun, maságürijaantina luágu, guetó. Aságürijatiná meja furúmiñe láu nasúbudiruni luágu jírugua jumá tadüga gárada tugúya luágu murúsun dan. ⁹ Guetó gúndaatina, máma ladüga jírudagun, ladüga sáansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara lína lubeíti madügüntiwa ni murúsun dáñu jun. ¹⁰ Lugúndun dan le wíchugun üma lun Búngiu lun layúsuruni íruni le wawágubei ladüga luríban wagáburi lun lasáansiraguni wagáburi, barü lumútiwa lídoun asálbaruni le magúmuchaditi, maríbaanti íruni ligía woun. Ánjein wanüga íruni ligía queísi janügüni lirajüñü uboú, magáraragunga wagía lun Búngiu, lanügübadiwa lídoun féridi lun sun dan. ¹¹ Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadüga gárada tugúya, ába jatátirun asáminara buídu cába lan jadüga láu wügüri le afígounjabei jagánagua. Arúfuda jumúti luágu magúndan jumá láu figoú le ladügübei, áni gáñitün luágu busíganu le líchugubei jun, janúfudetün lueí jamuga jabeichúniwa lueígiñe. Ába jabúseerun jaríjinina lun nasúbudiruni jínsiñejabu nun. Weíriti jabúseerun lun jadügüni le richábei, lun jabeichuni le adügübalin figoú, adüga jumáali sun le lúnbei jadügüni lun jaráanseruni cátei le. Madúnrunjadün guetó. ¹² Dan lubeíti le nabürüjanbarun meja gárada tugúra jun, mámadügüya jamúga ladüga nasáminaruña lan sarágu luágu gürigia le adügübalin wuríbani, ni luágu le asúfurirubalin lueígiñe, nabürüjanbarun lun geféen júma ligíbugüiñe Búngiu luágu luweírin jínsiñejabu woun. ¹³ Ligía ragürguaadiwa lubeí woúngua.

Lánwoun sun gurásu le barü wamáalibei juágu, oúnwenbun wagúndan láu waríjini luágu gúnda lan Tito, íderagua jumáali sun jugúya lun lasándirun darángilaü. ¹⁴ Adímurejatina bugája buíti juágu lun Tito, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña gíñe inárüni lan le waríñagubei lun Tito, luágu gunda wamá jáu. ¹⁵ Áni weíritimaati jínsiñe lun dan le larítagun luágu jadügüni sun jugúya le lamúriajabei júma, lúma luágu jerésibiruni láu ában inébesei lúma idíjeri lueí jamúga jemégeiruba lan lídan jagúncularun láu lerérun. ¹⁶ Gúndaatina láu gayára lan nafíñerun juágu le gumúti.

8

Wíchugun joun gudémetiña

¹ Guetó, nidújeňu, buséntina nabájüdagun jun luágu lareíni Búngiu joun tílana sun ligílisi buri to loúbawaguboun Macedónia. ² Láu sun ában lan oúnwenbun oúchawaguni lun jafíñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rí sitiña. ³ Geféentina luágu rújamaali lan sun le jayáraabei láu sun tarúman janígi, ru jagía sügü láu lé yebe jayáraabei. ⁴ Ayúmuraguatiña sarágu woun lun wígoruniña lun jíchuguni jafáran lídan jíderawagúniwa idújeňu lueígiñe Jesucristu. ⁵ Adügatiña sügü láu lé yebe wagúrabubei jadügün, furúmiñe, ába jederegeragun joúngua le gumúti lun Wabúreme Jesucristu, lárigiñe ába jederegeragun joúngua woun, queísi lugúndan Búngiu. ⁶ Weíriti jabúseerun jíchugun, darí lun wayúmuragun lun Tito lun lagíribudun júmoun lun gayáraabei lan lagúmuchaguagüduni labúdajoún seínsu lé meja lagúmeserubei jídan. ⁷ Jugúya ubáraübei lídan sun cátei—lídan jafíñen, lídan jisúbudin luágu Lerérunt Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeíti gíñe ubáraü jumá lídan ídejani le.

⁸ Máma naríñaguñein le jun quei ában gumádi, busénrügtina jasúbudiruni jabúseeruni ja jíbiri jídejan, lun gayáraabei lan gíñe jarúfuduni jínsiñejabu láu jíchugun táu sun janígi quei jagía. ⁹ Jarítagua jumá luágu lareíni Wabúreme Jesucristu woun. rí siti bugája dan le siélu lan, ába lagúdemedun láu liábin uboúagun ladüga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleísei naríñagei narítagun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adüga jumúti gíñe táu sun janígi. ¹¹ Guetó lubeíti, ítara méme jumá darí jagúmuchuni

abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmati. ¹² Lugúndun ánjein íchiga ában gürígia sun le liyáraati según le lúmabei, láu sun lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³ Máma lun jáfagun mégei ladüga jíderagun ámu, ¹⁴ le busénwabei, lun ñi lan úarani jídan. Guetó, níjein júma lun jabuínchagüdüni le jemégeirubei ámu, lídaanme ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani, ¹⁵ quei taríñagun Lererun Búngiu. “Le gíbebei úma, mígiragunti lúma, le míbebei úma, memégeirunti lun.”

Títo jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídoun tídoun lanígi Títo lun líderagunün. ¹⁷ Gúndaati Títo lúnya lídin aríjaün quei namúriajan lúma, áni afíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸ Úara lúma Títo, woúnajaña ában idújei le uágubei buídu lan jadímuřejan tílana sun ligílisi, luágu lubuídu luwádigimari lun labúruchagun ugánu luágu Wasálbaragüle. ¹⁹ Áni mámarügü líra, anúadaja jamúti gíñe tílana buri ligílisi idújei ligía lun ladügün weíyaasu wáma lun líderagun lídan loúndarún seínsu le. Wadügüñein wadágimanu le, le lánina ídejani, lun wíchugun ugúndani lun Búngiu, lun gíñe warúfuduni luágu busén jamá afíñetiña lun jíderaguniña jadújeñu ja gudémebaña. ²⁰ Waráanseruñein sun cátei lébei lun míchugun wamá lúgaaru lun ladímuřejouň wuríba wawágu lueígiñe loúndarun seínsu le wadügübei. ²¹ Wáfaaguña lun wadügüni sun cátei láu arúmani, mámarügü ligíbugiñe Wabúreme, jagíbugiñe gíñe gürígia.

²² Woúnajaña gíñe ábanya jádaangiñe wadújeñu lúma Títo lúma le ában. Wügüri le, arúfuda láalibei luweírin labúseerun lesériwidun lun Crístu woun lídan sarágu luwúyeri, guetótima láu oúnwenbun afíñeni le luágubei luágu jíchuguba lan sarágu seínsu láu sun jugúndan. ²³ Le álögüdajati libügürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álögüdaja jabügürü biáma idújeñu lueígiñe Jesucristu ja lúmabaña, jaríñagame joun luágu joúnajan lan tílana ligílisi buri, luágu jiñúragüdüñein lan líri Crístu láu lubuídu jagáburi. ²⁴ Ítara líña lubeíti, resíbi jumáña láu ában ínsiñeni le tímatimaati lun gayáraabei lan jaríjini wügüriña jagía luágu inárüni lan lubuídu werérun juágu, áni lun gíñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügüriña jagía.

9

Loúndarún seínsu joun idújeñu ja gudémebaña

¹ Luágu loúndarún seínsu joun idújeñu lídan afíñeni, memégeirunwati lun nabürüjan jun, ² lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügújalibe, áni jíbe-ágei Macedóniana ragüjaña gíñe dëgüdaguaü láu jagáambun luágu luweírin jáfaagun luágu ídejani le. ³ Láu sun líra, noúnajaña idújeñu jun nubáragiñe lun jaráanseruni luáguti labúdajoún seínsu, lun mámabei lan iyéeni, buítí le naríñagubei juágu libügürü cáteli le, lun abúdajoúali lan sun seínsu lubáragiñe nachülürün jumóun, ⁴ ñüdündügü jañeín jádaangiñe Macedóniana núma, jadáriraünme maráanserunga. Líchuguña jamúga líra busíganu woun, júntima, lárigiñe rúwamaali lan sarágu wafíñen juágu. ⁵ Ligía narítagunbei namúriajan jáma idújeñu ja lun joúdin bisídaün nubáragiñe, lun gíñe jíderagunün abuinchagüdei seínsu le uágubei jaríñaga joúndarun. Ítara, aráanseñu lúba seínsu le joúndarubei lun jarúfuduni jareíni, máma quei ában cáteli le lúnti wafósurunün luágu.

⁶ Jarítagua jumá luágu cáteli le. Le loúguati lábunagun, loúguabeí gíñe lalúbajan, le gíbetti lábunagun, gíbebei gíñe lalúbajan. ⁷ Cáda ában jídaangiñe, lúnti líchugun queísi ligáburi larítagun, máma láu magúndani ni ladüga aríñawagúa lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸ Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame gíñe sarágu júma lun jídejan. ⁹ Taríñajare Lerérung Búngiu luágu gürígia le íchugubei sarágu.

Rújali sarágu joun gudémetiña,
áni reídeiti cáteli buítí le ladügübeí lun sun dan.

¹⁰ Búngiu, le íchugubalin ílaü lun lábunún, ában lalúbajagüdün sarágu lídaangiñe lun gayára lan weígin buídu, líchuguba gíñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagüdüní Búngiu murúsun fuleísei le jadügübeí joun, daríme lun jabíjin oúnwenbun abíniruni lúmagiñe Búngiu queísi ában oúnwenbun alúbajani. ¹¹ Juguya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei joúnajani joun wáma, weíribei jateíngiruni Búngiu. ¹² Lugúndun láu wíchuguni íderawaguni le joun wadújeñu, máma wíchiga rügüñein seínsu le jemégeirun joun, wadügüña gíñe lun jíchugun sarágu eteíngiruni lun Búngiu láu líra. ¹³ Jíchuguba

uweíriguni lun Búngiu lugúndun arúfuda lumúti ídejani le joun luágu adüga jumáni le lubeíbei Crístu, jíchuguba gíñe uweíriguni lun Búngiu luágu íderawaguni le jíchugubei joun lúma joun súngubei. ¹⁴ Ábame jayúmuragun lun Búngiu juágu láu sarágu ínsiñejabuni jun luágu luweírin lareíni Búngiu le larúfudubei jídaangiñe. ¹⁵ ¡Teínqui wáña lun Búngiu, luágu rújali lan ában oúnwenbun cátei woun le siñá wabeí adáira dimúrei le buídurügti ubuídun lun wadímurejan luágu! Cátei ligía, Liraú.

10

Lubáfu Páblo queísi apóstolu

¹⁻² Aríñawagúati luágu gudémegu nan dan le júma nan, ánjein lan dan le díse nan jueí, derégüda lan noúserun júma. Áu Páblo, ayúmuraguatina jun láu ában ünabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdünün luágu wuríbati le jadügübei, dánme le nachülürün júmoun. Sáansi jumeí ligáburi jarítagun wawágu, jugúya le aríñagubei luágu lun lan waríjin cába lan waságara lídaangiñe wesériwidun lun Crístu. Ánjein madügün jumá, aráansetina lun nagágibudagun júma. ³ Inárüni luágu uboúaguna wamá láu sun jadébilin gürígia uboúaguna, máma queísi wügüriňa lánina uboú le wawúribuja luágu wuríbani. ⁴ Máma uboúaguna áruma to áuboun wawúribuja, larúmate Búngiu wayúsuruboun lun tagünrinchagun érei. ⁵ Ítara líña lubeíti, láu lubáfu Búngiu güríngua wamúti sun arítaguni le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gíñe jasáminan gürígia uboúagu rúwamuti lábugiňoun lubáfu Crístu lun lúaraduba lan láu le lubeíbei. ⁶ Áni lárigiñe jíchaagun júngua le gumúti lábugiňoun lagúmadijan Crístu, aráanseñu wáña lun wasúfuriragüdüníja ja magáambadigiňabaña lun.

⁷ Barü jumuti cátei quei larijíniwa boúgudigiñe libíti. Aríñagatina jun luágu ánjein lan choúrugua lubeí ában gürígia lúngua luágu lánigu lan Crístu, lúnti gíñe lasúbudiruni luágu ítara méme líña lan lánigu wamá gíñe Crístu. ⁸ Fágua jarítagun luágu néredun murúsun lueí le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdünün lídan cátei lánina Búngiu, máma lun nagünrinchaguni jafíñen, queísi jadügüni arúfudajatiňa jagánagua guetó. ⁹ Mabúseerúntina lun jarítagun luágu náluguňa lan nebélaagüdün anúfudei jídoun táo nigáradan. ¹⁰ Aríñagatiňa náganiňu luágu abürüja nánun gárada queísi ában gürígia láuti sarágu ubáfu, áni derégüdatí nege nerérun jun tídan, dan le júma nan, débilitiná nege, áni

mínsiñegu lán nege ligáburi nadímurejan. ¹¹ Furúmieguarügü le aríñagubalin cátei le, lúnti gíñe lasúbudiruni luágu ítara lan quei nubeí láu dimúrei díse jueí, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawoúngua, mítaraantiwa quei jagía. Jagía, adügatiña ában libídouniga áu láu jamísuraagun joúngua láu guánarügü jamísuraagüle lúma láu jíchaagun joúngua jámagua. ¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñílumuti míchugun lan Búngiu ūma woun lun wesériwidun lun ñi, queísi jadügüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachülürün júmoun ubúrugun Corínto. ¹⁴ Ligía mídin wabeí sügü láu le labúseerubei Búngiu wadüga lídan le wáfaagun lun wíderagunün, ladüga wagía anügübalin ugánu luáguti Crístu jun furúmiñe. ¹⁵ Mapántajaantiwa láu wadágimanu le jadügübei ámu, camá jamuga wadüga. Agúrabarügütiwa lun quei lan lagánwoundun jafíñen, gayáraabei lan wawádigimaritima jagánagua, súnwandan quei lugúndan Búngiu. ¹⁶ Lárigiñeme, jarítaguatiwa wadíseduntima lun wapúrichijani ugánu lánina asálbaruni lídan buri fulásu le díseti jueí, le ñí lumuti magáambungiña lan luágu Crístu, lueí wapántajan luágu wadágimanu le jadügübei ámu, camá jamuga wadüga.

¹⁷ Le busénti ladímurejan luágu uweíriguni, ladímureja luágu luweírigun Crístu, máma luágu luweírigun guánarü. ¹⁸ Lugúndun gürígia le buídubei, máma le adímurejabei buídu luoúngua, le uágubei buídu lan ladímurejan Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

¹ ¡Buséntina jamúga lun jawánduni libídouniga náu murúsun! Awánda jumá, ² lugúndun eméendütina jáu láu ában eméendüni le lúmagiñeti Crístu, lueí jamuga jígoruni Crístu. Áu asúbudiragüdübalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amárieidutu lúma ábanrügü wügüri. ³ Ítara quei layeedunun Máfia Éva, janúfudetina lueí gíñe jígoraguagüdün júngua lun jeyeedún lídan jarítagun, lueí jesériwidun lúnrügü Crístu táo sun tarúman janígi. ⁴ Naríñagubalin le, ladüga resíbi jumáaña ja ñübintiña adímureja iyéeni jun luágu Crístu, áni buliéiguatün lueí cátei inárüniti le warúfudajabei jun. Resíbitün gíñe ában espíritu láu ugúndani ámu lueí Sífiri Sándu le resíbi jumáalibei láu

warúfudajan jun, resíbitün gíñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibeí wámagiñe.⁵ ¡Afíñetina luágu münabun nan sügú jáu súper-apóstolugu ja jafálarubaña!⁶ Fágua ibídiouguati láu ligáburi nadímurejan, mabídiounigati láu nisúbudin, áni arúfuda wamáali le jun súnwandan lídan sun le adüga wamáalibeí.

⁷ ¿Ódi wuríbatí nadüga napúrichijani ugánu lánina asálbaruni jun magúburajanga áu ni cáta, ünabudaguagüda núngua ítara lun niñúragunün lídaangiñe binádu jigáburi? ⁸ Barütina seínsu jámagiñe tílana ámu buri ligílisi láu nerésibiruni le jafáyeirubei nun, lun nayúsuruni esériwida jun magúburajanga naün. ⁹ Áni dan lé meja níjein lan nemégeirun dan le júma nubeí, merédetina quei ijürügu lun ni ában, idújeñu ja ñübinbaña Macedóniagiñe, jagía íchugubalin le nemégeirubei nun. Ítara líña náfaagun lun mámabadina lan ijürügu jun lídan ni cáta, áni ítara méme lúba nadüga. ¹⁰ Ítara quei choúru náni luágu subúdi náni linárün Crístu, ítara líña gíñe nasúbudiruni luágu manügübadiña lan seínsu lúmagiñe ni ában lídan sun Acáya, lueí jamuga lagídarúniwa lóbuna ugúndani le nuágubei, lun gayára lan nesériwidun jun magúburajanga. ¹¹ ¿Cásan uágu nadímureja ítara? ¿Ladüga funásan jímisiñe nun? Subúditi luweírin jínsiñe nun lun Búngiu.

¹² Nadüga mémebei le nadügübei lun míchugun nan lúgaaru joun arúfudajatiña jagía ja áluajabaña lun gayáraabeí lan jaríñagun luágu ítara méme líña lan jesériwidun jun queísi wagía. ¹³ Máma Crístu oúnabajabiña yéetiña jagía jagánaguoún láu sun jafámurun camá lánigu Crístu apóstolu jagía. ¹⁴ Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgounga, ¹⁵ ligía giñéti jafámurubei ja esériwidubaña lun queísi gürígia ja adügutiña buíti. Wel, lachülürüba wéyu lun jerésibiruni le jadünabeí luágu wuríbani le jadügübei.

Lasúfurirun Páblo luágu lesériwidun lun Crístu queísi apóstolu

¹⁶ Naríñaguñaya jun. Úa la ni ában arítaguti luágu ladüga lan lülü lan náu nadímurejanbei jun ítara, áanjein jarítagua jubálin ítara, ígira jumána lun nadímurejan jun quei ában lülü táu, lun gíñe gayára lan napántajan murúsun. ¹⁷ Dan le nadímurejan buíti nuoúgua, madímurejaantina láu ában ünabuni quei ligáburi ladímurejan Crístu, nadímurejan quei jadímurejan ibídiouguatiña áu. ¹⁸ Queísi japántajan arúfudajatiña jagánagua láu buri cátei le lánina uboú le, napántajaba gíñe. ¹⁹ ¡Quei lanárimbeí lichú jáu, awánda jumútiña lülü táu láu ugúndani! ²⁰ Lugúndun awánda jumútiña ja afósurubalün lun jesériwidun joun, jáma gíñe ja aságarubalin le júmati, ja anügübaliñ jánime,

ja oúserubalün quei ni cáta, ja agáyuajabaña jigíbuagun. ²¹ Láu sun nibúsigari nan lun naríñaguni, ¡weírití buga wedébilin lun wadügünü cátei líra!

Ánjeinti le uágubei gayára lan janáangun joúngua, gayáraati gíñe nanáangun núnqua luágu (nadímurejaña méme queísi ában lülü tú). ²² ¿Jarásan Hebréona jagía? Áu sun. ¿Linásifuna Israél jagía? Áu sun. ¿Linébaanfaangu Abrahám jagía? Linébaanfan gíñe áu. ²³ ¿Esériwidutiña lun Crístu jagía? Sügütimaatina jáu láu sun nadímurejaña lan queísi ában lülü tú dan le naríñaguni. Ñadágimeinjaaadina sügü jáu, beíwaadina sügü jáu, dáüwaadina sügü jáu, sarágujali weíyaasu yaráfa nan lun noúnen. ²⁴ Seíngüjali weíyaasu jabeíchunina juríu láu darándi-néfu beíti. ²⁵ Ürüwa weíyaasu jíchaagun Rómana wéwe nuágu, ában weíyaasu jachüragun juríu dübü nuágu. Ürüwa weíyaasu tabúluchun ugúnein to ídaanboun náfayaja náu, ában weíyaasu sügütina ában áriebu lúma ában wéyu anágü baránaja lárigiñe tabúluchun ugúnein náu. ²⁶ Aweíyasujaadina sarágu luágu luwádigimari Wabúreme, áni luágu buri weíyaasu ligía daríguadina núnqua lídan pelíguru dúnarugu, jádan jíwerutiña, jádan nupaísanu, lúma jádan teréncha. Daríguadina núnqua lídan pelíguru ubúrugu, áraabu, lúma baránaja, lúma lídan pelíguru jádan gürígia aríñagutiña luágu idújeñu jamá lueígiñe Jesucristu, le jayéeni. ²⁷ Deréti nuwádigimaridun láu sarágu lénreengúnga, reídeijadina marúmugunga sarágu weíyaasu, súfurijadina ilámaü lúma mágürabu, ayúnaraadina gíbe, súfurijadina lidíliga lúma tiloúga anáanguni.

²⁸ Boúgudi lueí buri cátei le lúma buri ámu cátei, ságü wéyu nasándiruni lijürü nidíjeri jawágu títana sun ligíli. ²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figoú, weíriti nigárigu luágu. ³⁰ Ánjein lúnti lubeí napántajan lun gayáraabei lan jerésibrunina queísi apóstolu, napántajaba láu buri cátei le, le arúfudubalin nidébilin. ³¹ Búngiu, le Lubúngiute áni Lúguchi Wabúreme Jesucristu, le únbei lúnti lan líchugúniwa uweíriguni lun sun dan, subúdi lumúti luágu inárüni lan naríñagubei. ³² Dán meja le ubúrugu nubeí Damásco, ába líchugun gumádimati le esériwidubei lun urúei Arétas oúnigirutiña luágu buri lubéneri fulásu ligía lun janügünina adáüra. ³³ Ába jaráriragüdünunga numádagu lídan ában faníñe lídaangiñe ában funédere láni lubárierun ubúrugu, ítara líña neséfurun jájaburugugiñe náganiñu.

Labájüdagun Páblo luágu buri cátei le larúfudubei Jesucristu lun

¹ Magáñeirunti gürígia ni cáta láu ladímurejan buídu luoúgua. Láu sun líra, nabájüdagua jun guetó luágu buri cátei lé meja larúfudubei Jesúsu nun. ² Catoúrusu irúmu guetó lueigiñe nanügüniwa lídoun lürüwan siélu, áu le afíñebi luágu Crístu. Ibídiñeti nun ánjein láu sun lubeí núgubu nídin, lúmoun máma lan láu, Búngiu asúbudirubalin. ³ Subúdi numúti luágu barüwa nan lídoun lürüwan siélu, le méme gíribei paraíso, ibídiñeti nun ánjein láu sun lubeí núgubu o máma lan láu sun núgubu, Búngiu rügüñein asúbudirei. ⁴ Ni siélu, arúfudati Búngiu cátei nun lé buri uágubei siñá lan nadímurejan ni ca un ladüga arámudaguati buri cátei ligía lueí jasúbudin gürígia. ⁵ Gayáraati jamúga napántajan luágu narijini buri cátei líra, láu sun líra, siñáti napántajan nuoúgua, nadímurejanrügü luágu luweírin mabáfu nan nurúmawagua. ⁶ Láu sun ánjana lan jamúga busén nadímurejan buídu nuoúgua, máma jamúga libídiouniga áu líra, lugúndun inárüni lan jamúga le nariñagubei luágu le asúseredubei nun. Madüğün nubeí lun úa lan ni ában anügütina weíri sügü láu laríjinina o sügü lan láu le lagáambubei nariñagun.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu charúnu nuágu, liábin quei ában lumégen Máfia lun lasúfuriragüdünina. ⁸ Ürüwaali weíyaasu namúriajan lúma Nabúreme Crístu lun lagídaruni sándi ligía nueí, ⁹ laríñaga Nabúreme nun. “Anájein búma láu nínsiñejabu, áni buídurügüti líra lun bawánduni sun asúfuriruni, buítimaati larijín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu. ¹⁰ Ligía nagúndaarúnbei láu débili, anabúni, mégei, eíbaajoúni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weíritimaabei nasándiruni lubáfu Crístu nuágu.

Lidíjeri Páblo jawágu tílana ligíllisi Coríntona

¹¹ Ábanjadina lülü túa láu nadímurejan buíti nuoúgua, áni jugúa adügagüdübalin nun, lugúndun jugúa yebe lúnbei jadímurejan buídu nuágu, máma áu. Münabuntina sügü jáu súper-apóstolugu ja jafálarubaña, láu sun ni cáta nan. ¹² Lidan wadágimanu le nadügübei láu sarágu gurásu jagánagua, arúfudúati láu seíni lúma miláguru weíriti le nadügübei luágu ában lan apóstolu tímatimaati áu. ¹³ Moúserun numútün ünabu jaweí tílana tibiri ligíllisi, ánjein gubeírügü láu lubeí meréde nan quei ában ijürügu jun. ¡Ferúduna jumána luágu líra!

¹⁴ Guetó aráanseedina lun nídin bisídaün lürüwan weíyaasu, áni mámabadina ában ijürügu jun. Máma náluguñein le júmabei, juguya nálugubei lun jederegeragun júngua le gumúti lun Crístu. Ítara jína nun queísi isáanigu, áni agübürigu lúnbaña joúndarun seínsu jabá jasáanigu, máma isáanigu jabá agübürigu. ¹⁵ Nagástarubei le númabei láu ugúndani juágu, daríme lun níchaagun núngua le gumúti luágu jufúleisein lun gayáraabei lan jeíbugun buídu lúma Crístu, láu sun genége láni luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijürügu jun, aríñagatiña luágu barü nan seínsu júmagiñe lídan ámu luwúyeri láu ibíbuni. ¹⁷ ¿Ayéeda numútün funági láu ában jádaangiñe gürígia ja noúnajabaña jun lun lanügüni seínsu júmagiñe nubá? ¹⁸ Amúriajatina lúma Títo lun lídin bisídaün, oúnaja áu ában idújei lúma. ¿Yéegua lumútün funági Títo? ¿Ma ában láu woúserun wagía biángubei, áni ában méme Sífiri Sándu abúgurubalíwa?

¹⁹ Fágua jarítaguatün luágu weséfuraguña lan woúngua jígibugiñe, máma líña. Lubáragiñe líra, wadímurejaña ligibugiñe Búngiu queísi lánigu Crístu. Sun le aríñaga wamáalibe, waríñaguñein lúnrügü jawáanserun lídan jeíbugun lúma Búngiu, nidújeñu jínsiñetiña nun. ²⁰ Nidíjeritina lueí dan lánme nídin aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucristu, láu marásualugu, agúseragüdüña jidújeñu, láu pántaü, lúma lídan chagáguäü. ²¹ Nidíjeritina lueí lídan lánme nídneya bisídaün, lanügagüdüniná Nubúngiute busíganu jáu, lueí gíñe nayájun jawágu sarágu jídaangiñe ja afígounjañabaña lúmagiñe binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewéridijani lúma lagúmujoún buri mábugaü

¹ Nijánme lürüwan weíyaasu nídin bisídaün. Dánme le nachülürün júmoun, lagúseragüdüwaba cáda ában le gadúnrunti áanjein añájein lubeí biáma o ürüwa geféentiña luágu lidúnrun. ² Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan jueí guetó, naríñaguñaya joun sun ja asígirubaña adáagua wuríbani, luágu dánme lan nídin bisídaün lürüwan weíyaasu, nasúfuriragüdübaña lan láu ában érei weíriti. ³ Narúfudubeiti jun luágu adímureja lan Crístu

nídaangiñe. Áni medébilinti Crístu lídan ligáburi loúserunün, arúfudarügü lumúti luweírin lubáfu jagánagua.⁴ Inárüni luágu jilá lan luágu gurúwa queísi débiliti, ába labágardun láu lubáfu Búngiu. Débilitiwa giñe queísi ligía dán meja le laganoúnbei ya uboúagu, áni quei sará lan Crístu lídaangiñe oúweni láu sun lubáfu Búngiu luágu, wachülürüba júmoun láu sun lubáfu Búngiu wawágu ladüga lídaañadiwa lan ában lúma Crístu.

⁵ Joúchagua jumá júngua lun jaríjini ánjein lánigu jubeí Crístu le tímatimaati, joúchagua jumá júngua, moúchugua jumána. ¿Ibídiñeti jun luágu níjein lan Crístu jídan ánjein afíñe jubeí le tímatimaati luágu?⁶ Agúrabatina jasúbudiruni luágu afíñe wamá luágu Crístu le tímatimaati, áni níjein lan agánawa wádan láu sun lubáfu,⁷ ladüga mabúseerun wamá warúfuduni wabáfu quei apóstolugu láu wasúfuriragüdünün luágu luríban jigáburi. Busérnögütiwa lun buídu lan jeíbugun lúma Búngiu láu sun jamúga ígirúa wamá marúfudunga wabáfu quei apóstolugu.⁸ Dan rügüñiein müaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüduni gürígia luágu lifígoun, dan le buídu lan jóúdin lúma Búngiu, mabúseerúnwati narúfuduni nubáfu láu abeíchuni.⁹ Gúndaatina lun naganoún quei mabáfuti ánjein buídu lubeí jigáburi, áni wayúmuraguamémeba lun jiábin lun jabuídurun le gumúti.¹⁰ Nabürüjañoun gárada to jun lubáragiñe nídin aríjaün, lun gayáraabei lan jasáansiruni jigáburi lubáragiñe nachülürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünün. Lugúndun rúlumuti Búngiu ubáfu nun queísi apóstolu lun nawáanseragüdünün lídan jeíbugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburi, ragüjuma dügüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu.¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua.¹³ Mábuga jáña sun wadújeñu lídan afíñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labüriüjan Pablo joun tílana ligílisi buri to Galáciaboun

¹ Anája áu Páblo, le láni Jesucristu apóstolu. Máma gürígia anúadirubalina lun apóstolu nan, máma gíñe gürígia oúnajabalina apúrichija luágu, Jesucristu guánarügü lúma Wáguchi Búngiu le ásaaragüdübalin lídaangiñe oúweni, jagía oúnajabalina quei apóstolu. ² Áu jáma sun wadújeñu lueígiñe Jesucristu ja númabaña ya, wabürüjañoun gárada to jun, jugúa le tílana sun ligílisi to Galáciaboun. ³ Binílaün Wáguchi Búngiu lúma Wabúreme Jesucristu, ibíja jumá gíñe darángilaü jámagiñe. ⁴ Rúlumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboú le, queísi labúseeruni Búngiu. ⁵ ¡Uweíriguni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶ ¡Weíriti nanígi láu lufúresen jígoruni Búngiu le agúarubei jun lun lánigu jumá luágu le ladügübei Crístu juágu, láu luweírin línsiñejabu! Furéseti jasáansiruni jafíñerun afálara ámu arúfudajani lún nege jadáriruni jasálbarun lídaangiñe, ⁷ iyéeni arúfudajani ligía. Chülujaña wügüriña jagánaguóún, ja buséntiña jañáwurijani jarítagun lun jafálarun ában üma le maríchati —ámu lueí jafíñerunrügü luágu Jesucristu lun jasálbarun. ⁸ Wel, furúmieguarügü gürígia le ñübinbei adímureja jun luágu ámu luwúyeri asálbaruni lueí le arúfudaja wamáalibei jun, cátenein lan gürígia ligía, ¡reídeilá lábugiñe líñaragun Búngiu lun sun dan, áu yebe, ában yebe ánjeli siélugiñe! ⁹ Aríñaga náali meja áni naríñagayaali guetó. Ánjein ñübin ában gürígia arúfudaja ámu luwúyeri ligáburi asálbaruni lídaangiñe figoú jun lueí le resíbi jumáalibei, ¡reídeilá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachüllürün Pablo lun ábanbei lan láni Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹² máma lúmagiñe ni ában gürígia nibíjei, máma

gíñe larúfudajan ni ában gürígia nun, Jesucristu guánarügü asúbudiragüdübalin nun.

¹³ Agáamba jumáali ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáali ída líña lán meja lanárimé neíbaajaniña tilana lilígilisin Búngiu, áfaagua áu lun nagúmuchaguagüdüniña. ¹⁴ Lídan ligáburi jagúnfulirun juríu lúma Búngiu, furésetina meja sügú jáu sarágu jádaangiñe nupaísanun ja madíseguati jagüriaajoún núma, ladüga derégüdatimáatina meja lídan nagúncorürun lúma jagáburi binádu nagübürigu. ¹⁵ Ánjeinti Búngiu, anúadira láadina méja lubáragiñe nagüriaajoún lun nesériwidun lun, ába lagúarun nun luágu luweírin línsiñejabu lun lánibadina lan. ¹⁶ Lídan lidáani, ligía lugúndaanbei Búngiu lun lasúbudiragüdüni Liraü nun lun gayáraabei lan napúrichijani lubuídun ugánu joun ja mámabaña juríu luágu ligía lan Wasálbaragülebei. Lárigiñe nasúbudiruni Jesucristu, míndintina álögüdaja ni ca úma, ¹⁷ mídin áu Jerusalén arijaña ja apóstolubaña nubáragiñe, lubáragiñe líra, ába nídin furése louwbawagun Arábia. Lárigiñe, ábaya nagíribudun ubúrugun Damásco.

¹⁸ Darí ürüwa irúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma. ¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu. ²⁰ Ninárün jáu ligíbugiñe Búngiu luágu inárüni lan le nabürüjabei jun.

²¹ Lárigiñe líra, ába nídin louwbawagun Síria lúma Cilicia. ²² Ja wadújeňu lueígiñe Crístu ja tídaanbaña lilígilisin Crístu to louwbawaguboun Judéa, maríjin jamágidiná meja lídan dan ligía, ²³ agáambarügtiña lariňawagún. “Wügüri lé meja eíbaajabaliwa, lapúrichijañein ugánu le lánina afíñeni luágu Crístu queísi Wasálbaragüle guetó, áni ligía lé meja busénbei lagünrinchaguni wafíñen luágu Crístu.” ²⁴ Ába jíchugun uweíriguni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Pablo

2

¹ Catoúrusu irúmu lárigiñe, ábaya nídin Jerusalén úara lúma Bernabé, barü numuti giñe Títo númagua. ² Nídinbei ñi ladüga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu afíñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadügünbalin líra lun gayára lan jánjarun lun le narúfudajabei, lueí leréderun le adüga náalibei lúma le nadügübei quei ni cáta. ³ Resíbi jamúti, áni ni Títo, le nouóbabei, mafósurun jamúti lun lerésibirun circuncisión, láu sun máma

lan juríu. ⁴ Inárüni luágu añájein lan eyéejatiña luágu idújeñu jamá lueígiñe Jesucristu, ádaragutiña joúngua wagánaguóún arámudaguarügü, buséntiña lun líchugúniwa gumádi luágu lúnti lan jerésibiruni Títo circuncisión áanjein busén lubeí lun láni lan Búngiu. Belútiña yéetiña jagía quei aríaa jatiña lun jaríjini ída líña lan wagáburi boúgudi lueí lilúrudun Moisés lidan woúndaragun lúma Jesucristu, buséntiña jamúga lúnya wayábin lun idámunate lun lúrudu ligía. ⁵ Mígiraguagüdüntiwa woúngua joun ladüga busén wamá lun ñi méme lan inárüni le lánina ugánu luáguti asálbaruni júma, jugúya le mámabei juríu, meméterunga ámu buri cátei lánwoun le lúnbei jadügüni lun jasálbarun lueídügya lun jafíñerun luágu Jesucristu.

⁶ Ja asúbudirúabaña queísi ábutigu—láu sun, mebérere nan láu cátañañanu lan ladüga magúseragüdünti Búngiu luágu cátei le genégerügüti —míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabe. ⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijoún ugánu luáguti asálbaruni joun ja mámabaña juríu nun, ítara queí buga líchuguni wadágimanu lun Pédro lun lapúrichijani ugánu méme ligía joun juríu. ⁸ Aríja jamáali luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei nídaangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügübaña quei weírigutimaatiña, luágu Búngiu lan fuleíseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun woúdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu. ¹⁰ Amúria jarügütiña wáma lun warítagun jawágu gudémetiña, áni nijánti cátei le noúchubei nadügün láu sarágu goúnigi.

Ladeínjan Páblo lun Pédro ubúrugu Antioquía

¹¹ Dan le lídinbei Pédro ubúrugu Antioquía, ába nadeínjan lun ligíbuagun, lugúndun mabuídun lan le ladügübei. ¹² Furúmiñe meja, joúti meja jáma afíñetiña luágu Crístu ja mámabaña juríu (ja mebérerenbaña láu circuncisión lúma buri ámu gumádi lídan lilúrudun Moisés). Áanjeinti lárigiñe jachülürün gürigia loúnajan Jacóbo, ligía lagúmeserun Pédro adíseda jaweí ja mámabaña juríu, ába meíginjali lan jáma ladüga lanúfude lueí le gayáraabei jaríñagun ja afíñebaña luágu lúnti lan jerésibiruni wügüríña circuncisión lun jasálbarun, lun gíñe meígin jamá juríu lídan ában jáma ja mámabaña juríu. ¹³ Játi jíbiri juríu ja afíñebaña

luágú Crístu, ába júaradun lúma Pédro lídan cátei mabuínduti le ladügübei, ába gíñe lúaradun Bernabé jáma lídan cátei ligía.
¹⁴ Dan le narijinbei luágú meíbugun jamá úara lúma inárüni le larúfudajabeí ugánu luáguti asálbaruni (luágú man lan asálbaruni ni cátei lúma lilúrudun Moisés), ába nariñagun lun Pédro ligíbugiñe sun adámurini. “Amürü le juríu, berédera abágardia quei ja mámabaña juríu, mabágarduntibu quei juríu. ¿ída liñáti babúseerúnbei bafósuruniña ja mámabaña juríu lun jabágardidun quei juríu?”

*Sálbwatiñajuríu, queísigubeirügüsungürígia, luágurügüpafíñen
luágu Jesucrístu*

¹⁵ Ába nasígirun aríñaga joun.

—Juríu wagía lúmagiñe wagüriajoún, aríñagatiwa luágumafígoun wamá, luágumítaran wamá quei ja mámabaña juríu ja agüriaajoúbaña boúgudi lueí lilúrudun Búngiu.¹⁶ Láu sun líra, subúdi wamúti luágumá abei lan ni ában eréderuti richágumigibugiñe Búngiu luágumá ladügüni le lubeíbei lilúrudun Moisés, láurügübeilafíñerun luágumá Jesucristu lerédera richágumigibugiñe Búngiu. Ligia gíñelébubei wafíñerun luágumá Jesucristu, wagía le juríubei, lun gayáraabei lan weréderun richágumigibugiñe Búngiu lídaangiñe affíñeni le, máma lídaangiñe wadügüni le lubeíbei lilúrudun Moisés, lugúndun úabesi ni ában eréderuti richágumigibugiñe Búngiu lueígiñe ladügüni le lubeíbei lilúrudun Moisés.

17 Ítará líña lubeíti, quei wáluajan weréderun richágú ligíbugiñe Búngiu lídaangiñerügü Jesucristu, ába warijín luágú gafígoun méme wamá queísi ja mámabaña juríu ladüga wabágariduña lan gíñe guetó boúgudi lueí lilúrudun Moisés, ¿gayáraati waríñagun lueígiñe líra luágú Crístu lan gafígoungüdübaliwa? ¡Ni cátei líbe líra! 18 Lubáragiñe líra, lun jamúga wagíribudun lun weménigidun luágú wagúnfulirun lúma lilúrudun Moisés lun wasálbarun lárigiñe weménigidun luágurügü wafíñerun luágú Crístu, warúfuduñein luágú magúnfulirun wamá lúma linárün laníchigu lúrudu ligía, áni gafígountiwa. 19 Áu, queígubeirügü jiláadina lan lun lilúrudun Moisés, lúrudu méme ligía oúwedagüdübádina lun, lun gayára lan nabágaridun lun Búngiu. 20 Rúguatina núngua quei jiláadina lun figoú, dáwaguañu luágú gurúwa lúma Crístu. Mámaadina lubeíti áu méme abágaridubei nídaangua, Crístu abágaridubei nídan. Ibágari le nabágaridubei lídan núgubu, nabágariduñein láu sun nafiñen luágú Liraü Búngiu le jínsiñejabúbei nun, ába ledéregeragun lúngua lun loúnwen nuágu. 21 Mabúseerúntina lubeí namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára

lan leréderun gürígia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Crístu.

Lúrudu ódi afíñeni

3

¹ ¡Jugúya Galáciana, magáambaditün gíñel! ¿Ca abíñaragubadün lun magáambun jubeí lan ugánu le inárünibe libügürü wasálbarun? Lidan meja wapúrichijan jun, aráfuda wamúti lanichigu loúnwen Crístu luágu lugúruwan jun, furáangu. ² Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafíñerun luágu le jagáambubei luágu Crístu? ³ ¿Ída líña ítara lubeí jumágaambadi? Gumésetün eíbuga lúma Crístu láu lubáfu Sífiri Sándu, ¿guetó jarítaguatün funági luágu buítimaabei lan jeíbugun lun jígiruni Sífiri Sándu lun jagúnfulirun lúma jagáburi juríu? ⁴ ¿Marúfudajaangili sun le jasúfurirubei jun? ¡Arúfudajaali lámuga jun! ⁵ Dan le líchuguni Búngiu láni Espíritu jun, adüga ligía miláguru jagánagua, ¿cásan uágu ladügei líra? Máma lugúndun adüga jumáni le lubeíbei lilúrudun Moisés ladügei, ladügünbalin lugúndun afíñie jumá luágu le jagáambubei luágu Liraú.

⁶ Jarítagua jumá luágu Abrahám. Rúlumuti meja sun lafíñen luágu Búngiu, luágu lafíñen, ába lerésibiruni Búngiu queísi ában wügüri richáguati. ⁷ Ligía lubeíti jugúa, lúnti jasúbudiruni luágu ja lan afíñebaña, jagía lan linébaanfaanbaña Abrahám tímatimaatiña. ⁸ Queísi subúdi láni Búngiu lubáramegiwa luágu níbaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafíñerun luágu Jesucristu, ába laríñaguni ugánu buíti lun Abrahám lubáramegiwa, queísi bürüwañu lan tídan lilíburun. “Jabíñirúaba sun gürígia uboúagu bidaangiñe.” ⁹ Ítara líña lubeíti, ja afíñebaña, biníwatiña úara lúma Abrahám le afíñerubei luágu Búngiu.

¹⁰ Ja afíñerubaña luágu jasálbaruba lan láu jagúnfulirun lúma lilúrudun Moisés, bulíeiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürüwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.” ¹¹ Furáanguti lubeíti luágu úa lan ni ában eréderuti richágu ligíbugiñe Búngiu luágu ladügni le laríñagubei lilúrudun Moisés, lugúndun taríñajare Lerérun Búngiu. “Láu lafíñerun gürígia luágu Búngiu lerédera richágu ligíbugiñe, ibíjaleíme ibágari magúmuchaditi.” ¹² Ánjein lilúrudun Moisés máma cátei lánina afíñeni, lánina cátei le adügúwarügti ladüga laríñajare lúrudu ligía. “Láu rügüñein jamúga lagúnfulirun gürígia láu sun igáburi lánina lúrudu le, libíjei ibágari magúmuchaditi.”

¹³ Wagía queísi gürígia garaüwarügütiña, mabáfutiwa lun wagúñfuliruni sun lúrudu ligía. Ába laséfuruníwa Crístu lídaangiñe líñaragun Búngiu lé lúnbei yebe láburujan wawágun lueígiñe magúñfulirun wamáni sun lilúrudun Búngiu le líchugubei woun lídaangiñe Moisés. Barü lumuti Crístu líñaragun Búngiu luoúgua wewéñagua lídan le loúnwenbei luágu gurúwa, lugúndun taríñajare Lerérunt Búngiu. “Íñarawagúati sun le ádarawagúti luágu gurúwa.” ¹⁴ Adüga lumúti loúnwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucristu joun gíñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu wafíñen.

Lilúrudun Moisés, lúma lerérunt Búngiu lun Abrahám

¹⁵ Nidújeňu, níchiga ában jémpulu jun lídaangiñeti jabágari gürígia. Dan le ladügün wügüri ában darádu, ába laseíniruni, úati ni ában lun gayára lan lagúluuduni ni lun líchugun ni cátei lánwoun. ¹⁶ Ítara lína gíñe, rúlumuti meja Búngiu lerérunt lun Abrahám lúma lun linébaanfan. Maríñaguntu Lerérunt Búngiu “binébaanfaangu”, camá jamuga jawáguti sarágu gürígia, taríñajare “lun binébaanfan”. Laníchigu líra, “ábanrügü gürígia”, le Crístu. ¹⁷ Niján le naríñagubei. Adügati Búngiu ában darádu lúma Abrahám, ába lachouúruruni, gadürü-san darándi irúmu lárigiñe, ába líchuguni lilúrudun lun Moisés lun lafúnraanguagüduni joun gürígia. Ligía darádu lubeí lé meja ladügübei Búngiu lúma Abrahám siñáti lagúluudúniwa láu ában lúrudu le ñübinbei gadürü-san darándi irúmu lárigiñe, lun lígiruni lerérunt Búngiu lun Abrahám mebégiga. ¹⁸ Lun jamúga lídaangiñeti lan agúñfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúñfulirún láu lerérunt. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibeí cátei ligía madügüngá ni cátei lun lagáñfeiruni.

¹⁹ ¿Cáti un ju lan lilúrudun Moisés ánjein siñá lubei lasálbaruníwa? Ñübinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafígoun gürígia joun, lúntirügü ladúrarun darí liábin linébaanfan Abrahám, le Crístu, le gíñe úmabei ladügüwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüduni lúrudu ligía joun gürígia. ²⁰ Ánjeinti dán meja le ladügübalin Búngiu lidáradun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adügübalin sun cátei.

Ca lan uágu níjein lubeí lilúrudun Moisés

²¹ ¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúncilirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnciliruni le lubeíbei lúrudu ligía. ²² Lidan linárün cátei, mabáfutiwa lun wagúncilirun lúma lilúrudun Búngiu, le líchugubei lídaangiñe Moisés, queísi laríñagun Búngiu tidan Lerérun. “Sun gürígia lábugiñeñanu lubáfu figoú.” Ítara líña lun lídaangiñerügü lan afíñeni luágu Jesucristu gayára lan jáfuridun gürígia lábugiñegiñe lubáfu figoú lun jeréderun richágu ligíbugiñe Búngiu láu jafíñen luágu Jesucristu, queísi meja laríñagun Búngiu lun Abrahám.

²³ Lubáragiñebei liábin Crístu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin. ²⁴ Ába lubeíti lanügüníwa lilúrudun Moisés lánime camá jamuga irájüñü wagía lun latoúnigiruníwa lueí wuríbani darí liábin Crístu lun dánme lan wafíñerun luágu, gayáraajalíme weréderun richágu ligíbugiñe Búngiu. ²⁵ Guetóti, quei chülüjali lubeí Crístu, mámaadiwa lábugiñe loúnigirun lilúrudun Moisés.

²⁶ Guetóti lirájüñü Búngiu sun jugúya luágu jafíñen luágu Crístu, lídaañadün ában lúma. ²⁷ Sun jugúya le belújalibei lídoun ában lúma Crístu láu jabásterun, ibíjaadün ában igáburi líbe ligáburi Crístu. ²⁸ Mámaali cátei lánina lun juríu jumá o máma jumá juríu, o idámuni o máma idámuni, wügüri o würi, ladüga láu lídaañadün lan ában lúma Crístu Jesúsu, sun jugúya ábanrugüñadün. ²⁹ Ánjein lánigu jubeí Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám queí jalágaante.

4

¹ Niján cátei le nabúseerúbei naríñagun. Dan le loúnwen ában úguchili áni ñüraügili liraü le lúnbei lerésibiruni alágan, mabuíduntimaati dan lun irájü ligía sügü jáu lumúsuniña lúguchi, láu sun ligía lan labúremebi alágan, ladüga siñágili lan layúsuruni. ² Añájein gürígia oúnigiruti, arija jagía láu lalágaante darí lachülürün dan le líridubéi lúguchi lun lerésibiruni. ³ Ítara líña lasúseredun wáma. Lubáragiñebei liábin Crístu uboúagun, lábugiñeñadiwa meja lúrudu lúma buri igáburi le mámabei lúnti ladúrarun lun sun dan. ⁴ Dan le lagúncilirunbei dan, ába loúnajani Búngiu Liraü, le agüriaajoúbei tídaangiñe ában würi, ába liábin quei juríu lábugiñe lilúrudun Moisés. ⁵ Liábinbei ítara lun laságaruníwa lábugiñegiñe lúrudu ligía, lun lerésibiruníwa Búngiu queísi lirájüñü.

⁶ Lúnti larúfuduni Búngiu luágu lirájüñüjadíwa lan, ába loúnajani láni Liraü Espíritu, le méme Sífiri Sándu, tídoun wanígi, áni agúajati Espíritu ligía wádaangiñe lun Búngiu. “¡Núguchi!” ⁷ Lirájüñü lubeíti Búngiu wagía, mámaadiwa idámuni, áni ladüga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afiñebaña

⁸ Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei. ⁹ Ánjein guetó, láu subúdi jumáali lan Búngiu, —lídan lirícha cátei, láu subúdi láadün lan Búngiu —¿ída lubáyasan gayára lan jarítagun lúnya jíchaagun júngua queísi idámuni lábugiñoun lúrudu lúma buri igáburi le mabáfubei lun ladügün ni cáta jun? ¹⁰ Adáaguatün buri fédu ítaga wéyu, ítaga játi, ítaga dan, ítaga irúmu queísi laríñaguni lilúrudun Moisés lun jeréderun richágu ligíbugiñe Búngiu, lídan jarítagun. ¹¹ Janúfudetina lueí masériwidun lan wadágimanu le nadügübei jagánagua lun ni cáta.

¹² Nidújeñu, ayúmuraguatina jun lun jarítagun queísi áu luágu buri cátei le, ladüga furíjadina lun mámaadina lan lábugiñe lilúrudun Moisés queísi meja mámañadün lan lábugiñe lúrudu ligía. Madügüntün ni ában wuríbani nun lídan meja júma nan, ¹³ quei subúdi jumáni, ladüga meja ában sándi le nuágubei gayára lubeí neréderun júma furúmiñeti dan lun napúrichijani ugánu lánina asálbaruni jun. ¹⁴ Sándi ligía lé meja nuágubei, ában meja ouchúni nun, münabunti janügünina luágu líra. Lubáragiñe líra, ába jerésibirunina queísi ában láni Búngiu ánjeli, camá jamuga Jesucristu guánarügü áu. ¹⁵ ¿Ca susérebei lun ugündani lé meja jasándirubei náu? Gayáraati nariñagun luágu jáni fuleísei luágu ánjein lan jamúga meja lúnti, jaságaruñein lan jamúga jágu lun jíchuguni nun. ¹⁶ Guetó, ¿jáganijadina funági lueígiñerügü nariñaguni inárüni jun?

¹⁷ Weíriti juwámaan joun mútu ja, mabuídunti jarítagun jubá. Le jabúseerubei, lun jadísedagüdünün waweí lun ában lánme jawámaadun jun. ¹⁸ Buítí lun juwámadirun joun ámu, ñi áu yebe júma o úaadina lan júma, ánjein láu lubeí lubuídun arítaguni ladügűwa. ¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jarúfuduni luágu níjein lan Crístu jídan. ²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun. ¿magáambun jumágili le

laríñagubei lilúrudun Moisés? ²² Laríñajare luágu garájüñü lán meja Abrahám bián irájüñü, ában táo lidámun, le ában táo lúmari to ában würi to máma idámuni. ²³ Le tiraü idámuni, ítara líña lagüriaajoún quei jagüriaajoún sun irájüñü, ánjein le tiraü to máma idámuni, lagüriaajoún lun lagúncularubá lan le uágubei laríñaga Búngiu lun Abrahám. ²⁴ Ítara líña cátei le queísi ában jémpulu. Bián würíña ja, ítara jáña queísi bián darádu le ladügübei Búngiu. Adügati ában darádu lúma Moisés dan le líchugunbalin lilúrudun lun luágu wübü Sinaí. Darádu ligía, ítara líña queísi Agár ladüga sun lan gürígia ja lábugiñebaña lúrudu ligía idámuni lun jagúncularubá lúma, queísi idámuni jamá sun tirájüñü Agár. ²⁵ Wübü le Sinaí lídaañein fulásu le gíribei Arábia (le ñí lubei jagánoua ladügawagun tiraü Agár). Agár liyáwaboun wübü ligía lúma lúrudu le íchugübei ñí. Ubúruju le Jerusalén le guetóbei, ítara líña quei wübü Sinaí lídan dan le sügüjalibei, ladüga ubúruju ligía jáu sun lílana, ítara jáña quei idámuni lun igáburi lánina lilúrudun Moisés. ²⁶ Ánjeinti Jerusalén le siélubei, máma lánina idámuni queísi máma lan idámuni lúmari Abrahám, áni lirájüñü Jerusalén le siélubei wagía. ²⁷ Taríñajare Lerérun Búngiu.

Gúndaaguabá, würi maraüjeitu, amürü to maraüboun, wágubá láu ugúndani, amürü to ibídíñebi agáriduni bun, lugúndun amürü to áuboun mebáresenwa lan, gíbetimaabaña birájüñü

sügü táo würi to garaüboun láu búmari.

²⁸ Nidújeñu, queísigubeirügi Isáac lan irájü le líchugubei Búngiu lun Abrahám lun lagúncularubá lerérun lun, wagía afíñetiña ladügawagunbaña Abrahám ja uágubaña laríñaga Búngiu lun. ²⁹ Ítara queí meja dan ligía, isáani le agüriaajoúbei lídan ában igáburi quei furúmiegarügi agüriaajoúni eibaaja lumúti meja isáani le agüriaajoúbei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eibaaja jamútiña ja mámabaña lábugiñelúrudu ligía. ³⁰ ¿Cáteisan taríñagunbei Lerérun Búngiu? Taríñajare. “Bugáboun idámuni láu sun tiraü, lugúndun siñáti gafánran lan tiraü idámuni lídan alágan lúma tiraü to mámaboun idámuni.” ³¹ Nidújeñu, mítaraantiwa lubeíti quei tirájüñü idámuni, ítara wáña quei tirájüñü würi to mámaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúrudu buri lúma igáburi. Reídei jumá lubeíti le ñí lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágú áanjaün lan íchaagua júngua lábugiñoún igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun. ³ Nariñagayaali lun furúmieguarügü wügüri le resíbinbalin circuncisión luágú lúnti lan ladügüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu. ⁴ Jugúya le jarítaguabei luágú richágu jumá ligíbugiñe Búngiu láu jagúñfulirun lúma lilúrudun Moisés, ígira jumáali Crístu, díseedün lueí asálbaruni le láurügtü lareíni Búngiu. ⁵ Wagía, láu lubáfu Sífiri Sándu lúma láu wafíñen luágú Jesucristu, jeménigitiwa luágú weréderuba lan richágu ligíbugiñe Búngiu. ⁶ Ánjein lídaañadiwa lubeí ában lúma Crístu Jesúsu, málati werésibiruni circuncisión lúmoun merésibirun wamáni. Le busénwabei, lun afíñe wamá luágú Jesucristu lúma lun warúfuduni afíñeni le wawágubei láu wínsiñejabu joun gürígia wáledi.

⁷ Buíti meja jeíbugun lúma Crístu, ¿ca ígiragüdúbalin la-gaambúniwa inárüni jun? ⁸ Máma Búngiu le agúarubei jun adügübalin líra. ⁹ Mabúlieida jumeí luágú furése lan lawáraüdagun arúfudajani le maríchati lun lagünrinchaguni jafíñen sarágu gürígia queísigubeirügü résigüda lánun murúsun ísi sun to añóundawaguboun láu. ¹⁰ Neméniguduña luágú Wabúreme Crístu lúnya lasáminaragüdünün queísi áu luágú buri cátei le. Áni cáteiñein lan gürígia le añawurijabei jun, labeíchubei Búngiu.

¹¹ Aríñagatiña arúfudajatiña yéetiña jagía luágú apúrichija nan luágú lúnti lan jerésibirun wügüriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga láburujan dimúrei luáguti loúnwen Crístu luágú gurúwa joun. ¹² Ánjeinti jawágu ja abúseerúbaña jádaruni jídoun luágú lúnti lan jerésibiruni circuncisión, igúndaatina jamúga lun jíbugunun jawáriua gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun Moisés, manúga jumeírugü liñáti líra lun lébume gayára lan jasígiruni ugúndani buri le lánina uboú le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴ lugúndun láu jagúñfulirun lúma lúrudu le aríñagubei. “Jínsiñelá gürígia bíledi bun queísi bísiñegua búngua”, gúnfulijadün láu sun lilúrudun Moisés. ¹⁵ Goúnigi jumá, áanjaün ageíndagua júmagua, jagúmuchaguagüdüba júniwagua.

Ugúndani le lánina uboú, lúma eíbuguni lúma Sífiri Sándu

¹⁶ Niján cátei le nariñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina uboú. ¹⁷ Ugúndani le lánina uboú máma lúmagiñeñeñein Sífiri Sándu, áni Sífiri Sándu, máma lúmagiñeñeñein ugúndani le lánina uboú. Gáganguati ában lúma le ában, ligía lásiñerunbei jadügünü jugúya cátei le jabúseerúbei yebe jadügün. ¹⁸ Ánjein Sífiri Sándu lubeí abúgurubadün, mámaadün gíñe lábugiñe lilúrudun Moisés.

¹⁹ Ménreengúnti larjíniwa cátei lán buri cátei le jadügübei ja afálarubalin ugúndani lánina uboú. Gámariaguatiña jámagua mamárieidunga, adáaguatiña buri cátei wíyeti, úati nibúsigari jamá láu jasálufurin, ²⁰ judúguatiña joun sándu, abíñaraja jagía. Níjein iyéreejabuni jádan, gáganguauü, lúma eméendüni. Ménreengúnti jagáñidun, jawoúgua rügüñein jarítagua súnwandan, fánreinguagüda jamúti adámurini. ²¹ Gimúgatiña, gáfarajadi, gátadi, weínamu jeígin, adüga jagía ámu buri cátei lenége líra. Nariñaguñeñin jun quei nariñaguni lubáramegiwa luágu ja lan adügübalin cátei le, mebélurunbaña lídoun larúeijan Búngiu.

²² Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni, ²³ manáanguni únguaü, ragüguauü únguaü. Úaraguati buri igáburi le lúma furúmieguarügü lúrudu. ²⁴ Ja lánigubaña Crístu, dágua jamáali sun luwáamaan cátei le lánina uboú le joun luágu lugúruwan Crístu. ²⁵ Ítara quei wabágaridun lídaangiñe Sífiri Sándu, lúnti gíñe wígirun lun labúguruníwa Sífiri Sándu lídan le wadügübei.

²⁶ Moún lumuti wanáangun woúngua, añawurijatiwa joun wíbirigu ítara, rúti gíñe gimúgaü wádaangua.

6

Íderagua jumá júmawagua

¹ Nidújeñu, ánjaün aríja luágu áburujaali lan ában jídaangiñe lídoun figoú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figoú ligía, adüga jumeí láu maweíriguni. Lúnti gíñe goúnigigua jumá júngua lueí gíñe jáburujan lídoun figoú queísi ligía. ² Ídaragua jumá júmawagua lun jawánduni jijürügü, ítara lúba jagúnfulirun lúma lilúrudun Crístu, le lánina ínsiñejabuni.

³ Lúnti wíderaguniña wíbirigu lugúndun ánjein anáangua gürígia lúngua áni ni cáta ligía, leyéedaguña lúngua. ⁴ Cáda ában gürígia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma

ámu,⁵ lugúndun sun gürígia geféenbaña lun Búngiu jawoúgua, máma jawágu ámu.

⁶ Le únbei larúfudajoúa Lerérun Búngiu lúnti lafánreinjani sun luwúyeri ibíjini lúma le arúfudajabeí lun.

⁷ Mayeedagua jumá júngua, siñáti jéjerajan láu Búngiu. Le lábunagubei gürígia, ligíaba gíñe lalúbaja. ⁸ Ánjein ábunagua ában gürígia cátei le íchugubei ugúndani le lánina uboú lun, le méme lábunagubei, líchuguba ában alúbajani le lánina férideri lun. Ánjein ábunagua ában gürígia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina ibágari magúmuchaditi lun. ⁹ Moún lumuti lubeíti labúchadun wawágu adügei cátei le buídubei, lugúndun ánjawa ítara méme adügei, walúbajaba buítí dánme le lachülürün dan lun werésibiruni. ¹⁰ Ligía, adüga wameí lubeí le buídubei joun súngubei ságü gayára lan, joúntima wadújeñu lueígiñe Crístu.

Ewéridijani lúma lagúmujoún ayoúraguni

¹¹ Aríja jumá luweínamu létera le áubei nabürüja jun guetó láu nújabu guánarügü. ¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadügüñein lúnrügü jeréderun buídu jagíbugiñe juríu, lun meíbaajoúniwa jamá lueígiñe jamúga jaríñagun luágu lídaangiñé rügüñein lan loúnwen Crístu wasálbara. ¹³ Ni ja íchaagubaña joúngua lábugiñoun igáburi le lánina circuncisión, madügün jamúti sun le laríñagubei lilúrudun Moisés, busénrugiñea lun jerésibiruni juguya circuncisión lun gayára lan japántajan luágu jafósurunün lun jibíjini circuncisión. ¹⁴ Ánjeinti áu, mabúseerúntina napántajan ni ca uágu, ában rügüñein cátei uágoti nadímureja weíri—luágu loúnwen Wabúreme Jesucristu luágu lugúruwan wawágu. ¡Lídaangiñé lugúruwan Crístu jiláaňu líňa cátei le lánina uboú nun áni jiláaňu níňa gíñe lun cátei le lánina uboú! ¹⁵ Lun Búngiu, ni cáta ánjein ibíja wabálín circuncisión lúmoun mibíjin wamáni, le busénwabei, lun iséri wamá gürígia. ¹⁶ Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilaü lúma gudéméjabu lúmagiñé.

¹⁷ Lúmagiñé dan le ugúñe, mabúseerúntina lun nibíjin lénreengúnga ni ca úmagiñé. Arúfuda lumúti lárigi buri bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binílaün Wabúreme Jesucristu, sun juguya. Ítaralá.

LIGÁRADAN PÁBLO JOUN ÉFESONA

Labürijan Páblo joun tílana ligílisi to Éfesoboun

¹ Anája áu Páblo, le láni Jesucristu apóstolu láu lugúndan Búngiu, nabürüjañoun gárada to jun, jugúya le lánigubei Búngiu ja afiñebeña luágu Crístu Jesúsu lídan ubúrugu le Éfeso. ² Binílaün Wáguchi Búngiu lúma Wabúreme Jesucristu, ibíja jumá gíñe darángilaü jámagiñe.

Abíniruni le wánibei lugúndun lídan wamá ában lúma Jesucristu

³ Rúwama uweíriguni lun Búngiu, Lúguchi Wabúreme Jesucristu, lugúndun láu lídan wamá ában lúma Wabúreme Jesucristu, biní laadiwa láu sun luwúyeri abíniruni le lánina siélu. ⁴ Lubáragiñebeí meja ladügüni Búngiu uboú, anúadira lumútiwa lun lánigubadiwa lan láu le lúnbei ladügüni Crístu wawágu, lun weréderun madúnrunga ligíbugiñe, derégeguñu woúngua lun. ⁵ Fánrein lumútiwa lúmagiñe binárü, láu línsiñejabu, lun lerésibiruniwa queisi lirajüñü lídaangiñe Jesucristu, ladüga ligía lan lugúndaanbei woun. ⁶ Ligía súnwandan lubeí wíchugun uweíriguni lun Búngiu luágu luweírin lareíni le áubei labínirawa dan le lídan wamá ában lúma Liraü le jínsiñebei lun. ⁷ Láu luweírin lareíni Búngiu, sálba láadiwa láu líta Liraü le áwiyurubei wawágu dan le loúnwenbei luágu gurúwa, ferúdunaleí wafígoun. ⁸ Arúfuda láali Búngiu lareíni woun le tímatimaati láu líchugun sun luwúyeri subúdi lúma gunfaráandaü woun, ⁹ subúdigüda láali layúmajan lé meja arámudaguabei woun, o arítaguni lan le lasáminarubei ladügün. ¹⁰ Según arítaguni le, le lúnbei lagúncularun quei lubúdubu dánme le lachülürün lidáani, ladúnraguagüdübei Búngiu sun cátei lábugiñe lagúmadijan Crístu, dándu lé buri siélubei quei le uboúagubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adügübalin sun cátei quei labúseeruni. ¹² Anúadira lumútiwa lun wabágaridun, wagía le afiñebei luágu Crístu furúmiñe, lun liñurúniwa líri Búngiu luágu luweírigun. ¹³ Jugúya gíñe, dan le jagáambunbalin ugánu le lánina inárüni—ugánu le anügübalin asálbaruni jun—ába jafíñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun. ¹⁴ Sífiri Sándu ligía ában lichoúrun Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni

lasálbaruníwa, wagía le lánigubei, lun liñurúniwa líri luágu luweírigun.

Lamúriajan Páblo lúma Búngiu lun líchugun subúdi joun afíñetiña

¹⁵ Ligía dan le lubeí nagáambunbei luágu afíñeni le jídaanbei luágu Wabúreme Jesúsu, lúma luágu ínsiñejabuni le juágubei joun sun ja lánigubaña Búngiu, ¹⁶ másuti neteíngiruni Búngiu juágu dan le narítagun juágu lídan nayúmuragun lun. ¹⁷ Amúriajatina lúma Lubúngiute Wabúreme Jesucristu, Úguchili Weíriguti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gíñe jasúbudirunitima Búngiu buídu. ¹⁸ Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírigun lúma lirísin alágan le líchugubei Búngiu joun lánigu. ¹⁹ Amúriajatina gíñe lúma lun lasúbudiragüdüni jun ída líña lan luweírin lubáfu le mébejabei le ñadágimeinbei wádan, wagía le afíñebi luágu. ²⁰ Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe oúweni, ába lañúuragüdüni lueígiñe loúnwenren yágüta siélu. ²¹ Rúlumuti loúgiñe sun gumádi, ubáfu, érei lúma arúeijani lé buri siélubei, lúma loúgiñe sun le gayáraabei liridún, dándu lídan dan le queísi lídan le lúnbei liábin. ²² Rúlumuti sun cátei lábun lubáfu Crístu, rúlei gíñe Crístu guánarügü lun ligíaba lan ichügündinaü joun sun gürígia ja lánigubaña, ja gíribaña lilígilisin. ²³ Gürígia jagía, ja méme lúgububaña Crístu, buin jáña láu libágari Crístu (láu lubáfu láni Espíritu), áni Crístu guánarügü adügübalin sun catei áni ágüdajaleí.

2

Sálbaadiwa láu lareíni Búngiu

¹ Rújali Búngiu ibágari magúmuchaditi jun úara lúma Crístu le lásaaragüdübei lídaangiñe oúweni, láu sún meja jiláñugidün lan lun cátei le luáguti Búngiu, lurúma wuríbani lúma figoú buri le gádaanbalün. ² Lídan meja dan ligía, falá jumuti láni uboú le jémpulu, adügei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³ Ítara líña meja gíñe wabágaridun, sun wagía, luágu ában dan, afálarei wayúmajan, agúñfulira lúma lugúndan wagáburi lúma lugúndan wasáminan, queísi gürígia garaüwarügütíña. Ligía lúnti lubeí yebe láburujan lanárimé ligáñi Búngiu wawágun queísi ja jíbiri. ⁴ Weíriti lugúdemejabu Búngiu, ⁵ ába larúfuduni luweírin línsiñejabu woun láu sún meja jiláñugidiwa lan lun cátei le luáguti Búngiu lurúma wafígoun.

Ába ladáraruni lubéneri ibágari magúmuchaditi woun láu lásaaragüdüni Crístu lídaangiñe oúweni. Sálbatiwa lubeíti láu lareíni Búngiu. ⁶ Sarágüda lumútiwa gíñe Búngiu lídaangiñe oúweni lánina figoú láu lásaaragüdüni Crístu lídaangiñe oúweni, ába líchuguni wabára woun lúma Crístu yágüta siélu, lúma uweíriguni lánina ubáraü ligía. ⁷ Ladügünbalin líra lun larúfuduni luweírin wiñsiñe lun lúma lareíni woun lídan Crístu Jesúsu lídounme dan le lúnbei liábin. ⁸ Sálbwádiwa luágu lareíni Búngiu, luágu wafíñen luágu. Máma jamúga ában cátei le wagía guánarügübei adügübalin, Búngiu íchugubalin wasálbarun woun. ⁹ Máma lídaangiñeti cátei le jamúga ladüga mútu, lun úa lan ni ában apántajati lueígiñe. ¹⁰ Lugúndun Búngiu adügübaliwa, iséri gürígia wagía lídan Crístu Jesúsu lun wadügün cátei buíti, quei larítaguni lúmagiñe binárü.

Waráandarun lúma Búngiu lídaangiñe Crístu

¹¹ Jarítagua jumá lubeíti luágu ída jíña lán meja furúmiñe. Máma meja lídaangiñetün jarásan juríu, ligía lébubei gürígia ja juríu, ja erésibirubalin circuncisión, ába jagúarunün, “gürígia ja merésibirubalin circuncisión”, o gürígia ja mámabaña lánigu Búngiu. ¹² Lídan meja dan ligía, ibídiñegili meja Crístu jun, mámagidün meja lílana linásiñun Israél, ja lumútuniñabaña Búngiu, boúgudiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduñá meja uboúagu meménigiga, ibídiñega Búngiu le inárütibej jun. ¹³ Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu. ¹⁴ Barü laadiwa Crístu lídoun aráandaruni, ladüga adüga láaña juríu jáma ja mámabaña juríu lun ában méme jamá mútu, güríngua lumúti gáganiguaü lé meja afánreinragubaliña. ¹⁵ Gumúguagüda lumúti cátei le lilúrudun Moisés láu sún buri gumádi lánina lúrudu ligía láu loúnwen, adügeina láña juríu jáma ja mámabaña juríu lun ában mémebaña lan lídan. Ítara lína ladüguni aráandaruni wádaangua. ¹⁶ Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña biángubei lúma Búngiu, adügeina láña biángubei lun ábanrügü lan mútu—lumútuniña Búngiu jagía.

¹⁷ Ñübinti Crístu, ába lapúrichijani ugánu buíti luáguti aráandaruni lúma Búngiu joun sun gürígia, dándu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu. ¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu. ¹⁹ Ligía mámaadün lubeí teréncha lun larúeijan Búngiu, lílanaadün larúeijan quei

sun ja lánigubaña. Lufámliliangu Búngiu jugúa. ²⁰ Sun wagía afíñetiña, dándu juríu quei máma juríu, ítara wáña quei ában ligílisi to ligíbuaguboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucristu meme ligía dübü le weírigutimaabei lídan ébuu ligía. ²¹ Luágu ébuu ligía le Crístubei tiñúrawagua muna tugúa (wagía afíñetiña), aráanseñu sun tumégegun buídu darí lun tiábin lun ában tan ligílisi to derégewatu lun Crístu, to gíñe lídaantu ában lúma. Ítara wáña wagía le afíñebi luágu Crístu. ²² Ítara líña lubeíti, jugúa gíñe le mámabei juríu, lídaañadün ában lúma Crístu, oúndaraguatün jáma súngubei ja jíbiri lun wayábin sun wagía lun ítara wamá quei ában muna to ní lubei lagánawa Búngiu láu láni Espíritu.

3

Luwádigimari Páblo lun lapúrichijan luágu Crístu joun ja mámabaña juríu

¹ Ligía lébubei nayúmuragun, áu Páblo, lun Búngiu juágu. Daňwañu níña lueígiñe luwádigimari Crístu le adüga náalibei jagánagua, jugúa le mámabei juríu. ² Mósu subúdi jumáali lan luágu rúlaali lan Búngiu wadágimanu le nun láu lareíni, luágu jáni fuleísei. ³ Queísi nabürüjan jun, adüga lumúti meja Búngiu ában aráansejani juágu, jugúa le mámabei juríu, arámudaguati aráansejani ligía, ába lasúbudiragüduni nun. ⁴ Láu jalíjani le nabürüjabei, jasúbudirubei luágu gunfaráanda náni laráansejan Búngiu luágu Crístu, lé meja ligílarügübei asúbudirei. ⁵ Masúbudirawagüdünti aráansejani ligía lun ni ában lídan meja dan le sügüjalibe, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja derégeguubaña joúngua lun le gumúti. ⁶ Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richáguligíbugiñe Búngiu lídaangiñe Jesucristu. ⁷ Fuleísei láadina Búngiu láu líchugunina lun napúrichijani ugánu ligía láu lubáfu, laú sun madüna náni yebe fuleísei ligía. ⁸ Ünabutimaatina sügü láu le ünabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírin jarísin lídan Crístu le mébejabei. ⁹ Rúlaadina Búngiu, le adügübalin sun cátei, lun nafúraanguagüduni joun sun gürígia ída líña lan lanügün aráansejani ligía lé meja arámudaguabei fulásu. ¹⁰ Arámudaguati meja aráansejani ligía lun guetó lan gayára lan jayábin sun láni Búngiu ánjeligu

ja arúejabaña siélu lun jasúbudiruni lichú láu Búngiu lídan sun luwúyerigu jádaangiñe afíñetiña, ja lilígilisinbaña Crístu. 11 Úaraguati sun le lúma larítagun Búngiu le larítagubei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. 12 Lídaangiñe Crístu, gayáraati wayárafadun lun Búngiu láu eméniginí le líchugubei wafíñen luágu Jesucrístu woun. 13 Ligía nayúmuragunbei jun lun máburujan lan jarüna lueígiñe le nasúfurirubei juágu, lugúndun weírirügüti cátei líra jun.

Línsiñejabu Crístu

14 Ligía lubeíti lébubei nájuduragun ligíbugiñe Lúguchi Wabúreme Jesucrístu, 15 le Jáguchibei sun lufámlían Búngiu uboúagu lúma siélu. 16 Amúriajatina lúma Búngiu lun líchugun érei lúma ubáfu jun según luweírin ubáfu le lúmabei, lun jídin jubáruaguóún láu Sífiri Sándu le jídaanbei. 17 Amúriajatina gíñe lúma lun jíchugun fulásu tídan janígi lun laganoún Crístu ñi, láu sun jafíñen luágu, 18 lun gíñe láu lan ában ínsiñeni weíriti, derégüdagu jídan, gayára lan gunfaráanda jumáni lítulen, limígifen, Iujúlin lúma líñun línsiñejabu Crístu buídu, jáma sun jíbiri afíñetiña. 19 Amúriajatina lubeíti lun jasúbudiruni ínsiñejabuni le, le weíritimaabei lueí sun le wayáraabei asúbudira, lun lúma jumá Búngiu le gumúti.

20 Guetóti, iñurúalá líri Búngiu le gabáfubei lun ladügün gíbe sügü láu le wamúriajabei o le lan wasáminarubei, láu lubáfu le ñadágimeinbei wádan. 21 ¡Arijúalá luweírigun Búngiu lídaangiñe sun le ladügübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

4

Lídaañadiwa ában láu lubáfu Sífiri Sándu

1 Ladüga sun le adüga láalibei Búngiu jun, ligía namúriajabei júma, áu le adaürübei lueígiñe luwádigimari Crístu, lun joúseragun júngua quei lúnti lan jadügüni ja únbaña wájali lan Búngiu lun lánigu jamá quei lagúarun jun. 2 Ünabugu jumá, jínsiñejabu, gagúraasun jumá, areída jugúyame joun jíbirigu. 3 Joúcha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaü júmagua, ítara lúba lídaanbadün lan ában súnwandan. 4 Lúnti wanáangun woúngua lídan ában, lúma jáma jíbiri lánigu Búngiu ladüga lumégegun lan ában méme úgubu le gíribei lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eméniginí luágu walágaante lídaangiñe. 5 Ligía méme Abúremein Wabúreme súngubei, ligía méme wafíñen luágu Jesucrístu, badíseitiwa sun wagía lídan

líri Abúremein ligía. ⁶ Ában rügүñein Búngiu Jáguchi súngubei, joúgiñeñein súngubei, ñadágimeinti jáu súngubei, áni níjein jádan súngubei.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában Wádaangiñe, woun. ⁸ Ligía laríñawagunbei tídan Lerérun Búngiu luágu Crístu. Múdeiti siélun barüina láña adaürütiña lúmagua, ába buri líchugun ubáfu joun gürigia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le ünabutimáabei uboúagu. ¹⁰ Crístu le arárirubei lun uboúagun, ligía méme gíñe le amúdeirubei lídoun líñun-ägei siélu láu sun luweírigun lun labuínchagdüni súngubei láu guánarügü. ¹¹ Ába líchugun ubáfu lun cáda ában jádaangiñe afíñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun joúdin apúrichijei ugánu buítí lánina asálbaruni joun ja magáambun jamágilibei ugánu ligía, jíbiri lun jafádirajan lúma lun jarufudajani Lerérun Búngiu. ¹² Ítara líña laráanseruniña lánigu lun gayáraabei lan jesériwiduni buídu, ¹³ lun jedérebudagüdüniña jíbirigu lídan Crístu daríme wachülürün sun wagía lun lídan wamá ában lídan wafíñen luágu Jesucrístu, le Liraü Búngiu, lúma lídan lisúbudinwa. Ítara lúba gürigia wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu. ¹⁴ Mítaraanjádiwame quei irájüñü lun ménreengun lan wasáansijan lun ladúurujaníwa ligárabalí furúmieguarügü iséri luwúyeri arúfudajani lun wáburujan lídoun jayéeni gürigia bíbutiña ja abúseerúbaña janügüníwa lídoun üma le maríchabei. ¹⁵ Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichügüdünaübei joun sun lánigu ja gíribaña lúgubu. ¹⁶ Sun wagía le lúgubu Crístu, úaraguatiwa lídan ában lábugiñe lagúmadijan Crístu, cáda ában Wádaangiñe gayáraati wíderaguniña ja wíbirigu. Ítara lúba gayára lan wawáanserun súngubei lídan weíbugun lúma Crístu, awáanse wagíame lídan ínsiñeni.

Iséri ibágari lídan Crístu

¹⁷ Niján lubeíti cátei le naríñagubei jun lídan líri Wabúreme. lun jebé lan jabágaridun quei ja ibídiñejabubaña lun Búngiu, ja abágaridubaña úaragua lúma jasáminan le málabei. ¹⁸ Darúgu líña láu jasáminan, úati ibágari le ñübinbei lúmagiñe Búngiu jádan lugúndun ibídiñeti ni cáta joun lurúma tidére janigi. ¹⁹ Féridi jamáali jabúsigari, derégeguaaña joúngua lun wuríbani, adügatiña sun luwúyeri iwíyei láu ugúndani. ²⁰ Ánjeinti jugúya, máma líña jafúnrendeirun lúmagiñe Crístu, ²¹ ladüga inárüni

lan luágu agáamba jumá luágu Crístu, arúfudajoúati inárüni lé meja larúfudajabei, jun. ²² Ánjeinti luágu binádu ligáburi jabágardun, arúfudajoúati jun lun jígiruni binádu meja jígaburi le mabuídunjalibei láu jagúñfulirun lúma luríban ayúmajani le gayéeraguadibe, ²³ arúfudajoúati jun lun iséri jumá lídan jáni espíritu lúma lídan jisáminan, ²⁴ lun iséri lan jígaburi, buíduñu, jarúmañu le gumúti queísi ligáburi Búngiu.

²⁵ Ligía jebé lubei jayéejan, adímureja jumeí inárüni jáma jíbirigu lugúndun lánigu ában méme úgubu sun jugúya, le lúgubu Crístu.

²⁶ Moún lumuti jagáñidun le lánina afígoujani, moún lumuti gíne jálündün sarágu dan arítagua luágu cátei le agáñidagüdübalün— ²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagüriaragun lúngua, lun gíne gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, ibíja jagíame abíniruni lídaangíñe jerérun. ³⁰ Majírudaguagüda jumeí Sífiri Sándu, lugúndun níjein Sífiri Sándu jídan lun jasúbudirúniwa queísi lánigu Búngiu daríme lachüllürün wéyu lun jasálbarun le gumúti.

³¹ Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani. ³² Buídu jumá, gudémejabu jugúyame júmagua, ferúdunagua jumá júmagua ítara quei ferúduna lánün Búngiu lídan Crístu.

5

Ída lúba lan ligáburi jabágardun lirájüñü Búngiu

¹ Quei lirájüñü jubeí Búngiu ja jínsiñetiña lun, joúcha jumá lun ítara lan jígaburi quei ligáburi. ² Jínsiñegua jumá júniwagua ítara quei wínsiñedun lun Crístu, ába lederegeragun lúngua wawágu queísi ában mudún le adágarawagüdüti lun Búngiu. Ítara líñia línsiñejabu Crístu woun queísi cupáli le buíti líjeme, le águdajoúbei lun Búngiu, resíbi lumúti láu ugúndani.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweínamu águu.

⁴ Mawíyelá jiyúma, maríñagun jugúyame libídiouniga áu, ni dimúrei málati, ladüga mabuídunti buri cátei le. Lubáragiñe jadímurejan cátei líbeina líra, yúsú jumeí jiyúma lun jíchugun eteíngiruni lun Búngiu. ⁵ Subúdi jumúti luágu le lan agámariduti mamárieidunga, o ladügün lán buri cátei wíyeti, o labágardun lídan luweínamu águu —le queísigubeirügübei lanügüni irísini lisándunme —siñáti gafánran lan lídan jarúeijan Crístu lúma

Búngiu. ⁶ Mayéedagualaün ni ában láu lagübüri buri dimúrei, lugúndun ladüga buri cátei wuríbati le, láburuja lanárime ligáñi Búngiu jawágun ja magáambadibaña lun. ⁷ Dírei jumá jaweí jíbe gürígia jára.

⁸ Lídaañadün meja lubúriga, ánjein guetó, quei lídaañadün lan ában lúma Wabúreme, lídaanjadün larúgounga. Ítara líña lubeíti agáburida jumá queísi gürígia ja eíbugubaña lídan larúgounga. ⁹ Gürígia jagía, areídatiña, surúti jabágari, jínsiñeti inárüni joun. ¹⁰ Joúcha jumá jafúnrendeiruni ca lan jínsiñebi lun Wabúreme. ¹¹ Mádanlaün buri cátei málati le jadügübei ja lánigubaña lubúriga, sagárügü jumeí lídoun larúgounga láu lubuíduñun jigáburi. ¹² Rúti busíganu íbini lun ladímurejoúniwa luágu buri cátei le jadügübei arámudaguarügü, ¹³ dan le larúfuduni larúgounga luágu wuríba lan jagáburi, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga. ¹⁴ Ligía laríñawagúnbei.

Agáguduabá, bugúya le arúmugubei,
sarába jádaangiñe jiláaña,
ábame larúgoungadágüdün Crístu báu.

¹⁵ Toúnigi jumá lubeíti buídu ída líña lan joúserun. Mabágarida jumá quei ibídiougu táu, jabágarida quei chu táu. ¹⁶ Yúsu jumeí jidáani lídan cátei buíti, lugúndun níjein sarágu wuríbani lídoun buri dan le. ¹⁷ Ligía mabídiouniga lubeí jáu, joúcha jumá gunfaráanda jumáni ca lan lugúndaanbei Wabúreme. ¹⁸ Mabácharuada jumá, lugúndun barü lumútiña líra gürígia lídoun féridi, lubáragiñe líra, buínjuma láu Sífiri Sándu. ¹⁹ Adímureja jumá júmagua luágu luweírigun Búngiu, erémuja jumá luágu, jerémuja táu sun janígi lun Wabúreme. ²⁰ Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucristu.

Igáburi le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crístu jun.

²² Lúnti derégeguñu tan würi túngua lun túmari quei lun Wabúreme Jesucristu, ²³ lugúndun wügüri tichügüdinabei lúmari ítara quei Crístu lan tichügüdinabei lilígilisin. Crístu gíñe Jasálbaragülebei gürígia ja gíribaña lilígilisin, ja méme gíñe gíribaña lúgubu Crístu. ²⁴ Ítara quei jagáambadi afíñetiña lun Crístu, ítara líña gíñe lúnti lan gagáambadi jamá würíña joun jámarigu lídan sun cátei.

²⁵ Jínsiñetá lúmari wügüri lun quei luweírin wínsiñe lun Crístu, wagía le lilígilisin, ába líchuguni libágari wawágu. ²⁶ Ladügünbalin líra lun larúmadagüdüníwa lídaangiñe le binádubei láu wabásterun lúma gíñe láu lerérun, ²⁷ lun

larúfuduníwa ligíbugiñe queísi ában würi to ayárafaduboun lun túmari—buídumeraütu, jarúmañu, aráanseñu, ni cáta mégeiti tuágu, ában würi derégüdaguatu, úaraguatu. ²⁸ Ítara líña lúnti lan tínsiñedun lúmari wügüri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladüga ábanjali lan láu jágubu. ²⁹ Úati gürígia meberesenti láu lúgubu guánarügü, joúgüdarügü lumúti, toúnigileí. Ítara líña gíñe ladüga Crístu tun lilígilisin, ³⁰ ladüga lúgubu tan, áni wagía líbiri úgubu ligía, ábanjadiwa lúma. ³¹ Lariñajare tídan Lerérun Búngiu. “Ligía lígirubei lubeí wügüri lúguchi túma lúguchu lun lamárieidun túma lúmari, ábame jayábin jagía biángubei lun camá jamá ábanrügü.” ³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúaradagun Crístu jáma lánigu ja gíribaña lilígilisin. ³³ Laríñaguña gíñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun gíñe inébe lan túmari würi tun.

6

¹ Isáanigu, le lúnbei jadügüni queísi afíñetiña lun gagáambadi jumá joun jagübürigu, lugúndun ligía richábei. ² Niján ában gumádi weíriti lídaangiñe ligúmadin Búngiu le anügübei buítí woun láu wagúncfuliruni. “Inébelá búguchi túma búguchu bun lun buídu lan dan bun, ³ gabágari amürüme migife ya uboúagu.”

⁴ Jugúa agübürigu, magáñidagüda jumáñña jisáanigu, agúriajarügü jumáñña buídu lun gagáambadi jamá, arúfudajeina joun lun jafíñerun luágu Wabúreme.

⁵ Músú, gagáambadi jumá joun jiyúbudirigu ya uboúagu láu inébesei, láu anúfudei, lueí ffi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida. ⁶ Seríwi jumáñña buídu, mámarügü dan le ariágu jáña lan jun lun jeréderun buídu jáma, seríwi jumáñña buídu súnwandan quei esériwidutiña lun Crístu, adügeina lugúndan Búngiu táu sun janígi. ⁷ Adüga jumeí juwádigimari láu ugúndani, camá jamuga lun Wabúreme jadügei máma joun gürígia, ⁸ ladüga subúdi jumáali luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buítí le ladügübei.

⁹ Jugúa iyúbudirigu, buídulá gíñe joúseruniña jumúsuniña, masíadira jumáñña. Jarítagua jumá luágu dándu lan jugúa quei jagía, lábugiñeñadün lagúmadijan Wabúreme le siélubei, áni ában lan láu lanügüniña Búngiu sun gürígia.

¹⁰ Guetóti nidújeñu, jére jumá lídaaňu ában lúma Wabúreme, láu lére le gabáfubei. ¹¹ Daüjumoun sun daüguau to líchuguboun Búngiu joun sun lánigu lun derégüdagu jumá lueí leyéedagunün Máfia. ¹² Lugúndun máma jáma gürígia ja láutiña ügürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan uboú le wageíndagua. ¹³ Ligía ragüjumoun lubeí sun daüguau to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu. ¹⁴ Derégüdagu jumá lubeíti, daügu táu láni Búngiu daüguau queísi ában lisúdaaran. Daügu jumá láu inárüni queísi láu ában béliti le gürágu umúti buídu luágu jiránaagu, areidúaňu láu ísuruni quei láu cátei le adáuragubei láu laníguagu súdaara. ¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queísi laráanserun súdaara dan le ladáürunun lisábadun. ¹⁶ Loúgiñe sun cátei, barüjumei jafíñen quei lárügündüni súdaara cátei láuti gürábu ligíbugiñe, lun jaráramunun sun gimára durúnguatu to lachüüjaboun Máfia juágun. ¹⁷ Barüjumei jeménigidun luágu jasálbarun quei ladáüruni súdaara lubúnidin lun latoúnigiruni lábulugu, barü jumeíme Lerérerun Búngiu quei efeín to líchuguboun Sífiri Sándu jun. ¹⁸ Adüga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúaňu jumá, máburujalá jarüna, ayúmuragua jumá jawágu sun ja lánigubaña Búngiu. ¹⁹ Ayúmuragua jumá gíñe nuágu lun líchugun Búngiu dimúrei nun dan le nadímurejan, lun giñe nadímurejan láu manúfudei lun nasúbudiragüdüni ugánu luagu gayára lan gíñe jasálbarun ja mámabaña juríu queísi ja juríubaña. ²⁰ Oúnaja láadina Búngiu lun napúrichijani ugánu le, le ueígiñebi nadaürüwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligíaba íchiga ugánu jun nuágu lúma luágu le nadügübei. ²² Ligía noúnajaanbalin jun lun laríñaguni jun ída wáñia lan, lun líchugun gurásu jun.

²³ Rulá Búngiu Úguchili lúma Wabúreme Jesucristu darángilaü lúma ínsiñeni láu affíñeni jun, wadújeñu lueígiñe Jesucristu, ²⁴ biní láñame Búngiu sun ja jínsiñejabúbaña lun Wabúreme Jesucristu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labürijan Páblo furísunrugugiñe joun tílana ligílisi to Filíposboun

¹ Anája áu Páblo lúma Timotéo, esériwidutiña wagía lun Jesucristu, wabürüjañoun gárada to jun, sun jugúya fádirigu jáma esériwidutiña ligílisirugu ja ubúrugubaña Filípos, jáma jíbiri lánigu Búngiu ja lídaañabaña gíñe ában lúma Crístu Jesúsu.
² Binilaün Wáguchi Búngiu lúma Wabúreme Jesucristu, ibíja jumá giñe darángilaü jámagiñe.

Layúmuragun Páblo jawágu afíñetiña

³ Ságü narítagun juágu neteíngiruni Nubúngiute. ⁴ Súnwandan nayúmuragun lun Búngiu juágu láu ugúndani, ⁵ Láu narítagun luágu luweírin jíderagunina abúruchaguagüdei ugánu le lánina asálbaruni lúmagiñe wéyu le jagáambubalin chülü lúmoun wéyu le ugúñebi. ⁶ Choúru numúti luágu Búngiu lan le agúmeserubei adügei lubuídun luwádigimari jídan, lasígira mémeba lan adügei daríme wéyu le liábingüle Jesucristu. ⁷ Richáti lun narítagun juágu ítara lugúndun weíriti jínsiñe nun, lugúndun gíñe gafánran jumá lídan abíniruni le nánibei dan le furísunruguñadina lan luágu nesériwidun lun Crístu, o dan lan le naráramun ligíbugiñe lúrudu lun nadímurejan lueígiñe loúbadina ugánu le lánina asálbaruni lun nachoúruruni joun luágu inárüni lan. ⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucristu.

⁹ Amúriajatina lídan nayúmuragun lun Búngiu juágu lúntima laweíridun jínsiñejabu láu sarágu subúdi lúma gunfaráandaü lídan sun cátei, ¹⁰ lun gayára lan janúadajani cátei le buídubei súnwandan. Ítara lúba jabágaridun ában ibágari jarúmati, madúnrun jumámuga dánme liábin Crístu. ¹¹ Amúriajatina lúma Búngiu lun buin jumá láu lubuídun igáburi, láu lubáfu Jesucristu le jídaanbei, lun líchugúniwa uweíriguni lun Búngiu luágu.

Crístu ibágari bei nun

¹² Nidújeñu, buséntina jasúbudiruni luágu cátei lán buri le suséreelibei nun, ñübinjali lídan linárün lun líderagun lídan lapúrichijoún ugánu le lánina asálbaruni. ¹³ Subúdi jamúti lubeíti sun tisúdaraana lúban urúei jáma sun ja jíbiri luágu nadaürüña lan lueígiñe nesériwidun lun Crístu. ¹⁴ Játi jíbiri idújeñu, láu jaríjin luágu nadaürüña lan lueígiñe napúrichijani ugánu luágu Crístu, ragüjaña anígi lun japúrichijani méme ugánu ligía manúfudeiga, láutima afíñeni luágu Crístu.

¹⁵ Inárüni luágu añájein lan adímurejatiña luágu Crístu ladüga jagímugan, busén jagía janügüniña gürígia jánigume. Ánjaña jíbiri, japúrichijan luágu Crístu láu lubuídun arítaguni. ¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürüña lan. ¹⁷ Ánjaña ja jíbiri, máma láu janárün japúrichija, lun jaríjíniwa weírigu jadügei, lúma lun jíchugun líbe samínaü nun guetó le nadaürüña lan. ¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba gíñe, ¹⁹ lugúndun subúdi numúti luágu buídubei lan nasálirun lídan sun cátei le, ladüga jayúmuragun lun Búngiu nuágu lúma ladüga líderagunina láni Jesucristu Espíritu. ²⁰ Cátei le nabúseerúbei lúma le nagúrabubei, lun madügün nan ni cáta lun jamúga nanügün busíganu luágu, gayáraarügü lámuga nadímurejan manúfudeiga, arijúa mémetima lámuga luweírigun Crístu nuágu guetó quei súnwandan, wínwaňu áu yebe, jiláňu áu yebe. ²¹ Lugúndun ánjana abágarda méme, lúnba Crístu nabágarda, ánjana oúwe, buítimaabei nun lugúndun lúmounbadina Crístu. ²² Ánjein gayára lubeí nasígirun ñadágimein luágu láni nabúreme Crístu fuléisei láu nasígirun abágarda, ibídiñeti nun ca lan buítimaabei, ánjein lun lubeí nasígirun wínwaňu ódi lun noúnwen. ²³ Jénreenguti nun lun nanúadajan lídan bián cátei le. lídan ában oúbaü, buséntina jamúga noúnwen lun nídin erédera lúma Crístu, lugúndun buítimaati jamúga líra nun, ²⁴ lídan le ában oúbaü, buítimaati jun lun nasígirun abágarda. ²⁵ Áni quei choúru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguóún, lun gíñe jagúndaaruntima lídan jaffíñen. ²⁶ Ítara lúba jiñúragüdüni líri Crístu Jesúsu luágu lagíribudagüdünila júmoun.

²⁷ Joúcha jumá lun úaragua lan ligáburi jabágardidun lúma larúfudajan Crístu. Ítara lúba, ánjana ñüdün aríjaün o ánjein díseñu níña lubeí jueí lun agáambarügü nan juágu, gayára lámuga nasúbudiruni luágu derégüdagü meme jíña lan áni lídaaňadün lan gíñe ában, áfaagua súngubei lídan ában lun labúruchagun afíñeni luágu Jesucristu queísi Wasálbaragüle, ²⁸ mígiraguagüdünga júngua lun janúfudedagun jaweí jáganiňu. Ladüga jáganiňu lan gürígia jagía, arúfuda lumúti líra furáangu luágu joúdiňa lan lídoun gürínguaü, arúfuda lumúti gíñe jasálbarun jugúya le afíñebi, áni lúmagiñe Búngiu liábin cátei le. ²⁹ Ladüga Crístu, gayáraati mámarügü lun jaffíñerun luágu, gayáraati gíñe jasúfurirun lueígiñe. ³⁰ Jugúya núma, lídaaňadiwa ában méme áfaaguni. Aríja jumáali meja ída líña lan náfaagun,

guetó agáambatün luágu ída líña méme lan náfaagun.

2

Lünabugun Crístu lúma luweírigun

¹ ¿Sandítünsan dügüdaguaü ladüga lídaañadün lan ában lúma Crístu? ¿Barütünsan gurásu luágu línsiñejabu jun? ¿Eíbugatünsan sun jugúya lúma Sífiri Sándu? ¿Subúdi jumútisan lugúdemejabu Crístu jun lúma lareídun? Afíñetina luágu ítara líña lan.
² Ligía lébubei namúriajan júma lun jaganoún lídan úarani lúma ínsiñejabuni júmawagua, lun ában lan jarítagun, ában lan gíñe jáfaagun luágu buri cátei le láni Crístu. Láu jabágardidun ítara, buin lúba nugúndan jáu. ³ Madüga jumá ni cáta juoúguarügü lun janügúniwa weíri, ni luágu pántaü, adüga jumeí cátei láu ünabuguni. Buídulá janügúniña ámu gürígia jueí guánarügü.
⁴ Mámarügülá cátei le buídubei jun jáluaja, áluaja jumeí gíñe le buídubei joun ámu.

⁵ Ítaramemelá ligáburi jasáminarun queí meja ligáburi lasáminarun Crístu Jesúsu. ⁶ Láu sún meja Búngiu Irájü lan ligía, málugunti lárügündüni lirícha quei Búngiu. ⁷ Lubáragiñe líra, ába lígiruni le lánibei, ába ladügün quei músu láu lagüriajoún quei wügüri. ⁸ Dánti le ítarajali quei wügüri, ába lünabudaguagüdüntima lúngua, áni ladüga lagáambadi, ába loúnwen luágu gurúwa láu sun nibúsigarídüna lan oúwени luágu gurúwa. ⁹ Ligía líchugunbalin Búngiu líñun-ägei uweíriguni lun lúma íri le weírigutimaabei lídaangiñe súngubei, ¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun, ¹¹ lun gíñe jasúbudiruni súngubei, aríñaga jagíame luágu Jesucristu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgounga uboúagu

¹² Ítara líña lubeíti nidújeňu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eíbuga meme jumá jubáruaguoún lídan lémeri Crístu láu ünabuguni lúma inébesei lun Búngiu daríme jebélurun siélun. ¹³ Búngiu íchugubalin lubuídun ayúmajani jun lun jeíbugun lúma, íderagualaün lun jadügünü quei labúseeruni.

¹⁴ Adüga jumeí sun cátei láu ugúndani, masígenejaanga, ¹⁵ madárirúniwa lámuga dúru juágu, ni mégeiti, lirajüñü jumámuga Búngiu jarúmatiña jagánagua gürígia wuríbatiña, magáambaditiña lun Búngiu. Jugúya, jarúgoungadagüdatün jagánagua gürígia jagía quei warúguma lídan ában fulásu búrigati, ¹⁶ íchigeina ugánu luáguti ibágari magúmuchaditi joun. Láu jigáburidun ítara, gúndaabadina juágu dánme le lachülürün

wéyu le liábingüle Jesucristu, láu nasúbudiruni luágu máma lan luágu ni cáta nuwádigimarida jagánagua. ¹⁷ Íbini lun lan níchuguni nibágari guánarügü lun loústarun jafíñen, le queísibei ában edéweejani buíti lun Búngiu, gúndaabada níra júma luágu lubuídun wedéweejan lun Búngiu. ¹⁸ Lun jamúga lasúseredun ítara lun noúnwen luágu nesériwidun lun Crístu, lúnti gíñe jagúndaarun níra núma.

Timotéo lúma Epafrodító

¹⁹ Ánjein busén lubei Wabúreme Jesucristu, noúnajabeí Timotéo aríjaün madíse, lun gayáraabeí lan nagúndaarun dánme le lagíribudun láu ugánu nun juágu. ²⁰ Úati ámu níma le asáminaruti quei áu, le áfaaguti lun buídu lan lídin jun, ²¹ súngubei jawoúgua rügüñein jarítagua, mebérerseguntiña láu le labúseerubei Crístu Jesúsu. ²² Ánjeinti Timotéo, subúdití ligáburi jun, ída líña lan lesériwidun níma lídan lapúrichijoún ugánu le lánina asálbaruni queísi ában isáani le íderaguti lúguchi. ²³ Agúrabatina lubeíti noúnajani aríjaün lárigüñeme nasúbudiruni ánjein náfuriduba lubeí furísunrugugiñe, ²⁴ láu sun afíñe nan luágu niján lan lugúndaanbei Búngiu, lun nídin aríjaün nungua madíse.

²⁵ Genége lumúti gíñe nun luágu lúnti lan noúnajani nibíri Epafrodító lárigoún júmoun. Quei jasúbudirun, ligía noúbabeí lídan luwádigimari Crístu lúma lídan áfaaguni, le joúnajabeí juguya guánarügü nun lun leténirun lun le nemégeirubei. ²⁶ Weíriti labúseerun laríjinün áni gíbeti larítagun ladüga jagáambun luágu lasándirun. ²⁷ Inárüni luágu sándi lán meja, yaráfa lun loúnwen, ába gudémejabu lan Búngiu lun lúma nun lun mabíjin nan íruni lánwoun le nüagubei, ába lareídagugüdüni. ²⁸ Ligíatima nabúseerúnbei noúnajani lun jagúndaarun láu jaríjini. ²⁹ Resíbi jumeí láu sun ugúndani queísi idújei lueígiñe Wabúreme Jesucristu, áni jínsiñe jagíame sun ja ítarabaña quei ligía jun súnwandan, ³⁰ quei chülü lubei yaráfa lun loúnwen ladüga lesériwidun lun Crístu. Derégeguati lúngua, mebérersegunga cába lan asúsereda lun, lun lesériwidun nun, cátei le jásiñerubei adüga lugúndun díseñu jíña lan nueí.

3

Üma le inárüti lun weréderun richágú ligíbugiñe Búngiu

¹ Lagúmujoún cátei, nidújeñu, gúnda jumá lídan Wabúreme. Mabúchatí nuágu abürüjei le abürüja náalibeí jun, lugúndun buíti jun. ² Cátei ligía, lun toúnigigua jumá júngua javeí ja ítarabaña oúserun quei oúnli, ja adügúbalin le wuríbabeí, ja íbagubalin úgubu. ³ Aríñagatiña yéetiña jagía luágu lúnti lan jerésibiruni wügüriña circuncisión lun lánigu jamá Búngiu,

iyéeni líra. Lirájüñü Búngiu le tímatimaati wagía le agúnfulirubei lúma láu lubáfu láni Espíritu le wádaanbei, wagía le gúndaabeí láu lánigu wamá Crístu Jesúsu áni míchu wamúti weménigi luágu cátei boúgudinti lueí lun wasálbarun. ⁴ Lun jamúga gayára lan wasálbarun luágu cátañañadiwa lan boúgudin lueí Jesucrístu, garíchatina jamúga lun neménigidun luágu buri cátei ligía, úati jamúga ni ában garíchatílueí lun leménigidun luágu buri cátei ligía. ⁵ Wídu wéyu lueígiñe nagüriaajoún, ligía nerésibiruni circuncisión lugúndun jarásan israelítagu áu, jádaangiñetina lufámlian Benjamín, hebréo áu lúmagiñe nagüriaajoún, hebreogu gíñe nagübürigu. Fariséo meja áu lídan ligáburi gunfaráanda náni jalúrudun juríu, ⁶ janárimeti meja neméendün darí neíbaajaniña afíñetiña luágu Jesucrístu. Luáguti lísurun ibágari según jalúrudun juríu, úati meja ni ában lun gayára lan laríñagun ni cáta nuágu. ⁷ Ánjeinti guetó, sún buri meja cátei le, lé meja weíritibei cátei nun, barü numuti quei ni cáta lun gayáraabeí lan nasígiruni Crístu. ⁸ Sügü láu líra, sun cátei le gayáraabeí jamúga níjein lan núma, rúnumuti quei ni cáta ligíbugiñe oúnwenbun agáñeiruni le luágubei nasúbudiruni Wabúreme Crístu Jesúsu. Féridi náali sún buri cátei le ladüga nasúbudiruni Crístu, áni barü numuti sun le quei ífei lun nagáñeiruni Crístu, ⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lilúrudun, lugúndun barülaadina Búngiu richágu ligíbugiñe láu nafíñerun luágu Jesúsu. Richáguáü ligía ában cátei le lídaangiñeti afíñeni, máma adügünü. ¹⁰ Le nabúseerúbei, lun nasúbudiruni Crístu buídu buídu, lun nasándiruni lubáfu meme Búngiu le ásaaragüdúbalin Jesúsu lídaangiñe oúweni nuoúgua, lúma lun nasúfurirun luágu queísi lasúfurirun nuágu, ¹¹ lun ítara nan quei ligía lídan loúnwen láu eménigini luágu násaaruba lan lídaangiñe oúweni quei ligía.

Áfaaguni lun lachüllürün lídoun lébeja

¹² Máma naríñaguña luágu chülüjadina lan lúmoun lébeja lídan sun cátei le, maríñaguntina gíñe luágu buídujali lan nigáburi lídan sun cátei, le nadügübei, nubáruaguóúñadina méme lun ítarabadina lan queísi meja labúseerun Crístu lun ítarabadina lan dán meja le lasálbarúbalina. ¹³ Nidújeñu, maríñaguntina luágu ibíja náali lan sun cátei le, le nadügübei, nabúlieiduni sun le eréderubei árigi lun náfaagun lun nárügündüni le nigíbugiñebi, ¹⁴ lun nachüllürün lúmoun lébeja eíbaaguni ligíbuagu uboú le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsu.

¹⁵ Sun wagía le weínamujalibeí lídan waffíñen, lúnti wasáminarun ítara. Ánjaün asáminara lídan ámu luwúyeri lídan som cátei, larúfudubei gíñe Búngiu cátei le jun. ¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalibeí.

¹⁷ Nidújeñu, amúria jatina júma lun ában lan jarítagun lun jafálaruni náni jémpulu, aríja jumáñña gíñe ja abágaridubaña segúñ jémpulu le wíchugubei jun. ¹⁸ Aríñaga náali jun sarágu weíyaasu áni naríñagayaali jun láu águiraü, luágu añájein lan sarágu ja aríñagatiña luágu afíñe jamá luágu Crístu, abágaridutiña queísi láganiñu Crístu le oúwebei lun larúmadagüdüníwa. ¹⁹ Lídaanme lagúmujoún dan, gürínguabei cátei joun—jasúfuriruba luágu jafígoñun sun dan. Lé buri cátei le wámaabeí joun, ligía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei uboúaguna jarítagua. ²⁰ Ánjein wagía, siéluna wagía, áni wagúrabuña liábin Wabúreme Jesucristu le Wasálbaragüle siélugiñe. ²¹ Lídaanme wéyu ligía, lasáansirubei wágubu le emégeirubei sarágu lun ítara lan quei lúgubu, le úabeí lemégeirun. Áni ladügübeí láu méme ubáfu le luágubei lun líchuguni sun cátei lábugiñe lagúmadijan.

4

Gúnda jumá súnwandan lídan Wabúreme

¹ Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeiruaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queísi idújeñu lueígiñe Crístu. ³ Ánjein bun, noúba buiti lídan wadágimanu, amúria jatina búma lun bideraguniña ítunu ja lun gamádagua jamá, lugúndun áfaaguatiña noúbagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Bürüwaali jíri sun jagía tídan lilíburuna ibágari magúmuchaditi.

⁴ Gúnda jumá súnwandan ladüga lídaañadün ában lúma Wabúreme. Aríñagaya numúti. ¡Gúnda jumá! ⁵ Subúdiwa jumá quei gürígia areídatiña ladüga madíseeli liábin Crístu.

⁶ Magíbedalá jarítagun luágu ni cáta, aríñagarügü jumeí sun cátei lun Búngiu súnwandan dan le jayúmuragun lun, amúria jumá lúma, mabúlieidagunga lun jíchugun eteíngiruni lun. ⁷ Ábameti líchuguni Búngiu lidárangilan jun, darángilaü le, weíritimaabeí lubáfu lun lagídarun jídíjeri sügü láu jubáfu lun jarítaguni cátei le lúnbei jadügünü, áni darángilaü ligía,

loúnigiruboun janígi lúma sun jisáminan lueí idíjeri lídan le jeménigidun luágu Búngiu lídaangiñe Crístu Jesúsu.

Samína jumá luágu le buídubei

8 Lagúmujoún cátei nidújeñu, samína jumá luágu sun le inárütibe, sun le gadünabei inébesei, sun le richábei, sun le jarúmabei, sun le gúndaawabei láu, sun le uágubei buídu lan ladímurejouá. Samína jumá luágu sun le buídubei lúma sun le gadünabei uweíriguni.

9 Falájumei sun le arúfuda náalibei jun lúma sun le resíbi jumáalibei númagiñe. Gúnduli jumá láu le naríñagubei jun, áyeija jumeí nigáburi. Ábame júma lan Búngiu láu lidárangilan le líchugubei.

Jedéweejan Filíposna seínsu lun Páblo

10 Oúnwenbun nugúndan lídan Wabúreme luágu jarítaguayaadün lan nuágu. Maríñaguntina luágu bulíei jumáadina lán yebe, madárirügü jiñáalin ligáburi ída lúba lan líderagunina. 11 Mabúseerúntina jamúga jarítagun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati, 12 subúdi numúti labágaridúniwa lídan gudémein, subúdineí gíñe gámawa lan gíbe. Furéndeijadina lawandúniwa furúmieguarügü igáburi, ilámaü yebe o quimúle, níjein lan darí lun lígiragún o úa lan ni cáta. 13 Úati cátei jénreenguti nun ladüga lídaañadina ában lúma Crístu le íchugubei ubáfu nun. 14 Láu sun líra, buíti jadüga láu jíderagunina lídan lénreengúnga nun.

15 Queísi gíñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügüñadün tílana ligílisi oúnaja seínsu nun quei ateíngiragülei luágu nesériwidun jun. 16 Sun meja anájagua lan ubúrugu Tesalónica, oúnajatün edéweejani nun, mámarügü ában weíyaasu, lun le nemégeirubei. 17 Máma jamúga nasáminarun lun gubeírügü nibíjin som cátei, le nabúseerúbei, lúntima lagánwoundun le lúnbei jibíjini lúmagiñe Búngiu. 18 Áu, resíbi náali súngubei lúma sügü láu lé yebe lúnbei nerésibiruni, láu le joúnajabei nun lúma Epafródito ígiraguaali núma. Le joúnajabei nun, ítara líña quei líjeme cupáli le águdajoúti lun Búngiu, ában edéweejani le lerésibirubei láu ugúndani. 19 Líchugubei lubeíti Nubúngiute sun le jemégeirubei jun queísi buri luweírigun lirísin, lídaangiñe Crístu Jesúsu. 20 ¡Uweíriguni lun Wáguchi Búngiu lun sun dan!

Lagúmujoún buri mábugaü

21 Rújumei numábugaü lídan líri Jesucristu joun sun ja lánigubaña Búngiu. Mábuga jáña wadújeñu lueígiñe Jesucristu ja

yábaña núma jun. ²²Sun ja yábaña Róma ja lánigu Búngiu, játima
tílana lúban urúei, mábuga jáñga gíñe jun.

²³Binílaün Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓSASNA

Labürijan Páblo joun tílana ligílisi to Colósasboun

¹ Anája áu Páblo, le ában láni Jesucristu apóstolu láu lugúndan Búngiu. ² Úara lúma Timotéo le wadúje lueígiñe Jesucristu nabürüjañoun gárada to jun, juguya le lánigu Búngiu ja gúncfulibaña lúma Crístu le uágubei jafíñera, ja ubúrugubaña Colósas. Binílaün Wáguchi Búngiu, ibíja jumá gíñe darángilaü lúmagiñe.

Layúmuragun Páblo jawágu afíñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucristu, dan le wayúmuragun lun juágu. ⁴ Agáambaadiwa luágu jafíñen luágu Crístu Jesúsu lúma luágu jínsiñejabu joun sun ja lánigubaña Búngiu, ⁵ ladúga eménigini le juágubei luágu le areidúañubei jubá siélu. Chülütün árugiudei eménigini le lárigiñe jagáambuni ugánu le inárütibe, ugánu le luáguti asálbaruni. ⁶ Ugánu méme le, lé meja apúrichijoúbei jun, labúruchaguña lídan sun uboú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejoún luágu línsiñejabu Búngiu, ába jasúbudiruni luágu inárüti lan jínsiñejabuni le. ⁷ Ligía cátei le larúfudajabei Epáfras jun, le ñadágimeinjalibei wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua. ⁸ Barüjali ugánu woun juágu lúma luágu jínsiñejabu le rúlaalíbei Búngiu jun.

⁹ Ligía lúmagiñe lubeí wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüduni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei láni Espíritu jun. ¹⁰ Ítara lúba gayára lan jagáburidun queísi lúnti lan jagáburidun lánigu Wabúreme, adügei le áubei lagúndaara súnwandan, aráfudeina ában alúbajani le lánina sun luwúyeri cátei buíti, lun gíñe jasúbudirunitima Búngiu. ¹¹ Amúriajatiwa lúma lun léredagüdünün láu luweírin lubáfu lun gayára lan jawánduni sun cátei láu sarágu gurásu lúma ugúndani, ¹² lun gíñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbei líchuguni joun lánigu lídaanme larúeijan le lánina larúgounga. ¹³ Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraü le jínsiñebi lun, ¹⁴ le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábei jaríjini gürígia, ába liábin uboúagun lídan ában luwúyeri le gayáraati jaríjini gürígia lídan Liraü le Jesucristu, le weírigutimaabei lídaangiñe sun cátei le níjeinbei. ¹⁶ Lídaangiñe Crístu ladügei Búngiu sun cátei le siélurugubei lúma le uboúagubei, dándu buri cátei le marijínbei quei le arijúabei. Lídaangiñe Crístu ladügei arúejani, gumádi, lúrudu buri lúma buri ubáfu le jáni ánjeligu, áni lun gíñe Crístu ladügúwa. ¹⁷ Lubáragiñebeí sun cátei, níjeinjali meja Crístu, áni láu lubáfu, níjein lubeí sun cátei lídan lubára. ¹⁸ Loúgiñe sun líra, Crístu jachügüdinabeí lánigu, ja gíribaña lúgubu, ja gíñe gíribaña lilígilisin. Ligía le íchugubei ibágari lun úgubu ligía, ligía furúmiñebi ásaara lídaangiñe oúweni lun moúnwendüguyaali lan, lun ligía lan láu furúmiñeti ubáraü lídan sun cátei. ¹⁹ Ítara líña labúseeruni Búngiu lun níjeinbei lan sun le ligíabei lídan Crístu. ²⁰ Lídaangiñe Crístu, ába laráandaragüdüni Búngiu sun uboú dayárugubei lúmagua, dándu buri cátei le uboúagubei quei lé buri siélubei, ladügüni aráandaruni ligía láu loúnwen Crístu luágu gurúwa.

²¹ Jugúa, teréncha buri meja jugúya lun Búngiu, lágani buri meja Búngiu jugúya tídan janígi ladüga buri cátei wuríbati le jadügübei. ²² Ánjeinti guetó, aráandaragüda láadün Búngiu lúmagua láu loúnwen Crístu lun larúfudunün jarúmañu, madúrunga, queísi lánigu ligíbugiñe. ²³ Ítara méme lúba gíñe áanjaün asígira derégüdagu lídan jaffíñen, ragüñu buídu luágu Crístu, mígirunga jumeí eméniginí le juágubei le íchugubalin ugánu lánina asálbaruni le jagáambubéi. Ligía ugánu le apúrichijoúbei lídan sun uboú, le gíñe napúrichijabi, áu Páblo.

Rúlumuti Búngiu Páblo lun lesériwidun joun títana buri ligílisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loústaragüdüniwa le lúngilibei lasúfuriruni Crístu jawágu lánigu, jawágu lilígilisin ja lúgubu. ²⁵ Ñübinjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu. ²⁶ Ugánu ligía, cátei lé meja arámudañu lubeí Búngiu lúmagiñe sarágu dan, áni guetó subúdigüda láali joun lánigu. ²⁷ Joun lánigu Búngiu labúseera lasúbudiragüdüni luweírin irísini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíriguni le lúnbei jibíjini siélu.

²⁸ Luágu Crístu wapúrichija, aríñagatiwa joun sun gürigia lun járugüduni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírin lidíjeri narítagun juágu, lúma jawágu afíñetiña ja Laodicéabaña, lúma jawágu sun jíbirigu afíñetiña ja maríjin jamágidinabaña. ² Weíriti nayúmajan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbirigu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafíñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü. ³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibei ában oúnwenbun irísini woun. ⁴ Naríñaguñein buri cátei le jun lun mayéedun lánün ni ában láu buri dimúrei buíduburiti. ⁵ Láu sun úa nan jígibugiñe lun gayára lan jamúga jaríjinina, anájein júma lídan espíritu, áni gúndaatina láu narijini luágu lídaañein lan dan sun cátei jurúma áni derégüdagu jíña lídan jafíñen luágu Crístu.

⁶ Ligía, ítara queísi jerésibiruni Wabúreme Jesucristu láu sun jafíñen luágu, lúnti ítara lan jabágaridun lídan ában lúma, ⁷ lun ragüñu lan jibágori luágu lídan le jídin jubáruaguoún lúma, derégüdagu lídan jaffíñen ítara queísi larúfudajoúniwa jun, láu eteíngiruni lun Búngiu súnwandan.

Iséri ibágari lídan Crístu

⁸ Toúnigi jumá, mígiraguagüda jumá júngua joun ja busénbaña jayéejan láu buri arúfudajani málati. Máma lúmagiñeti Crístu cátei le jarúfudajabe, lúmagiñeti jagáburi binádu mútu lúma buri ligáburi jarítagun gürigia lánina uboú le luágu cátei.

⁹ Níjein sun le Búngiubei lídan Crístu, ¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu lueí sun lúrudu lúma ubáfu le uboúagubei lúma le siélubei. ¹¹ Láu gíñe lídaañadün lan ában lúma Crístu, queísigubeirügü resíbi jumáali lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jibíjubei, máma le adügübei láu bíti luágu úgubu, jáni circuncisión, láu jasálbarun lídaangiñe figoú le áubei jiábin uboúagun. Niján luwúyeribei ladügüníwa Crístu lun lánigu wamá Búngiu. ¹² Láu jabásterún, arúfuda jumúti luágu bunáwa jumá lúma Crístu lun ibágari le binádubei, sarátün gíñe lúma lun ibágari le iséribei ladüga jafíñerun luágu lubáfu Búngiu

le ásaaragüdübalin lídaangiñe oúweni. ¹³ Luágu meja ában dan, jiláñu jiñá meja lun cátei lánina Búngiu ladüga jifígoun, ladüga gíñe jabágariduña lan queísi gürígia boúguditiña lueí lilúrudun Búngiu, agúnfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu. ¹⁴ Láu loúnwen Crístu, ferúduna láali Búngiu sun wafígoun, ába lagúmuchaguagüduni Búngiu lilúrudun Moisés lúma buri sun gumádi le lánina lúrudu ligía le áubei mabáfu wamá lun wagúnfulirun, queígubeirügü jamúga dágua láni Búngiu lúrudu ligía luágu lugúruwan Crístu. ¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbati, ába lúnabudagüduniña ligíbugiñe guríriguaü, ába lanügüniña quei adaürütiña lun.

Áluaja jumeí buri cátei le lánina siélu

¹⁶ Úa la ni ában añáwarijati jarítagun luágu buri arúfudajani lánina cátei le lúnbei jeígni o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri irúmu, lúma iséri játi, o luágu lan wéyu le eméraaguagülei. ¹⁷ Sún buri cátei le, lúntirügü lagúnfulirúniwa lúma darí meja liábin Crístu uboúagun, liyáwa rügüñein le lúnbei liábin, Crístu ligía linárünbei. ¹⁸ Mírigaguagüda jumá júngua joun ja afámurubaña quei ünabugutiña, ja ájuduragubaña joun ánjeligu, lun janügüni jagáñirun jueí. Weíriti jadímurejan luágu nege buri cátei le ayáwadaguti joun, ába buri janáangun joúngua luágu ligáburi jasáminan, le jáni gürígia. ¹⁹ Mámañianu lídan ában lúma Crístu, le ichügündinaü joun sun lánigu ja gíribaña lúgubu, le ágüdajabalín úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu. ²⁰ Jugúa, ígira jumáali binádu jígáburi, queísi lídaanjadün lan ában lúma Crístu, gidáadün lídaangiñe ligáburi jarítagun gürígia luágu buri cátei. ¿Cáti uágu jabágaridunbei camá jamuga lánigugidün uboú, ²¹ íchaagua júngua lun ligáburi uboú lun jagúnfulirun lúma Búngiu queí buri jamúga lúrudu le ariñagubei. “Magúurabeí le, meígabeí líra, márügündabeí cátei ligía”? ²² Sún buri gumádi le, luáguti buri cátei le gagúmuchaditi láu layúsurún, áni máma ámu cátei lueí gumádi buri lúma arúfudajani le jáni gürígia. ²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma ünabuni lun lagúnfulirúniwa láu, áni deréti líra woun. Láu sun líra, mabáfuti lúrudu buri ligía lun lídejan luágu luríban jayúmajan gürígia.

3

¹ Queísiti jabágariduña lan ában ibágari iséri ladüga lídaanjadün lan ában lúma Crístu, áluaja jumeí buri cátei le

lánina siélu, le ñí lubei Crístu ñun lueígiñe loúnwenren Búngiu.
² Samína jumá luágu buri cátei le lánina siélu, máma luágu buri le lánina uboú. ³ Jilátün lúma Crístu lun uboú le, guetó, niyein jibágari le tímatimaati lúma Crístu le yágütabei siélu lúma Búngiu. ⁴ Dánme lagíribudun Crístu, le úmabei lídan wamá ában, wachülaaguba gíñe lúma, ábame gafánran wamá lídan luweírigun.

Binádu ibágari lúma iséri ibágari

⁵ Ígira jumeí sun le jigáburibeí le láninabei uboú le. Úa la ni ában jídaangiñe agáamariduti mamárieidunga, madügün jugúyame cátei wíyeti, mafálara jumeí luríban ayúmajani, maweínamulá jágu luágu cátei le máma jáni, le méme ájuduraguni joun sándu. ⁶ Lueígiñe buri cátei le, láburujan lanárime ligáñi Búngiu jawágun ja madügünbaña gásu láu. ⁷ Jugúya, adüga buri jumúti meja cátei le lídan meja binádu jibágari, ⁸ ánjeinti guetó, ígira jumeí sún buri cátei le. igáñi, iyéreejabuni, wuríbani, anábajani, lúma buri dimúrei wíyeti. ⁹ Maríñaga jumá iyéeni júmagua quei ígira jumáali lan binádu jigáburi lúma lé buri meja jadügübei. ¹⁰ Isérijali jigáburi le isériderinábei quei méme ligáburi Búngiu guánarügü le adügúbalin, daríme jasúbudiruni Búngiu buídu buídu. ¹¹ Iséri ibágari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machülaaguntiña, idámuni, máma idámuni, Crístu, ligía sun cáteibei, áni niyein gíñe jádan sun lánigu láu láni Espíritu.

¹² Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queísi lánigu, láu gudémejabu, areíduni, manáanguni únguaü, gagáambadi, lúma gagúraasuni. ¹³ Gagúraasun jumá jubáruagua, ferúdunagua jugúyame júmawagua, ítara quei ferúduna lánün Crístu, ítaralá gíñe jadüga. ¹⁴ Loúgiñe sun cátei, jínsiñejabu jumá, ligía cátei le íchugubalin sun cátei lídan ában, áni joústagüdaleí lubuídu jigáburi. ¹⁵ Abúgoraleí lidárangilan Búngiu sun le jadügübei, ladüga ligía lagúarunbei Búngiu jun lun ábanrügü jumá úgubu, abágarideina láu darángilaü. Geteíngiradi jumá gíñe.

¹⁶ Buíngüdaloún láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jeremuja luágu luweírigun Búngiu láu eteíngiruni lun tídan janígi. ¹⁷ Furúmieguarügü cátei le jadüga o le lan jaríñagun, adüga jumeí lídan ában luwúyeri le íchuguti inébesei lun Wabúreme Jesucristu, eteíngireina Búngiu Úguchili lídaangiñe Jesucristu.

Igáburi le lúnbei wagáburiduni jáma ja wábiñebaña

¹⁸ Würíñā, gagáambadi jumá joun júmarigu, ligía cátei buíti le lúnbei jadügünü queísi afíñetiña luágu Wabúreme Crístu. ¹⁹ Wügüriñā, jínsiñe jamá júmarigu jun, magáñida jumá jáma. ²⁰ Isáanigu, agáamba jumáñña jagübürigu lídan sun cátei, ladüga ligía jínsiñebei lun Búngiu. ²¹ Agübürigu, másügüragualá jagúmadiruniña jisáanigu, ragü jáñein magúraasuni. ²² Esériwidutiña, gagáambadi jumá joun jiyúbudirigu lídan sun cátei, mámarügü dan le ariagu jáña lan jun lun jeréderun buídu jagibugiñe, adüga jumeí súnwandan táu sun janígi ladüga luweírin linében Búngiu jun. ²³ Furúmiegarügü cátei le jadüga, adüga jumeí láu ugúndani, camá jamuga jadügüñein lun Wabúreme Crístu máma joun gürigia. ²⁴ Subúdi jumáali luágu líchugubei lan Búngiu alágan jun queísi jafáyeiruaja, ladüga lun Wabúreme Crístu le Jabúreme le tímatimaati jesériwida. ²⁵ Ánjeinti le adügüti wuríbati, lerésibirubei lafáyeiruaja wuríbati le ladügübei, áni ában láu lanügüniña Búngiu sun gürigia.

4

¹ Iyúbudirigu, lúnti buídu lan jigáburi jáma jumúsuniña, oúsera jumáñña láu úarani lúma iríchaü, jarítagua jumá luágu níjein lan gíñe ában Jabúreme yágüta siélu.

² Ítara méme jumá ayúmuragua lun Búngiu sarágu, agáguduañu, eteíngireinei Búngiu. ³ Ayúmuragua jumá gíñe wawágu lun ladárarun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaürüwa. ⁴ Ayúmuragua jumá lun nasúbudiragüdüni furáangu quei lubúdubu.

⁵ Buídulá joúserun jáma ja mafíñebaña, yúsu jumeí jidáani lídan cátei le buídubei. ⁶ Lúnti gúndaawa lan láu jiyáanu súnwandan, lúnti gíñe semé lan, lúnti gíñe jasúbudiruni ída lúba lan joúnabuniña gürigia.

Lagúmujoún buri mábugaü

⁷ Laríñaguba wadúje Tíquico nuágu jun. Jínsiñeti wügüri ligía woun sarágu, ligía ában ídejati buíti le giñe esériwidubei lun Wabúreme Crístu núma. ⁸ Ligía noúnajaanbalin jun lun laríñagun jun ída wáña lan, lun giñe líchugun gurásu jun. ⁹ Níngira giñe Onésimo lúma, wadúje úaraguati le jínsiñebei woun, le jupaísanun. Jagíaba abájüdagua jun luágu sun le asúseredubei ya.

¹⁰ Mábuga líña Aristárco le noúba furísunrugu jun, mábuga líña giñe Márcos le lidúje Bernabé jun. Aríñawagúaali jun luágu Márcos, áanjein ñüdün aríjaün, resíbi jumeí buídu.

11 Mábuga líña gíñe Jesúsu, le gíñe gíribei Jústo, jun. Jagía rügüñanu jádaangiñe juríu afíñetiña ja ñadágimeinjáñabaña núma luágu larúeijan Búngiu, áni jayábin nun quei ában oúnwenbun dëgüdaguaü. ¹² Mábuga líña Epáfras le jupaísanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jafíñen áni derégeguñu júngua buídu lun jadügüni lugúndan Búngiu. ¹³ Geféentina luágu jarítagua lan Epáfras juágu, lúma gíñe jawágu ja ubúrugubaña Laodicéa lúma Hierápolis. ¹⁴ Mábuga líña Lúcas, le wasúrusian, le jínsiñebi woun, jun, lúma gíñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégüdagu jumá lídan jafíñen áni derégeguñu júngua buídu buídu lun jadügüni lugúndan Búngiu. afíñetiña ja oúndaragubaña túbiñe lun jájuduragun lun Búngiu. ¹⁶ Lásunme jalíijanun gárada to júmagua, joúnajounme lun jalíijanun tílana ligílisi Laodicéa, alíja jumoúnme gíñe gárada to achülürüboun jun Laodicéagiñe to nabürüjaboun. ¹⁷ Aríñaga jumá lun Arquípo lun ladügüni wadágimanu le rúlaalíbei Wabúreme Crístu lun, buídu.

¹⁸ Niján numábugaü le nabürüjabei jun láu nújabu guánarü—áu Páblo. Jarítagua jumá luágu nadaürüña lan. Binílaün Búngiu. Ítaralá.

FURÚMIÑETU **LIGÁRADAN PÁBLO JOUN TESALÓNICANA**

*Labürijan Páblo jáma libirigu joun tílana ligílisi to ubúruguboun
Tosalónica*

¹ Áu Páblo lúma Silváno láu Timotéo, wabürüjañoun gárada to jun, jugúya tílana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumeí abíniruni lúma darángilaü jámagiñe.

Jémpulu lánina afíñeni lé meja jarífudubei Tesalónica

² Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu.

³ Jarítaguatiwa ligíbugiñe Wáguchi luágu lubuídun jesériwidun lun Jesucrístu ladüga jafíñen luágu, lúma lubuídun joúseruniña wánigu ladüga buin tíña lan janígi láu ínsiñejabuni, lúma lubuídun jawánduni sun asúfuriruni ladüga jeménigidun luágu Wabúreme Jesucrístu le ídaangiñebei lan jachülüra siélun.

⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan. ⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñiadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúruni le tímatimaati luágu inárüni lan. Subúdi jumúti lubuídun woúserun jagánagua, lun ábanbadiwa lan jémpulu buíti jun.

⁶ Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barü lan jerésibiruni Crístu asúfuriruni jun.

⁷ Ítara líñia jiábin lun ábanbadün lan jémpulu joun sun afíñetiña ja loúbawagubaña Macedonia lúma Acáya. ⁸ Burúguali ugánu luágu Wabúreme Jesucrístu júmagiñe, mámarügü loúbawagu Macedonia lúma Acáya, burúguali lídan sun fulásu, áni subúdiwaali luágu afíñeni le jibíjubei luágu Búngiu lídan sun fulásu. Memégeirunwati wabájüdagun luágu jafíñen joun gürígia, ⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruníwa, lúma luágu jígoruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibei. ¹⁰ Abájüdaguatiña gíñe juágu luágu jagúrabajañein lan lagíribudun Liraü Búngiu siélugiñe—Jesúsu le lásaaragüdübei Búngiu lídaangiñe oúweni, le

asálbarubáliwa lueí lanárime afáyeiruajaü luágu figoú le lúnbei liábin.

2

Luwádigimari Páblo Tesalónica

¹ Jugúa guánarügü, nidújeñu, subúdi jumúti luágu máma lán meja luágu ni cáta woúdin aríjaün. ² Queísi jasúbudiruni, wuríbati meja joúseruníwa gürígia ja Filíposbaña, ába wayábin júmoun ladügarügü líchugun Búngiu anígi woun lun wadügünü. Ába wapúrichijani ugánu le lánina asálbaruni jun, mebérresenga wagía láu le lúnbei wasúfuriruni jámagiñe gürígia ja mísiñejabúbaña lun ugánu ligía. ³ Máma wapúrichijaña ladüga jamúga bulíeiguauü, queísi jaríñaguni wáganiñu, ni láu luríban arítaguni, ni lun wayéedagunün. ⁴ Lubáragiñe líra, aríja lumúti Búngiu luágu buídu wamá, ába líchuguníwa lun wapúrichijani ugánu le lánina asálbaruni, ítara líñati wadímurejan lun wagúncfulirun lúma eménigini le lánbei Búngiu wawágu. Máfaaguntiwa lun gúnda jamá gürígia wáma, wáfaagun lun gúnda lan Búngiu wáma, le asúbudirubarun wanígi. ⁵ Queísi jasúbudiruni, siñáti laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶ Málujantiwa lun wibíjin uweíriguni jámagiñe ámu gürígia, ni júmagiñe, láu sun gayára lan jamúga wasándiragüduni lijürü wagúmadijan queísi láni Crístu apóstolugu. ⁷ Lubáragiñe líra, oúserarügü wamútün láu ában uálini queísi ában úguchuru to agüriajabaliña tirájüñü, oúnigira táña. ⁸ Weíriti jínsiñe woun darí lun máma rügüñein lan jamúga láni Búngiu ugánu wabúseera wíchugun jun, buséntiwa jamúga wíchuguni wabágari guánarügü jun, le luweírin jínsiñe woun. ⁹ Nidújeñu, jarítagua jumúti ligáburi wawádigimari lúma ligáburi wáfaagun lun wawínwandun. Ñadágimeintiwa meja wéyuagu áriebu lun mámabadiwa lan ijürúgu lun ni ában jídaangiñe, sun awánja lan apúrichijkei láni Búngiu ugánu jun.

¹⁰ Geféentün, geféenti gíñe Búngiu luágu reídei wamá meja láu ában igáburi le jarúmati áni surú jídan, jugúa le afíñebei, míchugunga wagía lúgaaru lun ni ában lun líchugun wadúnrund. ¹¹ Subúdi jumúti gíñe ída líña lan wíchugun gurásu jun lúma derégüdaguaü lun jafíñen, cáda ában jídaangiñe, quei ladüga ában úguchili joun lirájüñü. ¹² Aríñagaadiwa jun lun buídu lan joúserun quei lúnti lan joúserun lánigu Búngiu le agúarubei jun lun gafánran jumá lídan larúeijan lúma luweírigun.

¹³ Ligía, súnwandan lubeí weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabej jun, resíbi jumúti queísi ugánu láni Búngiu, máma queísi ugánu

jáni wügüriña. Áni inárüni luágú láni lan Búngiu ugánu, le íchugubalin ubáfu jun lun jagáburidun buídu, jugúya le afíñebi. ¹⁴ Nidújeňu, dan le jeíbaajanbalün jupaísanun, suséreti jun quei méme le asúseredubei joun tilana buri ligilisi to Judéaboun, ja lánigu Búngiu lídaangiñe Jesucristu, eíbaaja jamútiña gíñe juríu ja japaísanun. ¹⁵ Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamutiwa gíñe bougudin lueí jageíra. Magúndaanti Búngiu jáu, jáganiňu gíñe sun gürígia. ¹⁶ Dan le wabúseerun wadímurejan joun ja mámabaña juríu lun gíñe jasálbarun, májatiňá yebe juríu lun wadügünü. Láu igáburi le, gánwounguagüda jamúti jafígoun. Ánjeinti guetó, liábindügürüga lanárime ligáñi Búngiu jawágun.

Busényati Páblo lídin aríjaña Tesalónicana

¹⁷ Nidújeňu, murúsun dan lárigiňe wígirunün (láu sun ajúnja méme lan tídan wanígi) oúnwenbun wabúseerun woúdinya aríjaün. ¹⁸ Joúchatiwá yebe woúdin, áu Páblo, sarágu weýyaasu yebe noúchun nídin, áni ságü noúchun nadügünü, migirun lumútina Máfia. ¹⁹ Ladüga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucristu le uágubei gayára lan weménigidun lun werésibiruni wafáyeiruaja dánme le lagíribudun, áni jugúyaba wagúndaрагüle dánme le jaráramun ligíbugiňe. ²⁰ Jugúya lébunabei wagúndan, áni rújadün lébuna wadímurejan buítí joun ámu juágú.

3

¹ Dán meja le siňá wamaali awánta masúbudirunga ída líña lan sun cátei júma, ába warítagun luágú buídutima lan lun weréderun Aténas, áu lúma Silváno, ² lúma lun lídin wadúje Timotéo, le ában esériwiduti lun Búngiu lídan lapúrichijoún ugánu luágú Crístu le Wasálbaragüle, aríjaün. Oúnaja wamúti júmoun lun líderagunün arárama buídu lídan jafíñen, ru ligía gurásu jun, ³ lun úa lan ni ában eíguaduti larüna lueígiňe buri lénreengúnga le lasúfurirubei luágú laffínerun luágú Crístu. Jugúya guánarügü subúdi jumúti luágú lúnti lan wagúrabajani asúfuriruni líbe le. ⁴ Dán meja le awánjagua lan júma, aríñagatiwa meja jun luágú lúnti lan wagúrabajani asúfuriruni luágú líri Jesucristu, áni ítara líña lasúseredun, quei jasúbudiruni. ⁵ Ligía lébubei dán meja le siňánaali lan awánta, ába noúnajan álügündaja ída jíña lan lídan jafíñen, ladüga nanúfude lueí jamuga línhajanün Máfia lun jígoruni jafíñen luágú Crístu, ába jamúga liábin wawádigimari jídan lun ni cátame.

⁶ Guetó, giríbujali Timotéo Tesalónicagiňe, áni barüti ugánu buítí woun luágú jafíñen lúma jínsiňejabu. Laríñajare woun luágú jarítagua jumá wawágu láu insiňeni súnwandan, luágú gíñe luweírin jabúseerun jaríjiníwa, ítara gíñe quei busén

wamá waríjinün. ⁷ ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó. ⁸ ítara líña quei iséri ibágari woun wasúbudiruni luágu derégüdagu jíña lan lúma Búngiu. ⁹ ¿Ída lubá funasan wíchugun eteíngiruni buídürügti lun Búngiu juágu, lúma luágu sarágu ugúndani le rújumaalíbei woun? ¹⁰ Wéyuagu, áriebu, wayúmuragun lun Búngiu lun gayáraaya lan waríjinün, gúnfuli lámuga le mégeibei lídan jafíñen.

¹¹ Buséntiwa lun líderaguníwa Wáguchi Búngiu lúma Wabúreme Jesucristu lun gayára lan woúdin aríjaün, ¹² lun gíñe laweíridagüduni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³ Derégeguagüda lámugaün Wabúreme Búngiu júngua lun le gumúti, madúrnunga jugúyame ligíbugiñe dánme liábin Wabúreme Jesúsu jáu sun lánigu.

4

Igáburi le áubei lagúndaara Búngiu

¹ Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucristu lun ítaramemetima lan jagáburidun queísi labúseeruni Búngiu.

² Jarítaguatün luágu arúfudajani le wíchugubei jun láu lugúmadin Wabúreme Jesúsu. ³ Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamárieidunga, ⁴ lun cáda lan ában láluajanun lúmari lau lubuídun arítaguni queísi labúseeruni Búngiu, lídan lubúdubu, ⁵ máma láu luríban ayúmajani quei jadügüni gürígia ja ibídiñejabubaña lun Búngiu. ⁶ Úa la ni ában adügüti wuríbani lun lidúje láu lagámaridunun lúmari, jéreti labeíchuni Búngiu le adügüti cátei le, queísi waríñaguni jun. ⁷ Máma lun wabágaridun lídan iwíyení lagúara Búngiu woun lun lánigu wamá, busénti lun wabágaridun derégeguañu woúngua lun. ⁸ Ítara líña lubeíti, le amájaruti lerésibiruni arúfudajani le, máma lun ni ában wügüri lamájara, lun Búngiu lamájara, Búngiu le íchugubalin Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabürüjani jun lugúndun arúfudajaali Búngiu guánarügü jun lun jínsiñegua jumá, ¹⁰ áni ítara líña jadügüni joun sun jidújeñu lueígiñe Jesucristu ja lídaanbaña sun ubúrugu Macedonia. Láu sun líra, nidújeñu, ayúmuraguatiwa jun lúntima lagánwoundun jínsiñejabu. ¹¹ Joúcha jumá jabágaridun darángilañu, berésegünu lídan le lúnbei jadügüni. Ñadágimein jumá lun janúriragun

júngua, quei waríñaguni jun, ¹² inébe jumámuga joun ja mafíñebaña luágu Jesucristu, úa lámuga gíñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, lueí jajírudagun quei ja meménigidunbaña luágu níjein lan ában ibágari lárigiñe oúweni. ¹⁴ Ítara quei afíñe wamá luágu jilá lan Jesúsu áni sará ligía lídaangiñe oúweni, ítara líña gíñe afíñe wamá luágu láasaaragüdübaña lan Búngiu ja oúwegubaña afíñeñu luágu Jesúsu.

¹⁵ Ligía waríñagunbei jun queísi larúfudajan Wabúreme Jesúsu, luágu wagía lánme le wínwangilibei dánme liábin, mámaba wagía ñüdün jabáragiñe ja jiláguañaña. ¹⁶ Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lifídun Búngiu. Gürígiameti ja oúwegubaña afíñeñu luágu Crístu, jagíaba ásaara furúmiñe. ¹⁷ Lárigiñeme, ábame wásaarun, wagía afíñetiña ja wínwangiñabaña, ábame wanügüniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábameti weréderun lúma Wabúreme Jesúsu lun sun dan. ¹⁸ Ligíati rújuma lubeí gurásu júngua láu dimúrei buri le.

5

¹ Ánjeinti luágu cába lan dan lasúsereda buri cátei le, nidújeñu, mabúseerúnwati nabürüjan jun. ² Subúdi jumáali buídu buídu luágu lachülüruba lan wéyu ligía dánme magúrabúniwa lan, queísi liábin ában íwerujati áriebu. ³ Dánme añája lan gürígia aríñaga. “Lídaañein dan sun cátei áni úati mégeiti”, ligíame liábin gürínguaü jawágun sódini quei liábin agáriduni tun wúri dageínatu, siñábeiti jeséfurun. ⁴ Ánjeinti jugúya, nidújeñu ja afíñebaña luágu Jesucristu, máma lídaañadün lubúriga luágu cátei lánina Búngiu lun lárügündün luwéyuri liábin Crístu quei lárügündün ában jíweruti. ⁵ Lídaañadün larúgounga sun jugúya, máma wagía lánina áriebu lúma lubúriga. ⁶ Ligía moún lubei lun maráanserun wamá quei ja mafíñebaña luágu Jesucristu, lúnti deréñuma wamá lubá lagíribudun, lídan wagíame lubuídun wachügü. ⁷ Ja arúmugubaña, áriebu jarúmuga, ja abácharuadubaña, áriebu jabácharuada. ⁸ Ánjein wagía le lánina wéyuagu, lúnti lídan wamá lubuídun wachügü. Lúnti wadáuragun woúngua láu afíñeni lúma láu ínsiñeni queísi ladáuragun súdaara láu laníguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súdaara lábulugu lun loúnigiruni. ⁹ Máma

lun labéíchuniwa Búngiu lanúadajawa, lun wibíjini asálbaruni lídaangíñe Wabúreme Jesucristu lanúadajawa.¹⁰ Jiláti Jesucristu wawágu lun wabágaridun úara lúma, wínwañu wagía yebe, jiláñu yebe wéyume le liábin.¹¹ Ligía rúmeme jumá lubeí gurásu lúma érei júniwagua ítara quei jadügünü guetó.

Laríñaguni Páblo joun afiñetiña ída lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu.¹³ Lúnti jínsiñe jamá jun sarágu luágu wadágimanu le jadügübei. Abágarida jumá lídan dan jáma jíbirigu.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimari, lun jíchugun gurásu joun ja magúraasunbaña, lun jídérاغuniña ja débilibaña lídan jaffíñen, lun gíñe gagúraasun jumá jabá súngubei.

¹⁵ Úa la ni ában afáyeiruti wuríbani luágu wuríbani. Joúcharügü jumá jadügün buíti jagánagua, lúma joun sun gürigia.

¹⁶ Gúnda jumá súnwandan. ¹⁷ Ayúmuragua júma lun Búngiu sun dan. ¹⁸ Teínqui jumeí luágu sun le asúsereduti –buíti, wuríbati, niján le labúseerúbei Búngiu júmagíñe, queísi afiñetiña luágu Jesucristu.

¹⁹ Merédera jumeí luwádigimari Sífiri Sándu tídan janígi. ²⁰ Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucristu. ²¹ Joúcha jumeí sun arúfudajani aríja jumeíme áanjein lúmagíñeti lubeí Búngiu, ábame jeréderun lau le inárünibe. ²² Dise jumá lueí sun luwúyeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída louíme juwáni, janígi luma júgubu dayáru, jarúmañu, lubá liábin Wabúreme Jesucristu. ²⁴ Úaraguati Búngiu le agúarubei jun lun lánigu jumá, lagúmuchubei ladügünü sun cátei buíti le jídan.

Lagúmujoún buri mábugaü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucristu.

²⁸ Binílaün Wabúreme Jesucristu. Ítaralá.

TIBÍAMAN LIGÁRADAN PÁBLO JOUN TESALÓNICANA

*Labürijan Páblo jáma líbirigu joun tílana ligílisi to
Tesalónicaboun*

¹ Áu Páblo lúma Silváno láu Timotéo, wabürüjañoun gárada to jun, jugúya tílana ligílisi to ubúruguboun Tesalónica ja lánigubaña Wáguchi Búngiu lúma Wabúreme Jesucristu. ² Resíbi jumeí abíniruni lúma darángilaü jámagiñe.

Lagúseragüdubaña Búngiu gafígountiña dánme liábin Crístu

³ Nidújeñu, teínqui wamúti Búngiu súnwandan juágu, queísi lúnti lan wadügünü, lugúndun laweíriduña jaffíñen sarágu, áni ínsiñeni le jídaanbei jubáruagua aweírideinatima líña súnwandan. ⁴ Adímurejatiwa buíti juágu tídan buri lilígilisin Búngiu, luágu gurásu lúma afíñeni le jarúfudubei lídan sun eíbaajoúni lúma idíjeri buri le jasúfurirubei lueígiñe Crístu. ⁵ Arúfuda lumúti lubuídun jawándun luágu úaragua lan Búngiu lídan ligáburi lagúseragüdün, láu lanügünün quei garíchatiña lun jebélurun lídoun larúeijan, le uágubei jasúfurira.

⁶ Ladüga gíñe úaragua lan Búngiu, lachülürüba wéyu lun lasúfuriragüduniña ja asúfuriragüdübalün, ⁷ lúma gíñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachülaagun Wabúreme Jesúsu siélugiñe lídan wátu geméti jáu láni ánjeligu ja gabáfubaña. ⁸ Liábinba lun labéichuniña ja masúbidirunbalin Búngiu, madügün jagía gásu láu ugánu luáguti asálbaruni le wabíjibeí lídaangiñe Wabúreme Jesúsu. ⁹ Agünrinchawagúni le magúmuchaditi, ligíaba jabeichúagüle, jabugúba díse lueí laríjin Búngiu lúma luweírigun lúma lubáfu. ¹⁰ Dánme le liábin Crístu, laríjúba luweírigun jádan lánigu, ábame laweíridun janígi sun ja afíñeñabaña luágu, áni jugúya, jádaanbadün gürígia jagía queísi afíñeedün lan luágu le waríñagubei jun luágu.

¹¹ Ligía lébubei súnwandan lan wayúmuragun juágu, amúria ja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuraguatiwa gíñe lun Búngiu lun lagúñfulirun sun jayúmajan lun buídu lan jigáburi, láu lubáfu, lúma buri sun wadágimanu le jadügübei ladüga jaffíñen. ¹² Láu igáburi le, líchugúba uweíriguni lun líri Wabúreme Jesúsu lídan jibágari, ábame líchugún uweíriguni jun luágu lareídun Wabúngiute lúma Wabúreme Jesucristu.

2

*Le lúnbei lasúseredun lubáragiñe lagíribudun Jesucristu
uboúagun*

¹ Guetóti, nidújeñu, libügürü liábin Wabúreme Jesucristu, dánme liábin oúndaraguawa lúma, ² amúria jatiwa júma lun masáansirun jumáni ligáburi jarítagun ítara uménrengun, masústarun jugúyame luágú ni ában ugánu, o dimúrei buri le uáguti laríñawagua luágú lúmagiñeti lan Búngiu, ni tuágú gárada to uáguboun jaríñaga luágú wámagiñetu lan, to aríñaguboun luágú chüliújali lan luwéyuri Wabúreme lun lagíribudun uboúagun. ³ Mígiraguagüda jumá júngua lun jyeedúniwa ítara. Lugúndun lubáragiñeme lachülürün wéyu ligía, níjeinbei awúribujani lúma Búngiu, lachülaaguba gíñe láganí Cristu, le lunbei lagünrinchawagún. ⁴ Ligía láganibei Búngiu, liñúraguba lúngua luágú sun cátei le luáguti Búngiu, lachülürüba gíñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágú Búngiu lan.

⁵ ¿Marítagan jumútisan luágú aríñagañaja náni méja buri cátei le jun dán meja le anájeingua lan júma? ⁶ Subúdi jumúti gíñe ída líña lán meja nadimurejan luágú ában ubáfu le lunbei leréderuni liábin láganí Cristu lubáragiñe lidáani. ⁷ Luwádigimariña wuríbani guetó, arámudagu, áni lúnti lagídarúniwa le eréderubalin láganí Cristu ligía lubáragiñe gayára lan láfuridun lídoun larúgounga. ⁸ Ligíaba larijoúniwa, áni lagünrinchagubei Wabúreme Jesúsu áganí ligía láu ában dimúrei, lúma láu luweírigun le áubei liábin. ⁹ Ladügaba Máfia liábin láganí Cristu ligía, lachülürüba láu sarágu ubáfu, ladüguba buri miláguru yéeti lun layéedaguniña gürígia. ¹⁰ Layúsuruba sun luwúyeri wuríbani lun layéejaniña ja lídaanbaña üma lun gürínguaü, quei mája jabeí lun jerésibiruni inárüni luáguti Cristu lun jasálbarun. ¹¹ Ligía líchugunbáliña Búngiu lídoun bulíeiguaü lun jyeedúniwa lúma lun jaffínerun luágú iyéeni, ¹² lun jasiadirúniwa lun máfiougati sun ja májabaña jafíñerun luágú Cristu, jínsiñerügü ligía wuríbani joun.

Anúadajoútiña lun jasálbarun

¹³ Ánjein jugúya, wadújeñu jínsiñetiña lun Cristu, súnwandan teínqui wamúti Búngiu juágú lugúndun anúadaja lumütün lúmagiñe lagúmeserun dan lun jasálbaruba lan láu Sífiri Sándu le arúmadagüdüberun janígi, lúma inárüni luágú wasálbarun lídaangiñe Jesucristu, le uágubei jaffíñera. ¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigun Wabúreme Jesucristu.

¹⁵ Ítara líña lubeíti nidújeñu, derégüdagu meme jumá, mabúlieidagun jugúyame lueí buri arúfudajani le rúwamaalíbei

jun láu dimúrei lúma táu gárada. ¹⁶ Wabúreme guánarügü Jesucristu lúma Wáguchi Búngiu, le arúfuda láalibei línsiñejabu woun láu lareídun, ¹⁷ ru ligía ámalijouni le magúmuchaditi woun lúma ában eménigini buíti, rúla dëgündaguáü tun janígi, derégüdagaguagüda laünme lun jaríñaguni lúma lun jadügünü sun le buídubei.

3

Amúriajati Páblo jáma lun jayúmuragun lun Búngiu luágu

¹ Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resíbiwa ligíame láu ugúndani queísi lasúseredun jagánagua. ² Ayúmuragua jumá gíñe lun gayára lan weséfurun javeí wügüriña wuríbatiña, lugúndun máma sun gürigia uboúagu afiñetiña luágu Crístu. ³ Áanjeinti Búngiu, gayáraati wafíñerun luágu, luágu lagúñfuliruba lan láu lerérun, lárügündübadün derégüdagü, goúnigilaünme tueí lisádaran Máfia. ⁴ Jeménigitiwa luágu Wabúreme Búngiu luágu adüga jumáni le waríñagubei jun áni luágu jadüga mémebei lan. ⁵ Íderagualaün Búngiu lun jasándiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucristu lun jadísedun lueí furúmieguarügü jídaangiñe le májati luwádigimaridun, le mabágaridunti úaragua lúma arúfudajani le jibíjubei wámagiñe. ⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua. ⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebu, lun mámabadiwa lan ában ijürügu lun ni ában jídaangiñe. ⁹ Láu sun garícha wamá yebe lun wamúria jan júma lun jíderaguniwa, ñadágimeinrugiütiwa lun wíchugun ában jémpulu jun lun jafálaruni. ¹⁰ Dán meja le júma wamá, rúwamutí meja gumádi le jun. “Le májabei luwádigimaridun, meígalá.” ¹¹ Agáambatiwa luágu añájein lan jídaangiñe májatiña jawádigimaridun, jerédera madügunga ni cáta, eténira lun le moún lubei jeténirun lun. ¹² Waríñaguña joún buri gürigia jagía láu lugúmadin Wabúreme Jesucristu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adüga buíti. ¹⁴ Áanjein ñi ában le madügünti gásu láu le waríñagubei tídan gárada to, aríja jumeí cátei lan, memétera jumá lúmoun, barü lámuga busíganu. ¹⁵ Manüga jumeí quei ágani, erérarügü jumá lun queísi idújei.

Lagúmujoún abíniruni

16 Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

17 Áu Páblo, nabürüjañein mábugaü le jun láu guánaru nújabu lúma nilétüran. Ítara lúba jasúbudiruni luágu áu lan oúnajabarun gárada to. 18 Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labüriijan Páblo lun Timotéo

¹ Áu Páblo, láni Jesucristu apóstolu áu, noúnajoún láu lugúmadin Búngiu le Wasálbaragüle lúma Wabúremes Jesucristu, le uágubei weménigida lun webélurun siélun. ² Nabürüjañoun gárada to bun, Timotéo, niraü le tímatimaati lídan wafíñen luágu Jesucristu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucristu le Wabúreme.

Ewéridijani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúrugu Éfeso lun baríñagun joun ítaga gürígia lun marúfudajan jamá cátei le maríchabei,⁴ meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barürüguti sigénei le málati, ani míderagun lumútiña gürígia lun jesériwiduni Búngiu láu jafíñerun luágu.

⁵ Le lúnbei barúfudajani joun afíñetiña jagía, lun jínsiñegua jamá jámagua lugúndun jarúmaaru tan janígi, míchujali jarítagun dúru jawágu, áni buídijali jafíñerun. ⁶ Añájein, adíreirutiña lueí buri cátei le, ába jíchaagun joúngua lídoun buri sigénei málati. ⁷ Buséntiña buri lun arúfudajatiña jamá lídan lúrudu le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabeí luágu lúrudu ligía láu sarágu afíñeni.

⁸ Subúdi wamúti luágu buídu lan lúrudu, yúsuwarügaali ligía quei lubúdubu. ⁹ Lúnti lasúbudirúniwa luágu máma lan joun ja adügübalin le buídubei ladügüwa lúrudu, lúrudu joúnti ja wuríbabáña, ja magáambadibaña, ja meberesenbaña láu Búngiu, ja gafígonbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchi jíllágubei, joun sun ja gáfarajadibaña, ¹⁰ joun ja agámaridubaña mamárieidunga o ja agáamaridubaña wügüriña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Joúnti gíñe sun ja adügübaña ámu cátei múaрадunti láu arúfudajani jarúmati. ¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibei gürígia, apúrichija.

Eteíngiruni luágu lugúdemejabu Búngiu

12 Teínqui numúti Wabúreme Jesucristu, le íchugubei ubáfu nun lun wadágimanu le, luágu lanügünina queísi ában wügüri derégüdagutu, lúma luágu líchugunina lun nesériwidun lun.
 13 Adüga láali sun cátei lé buri nun láu sún meja anábagua náni, eíbaaja numútiña meja ja afálarubalin, adüga numúti meja sun le nuáraati lun nagúmuchaguagüduni jafíñen. Ába gudéme nan lun Búngiu lugúndun mámagidina meja afíñeti luágu Jesucristu áni ibídiñetí meja nun ca lan nadügübei.
 14 Ligía luweírinbei nasándiruni labínirunina Búngiu, úara lúma afíñeni lúma ínsiñejabuni le gíñe wawágubei luágu lídaañadiwa lan ában lúma Jesucristu.

15 Inárüni cátei le, le tímatimaati, áni lúnti jafíñerun súngubei luágu inárüni lan. luágu “liábin lan Jesucristu uboúagun lun lasálbaruniña gafíountiña”, áu furúmiñeti jádaangiñe.
 16 Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebi jádan gafíountiña. Ítara líña niábin lun ábanbadina lan jémpulu jour ja lúンbaña jafíñerun luágu, lun jabíjini ibágari magúmuchaditi.
 17 ¡Ligía rúwama lubeí uweíriguni lúma inébesei lun Búngiu le Warueitebei lun sun dan, súnwandan, le moúwedadibei, siñá ligía larijíniwa, le Búngiu le ábanrügüti, le sábiu! Ítaralá.

18 Timotéo, niraü, rúnumuti gumádi le bun lun bageíndaguni luwúribun Búngiu buídu, queí meja laríñaguni Búngiu jayúmulugugiñe wadújeñu lueígiñe Jesucristu bun, ragüñubei inárüni lánina asálbaruni, adügeina le basúbudirubei luágu richá lan.
 19 Añájein gürígia, féridi jamúti jafíñen ladüga madügün jamá gásu láu le jasúbudirubei luágu richá lan.
 20 Ítara líña lasúseredun lun Himenéo lúma Alejándro ja nedéregerubaña lun Máfia lun jafúnrendeirun lun manábagun jamáni Búngiu.

2

Arúfudajani libügürü ayúmuraguni lun Búngiu

¹ Furúmiñeti cátei, amúriajatina lun ladügüniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gíñe inébewati lídan sun luwúyeri. ³ Buítí cátei le, gúndaati gíñe Búngiu le Wasálbaragüle láu, ⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. ⁵ Ában rügüñein Búngiu, ában rügüñein gíñe gayára ladímurejan waweígiñe ligíbugiñe Búngiu, wügüri le Jesucristubei. ⁶ Derégeguati Jesucristu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdün cátei le lídan lidáani. ⁷ Lun cátei le,

loúnajana Búngiu lun narúfudajan joun ja mámabaña juríu libügürü inárüni le, lun gayára lan jafíñerun luágu Crístu queísi Jasálbaragüle. Áu, queísi ában afíñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügüriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu. ⁹ Manárimelá tuwéndegun jadáüragun würíña, lun máma lan láu amúriguni janárimeguti jaráanseragua joúngua, ni láu gólu, pérlas, o daüguaü séruburitu, ¹⁰ lun láu lan lubuídun igáburi jadáuragua joúngua quei lúnti lan jadügün würíña ja derégeguáñabaña joúngua lun Búngiu. ¹¹ Lúnti maní jamá würíña dan le larúfudajoúniwa joun, lúnti jerésibiruni arúfudajani ligía láu ában ünabuni. ¹² Májatina lun tarúfudajan würi lídan jadámurin afíñetiña, ni lun tagúmadiruni würi wügüri, lúnti teréderun maníñu. ¹³ Lugúndun Adán ladügübei Búngiu furúmiñe, lárigiñe, ladügoun Éva. ¹⁴ Máma gíñe Adán leyéedubei Máfia, würi ayeedúaboun, áni láu tayeedúniwa, ába táburujan lídoun figoú. ¹⁵ Láu sun líra, jasálbaruba würíña láu jagúncularun láu le lúnbei jagúncularun queísi úguchuru, ánjein ítara méme jafíñerun luágu Crístu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan joúserun fádirigu

¹ Inárüni cátei le. Ánjein abúseera ában gürígia lun fádiribei lan, ában wadágimanu buíti labúseerúbei ladügün. ² Lun fádiribei lan ában gürígia, lúnti labágaridun ában ibágari le míchuti lúgaaru lun ladeinjoúniwa lun. Lúnti túmari lan ábanrugü würi, lúnti gíñe lanügün ában ibágari sériuti, buíti lichügü, inébewa. Lúnti aráanseñu lan sun dan lun lerésibirun bisida lúbiñe, lúnti buídu lan larúfudajan, ³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. ⁴ Lúnti gayára lániña títana lúban agúmadira buídu, lun gíñe ladügün lun gagáambadi jamá lirajüñü, inébejabu. ⁵ Lugúndun ánjein magúmadirun lubáliña wügüri títana lúban, ¿ída lubági gayára lan laríjin jáu títana lilíglisin Búngiu? ⁶ Moún lumuti lubeíti fádiri lan ában iséri afíñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. ⁷ Lúnti buídu lan ligáburi, lúnti gíñe inébe lan joun ja mafíñebaña lueí ladímurejoún wuríba luágu, ábame láburujan tídoun lisádaran Máfia lun lagünrinchawagúniwa lubuídun líri.

Ligáburi ída lúba lan joúserun ja esériwidubaña ligílisirugu

⁸ Ja gíñe esériwidubaña ligílisirugu lúnti wügüriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹ Lúnti járúgüdüni inárüni lánina afíñeni le arúfuda láalibei Búngiu woun, buídu, lun gíñe jarúma tan janígi. ¹⁰ Lúnti jouchún, lárigiñeme, áanjein úa lubeí mégeiti luágu lubuídum jagáburi, ligíaba gayára lan jesériwidun ligílisirugu. ¹¹ Würíña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílisirugu, lúnti túmari lan ábanrügü würi, lúnti gíñe lagúmadiruniña lirajüñü buídu jáu sun tílana lúban. ¹³ Lugúndun esériwidutiña ligílisirugu ja adügübalin jawádigimari buídu, buídubei ladímurejoúniwa jawágu, áni ragútimaatiña anígi lun jadímurejan luágu jaffíñen luágu Jesucristu.

¹⁴ Agúrabatina nídin aríjabu madíse, ¹⁵ nabürüjaní buri cátei le bun lun ánjana lan adárasaragua, lun subúdi báni ída líña lan lun loúserun gürígia jádan lufámilian Búngiu, to lilígilisinboun Búngiu le wínwanbei lun sun dan. Lilígilisin Búngiu ágüdajabalin linárün, toúnigiteí inárüni ligía buídu. ¹⁶ Siñáti lasígenerúniwa luágu weírigu lan Wasálbaragüle Jesucristu, le subúdigüda láalibei woun.

Arúfudaguati Búngiu lúngua queísi gürígia lídan Jesucristu, arúfudaleí Sífiri Sándu luágu úaragua lan Jesucristu.

Arija jameí ánjeligu.

Apúrichijoúati luágu joun lílana sun fulásu,
afíñewa luágu lídan sun fulásu,
resíbiwa ligía siélu.

4

Ja lúnbaña jígiruni jafíñen

¹ Furáanguti laríñaguni Sífiri Sándu luágu lídoun lánme lagúmujoún dan, añajeinbaña lan gürígia ígiruti jafíñen luágu Crístu, jafálarame espíritugu ja ayéejatiña lúma arúfudajani le jámagiñeti mafianu. ² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu süti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eígnini moún lumuti leigín, láu sun ladüga lan Búngiu eígnini buri ligía lun jeígnini ja afíñebaña jáma ja subúdibalin inárüni, láu ateíngiruni lun Búngiu luágu. ⁴ Sun cátei le ladügübeí Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adüga láalibei, teíñqui wameíme luágu. ⁵ Lugúndun láu wamúriaian lúma Búngiu lun

labíniruni sun weígin, ñübinti lun labuídurun láu lerérun, lúma láu wayúmuragun lun luágú.

Ában esériwiduti buíti lun Jesucristu

⁶ Ánjein barúfudaja cátei le joun wadújeñu lueígiñe Jesucristu, ábanbadibu esériwiduti buíti lun Jesucristu, áni tágüdajoúba buwáni láu buri dimúrei le lánina wafíñen, lúma arúfudajani buíti le falábaalíbei. ⁷ Meférdirabeí bidáani asígeneja luágú buri libídiegun úraga le ni cátati ligíbugiñe Búngiu, lubáragiñe líra, áfaaguabá lun bagúncfulirun lúma Búngiu. ⁸ Láu sun ju lan lánjingichún úgubu, jútimaati báningichagun búngua lídan bagúncfulirun lúma Búngiu, lugúndun barüti cátei buíti woun lídan ibágari le lúma lídan ibágari le lúnbei wabíjini. ⁹ Inárüni cátei le, áni lúnti jafíñerun súngubei luágú. ¹⁰ Ligía lébubei wawádigimaridun, súfuri wagía anabúni, lugúndun rúwamaali lan weménigi luágú Búngiu le wínwanbei, le aráansejaalíbei asálbaruni joun sun gürígia, áni ja afíñebaña luágú, jerésibirubei asálbaruni ligía.

¹¹ Ligía buri cátei lúnbei barúfudajani lun jagúncfulirun gürígia láu. ¹² Sériulá bigáburi lun manügüniwa ban quei ni cátia lueígiñe ñüraügidibu lan, lubáragiñe líra, lúnti ában ban jémpulu buíti joun ja afíñebaña, lídan ligáburi badímurejan lúma boúserun, lídan ínsiñejabuni, lídan bafíñen luágú Búngiu, lúma lídan larúma bibágari. ¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachülürün. ¹⁴ Yúsubeí ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Derégeguabá búngua lún buri cátei le, lun gayára lan larijíniwa bawáanserun lídan cátei láni Búngiu. ¹⁶ Goúnigiguabá búngua, lúma láu le barúfudajabeí, ítaramemebá derégüdagulídan sun cátei. Ánjein badüga ítara, basálbaruba, sálba jagíame gíñe ja agáambubalibú.

5

Ída lúba lan ligáburi loúserun Timotéo jáma afíñetiña

¹ Madeínjabá lun ában weíriei mútu, lubáragiñe líra, adímurejabá lun camá jamuga lun búguchi, oúsera báñame wügüriña ñübürigiña queísi bamúlenu. ² Oúsera báña weíyaaña würíña quei boúserunun búguchi, oúsera báñame würíña irájüñü quei bítunu, láu lubuídun arítaguni.

³ Íderagua báña würíña ja jiláañabaña úmari, ja arijúabeí luágú mégei jamá iderúni. ⁴ Ánjein garájüñü tubeí ában würi

to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagübürigu, lugúndun buíti cátei le, gúndaati gíñe Búngiu láu. ⁵ Würi to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti gíñe tayúmuragun lun Búngiu áriebu, wéyuagu. ⁶ Ánjounti to edéregeraguboun túngua lun ugúndani lánina uboú le, jiláñu tíña lun cátei lánina Búngiu láu sun wínwangiru lan. ⁷ Aríñagabeí buri gíñe cátei le joun, úa lámuga ni cáta lun ladeinjoún joun luágu. ⁸ Le marítagunti jawágu lánigu, játima lidújeñu, magúnfulinjali lúma laffñen, wuríbatimáatiti sügü láu ában gürígia le mafíñeti.

⁹ Lun labüridüniwa tíri würi to jiláalibeí túmari tídan gárada lánina íderawagúni, to rügüboun níjeinjali lúmagíñe ürüwa-wein irúmu táo, lun gíñe ábanrugügili lán meja túmari. ¹⁰ Lúnti tasúbudirúniwa luágu buíti le tadügübei queí buri jamúga ánjein meja agüria ja tubáliña tirájüñü buídu, ánjein buídu lubeí toúserun jáma ja achülürubaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adüga tubeí furúmieguarügü ámu cátei buíti.

¹¹ Würíña ja jiláaña úmari ja ñübürigiña, mabürüdabeí jíri tídan gárada, lugúndun lachülüruba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun. ¹² Ábameti jadímurejan gürígia jawágu ladüga jadüraaguni jadáradun lúma Búngiu le lánina jesériwidun lúnrügü súnwandan. ¹³ Ába jayábin lun jamágualigudun, mámarügü jamágualigudun, ába gíñe marásualugu jamá, eméteja lídoun sun cátei, adímureja cátei le moún lumuti. ¹⁴ Ligía nabúseerúnbei lun jamárieidunya ja ñübürigiñabaña, lun garájüñü jamá, lun joúnigirunun jában, lun míchugun jamá lúgaaru joun ja mafíñebaña lun jadímurejan wuríba jawágu. ¹⁵ Añájein würíña, ígira jamáali Búngiu, ába jafálaruni Máfia.

¹⁶ Ánjein añájein jabeí würíña ja jiláalibeí jámari jádan lufámilian ában afíñeti würi o wügüri, lúnti líderaguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña tílana ligílisi würíña ja busénbaña jíderawagún.

¹⁷ Fádirigu ja lábugiñeñounboun jaríaján ligílisi, ja adügübalin jawádigimari buídu, lúnti inébewa jamá sarágu, játima gafísiutebalin apúrichijani lúma arúfudajani. ¹⁸ Taríñajare Lerérur Búngiu. “Magüragua jumeí liyúma jilügün bágasu le lánina wadágimanu lueí lásiñerun leígin lídaangiñe tubúñe

fulúwaaru le uágubei ladügüragua lun lagídaruni túra." Aríñagatu gíñe. "Garíchatí ñadágimeinti lun libíjin lafáyeiruaja."

¹⁹ Madügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidúnrun. ²⁰ Ánjaña ja asígirubaña lídan figoú, lúnti badeínjan joun jagíbugiñe sun afíñetiña lun janúfudedun súngubei lueí jafígounjan. ²¹ Ayúmuraguatina bun ligíbugiñe Búngiu lúma Wabúreme Jesucristu, lúma jagíbugiñe ánjeligu ja lanúadirubaña, lun bagúñfulirun lúma buri gumádi le, lun ában lan láu janügúniwa sun gürígia. ²² Míchigabádüğabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidá ni ában queísi fádiri tídan ligílisi lídan loúfudagun, lúnti batúriajani ligáburi buídu lueídügü gafígoun lan, larijíwameti camá gúndaatibu láu lifígoun. Dísebá lueí sun le wuríbabéi.

²³ Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴ Lídan le báluajaniña wügüriña lun jesériwiduni Búngiu ligílisirugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein gíñe, marijínti jafígoun darí lárigiñe. ²⁵ Ítara méme líña gíñe, cátei buíti le jadügübei gürígia, arijúati furáangu, áni íbini marijín lan, siñáti leréderun arámudagu lun sun dan.

6

¹ Afíñetiña ja músubaña, lúnti weíri lan jinében jayúbudirigu joun, lun madímurejoún lan wuríba luágu líri Búngiu, ni luágu cátei le warúfudajabe. ² Ánjein añájein lubeí esériwidutiña gayúbudiritiña afíñetiña, moún lumuti loúgua lan jinében joun ladügarügü jadújeñu jamá lueígiñe Crístu. Lubáragiñe líra, lúnti jesériwiduniña buídtima, lugúndun ja erésibirubalin lubuídun jesériwidun, afíñetiña, idújeñu gíñe jínsiñegutiña. Arúfudajabeí cátei le, apúrichijabeíme.

Arúfudajani maríchatí lúma irísini inárüni

³ Ánjein arúfudaja ában gürígia cátei maríchatí áni múaraanti lúma larúma arúfudajani le láni Wabúreme Jesucristu le íderagubaliwa agúnfulira lúma Búngiu, ⁴ ában barürgua túngua gürígia ligía, le ibídiñeti ni cáta lun. Ganígití lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, mafíñeni joun gürígia, ⁵ lúma buri wuríbu magúmuchaditi. Jíbiri gürígia ja, wuríbatí jasáminan, ibídiñejabutiña lun inárüni, jarítaguatiña luágu lóbuna lan lagáñeirun irísini agúnfuliruni lúma Búngiu. Disebá jaweí gürígia ja ítarabaña. ⁶ Inárüni luágu ában lan oúnwenbun irísini agúnfuliruni lúma Búngiu lun le gufúrumabei láu le lúmabei.

⁷ Manügüntiwa ni cáta wámagua ñájoun uboúagun, siñábei gíñe wanügün ni cáta yágiñe, ⁸ áanjein geígin wabeí, ganáangun, lúnti gufúruma wamá láu líra. ⁹ Ánjaña ja buséndaña jarísidun, mawándun jamúti oúchawagúni, ába jáburujan tídoun lisádaraana sarágu lagübüri ayúmajani le málati, le ásiñeragüdübei gürigia jebélurun siélun, ába joúdin máfiougatin. ¹⁰ Línsiñegu seínsu ligía lílagülebei sun luwúyeri wuríbani, áni añájein sarágu gürigia ladüga joúchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügú láu asúfuriruni.

Wuríbu buíti le láni afíñeni

¹¹ Ánjabuti amürü, Timotéo, queísi ában ban wügüri derégeñuti lun Búngiu, anúrajabá lueí buri cátei le. Barüba ában ibágari le lánina ísuruni, le lánina gúnfuli lúma Búngiu, le lánina afíñeni, le lánina ínsiñeni, le lánina gagúraasuni lúma areíduni. ¹² Áfaaguabá buídu luágu láni wafíñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürigia luágu aráanseñu bíña lan lun bafálaruni Crístu. ¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucristu, lé meja gíñe geféenbei luágu le inárünibei ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucristu. ¹⁵ Dánme lachülürün dan ligía, le lanúadajabei Búngiu, lagíribuduba Crístu uboúagun, Búngiu rügüñein weírigu, Súnti Gabáfu, Jarúeite urúeigu, Jabúreme abúremeinigu. ¹⁶ Ligía rügüñein moúwedadi, le abágardubéi lídan larúgounga le ñíjin lubeí mayárafadun lan ni ában. Maríjin lágili ni ában gürigia Búngiu, siñáti gíñe larijíniwa. ¡Rúalá uweíriguni lun, arúfudualá lubáfu lun sun dan! Ítaralá.

¹⁷ Ja gámabaña irísini lánina uboú le, aríñagabá joun lun manáangun jamá joúngua luágu, míchugun jameíme jeménigi luágu irísini ligía, lugúndun machoúrunti, lun jíchuguni jeménigi luágu Búngiu, le wínwánbéi, áni rúleí sun cátei woun gíbe lun wagúndaarun luágu. ¹⁸ Aríñagabá joun lun jadügünü le buídubei, lun buídu lan jóúserun le tímatimaati, lun aráanseñu jamá lun jíchuguni lúma lun jafánreinruni le jámabei. ¹⁹ Ítara lúba joúndaragun irísini joúngua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujoún dimúrei lun Timotéo tídan gárada to

²⁰ Timotéo, toúnigibeí le íchugúbei lábugiñe baríaajan. Magáambabá dimúrei buri le lánina lisúbudin uboú, ni sigénei le lánina cátei le gíridügübei subúdi, ²¹ añájein jádaangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labüriüjan Páblo lun Timotéo

¹ Áu Páblo, láni Jesucristu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucristu. ² Nabürüjañoun gárada to bun, Timotéo le nanügübei queísi niraü le jínsiñebei nun, resíbibá abíniruni, gudémejabu, lúma darángilaü lúmagiñe Wáguchi Búngiu, lúma lúmagiñe Wabúreme Jesucristu.

Adímurejani luágu Crístu

³ Dan le nayúmuragun lun Búngiu buágu ságü nayúmuragun áriebu lúma wéyuagu, teínqui numúti Búngiu le únbei nesériwida láu tarúma nanígi quei jadügüni binádu nagübürigu. ⁴ Súnwandan narítagun luágu bayájun dán meja le nígirunibu, buséntina jamúga naríjinibu lun nabuinchun láu ugúndani. ⁵ Jarítaguatina luágu afíñeni inárüni le buágubei, Lóida to bagüty, túma Euníce to búguchi, jagía meja gawágubalin afíñeni le furúmiñe, áni choúru numúti luágu níjein lan gíñe buágu.

⁶ Ligía naríñagunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu. ⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadügüni furúmieguarügi cáteli, ínsiñeni, lúma ubáfu lun wasáminarun buídu líchugubei woun. ⁸ Mabúsigaribá lubeíti lun bapúrichijani le larúfudajabei Crístu, mabúsigaribá gíñe náu, áu le adaürübei lueigiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹ Sálba lumútiwa Búngiu, wa ligía woun lun wanügün ában ibágari le derégewati lun, máma jamúga lueigiñe níjein lan cáteli buíti wadüga, ladüga ítara líña lan laráanseruni lubáragiñe ladügüni uboú lun larúfuduni lareídun lúma línsiñejabun woun lídaangiñe Jesucristu. ¹⁰ Guetó larúfudei ínsiñeni le láu loúnajani Jesucristu le Wasálbaragüle lun lagünrinchaguni lubáfu oúweni, ru ligía ubáfu woun lun wibijini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña juríu. ¹² Ligía nasúfurirunbalin sun cáteli le. Láu sun líra, úati nibúsigari nan, lugúndun subúditi nun ca lan uágu níchigei nafíñen, áni choúru

numúti luágu gabáfu lan lun loúnigiruni le líchugubei lábugiñe naríaaajan daríme lachülürün wéyu ligía lun lagíribudun Crístu uboúagún.

¹³ Mígirabeí luwúyeri arúfudajani jarúmati le níchugubei bun, abágaridabá láu bafíñen luágu Crístu, arúfudeina ínsiñeni joun súngubei ladüga lídaañadiwa ában lúma Jesucristu. ¹⁴ Láu lubáfu Sífiri Sándu le wádaanbei, goúnígibeí arúfudajani le líchugubei Búngiu lábun baríaaajan lun madarúniwa lan iyéeni lídoun.

¹⁵ Queísi basúbudiruni, Ígira jamáadina sun afíñetiña Ásiana nábugua, níjein Figélo jádan, lúma Hermógenes. ¹⁶ Gudémejabulá Búngiu joun lufámilian Onesíforo, lugúndun barüjeiti gurásu nun sarágu weíyaasu, úati gíñe nibúsigari lan láu nadaürüña lan, ¹⁷ lubáragiñe líra, dan le liábinbei ubúrugu Róma, merédeti lálujanina darí ladárirunina. ¹⁸ Darí lámugei lugúdemebabu Búngiu lídaanme wéyu ligía le lagíribudagüle Wabúreme Crístu uboúagun. Subúsiti gíñe bun buídu ída lína lan líderaguníwa ubúrugu Éfeso.

2

Ában lisúdaaran Jesucristu buíti

¹ Ánjeinti amürü, niraü, resíbibá érei lídaangiñe abíniruni le wibíjibei láu lídaañadiwa lan ában lúma Jesucristu. ² Le cátei lánina wafíñen le agáamba báalibei nariñagun jagíbugiñe sarágu geféentiña arúfudajabeí joun wügüriña ja afíñewati jawágú, ja gayáarati jarúfudajani joun ámu.

³ Awándabeí lubeíti súfuri quei ában lisúdaaran Jesucristu buíti. ⁴ Úati súdaara le esériwiduti ádaraguti lúngua lídoun ámu cátei lueí le lánina súdaara, lugúndun gásu leréderun dayáru gu lábugiñe lerénjan lugúmandan. ⁵ Ítara lína gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu. ⁶ Le ábunagubei, garíchatí lun ligía lan furúmiñe ibíjei lufánran lídaangiñe alúbajani. ⁷ Samínabá luágu ürüwa jémpulu le, ábame gunfaráandagüda láni Wabúreme súngubei bun.

⁸ Jarítaguabá luágu Jesucristu. ligía ában gürígia wáledi, jádan linébaanfaangu urúei Davíd, áni sarágüda lumúti Búngiu lídaangiñe oúweni. ⁹ Niján ugánu le lánina asálbaruni le napúrichijabei, áni lueígiñe napúrichijani, awándatina asúfuriruni darí lun nagúrawagún láu güríngüri camá ában gürígia wuríbati áu. Siñáti leréderúniwa labúruchagun láni Búngiu ugánu, ¹⁰ ligía nawándunbalin sun cátei, luágu jáni ja anúadaja láñabaña Búngiu fuleísei, lun gíñe jayábin lun jabíjini asálbaruni lúma uweíriguni magúmuchaaditi siélu ladüga lídan jamá ában lúma Jesucristu.

¹¹ Inárüni cátei le.

Ánjein jiláadiwa lubeí lúma Crístu, wabágariduba gíñe lúma,

¹² ánjawa awánda súfuri lueígiñe, gafánraanbadiwa lídan larúeijan.

¹³ Ánjawa múaran, ligía úaramemebei, lugúndun ítara liña ligáburi Búngiu.

Ában ñadágimeinti buíti

¹⁴ Jarítaguagüdabeí cátei le joun ja afíñebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ni cáta, añawurijarügü lumútiña ja agáambabajabaña. ¹⁵ Joúchabeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubu. ¹⁶ Dísebá lueí dimúrei buri málati le lánina uboú le, lugúndun ja adímurejabaña ítara, joúdintimaaña lídoun wuríbani, ¹⁷ ábame labúruchagun jarúfudajan quei cánser. Niján le susérebei lun Himenéo lúma Filéto, ¹⁸ ígira jamáali inárüni, jaríñaga luágu sügújali lan lidáani ásaaruni lídaangiñe oúweni, jagünrinchaguñeiti jafíñen sarágu gürígia ítara. ¹⁹ Wagía afíñetiña, wagía lilígilisin Búngiu láu ébuu derégüdati le rúalaalíbei Búngiu, siñáti lánjingichúniwa. Bürüwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun lueí wuríbani.”

²⁰ Tídan ában muna weíritu, máma rügüñein umégeni gólu o pláta ñi, níjein gíñe le láuti fuláansu lúma láuti múa, níjein lúnti luweírin-ägei ayúsuruni, níjein lúnti furúmieguarügü yúsu. ²¹ Lun lúnti lan ában ayúsuruni weíriguti ában gürígia le derégeguati lúngua lun Búngiu, ju ligía lun, lúnti jarúma lan libágari, díse ligía lueí sun le wíyebei, ítara lúba ju lan lun furúmieguarügü wadágimanu buíti.

²² Anúrajabá lubeíti lueí jayúmajan wügüriña ñübürigiña, barüba ában ibágari le lánina ísuruni, afíñeni, ínsiñejabuni, lúma darángilaü, úara jáma sun ja agúarubalin Wabúreme Crístu táo anígi jarúmatu lun líderaguniña. ²³ Madügabá gásu láu sigénei málati, subúdi báali luágu barü lan líra wuríbu. ²⁴ Moún lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun gürígia. ²⁵ Lúnti ában lan arúfudajati buíti ligía, lúnti gagúraasun lan jáma ja múaradúntiña lúma, lúnti larúfuduni joun táo anígi ünabugutu luágu marícha jamá, ladüga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibei. ²⁶ Gayáraati jadáriragun joúngua lun jeséfurun

tídaangiñe sádara to gádaanbaliña lurúma Máfia lun ladügünü labúseerun jáu.

3

Ída jába lan gürígia lídoun búrime lagúmujoún wéyu

¹ Lúnti gíñe basúbudiruni luágú liábin buríba lan wéyu jénreenguti lídounme lagúmujoún dan. ² Joúngua rügübei buri gürígia jabúseera buíti, jínsiñe seínsu joun, pánta jagía, barüguo joúngua. Jadímurejaba wuríba luágú Búngiu, magáambun jabáñia jagübürigu, meteíngiradibaña, minébeme cátei lánina Búngiu joun. ³ Mínsiñejabubaña joun jarájüñü, magúdemejabu, marásualugubaña, siñábei járugüdagun joúngua, janárimebaña, láganibaña sun le buídubei. ⁴ Jalúgurubaña jamádagu, jadügüba buri cátei mabuídunti mebérresenga jagía cába lan asúsereda lárigiñe, janárimebei janáangun joúngua, jáluajabei jagúndan guánarügü lubáragiñe jamúga jáluajani Búngiu. ⁵ Jafámuruba camá gúnfultiña lúma Búngiu áni larijúba luágú iyéeni lan láu ligáburi jabágaridun.

Meméterabá jámoun jíbe gürígia ja. ⁶ Jádan buri gürígia ja, añajein já buri ebélurubaña jábiñoun mútu ayéedaña würíña ja débilitiña, já buri buínbaña láu figoú lúma láu sun luwúyeri ayúmajani. ⁷ Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni. ⁸ Ítara quei jawügürijoun Jánes lúma Jámbres, ja gabíñarajadibaña, lun Moisés, ítara líña gíñe jawügürijoun wügüriña ja lun inárüni. Wügüriña buri ja, wuríbatí jasáminan, garábaguaaña luágún wafiñen. ⁹ Mawáanserunbaña sarágu, ladüga geféenbei sun uboú luágú ibídiouguo lan jáu, quei lasúseredun joun bián jagüra ja awügürijoúbaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰ Ánjein amürü, falábaali narúfudajan buídu lúma ligáburi nagáburidun. ¹¹ Subúdi báali narítagun lúma nafíñen, aríja báali nugúraasun lúma nísiñejabu, lúma ída líña lan nawánduni eíbaajoúni lúma súfuri lúma líbiri lénreengun le nasúfurirubei lídan buri fulásu quei buri ubúrugu Antioquía, Icónio lúma Lístra. Subúsiti gíñe bun ída líña lan leséfurunina Wabúreme Búngiu lídaangiñe buri sun cátei le. ¹² Inárüni luágú jeíbaajoúba lan sun ja busénbaña jabágaridun derégeguañu joúngua lun Jesucristu. ¹³ Ánjaña ja wuríbabáña jáma ja gayéejadibaña, jaríbadatimaaba, ítara mémejaba ayéejá lúma ayeedúa.

¹⁴ Ánjein amürü, ítaramemebá derégüdagu lídan le bafúnrendeirubei, le uágubei affíñeedibu lan. Subúdi bumúti luágú inárüni lan le bafúnrendeirubei ladüga gayára lan bafíñerun jawágu ja arúfudajabalín bun. ¹⁵ Subúdi bumúti

Lerérunt Búngiu lúmagiñe ñüraügidib. Tídan Lerérunt Búngiu, ladárirúa sun lichú áu le busénwabei lun gayára lan jasálbarun gürígia, láu jafíñerun luágu Jesucristu. ¹⁶ Sun le bürüwañubei tidan Lerérunt Búngiu, Búngiu guánarügü íchugubalin jarítagunrugun wüguriña lun jabürüdüni. Jútulíburu tuguya lun taráfuduni le inárünibeí lúma gíñe lun taráfuduni le marichabeí, adügatu lun jígiruni gürígia cátei le mabuídunbeí luágu le buídubei, arúfudajatu joun gürígia lun jabágardun surúñu. ¹⁷ Líburu tuguya, jemégenboun gürígia ja esériwidubaña lun Búngiu lun jadügüni sun luwúyeri wadágimanu le lúnbeí jadügüni lun.

4

¹ Ligíbugiñe Búngiu lúma Wabúreme Jesucristu, le lúnbeí liábin quei urúei agúseragüdaña wínwangiña jáma jiláguaaña, naríñaguña bun lun bapúrichijani Lerérunt Búngiu, ² aráanseñubá lun bapúrichijani, busén jagia gürígia jagáambuni, mabúseerun. Afíñegüda báña, adeínjabá, eréra amürüme, arúfudajabá joun láu gurásu. ³ Lugúndun lachülüruba dan dámme le mawándun jamáni gürígia arúfudajani jarúmati, lubáragiñeme líra, jáluajabeí arúfudajani le gúñfulibei lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerubei jagáambun joun. ⁴ Jíchugubei janágan luágun inárüni, ábame jadügün gásu láu sun luwúyeri úraga. ⁵ Ánjein amürü, buídulá bisáminan súnwandan, awándabeí asúfuriruni, rúguabá búngua lun bapúrichijani ugánu le lánina asálbaruni, gúñfulibá buídu láu buwádigimari.

⁶ Áu, sandíguatina núngua luágu nadügüñein lan lagúmujoún le nuáraati lun Búngiu, yaráfaali lórate noúnen. ⁷ Ageíndagua náali luwúribun Crístu buídu, eíbaguaadina chüllü lúmoun lébeja, adüga náali sun le rúalaíbei Búngiu nun lun nadügüni, areída náali arúfudajani le lánina waffíñen jarúmañu. ⁸ Guetó, lagúrabuñadina nafáyeiruaja le lebégi ában ibágarí le lánina ísuruni, afáyeiruajaü le lúnbeí líchuguni Nabúreme nun, le agúseragüduti le úaraguabei, lídaanme wéyu ligía. Áni máamarügüba nun líchigei afáyeiruajaü ligía, líchugubei gíñe joun sun ja agúrabajabaalin liábin láu ínsiñejabuni lun.

⁹ Jouchabá biábin aríjana furése. ¹⁰ Ígira láadina Démas, jínsiñetimaati cátei le lánina uboú le lun, ñüdünjati ubúrugun Tesalónica. Ñüdünja Crescénte loúbawagun Galácia, ñüdün Tito loúbawagun Dalmácia. ¹¹ Lúcas rügüñein núma ya. Áluajabeí Márcos, banügeime búmagua, gayáraabei líderagunina lídan wadágimanu. ¹² Oúnaja nan Tíquico ubúrugun Éfeso. ¹³ Dámme biábin, banügounme cápa to nígoruboun lúbiñe Cárpo

yágüta Tróas nun, barübounme gíñe buri líburu, nigáradan burítima. ¹⁴ Adügaali Alejándro, le ñadágimeinbei gürábu, sarágu wuríbani nun, lafáyeirubei Búngiu quei ligáburi cátei le ladügübei. ¹⁵ Toúnigiguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrudu, úati ni ában íderagutina, ígira jamútina súngubei. Agúrabatina lun mabájüdün láni Búngiu cátei le joun. ¹⁷ Láu sun líra, íderagua lumútina Wabúreme Jesucristu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüdaneí joun sun gürígia ja mámabaña juríu. Ítara líña leséfurunina Nabúreme lueí yebe oúweni, ¹⁸ áni leséfurubadina lueí sun wuríbani, areída láname lubá larúeijan siélu. ¡Rúalá uweíriguni lun súnwandan! Ítaralá.

Lagúmujoún buri mábugaü lúma abíniruni

¹⁹ Mábugaü tun Prísca lúma lun Aquíla lúma joun lufámilian Onesíforo. ²⁰ Reídeija Erásto ubúru gu Corínto, ígira numúti Trófimo láu sándi Miléto. ²¹ Joúchabá biábin lubáragiñe laríbougadun. Mábuga líña Eubúlo bun, Pudénte, Líno, Cláudia jáma sun wadújeñu lueígiñe Jesucristu. ²² Búma lámuga Wabúreme Jesucristu, biní laünme Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN TÍTO

Labürijan Páblo lun Títo

¹ Áu Páblo, le abürüjabarun gárada to, ában esériwiduti lun Búngiu áu, ában gíñe láni Jesucristu apóstolu. Oúnaja lumútina lúntima níchugun dëgëdaguaü lun jafíñen ja anúadaja láñabaña Búngiu quei lánigu, lun gíñe gayáraabei lan jasúbudiruni inárüni lánina wafíñen, gayára lámuga jabágardun ában ibágari derégewati lun. ² Ítara lúba gayára lan jeménigidun lun jabágarduba lan súnwandan lúma Búngiu. Búngiu, le mayéejanbei, aríñaga lumúti luágu líchugubei lan ibágari magúmuchaditi le woun lúmagíñe lubáragíñe ladügüni uboú. ³ Guetóti, queísi chülüjali lan dan, subúdigüda láali ugánu lánina asálbaruni woun, ábatí loúnajanina Búngiu le Wasálbaragüle, lun napúrichijani ugánu ligía. ⁴ Nabürüjañoun gárada to bun, Títo, le nanügübei queísi niraü le tímatimaati, lídan ában wafíñerun luágu Crístu. Ayúmajatina lun bibíjin abíniruni lúma darángilaü lúmagíñe Wáguchi Búngiu, lúma lúmagíñe Wabúreme Jesucristu le Wasálbaragüle.

Luwádigimari Títo luágu uboúju Créta

⁵ Lébubei nígirunibu luágu uboúju le gíribei Créta, lun baráanseruni le mégeigilibei lun laráanserún, lúma lun bichugun fádirigu lídan ságü fulásu queísi naríñaguni bun. ⁶ Ában fádiri lúnti labágardun buídu, úa lámuga ni cáta uáguti lererúa lun. Lúnti ábanrugi tan lúmari, lúnti afíñe jamá lirajüñü luágu Crístu, gagáambadi, lun gíñe buídu lan joúserun lirajüñü lueí gayára lan líchugúniwa jadúnrun. ⁷ Lábugíñeñein laríaajan fádiri luwádigimari Búngiu, ligía lúnti lubei labágardun ában ibágari le úaraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuríbu, mínsiñelá seínsu lun sarágu. ⁸ Lubáragíñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügüri le jínsiñejabuti lun le buídubei, lun buídu lan lichügü, buídume loúseruniña sun gürígia, derégeguañu lúngua lun Búngiu, láu ubáfu lun lárügündagun lúngua. ⁹ Lúnti lárügündün luágu ugánu inárüiniti le uágubei gayára lan weménigidun, le arúfudajoúbei lun, lun gayára lan líchugun dëgëdaguaü joun ámu láu arúfudajani le richábei, lun gíñe lafíñeragüduniña ja asígenerubalin.

¹⁰ Lugúndun añájein sarágu magáambaditiña, jádaantima jarásan juríu, ja arúfudajabaña libídiouniga áu, ayéeda jamáña gürígia. ¹¹ Lúnti ladaurúniwa jayúma ja, ladüga

chagáguagüdatiña sarágu família láu jarúfudajani le moún lubei, lun jagáñeirun seínsu láu műarani.

¹² Aríñagatí meja ában chu táu Crétana, le ñí bubei guetó, jawágu lupaísanun. “Gürígia Crétana, súnwandan yé jama, machülaaguntiña, jalíluatiña, magúali.” ¹³ Áni inárÜni laríñagubei. Ligía lubeíti, badeínja joun jére, lun joúdin láu arúfudajani le richábei luágu wafíñen, ¹⁴ lun gíñe mebéresen jamá láu buri úraga le jadáagun juríu, ni láu le jaríñagubei gürígia, játima íchugubalin janágan luágun inárüni.

¹⁵ Queísi laríñawagúniwa, jarúmati sun cátei joun ja jarúmabaña anígi, áanjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, Wíyetu gíñe janígi. ¹⁶ Aríñagatíña luágu subúdi lan Búngiu joun, láu buri cátei le jadügübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadügüni le buídubei.

2

Arúfudajani inárüniti rúti ibágari buíti

¹ Ánjeinti amürrü, Títo, lúnti barúfudajani luwúyeri igáburi le lúnbei jagáburiduni afíñetiña luágu Crístu, ában ibágari le úaraguabej líma inárüni le lúmagiñebi Búngiu. ² Lúnti mátun jamá wügüriña weíyaaña mútu, inébewa jagíame, buídu jachügü, derégüdagü lídan jafíñen luágu Crístu, buin láu ínsiñejabuni líma gurásu. ³ Würíña gíñe ja weíyaaña, lúnti gíñe buídu lan joúserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun líma jerérun, ⁴ lun jarúfudajan joun würíña nübürigiña jaweí lun jínsiñe jamá jámari joun, jínsiñe jarájüñü joun, ⁵ lun buídu lan jachügÜ, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágari würíña, lun úa jamá ni ában adímurejatiña wuríba luágu ugánu le láni Búngiu luágu asálbaruni láu afíñeruni luágu Jesucristu.

⁶ Arúfudabajabá joun wügüriña irájüñü lun buídu lan jachügü, ⁷ rúba ában jémpulu buíti joun lídan sun cátei. Arúfudajabeí lérügü inárünibei joun láu ában igáburi derégüdati, ⁸ adímurejeina láu ában igáburi magádieti le uáguti lásiñera ladárirún mégeiti. Ítara lúba janügüba báganiñu busíganu luágu luríban joúserun áni siñábei jadímurejan wuríba buágu.

⁹ Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun, ¹⁰ lun míwerujan jamá, lun jarúma lan

jagáburi le gumúti jáma jayúbudirigu lun larijíniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabeí cátei le, Tito, lugúndun arúfuda láali Búngiu lareídun woun, le ídaangiñebi gayára lan jasálbarun sun gürígia lídaangiñe luríban jagáburi. ¹² Arúfudaja láali Búngiu woun láu lareídun lun wígiruni wuríbani lúma ayúmajani lánina uboú, lun wabágaridun ában ibágari le buíti ligíbuagu uboú le, ragüguañu woúngua, derégeguñañu woúngua lun Búngiu. ¹³ Niján luwúyeri igáburi le lúnbei wagáburidun lídan le wagúrabajaña lan lagúncularun lubuídun cátei le uágubei laríñaga Búngiu —lagíribudun Wabúngiute, Wasálbaragüle Jesucristu uboúagun láu sun luweírigun. ¹⁴ Derégeguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüníwa le gumúti, lun láni wamá, aráanseñu lun wadügünü le buídubei.

¹⁵ Ligía buri cátei le lúnbei barúfudajani, íchigeina dügüdaguaü, arérejeina láu sun ubáfu. Míchigabá lúgaaru lun banügüniwa quei ni cátá.

3

Cátei lé buri lúnbei jadügünü afíñetiña

¹ Jarítaguagüda báña afíñetiña luágu Crístu, luágu lúnti lan jagúncularun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadügün furúmieguarügü cátei buíti, ² lun madímurejan jamá wuríba luágu ni ában, lun dilílan joúserun, areída jagíame, lun ünabugu jamá lídan joúseruniwa sun gürígia.

³ Lugúndun wagía afíñetiña, ibídiouguati meja gíñe wáu, magáambadi wagia meja lun Búngiu, barütiwa meja ában üma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adüga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴ Ángeinti dan le larúfudunbalin Búngiu Wasálbaragüle lareíni lúma línsiñejabu joun gürígia, ⁵ ába lasálbaruniwa, máma jamúga ladüga wadügün som cátei buíti, ladüga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun. ⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesucristu, lun wámabei lan láu sun luweírin lubáfu. ⁷ Láu larícharaguagüdüníwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu. ⁸ Inárüni cátei le.

Buséntina lun barúfudajani buri cátei le láu ában éregu, lun ja lan afíñebeña luágu Búngiu, lun súnwandan lan jíchaagun joúngua lun jadügüni cátei le buídubei. Buítí cátei le, áni buítí lanügün joun sun gürígia. ⁹ Dísebá lueí sigénei buri le málati, úraga buri jawáguti binádu mútu, fáreinguauü buri, lúma buri wuríbu lueígiñe lilúrudun Moisés. Sún buri cátei líra, manügünti buítí lun ni ában.

¹⁰ Áanjein ñí lubei ában tílana ligílisi le adügübalin fáreinguauü, erérabá lun ában o bián weýyasu, áanjein madügün gásu báu, ígirabeí lúngua. ¹¹ Subúdi báali luágu ígira láali lan wügüri ligía üma le surúbei láu luwúyeri labágardun.

¹² Dánme noúnajani Artémás o Tíquico lan lun lárügündüni bubára ñi, buséntina biábin aríjana Nicópolis lugúndun ñíba násügürei lidáani luríbouga. ¹³ Íderaguabeí Zénas, le subúdijabúbei lun lúrudu, lúma Apólos lídan sun le buáraati, rúbeíme le jemégeirubei joun lun jasígiruni jaweíyasun. ¹⁴ Furéndeí jamá gíñe sun wánigu lun jadügüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja númabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíijabarun gárada to. Ítaralá.

LIGÁRADAN PÁBLO LUN FILEMÓN

Labürijan Pablo lun Filemón

¹ Áu Páblo, le nadaürüñabei lueígiñe napúrichijan luágu Jesucristu, nabürüjañoun gárada to, úara lúma Timotéo, le wadúje lueígiñe Crístu, bun, Filemón, le weíribei ínsiñe woun, le gíñe woúba lídan wadágimanu. ² Gárada to, joúntu gíñe títana ligílisi ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu. ³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucristu.

Línsiñejabu Filemón lúma lafíñen

⁴ Teínqui numúti Búngiu súnwandan lídan le narítagun buágu lídan nayúmuragun lun, ⁵ lugúndun agáambaadina luágu ínsiñejabuni lúma afíñeni le buágubei lun Jesúsu lúma joun sun ja lánigubaña Búngiu. ⁶ Amúriayatina lúma Búngiu lun ja lan afíñeñabaña luágu Crístu ladüga bafíñen, lun jayábin lun gunfaráanda jamáni sun abíniruni le wabíjibeí lúmagiñe Jesucristu, buídu. ⁷ Nidúje, oúnwenbun nugúndan lúma dëgündaguáü le nídaanbei luágu bínsiñejabu, lugúndun darángilajaru janígi ja afíñeñebaña luágu Crístu, bugúndun.

Lamúriajan Pablo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun naríñaguni le lúnbei badügüni bun, ⁹ jímein numúti ayúmuraguarügü nan bun luágu ínsiñejabuni le wádaanguabei woúniagua. Áu Páblo, weíyaadina, guetó nadaürüña lueígiñe napúrichijan luágu Jesucristu. ¹⁰ Amúriayatina ában fuleísei búma lun Onésimo, le ítarajalíbei queísi niraü lídan Jesucristu lárigiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügüjalibei, ában meja idámuni moúnti Onésimo bun, ánjeinti guetó, gebégití bun queísi nun. ¹² Noúnajañein bun lárigoún, resíbibeí lubeíti láu ugúndani lugúndun láu noúnajani bun, queígubeirügü jamúga noúnajañoun lan nanígi, le luweírin línsiñe nun. ¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürüwa lueígiñe napúrichijani ugánu le lánina asálbaruni. ¹⁴ Mabúseerúntina nadügün ni cáta magúndaga amürü láu, lun máma lan láuti afósuruni fuleísei le badügübei nun láu jamúga bígiruni núma, lun láuti lan bugúndan guánarügü. ¹⁵ Fágua lanúurunbei Onésimo bueí luágu átiri dan lun bómabei lan guetó lun sun dan, ¹⁶ guetó

mámarügü queísi ában idámuni, queísi cátei buítimaati lueí idámuni—queísi ában idújei jínsiñeguti. Weíriti línsiñe nun, lúnti jínsiñetima lan bun, mámarügü queísi wügüri, queísi gíñe ában idújei lueígiñe Crístu.

¹⁷ Ánjein lubeíti barü bubálina queísi ában boúba lídan wesériwidun lun Crístu, resíbibeí queísigubeirügü jamúga áu lan berésibirubei. ¹⁸ Ánjein adügaali lubeí dáñu bun, o ánjein dúwei lubálibu, agúburaja bána. ¹⁹ Áu Páblo, nabürüjañein murúsun cátei le láu nújabu lúma nilétüran. nafáyeirubei bun, láu sun, gayára lan jamúga narítaguagüdünibü luágu dúweigua ban gíñe búngua nun lugúndun áu lan asúbudiragüdübalin Wasálbaragüle bun. ²⁰ Ánja, nidúje, adügabéi fuleísei le nun queísi afíñeti luágu Crístu, ámaljaboún nanígi queísi idújei lueígiñe Crístu.

²¹ Nabürüjaña bun lugúndun choúru nan luágu bagáambadi, áni subúdití nun luágu badügüba lan sügü láu le uágubei namúria ja búma. ²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoún abíniruni

²³ Mábuga líña Epáfras bun, le noúba furísunrugu lueígiñe lapúrichijan luágu Jesucristu, ²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucristu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraü

¹ Lídan meja dan le sügūjalibe, adímurejati meja Búngiu joun binádu wagübürigu sarágu weíyaasu lúma lídan sarágu luwúyeri, jádaangiñe profétagu, ² guetó, lídoun buri lagúmujoún dan le, adímurejaali woun lídaangiñe Liraü. Lídaangiñe Liraü le, ladügei uboú, áni rúlaali sun cátei lun. ³ Arúfuda lumúti Liraü Búngiu luweírigun Lúguchi luoúgua, ligía méme Búngiubei, ligía ágúdjajabalin sun cátei láu lerérunt le gabáfubei. Lárigiñe lachibuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraü Búngiu sügū jáu ánjeligu

⁴ Nübinjali Liraü Búngiu lun weírigubei lan jaweí ánjeligu, resíbjali ában ubáraü íñugutimaati jaweí queísi lalágaante queísi Liraü Búngiu. ⁵ Maríñagunti Búngiu ni ában weíyaasu lun ni ában ánjeli.

Niraü amürü,
rúnaali ubáraü le bun ugúñe,
maríñagun ligía luágu ni ában ánjeli.

Áuba Búguchi,
amürüme nisáani.

⁶ Áanjeinti dán meja le loúnajaabalin Liraü le ábanrügüti uboúagun, aríñagati.

Judúgu jamá sun náni ánjeligu lun.

⁷ Lariñaga jawágu ánjeligu.

Adügatina lun ítara jamá náni ánjeligu camá garábali,
adüga áu lun ítara jamá camá wátu geméti,
oúnagüleigu jagía ja esériwidubadina.

⁸ Áanjeinti lun Liraü aríñagati Búngiu ítara.

Búngiu, lúntibei súnwandan bañúurun luágu bála lun barúeijan,
láu ában úaraguni bagúmadija.

⁹ Jínsiñeti le richáguabei bun, iyéreeguti le wuríbabéi bun,
ligía níchugunbei, áu le Bubúngiute, gíbetima ugúndani bídoun
sügū jáu bíbirigu.

¹⁰ Áriñagati gíñe.

Amürü le Abúremein, lídan lagúmeseja, adüga bumúti uboú,
láu bújabu badügei siélu.

¹¹ Lagúmuchuba siélu lúma uboú, áanjein amürü, beréderuba lun
sun dan.

Liábiba siélu lúma uboú lun laweíyadun quei anáanguni,

12 babáruchagubaña quei ában daüguaeü,
jasáansirúaba quei anáanguni.

Ánjein amürü, ában mémebadibu, magúmuchunbei bibágari.

13 Maríñagunti Búngiu ni ában weíyaasu lun ni ában ánjeli.

Ñurúba lueígiñe noúnwenren darí lun nagáñeiragüdünib
jawágu báganiñu,

ru náñame bújaburugun.

14 Sun ánjeligu, espíritugu esériwidutiña lun Búngiu jagía,
oúnajoútiña lun jíderaguniña ja lúnbaña jerésibiruni asálbaruni
lídaangiñe jafígoun.

2

Lúnti woúnigiruni wasálbarun

1 Queí ítara lína lubeí luweírigun Liraü Búngiu, lúnti lubeí weténiruntima lun ugánu le agáamba wamálibei luágu, lun madíreirun wamá lueí üma. 2 Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adüraagubalin, madügün jagía gásu láu, áburujati ligáñi Búngiu jawágun láu iríchaü. 3 Gúbuméti wafáyeija luágu wafígoun ángein moúnigirun wamá oúnwenbun asálbaruni le resíbi wamálibei lúmagiñe Jesucristu le Wasálbaragüle. Wabúreme Jesucristu guánarügü adímurejabei luágu asálbaruni le furúmiñe, lárigiñe, ja agáambubalin, ában jásiügüragüdüní woun láu ában achoúruruni luágu inárüni lan. 4 Ñurúgüda láali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucristu quei libíriña

5 Míchugun lumúti Búngiu uboú líte le uágubei wadímureja lábun jagúmadijan ánjeligu, 6 lubáragiñe líra, laríñajare tídan Lerérunti.

Búngiu, ¿cáteiñeinsan wügüri lun barítaguba lan luágu?

¿Cáteiñein wügüri goúwedaditi badíjeridunbei láu?

7 Rúbumuti ünabu jaweí ánjeligu luágu murúsun dan, daüguagüda bumúti láu uweíriguni lúma inébesei, ru amürü ubáfu lun luágu sun cátei le badügübei,

8 rúbumuti sun cátei lábugiñoun lagúmadijan.

Dan lubeíti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñüdünti láu le lubeíbei wügüri. 9 Ánjeinti lídan Jesucristu, aríja wamúti lagúñfulirun sun dimúrei le, ligía meja ában gürígia le líchugubei Búngiu ünabu jaweí ánjeligu luágu murúsun dan. Láu luweírin línsiñejabu Búngiu woun, ánjati lun loúnwen Crístu jawágua sun

gürígia, áni guetóti, daügu líña láu uweíriguni luágu oúweni le lasúfurirubei.

¹⁰ Sun cátei níjein lun Búngiu, áni lídaangiñeti gíñe, áni busénti Búngiu lun gafánran jamá sun lirajüñü lídan luweírigun. Ligía lúnti lubeí buga lasúfurirun Liraü Búngiu, le Jesucristu, queísi ában gürígia lun ligíaba lan ában asálbaragülei gumúti láu asúfuriruni. ¹¹ Ja edéregerúabaña jarúma lun Búngiu lúma Liraü le edéregerubaliña ítara, sun jagía ában meme Úguchili –Búngiu. ¹² Ligía úa lubeí nibúsigari lan Liraü Búngiu lun lagúaruniña lamúlenu jáma lítunu dan le laríñagun lun Búngiu, queísi bürüwaňu lan tídan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigun lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴ Ja jasáanigu ában familia, ában meme jítaü jagía, ítara gíñe, wügüri meja gíñe garaüwarügti Jesúsu, lun meja gayáraabei lan loúnwen, gayára lámuga lagünrinchaguni lubáfu Máfia le ídaangiñebi liábin oúweni joun gürígia. ¹⁵ Ítara líña gidá lumuti Jesucristu janúfude gürígia, já meja aganoúbaña quei idámuni lun anúfudei lueí oúweni. ¹⁶ Masáliragunti Crístu queísi ánjeli lun líderaguniña ánjeligu, salíti queísi wügüri garaüwarügti lun líderaguniña gürígia líledi, ja linébaanfaangu Abrahám, ja lúnbaña jafíñerun luágu. ¹⁷ Lúnti líra, gásu meja ítara lúba lan queísi libíriňa, lun liábinba lan lun ábanbei lan fádiri íñutimaati, le úaraguati, láu gudémejabu joun gürígia, lun gíñe lachíbuni jafígoun gürígia láu ledéregeragun lúngua luágu gurúwa. ¹⁸ Áni queíti súfuri lan, áni oúchagualeí Máfia, guetó gayáraati gíñe líderaguníwa lídan le woúchawagún.

Weírigutimaati Jesúsu lueí Moisés

3

¹ Ítara líña lubeíti, nidújeñu derégeguatiña joúngua lun Búngiu, quei jádaangiñetün lan ja únbaña wájali lan Búngiu lun jaganoún lúma siélu, téni jumá buídu lun Crístu le loúnajabei Búngiu, le gíñe fádiri íñutimaati le lánina affíñeni le wawágubei.

² Úaraguati Jesúsu lúma Búngiu lídan sun wadágimanu le únbei lanúadirei, queísi meja gíñe úaragua lan Moisés lídan sun lesériwidun jádan lufámilian Búngiu. ³ Gadúnatimaati Jesúsu uweíriguni sügü láu Moisés ítara quei resíbitima lan le adügübei ában müna uweíriguni sügü táu müna to ladügüboun. ⁴ Sun müna adügarügü lumútu som gürígia, áni Búngiu adügübalin

sun cátei le njieinbei. ⁵ Ítara liñáti, úaraguati meja Moisés lídan lesériwidun jádan lufámlian Búngiu queísi ában esériwiduti lun Búngiu, wadágimanu lé meja ladügübei, ában liyáwa inárüni le lúnbei lasúbudiragüduniwa lídan dan le lúnbei liábin. ⁶ Ánjeinti Crístu, úaraguati queísi isáani jádan lufámlian Búngiu, áni jádaangiñetiwa família jagía ánjawá derégüdagu méme, ánjawá gíñe afíñie darí lúmoun woúnwen, gúndaañu lídan eménigini le wawágubei.

Eméraaguni joun lumútuniña Búngiu

⁷ Ligía lubeíti, lúnti wagáambuni le laríñagubei Sífiri Sándu tídan Lerérun Búngiu.

Ánjein jagáamba le laríñagubei Búngiu ugúñe,

⁸ medéreratá janígi queí meja tedérerun janígi magáambaditiña ja oúchagubalin Búngiu lídan fulásu mageírawati.

⁹ Lídan bián-wein irúmu le jáubei ñi, joúchagua jamútina binádu jagübürigu lídan fulásu ligía, líña Búngiu,

láu sun aríja jamáni buri cátei le nadügübei.

¹⁰ Ligía nagáñidunbei jáma gürígia jagía, ába naríñagun. “Súnwandan charárañu jamá tídan janígi, májatiña jafálaruni üma le narúfudubei joun.” ¹¹ Ligía nagáñidunbei jáma, ába náfiñurun luágu mebélubaña lan lídoun fulásu lé yebe aráanse náalibei jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadísedun lueí Búngiu le wínwanbei láu mafíñerun jumá luágu. ¹³ Lubáragiñe líra, rújuma gurásu júniwagua ságü wéyu, sun njangua lan dan. Toúnigi jumá lueí leyéedagunün figoú, edéreragüdounme janígi, ¹⁴ lugúndun ánjawá ítara méme derégüdagu darí woúnwen lídan afíñeni le wawágubei lúmagiñe furúmiñeti, gafánraanbadiwa lúma Crístu.

¹⁵ Níjangua dimúrei le, le gíñe woúnbei, wagía le wínwanbei lídoun buri dan le.

Ánjein jagáamba le laríñagubei Búngiu guetó,

medéreratá janígi quei jagüra ja magáambadibaña lun Búngiu. ¹⁶ ¿Cátañati agáambubalin lumálali Búngiu, lárigiñe, ába jagáñidagüduni láu luríban jagáburi? Sun ja laságarubaña Moisés Ejíptogiñe. ¹⁷ ¿Cáti úma lagáñida Búngiu bián-wein irúmu? Jáma ja afígnounjabaña, ja oúwegubaña lídan fulásu mageírawati, ába ligirúniwa jábu ñi. ¹⁸ ¿Cáti un láfiñura Búngiu luágu mebélubaña lan lídoun fulásu lé yebe aráanse láalibei joun lun jeméraagun ñi? Joun ja adüraagubalin le lubeíbei.

¹⁹ Ítara líña lubeíti, goúnigi jumá lun jafíñerun meme darí

lúmoun joúnwen, lugúndun ladüga mafíñeni le jawágubei binádu wagübürigu, siñá lubeí meja jebélurun lídoun fulásu le aráanse láalibei yebe Búngiu jabá.

4

¹ Guetó lubeíti níjeingua béna júnren woun lun gayára lan webélurun lídoun eméraaguni le aráanse láalibei Búngiu woun siélu, lúnti goúnigi wamá, siñadügü liñeín lebélurun ában wádaangiñe, dánme lachülürün óra lun woúnwen.

² Lugúndun apúrichijoúali gíñe ugánu luáguti asálbaruni woun queísigubeirügü joun binádu wagübürigu, mesériwinti lun ni cáta joun jagáambuni ugánu ligía lugúndun agáamba jamúti, mafíñerunga luágu. ³ Ánjeinti wagía le afíñeelebei, wagíaba ebélura lídoun eméraaguni le, le uágubei laríñaga Búngiu.

Ligía nagáñidunbei jáma,

ába náfiñurun joun luágu mebélubaña lan lídoun fulásu le aráanse náalibei yebe jabá lun jeméraagun.

Ítara líña lerérun Búngiu jawágu binádu wagübürigu. Aráanserúati fulásu lánina eméraaguni joun lúmagiñe wéyu le lagúmuchuni Búngiu ladügüni uboú, ⁴ queísi labürüdúniwa tídan Lerérun Búngiu luágu lisédün wéyu.

Ába leméraagun Búngiu lídaangiñe sun luwádigimari luágu lisédün wéyu.

⁵ Aríñawagúaya ligía tídan Lerérun tugúya ítara.

Mebélubaña lídoun fulásu le aráanse náalibei yebe jabá lun jeméraagun.

⁶ Láu dimúrei buri le, subúdi wamúti luágu aráanserúaňu lan fulásu lánina eméraaguni jabá gürígia, ja binádu wagübürigu, ja furúmiñebaña agáambei ugánu lánina asálbaruni, mebélutiña ladüga mafíñeni le jawágubei lun Búngiu. ⁷ Ligía laráanserunbei Búngiu ámu dan lun gayáraabei lan jebélurun iséri gürígia lídoun jeméraagun, lugúndun adímurejati Búngiu lídaangiñe lé meja laríñagubei Davíd sarágu dan lárígiñe, tídan Lerérun Búngiu.

Ugúñe, láu jagáambuni le laríñagubei Búngiu,
medéreratá janígi lun.

⁸ Lun jamúga fulásu lan lé meja ñíjin lubeí lanügaña Josué Israelítagu fulásubei lánina eméraaguni le uágubei ladímureja Búngiu, madímurejaanyati jamúga Búngiu sarágu irúmu lárígiñe jebélurun Israelítagu lídoun jageíra luágu “ugúñe lan dan” lun jagáambuni Búngiu, gayára lámuga jebélurun lídoun jeméraagun.

⁹ Ítara líña lubeíti, níjeingua ában eméraaguni le gumúti joun lánigu Búngiu, ¹⁰ lugúndun le ebéluruti eméraagua lúma Búngiu siélu, eméraaguati lueí luwádigimari ítara quei leméraagun meja Búngiu lueí luwádigimari lárígiñe ladügüni uboú. ¹¹ Lúnti lubeíti wafíñerun le tímatimaati luágu Jesucrístu lun gayára

lan webélurun lídoun eméraaguni siélu, faládëgü liñálin ában wádaangiñe jáni já meja mafíñerunbaña jémpulu, ábame lefériderun.

¹² Lugúndun mítaraantu Lerérun Búngiu queísi ában cátei le jiláalibei, lubáragiñe líra, gabáfuti lun lasáansiraguni wagáburi. Belútu tídoun wanígi queísi ában efeín to biángua tamána, belú tugúya chüli túmoun wawáni lúma wáni espíritu. Furáangugüda tumúti sun warítagun lúma sun wayúmajan, arúfuda tugúya cátañañadiwa lan. ¹³ Úati ni ában gürígia le ladügübei Búngiu lun gayára lan larámudagun lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiriñebei le tímatimaati

¹⁴ Jesúsu le Liraü Búngiu, ligía wafádiriñebei le tímatimaati, le belújalibei siélun lun laráramun ligíbugiñe Búngiu abúyeija luágu wafúleisein. Ligía lunti lubeí derégüdagu méme wamá lídan ligáburi wafíñen. ¹⁵ Gayáraati gudémejabu lan Jesucristu le wafádiriñebei woun luágu wadébilin, lugúndun ligía guánarügü súfuriti sun luwúyeri oúchawaguni quei wagía, mafigounjaanti. ¹⁶ Ligía lúnti lubeí wayárafadun lun Búngiu le jínsiñejabúbei woun, láu afíñeni, lun gudémejabu lan woun, íderagua láwame láu lareíni lídan wemégeirun.

5

¹ Según wagáburi, wagía juríu, ságü ában fádiri le íñutimáabei anúadajoúati wádaangiñe lun ligíaba lan wachügündina ligíbugiñe Búngiu, lun gíñe líchuguni edéweejani lun Búngiu lueígiñe joúbadina gürígia, lúma adágaragüdüni luágu lifígoun lúma luágu jafígoun jíbiri gürígia. ² Quei débili lan fádiri guánarügü quei furúmieguarügü gürígia, gayáraati gudémejabu lan joun gafígountiña jáma acháragadutiña, ³ áni ladüga lidébilin guánarügü queísi furúmieguarügü gürígia, gásu gíñe ladágaragüdüni luágu lifígoun guánarügü queigubeirügü luágu jafígoun jíbiri gürígia.

⁴ Siñáti ladáagun ában gürígia lúngua fádirime le íñutimaabei láu láni lúngua, Búngiu anúadirubalin, rúleí ubáraü le lun queísi meja lasúseredun lun Aarón lé meja furúmiñeti fádiri le íñutimaabei. ⁵ Ítara líña lasúseredun lúma Crístu, máma ligía íchaagubei lúngua fádirime íñutimaati láu láni lúngua, Búngiu íchugubalin ubáraü weíriguti le lun queí buga laríñaguni lun.

Niraü amürü,

rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu.

Fádiri amürü lun sun dan,

le líbe Melquisedéc.

⁷ Dán meja le laganoúnbei Crístu ya uboúagu, ayúmuraguati meja láu umálali jéreti lúma sarágu águiraü lun Búngiu le gabáfubei lun leséfuruni lídaangiñe oúweni le lúnbei lasúfurirun. Ába lagáambuni Búngiu ladüga derégeguñu líña lan Crístu lúngua lun lugúndan Búngiu. ⁸ Láu sun Liraü lan Búngiu Crístu, chülüti dan lun larúfuduni lagáambadi láu lawánduni asúfuriruni. ⁹ Ñübinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñüdüntiña láu le lubeíbei. ¹⁰ Ába lanügüni Búngiu Crístu quei fádiri íñutimaati líbe Melquisedéc.

Wuriíbani le líchugubei lígirúniwa afíñeni

¹¹ Gíbetti lúnti waríñaguni jun luágu Crístu lúma Melquisedéc, jénreenguti lariñawagún furáangu, lugúndun siñá lan gunfaráanda jumáni. ¹² Sügújali sarágu dan lúmagiñe jasálbarun, lúnti jamúga gayáraajali lan jarúfudajani Lerérun Búngiu joun ámu, áni busén mémegidün narúfudajaniya buri cátei létima ménreengúnbei lídaangiñe Lerérun Búngiu jun. Irájüñügidün lidan jafíñen, queísi irájüñü ja gásubaña játun míligi lubáragiñe jamúga jeígin eígin le dëgüdati. ¹³ Afíñetiña ja buséngiñabaña larúfudajoúniwa cátei létima ménreengúnbei tídaangiñe Lerérun Búngiu joun, ítara jáña quei irájüñü ja gurágiña—úagili gunfaráanda jamáni Lerérun Búngiu buídu. ¹⁴ Ja weínamujañábaña lidan jafíñen, subúditi Lerérun Búngiu joun buídu, subúdi jameí arúfudajani le buídubei lúmoun le mabuídunbei.

6

¹ Queímoun méme lubeíti wabáruaguóún lidan wasúbudin luágu Lerérun Búngiu, ígira wamámugei arúfudajani le ménreengúnbei libügürü Crístu lun watúria jani lujúlilin-ägei. Marítagua wamá luágurügü lébu wafíñen, queí buri ligirún binádu igáburi le málati, lúma buri afíñeni luágu Búngiu, ² arúfudajani luágu badísei, líchugúniwa újabu jábulugu afíñetiña, jásaarun jiláaña lídaangiñe oúweni, lúma lagúmujoún lagúseragüduniña Búngiu gürígia, ³ queímoun wabáruaguóún lidan wasúbudiruni lujúlilin-ägei Lerérun Búngiu, láu lubáfu wawágu.

⁴ Gürígia ja resíbi jamáalibei larúgounga ában weíyasu, resíbi jameí Crístu queísi jasálbaragüle, resíbi jameí gíñe Sífiri Sándu, ⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya uboúagu — ⁶ ánjein jíchiga janágan luágun Crístu lárigiñe sun cátei líra, ába jagíribudun járgoún lídoun binádu jagáburi, siñáalime jaságúrijan, siñáalime gíñe lánigu jamá Crístu. Lun jamúga jíchuguni janágan luágun Liraü Búngiu

lárigiñe jafíñerun luágu, queísigubeirügü jamúga jádaraguñeinya lan luágu gurúwa, jéjerajaña gíñe láu jagíbugiñe gürígia.⁷ Gürígia ja eíbugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágimeinbalin, ladüga binilaali lán buga Búngiu múa ligía.⁸ Gürígia ja íchugubaña janágan luágun Crístu, ítara jáña quei múa le ñí lumuti lájücha jíyu lúma lagübüri jíduru, úati ju lan lun ni cáta. Láburujaba lábun líñaragun Búngiu, ábame lagudún.

Eménigini le adügübei lun derégüdagu wamá

⁹ Láu sun wadímurejan ítara, nidújeñu jínsiñetiña nun, afíñetiwa luágu ítara júba lan queí múa le íchugubei inádiri buíti, áni jíbibubei sun abíniruni le ñübinbei woun luágu wasálbarun.¹⁰ Lugúndun úaraguati Búngiu, áni mabúlieidun lubeí le adüga jumálibei, lúma ínsiñejabuni le arúfuda jumálibei lun láu jíderaguniña jidújeñu luágu afíñeni, cátei le anjünjaguabei adügei.¹¹ Buséntiwa lun ítara méme lan cáda ában jídaangiñe, arúfudei afíñeni le darí lúmoun joúnwen, lun gayáraabei lan jibíjini le jagúrabubei—lun jebélurun siélun.¹² Mabúseerúntiwa lun jamáqualigudun lídan cátei le láni Búngiu, busérügütiwa lun jáyeijani jagáburi já meja afíñebaña buídu buídu luágu Búngiu, awánda jameí sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñuti luágu guánarügü líri ladüga úa lan ámu weírigutimáati lueí lun láfiñurun luágu,¹⁴ ába laríñagun. “Nabínirubadibu sarágu, níchuguba gíñe sarágu adügawaguni bun.”¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun.¹⁶ Dan le jáfiñurun gürígia, luágu ában le weírigutimáati jaweí jáfiñura, áni choúrujaña ligíati ában cátei láu fiñún, úaali ámu cátei lun laríñawagún.¹⁷ Ligía lachoúrurunbalin Búngiu lerérunti láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, luágu lagúnfulirubei lan lerérunti luágu wasálbarun, masáansirunga ni cáta lídaangíñe.¹⁸ Rúlaali Búngiu lerérunti woun, rúleí láfiñurun luágu, bián cátei ligía, gayáraati weménigidun luágu, ladüga siñá lan leyéejan Búngiu. Áni láu cátei ligía, sun ja ñübinbaña lun Búngiu lun jasálbarun, gayáraati janügún gurásu, gayáraati jasúbidiruni le tímatimaati luágu jasálbaruba lan áni jebéluruba siélun.¹⁹ Ágüdaja lumútu eménigini le wawáni derégüdagu, choúruñu, queísi lágüdajanun oúnguru ugúnein derégüdagu. Choúruwañu líña eménigiruni le wabíjibeí buídu buídu, ragüñu líña luágu Búngiu lídan fulásu sándutimáati siélun,²⁰ le ñíjin lubeí lebélura Jesúsu ában weíyaasu

wawágu lun ladáraruni ūma wabá. Níjein ñi guetó afádirija wawágu ligíbugiñe Búngiu queísi ában fádiri iñutimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribei Sálem, lufádiriñein gíñe Búngiu le iñutimáabe. Dan le lagíribudunbei Abrahám wuríburugugíñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni, ² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” queí mejati lurúeite lubeí Sálem, áni “darángilaü” míni lan Sálem, ítara líña lubeíti “lurúeite darángilaü” Melquisedéce. ³ Ibidiñewati ca lan lagübürigubaña, ibidiñeti gíñe ca lan linébaanfaangubaña, ibidiñewati ni cáta libügürü lagüriaajoún ni libügürü loúnwen, liyáwa Liraü Búngiu ligía, ában fádiri lun sun dan.

⁴ Aríja jumeíti luágu weírigu lán meja Melquisedéc. Abrahám guánarügü lé meja binádu wadúje, rúlumuti ában lídaangiñe cáda díisi lun lídaangiñe le lagídarubei jaweí urúeigu lídan wuríbu. ⁵ Según lilúrudun Moisés, fádirigu ja linébaanfaangu Leví lúnti jagúburajani ában lídaangiñe cáda díisi jámagiñe gürigia lídaangiñe sun cátei, láu sun jadújeñu jamá, linébaanfaangu Abrahám jáledi. ⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidíisin cátei lueí Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám, ⁷ áni siñáti lasígeneruni ni ában luágu weírigutima lan le abínijabei sügü láu le abínirúabe. ⁸ Ya wádan, fádirigu ja erésibirubalin cáda lidíisin cátei, wügüriña goúwedaditiña, ánjeinti luágu Melquisedéc, tadímurejan Lerérunt Búngiu luágu quei luágu ában le wínwangili. ⁹ Áni gayáraati laríñawagún luágu Leví jáu sun fádirigu ja linébaanfaangu ja agúburajabalin cáda lidíisin cátei guetó, luágu fáyei jamáni gíñe lun Melquisedéc lídan óra le lafáyeirunbalin Abrahám lun, ¹⁰ lugúndun lídan ában oúbaü, barü lumutiña buga Abrahám linébaanfaangu ja magüriaajoúngiñabaña lídan lúgubu dan le láfuridunbei Melquisedéc lubároun.

¹¹ Jadaangiñe fádirigu ja linébaanfaangu Leví jerésibirei Israelítagu lilúrudun Moisés, áni Aarón furúmiñetibe jafádirin. Gürigia ja afálarubalin lúrudu ligía, lun jamúga gayára lan jasálbarun le tímatimaati lueígiñe, memégeirunwali jamúga lachülaagun ámuya fádiri, máma líbe Aarón, líbe Melquisedéc. ¹² Lugúndun dan le liábin fádiri lídaangiñe

ámu adügawaguni, sáansiwati gíñe lúrudu lé buga lábugiñebesi lafádirija. ¹³ Wabúreme Jesucristu, queísi fádiri lídaangiñé ámu adügawaguni queísi Melquisedéc, sáansiguati gíñe lúrudu le lábugiñebesi lafádirija. Taríñajare Lerérunt Búngiu luágu lídaangiñeti lan ámu liraü Israél lueí Leví liábin Crístu —ában adügawaguni le úagilibeí ni ában jádaangiñé afádirijati. ¹⁴ Lugúndun subúdiwati buídu luágu jádaangiñé lan linébaanfaangu Judá liábin Wabúreme Jesucristu, áni maríñagunti Moisés ni cáta jawágu adügawaguni ja dan le ladímurejaanbei jawágu fádirigu.

¹⁵ Áni furáangutimáati le dan le liábin Jesucristu lun lafádirijan queísi Melquisedéc, ¹⁶ máma láu ában lúrudu le aríñagubei cába lan ídaangiñé adügawaguni liábin, liábin lun fádiribei lan lugúndun gabáfu lan lun labágaridun lun sun dan. ¹⁷ Niján le laríñagubei Búngiu luágu Jesucristu.

Ában fádiri amürü lun súnwandan,
le líbe Melquisedéc.

¹⁸ Gumúguati lubeíti binádu gumádi le lilúrudunbei Moisés, le lábugiñebesi jafádirijan Levítagu, lugúndun nírein lan mégeiti luágu, ¹⁹ mabáfuti lúrudu ligía lun lasálbaruniña gürígia lídaangiñé jafígoun. Lewéñeguati, níjein ában iséri aráanseruni le buítimaati, le ídaangiñebi gayára lan wayárafadun lun Búngiu.

²⁰ Áni láu ában fiñún ladügei Búngiu aráanseruni le lun Jesúsuba lan wafádiriñé. ²¹ Ja jíbiri fádirigu, máfiñurunwati dan le líchugunbei jafúlasun joun, áanjeinti luágu Jesúsu, le láubei fiñún líchugúa lufúlasun lun, laríñajare tídan Lerérunt Búngiu.

Áu Búngiu le Abúremteinbei, fiñújadina bun,
masáansiragun nubeí narítagun.

“Ában fádiri amürü lun súnwandan,
le líbe Melquisedéc.”

²² Ligía Jesúsu lubeí achoúrurubei ában darádu buítimaati lueí le furúmiñeti. ²³ Já meja jíbiri fádirigu, chülütiña agíbedagua lugúndun quei ába lán buri joúnwen, siñáti jasígirun, ²⁴ áanjeinti Jesúsu, quei moúnwen lan, másüğürünbei lifísiute queísi fádiri lúmoun ámu. ²⁵ Ligía gayára lubeí lasálbaruniña ja ayárafadubaña lun Búngiu lídaangiñé le tímatimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsu lubeíti fádiribei íñutimáati le wabúseerúbei. Jarúma ligía, úati wuríbani lídan, ni figoú, máma ligía ában jáma gafígountiña, iñurúa ligía íñutima lueí sun cátei siélu lun lañúurun lúma Búngiu. ²⁷ Mítaraanti quei jíbiri fádirigu íñutimaatiña ja gásubei jáfarun anímaalu lun jadágaragüdüniña quei sacrificisiu ságü wéyu, furúmiñé luágu jafígoun guánarügü,

lárigiñe luágu jafígoun jíbiri gürígia. Lubáragiñe líra, adüga lumúti Jesúsu sacrificisu ábanrügü weíyaasu dan le líchaagunbei lúngua lun loúnwen luágu jafígoun gürígia. ²⁸ Wüguriña ja débilibaña, jagía líchugubaña lilúrudun Moisés queísi fádirigu, ánjeinti lárigiñe lidáani lúrudu, ába láfiñurun Búngiu luágu Liraü lun ladügünü fádirime, le buídubei adügün le gumúti lun súnwandan.

Jesúsu búyei lun ában iséri darádu

8

¹ Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu, ² áni lesériwiduña queísi fádiri lídan fulásu le sándutimáabei le ladügübei Wabúreme Búngiu yágüta siélu, máma fulásu le sándutimáabei le jadügübei gürígia ya uboúagu. ³ Sun fádiri íñutimaati líchugúniwa lun líchugun edéweejani lúma adágaragüdüni lun Búngiu, ligía gásu lubeí gíñe níjein lan som cátei lúnti ladágaragüdüni Jesucristu lun Búngiu. ⁴ Lun jamúga yáñein lan Jesucristu uboúagu, mámañein jamúga fádiri, lugúndun añájeingua fádirigu adágaragüdutiña le uágubei lariñaga lilúrudun Moisés. ⁵ Fádirigu ja, jadügünü jawádigimari láu buri cátei le liyáwarügti lé buri siélubei. Subúdi wamúti luágu iyáwaü lan, lugúndun le lubábei ladügünun Moisés lúban Búngiu, ába lariñagun Búngiu lun. “Adügabeítia sun cátei queísi iyáwaü to narúfuduboun bun luágu wübü.” ⁶ Weíriguti lafádirijan Jesucristu sügü láu jafádirijan fádirigu uboúagu, queísigubeirügü buítima lan darádu le uágubei labúyeija lúma Búngiu luágu jáni gürígia fuleísei uboúagu, áni buítimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladügübei Búngiu jáma binádu wagübürigu lídaangiñe Moisés, memégeirúnwati jamúga ábanya libíaman darádu. ⁸ Magúndaatí buga Búngiu laú furúmiñeti darádu ladüga mabáfu jamá binádu wagübürigu lun jagúnculirun lúma darádu ligía. Ába lariñagun tídan Lererún.

Laríñajare Jabúreme Búngiu. Lachülüruba wéyu lun nadügün iséri darádu jáma buri linásíñun Judá lúma Israél. ⁹ Mítaraanbei quei darádu le nadügübei jáma binádu jagübürigu le wéyu le nárügüdünbalin jájabu lun naságaruniña Ejíptogiñe, magúnculirun jamúti meja nidáradun ligía, ligíati nígirunbáliña joúngua, líña laríñagun Búngiu.

¹⁰ Niján darádu le lúnbei nadügünü jáma linásíñun Israél lárigiñeme buri wéyu ligía, líña laríñagun Jabúreme. Níchugubei nugúmadin lídoun jarítagun, ábame nabürüjani tídan janígi.

Áubati Jabúngiute, jagíame nánigu.

11 Memégeirúnwabei lun larúfudajoúniwa nuágú,
maríñagunbei wügüri ni lun lidúje ni lun libíri lun jasúbudiruni
 Búngiu le Jabúremebi,
lugúndun jasúbudirubadina súngubei,
lúmagiñe le ñüraütimaabei darí lúmoun le weíritimaabei
 jádaangiñe.

12 Ferúduna nubeí wuríbani le jadügübei,
nabúlieidubei jafígoun lun sun dan.

13 Adímurejaali ligía Búngiu luágu ában iséri darádu, rúlaalírugi
líña le furúmiñeti quei binádu, áni cátei le binádujalibei,
mayúsurunwadügüyaali.

9

Lúban Búngiu to uboúaguna túma Lúban Búngiu to siéluna

1 Lídan meja le furúmiñeti darádu le ladügübei Búngiu jáma
binádu wagübürigu, rúlumuti meja gumádi joun ída lúba lan
jájuduragun lun, ñíñoun gíñe ában muna to sánduboun ya
uboúagu to lúbanboun Búngiu. 2 Ítara líña ligáburi taráanserún
muna tugúya. Múnada, ñíñein bián rúmu, lídan furúmiñeti rúmu
le gíribei Fulásu Sándu, ñíñein lébu sanúdelu lúma dábula le
ñí tubei fein to biníwaboun. 3 Ñíñoun ában bélù labádinagua
bián rúmu ligía, Fulásu le Sándutimáabei líribei libíaman rúmu.
4 Lídan rúmu ligía, ñíñein ában latárü gólu lun lágudajoún cupáli
ñi, túma bágusi to lánina darádu, gólu sun toúba. Turágeirugu
bágusi tugúya, ñíñein ában ágeidinaú gólu le gádaanbalin eígnini
le gíribei maná, ñíñein gíñe luwénwen Aarón le ájüchagubei,
lúma dübü le uágubei labürüjoúa díisi gumádi le líchugubei
Búngiu lun Moisés. 5 Tougiñe bágusi tugúya, ñíñoun jayáwa
querubínes, ja queísigubeirügubaña ánjeligu, arúfuda jamúti
querubínes jagía luágu ñíñein lan Búngiu lídan fulásu ligía.
Darúguatiña táo bágusi tugúya, le ñílubei ferúdunawa lan figoú,
lau jarüna. Mabúseerúntiwa wadímurejan sarágu luágu buri
cátei le guetó.

6 Aráanseñu líña buri cátei ítara, belútiña fádirigu lídoun
Fulásu le Sándubei ságü wéyu lun jafádirijan. 7 Ángeinti lídoun
Fulásu le Sándutimáabei, fádiri rügüñein íñutimáati ebélura ñíjin
ában weíyaasu lídan irúmu, áni dan le lebélurun, gásu lanügün
játa anímaalu lun ladágaragüdü luágu lifígoun guánarügÜ lúma
luágu jafígoun gürígia. 8 Láu cátei le, larúfudajaña Sífiri Sándu
woun luágu sun lan seríwigili lan Fulásu le Sándubei lúma
buri sun igáburi le adügübei ñi, madárarúngili üma lídoun
Fulásu Sándutimáati. 9 Sun igáburi lé meja adügüwabeí lábugiñe
binádu lidáradun Búngiu, liyáwa iséri lidáradun Búngiu wáma

le seríwigilibei lídan dan le. Cátei lé buri meja íchugúbei lun Búngiu, lúma cátei le adágáragawagüdúwabei lun lábugiñe binádu darádu, siñáti meja larúmadagüdünun jawáni ja agúñfulirubaña lúma Búngiu ítara. ¹⁰ Lúrudu buri lánina binádu darádu luágu jagúñfulirun lúma Búngiu, luáguti eígini le lúnbei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáansiruni Búngiu sun cátei láu liábin Crístu.

¹¹ Láu liábin Crístu, guetó ligía fádiri íñutimáabei luágu iséri darádu le íchugubei ubuíduni woun sügű láu le binadubei. Lúban Búngiu le ñí lubei lafádirija, buítimaatu sügű táu gó meja ubouúaguboun. úati mégeiti tuágu, ladüga máma jadüga gürígia müna to siéluboun, to uáguboun nadímureja. ¹² Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñübürigiña luágu jafígoun gürígia, dagágüda lumúti líta guánarügü. Láu ábanrügü lebélurun, ligía ibíjaali asálbaruni magúmuchaditi woun. ¹³ Inárüni luágu lábugiñe lan binádu darádu, gabáfuti meja játa bágasu jáma gábara, lúma jabáligin bágasu ñübürigiña, lé buri áturawagúbei jawágun ja marúmanbaña, lun ledéregeruniña lúma lun larúmadagüduniña boúgudigiñe jabíti ligíbugiñe Búngiu. ¹⁴ Áni ánjein ítara líña lubeí, igúbumégia gabáfutima lan líta Crístu! Lídaangiñe Sífiri Sándu le magúmuchadibe, rúguati Crístu lúngua lun Búngiu quei ában adágaragüduni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjeri aritaguni luágu wagúñfulirun lúma binádu darádu, adüga lumútiwa lun wabúseerun wesériwidun lun Búngiu le wínwani.

¹⁵ Ligía Jesucristu lubeí búyeibeí lun ában iséri darádu le adüga láalibei Búngiu wáma. Loúnwenbei Crístu lun ferúdunawa lan figoú le adügúbei lábugiñe binádu darádu, lun gíñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queísi alágan. ¹⁶ Lugúndun dan le líchugun ában gürígia lújabu árigi tuágu ában gárada luágu alágan, mabáfuti gárada tuguya darí lun lasúbudirúniwa luágu jiláali lan gürígia ligía. ¹⁷ Mebégitu gárada tuguya dan le wínwangili gürígia ligía, darí dan le jiláali. ¹⁸ Ligía gíñe láu lubeí léserun jítaü ladügüwa furúmiñeti lidáradun Búngiu jáma lumútuniña. ¹⁹ Subúdigüda lumúti Moisés sun lugúmadina lúrudu joun sun gürígia, lárigiñe, ába lanügün gamísá funátu lúma lilímun isópo, ába ladüdüragüduni lídan dúna lúma játa bágasu ñübürigiña jáma gábara, ába labájichagunun lilíburuna lúrudu jáma gíñe sun gürígia. ²⁰ Ábatí laríñagun joun. “Niján jítaü le achoúrurubalin

lidáradun Búngiu júma.”²¹ Bajígua lumútú gíñe Moisés Lúban Búngiu lúma sún buri cátei le ayúsurubei lídan jájuduragun lun.²² Según lúrudu ligía, jarúmagüdúwati sun líbe-ágei cátei láu jítäu, áni úati ferúdunawa lan figoú ánjein úa láwiyurun jítäu.

Lachíbuni loúnwen Crístu wafígoun

²³ Busénwati lubeí mejati ladágaragüdúniwa játa anímaalu lun larúmadawagüdün buri cátei le, sun líra, iyáwaü rügüñein lun cátei le ináruniti le siélubei, le ñí tubei Lúban Búngiu tímatimaatu, áni busénwati ladágaragüdúniwa jítäu le buídutimaati sügú láu játa anímaalu luágu cátei lánina siélu.²⁴ Mebéluti Crístu tídoun Lúban Búngiu tugúra to jadüga wügüríña ya uboúagu, to meja tiyáwarügüboun Lúban Búngiu to tímatimaatu siélu, siélun méme lebélura, le ñí lubei larúfudagua lúngua guetó ligíbugíñe Búngiu lun lafadírigan luágu wafúleisein.²⁵ Belúti fádiri íñutimaati le juríu lídoun Fulásu Sándutimaati ában weíyaasu lídan irúmu lun ladágaragüdün jítäu le máma líta, ánjeinti Crístu, míchaagunti lúngua quei adágaragüdúni sarágu weíyaasu lun lachíbuni figoú.²⁶ Lun jamúga ítara líña lan, gásu jamúga loúnwen sarágu weíyaasu lúmagíñe ladügün uboú. Masúseredunti ítara, lubáragíñe líra, dan le lagúncularuña lán buri dan, chülguaali Crístu ábanrügü weíyaasu, íchaagueina lúngua lun lagídaruni figoú.²⁷ Ítara quei sun lan gürígia lúnti lan joúnwen ábanrügü weíyaasu, lárigíñeme ábame jagúserawagüdün,²⁸ Ítara líña gíñe líchaagun Crístu lúngua ábanrügü weíyaasu lun lagídaruni jafígoun gürígia. Lachülüruba wéyu lun lagíribudun Crístu uboúagun, mámaalime lun lagídaruni figoú liábin, liábinba lun lanügüniña sun ja agúrabubalin liábin siélun lun jabíjini sun cátei lánina jasálbarun.

10

¹ Lilúrudun Moisés liyáwa rügüñein méja buri cátei buíti lé meja lúnbei lanügüni Crístu joun gürígia, le lásiñerubei lúrudu íchiga joun. Ja lubeíti ayárafadubaña lun Búngiu lídaangiñe játa anímaalu le adágaragüdúwabei lun Búngiu según lilúrudun Moisés, lé buri adágaragüdúwabei ságü irúmu, siñáti meja jadáriruni jabuídurun le gumúti ítara.² Lun jamúga gayára lan labuíduragüdúniña lúrudu le gumúti ligíbugíñe Búngiu, ába jamúga madügünjali lan adágaragüdúni buri le, lugúndun ja adügúbalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga joúngua láu dúru luágu figoú.³ Seríwiti adágaragüdúni buri le lun larítaguagüdúniña luágun jafígoun ságü irúmu,⁴ quei siñá lubei lagídaruni játa bágasu lúma játa gábara figoú.

⁵ Ligía laríñagunbei Crístu lun Búngiu dan le lebélurunbei uboúagun.

Mabúseerúntibu adágaragüduni ni anímaalu íchugúti bun, aráaanserügtibú ában úgubu nun lun nedéregeruni bun.

⁶ Magúndaantibu láu buri jagudún anímaalu luágu latárü bun, ni buri láu adágaragüduni lun ladáuragun figoú.

⁷ Ábatí nariñagun. “Ñúbinjadina uboúagun lun nadügünü bugúndan, Nubúngiute,

ítara queísi bürüwaňu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüduni, ni jáu anímaalu íchugúti lun, ni anímaalu gudáwati luágu latárü, ni adágaragüduni lun ladáuruni figoú, láu sun lán buri cátei le uágubei laríñaga Búngiu lídaangiñe Moisés joun gürígia lun jadügünü. ⁹ Laríñaga Crístu lárigiñe. “Ñúbinjadina lun nadügünü bugúndan, Búngiu.” Lanichigu líra, ñúbinjali Crístu uboúagun lun lagúmuchaguagüduni igáburi le ladágaragüduniwa anímaalu, lun líchaagun lúngua lewéñegua. ¹⁰ Ligía lugúndanbei Búngiu, lun larúmadagüduniwa ligíbugiñe láu loúnwen Jesucristu ában weíyaasu lun sun dan luágu wafígon.

¹¹ Sun fádirigu juríu, ságü wéyu jadügünü buri ában méme adágaragüduni, láu sun siñá lan lagídaruni adágaragüduni ligía figoú. ¹² Ángeinti Jesucristu, ában rügülñein weíyaasu líchaagun lúngua luágu figoú lun sun dan, ábatí lagíribudun siélun, ába lañúurun lueígiñe loúnwenren Búngiu. ¹³ Níjein ñi guetó agúrabaja líchuguniña Búngiu láganiñu lábugiñoun lubáfu. ¹⁴ Láu loúnwen ábanrugü weíyaasu, ába labuíduragüduniña lánigu Búngiu, le gumúti, lun sun dan. ¹⁵ Choúru lumúti gíñe Sífiri Sándu cátei méme ligía woun, lugúndun laríñaga le laríñagunbei Búngiu.

¹⁶ Darádu le lúnbei nadügünü jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi,
ábame nabürüduni jarítagunrugu.

¹⁷ Lárigiñe laríñaga.

Marítagundügyúaadináme luágu jafígon ni luágu wuríbati buri le jadügübei.

¹⁸ Dan lubeíti le ferúdunawaali figoú lun sun dan, memégeirunwali ámu adágaragüduni luágu figoú.

Lúnti wayárafadun lun Búngiu

¹⁹⁻²⁰ Ligía lubeíti nidújeñu, láu loúnwen Crístu luágu wafígon, gayáraajali wayábin ligíbugiñe Búngiu manúfudeiga. Úaaru bélu lun teréderuníwa lueí webélurun lídoun Fulásu le Sándutimáabe, le ñí lubei Búngiu, gidá lumutu Crístu

bélu tugúya láu loúnwen. Junrénti ában iséri üma woun lúmoun Búngiu, ában üma le anügübalíwa lídoun ibágari magúmuchaditi. ²¹ Jesúsu wafádiriñebi íñutimaati tídan Lúban Búngiu siélu, ²² ligía lúnti lubeí wayárafadun lun Búngiu láu tarúma wanígi, lúma láu sun wafíñen derégüdagu luágu. Jarúmagüda láaru wanígi lun masándiragun wamá woúngua láu dúru luágu figoú lárigiñe lachibúniwa, badíseijadiwa láu dúna jarúmati. ²³ Ítara méme wamá derégüdagu lídan wafíñen, masáansiragúnga, lugúndun gayára lan weménigidun luágu Búngiu lun lagúnliruni lerérunt lun líchuguni ibágari magúmuchaditi woun. ²⁴ Lúnti gíñe wáfaagun wíderaguniña wíbirigu lun jínsiñejabu jamá, lúma lun jadüguni le buídubei. ²⁵ Moún lumuti wafálaruni jémpulu jáni ja jéchubaña lun mídin jamá lídan wadámuridagun, wagía afíñetiña, le lúnbei wadüguni, lun wíchugun gurásu joun wíbirigu, guetótima láu aríja wamáni luágu yaráfaali lan luwéyuri Wabúreme Jesucristu lun lagíribudun uboúagun.

²⁶ Lugúndun ánjava afígounja láu wíchuguni wanágan luágu Crístu lárigiñe wasúbudiruni luágu ligía rügüñein lan agídarei figoú, úaali ámu luwúyeri lun wasálbarun lídaangiñe wafígoun. ²⁷ Ában rügáali cátei lun wagúrabajani, lun lagúseragüdüníwa Búngiu láu ában lanárimé igáñi, ábame wagünrichawagún jáu sun jíbiri láganiñu Búngiu lídan wátu geméti. ²⁸ Dan le ladüraaguni ában gürígia lilúrudun Moisés, áni añájein biáma o ürüwa geféentiña luágu, ába laríñagun lilúrudun Moisés luágu lúnti lan loúnwen gürígia ligía, magúdemejabuti lúrudu lun. ²⁹ Weíritimaati súfuri le jadünabej ja mebéresenbaña láu Liraü Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucristu, ligía achoúrurubalin lidáradun Búngiu wáma, le adügübalíwa jarúma ligíbugiñe. ³⁰ Subúdi wamúti ligáburi Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüduniña luágu jafígoun.” Aríñagati gíñe. “Nagúseragüdubaña numútuniña.” ³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jarítagua jumá luágu buri wéyu le sügjalibei dán meja le jerésibirubalin larúgounga luágu Jesucristu. Weíriti meja jasúfurirun lídoun meja dan ligía, áni awánda jumúti sun cátei láu gurásu. ³³ Añájein jídaangiñe, anabúatiña, ouserúa jagía wuriba ligíbugiñe guríriguaü ladüga jeíbugun lúma Crístu, jíbiri, súfuritiña ladüga gamádagua jamá jáma ja wuríbabña ouserúniwa. ³⁴ Gudémejabutün meja joun ja furísunrugubaña, ásta láu ugúndani ígiraguagüdatün júngua lun lagídarún le júmabei jueí, subúdiñu jumeín luágu níjein lan cátei júma siélu

le buítimaati, le siñábei lagidarún jueí. ³⁵ Guetóti, meféridera jumeín lubeíti jeménigi luágu Búngiu, lugúndun jerésibiruba lan ában oúnwenbun afáyeiragülei siélu. ³⁶ Gagúraasun jumá, lun lárigiñeme lan jawánduni asúfuriruni queísi labúseerun Búngiu, gayára lámuga jerésibiruni le lúnbei líchuguni Búngiu jun, siélu. ³⁷ Taríñajare Lerérunt Búngiu luágu lagíribudun Crístu uboúagun. Málujali ánjein ñübin le lúnbei liábin, madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu lafíñerun nuágu, líña laríñagun Búngiu.

Ánjein leféridera lafíñen, magúndaanbadina lúma.

³⁹ Wagía, mítaraanbádiwa queí gürígia ja eféridirubalin jafíñen luágu Búngiu, ába jeféridirun, wasígiruba láu sun wafíñen luágu daríme woúnwen, belú támuga wawáni siélun.

Luáguti afíñeni

11

¹ ¿Cáteigi afíñenibe? Afíñeni, achoúrurúni le gumúti luágu wabíjibeí lan le wagúrabubei, lúma wachoúruruni le gumúti luágu nírein lán buri cátei láu sun maríjin wamáni. ² Niján luwúyeribeí meja jafíñen jádaangiñe binádu wagübürigu luágu Búngiu, ába lagúndaarun jáma.

³ Láu wafíñen, wasúbudirei luágu Búngiu lan adügübalin uboú láurügü lerérunt, le lubeíti uboú le waríjubei guetó, máma lídaangiñe cátei lé meja arijuabei ladügüwa.

⁴ Láu lafíñen Abél, dagágüda lumúti le labúseerúbei Búngiu sügü láu le ladágaragüdübei Caín, ligía lerésibirunbalin Búngiu queísi richáguati, ába lerésibiruni ladágaragüdü lun. Láu sun lubeíti jilá lan Abél, nijángua luwúyeri lafíñen queísi jémpulu woun.

⁵ Láu lafíñen Enóc, lanügüwa siélun moúnwenga, áni madárirúnwati lúgubu lugúndun barü lani meja Búngiu. Áni taríñajare Lerérunt Búngiu luágu, luágu lubáragiñebi lán meja lanügün Enóc, gúndan lan Búngiu láu ya uboúagu. ⁶ Ánjeinti wagía, siñáti gúndan lan Búngiu wáu ánjein mafíñen wabeí luágu, lugúndun lun wayárafadun lun, gásu waffíñerun luágu níjein lan áni líchuguba jafáyeiruája ja áluajabalin.

⁷ Láu lafíñen Noé, dan le lawísarunbalin Búngiu luágu ladágaruba lan ában oúnwenbun gúnran, láu sun maríjíñajagili lan gúnran, ába ladüguni le lubeíbei Búngiu, ába ládaragun ában oúnwenbun ugúnein lun lasálbarun jáu lufámilian. Arúfuda lumúti lafíñen Noé oúnwenbun mafíñeni le jawágubei jíbiri gürígia uboúagu. Ába lanügün Búngiu Noé queísi ában wügüri richáguati lúma, luágu lafíñen.

⁸ Láu lafíñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei láni lan, ába ladügüni le lubeíbei Búngiu, ába láfuridun lageíragiñe, ibídiñounga lun jalíñounbei lan. ⁹ Ába laganoún lídan iséri fulásu ligía, láu sun teréncha lan ñi, ladüga lafíñen luágu lerérun Búngiu lun luágu líchugubei lan fulásu ligía lun. Laganoúa tídan míuna adügütu láu jára anímaalu, ligía méme gíñe jadügübei Isáac, le liraü, lúma Jacób, le libári, ladüga jalágaante lan fulásu ligía lúmagiñe Búngiu. ¹⁰ Adüga lumúti Abrahám sun líra ladüga agúrabaja lan lebélurun lídoun lubuídun ubúrugu siélu le ladügübei Búngiu, le adúrarubei lun sun dan.

¹¹ Láu gíñe tafíñen Sára, láu sun meja weíyaaru tan lun tagáraüdün, resíbi tumúti ubáfu lúmagiñe Búngiu lun tagáraüdün, garaütu ában irájü ladüga tafíñerun luágu lagúñfulirubei lan Búngiu le laríñagubei. ¹² Láu sun lubeíti weíyaali lan Abrahám lun garaü lan, ñübinti lun ganébaanfaangubei lan sarágu, quei warúguma ja siélubaña, quei gíñe lágu buri ságoun le lárubei béya le siñábei labájüdün.

¹³ Jiláguatiña Abrahám jáma lirajüñü láu jafíñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúñfuliruba lan Búngiu láu lerérun, ába jagúndaaragun luágu. Subúdi jamúti luágu máma lan jageíra uboú le, jayábin rügüña ebéluja queísi teréncha ya. ¹⁴ Gürígia ja arítagubaña ítara, arúfuda jamúti luágu jáluaja mémeña lan ában ageíraü lun jageírame. ¹⁵ Lun jamúga fulásu lan le ñígiñe lubeí jáfurida ageíraübei le jáluajabei, gayáraayati jamúga jagíribudun járigoún ñíjin. ¹⁶ Ában buga ageíraü buítimaati jabúseerúbei, ageíraü le siélubei. Ladüga níjein lan jarítagun luágu cátei le lánina siélu, ligía úa lubeí nibúsigari lan Búngiu lun Jabúngiutebei lan, ába laráanserun ában fulásu joun siélu.

¹⁷ Dán meja le loúchagunbalin Búngiu Abrahám láu laríñagun lun lun láfaruni liraü le Isáac jilágubei lun ladágaragüdüni lun, afíñe mémeti luágu Búngiu, rúguatí yebe lúngua lun ledéregeruni liraü le ábanrügüti, ¹⁸ láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac. ¹⁹ Subúdirügü liñáali Abrahám luágu gabáfu lan Búngiu ásta lun lásaaragüdüni Isáac lídaangiñe oúweni, áni ítagaraüyebe ladügüni Búngiu láu líchuguni Isáac láridoún lun Abrahám lubáragiñe yebe láfaruni.

²⁰ Afíñeti Isáac luágu ladügübei lán Búngiu le laríñagubei, ába laríñagun joun lirajüñü ja Jacób lúma Esaú luágu labínirubaña lan Búngiu lídan dan le lúnbei liábin. ²¹ Laú lafíñen Jacób, dán meja le louwe lan, biní lumuti cáda ában jádaangiñe lirajüñü José, ába ladímurejan luágu luweírigun Búngiu, ragüñu luágu

lígiri lubádun. ²² Láu lafíñen José, lubáragiñe loúnwen, aríñagati luágu jáfuriduba lan Israelítagu Ejíptogiñe, aríñaga ligía lun janügünü lábu jáma dánme le jígoruni fulásu ligía.

²³ Láu jafíñen lagübürigu Moisés, dan le lagüria joúnbei, ába jará muduni luágu ürüwa játi, ladüga jaríjin luágu buídumeraü lan, janufudetiña lueí lúrudu le líchugubei urúei lun jañáradawagüduniwa wügüríñia irájüñü. ²⁴ Láu lafíñen Moisés, dan le wügüríjali, májati lun lanügüniwa queísi tiraü liraü lurúeite Ejípto, ²⁵ jímein lumúti lasúfurirun jáma lánigu Búngiu lubáragiñe laganoún buídu tídan lúban urúei, to lánina figoú. Subúdi lumúti luágu madúra lan luwúyeri ugúndani ligía sarágu dan. ²⁶ Rísitimaati lasándiragun lúngua láu lasúfurirun ünabuni lueígiñe Crístu le lúnbei liábin, sügü láu laganoún lídan sun lirísin Ejípto, lugúndun luágu afáyeiruajaü le lúnbei líchuguni Búngiu lun, líchigei larítagun. ²⁷ Láu lafíñen Moisés luágu Búngiu, ába lígoruni Ejípto, manúfudeiga lueí ligáñi urúei, reídeiti derégüdagu lídan larítagun camá jamuga aríagu líña lun Búngiu le marijínbei.

²⁸ Láu lafíñen Moisés ladügei fédu le gíribei páscua, ába loúnajan abájichaguei tubéneri jában Israelítagu láu jítäu lun dánme lan le lásügürün ánjeli le lánina oúweni, máfarun lámuga ni ában jaraü Israelítagu le íbugañaü. ²⁹ Ladüga jafíñen Israelítagu luágu Búngiu, ába ladügün Búngiu üma joun lídaangiñe dúna le gíribei Barána Funáti, lun gayára lan jásügürün eíbugeina camá jamuga múa le mábeiti. Dánti le jabúseerúnbei Ejíptona lun gíñe jásügürün quei jagía, ába ladáuragun dúna jáu, ába jañáradagun.

³⁰ Láu jafíñen Israelítagu luágu Búngiu, ába jamácharun geyéguá láu lubárierun ubúrugu Jericó ságü bináafin luágu sédü wéyu, ába leíguadun loúba lubárierun ubúrugu ligía. ³¹ Afíñetu Raháb, gó meja jóru, luágu Búngiu, ába tarámuduniña Israelítagu aríajatiña túbiñe. Ladüga cátei le, máfarúnwatu lídan le jáfarawagún magáambaditiña lun Búngiu lídan fulásu ligía.

³² ¿Cába ámu cátei naríñaga? Loúguabei dan nun lun nabürüjan luágu Gedeón, Bárac, Sansón, Jefté, Davíd, Samuél luma jawágu profétagu. ³³ Láu jafíñen, siríguatiña buri fulásu, agúmadija jagía buídu, íderagua lumútiña Búngiu queísi laríñaguni joun. Darú lumuti Búngiu jayúma liñún jaweí, ³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jéredun ja mérebaña, ñübintiña lun gabáfubaña lan wuríburugu, ába jásiiragúniña jáganíñu. ³⁵ Ñíñanu würíña ásaaragüdürüwatiña jadújeñu lídaangiñe oúweni joun.

Añájein gíñe jíbiri, jiláguatei lídan luweírin asúfuriruni ladüga jamájan jíchuguni janágan luágun Búngiu lun jamúga

gayáraabei lan jígirawagüdüniwa. Jímein jamúti jáfarawagún jilágubei luágu líri Búngiu lun gayáraabei lan jásügürün lídaangiñe oúweni lídoun ában ibágari le buídutimaati siélu. 36 Jíbiri, áfagatiña léjerajoún jáu, abeichúni, agürawagúni láu güríngüri, lúma adaürüni furísunrugu. 37 Áfarawagúatiña láu dübü, asiarajoúatiña jamídan jámagua, oúchawagúatiña lun jígiruni Búngiu, áfarawagúatiña táu efeín, anúrajatiña jábiñegiñe, ába jeréderun eíbugañajadügü, darúgu joúgua láurügü jára mudún lúma jára gábara, fugiábugu, láu idíjeri, oúserúa wuríba. 38 Gürígia buri jagía ja ní lubei uboú madüna lumútiña, eíbugañajadügü jána buga lídan buri fulásu mageírawati, áraabu, lídan buri lilúlun dübü weínamuti lúma lídan buri jýyu le múaruguti. 39 Sun jagía, láu sun buídu lan affíñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladüga machülü lan Wasálbaragüle uboúagun lídan jadáani, 40 labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Crístu joun lánigu.

12

Rúwamei waríjin luágun Jesúsu

¹ Ítara líña meja jagáburidun sun jíbe gürígia jagía lídan dan le sügüjalibei, láu jafíñen luágu Búngiu. Ában jémpulu jagía woun lun ítara méme lan wagáburi. Ibágari le, queísigubeirügü ában eíbaaguni, gidáwamei sun le erédejabaliwa wawáriua, lúma figoú le agüragubalíwa, adüga wameí eíbaaguni le wabáragiñebei láu gurásu, láu sun wafíñen luágu Jesucristu. ² Rúwamei waríjin luágun Jesúsu, le ídaangiñebei liábin wafíñen, le gíñe abuíduragüdübalin wafíñen le gumúti. Súfuriti Jesúsu luágu gurúwa, mebérresenga ligía láu nibúsigarídüna lan luwúyeri oúweni ligía, lugúndun subúdi láni luágu lásun lánme lasúfurirun, lagúndaaruba lan, ába lañúurun lueígiñe loúnwenren Búngiu.

³ Lídan le joúchawagúniwa, samína jumá lubeíti luágu láni Jesúsu jémpulu, luágu lawánduni sarágu súfuri jámagiñe gafígoountiña, ligía mabúchadalá lubeí juágu, máburujan ligíame jarüna. ⁴ Machülügidün lúmoun oúweni lídan jageíndagun lúma figoú queí ligía. ⁵ ¿Bulíei jumásan dimúrei le líchugubei Búngiu jun queísi lirajüñü? Láriñajare tídan Lerérunt.

Niraü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi, máburujan ligíame barüna dan le ladeínjan bun.

⁶ Lugúndun arúfudajati Búngiu joun ja jínsiñebaña lun, beílumutiña gíñe ja lerésibirubaña queísi lirajüñü.

7 Áfaga jumeí abeichúni lúmagiñe Búngiu, lugúndun loúseruñadün queísi lirájüñü. ¿Níjein funági isáani mabeíchun lumúti lúguchi? 8 Ánjaün mabeíchun lan Búngiu, queísi labeíchuniña sun lisáanigu, máamarügü jíña lisáanigu ja tímataatiña, bástadi jugúya. 9 Dán meja le ñübürigidiwa, beíjamutíwa meja wagübürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan. 10 Jabeíchuniwa meja wagübürigu ya uboúagu lúnrügü murúsun ibágari le, lun jagüriajaníwa buídu según jabáfu, áanjeinti Búngiu, lun waságarun buíti lídaangiñe labeichúniwa, labeíchawa lun ladügüníwa lun buídu wamá ítara quei buídu lan. 11 Inárüni luágu úa lan abeichúni áuti wagúndaara lídan le werésibiruni, gárirügüti woun, áanjeinti ja afúrendeirubaña lídaangiñe abeichúni, ibíjatiña ában ibágari lánina ísuruni lúma darángilaü lídaangiñe abeichúni ligía, lárigiñe.

Mamájara wamá lun Búngiu

12 Rújuma lubeíti iséri érei lun jarüna le bucháalibei uágu lárigi asúfuriruni, lúma lún buri jígachürügü le débilijalibei, 13 áluaja jumeí üma le surúbei. Mígira jumá lóbuna chugéguaü lídan üma lueí jeíguadun ja débiligiñabaña lídan jafíñen, íderaguarügü jumáña lun joúdin jabáruaguóun lídan jafíñen.

14 Joúcha jumá lun lídan jumá darángilaü jáma sun gürígia, abágarideina ában ibágari le jarúmati, lugúndun le wíyebeti igáburi, siñábei lachülürün lúmoun Búngiu. 15 Toúnigi jumá lueí níjein lan ában jídaangiñe meíbugunti buídu lúma Búngiu, ábame leférideragüduni jafíñen jíbiri queísi ladügünü jíduru gífti le abiñaragubalin sun le agúurubei luágu. 16 Úa la ni ában jídaangiñe agámariduti mamárieidunga, míchugun ligíame mebáreseni luágu cátei le lánina Búngiu. Ligía cátei le meja ladügübei Esaú, ába lalúguruni lirícha queísi ibugañaü luágu ában asíedu eígini. 17 Subúsiti jun luágu lárigiñe lán buga ladügünü, buséngili yebe lerésibiruni labinirun lúguchi queísi ibugañaü, mabíjin láali, siñáali lasáansiraguni lúguchi le adüga láalibei láu sun layájuajan Esaú láu igárigu.

18 Jugúya, mayárafaduntün lun cátei le gayáraabei jasándiruni queísi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wübü le Sión, le durúngubei láu wátu geméti, le ñí lubei níjein lán meja lubúriga lúma luríbouga, 19 magáambun jumúti gíñe lamúri fídu lúma lumálali Búngiu le adímurejabei joun. Ja agáambubalin umálali ligía, ayúmuraguatiña lun jebé lan ladímurejan joun. 20 Jadügünbalin líra lugúndun luweírin janúfude lueí lagúmadijan Búngiu, ladüga laríñajare. “Le íchuguti lugúdi luágu wübü, afarúalá jilágubei láu dübü o táu lan

ában efeín, íbini ában lan anímaalu”, ladüga fulásu ligía, níjein Búngiu ñi. ²¹ Weíriti lanúfunejabu cátei le jaríjubei, darí lun lariñagun Moisés guánarügü. “Nadádagaruña láu anúfudei.”

²² Ánjein jugúya, lábugiñe iséri darádu, ñübinjadün lun cátei weíriti sügü láu le únbei jayábin já buga lábugiñebaña binádu darádu. Yaráfaadün lun wübü Sión le siélubei, lílanaadün lubúrugute Búngiu le wínwanbei, le ában Jerusalén le siélubei, le ñí lubei jagánawa sun ánjeligu, ja ájuduragubaña lun jíchugun uweíriguni lun Búngiu. ²³ Lídaañadün jadámurin lirajüñü Búngiu ja bürüwañubaña íri siélu. Lun Búngiu le agúseragüdübaliña sun gürigia jayárafada, lídaañadün ában jáma ja oúwegubaña ja buídubaña igáburi uboúagu, áni buíngüda lumúti Búngiu lubuídun jagáburi siélu. ²⁴ Ñübinjadün lun Jesúsu, le búyei lun iséri darádu, bajíwaguaadün láu líta Jesúsu lun lachibúniwa jifígoun, le ábanbei cátei weíritimaati sügü láu le labúseerúbei líta Abél – lun lagúseragüdüniwa Caín luágu láfaruni Abél jilágubei.

²⁵ Ligía mamájara jumá lubeí jagáambuni Búngiu. Meséfujaña ligía meja Israelítagu ja mebéresenbaña láu Búngiu, dán buri meja leréruntbei joun lídaangiñe Moisés, le ábanbei lílana uboú, gúbume siñá lan weséfurun áanjein wíchiga wanágan luágun Búngiu lídan le ladímurejan woun lídaangiñe Liraü, le lílana siélu. ²⁶ Jingígüda lumúti meja lumálali Búngiu uboú lídan dan ligíra, áanjeinti guetó laríñajare. “Nánjingichagüdübeiya mámarügü uboú, ásta gíñe siélu.” ²⁷ Dan le laríñagun “nánjingichagüdübeiya”, míni lan luágu lagídarúba lán buri cátei le márügündünbei luágu ébuu derébuguti, ábame leréderun le siñábei lánjingichúniwa. ²⁸ Arúejani le líchugubei Búngiu woun siñáti lánjingichún. Rúwama lubeíti eteíngiruni lun Búngiu luágu líra, judúgua wamá lun láu inébesei lúma gúñfuli queísi labúseerun, ²⁹ lugúndun lagúmuchaguagüdübeí Wabúngiute sun cátei le mabuídunti queísi lagúmuchaguagüdün wátu geméti cátei.

13

Ída lúba lan wagúndaaragüdüni Búngiu

¹ Jínsiñegua méme jumá júmagua queísi idújeñu lueígiñe Je-sucristu. ² Mabúlieida jumeí lun jebélaagüdüniña achülürütiña júbiñoun láu ugúndani. Sarágu jáña gürigia, rújaña ubáraü joun ánjeligu láu jadüguni cátei le, ibídiñoun joun.

³ Jarítagua jumá jawágu adaürütiña, queísigubeirügü jamúga gíñe jadaürüña lan jáma. Jarítagua jumá jawágu ja oúserúabaña wuríba, quei níjein lan gíñe ában úgubu juágu le gayáraati lasúfurirun.

⁴ Buítí cátei lun jagámaridun, áni lúnti júmagua jumá darí lun joúnwen. Ja asáansijatiña jámari lagúseragüdübaña Búngiu, lagúseragüdübaña gíñe ja adügübaña salúfuri.

⁵ Míchiga jumeí jínsiñejabu luágun seínsu, gúnda jumá láu le júmati, lugúndun líchugubei Búngiu le jemégeirubei jun. Ariñagaali. “Natoúnigirubadibu, mígirun nábume.” ⁶ Gayáraati lubeíti waríñagun láu afíñeni.

Nabúreme Búngiu íderagubalina, manúfudebadina.

Siñáti jadügün gürígia ni cáta náu ánjeingubeírügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu láni Búngiu jun, samína jumá luágu buítí le ñübinjalibei lídaangiñe jabágari, falájumei jémpulu le láni jafíñen.

⁸ Masáansiragunti ligáburi Jesucristu, ligía meme gúñaarü, ugúñe, lúma súnwandan. ⁹ Mafálara jumá arúfudajani le ámuñgueinearügti lueí le larúfudajabei Jesúsu. Resíbitá wawáni érei lúmagiñe línsiñejabu Búngiu, siñáti terésibirun wawáni ni cáta lúmagiñe lúrudu buri luáguti eígini. Igáburi ligía, miábinti lun ladügüba lan buítí joun ja afálarubalin.

¹⁰ Wagía afíñetiña luágu Crístu, ibíjatiwa gíñe ában latárü, le guruwabei le uágubei loúwe Crístu luágu wafígoun. Ja asígirubaña láu binádu jagáburi juríu, siñáti gafánran jamá lídan le líchugubei loúnwen Crístu. ¹¹ Jafádirin juríu le íñutimaabei belúgüda lumúti játa anímaalu lídoun Fulásu Sándutimaati quei adágaragüdüni luágu figoú, jágubu anímaalugu jagía, boúgudi lueí ubúrugu lágudúa. ¹² Ítara líña gíñe jiláti Jesúsu boúgudi lueí ubúrugu lun lachíbuni wafígoun láu líta guánarügü. ¹³ Queímóun lubeíti lun Jesúsu, boúgudin lueí fulásu, boúgudin lueí binádu igáburi, asúfurireína únabuni luágu líri queísi lasúfurirun wawágu. ¹⁴ Lídan uboú le, úati ni ában fulásu wáma le adúraruti lun sun dan, wáluajañein ubúrugu le lúnbei ñíjinbadiwa lan lárigiñe ibágari le. ¹⁵ Ligía lúnti lubeí wíchugun eteíngiruni lun Búngiu súnwandan lídaangiñe Jesucristu le wafádiriñebi. Eteíngiruni ligía, ligía luwúyeribei adágaragüdüni le labúseerúbei Búngiu wámagiñe. ¡Rúwama lubeíti uweíriguni lun láu wayúma! ¹⁶ Mabúlieida jumá jadügüni le buídubei, lúma lun jafánreinruni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúnigirubarun juwáni, áni quei jasúbudiruni, gásu jagúserun ligíbugiñe Búngiu luágu jatoúnigirunün. Joúcha jumá lun medéreragüdü jumáni jawádigimari, lugúndun mabuídunbei jamúga giñe líra jun.

¹⁸ Ayúmuragua jumá lun Búngiu wawágu, choúru wamúti luágu darángilañu líña lan warítagun quei busén wabeí buídu lan woúserun lídan sun cátei. ¹⁹ Amúriajatina júma lun jayúmuragun lun Búngiu lúnya gayáraabei lan nídin aríjaün madíse.

Abíniruni buri lúma lagúmujoún buri mábugaü

²⁰ Ayúmuraguatina lun Búngiu, le íchugubalin darángilaü, le gíñe ásaraagüdúbalin Wabúreme Jesucristu lídaangiñe oúweni, lun líchuguni sun ubáfu le busénwabei jun, lun jadügünü lugúndan. Wabúreme Jesucristu ában le atoúnigiruti lumútuniña buídu queísi ában atoúnigiruti mudún. Ítara líña ladüga líta, le achoúrurubalin lidáradun Búngiu, le adúrarubei lun sun dan, wáma. ²¹ Ayúmuraguatina gíñe lun Búngiu lun luwádigimardun jídan, lídaangiñe Jesucristu, lun gayáraabei lan jíchugun ugúndani lun. ¡Uweíriguni lun Crístu lun sun dan! Ítaralá.

²² Nidújeñu, ayúmuraguatina jun lun jerésibiruni dimúrei le abürüja náalibei jun tídan murúsun gárada to. ²³ Niján ában ugánu jun— ifuríjali wadúje Timotéo furísunrugugiñel Áanjein ñübin yájoun, nanügübei númagua dánme le nídin aríjaün.

²⁴ Mábuga níña joun sun tábutigu ligílisi lúma joun sun jíbiri wadújeñu lídan wafíñen. Mábuga jáña wadújeñu ja Itálianu jun.

²⁵ Binílaün Búngiu sun jugúya, ítaralá.

LIGÁRADAN SANTIAGO

Labürijan Santiago joun tílana ligílisi buri ja chagágubaña

¹ Áu Santiago, esériwiduti lun Búngiu lúma lun Wabúreme Jesucristu áu, mábuga níña joun ja jadügawagubaña dúusu lirajüñü Israél ja chagágubaña lídan sun uboú.

Subúdi le ñübinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü oúchawagúni. ³ Subúdi jumáali luágu dan lan le loúchawagún jafíñen, furéndeitimaatün gagúraasuni. ⁴ Ítara líña lubeíti, maríbadalá jarítagun lueígiñe joúchawagún, lubáragiñe líra, ígira jumeí oúchawagúni ligía lun líchugun lánwoun jugúraasun, lun loústarun lubuídun jigáburi, úouga mégeiti luágu.

⁵ Dan le ibídiñe lan jun cába lan jadüga lídan ában lénreeengunga, amúria ja jumá lúma Búngiu, ábame lasúbudiragüduni jun cába lan jadüga. Rúlumuti Búngiu subúdi le jamúriajan lánigu lúma joun, quei jamúriajani, maríñagunga ni cáta joun luágu. ⁶ Lúnti jamúriajan láu afíñeni luágu líchugubei lan Búngiu le jemégeirubei jun, máma láu liloúguan afíñeni, le loúguia tafíñen, ítara líña quei ában lugúdi barána le lanügübeí garábali lueígiñe ában oúbaü lun luágun ámu. ⁷ Gürígia le medéraaguagüdünti lafíñen, marítagualá luágu libíjuba lan ni cáta lúmagiñe Wabúreme. ⁸ Lugúndun gürígia le afíñe líñabei, mafíñen, siñáti lasígirun ában igáburi le derégüdaguati luágu ni cáta.

⁹ Idújei le gudémebei, majírudalá luágu, gúndaalá luágu irísini le siélubei lubá. ¹⁰ Léti idújei le rísibei, manáangualá lúngua luágu, gúndaalá luágu larúfuduni Búngiu lun luágu mebégi lan lirísin lun ni cáta lídan cátei le lánina siélu. Lugúndun ítara líña rísti quei lufúlurin jíduru, le siñábei ladúrarun. ¹¹ Dan le láfuridun wéyu, ába lásüdün sarágu, ába lásaürün jíduru, ába leíguadun lufúlurin, ába lagúmuchun lubuídunméraü. Ítara lúba gíñe rísti. lachülrüba wéyu lun loúnwen, ábame lígiruni sun láfaagun luágu seínsu.

Oúchawagúni lúma adúndeijoúni lun wuríbani

¹² Gúndaati gürígia le awándubalin oúchawagúni láu gurásu, lugúndun dánme le láfuridun láu buídu, libíjubei ibágari magúmuchaditi le uágubei laríñaga Búngiu luágu líchugubei lan joun ja jínsiñejabúbaña lun, queísi ában afáyeiruajaü, queísi ában rídi. ¹³ Dan le lebélurun lun ában gürígia lun ladügün

cátei wuríbati, marítagualá luágú Búngiu lan ádarubalin cátei ligía lídoun, lugúndun mebéluti lídoun Búngiu lun ladügün wuríbani, máda lumúti gíñe jádoun gürígia lun jadügüni. ¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladügün le wuríbabei. ¹⁵ Lídaangiñe buri luríban ayúmajani le, liábin figoú, ában ibágari lánina figoú barüti oúweni.

¹⁶ Nidújeñu jínsiñetiña nun, mayéedagua jumá júngua arítagua luágú lúmagiñe lan Búngiu liábin wuríbani. ¹⁷ Lubáragiñe líra, sun buíti le íchugúbei woun, le úabei mégeiti luágú, lúmagiñe Búngiu le adügúbalin lilámpuna siélu liábin. Búngiu súnwandan ligía méme lan, úati sáansiguaü lídan quei lilámpuna siélu le gabúlubudadíbei. ¹⁸ Ligía lugúndaabei lun ladügüniwa lirajüñüme láu waffíerun luágú lerérun le inárüníbei, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladügübei.

Ligáburi agúñfuliruni lúma Búngiu le áubei lagúndaara

¹⁹ Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagánidun, ²⁰ lugúndun gürígia le gáñíbei, madügün lumúti le áubei lagúndaara Búngiu. ²¹ Ígira jumeí lubeíti sun iwíyení lúma luríban igáburi le jídaangilibei, resíbi jumeí ugánu le bunáwaalíbeí tídan janígi láu ünabuni, lugúndun gabáfuti ugánu ligía lun lasálbarunun juwáni.

²² Adüga jumeí le taríñagubei Lerérun Búngiu, máma lun agáambarügü jumáni. Ánjein jarítagua jubeí luágú buídurügü lan lúnrügü jagáambuni Lerérun Búngiu, jeyéedaguña júngua. ²³ Le agáambarügúbalin, madügün lumúti le lubeíbei, ítara líña quei ában gürígia le aríagubei lúngua tídan ában isúbusein. ²⁴ Aríja lumúti ída líña lan, áni quei lídin, ítara labúlieiduni ída líña lán buga. ²⁵ Ánjeinti gürígia le jéchubei atúriaiei Lerérun Búngiu le úabei mégeiti lídan, áni furáangugüda láwa lueígiñe figoú, mabúlieidun lubeí le lubeíbei, adüga lumúti le laríñagubei Lerérun Búngiu áni gúndaati le tímatimaati.

²⁶ Gürígia le jarítagubei luágú gúnfuli lan lúma Búngiu áni siñá lumutu liñéñe erédera, leyéedaguña lúngua áni úati ju lan ligáburi lagúñfulirun lun ni cáta. ²⁷ Niján agúñfuliruni le jarúmabei, le áubei lagúndaara Wáguchi Búngiu. lun wíderaguniña magübürigujaaña jáma würiña ja jiláaña úmari lídan jadíjeri, lúma lun madáseirun wamá láu buri cátei wuríbati le láni uboú le.

¹ Nidújeñu, queísi jugúya lan gürígia ja afíñebaña luágu Wabúreme Jesucristu le weírigubei, moún lumuti ámu lan janügün ában gürígia jaweí jíbiri. ² Queí buri jamúga, lun jamúga lebélurun ában wügüri lídoun jadámurin láu bágü gólu túma anáanguni finutu, belú ligía giñe ában gudémeti táu anáanguni juchécheeru, ³ ánjaün eténira lun le finubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebei. “Amürü, reídeibá rára, o ñurúba ya múarugu”, ⁴ janügüña ában gürígia ámu lueí le ában, áni jagúseragüdüña láu luríban arítaguni.

⁵ Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lídan uboú le lun rísi jamá lídan jafíñen, lun giñe jerésibiruni aruéijani le uágubei laríñaga Búngiu joun ja jínsiñejabúbaña lun luágu líchugubei lan joun queísi jalágaante. ⁶ Ánjeinti jugúya, rújumutiña gudémetiña lídoun busíganu. ¿Máma funági ríslitiña ja wuríbabei joúserunün, áni barüjamaün adúruujeina ligíbugiñoun lúrudu? ⁷ ¿Máma jagía adímurejababaña wuríba luágu líri Crístu, le inébebei jun, le únbei jedéregeragua júngua?

⁸ Ánjein inárüni lubeí luágu gúnfuli jumáni líñun-ägei lúrudu queísi taríñaguni Lerérunt Búngiu. “Jínsiñelá gürígia bíledi bun quei bínsiñegua búngua”, buíti jadüga. ⁹ Ánjein máma lubeí ában láu janügüniña sun gürígia, jadügüña figoú, dürürgua jumúti lilúrudun Búngiu. ¹⁰ Lugúndun ánjein agúnfulira ában gürígia láu sun lúrudu, ígira lagúnfulirun ában lídaangiñe, gadúnrunti luágu ladüraaguni sun lugúmadin lúrudu. ¹¹ Lugúndun Búngiu méme le aríñagubei. “Madügabá salúfuri”, aríñagati giñe. “Máfarajabá.” Ánjein lubeíti madügün gürígia salúfuri, áni áfarajati, mídinti láu le lubeíbei lúrudu. ¹² Jugúya, lúnti jadímurejan, agáburida jugúyame queísi lúntiña jagúserawagüdüñun láu lúrudu le furáangugüdabaliwa lueí lubáfu figoú. ¹³ Ja magúdemejabubaña joun ámu, magúdemejabubei giñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáani agúseruni.

Afiñeni lúma wadágimanu

¹⁴ Nidújeñu, ¿cásan ju lan laríñagun gürígia luágu afíñe lan luágu Crístu ánjein madügün ni cáta lun larúfuduni? ¿Gayáraati funági lasálbaruni afíñeni ligía? ¹⁵ Queí jamúga guetó, níjein ában idújei wügüri o würi emégeiruti anáanguni lúma eígini, ¹⁶ laríñaga ában jídaangiñe lun. “Buídulá lídin bun, darúguabá boúgu, jou amürüme,” áni míchu lumúti le lemégeirubei lun, ¿cági ju lan líra? ¹⁷ Ítara líña lasúseredun lúma afíñeni.

ánjein marúfudun jamá gürígia láu cátei le jadügübei, afíñeni lábuguarügü, ítara líña quei ában cátei jiláali.

¹⁸ Fágua níjeinbei aríñaguti. “Amürü afíñetibu, áu adüga numúti le buídubei.” Áu Santiágó aríñagatina lun idújei ligía. “Arúfudabeíti bafíñen nun boúgudin lueí buíti le badügübei, narúfudeime nafíñen bun láu buíti le nadügübei.” ¹⁹ Afíñetibu luágu ában rügüñein lan Búngiu, buíti badüga, afíñetiña gíñe máfianu luágu líra, adádagara jagía láu anúfudei lueí. ²⁰ ¿Májatibu bafíñerun, ibídiouqua táu amürü le, luágu jiláñu líña lan lafíñen gürígia ánjein marúfudun lan láu le ladügübei? ²¹ Resíbi lumúti Búngiu Abrahám, le binádu wáguchi, queísi richáguati ligíbugiñe luágu le ladügübei dan le lánjarun lún yebe láfaruni Isáac le liraü jilágubei queísi adágaragüduni lun Búngiu. ²² Aríja báali luágu arúfuda láni Abrahám lafíñen láu cátei le ladügübei, áni ñübinti lafíñen lun dayárubei lan láu cátei le ladügübei. ²³ Ítara líña lagúncularun le bürüwañubei tídan Lerérunt Búngiu. “Afíñeti Abrahám luágu Búngiu, áni luágu lafíñen, ába lerésibiruni Búngiu queísi wügüri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáali lubeíti, luágu resíbi láni gíñe Búngiu wügüri luágu buíti le ladügübei, úara lúma lafíñen, áni mámarügü luágu lafíñen. ²⁵ Ligía méme meja asúseredubei tun Raháb, to joru lídan dan le sügüjalibe. resíbi lumútu Búngiu queísi richáguatu ligíbugiñe dán meja le tarúfuduni tafíñen luágu láu cátei le tadügübei—safá tumútiña loúnagülegu Josué, ába tíderaguniña lun jagíribudun lídaangiñe ámu üma. ²⁶ Ítara quei jiláñu líña lan úgubu ánjein úa tubeí uwáni lídan, jiláñu líña gíñe jafíñen ánjein marúfudun jumá láu cátei buíti le jadügübei.

3

Lúnti wabúgurunun wañéñe wayúmulugu

¹ Nidújeñu, moún lumuti añájein lan sarágu jídan ja adáagutiña joúngua arúfudajatiñame lánina Lerérunt Búngiu lugúndun subúdi jumáali luágu wagía lan le arúfudajabe, derégüdatimaabe lan wagúserawagüdün. ² Sun wagía adügatiwa cátei charáti, ánjein níjein lubeí ában gürígia madügünti ni murúsun charáti lídan le laríñagubei, ában wügüri buíti le gumúti ligía, le gíñe gayáraabei labúguruni sun lúgubu. ³ Dan le wagürüni jayúma anímaalugu lun jagáambuniwa, gayáraati wabúguruni sun jágubu. ⁴ Aríja jumoún buri gíñe ugúnein, láu sún buri weínamu tan áni jereburiti garábali le ádajabarun, abúgura lumútu abúguruti láu ában liraüraü simúnu le ñíjin lumúti labúseera. ⁵ Ítara líña gíñe lasúseredun lúma wayúma, ában cátei ñüraüraüti,

áni gayáraati ladügün sarágu buri cátei weínamuti. ⁶ ¡Láu murúsun wátu geméti, gayáraati lágudún ában oúnwenbun áraabu! ⁶ Ítara líña wayúma quei ában wátu geméti. Gayáraati wadügün sarágu wuríbani láu, gayáraati lagádeiruni sun le wagíabei. Gayáraati líchuguníwa lídoun wuríbani lídan sun wabágari, Máfia guánarü lébunabei sun le. ⁷ Gayáraati lagídaruni wügüri jagáñi sun jawúyeri anímaalugu gáñitiñia –dunúru, jéwe, jáma anímaalugu baránajana –áni adüga láali. ⁸ Úati ni ában lun gayára lan lagídaruni ligáñi wayúma. Ában wuríbati ligía le mígiraguagüdünbei lúngua, áni buin líña láu peísini le gáfarajati. ⁹ Láu méme wayúma wadímureja buíti luágu Wáguchi Búngiu, láu gíñe wiñaraguaña gürígia ja ladüga Búngiu lenége. ¹⁰ Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le. ¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹² ¿Gayáraatisan tagíindun ában tídbu fígi fáluma, ódi gayáraati tagíindun tídbu beíbei fígi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibeí

¹³ Ánjein níjein lubeí ában chu táo jídan, gunfaráanda ligía, arúfudaleí láu lubuídun louerun, láu ünabugubuni le líchugubei lisúbudin lun. ¹⁴ Ánjein níjein lubeí gimúgaü tídan janígi, áni jadüguni cátei láu jarítagun juágun guánarügü, moún lumútiti janáangun júngua luágu jisúbudin, lugúndun iyéeni líra. ¹⁵ Máma niján luwúyeri subúdi le ñübinbei lúmagiñe Búngiu, ában subúdi le lánina uboú líra, le lánina jasáminan gürígia, le láni méme Máfia. ¹⁶ Lugúndun le ñí lumuti gimúgaü lúma marítawaguni jawágun ámu, níjein chagáguau ñí lúma sun luwúyeri wuríbani. ¹⁷ Ánjaña ja gámabalín subúdi le lúmagiñebi Búngiu, furúmiñe níjein ában ibágari jarúmati jawágu, gálumatiñia, areídatiñia, gagáambaditiñia, gudémejabutiñia, adüga jamúti le buídubei, ában lábu janügüniña sun gürígia, furáangutiñia. ¹⁸ Ja áluajabalín darángilaü, bunáguatiña ílaü lun lalúbajoúniwa ában ibágari le richáguati jádan, lúma jádan ámu.

4

Gamádaguaü lúma uboú

¹ ¿Cá buri ueígiñe jabúseera jawúribujan, lúma jageíndagun? Ladüga buri lagübüri ayúmajani le jídaanbei súnwandan. ² Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu. ³ Ánjein jamúriaja, mibíjin jumúti lugúndun luríban jamúriajani, jabúseeruni lun

jagástaruni luágu lagübüri jugúndan. ⁴ ¡Gürígia müaraantiña! ¿Íbídiñetísan jun luágu ánjein lan gamádagua jubeí lúma uboú, jáganiñein lan Búngiu? ⁵ ¿Jarítaguatünsan luágu mála lan le taríñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá. ⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Taríñajare Lerérun Búngiu. “Rúlumuti Búngiu lanágan jawágun ja barüguabaña joúngua, áni íderagua lumútiña ja ünabugubaña, láu lareíni.” ⁷ Rúrgua jumá júngua lábugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí. ⁸ Yaráfa jumá lun Búngiu, ábame gíñe layárafadun jun. Jugúa le busénbei jesériwidun lun Búngiu lúma lun uboú, gafígounjadün, ítara líña lubeíti, jarúmagüda jumeí jígáburi túma gíñe janígi. ⁹ Lídan le jayárafadun lun Búngiu, aságürija jumá luágu jifígoun láu águiraü. Gáritá janígi luágu luríban jígáburi lúma Búngiu, sáansignalá jugúndan lun íruni luágu jifígoun. ¹⁰ Ünabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbirigu. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilitrudun Crístu le aríñagubei luágu moun láni ladügünüwa, áni ladáriruña mégeiti luágu. Ánjein jadüga líra lubáragiñe jadügüni le lubeíbei lúrudu, jíchaaguña júngua queísi agúseragüdüti. ¹² Ában rügüñein agúseragüdüti, le íchugubalin lúrudu ligía, le Crístubei méme, lérügü gabáfubei lun lasálbajan o lun lagünrinchagun. Ánjein bugúa, ¿cátabuñadíbugi lun badárirun lidúnrun ámu?

Machoúrurunwalá luágu jarúga

¹³ Guetó, agáamba jumeí cátei le, jugúa le aríñagubei. “Ugúñe o jarúga woúdiba lídan ítaga fulásu, ábame webélujan ñi ában irúmu, wawádigimaribei waseínsun lun wabíjin lánwoun.” ¹⁴ ¿Ída liñásan jasúbusiruni cába lan asúsereda jarúga? ¿Cáteiñeigi jibágari? Ítara líña quei jeméreedu le asáliragubei luágu murúsundan, lárigiñe ába lagúmuchagun. ¹⁵ Aríñagarügütün jamúga. “Ánjein busén Búngiu, wabágariduba, ábame wadügüni le o líra.” ¹⁶ Ánjeinti jugúa, jadímurejan láu pántaü luágu cátei le jarítagubei lun jadügüni, áni sun pántaü le, mabuídunti. ¹⁷ Afíñetina luágu ánja jumá lun sun le, wel, le subúdjabubei lun ladügün buíti áni madügün lumúti, ladügüña figoú.

5

Ewéridijani joun rí sitiñā

¹ ¡Agáamba jumeí cátei le, jugúya rí sitiñā le wuríbabei igáburi! Chülüjali óra lun jayájuajan, wágua jugúyame luágu buri lamíselu le lúnbei jasúfuriruni. ² Ñaláali buri jirísin, jou jamáaru jamútiri janáangun to fínuboun. ³ Gájüjali jígolun lúma jáni pláta, áni láu cátei méme le, arijúati jarügüren, ábame jagünrinchawagún lueígiñe camá jamuga láu wátu geméti. Oúndaraguaadün sarágu irísini lídoun buri lagúmujoún dan le. ⁴ ¿Ánti fáyeiti le míchu jubeí joun ja ñadágimeinbalin jichári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba láali Búngiu jamúriajan ñadágimeintiña jagía juágu. ⁵ Rúguadün júngua lun ában ibágari lánina wéndeí lúma ugúndani ya uboúagu, ibíja jumáali sun le jabúseerúbei quei jadíbunedagüdúniwa anímaalu lubá jáfarun, yaráfaali gíñe jagünrinchawagún sun jugúya. ⁶ Rújadün jadúnrun ja madúnrunbaña, áfaragua jumáña jlágubei, madügünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷ Ligía lubeíti, nidújeñu, gagúraasun jumá daríme liábin Wabúreme Jesúsu. Ábunaguti le agúrabubei ladügün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun. ⁸ Gagúraasun jumá gíñe, máburujan ligíame jarüna, lugúndun madíseeli liábin Wabúreme. ⁹ Nidújeñu, mequéjera jumá jawágu jidújeñu lueígiñe Jesucristu, magúserawagüdün jumámuga, yaráfaali lidáani Búngiu lun lagúseragüdün. ¹⁰ Nidújeñu, barü jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni. ¹¹ Wagía, barü wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáali gíñe ída líñia lan fuleísei láni Búngiu lagúmujoún óra, lugúndun areídati Búngiu, gudémejabu.

¹² Loúgiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoúruruni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³ Ánjein lasúfuriruña lubeí ában jídaangiñe, lúnti layúmuragun lun Búngiu. ¹⁴ Ánjein sándiñein lubeí, lúnti lagúarun joun tábutigu ligílisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵ Dánmeti le jayúmuragun láu afíñeni, ábame lareídagun sánditi, áni ánjein

gíñe afígounjaali lubeí, ferúdunawabei lifigoun. ¹⁶ Ligía, gúfese jumeí lubeí jifígoun joun jidújeñu lueígiñe Jesucristu, áni ayúmuragua jugúyame jawágu lun jareídagun. Weíriti lubáfu ayúmuraguni lun Búngiu le ladügübei gürigia le buiti táu sun lanígi. ¹⁷ Proféta Elías ában meja wügüri quei wagía, dan le lamúriaianbei lídan layúmuragun lun Búngiu lun májuyun lan júya, reídeiti júya májuyunga ūrüwa-irúmu-dimí. ¹⁸ Lárigiñe, dánya le layúmuragun, ábaya lájuyun júya, ábaya tájüchün sun inádirigu uboúagu.

¹⁹ Nidújeñu, áanjein egéyeda ában jídaangiñe lueí ūma le richábei, liábin ámu lun lagíribudagüdüni, ²⁰ subúdi jumeí luágu furúmieguarügü lan agíribudagüdüti le afígounjabei lídaangiñe luríban lémeri, lasálbaruboun lan luwáni afígounjati ligía lueí tídin máfiougati, áni ferúdunagüdaleíme sarágu lifigoun gürigia lé yebe acháragadubei.

FURÚMIÑETU LIGÁRADAN PÉDRO

Labüriüjan Pédro joun afiñetiña ja chagágubaña boúgudi lueí jageíra

¹ Áu Pédro, ában láni Jesucristu apóstolu áu, nabürüjañoun gárada to jun, jugúya lánigu Búngiu ja chagágubaña boúgudi lueí jageíra loúbawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagiñe meja binárü lun lánigu jumá, áni subúdi lumúti meja luágu lachülüruba lan ában wéyu lun ítara lúba lan, ladüga ligía lan lugúndaanbei. Ligía larúmadagüdañajañoun lubeí Sífiri Sándu janígi láu líta Jesucristu, adügalaün lun gagáambadi jumá. Ibíja jumá lubeíti sarágu abíniruni lúma darángilaü lúmagiñe Búngiu.

Loúchawagúba jafíñen, ábame liábin butí lídaangiñe

³ Rúwama uweíriguni lun Búngiu, le Lúguchibei Wabúreme Jesucristu, luágu luweírin lugúdemejabu woun. Rújali iséri ibágari woun queísi lirajüñü láu láasaaragüduni Crístu lídaangiñe oúweni lúnya labágaridun. ⁴ Queísi lirajüñü wabeí, gayáraati weménigidun le gumúti luágu wabíjubei lan ubuíduni le aráanse láalibei wabá, gayáraati weménigidun luágu werésibirubei lan alágan le areídañu lubeí Búngiu wabá, siélu —ában alágan le lúnbei ladúrarun lun sun dan, le siñábei ladáseirun, le siñábei lefériderun lubuídun. ⁵ Goúnigi lumútiwa Búngiu láu lubáfu lugúndun afiñe wamá luágu, lun gayáraabei lan wabíjini asálbaruni lídaangiñe asúfuriruni lánina uboú le, le aráanseñu lubeí wabá lárigineme lagúmuchun uboú.

⁶ Ligía lóbubei buin jíñia lan láu ugúndani, láu sun lúnti lán funa jasúfurirun sarágu oúchawagúni luágu murúsun dan. ⁷ Lúnti jasúfuriruni oúchawagúni ladüga ítara líña lan jafíñen quei gólu —lúnti louchúniwa láu wátu geméti lun larijíniwa ca lan luwúyeribe. Afíñeni le awánduti oúchawagúni ligía, butí sügü láu gólu, lugúndun gagúmuchaditi gólu. Láu lubeíti jawánduni loúchawagún jafíñen, ladímurejaba Jesucristu butí juágu dánme le lagíribudun uboúagun, jibijuba gíñe uweíriguni lúma inébesei lúmagiñe.

⁸ Jínsiñeti Jesucristu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában oúnwenbun ugúndani le siñá jumuti aríñaga láu dimúrei. ⁹ Ladüga méme luweírin jafíñen luágu Crístu, jerésibiruñein tasálbarun juwáni.

¹⁰ Lídan meja dan le sügjalibei, adímurejatiña meja profétagu luágu cátei le lúnbei líchuguni Búngiu jun láu lareíni,

ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹ Subúdigüda lumútija láni Crístu Espíritu joun wügüríña jagía le lúnbei lasúfuriruni Crístu lubáramegiwa, lúma uweíriguni le lúnbei liábin lárigiñe. Jagíati, ábaja joúchun jasúbudiruni cátei lan gürígia ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jadáani lagúncilirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan le, láu lubáfu Sífiri Sándu le ñübinbei siélugiñe. Ásta ánjeligu, buséntiña jamúga gíñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabajañein lubeí jerésibiruni jalágaante siélu, gidájumei samínäü málati jarítagunrugugiñe, lubáragiñe líra, derégüdagulá jarítagun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucristu uboúagun. ¹⁴ Queísi isáanigu gagáambaditiña, mabágarida jumá queí meja ligáburi jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶ Taríñajare Lerérunt Búngiu. “Jarúma jumá, lugúndun áu, jarúmatina.”

¹⁷ Queíti janügüni Búngiu quei Júguchi, Búngiu le ábanbei lábu ligáburi lagúseragüdüni jagáburi sun gürígia, lúnti júaradun lúma láu ában goúnigi sun dan le lúnbei jabágariduni ya uboúagu. ¹⁸ Sálba láadün Búngiu lídaangiñe lagübüri ibágari lé meja jafúnrendeirubei jámagiñe binádu jagübürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta, ¹⁹ láu líta Crístu le gebégibeı sügü láu sun cátei lafáyeirúa. Derégewati Crístu lun loúnwen luágu wafigoun quei ában mudún le buídubei lídan sun luwúyeri, sálba wamámuga. ²⁰ Lúmagiñe lubáragiñe buga ladügüni Búngiu uboú, ába laráanserun lun Crístuba lan Wasálbaragüle, luágu lubeíti wafúleisein lachülaagua Crístu lídoun lagúmujoún dan le, lun lasálbaruníwa. ²¹ Lídaangiñe Crístu, ába jiyábin lun jafíñerun luágu Búngiu le ásaaragüdübalin Crístu lídaangiñe oúweni, ru ligía uweíriguni lun, ítara líña jiyábin lun jafíñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabeı lan jínsiñedun jidújeñu lueígiñe Jesucristu jun le tímataati. Lúnti lubeíti jínsiñegua jumá júngua láu sun tarúman janígi, lúma láu sun jére,

²³ lugúndun iséri gürígia jugúya. Mámaadün jasáanigu agübürigu ja goúwedaditiña, lirajüñüjadün Búngiu láu jagáambuni lerérun le íchugubei ibágari, le gíñe adúrarubei lun sun dan. ²⁴ Taríñajare Lerérun Búngiu.

Ítara jáña sun gürígia quei jíduru,
liábin jaweírigun quei lufúlurin jíduru.

Dan le lásaürün jíduru, ába láburujan lufúlurin,
²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirajüñüjadün lubeí Búngiu, ígira jumeí lubeíti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítaralá gíñe busén jumá lun jatúriajani Lerérun Búngiu buídu lun gayáraabei lan ledérebugudun jafíñen luágu Crístu. ³ Subúdijadün murúsun luáguti luweírin lubuídun louseruníwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajoúa jumá lubeíti lun Crístu le gabágaribe. Rútiña gürígia mebéresení luágu, ánjeinti lun Búngiu, ítara líña Crístu quei ában dübü le gebégiti sarágu, le lanúadirunbei lun ligíaba lan ébuu tun lilígilisin, áni sun ja afíñebaña luágu Crístu, jagía lilígilisinbaña Búngiu. ⁵ Ítara líña lubeíti, ígiraguagüda jumá júngua lun Crístu le rúlaalíbei ibágari magúmuchaditi jun, lun tadügúniwa ában témpulu buítu lun Búngiu jídaangiñe, lun gíñe ítara jumá quei fádirigu ja derégeguatiña jóúngua lun Búngiu, ja íchugubalin cátei le áubei lagúndaara lun, Lídaangiñe Jesucrístu. ⁶ Ligía gíñe taríñagunbei Lerérun Búngiu.

Noúnajañein Crístu lun ligíaba lan dübü le weírigutimaabei tuágu nilígilisin lídan fulásu le gíríbei Sión.

Áni ja afíñerutiña luágu, buídubei lídin joun.

⁷ Weíriti lebégi Crístu jun, jugúya le afíñebeti luágu, ánjeinti joun ja mafíñebaña, mebégiti quei dübü le únbei jamájara ábunagutiña. Láu sun líra, gúnfulijali le taríñagubei Lerérun Búngiu.

Dübü le únbei jamájara ábunagutiña,

ñübinja lun ligíaba lan furúmiñeti lídan bunáguaü.

⁸ Joun ja mafíñebaña luágu Crístu, gúnfuliti gíñe le aríñawagúbei.

Ában dübü achúgeraguágülei ligía, le eíguadagüdüti gürígia.

Ja madügünbaña gásu láu ugánu lánina asálbaruni lídaangiñe Crístu, chugéguatiña luágu, férideritiña gíñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le afíñebi luágu Crístu, ában família anúadajoúatiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaeña joúngua lun. Ítara lína cátei le, lun jadímurejan luágu buri cátei buíti le ladügübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeňu jínsiňetiña nun, jugúya queísi teréncha lídan uboú le, aganoútiña boúgudi lueí jageíra, ayúmuraguátina jun lun mígiraguagüdün jumá júngua lun lagübüri buri ayúmajani le ageíndagubei túma juwáni. ¹² Buídulá joúserun jádan ja ibídiňejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadügübei, ábame jíchugun uweíriguni lun Búngiu dánme lachülürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya uboúagu. Gúnfuri jumá lúma lugúmadin urúei, quei ligía lántima íñubei ufúlasun, ¹⁴ gúnfuri jumá gíñe lúma jagúmadin gumádimatiña ja loúnajabaña lun jafáyeiragüduniña ja müaradúnbaña lúma lúrudu, lúma lun jíchugun uweíriguni joun ja adügubaña buíti. ¹⁵ Busénti Búngiu lun jadügumi le buídubei, lun jámanichagüduniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, oúsera jumá queísi gürígia ja mámabaña idámuni lun ni ában gürígia, máma lueígiñe líra lun jadügumi le wuríbabai, lubáragiñe líra, abágarida jumá queísi lidámun Búngiu. ¹⁷ Inébe jamá sun gürígia jun queísi lubúdubu, jínsiňe jamá jidújeňu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸ Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta gíñe ja wuríbabaa. ¹⁹ Lugúndun labínirubei Búngiu gürígia le awándubei asúfuriruni le mébunati láu larítagun luágu Búngiu. ²⁰ Ánjaün adüga cátei wuríbati, jafáyeira luágu, málati gagúraasun jumá luágu líra,

ánjaün asúfurira lueígiñe jadügün cátei buíti, ába jawánduni láu gurásu, buíti líra ligíbugiñe Búngiu. ²¹ Lun luwúyeri igáburi le lagúara Búngiu juágu, quei súfuri lubeí Crístu juágu láu gurásu, íchiga ában jémpulu jun lun jafálaruni. ²² Madügünti Crístu ni ában figoú, meyéeragun ligía gürígia ni ában weíyaasu. ²³ Dan le janábuni, moúnabunti láu anábjani, dan le jasúfuriragüdüni, masíadirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni. ²⁴ Barú lumuti Crístu guánarügü wafígoun luoúgua luágu gurúwa lun weréderun quei jiláñu lun figoú, lun wabágaridun ában ibágari le lánina ísuruni. Buleíseiwati lun wareídagun. ²⁵ Ítara jiña meja quei mudún ja féridijaña, ánjein guetó, níübinjadün lun Crístu le oúnigirubalün queísi joúniri mudún, toúnigiloún juwáni.

3

Ligáburi jabágaridun maríeitiña

¹ Ítara gíñe jugúa würíña gámaritiña, derégegua jumá júngua joun júmarigu, lun ánjein lan mánjagiña lubeí lun ugánu lánina asálbaruni, gayára lámuga jayábin lun jaffíñerun luágu Crístu, maríñagunga jugúa ni cáta joun luágu asálbaruni, ² láurügü jaríjini lubuídun joúseruniña láu inébesei lúma larúman igáburi. ³ Mámala láu buri cátei boúguditi jibíti jewéndeda, queí buri lanárimé aroúraguni, arígeilaü lúma buri bángüli le gólu, anáanguni wéndegutu, ⁴ tídaanlá janígi jewéndeda, le ábanbei ubuíduni le meféridirawadibe. Ában igáburi bímeti, darángila, ligía cátei gebégibei sarágu ligíbugiñe Búngiu. ⁵ Ítara liñá meja ligáburi jewéndedun würíña já meja derégeguañabaña joúngua lun Búngiu lidan meja dan le sügüjalibe. Jeménigitiña meja luágu Búngiu, derégegua jagía joúngua joun jámarigu. ⁶ Ítara tiñá meja Sára. gagáambaditu lun Abrahám, ába tagúarun lun, "nabúreme" lun tarúfuduni linében tun. Jiyábinba lun ítara jumá quei tugúa ánjein jadüga le buídubei, manúfudeiga lueí ni cáta.

⁷ Jugúa gíñe wügüriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima würi, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adúga jumeí ítara, úa lámuga ni cáta lun leréderunün lueí jayúmuragun lun Búngiu.

Ja asúfurubaña lueígiñe jadügüni le buídubei

⁸ Abágarda jumá sun jugúa lídan úarani lúma láu gudémejabu jídaangua, jínsiñegua jugúyame júngua queísi idújeñu lueígiñe Jesucristu. Areída jumá, ünabu ligíame janáangun júngua. ⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun

lun jerésibirun abíniruni lúmagiñe Búngiu lagúaraün. Lugúndun taríñajare Lerérun Búngiu.

¹⁰ Le busénti labágaridun ában ibágari buíti, lúma gíñe ában ibágari lánina ugúndani,

lúnti loúnigiruni liyúma lueí ladímurejan wuríbani, maríñagun ligíame iyéeni.

¹¹ Lúnti ladísedun lueí wuríbani lun ladügünü buíti, láluajani darángilaü lun labágariduni súnwandan.

¹² Lúnti ítara lan ligáburi, ladüga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adügubaña wuríbati, magúndaati Búngiu jáu.

¹³ ¿Cábagi gayára ladügün wuríbati jun, ánjaün íchaagua júngua lun jadügünü buíti súnwandan? ¹⁴ Áni íbini jasúfurirun ladüga lísurun jibágari, gúnda jumá ladüga fuleíseiwa jumá lídan le jasúfurirun luágu Crístu. Manúfude jumá lueí ni ában, madíjeri ligíame jarítagun. ¹⁵ Derégeguarügü jumá júngua le gumúti lun Crístu quei Jabúreme, aráanseñu jumá súnwandan lun joúnabuniña ja álüğdüütün ca lan ueígiñe jeménigida luágu Crístu, láu maweíriguni lúma láu inébesei. ¹⁶ Buídulá joúserun, darángilañu támuga janígi, lun ja lan adímurejabaña wuríba luágu lubuídun jigáburi queísi afíñetiña luágu Crístu, nibúsigari jamámuga luágu jerérun guánarügü. ¹⁷ Buítimaati lun jasúfurirun lueígiñe jadügün buíti, ánjein ítara lína lubeí labúseeruni Búngiu, sügü láu lun jasúfurirun lueígiñe jadügün wuríbati.

¹⁸ Jarítagua jumá luágu luweírin lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanügüníwa lun Búngiu. Áfarúati jilágubei, wínwantu lánai Espíritu. ¹⁹ Quei Espíritu, ñüdünti gíñe apúrichija joun espíritugu ja lídaanbaña jafúlasun jiláaña. ²⁰ Espíritugu jagía, gürígia ja wínwantaña lídan meja lidáani Noé, magáambaditiña meja gürígia jagía lun Lerérun Búngiu láu sun aráfuda lánai Búngiu luweírin lugúraasun joun lídan le lagúrabajani tagúmuchún árca to ladügüboun Noé. Mánjatiña jagáambuni Búngiu, ába jasálbarun wídürögü gürígia lídaangiñe luweírin gúnran ligía. ²¹ Dúna ligía, ítara lína quei lidúnarina badísei guetó, le ídaangiñebei wanügüwa lun wasálbarun. Máma lun larúmadun úgubu abásteruni, aráfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu gíñe sálbaadiwa lan láu lásaarun Crístu lídaangiñe oúweni lúnya labágaridun. ²² Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹ Ligía, ítara quei súfuri lubeí Crístu ya uboúagu wawágu, lúnti gíñe aráanseñu wamá lun wasúfurirun láu gurásu luágú. ² Le súfurijalbei luágú Crístu, ígira láali figoú lun labágariduni líbiri libágari queísi lugúndan Búngiu, máma lun líchugun ugúndani lun lagübüri ayúmajani. ³ Lidan meja dan le sügüjalbei, adüga jumúti meja luríban buri cátei le jínsiñebi joun ja ibídiñejabubaña lun Búngiu, jaganoúña meja lídan ibágari nibúsigarídünati, gúnfulitün meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le moúnbei ladügüniwa. Buidurügaali dan le abágarida jumáalbei ítara. ⁴ Guetó, weíriti janígi já meja jumádagubaña láu mafála jumáaña lan lídan lagübüri ibágari le, ligía jadímurejanbei wuríba juágu. ⁵ Ánjeinti jagía, jagúfeseruba ligibugiñe Búngiu, le aráanseñubei lun lagúseragüdüníña wínwangiña jáma jiláguaña, madíse. ⁶ Ligía apúrichijoúa lubeí meja luáguti asálbaruni joun ja jiláguañábaña guetó, lun gayáraabei lan gabágari tan jawáni láu libágari Búngiu, láu sun jilá lan jágubu queísi lasúseredun joun sun gürigia.

⁷ Yaráfaali lagúmuchun uboú, ligía lúnti lubeí aráanseñu jumá, ragügua jugúyame júngua, derégegua jugúyame júngua lun ayúmuraguni lun Búngiu. ⁸ Loúgiñe sun cátei, níjeinlá sarágu ínsiñeni jídan joun jíbirigu, lugúndun ányaün jínsiñejabu, ferúduna jubeí jafígoun ámu juágu, láu sun gíbe lan. ⁹ Resíbi jumáña gürigia júbíñe láu sun jugúndan. ¹⁰ Rújali Búngiu ában ubáfu lun ságü afíñeti luágú Crístu, ítara liña lubeíti, seríwi jumá joun jíbirigu láu ubáfu le rúalaíbei Búngiu jun, queísi oúniri buítíña lánina ubáfu buri le líchugubei Búngiu. ¹¹ Le gabáfubei lun lapúrichijan, lúnti ladügüni queísi ában le adímurejati dimúrei lúmagiñe Búngiu. Le esériwiduti, adügaleí láu sun érei le líchugubei Búngiu lun. Sun cátei le jadügübei, adüga jumeí lídan ában igáburi le lúnti líchugúniwa uweíriguni lun Búngiu láu, lídaangiñe Jesucristu. Búngiu le Súnti Gabáfu, ligía le lúnbei lerésibiruni uweíriguni lun sun dan. Ítaralá.

Wasúfurirun queísi lánigu Crístu

¹² Nidújeñu jínsiñetiña nun, maweíridalá janígi láu buri lidíjeri oúchawagúni le jibíjubei, camá jamuga ába cátei ámuti asúseredubei jun. ¹³ Lubáragiñe líra, gúnda jumá luágú gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu uboúagun láu sun luweírigun. ¹⁴ Fuleíseiwatün ányaün anabúa lueigiñe lánigu jumá Crístu, lugúndun arúfuda lumúti líra luágú níjein lan Sífiri Sándu, le weírigubei, jídan. ¹⁵ Ánjein asúfurira ában jídaangiñe,

lun máma lan lueígiñe láfarajan, o lueígiñe lan líwerujan, ni lueígiñe ladüraaguni líbiri lúrudu, ni lueígiñe leméterun lídoun cátei le miábinti lun, mídin. ¹⁶ Ánjeinti asúfurira mútu lueígiñe lánigu lan Crístu, moún lumuti lanügün busíganu, lúnti líchugun eteíngiruni lun Búngiu luágu lánigu lan Crístu.

¹⁷ Chüllüjali dan lun lagúmeserun luweírin asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni ítara wámagiñe, weíritimaabei jasúfurirun ja mánjabaña jerésibiruni lerérun Búngiu. ¹⁸ Ánjeinti jénreengu lubeí jasálbarun ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹ Ja lubeíti asúfurirubaña queísi labúseeruni Búngiu, lúnti ítara méme jamá adügei le buídubei, derége jamoúnme jawáni lújaburugun Búngiu le adügübaliña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afíñetiña

¹ Níchuguñein nerérunti jun, jugúya ja ábutigubaña lídan jadámurin afíñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabárabadina gíñe quei jugúya lídan uweíriguni le lúnbei liábin. ² Toúnigi jumáña lirajüñü Búngiu ja lábugiñebaña jaríaajan queísi joúnigiruniña joúniri mudún mudún. Adüga jumeí láu ugúndani queísi labúseeruni Búngiu, máma ladüga jafósuruña lan, adüga jumeí ladüga busén jumá jesériwidun lun Búngiu, máma ladüga línsiñegu seínsu. ³ Moúsera jumá camá jamuga jabúriña ja lábugiñebaña jaríaajan jugúya, joúcharügü jumá lun ában jumá jémpulu buítí joun. ⁴ Ítara lúba, dánmeti le liábin Jesucristu, le joúniri mudún le tímatimaati, jibíjuba ában uweíriguni le weíriguti le ladúraruba lun sun dan, le mítaranbei quei rídi le láuti ubánaü le gásaurati.

⁵ Jugúya gürígia ñübürigiña, rúgua jumá júngua lábun jagúmadin weíyaña mútu. Lúnti jesériwidagun súngubei joúnigua láu manáanguni únguaü, lugúndun taríñajare Lerérun Búngiu.

Magúndaanti Búngiu jáu ja barüguabaña joúngua, áni íderagua lumútiña ja manáangunbaña joúngua, láu lareíni. ⁶ Rúgua jumá lubeíti júngua ünabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachülürün dan ligía. ⁷ Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragüguañu jumá júngua, lugúndun eíbugañajadügü líña Máfia le jágani queísi liñún gáñiti áluaja

cába lan lagünrinchagua. ⁹ Mígiraguagüda jumá júngua lun, derégüdagu jumá lídan jafíñen, subúdiñu jumeí luágu ligía méme lan gíñe jasúfurirubei jidújeňu lueígiñe Crístu lídan sun fulásu. ¹⁰ Lárigiñeme súfurijadün lan luágu murúsun dan, ladügübadün Búngiu lun úa lan mégeiti luágu lubuídun jigáburi, derégüdagu lídan jafíñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmuchadibei, lídan ában lúma Jesucristu. ¹¹ Ligía le Súnti Gabáfu lun súnwandan. Ítaralá.

Lagúmujoún buri mábugaü

¹² Noúnajañoun tiraüraü gárada to jun lúma Silváno, le nanügübei queísi ában idújei úaraguati, lun níchugun dügüdaguaü lun jafíñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña afíñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü. ¹⁴ Chúguia jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucristu. Ítaralá.

TIBÍAMAN LIGÁRADAN PÉDRO

Labüriüjan Pédro joun afiñetiña

¹ Áu Simón Pédro, ában esériwiduti lun Jesucristu áu, ában gíñe láni apóstolu. Nabürüjañoun gárada to jun, juguya le ñübinjalibeí lun gafánran jumá lídan luweírin asálbaruni le wabíjubeí lídaangiñe Wasálbaragüle Jesucristu, le méme Wabúngiute, lugúndun úaragua lan. ²Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesús.

Igáburi le lúnbei joúseruni afiñetiña

³ Rúlaali Búngiu sun le wemégeirubei woun lun wabágaridun lúma lun wesériwidun lun, láu lasúbudiragüduni Jesucristu le agúarubei woun lun gafánran wamá lídan luweírigun lúma lubuídun cátei le ladügübeí. ⁴ Gúnfuliti Búngiu láu lerérunt, lídaangiñe Jesucristu, láu líchuguni le buídutimaabei lúma le weíritimaabei woun. Láu líra, gabáfu wamá lun wanúrajan lueí lagübüri ayúmajani lánina uboú le, ibíja wamámugei ligáburi Búngiu wádan. ⁵ Ligía lúnti lubeí jáfaagun lun jíchugun lubuídun igáburi lánwoun jafíñen, ⁶ subúdi luágu Búngiu lánwoun lubuídun jigáburi, ragüguaü únguaü lánwoun jisúbudin luágu Búngiu, gurásu lánwoun ragüguaü únguaü, edéregeraguni únguaü lun Búngiu lánwoun gurásu, ⁷ areíduni lánwoun edéregeraguni únguaü lun Búngiu, ínsiñejabuni lánwoun areíduni.

⁸ Ánjein níjein buri lubeí igáburi líra jídan le tímataati, mámabei luágu ni cáta jisúbudin luágu Crístu, áni líchuguba jibágari sarágu cátei buíti lun Crístu. ⁹ Ánjeinti le mítaraanbei ligáburi, ítara líña queísi ában maríjinti o ában lan madíse taríjin, buliéilá luágu chibáwaali lan binádu lifígoun. ¹⁰ Ligía lubeíti nidújeñu, quei wájali lubeí Búngiu jun, anúadajalaün lun lánigu jumá, áfaagua jumá lun lájüchün buri cátei le jídan, ánjein jadüga ítara, máburujabadün lídoun féridi. ¹¹ Ítara lúba úa lan ni cáta ásiñeragüduti jebélurun lídoun larúeijan Wabúreme Wasálbaragüle Jesucristu, le magúmuchadibei.

¹² Ligía narítaguagüda mémebadün lubeí luágu, láu sun subúdi jumáali lan, áni jeíbuguña lan lídan inárüni ligía. ¹³ Láu sun líra, sun wínwangidina lan, afiñetina luágu buídu lan lun nagúaruni jarítagun lun luwúyeri ibágari le lúnbei jabágariduni queísi lánigu Crístu. ¹⁴ Subúdigüda láali Wabúreme Jesucristu nun luágu yaráfaali lan wéyu lun noúnwen, ¹⁵ ítara líña lubeíti,

nadügübei nuáraati lun íbini lánme lárigiñe jiláadina lan, lun súnwandan lan jarítagun luágu buri cátei le.

Já buri aríjubalin luweírigun Crístu

¹⁶ Arúfudajani le wíchugubei jun luágu lagíribudun Wabúreme Jesucristu uboúagun láu sun luweírin lubáfu máma meja úraga, aríja wamúti meja luweírigun láu wágú. ¹⁷ Aríja wamúti dan le líchugunbei Búngiu Úguchili inébesei lúma uweíriguni lun, ába laríñagun lumálali Búngiu lun lídaangiñe uweíriguni lánina siélu. “Niraü le jínsiñebei nun le, le áubei oúnwenbun lan nugúndan.” ¹⁸ Agáamba wamúti ladímurejan Búngiu ítara luágu Wabúreme Jesucristu dán meja ñíñadiwa lan lúma Wabúreme luágu wübü le biníwabei.

¹⁹ Níjein gíñe ában cátei choúrutimaati wáma luágu liábin Wasálbaragüle uboúagun—ligía ugánu le jabürüjabei profétagu. Buíti jadüga lun jatúriajani jerérun wügüriña jagía, ladüga líchuguba lan larúgounga tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun ítara daríme dan le lagíribudun Crístu uboúagun, le ítara lúbabei queísi larúgadun dan le táfuridun warúguma to lánina bináafin –wasúbidirubei sun cátei lídaanme dan ligía. ²⁰ Loúgiñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le bürü jamaalíbei profétagu láu láni lúngua. Busénwati lubáfu Sífiri Sándu lun gunfaráandawa lan, ²¹ lugúndun madímurejaantiña meja wügüriña jagía láu jáni joúngua. Jagía, queí meja wügüriña jabeí derégeguatiña joúngua lun Búngiu, dimúrei buri lúmagiñeti Búngiu jadímurejabei lugúndun Sífiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, ítara lúba gíñe añájeinbaña lan jídan, jádaruba iyéeni lagánagua arúfudajani le inárünibei lun lagádeiruni jafíñen. Jarúfudubeiti yéetiña jagía láu luwúyeri jabágaridun luágu máma lan Crístu Jabúremebi, láu sun jilá lan Crístu lun lasálbaruniña. Láu cátei líra, janügüba agünrichaguni furése joun guánarügü. ² Gíbeeabaña afálarutiña lídan liwíye jémeri, áni ladímurejoúba wuríba luágu üma le inárünibei jadüga. ³ Láu línsiñe seínsu joun, jaságaruba seínsu jueí láu jarúfudajan le málabei, le ñübinbei lídaangiñerügü jachügü, choúruti luágu jagúseragüdúwaba lan luágu luríban jadüga, yaráfatí jeféridirun queísi laráanserúniwa jabá lúmagiñe binárü.

⁴ Úati ferúduna lániña Búngiu ánjeligu já meja afígounjabaña, ába lachágaraguniña máfiougatin, ába lígiruniña adaürüwa lídan

lubúriga ñi agúrabajei wéyu lánina lagúseragüdüniña.⁵ Úati gíñe ferúduna lániña Búngiu mútu wuríbatiña já meja aganoúbaña uboúagu lídan lidáani Noé. Ába loúnajani gúnran jawágu gürígia jagía, Noé rügüñein le apúrichijabei joun gafígoountiña lun jasáansiruni jagáburi, jámaya sédü gürígia lánwoun asálbara.⁶ Darí lumuti gíñe meja jadúnrun gürígia ja aganoúbaña ubúrugu Sodóma lúma Gomórra. Ába láguduni fulásu buri ligía darí lun ladáagun balígime, lun larúfudajan joun gürígia wuríbatiña ja lúnbaña jayábin járigiñe ca lan lafáyeijabei figoú.⁷ Séfu lumúti meja Lot, ában meja wügüri buítí, le weíribei lidíjeri luágu liwíye jagáburi gürígia wuríbatiña lídan fulásu ligía.⁸ Ságüja wéyu lasúfurirun wügüri buítí ligía tídan lanígi láu laríjini lúma lagáambuni cátei buri wuríbati le jadügübei.⁹ Sun le, ában jémpulu luágu ligáburi lasálbaruniña Búngiu ja derégeguabaña joúngua lun lueí oúchawagúni, ígira láña ja wuríbabaña lábugiñe asúfuriruni lubá jasiadirúniwa lun sun dan lídaanme wéyu lánina agúserawagüdüni.

¹⁰ Lasúfuriragüdátimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barüguatiña joúngua, mebéresentiña láu ni cáta, marúfudun jagía inébesei joun ja weírigubaña, anábarügü jamáña.¹¹ Ánjañati ánjeligu, láu sun jéretima jamá, gabáfu jagía sügü jáu arúfudajatiña jagía, míchuguntiña jadúnrun ánjeligu wuríbatiña ligíbugiñe Búngiu, láu anabúni.

¹² Ánjaña arúfudajatiña ja, ítara jáña queísi anímaalugu úati gunfaráanda jamá, jagüriaajoún lun járugüdün lun jafarún. Adímurejatiña wuríba luágu buri cátei le úati gunfaráanda jamáni, joúweguba queísi joúwegun anímaalugu,¹³ asúfurireina lueígiñe jasúfuriragüdün ámu. Nibúsigarídünati jabágaridun, adáagua jamúti lagübüri jayúmajan lídan larúgounga, ligíbugiñe laríjin sun uboú, darí lun júaradagun júma lídan jufédun queísi jamúga gürígia buítíña, wíyeti jabágari.

¹⁴ Siñáti jaríjin ában würi lun úa lan suámei jamánun, mabúchatí jawágu adáagua figoú. Acháwaja jamútiña débilitiña lídoun figoú, bíbutiña luágu meménijabuni. Choúruti luágu jagünrinchagúba lan.¹⁵ Féridiña jáña, lugúndun jígiruni üma le surúbei. Falá jamuti láni proféta Baláam, le liraü Beór, jémpulu, lé meja álugubei lagáñeirun seínsu láu ladügüni le wuríbabei.¹⁶ Ábati ladeínjan ában burígü maríñagaditi lun luágu lifígoun, adímureja ligía lun láu jamálali gürígia, ába mígirun láni lun lasígirun láu lilülün láu.

¹⁷ Ítara jáña arúfudajatiña yéetiña ja queísi w-élu mábeiti, queísi buri juánriñu le lanügün garábali, siádiwaaña lun

jásügürün sun dan lídan luweírin-ägei lubúriga máfiougati. ¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adüga jameí furúmiegarügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina buliéiguaü, lun jagíribudun járigoún lídoun liwíye ibágari. ¹⁹ Aríñagatiña joun jánigu luágu jabágariduba lan ában ibágari le ní lumuti gayára lan jadügüni le jabúseerun, ánjeinti jagía guánarügü idámuniñanu lun Máfia, lugúndun sun gürígia lidámuñein cátei le árügündübalin. ²⁰ Ja subúdi jamáalibei Wabúreme Jesucristu le Wasálbaragüle, ani séfuyaña lídaangiñe iwíyei le lánina uboú le, ánjañaya áburuja lídoun buri cátei le lúnya lárügündüniña, wuríbatimaabei le lúnbei gádan lániña sügü láu meja furúmiñe. ²¹ Buítimaati jamúga meja joun lun masúbudirungubei jamáni üma le surúbei, sügü láu lárigiñe lan jasúbudiruni, ába jígiruni lerérun Búngiu joun. ²² Jawágu lagúnfulira linárün dimúrei le. “Léchun oúnli lun leíginiya lewérajan, léchun büíruju le sun liñábei lágoun jarúmati, lúnya lágoun lídan gubégubeti.”

3

Lagíribudun Wabúreme Jesucristu uboúagun

¹ Nidújeñu jínsiñetiña nun, nuján tibíaman gárada nabürüjan jun. Tídan biángubei gárada, joúchatina lun narítaguagüdünün luágu arúfudajani inárüniti le furéndejumáalibei, lun gayáraabei lan jasáminarun buídu luágu. ² Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucristu le Wasálbaragüle, lé meja warúfudajabe wagía apóstolugu jun.

³ Lídaangiñe sún buri cátei le waríñagubei, rútima jumeí le jarítagunrugun. luágu lídoun lánme lagúmujoún dan, añajeinbañia gürígia éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun, ⁴ ábame jaríñagun. “¿Másan jaríñajare luágu liábinyaba lan Crístu uboúagun? ¿Jalíñaañeinsan? Lúmagiñe joúwegun furúmiñetiña afíñetiña luágu Jesucristu, ítara mémegili sun cátei queí meja lúmagiñe ladügúnbei uboú.” ⁵ Mabúseeruntiña jasúbudiruni luágu ladügüni Búngiu sun cátei lídan lidáani lun ladügünüwa. Adüga lumúti meja siélu lúma uboú lúmagiñe binárü láu lugúmadin, adügaleí múa lídaangiñe dúna, geyégu lína gíñe múa ligía láu dúna. ⁶ Ába lachülürün dan lun lagúnrinchaguni Búngiu uboú meja ligíra láu lidúnarina gúnran. ⁷ Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdün. Lídaanme wéyu ligía, lágudubei Búngiu siélu

lúma uboú le gumúti láu lugúmadin. Ja madügünbaña gásu láu Búngiu, jágudúba lídan wátu ligía.

⁸ Mabúlieida jumeí góñi, nidújeñu jínsiñetiña nun, luágu ítara líña lan ában wéyu ligíbugiñe Búngiu quei mílu irúmu, mílu irúmu quei ában wéyu. ⁹ Máma jamúgatia lugúndun ladárasarun lagúnfulirun Búngiu láu lerérun, queísi jarítagun sarágu, gagúraasunrügütü jabá gürigia lugúndun mabúseerünti lun lefériderun ni ában jádaangiñe, labúseerun lun jaságüríjan sun gürigia lídaangiñe jafigoun, gayára lámuga jasálbarun.

¹⁰ Lachülüruba wéyu ligía lun lagíribudun Wabúreme Jesucristu uboúagun dánme le magúrabúniwa lan, queísi lachülürün jíweruti áriebu. Ábanmeti lagúmuchagun siélu láu ában lanárimé ireíni, rürüguagüdaleíme wátu geméti sun cátei le ñíbei—játi, warúguma, wéyu—gudáme uboú láu sun cátei le lídaanbei.

¹¹ Queísitei lagünrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti, ¹² agúrabañu jumeí lachülürün luwéyuri Búngiu, adügañu jumeí le juáraati lun joúfudajani. Lídaanme wéyu ligía, lagünrinchaguba siélu láu wátu geméti, ábame larürüdagun sun cátei. ¹³ Ángeinti wagía, agúraba wamúti iséri siélu lúma iséri uboú le uágubei laríñaga Búngiu woun, sun cátei ñi, úaraguabei, áni buídubei góñi.

¹⁴ Ligía lubeíti, nidújeñu jínsiñetiña nun, sun anjünja lan agúrabajeí buri cátei le, joúcha jumá lun ladárirunün Búngiu lídan úaraguni ligíbugiñe, jarúmañu, úouga mégeiti juágu.

¹⁵ Subúdi jumeítia luágu lagúrabaja rügüñu lan Wabúreme Jesucristu jasálbarun gürigia lubá lagíribudun uboúagun. Ítara líña góñi labürüjan wadúje Pablo le jínsiñebi woun sarágu, jun, láu subúdi le líchugubei Búngiu lun. ¹⁶ Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja loúguabaña afíñi, garábaguati laníchigu labürüjan Pablo según jagía, ítara quei jadüga tún buri tibiri líburu to Lerérun Búngiu. Jeférideruba lun sun dan ladüga cátei le.

¹⁷ Ligía lubeíti, nidújeñu jínsiñetiña nun, queísi subúdi jumáali lubeí buri cátei le lubáramegiwa, toúnigigua jumá júngua lueí jeyeedunün gürigia wuríbatiña, ígiragüdei arúfudajani le ináruniti luáguti Búngiu jun. ¹⁸ Joúcha jumá lúntima jasúbidiruni Wabúreme Jesucristu le Wasálbaragüle, awáanse jugúyame lídan línsiñejabu. ¡Uweíriguni lun, guetó lúma súnwandan! Ítaralá.

FURÚMIÑETU **LIGÁRADAN APÓSTOLU JUAN**

Dimúrei le lánina ibágari

¹ Wabürüjaña jun luágu Búngiu Irájü lé buga níjeinjalibe dan le lagúmeserunbei sun cátei. Ába liabin Búngiu Irájü uboúagun queísi ában gürígia, aríja wamúti láu wágu, agáamba wameí ladímurejan. Aríja wamúti sun le ladügübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíribei “Dimúrei”. ² Ába liábin uboúagun, quei nubeíbei jun, aríja wamúti, geféen wagía luágu, áni guetó wabürüjaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin uboúagun queísi gürígia lun gayáraabei lan wasúbudiruni. ³ Wafúraanguagüdüñein lubeíti jun le aríja wamáalibe ladügün, lúma le agáamba wamáalibe laríñagun, lun gayáraabei lan jafíñerun le tímatimaati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájü, queísi wagía. ⁴ Ítara lúba dayárubei lan wagúndan, sun wagía.

Ítara líña Búngiu queísi lámpu

⁵ Niján ugánu le larúfudajabe Crístu woun, le gíñe wíchugubei jun guetó. luágu ítara líña lan Búngiu queísi ában lámpu, mánti ni cáta lúma lubúriga. ⁶ Ánjawa aríñaga luágu lídaañadiwa lan ában lúma áni madügün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburi lúma linárün. ⁷ Ánjein úaragua lubeí wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchati le waríñagubei. ⁹ Ánjein wagúfesera wafígoun, gayáraabei weménigidun luágu Búngiu luágu ladügübei lan le úaraguabe —ferúduna lubeí wafígoun, jarúmagüda láwame lídaangiñe sun wuríbani. ¹⁰ Ánjawa aríñaga luágu madügüngidiwa lan figoú, wadügüñein Búngiu camá yéeti, áni merésibirun wamágili lerérun tídan wanígi.

¹ Nirájüñü, nabürüjañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucristu lueígiñe wafúleisein ligibugiñe Wáguchi Búngiu, ladüga ligía rügüñein richágua ligibugiñe Búngiu. ² Lídaangiñe Jesucristu ferúdunawa lan wafígoun, áni mámarügü wafígoun, ferúdunawati gíñe jafígoun sun ja afíñebaña luágu.

³ Ánjein wagúnfulira lugúmadin Búngiu, wasúbudirubei luágu chülüjadiwa lan asúbudirei Búngiu. ⁴ Ánjein aríñaga ában gürigia. “Subúdi numúti Búngiu”, áni magúnfulirunti táu lugúmadin, yéeti gürigia ligía, ibídiñegili Búngiu lun. ⁵ Ánjeinti gürigia le adügübalin le lubeíbei Búngiu, chülüjali Búngiu ínsiñeda lun buídu buídu, ítara líña wasúbudiruni luágu lídaañadiwa lan ában lúma. ⁶ Le aríñaguti luágu lídaañein lan ában lúma Búngiu, lúnti labágaridun queí meja labágaridun Jesucristu ya uboúagu.

Le iséri gumádi

⁷ Nidújeñu, mámatia iséri gumádi le nabürüjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úaragua lúma ugánu ligía. ⁸ Guetó narítaguagüdüñadün luágu gumádi le lagúarubei Jesucristu iséri gumádi, áni gumádi ligía, lun jínsiñegua wamá woúniagua. Ítara liñá meja labágaridun Jesucristu, jabágariduña gíñe ítara lugúndun jeíbuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. ¹⁰ Le jínsiñejabuti joun lidújeñu lueígiñe Jesucristu, lídaañein larúgounga, subúditi Crístu lun, áni úati ni cáta lun láburugüdüni lídoun figoú. ¹¹ Ánjeinti le iyéreejabuti lun lidúje, ítara líña queísi gürigia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájüñü, nabürüjaña jun lugúndun ferúduna láali Búngiu jifígoun ladüga Crístu. ¹³ Agübürigu, nabürüjaña jun lugúndun subúdi jumáali lan Jesucristu lé meja níjeinjalíbei lúmagiñe furúmiñeti dan. Ñübürigiña, nabürüjaña jun lugúndun gáñei jumáali lan wuríbu luágu Máfia.

Nabürüjanbei jun, nirájüñü, lugúndun subúdi jumáali lan Búngiu Úguchili. ¹⁴ Nabürüjaña jun, agübürigu, lugúndun subúdi jumáali lan Jesucristu lé meja níjeinjalíbei lúmagiñe furúmiñeti dan. Nabürüjanbei jun, ñübürigiña, lugúndun jére jumá, áni resíbi jumáali lerérun Búngiu tídan janígi, lugúndun gíñe gáñei jumáali lan wuríbu luágu Máfia.

¹⁵ Mínsiñedalá ligáburi uboú jun, ní buri cátei le lánina uboú. Siñati lajínsiñedun cátei lánina uboú jun, jínsiñeme Búngiu jun, ¹⁶ lugúndun úati ni cáta lídaangiñe cátei le líchugubei uboú ñübinti lúmagiñe Búngiu, lúmagiñe guánarügü uboú liábin. Luríban jayúmajan gürígia, ayúmajani lun jabíjini cátei le jaríjibeí le uágubei jarítagua luágu buídu lan, lúma pántaü luágu cátei le jabíjibeí, ligía buri cátei le líchugubei uboú. ¹⁷ Áni uboú, agúmucheina líña láu buri sun luríban ayúmajani le lídaanbei, ángeinti le adügüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülüjali lagúmujoún dan. Agáambaadün luágu iníte lan Lágani Crístu, quei chülüguuaña lubeí sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le. ¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun larijíniwa furáangu luágu máma lan wánigu le tímatimaati.

²⁰ Ángeinti jugúya, rúlaali Crístu Sífiri Sándu jun, áni subúditün sun jugúya lun. ²¹ Nabürüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

²² Ja arúfudajabalín le múaraanbei, ja aríñagubaña luágu máma lan Jesúsu Crístubei le loúnajabeí Búngiu uboúagun lun lasálbaruniña gürígia, jagía láganibaña Crístu, mafíñetiña ni luágu Búngiu Úguchili, ni luágu Búngiu Irájü. ²³ Sun ja májabaña lun jasúbudiruni Jesúsu queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsu lan Búngiu Irájü, subúditi gíñe Búngiu Úguchili joun.

²⁴ Ligía, areída jumeí lubeí ugánu le jagáambubei lúmagiñe furúmiñeti, tídan janígi. Ángein jadüga ítara, jeréderuba gíñe lídan ában lúma Búngiu Irájü lúma lúma Búngiu Úguchili, ²⁵ jerésibiruba gíñe ibágari le magúmuchaditi, queísi laríñaguni Jesúsu woun. ²⁶ Ligía nerérunbei jun jawágu láganiñu Crístu jagía já yebe busénbaña jayéedagunün. ²⁷ Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabeí, máma iyéeni.

²⁸ Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu

wawágu ligíbugiñe.²⁹ Queísi subúdi jumáni luágu richágua lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

3

Lirájüñü Búngiu

¹ Arija jumá luweírin wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu uboú gunfaráanda lugúndun ibídifiñeti meja Jesucristu joun lídan linárün cátei dán meja le ya lan uboúagu. ² Nidújeñu jínsiñetiña nun, lirájüñüjadíwa Búngiu guetó, áni marúfudungili woun catabadiwa lan lídaanme lagúmujoún, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubeí. ³ Áni sun le agúrababajabálín buri cátei le, jarúmagüda lumúti ligáburi ítara quei jarúma lan ligáburi Crístu.

⁴ Ánjeinti sun le afígounjabei, dürürgua lumúti lilúrudun Búngiu, lugúndun luágu cátei figoúbei ladüraawagún lilúrudun Búngiu. ⁵ Subúdi jumáali luágu lun lan lagídaruni Jesucristu wafígoun liábin uboúagun, luágu gíñe úa lan ni murúsun figoú luágu. ⁶ Sun lubeíti le lídaanbei ában lúma, máma lídaañein figoú, áni sun le lídaanbei figoú, maríjin lágili Jesucristu, masúbudirun lágili gíñe. ⁷ Nirájüñü, mayéedawagua jumá, ában gürigia richáguati ligíbugiñe Búngiu adüga lumúti le richábei, queísi richágua lan Jesucristu. ⁸ Ánjeinti le eíbugubei lídan figoú, lánigu Máfia, lugúndun afígoujati Máfia lúmagiñe furúmiñeti dan, ába liábin Liraü Búngiu lun lagünrinchaguni luwádigimari Máfia.

⁹ Úati ni ában le liraüti Búngiu asígiruti lídan figoú, lugúndun níjein ibágari le líchugubei Búngiu lun lídan, siñáti lasígirun lídan figoú lugúndun liraü lan Búngiu. ¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madügünbalin le buídubei, o mínsiñejabu lan lun lidúje lueígiñe Jesucristu, máma lánigu Búngiu.

Jínsiñe jamá wíbirigu woun

¹¹ Niján ugánu le jagáambubei lúmagiñe furúmiñeti dan. lun jínsiñegua wamá wámagua. ¹² Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladügübei Caín, áni buítí le ladügübei lamúlen, ligía lagímugajanbei.

¹³ Nidújeñu, maweíridalá janígi áanjaün eyéreeguda joun lánigu uboú. ¹⁴ Wagía, ítara wáña meja queísi jiláña, guetó ibíjaadiwa ibágari magúmuchaditi, áni subúdi wamúti líra

lugúndun jínsiñetiña wadújeñu lueígiñe Jesucristu woun. Le mínsiñejabuti lun lidúje, jiláñu mémegili. ¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmuchaditi. ¹⁶ Subúdi wamúti cátei lan ísiñenibei. luágu líchuguni Jesucristu libágari wawágu. Lúnti giñéti wánjarun lun wíchuguni wabágari jawágu wíbirigu. ¹⁷ Ánjein níjein lubeí lúma ában gürígia lun lawínwandun, áni laríja luágu níjein lan lemégeirun lidúje áni míderagun lumúti, ¿ída lubági níjein lan ínsiñeni tídan lanígi lun Búngiu? ¹⁸ Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjín lídan cátei le wadügübei.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá afíñeni le inárüntibei, gayáraabei gíñe wasúbudiruni luágu buídu lan weréderun ligíbugiñe Búngiu. ²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun. ²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu, ²² luágu líchugubei lan sun le wamúriajabei lúma woun, lugúndun gúñfulijadiwa láu lugúmadin áni adüga wamáali le áubei lagúndaara. ²³ Lugúmadin Búngiu, lun wafíñerun luágu Jesucristu le Liraü, lun gíñe jínsiñegua wamá wámagua queísi meja laríñaguni Jesúsu woun. ²⁴ Ja agúñfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

4

Láni Búngiu Espíritu lúma láni láganí Crístu espíritu

¹ Nidújeñu jínsiñetiña nun, mafíñera jumá joun sun ja aríñagubaña luágu Búngiu lan adímurejabei jayúmulugugiñe, joúcha jumáña lun jaríjini ánjein Sífiri Sándu lubeí le jádaanbei o máma lan ligía. Lugúndun labuínchuña uboú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni. ² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu uboúagun, níjein Sífiri Sándu lídan áni láu lubáfu Sífiri Sándu ladímureja. ³ Ánjeinti le aríñaguti luágu iyéeni lan, luágu mayábin lan Crístu uboúagun queísi gürígia, úati Sífiri Sándu lídan, espíritu le láganibeí Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali uboúagu.

⁴ Nirájüñü, lánigu Búngiu jugúa, gáñei jumáña yéetiña jagía ja busénbaña jagáraguagüdünün lueí arúfudajani le inárüntibe, gáñei jumáña lugúndun gabáfutimaati Sífiri Sándu le jídaanbei sügú láu láni Máfia espíritu le jádaanbei. ⁵ Lánigu uboú jagía, lánina uboú cátei le jarúfudajabe, ligía lébubei jagáambuniña ja gíñe lánigubaña uboú. ⁶ Ánjein wagía, lánigu Búngiu wagía. Le subúdijabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburi Búngiu lun larúfuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraü Búngiu, áni subúditi gíñe Búngiu lun. ⁸ Le mínsiñejabuti, ibídíñegili Búngiu lun, lugúndun ligáburi Búngiu lun larúfuduni ínsiñejabuni. ⁹ Arúfuda lumúti Búngiu wínsiñe lun láu loúnajani Liraü le ábanrugi uboúagun lun loúnwen, lun gabágari wamá lídaangiñe. ¹⁰ Niján ínsiñenibe, máma luágu wagía lan jínsiñejabubei lun Búngiu, luágu ligía lan jínsiñejabubei woun, ába loúnajani Liraü le ábanrugi lun loúnwen, lun lébuname ferúdunawa lan wafígoun.

¹¹ Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti gíñe jínsiñegua wamá wámagua. ¹² Úagili ni ában aríjiti Búngiu, láu sun líra, ánjawa jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. ¹³ Rúlaali Búngiu Sífiri Sándu woun lun lachoúrurun luágu lídaañadiwa lan, áni wádaañein lan gíñe. ¹⁴ Wagía guánarugi aríja wamáali Liraü Búngiu, aríñaga wameí luágu lun lan lasálbaruníwa loúnajei Búngiu uboúagun. ¹⁵ Furúmieguarugi le afíñerubei luágu Liraü lan Búngiu Jesúsu, labágariduña lídan Búngiu, áni labágariduña gíñe Búngiu lídan.

¹⁶ Ítara líña wayábin asúbudirei lúma afíñera luágu jínsiñe wamá lun Búngiu. Ligáburi Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña gíñe Búngiu lídan. ¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüduniña Búngiu sun gürígia ladüga wagáburiduña lan ya uboúagu queísi Jesucristu. ¹⁸ Ánjein jínsiñe Búngiu woun le gumúti, manúfudebadíwa luágu le lúnbei ladügini woun, láu luweírin línsiñe Búngiu woun, gidáti sun anúfudei waweí. Ánjein janúfude wabeí lueí Búngiu, ladüga wagúrabajaña lan láburujan ligáñi wawágun. Ligía,

ánjein janúfude lubeí ában gürígia, machülügilirügү líña Búngiu ínsiñeda lun le tímatimaati.

¹⁹ Wagía, jínsiñeti Búngiu woun lugúndun wínsiñedun lun furúmiñe. ²⁰ Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun, le maríjin lubeí. ²¹ Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

5

Wagáñeiruni wuríbu lúma uboú

¹ Sun ja afiñebaña luágú Jesúsu lan Crístubei le loúnajabei Búngiu, jagía lirájüñubaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu. ² Subúdi wamúti luágú dan lan le jínsiñe lan Búngiu woun áni adüga wameí le lubeíbei, jínsiñe jamá gíñe lirájüñü Búngiu woun. ³ Ladügünüwa le lubeíbei Búngiu, ligía ínsiñejabunibei lun, áni majürüti lugúmadin, ⁴ lugúndun sun le liraübei Búngiu, mabáfuti cátei lánina uboú luágú. Wafíñen, ligía cátei le íchigubei ubáfu woun lun wagáñeirun luágú cátei lánina uboú. ⁵ Le afiñebei luágú Jesúsu lan Liraübei Búngiu, ligía rügüñein gayára lagáñeirun luágú cátei lánina uboú.

Geféenwa lan luágú Liraü Búngiu

⁶ Jesucrístu ligía ñübinbei láu bián seíni luágú ligía lan Liraübei Búngiu. bián seíni ligía, dúna le lánina labásterun, lúma jítäu le lánina loúnwen. Mámarügү láu dúna, láu dúna lúma jítäu. Áni Sífiri Sándu guánarügү geféenti luágú cátei le, ligía arúfudubalin sun inárüni woun. ⁷ Añájein ürüwa geféentiña luágú cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía, ⁸ níjein gíñe ürüwa cátei geféenti múarugü luágú Jesúsu lan Liraübei Búngiu. Sífiri Sándu, dúna le lánina labásterun Jesúsu, lúma jítäu le lánina loúnwen. ⁹ Resíbi wamúti le jaríñagubei wügüriña, gúbuméti lúnti lan werésibiruni le laríñagubei Búngiu guánarügү luágú Liraü lan Jesucrístu. ¹⁰ Le afiñeti luágú cátei le, choúru lumúti tídan lanígi luágú inárüni lan, le mafíñebei, adüga lumúti Búngiu camá yéeti, lugúndun mafíñen lan luágú le laríñagubei Búngiu luágú Liraü. ¹¹ Le laríñagubei Búngiu, luágú rújali lan ibágari magúmuchaditi woun, áni lídaangiñe lan Liraü liábin ibágari ligía. ¹² Le níjeinbei Liraü Búngiu lúma, níjein gíñe ibágari le lúma, ánjeinti le úabei Liraü Búngiu lúma, úati gíñe ibágari le lúma.

Lagúmujoún buri lerérun Juan tídan gárada to

¹³ Nabürüjañein cátei le jun, jugúya le afíñebei luágu Liraü Búngiu, lun jasúbudiruni luágu gabágari jumá le magúmuchaditi.

¹⁴ Jeménigitiwa luágu Búngiu, lugúndun subúdi wamúti luágu ánjawa lan amúriaia furúmieguarügü cátei queísi labúseerun, lagáambubadiwa. ¹⁵ Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu loúnabubadiwa lan.

¹⁶ Ánjein aríja ában gürígia luágu ladügüña lan ában libíri ában figoú le mámabei lúnti lanügni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Níjein figoú anügüti gürígia lídoun féridi magúmuchaditi, málati lun layúmurawagúniwa lun Búngiu luágu figoú ligía. ¹⁷ Sun wuríbani figoú, máma sun figoú lun lanügni gürígia lídoun féridi magúmuchaditi.

¹⁸ Subúdi wamúti luágu gürígia lan le anügübalin Búngiu queísi Lúguchi, meíbugunti lídan figoú, lugúndun toúnigi lumúti Liraü Búngiu, siñáti ladügün Máfia ni cáta lun.

¹⁹ Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña uboú.

²⁰ Subúdi wamúti gíñe luágu ñübinjali lan Liraü Búngiu uboúagun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraü, le Jesucristubei. Ligía Búngiubei le tímatimaati, ligía gíñe le íchugubei ibágari le magúmuchaditi woun. ²¹ Nirájüñü, mafálara jumána búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Inárüni lúma ínsiñeni

¹ Áu le weíriei mútu, nabürubañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu. ² Jínsiñetün woun ladüga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi. ³ Búngiu Úguchili, lúma Wabúreme Jesucristu le Liraü Úguchili, jabínirubadün, jíchugubei jagúdemejabu lúma jadárangilan jun lídan jabúruchaguagdüni larúfudajan Crístu lúma ínsiñejabuni.

⁴ Oúnwenbun nugúndan láu nadárirun jádaangiñe birájüñü abágarida queísi lubúdubu, ítara queísi laríñagun Wáguchi Búngiu woun lun wabágaridun. ⁵ Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabürübabei bun, ligía méme le wámabei lúmagiñe furúmiñeti dan, dan le wagáambubei luágu Crístu. ⁶ Míni lan ínsiñeni, lun wabágaridun segúñ lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña uboúagu ja mafíñebaña luágu quei lan gürígia tímatimaati liábin Jesucristu uboúagun. Le ítarabei, ligía le yéebeti, le láganibei Crístu. ⁸ Duári jumá jaweí, jueí jeféridiruni le ñübinbei jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹ Furúmieguarügü le oúfudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, áanjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma. ¹⁰ Ánjein achüllüra ában gürígia júmoun máma láu arúfudajani le, merésibira jumeí júbiñe, mabúsurun jugúyame lun, ¹¹ lugúndun le abúsuruti lun, gádan lumúti gíñe wuríbani le ladügübei.

Lagúmujoún buri dimúrei

¹² Níjein sarágu cátei lúnti naríñaguni jun, mabúseerúntina abürüjarügü náni jun, agúrabatina nídin aríjaün lun nayánujan júma, lun lagúñfulirun wagúndan.

¹³ Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

TÜRÜWAN LIGÁRADAN APÓSTOLU JUAN

Buítí ladímurejoún luágu wügüri le gíribei Gáyo

¹ Áu le weíriei mútu, nabürüjañoun gárada to bun, numáda Gáyo, le jínsiñbei nun le gumúti.

² Numáda jínsiñeti nun, nayúmuragun lun Búngiu lun buídu lan lídin sun cátei bun, lun gíñe magádie ban ítara queísi buídu lan lídin bun lídan beíbugun lúma Crístu. ³ Oúnwenbun nagúndaarun dan le jayábinbei jádaangiñe wadújeñu lueígiñe Jesucristu, ába jabájüdagun nun luágu bugúnculin quei babágariduña lubeí úaragu lúma larúfudajan Crístu. ⁴ Úati ámu cátei agúndaaraguagdütina queísi dan le nagáambun luágu jabágariduña lan nirajüñü lídan úarani lúma larúfudajan Crístu.

⁵ Numáda jínsiñeti nun, buítí boúserun lídan esériwiduni le badügübei joun wadújeñu lueígiñe Jesucristu, joúntima ja lílana ámu fulásu. ⁶ Abájüdaguatiña ligíbugiñe adámurini le yábei luágu bínsiñejabu joun. Adügabeí fuléisei le. íderagua báña láu le jemégeirubei lun jasígiruni jaweíyasun lídan ában igáburi le áuti lagúndaara Búngiu. ⁷ Furítiña lun jesériwidun lun Crístu, merésibiruntiña ni cáta jámagiñe ja ibídiñejabubaña lun Búngiu. ⁸ Ligía lúnti lubeí weténirun joun, lun wíderaguniña lídan lapúrichijoún lerérung Búngiu.

Luríban loúserun Diótrefes

⁹ Abürüyatina buga ában gárada joun tílana ligílisi, májati Diótrefes lídin láu le wabeíbei lugúndun busénti ábuti lan jádan súnwandan. ¹⁰ Ánjana lubeíti ñüdün, nereruba lun luágu le ladügübei, adáagua marásualugu lúma iyéeni wawágu. Boúgudin lueí líra, merésibirun lumútiña wadújeñu ja achülürutiña, áni mája ligía lun jerésibiruniña ámu, ja erésibirutiña, ába labúguniña lídaangiñe adámurini le táni ligílisi.

¹¹ Numáda jínsiñeti nun, mafálarabeí jémpulu wuríbatí le, adügamemebeí le buídubei. Le adügüti buítí, lánigu Búngiu, áanjein le adügüti wuríbatí, ibídiñegili Búngiu lun.

Lubuídun láni Demétrio jémpulu

¹² Buítí jadímurejan súngubei luágu Demétrio, áni inárüni luágu buídu lan ligáburi. Geféentiwa gíñe luágu cátei le, áni subúdi jumúti luágu inárüni lan le waríñagubei.

Lagúmujoún buri dimúrei

¹³ Gíbeti yebe lúnti naríñaguni bun, mabúseerúntina abürüjarügü náni, ¹⁴ lugúndun agúrabatina naríjinibu madíse, ábameti wayánujan.

15 Darángilabá. Mábuga jáña umádagu yána bun, rúbei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labüriüjan Júdas joun ja únbaña wájali lan Búngiu lun lánigu jamá

¹ Áu Júdas, esériwiduti lun Crístu áu, áni lamúlen gíñe Jacóbo, nabürüjañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubáña Jesucristu séfuñu lueí buri cátei lánina uboú le. ² Resíbi jumá sarágu gudémejabu, darángilaü, lúma ínsiñeni lúmagiñe Búngiu.

Ja arúfudajabaña iyéeni

³ Nidújeñu jínsiñetiña nun, weírijali nabúseerun nabürüjan jun luágu asálbaruni le wabíjibei, dándu jugúya queísi áu, guetó sandíguatina núngua luágu lúnti lan nabürüjan jun lun nayúmuragun jun lun jáfaagun luágu afiñeni le lederegerubei Búngiu ában weíyaasu lun sun dan joun lánigu. ⁴ Naríñagubalin le jun lugúndun añájein lan arúfudajatiña yéetiña ádaragutiña joúngua jagánaguouén. Gürígia buri jagía, arúfuda táñia Lerérunt Búngiu lúmagiñe binárün luágu lúnti lan jasúfuriruni lafáyeiragüle jaríban, buídu. Wügüriña wuríbatiña jagía, minébenti Búngiu joun, arúfudaja jagía luágu gayára lan jadügün gürígia furúmieguarügü cátei mabuídunti, mabeíchun lubáña lan Búngiu lueígiñe, ladüga luweírin lareíni, ayeedagua jagía gíñe luágu Jesucristu, Wabúreme le ligiarügüti, le únbei wesériwida.

⁵ Láu sun subúdi jumáali lan, buséntina narítaguagüdünün luágu láu lan sun sagá lániña meja Búngiu lumútuniña Israelítagu Ejíptogíñe, lárigiñe, ába lagúmuchaguagüduniña ja mafíñerunbaña jádan. ⁶ Ánjeligu ja mareídunbalin jabára, ígirarügü jameí jábiñe siélu lun jagárabaagun luágun Búngiu, añájein adaürüwaňu lurúma Búngiu, gürágu lídan lubúriga láu güríngüri magúmuchaditi, agúrabajei oúnwenbun wéyu le lánina agúseruni. ⁷ Ja lílana buri ubúrugu Sodóma luma Gomórra, lúma fulásu buri le yaráfabei lun, ába jagárabaagun luágun Búngiu queísigubeirügü ánjeligu ja, ába jíchaagun joúngua lun salúfuri, ába jígiraguagüdün joúngua lun sun luwúyeri wuríbani darí lun lagámaridun wügüri wügüri líledi, würi würi tíledi. Ába lagúmuchaguagüduniña Búngiu láu wátu geméti. Reídeitiña queísi ewéridiruni joun sun gürígia, arúfudei ligáburi ída lúba lan lafáyejan Búngiu luágu figoú.

⁸ Ánjeinti láu sun jémpulu líra, wügüriña buri gíñe ja jagánaguubaña, láu jafálaruni arúfudajani le maríchabei, wíyedaguatiña joúngua, májatiña lun lugúmadin Búngiu, anába

jamáña ubáfu buri ja íñugutimaabaña.⁹ Ánjeinti arcánjel méme Miguél, dan le lasígenjanbei lúma Máfia lueígiñe lúgubu Moisés, moúchunti lun líñaragun láu anabúni, aríñagarügüti lun. “Ébecha lábu Wabúreme Búngiu.”¹⁰ Ánjaña wügüriña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasándiruni queísi jasúbudiruni anímaalu úouga gunfaráanda jamá, ligía buri cátei le jadügübei, ába janügün gürínguaü jawoúguoún láu joúserun.

¹¹ ¡Fugiábugu jagía! Falá jamaali láni Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queísi Coré le oúwebei luágu lumágaambadin lun lerérun Búngiu.¹² Nibúsigaridünatiña lídan buri jufédun le lánina jínsiñegua júmagua, le ñí lubei jeíga, gurá jagía láu ugúndani, minébenejábuga. Ítara jáña queísi joúniri mudún ja joúnguarügübei joúnigragua. Ítara jáña queísi juánriñu magánati dúna le lanügübei garábali, tídbu wéwe to magíinduntu lídan tidáani, ítara jáña queísi tídbu wéwe to ájulutu láu sun tílagüle, úuali ju jamá.¹³ Ítara jáña queílanárame buri lugúdi barána, arúfudei jagáburigu le nibúsigarídünati quei jacútaü. Ítara jáña quei warúguma buri ja féridi jamáali jémeri, íñarawagúaaña lun jeréderun lídan líwurin-ágei lubúriga lun sun dan.

¹⁴ Enóc gíñe le jasédün gürígia lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le laríñagunbei. “Aríja numúti Nabúreme liábin jáma sarágu mílu jádaangiñe láni ánjeligu¹⁵ lun lagúseragüdüniña sun ja wuríbabaaña luágu sun wuríbani le adüga jamáalibe, lúma luágu buri dimúrei deréti le aríñaga jamáalibe luágu. Lasádirubaña sun gafígoountiña jagía luágu le jadügübei.”¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadügübei ámu, lún rügüñein jagúñfulirun lúma lagübüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri gürígia lúnrügü jaságarun cátei buíti joúngua jádaangiñe.

Lererún joun afiñetiña

¹⁷ Jugúyati nidújeñu jínsiñetiña nun, jarítagua jumá luágu le laríñagubei Jesucristu jádaangiñe láni apóstolugu luágu buri cátei le lúnbei lasúseredun.¹⁸ Jariñajare. “Lídoun buríme lagúmujoún dan, añájeinbaña gürígia éjerajatiña láu buri cátei le láni Búngiu, agánawa jagíame úaragua lúma jagúndan le wíyebi.”¹⁹ Jadüga buri ja, níjein lubeí fánreinguaü, falá jamuti jagúndan le lánina uboú, úati Sífiri Sándu jádan.

²⁰ Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu. ²¹ Mabúlieida jumeí luágu jínsiñe jumá lun Búngiu, agúraba jumeí wéyu le lúnbei líchuguni Wabúreme Jesucristu ibágari magúmuchaditi woun láu lugúdemejabu.

²² Afíñegüda jumáña ja loúguabaña afíñe. ²³ Sálba jumáña jíbirigu camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafígoountiña jun, láu sun, goúnigi jumá lueí jadügüni wuríbani le jadügübei, iyéreegulá jaríban jun queísi gamísá wíyetu, lueí gíñe jeíguadun lídoun luríban üma quei jagía.

Lagúmujoún buri ladímurejoún luágu luweírigun Búngiu

²⁴⁻²⁵ Búngiu le ábanrügübei, le sábiubei, le Wasálbaragüle lídaangiñe Wabúreme Jesucristu, gabáfuti lun loúnigirunün lueí jeíguadun lídoun figoú, lun gíñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucristu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucristu

¹ Niján buri cátei le larúfudubei Búngiu lun Jesucristu lun lasúbudiragüduni joun lánigu cátei lé buri lúnbei lasúseredun madíse. Subúdigüda láali Jesucristu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le laríjubei, geféenti luágu láni Búngiu ugánu lúma luágu le aríñaga láalibei Jesucristu.

³ Gúndaatiña gürigia ja alíjabalin jáma ja agáambubalin lali-ijoún ugánu le, le erésibirüabe lúmagiñe Búngiu, adüga jagía gásu láu cátei le bürüwañubei ya, ladüga yaráfaali dan lun lasúseredun.

Labürüjan Juan joun tílana sédügubei ligílisi

⁴ Áu Juan, nabürüjaña joun tílana sédü ligílisi to Ásiaboun. Resíbi jumá abíniruni lúma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá gíñe abíniruni lúma darángilaü jámagiñe sédü espíritugu ja ligíbugiñebaña lála, ⁵ lúma lúmagiñe Jesucristu le aríñagubalin cátei le inárüti, le furúmiñebi ásaaruti lídaangiñe oúweni áni gabáfu ligía jawágu urúeigu ja uboúagubaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶ adüga láadiwa urúeigumé lúma fádirigumé lun wesériwidun lun Lubúngiute, le méme Lúguchibei. ¡Rúalá uweíriguni lúma ubáfu lun, lun súnwandan! Ítaralá.

⁷ ¡Aríja jumá, liábinba Crístu juánriñurugu, jaríjubei sun gürigia ásta gíñe ja áfarubalin! Jayájuba sun gürigia ja uboúagubaña dánme le jaríjini luágu wuríbani le adüga jamáalibe. Ítara lúba.

⁸ “Áu lagúmesejabei sun cátei, áu lagúmuchagülebei, quei létüra ‘A’ lúma ‘Z’”, líña laríñagun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Crístu lun Juan

⁹ Áu Juan, jidúje lueígiñe Jesucristu áu, gafánraantina júma lídan larúeijan Búngiu, súfurijadina úara júma luágu Crístu, resíbijadina gíñe gurásu lúmagiñe Crístu. Reídeitina adaürüwa luágu uboúju le gíríbei Pátmos lueígiñe napúrichijani Lerérunt Búngiu, lúma lueígiñe napúrichijan luágu Jesucristu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu,

ába nagáambun ában umálali reínti nanágangiñe quei lumálali fídu,¹¹ lariñaga umálali ligía nun.

—Áu furúmiñebei lúma agúmujoúni, quei létüra ‘A’ lúma ‘Z’. Abürübabeí sun le baríjubei, ábame boúnañanun gárada tugúya joun títana sédü ligílisi to loúbawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodicéa.

¹² Ába nagáragun lun naríjin ca lan adímurejabei nun, ába naríjin sédü lébu sanúdelu gólu, ¹³ labádinagua sédü lébu sanúdelu ligía ába naríjin ában camá jamuga Wügüri Garaüwarügüti—le Jesucristubei—táu ában anáanguni chÜlütu luágún lugúdi, lúma ában béliti gólu yaráfa lun laníguagu. ¹⁴ Jarúti lídiburi quei líyu mudún, quei moúru, ítara líña lágu quei wátu geméti. ¹⁵ Miríti lugúdi quei brónse le írichawagúaali, le dáwaali lídoun órno, reínti lumálali quei lireín leíbaagun sarágu dúna. ¹⁶ Ñíñanu sédü warúguma lídan lújabu le loúnwenren, ñíñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdün láu sun lére.

¹⁷ Dan naríjinbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wínwantina lun sun dan. Níjein ligélen oúweni núma, lúma ligélen fulásu le ñí jabei jiláguaña. ¹⁹ Abürübabeí lubeíti le baríjubei, le guetóbei lúma le lúnbei liábin. ²⁰ Niján laníchigubei jawáguti sédü warúguma ja baríjubaña lídan nújabu le noúnwenren, lúma sédü lébu sanúdelu gólu. sédü warúguma, jagía sédü joúniri títana sédü ligílisi, sédüti lébu sanúdelu, jagía sédü ligílisi.

2

Ugánu joun títana sédü ligílisi. Ugánu joun títana ligílisi Éfeso

¹ ‘Babürüja lun joúniri títana ligílisi to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédü warúguma lídan nújabu le noúnwenren, le gíñe eíbugubei labádinagua sédü lébu sanúdelu le gólu. ² Subúdi numúti sun le jadügübei, subúdi numúti lidére juwádigimari lúma jagúraasun, áni subúdi numúti luágu siñá lan jáfaguniña ja wuríbabáña. Subúdi numúti luágu joúchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni súfuri jugúya sarágu lídan juwádigimari nuágu, mabúcharunga juágu. ⁴ Láu sun líra, níjein ában cátei jadüga magúndaantina láu. maweírinjali nínsiñe jun queí meja furúmiñe. ⁵ Ligía lubeíti,

jarítagua jumá ída jíñá lán meja, sáansi jumeí jigáburi, adüga jumeí cátei lé meja jadügübei furúmiñe. Ánjein madügün jumá ítara, nídinba juágu furése, ábame nagídaruni lébu jísáandelun lídaangiñe lufúlasun, ábame mámaadün lan títana nilígilisin, ánjein gubeírugü jasáansira jigáburi, ligíaba madügün náni ítara. ⁶ Láu sun líra, luágúñein jáni fuleísei, liyéreegun cátei lé buri jarúfudajabei nicoláitagu jun lúma buri cátei le jadügübei, le gíñe iyéreegubei nun. ⁷ Le garígeirugubei lun lagáambun, agáambaleí le laríñagubei Sífiri Sándu joun títana buri ligílisi. Ja ásiiragúbalin wuríbani, neígagüdubaña lídaangiñe lin tídbu wéwe to lánina ibágari, to lufúlasunruguboun Búngiu.”

Ugánu joun títana ligílisi to Esmírnaboun

⁸ ‘Babürüja lun joúniri títana ligílisi to Esmírnaboun, baríñagame lun lun laríñaguni joun gürígia jagía. “Ítara líña naríñagun, áu le furúmiñeti lúma agúmujoúni, lé meja oúwebei áni wínwanyaali. ⁹ Subúdi numúti sun le jadügübei, subúdi numúti jasúfurirun lúma jugúdeme, láu sun lidan lan linárün cátei, rísi jumá. Subúdi numúti gíñe luágú adímureja jamá ja aríñagubaña luágú juríu jamá wuríbati juágu, máma ámu cátei jagía lueídügya lánigu jamá Máfia. ¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furísunrugun lun loúchawagúniwa jafíñen sun jugúya, áni jasúfuriruba sarágu luágú díisi wéyu. Derégüdagu jumá lidan jafíñen nuágú darí joúnwen, ábame níchuguni ibágari magúmuchaditi jun, jafáyeiruájame. ¹¹ Le garígeirugubei lun lagáambun, agáambaleí le laríñagubei Sífiri Sándu joún buri títana ligílisi. Ja ásiiragúbalin wuríbani, másögürünbaña lídaangiñe libíaman oúweni.”

Ugánu joun títana ligílisi to Pérgamoboun

¹² ‘Babürüja lun joúniri títana ligílisi to Pérgamoboun, baríñagame lun lun laríñagun joun gürígia jagía. “Ítara líña naríñagun, áu le gámabarun efeín to gágiriboun, to biánguaboun amána. ¹³ Subúdi numúti sun le jadügübei, subúdi numúti gíñe luágú Máfia lántima gabáfubei jádan gürígia ja ñí lubei jagánawa, áni láu sun líra, númamemeñadün. Mígirun jumágili jafíñen nuágú, ni íbini lidan dan le láfarúnbei Antipás le geféenbei buíti nuágú ñí lidan fulásu le ñí jubei, le ñí lubei lagúmadija Máfia. ¹⁴ Láu sun líra, níjein buri cátei jadüga, magúndaantina láu. luágú añájein lan fiú gürígia júma yára Pérgamo ja májabaña jígoruni cátei lé meja larúfudajabei Baláam, le íchugubei dimúrei lun Balác lun lafigoungüduniña Israelítagu láu jeígin eíginí le adágarawagüduti joun sándu, lúma láu jabágaridun lidan salúfuri. ¹⁵ Ítara méme gíñe, añájein ja májabaña jígoruni cátei lé buri jarúfudajabei nicoláitagu júma ñí, cátei le iyéreegubei

nun. ¹⁶ Ligía, sáansi jumeí lubeí jigáburi, ánjein madügün jumá ítara, nídiba juágu madíse, ábame nageíndagun jáma gürígia ja adügübalin cátei buri le, táu efeín to áfuriduboun niyúmulugugiñe. ¹⁷ Le garígeirugubei lun lagáambun, agáambaleí le laríñagubei Sífiri Sándu joún buri títana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dübü jarúti lun láu ában íri iséri búrúwañu luágu le ibídiñeti ni ca un lueídügüya lun le erésibirubalin.

Ugánu joun títana ligílisi to Tiatíraboun

¹⁸ ‘Babürüja lun joúniri tilana ligílisi to Tiatíraboun, baríñagame lun lun laríñagun joun gürígia jagía. “Ítara líña naríñagun, áu le Liraü Búngiu, le ítarabei águu quei wátu geméti, liábin lugúdi quei brónse le írichawáguaali. ¹⁹ Subúdi numúti sun le jadügübei, subúdi numúti jísiñejabu, jafíñen, jesériwidun láu jugúraasun, subúdi numúti gíñe luágu jadügüña lan cátei buiti guetó lueí meja furúmiñe. ²⁰ Láu sun líra, níjein ában cátei jadüga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganoún lídan salúfuri lúma lun jeígin eígini le adágarawagüdúti joun sándu. ²¹ Rújadina dan tun lun tasáansiruni tigáburi, májagiru tígiruni tisálufurin. ²² Ninárün jáu luágu náburugüdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadtáagubei, ²³ ábame náfaraguniña tirajüñü jilágubei, ítara lúba jasúbudiruni sun nánigu luágu subúdi náni lében arítaguni lúma tében anígi, ábame nafáyeiruni cára ában jídaangiñe según le ladügübei. ²⁴ Ja jíbiri ja Tiatírabaña, ja mafálarubalin arúfudajani ligía, machülügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anügüni jawágu. ²⁵ Ragüjumei lubuídun jigáburi darí niábin. ²⁶ Ja ásiiragúbalin wuríbani, adüga méme jameíme le nabúseerúbei ladügün darí lun joúnwen, níchuguba ubáfu joun luágu buri fulásu, ²⁷ ítara quei líchugun Núguchi Búngiu ubáfu nun. Ábame jedéraagüduni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi soúdieru le láuti múa. ²⁸ Níchuguboun gíñe warúguma to lánina bináafin joun. ²⁹ Le garígeirugubei lun lagáambun, agáambaleí le laríñagubei Sífiri Sándu joún buri títana ligílisi.”

3

Ugánu joun títana ligílisi to Sárdisboun

¹ ‘Babürüja lun joúniri tilana ligílisi to Sárdisboun, baríñagame lun lun laríñagun joun. “Ítara líña naríñagun, áu le jáubei

sédü espíritugu láni Búngiu jáma sédü warúguma. Subúdi numúti sun le jadügübei, subúdi numúti luágu jiláñu jíñan lan lún buri cátei le nuáguti, láu sun ariñawagúa lan luágu wínwan jumá. ² Agágudúa jumá, rújuma érei lún buri cátei le níjeinguabei, lubáragiñe loúnwen, arija náali luágu múaran lan le jadügübei ligíbugiñe Búngiu. ³ Jarítagua jumeí lubeíti le arúfudajoúbei jun, falájumei, sáansi jumeíme jigáburi. Ányaün magágudun, nídiba juágu quei liábin ában jíweruti ibídiñoun óra jun. ⁴ Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jeíbuguba núma táo anáanguni jarútu ladüga yúuti joun. ⁵ Ja ássiiragúbalin wuríbani, jadáüraguba anáanguni jarútu, áni magídarun nubeí jíri tídaangiñe líburu to gáubalin jíri ja lúnbaña jabíjini ibágari magúmuchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu. ⁶ Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadélfiaaboun

⁷ ‘Babürüja lun joúniri tílana ligílisi to Filadélfiaaboun baríñagame lun lun laríñagun joun. “Ítara líña naríñagun, áu le sándubei, le gíñe inárünibei, le gámalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸ Subúdi numúti sun le jadügübei. Rújadina ában béna júnren jigíbugiñe le lásiñerun ni ában adáura, ladüga láu sun loúgua lan jére, adügaadün gásu láu nugúmadin, áni meyéeraguntún luágu nánigu jumá. ⁹ Aríja jumá, nadüguba lun jayábin lánigu Máfia ja yéebaña, ja ariñagubaña luágu juríu jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu. ¹⁰ Areída jumáali nugúmadin lun gagúraasun jumá, ligía nareídubadün lubeí lueí lidáani oúchawagúni le lúnbei liábin luágu sun uboú lun jouchúniwa sun ja uboúagubaña. ¹¹ Madísebei niábin, mígira jumeí ni ában lun lagídaruni jafíñen nuágu, meféridirun jumámuga ni cátei lídaangiñe le lúnbei níchuguni jun. ¹² Ja ássiiragúbalin wuríbani, níchugubaña quei wagábu tídan Lúban Nubúngiute, mafuridundügüyañame ñígiñe, ábame nabürüdüni líri Nubúngiute jawágu lun lasúbudirúniwa luágu lánigu jamá, lúma líri ubúrugu le láni Nubúngiute, le iséri Jerusalén le ñübinbei siélugíñe lúmagíñe Nubúngiute, nabürüdübei gíñe iséri níri jawágu. ¹³ Le garígeiruguti lun lagáambun, agáambaleí le laríñagubei Sífiri Sándu joún buri tílana ligílisi.”

Ugánu joun tílana ligílisi to Laodicéaboun

¹⁴ ‘Babürüja lun joúniri tílana ligílisi to Laodicéaboun, baríñagame lun lun lariñagun joun. “Ítara líña naríñagun, áu le inárünibei, le gaféenbei buídu, le aríñagubalin inárüni, le ídaangiñebi liábin sun cátei le ladügübei Búngiu. ¹⁵ Subúdi numúti sun le jadügübei, subúdi numúti luágu madíli jumá lídan jesériwidun nun, másü jugúya. ¡Dilígubeijadün jamúga o süjuma! ¹⁶ Quei bachárügü jubeí, madilitün, másü, newérejabadün niyúmulugugiñe. ¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jína. ¹⁸ Ligía níchugunbei dimúrei jun lun jagáñijan gólu le afínujoúaali láu wátu geméti númagiñe, lun rísi jumá le tímatimaati, lun gíñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin. ¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jígáburi. ²⁰ Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma. ²¹ Ja ásiiragúbalin wuríbani, níchuguba ubáraü joun númagua luágu nála le lála urúei, ítara quei násíraguni wuríbani, ába nañúurun lúma Núguchi luágu lála. ²² Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

4

Ájuduraguni lun Búngiu, siélu

¹ Lárigiñe sun cátei le, ába naríjin ában béna júnren siélu, liábinti umálali le ítarabei quei lumálali fídu, lé buga adímurejabei nun, ába laríñagun nun.

—Weínba ñajoun, narúfudaali cátei lé buri lúnbei lasúseredun lárigiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³ Ítara líña camá ában dübü miríti, le jáspe o cornalína, ñíñoun ában jerémuuru geyégu láu jalaü ligía, mirítu quei ában dübü le esmerálida. ⁴ Geyégu láu lála urúei ligía aríjayatina ában wein-gádürü lála urúei, ñíñianu wein-gádürü gürígia ja weírigutiña ñun luágu, táu jadáuragun jarútu lúma rídi gólu jábulugu. ⁵ Lueígiñe lála Búngiu ligía áfurijati labíriganouga lúma wayújururu, ligíbugiñe lála, ñíñein sédü lámpu geménu, jagía sédü láni Búngiu Espíritugu. ⁶ Ñíñein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégua láu lála Búngiu, ñíñianu gádürü cátaña gabágaritiña buin láu águu, dándu jagíbugiñe quei janágangiñe.

7 Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügüri, le jürüwan, ítara líña ligíbu quei ligíbu ában wügüri, le jagádürün, ítara líña quei ában ágilá ájamajatu. 8 Gádürügubei jagía, sísiñein arünaü luágu cáda ában jádaangiñe, buin jáña láu águu jawágú, dándu boúgudigiñe quei múnadagiñe jabíti, wéyuagu áriebu jáu agúaraja.

Sándu, sándu, sándu,

Wabúreme Búngiu, le Súnti Gabáfu,

le wínwanbei lúmagiñe lubáragiñe furúmiñeti dan, wínwan ligía
guetó, wínwan ligíame sun dan.

9 Ságüti jíchugun cátaña gabágaritiña ja inébesei lúma eteíngiruni lun Búngiu le ñúnbei luágu lála, le gabágaribei lun sun dan,¹⁰ ábaja jájuduragun wein-gádürü weíyaaña mútu jagía ligíbugiñe, ába jarúfuduni jínsiñejabu lun Búngiu le gabágaribei lun sun dan, ába jíchuguni jarídin ligíbugiñe, ába jagúarajan.

11 Wabúreme, Wabúngiute, garíchatibu lun berésibiruni uweíriguni, inébesei, lúma ubáfu,
ladüga Amürrü adügübalin sun cátei,
láu bugúndan badügei, láu gíñe bugúndan níjein lubeí sun le
níjeinbei.

5

Líburu lúma Mudún

1 Ábatí naríjin ában líburu lújaburugu Búngiu le ñúnbei luágu lála, abürüjoúatu líburu tugúya turágeirugu lúma tigíbuagu, darúatu láu sédü séyu. 2 Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladárarunun líburu lúma lun lajeíridunun tiséyun?

3 Úati ni ában garíchati lun ladárarunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchati. 4 Ába nayájun sarágu ladüga úa lan ni ában garíchati lun ladárarunun líburu tugúya, ni lun lalíjanun, ni íbini lun laríjinun. 5 Ábatí laríñagun ában jádaangiñe weíyaaña mútu nun.

—Jebé bayájun, ladüga Jesucristu, le “liñún” le jádaangiñebei ladügawagun Judá, le linébaanfan urúei Davíd, siríigua láali wuríbani lun gayára lan ladárarunun líburu lúma lun lajeíriduni sédü tiséyun.

6 Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaali. Sédüñein ligáanchun, sédü lágu, águu buri ligía, láni Búngiu sédü Espíritugu ja oúnajoúbaña lídoun sun uboú. 7 Ñübinti Mudún ligía, le Jesucristubei, ába lanügünun

líburu tugúya lújaburugugiñe Búngiu. ⁸ Dan le lárügütünbarun líburu, ába jájuduragun gádürü cátña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹ Niján urému iséri le jerémujabe.

Garičhatibu lun banügünun líburu, lun bajeíridunun tiséyun, ladüga áfarúa ban, ába bagáñijaniña gürígia lídaangiñe sun rása, sun luwúyeri dimúrei, fulásu lúma néchaani.

¹⁰ Adüga báña urúeigumé jáma fádirigumé lun jesériwidun lun Wabúngiute, lúma lun jagúmadijan uboúagu.

¹¹ Lidan le naríagun, ába nagáambuni jamálali sarágu ánjeligu geyégu láu lála lúma geyégu jáu cátña gabágaritiña jagía, jáma weíyaaña mútu jagía. Ñíñanu míñun míñun ánjeligu, ¹² jaríñaga láu umálali jéreti.

Yúuti ubáfu lúma irísini, subúdi lúma érei, uweíriguni lúma inébesei, lúma eteíngiruni lun Jesucristu, Mudún le áfarúbei.

¹³ Agáamba numúti gíñe jaríñaguni sun cáteli le ladügübei Búngiu siélu, le múarugubei, le lábugiñebei múa, lúma le baránajabe, lúma sun cáteli lé buri lídaanbei.

Rúalá eteíngiruni, inébesei, uweíriguni, lúma ubáfu lun Búngiu le ñúnbei luágu lála, lúma lun Mudún, lun sun dan.

¹⁴ Ába jaríñagun gádürü cátña gabágaritiña jagía.

—¡Ítaralá!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

6

To sédü séyu

¹ Ábati naríjin dan le lajeíridúnbarun Mudún furúmiñetu tídaangiñe sédü séyu tugúya, ába nagáambun lariñagun ában jádaangiñe cátña gabágaritiña jagía láu ában umálali camá lumálali wayújururu.

—¡Jigábu baríja!

² Ába naríjin ában gabáyu jarúti, le waríñubei luágu, ñíñoun ában árco lújaburugu to áuboun lageíndagua. Rúati ában rídi lánina ásiiraguni lun ladüga lúnbei lan lagáñeiruniña láganíñu. Furíti ageíndagua, ába lásiiragun lídan sun cáteli.

³ Dan lajeíridunbarun Mudún tibíaman séyu, ába nagáambun laríñagun jabíaman cátña gabágaritiña jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü uboúagugiñe, lúma lun láfaraguágüdüniña wügüriña jámagua jilágubei, ába tíchugún ában oúnwenbun efeín lun.

⁵ Dan lajeíridúnbarun Mudún türüwan séyu, ába nagáambun laríñagun jürüwan cátaña gabágaritiña jagía.

—Jigábu baríja!

Ába naríjin ában gabáyu wuríti, níñein ában baláansu lújaburugu le waríñubei luágu. ⁶ Ába nagáambun laríñagun ában umálali jamídaanguágüñe cátaña gabágaritiña jagía.

—Ábanrügülá kílo türígu luágu lebégi ában wéyu wadágimanu, ürüwa kílo sebáda ligía méme ebégi, áni toúnigi jumeíme aíli lúma bínu buídu.

⁷ Dan lajeíridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—Jigábu baríja!

⁸ Ába naríjin ában gabáyu amaríyu, le waríñubei luágu, oúweni líribei, lárigi lárigi liábin jafúlasun jiláaña. Ába libíjin ubáfu luágu ligádürün murúsun lídaangiñe uboú lun láfarajan láu wuríbu, láu ilámaü, láu sándi, lúma jáu anímaalugu janárimetiña ja uboúagubaña.

⁹ Dan lajeíridúnbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérunt Búngiu, lúma luágu jadímurejan buíti luágu Jesucristu, lábugiñeñanu latárü. ¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérunt, darísan ídame bagúseragüdaña ja mísiñejabúbaña bun uboúagu, luágu woúnwen? ¿Ídamésan bafáyeigüdaña luágu jáfaruníwa jilágubei?

¹¹ Ába jabíjin anáanguni jarútu, ába laríñawagún joun lun jeméraagun luágu murúsun dan darí joústarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeíridunun Mudún tisísin séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítäü, ¹³ ába jeíguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali. ¹⁴ Ába lagúmuchagun siélu quei ában gárada dan le tabáruchawagún, ába ladíñuragunga sun wübü lúma uboúju lídáangiñe jabára. ¹⁵ Ába jarámudagun urúeigu ja lánina uboú lídan jýyu lúma buri labádinagua dübü le luágubei wübü, úara jáma ja weírigubaña, gurúnelugu, rísitiña, gabáfutiña, jáma sun idámuni, jáma wügüriña ja mabúremetiña. ¹⁶ Jaríñagati lun wübü lúma lun dübü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárimé ligáñi Mudún.

¹⁷ Chü'lüjali weíriti wéyu le lúnbei larúfuduni Búngiu ligáñi.
¿Cábasan gayára lawánduni?

Seini jawáguti Israelítagu

7

¹ Lárigiñe sun cátei le, ába naríjin gádürü ánjeligu rára luágú gádürü larígei uboú, ágúdaajei gádürügubei garábali lun máfurun lan ni murúsun luágún múa, ni luágún barána, ni luágún ni ában tídibu wéwe. ² Aríyatina gíñe ábanya ánjeli ñübinti lueígiñe oúbaü le ñígiñe lubeí láfuara wéyu láu liséyun Búngiu le wínwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadügün wuríbani lun múa lúma barána.

³ —Madüga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágú jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaanfaangu Israél.

⁵ Dúusu míluñanu jádaangiñe ladügawagun Judá, dúusu mílu jádaangiñe ladügawagun Rubén, dúusu mílu jádaangiñe ladügawagun Gad,

⁶ dúusu mílu jádaangiñe ladügawagun Áser, dúusu mílu jádaangiñe ladügawagun Neftalí, dúusu mílu jádaangiñe ladügawagun Manasés,

⁷ dúusu mílu jádaangiñe ladügawagun Simeón, dúusu mílu jádaangiñe ladügawagun Leví, dúusu mílu jádaangiñe ladügawagun Isacár,

⁸ dúusu mílu jádaangiñe ladügawagun Zabulón, dúusu mílu jádaangiñe ladügawagun José, jáma dúusu mílu jádaangiñe ladügawagun Benjamín.

Sarágu gürígia jarútu jadáüragun

⁹ Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía darí lun siñá lan jabájüdün, jarútu jadáüragun táu tubána fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun.

Weíriti Búngiu, le ñúnbei luágú lála, weíriti Mudún, luágú asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rúalá uweírigu, lichú áu, eteíngiruni,

inébesei, ubáfu lúma érei
lun Wabúngiute lun sun dan. Ítaralá.

¹³ Ábatí lálügündünina ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalíagiñésan jayábin?

¹⁴ Naríñaga lun.

—Aműrű jamúga aríñagei nun.

Lariñaga nun.

—Ja súfurijañabaña sarágu ja, ja chibá jamaalíbei jafígoun láu líta Mudún, jarúmagüda jamoún janígi láu. ¹⁵ Ligía ligíbugiñeñanu lubeí lálá Búngiu esériwida lun, wéyuagu áriebu tídan lúban to siéluboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürün láñame wéyu, mañáurijan láñame lárouga, ¹⁷ ladüga loúnigirubaña lan Mudún le lubádubei lálá Búngiu, ábame lanügüniña lárun dúna le íchugubei ibágari magúmuchaditi, ábame larágajani Búngiu sun águiraü lueígiñe jágu.

8

Tisédün séyu lúma lágei cupáli le gólu

¹ Dan lajeíridúnbarun Mudún tisédün séyu to tuáguboun líburu, ába ñi lan maníguaü siélu queí buri luágú dimí óra.

² Ába naríjiniña sédü ánjeligu ja rárábaña ligíbugiñe Búngiu, ába líchugúniwa sédü fidu joun. ³ Lárigiñe, ábaya liábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürübün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebei lálá Búngiu. ⁴ Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu. ⁵ Ábatí lanügüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachürüni luágun uboú, ába lagaambún wayújururu, ireíni, labírijaníga, lúma ában járabaganáli.

Lé buri fidu

⁶ Ábatí jaráanserun sédü ánjeligu ja láubaña sédü fidu lun jínwiruni.

⁷ Ába línwiruni furúmiñeti ánjeli lifídun, ába lasáliragun lúbara júya le deréguati lúma wátu geméti, láu gíñe jítäü, ába lachágarúniwa luágun uboú. Ába lágudun lürüwan murúsun lídaangiñe uboú, ígirúati bián murúsun mágudúnti, gudáwati gíñe lürüwan murúsun lídaangiñe buri tídiwu wéwe lúma jídu.

⁸ Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wübü durúnguati

baránajoun, ába lasáliragun lürüwan murúsun lídaangiñe barána jítaüme. ⁹ Jiláguatiña sun úduraü ja lídaanbaña barána le assáliragubei lun jítaüme, gürínguatu gíñe sun ugúnein to ñíboun lídan barána ligía.

¹⁰ Ába línwiruni jürüwan ánjeli lifídun, ába teíguadun ában oúnwenbun warúguma siélugiñe, durúngu quei ában tóchi. Táburuja luágun lürüwan murúsun lídaangiñe dúna lúma líseesen dúna. ¹¹ Igífi tíribei warúguma tugúa, ába lagífidun lürüwan dúna, ába joúwegun sarágu gürígia ladüga lagífidun dúna ligía.

¹² Ába línwiruni jagádürüün ánjeli lifídun, ába lagürinchagun lürüwan murúsun lídaangiñe líbiri wéyu, láu sun játi, jáma warúguma. Le oúbaü le agürinchagubei jawágu, ába labúridun, marúgoungadunti wéyuagu ni áriebu.

¹³ Lárigiñe, ába narijin ában dunúru weíriti ájamaja lamídaangua siélu, aríñageina ligía láu umálali jéreti.

—¡Fugiábugume ja aganoúbaña uboúagu luágu ürüwa lanárimeníga lé buri lúnbei láburuja jawágun dánme jínwiruni ja jíbiri ürüwa ánjeligu jafídun!

9

¹ Ába línwiruni jaseíngün ánjeli lifídun, ába narijin ában warúguma eíguadutu siélugiñe lun múarugun, ába líchugún ligélen jýu le mébejabei tun. ² Ába tánjunrenchuni jýu ligía, ába láfuridun gumúlali ñígíñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali. ³ Lídaangiñe gumúlali ligía ába jachülaagun chigángaru, ába jájamajani sun uboú, ába jabíjin chigángaru jagía ubáfu líbe jabáfu águru ja uboúagubaña. ⁴ Ába lariñawagún joun lun madügün jamá wuríbani lun jíduru le uboúagubei, ni lún buri nádü, ni lun tídbu wéwe, lueídügü joun gürígia ja úabei liseíni Búngiu jeréberugu. ⁵ Majoúati lun jáfaraguniña chigángaru jagía gürígia, lueídügü lun jásüjaniña gürígia luágu seíngü játi, ítara líñati ligári jásüjan quei jásüjan águru. ⁶ Lídaanme buri wéyu ligía, jáluajabei gürígia oúweni, madárijabei, busén jagía yebéme joúwegun, ladíseduba oúweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügüri. ⁸ Ítara líña jádiburi quei jádiburi würiñña, liábin jári, quei lári líñún. ⁹ Darúgu líña jágubu láu ában cátei camá gürábu, ítara líña lamúri jarüna quei tamúri sarágu cárü to jáutu gabáyu dan le teíbaagun wuríburugu. ¹⁰ Gálitiña quei jáli águru le gágiriti. Ñíñein ubáfu luágu jáli lun jadügün wuríbani joun gürígia luágu seíngü játi. ¹¹ Ñíñein ában jábuti chigángaru jagía, le ánjeli le láni jýu le

mébejabei. Abadón líribei ánjeli ligía lídan hebréo, lídan güriégu, Apolión o Agünrinchaguti.

12 Sügüja furúmiñeti lanárimeníga, mégeigili bián.

13 Ába línwiruni jasisin ánjeli lifídun, ába nagáambun ában umálali lídaangiñe gádürü larígei latárü gólu le ligíbugiñebi Búngiu. **14** Ába laríñagun umálali ligía lun jasisin ánjeli le láubei fidu.

—Farára báña gádürü ánjeligu ja güráñubaña láru oúnwenbun dúna le Eufrátes.

15 Ába jafáragadún gádürü ánjeligu jagía lun jáfaragun ában jádaangiñe cáda ürüwa gürígia jilágubei, ladüga aráanserúaña lubá óra ligía, wéyu ligía, játi ligía, lúma irúmu ligía. **16** Ába nagáambuni átiriñanu lan jasúdaaranigu ja luágutiña gabáyu. bián-san míñun.

17 Ítara líña ligáburi jayawadagun gabáyu jagía jáma ja waríñubaña jawágú nun. Ñíñein ában cátei janíguagu, funáti licólorun, dínguti, lúma amaríyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma súfuru jayúmulugugiñe. **18** Ába láfaraguniña úrüwa wuríbani le áfuridubei jayúmulugugiñe gabáyu jagía ában jádaangiñe cáda ürüwa gürígia jilágubei, ürüwa wuríbani ligía. wátu geméti, gumúlali, lúma súfuru. **19** Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadüga wuríbani.

20 Ja jíbiri gürígia ja moúwegunbaña láu wuríbani le, mígitun meme jamúti jadáaguni cátei lé buri meja jadügübei, mígitun jameí jájuduragun joun espíritugu wuríbatiña lúma joun sándu ja gólu, pláta, brónse, dübü, wéwe—ja siñáti jaríjin, ni jagáambun, ni jeíbugun. **21** Mígirun jameí jáfarajan, jabíñarajan, jasálufurijan, lúma jíwerujan.

10

Ánjeli táo tiraüraü líburu

1 Ábati naríjin ábanya ánjeli gabáfuti, ába larárirun siélugiñe lídan juánriñu táo ában jerémuru loúgiñe lichügü. Miríti ligíbu quei wéyu, liábin lúruna camá durúngu líña. **2** Ñíñoun ában tiraüraü líburu junréngu lújaburugu. Ába líchuguni lugúdi le loúnwenren loúgiñe barána, le lubaüna loúgiñe múa. **3** Ábati lagúaragun láu umálali jéreti quei ában liñún dan le láwoujan, dánti le lagúaragunbei, ába lagaambúniwa ladürügündün sédü wayújururu. **4** Lárigiñe ladürügündün sédü wayújururu ligía, ába yebe nabürüjaali lan le laríñagubei, ába nagáambun laríñagun ában umálali nun siélugiñe.

—Maríñagabeí le laríñagubei sédü wayújururu, mabürüjabeí gíñe.

⁵ Ánjeli bugáti le narijubei loúgiñe barána lúma loúgiñe múa, ába liñúruni lújabu le loúnwenren siélun, ⁶ ába láfiñurun luágu le gabágaribei lun sun dan, le adügübalin uboú láu sun siélu, barána lúma sun cátei le lídaanbei, ába laríñagun.

—Úadügütáali darásäü. ⁷ Dánme le lachülürün dan lun lagúmeserun jasédün ánjeli ínwirei lifidun, gúñfulijalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siélugiñe, ába laríñagun nun.

—Beíba, banügounme tiraüraü líburu to daráguboun, to lújaburuguboun ánjeli le rárabei loúgiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, joúboun, bímebei basándirunun biyúmulugu, tagífidame burágeirugu.

¹⁰ Ába nanügünun tiraüraü líburu tugúya lújaburugugiñe ánjeli ligía, ába neíginun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi. ² Mamísurajabei bürürü le boúgudibei tibítí ligílisi ladüga derégewaali joun ja teréñchabaña lun Búngiu, ja lúnbaña jagünrinchaguni ubúrugu le sándubei luágu bián-wein-bián játi. ³ Ábame noúnajan bián geféentiña lun jadímurejan nuágu luágu mílu bián-san ürüwa-wein wéyu, táu jadáüragun lúdu.

⁴ Bián geféentiña jagía, jagía gayáwabalin bián tídbu wéwe to olívo lúma bián lébu sanúdelu le ligíbugiñebi Búngiu, le Labúremebi sun uboú. ⁵ Ánjein ñi abúseerúti ladügün wuríbani joun, ába jígoragüdün wátu geméti jayúmulugugiñe, ába jáguduniña jáganiñu gumúgubei. Ítarati loúweba furúmieguarügü le busénti ladügün wuríbani joun. ⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadügüni dúna jítaüme, lun gíñe jasúfuriragüduni uboú láu sun luwúyeri wuríbani, ságü jabúseerun. ⁷ Dánme le

gumú jamaali jawádigimari, lageíndaguba anímaalu le áfuridubei lídaangiñe jýyu le mébejabei jáma, ábame jeféridiruni wuríbu, ábame láfaruniña jilágubei. ⁸ Ábame jeréderun riwágu lídan lémeri oúnwenbun ubúrugu le Jerusalén le ñí lubei ládarawagúa Jesúsu luágu gurúwa, fulásu meme le, camá Sodóma lúma Ejípto. ⁹ Ábame jaríaguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu ürüwa wéyu dimí, mígirunbaña lun jábunún. ¹⁰ Ábame jagúndaaragun ja uboúagubaña láu joúwegun, daríme lun jedéweegun cátei jámagua, le jagúndan, ladüga berése jamá meja bián lánigu Búngiu jagíaoun. ¹¹ Ába naríjin, áu Juan, luágu lárigiñe lan ürüwa wéyu dimí ligía, ába láguyuguagüdüniña Búngiu, ábaya jásaarun, áni sun ja aríjubaliña, weíriti janúfudedagun. ¹² Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun járabaganáli, ába tagúluludun ában muna tídaangiñe ságü dísi to ubúruguboun, ába joúwegun sedü mílu gürígia ladüga járabaganáli ligía. Ja jíbiri gürígia, ába jíchugun inébesei lun Búngiu le siélubei ladüga luweírin janúfude.

¹⁴ Sügüja libíaman lanárimeníga, madísebei le ában.

Le lisédün fidu

¹⁵ Ába Línwiruni jasédün ánjeli lifídun, ába lagaambúniwa laríñagun umálali buri jéreti siélugiñe.

Chülüjali lidáani Wabúreme Búngiu lúma lidáani Crístu lun jarúeijan lídan sun uboú,
áni jarúeijaba sun dan.

¹⁶ Ábati jélemuchunga weín-gádürü gürígia ja weírigutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jaríñagun.

Teínqui wáña bun, Wabúreme Búngiu,
amürü le Súnti Gabáfu,
amürü le wíñwanbei lúmagiñe lubáragiñe furúmiñeti dan,
wíñwan amürü guetó, wíñwan amürüme sun dan.

Teínqui wamútibu ladüga ragübaali lan oúnwenbun bubáfu.
áni guméseedibú arúeija.

¹⁸ Gáñiburija néchaanigu,
chülüja wéyu lun babeíjan,
chülüja gíñe dan lun bagúseragüdüniña jiláguaña,
ábame bíchuguni jafáyeiruaja báni profétagu joun,

jáma jíbiri ja derégeguabaña joúngua bun, jáma sun jawúyerigu gürigia ja íchubaña inébesei lun bíri.

Chülüja óra lun bagünrinchaguniña ja agünrinchagubalin uboú.

¹⁹ Ábatí tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumútuniña ñi tídan lúban. Ába ñi lan labírijaníga, ireíni, wayújururu, ában járabaganáli, lúma láburujan lúbara júya deréguati le weínamuti.

12

Würi lúma anímaalu le dragón

¹ Ábatí lasáliragun ában oúnwenbun seíni siélu. ában würi darúgu líña wéyu táu camá jamuga ában dínugu, láu játi lábugiñe tugúdi, lúma ában rídi jáu dúusu warúguma tábulugu.

² Würi tugúya dageínañoun, tagúaraja láu igári le lánina agáriduni, ladüga súfuritu lun tagüriaian. ³ Ábaya lasáliragun ábaya seíni siélu. ában oúnwenbun anímaalu le dragón funáti, sédüñein lábulugu, dísi ligáanchun, lúma ában rídi luágú cáda lábulugu.

⁴ Ába ladúrugudun dragón ligía ában jádaangiñe ságü ürüwa warúguma láu líli, ába lajúnruniña múarugun. Ába laráramun dragón ligía tigibugiñe würi to lúnboun tagüriaian, lun leígini tiraü dánme le tagüriaian. ⁵ Ába tagüriaian würi tugúya ában wügüri irájü le lúnbei ledéraagüdün lagúmadijan lídan sun fulásu queísi láu ában murúsun gürábu. Ába lagídarúniwa tiraü tueí, ába lanügüniwa lun Búngiu luágún lála.

⁶ Ába tanúrajan würi tugúya lídoun fulásu mageírawati le ñi lubei aráanseeli lan Búngiu ubáraü tubá, lun toúnigirúniwa ñi luágú mílu bián-san ürüwa-wein wéyu.

⁷ Lárigiñe, ába ñi lan ában wuríbu siélu, ñi lubei lageíndagua árcangel Miguél jáu láni ánjeligu lúma dragón. Ageíndaguati dragón jáu láni ánjeligu,⁸ ába jeféridiruni wuríbu, ába mabáraaña lan siélu. ⁹ Ába lubeíti laságarún oúnwenbun dragón, le binádu jéwe ligíra le gíribei Máfia, o Satanási, le ayéejabalín sun uboú, siélugiñe. Ligía jáu sun láni ánjeligu, ába jachágarún múarugun.

¹⁰ Ábatí nagáambun laríñagun ában umálali jéreti siélugiñe.

—Gáñei láali Búngiu Máfia láu luweírin lubáfu. Chülüjali asálbaruni joun gürigia uboúagun, chülüjali larúeijan Búngiu lúma lagúmadijan Crístu, ladüga sagáwaali le íchugubei jadúnrun wadújeñu lueígiñe Jesucristu, le íchigañajábei jadúnrun wéyuagu, áriebu ligibugiñe Wabúngiute. ¹¹ Sirígu jamáali láu loúnwen Mudún, le Jesucristubei, lúma láu jíchugun fe luágú láni Búngiu ugánu luágú asálbaragülei, manúfudeduntiña lueí jeféridiruni jabágari, aráanseñu rügütiña lun joúnwen.

12 Gúndaalá lubeíti siélu, gúnda jumá jugúya le aganoúbei ñi. ¡Áni fugiábugu ja aganoúbaña uboúagu, lúma baránaja! Ñüdünja Máfia júmoun láu oúnwenbun igáñi, ladüga subúdi lumúti luágu murúsun rügáali lan lidáani.

13 Dánti laríjinbei dragón luágu fíwaali lan uboúagun, ába leíbaajanun würi tó buga agüriajaboun. 14 Ába líchugún bián larüna dunúru le weínamuti tun würi tugúya lun gayára lan tájamarun lídoun fulásu mageírawati díse lueí dragón ligía, le ñíba lubeí toúnigirúa luágu ürüwa irúmu dimí. 15 Ába lewérajan dragón ligía sarágu dúna liyúmulugugiñe lun lañáradaguagüdünun würi tugúya. 16 Ába líderagunun múa würi tugúya, ába lánjunrenchun múa, ába lachúruni sun dúna le lígiragüdúbei dragón liyúmulugugiñe. 17-18 Gáñitimaati dragón túma würi tugúya, ába lídin ageíndagua jáma tirajüñü ja ñüdubaña láu le lubeíbei Búngiu, falájamei ugánu le láni Jesucristu.

13

Ja móнстругу

1 Ába naráramun láru béya, ába naríjin lamúdeirun ában móнстру baránajagiñe, sédüñein lábulugu, dísi ligáanchun. Ñíñein rídi luágu cáda ligáanchun lúma ában íri le áubei lanábaguei Búngiu luágu cáda lábulugu. 2 Móнстру ligía lenége geígusi, ítara líñá lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan. 3 Ñíñein ában chaünti luágu ában lídaangiñe lábulugu móнстру ligía, weíriti lún yebe láfaruni jilágubei, ába lareídagun lichaüntin. Weíriti janígi sun gürígia láu móнстру ligía. 4 Ába jájuduragun lun dragón luágu líchugun gumádi lun móнстру, ába gíñe jájuduragun lun móнстру, ába jaríñagun.

—Úati ni ában quei móнстру le, ¿cába gayára láfaruni?

5 Ígirúati gíñe móнстру ligía lun ladímurejan dimúrei buíti luoúgua lúma lun lanábaguni Búngiu, lúma lun lagúmadijan luágu bián-wein-bián játi. 6 Ába ladügün ítara, adímurejati wuríbati luágu Búngiu, anábaleí líri, lúban, jáma ja siélubaña. 7 Ígirúati gíñe lun lageíndagun jáma lánigu Búngiu dari lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. 8 Ába jájuduragun sun ja aganoúbaña uboúagu lun móNSTRУ ligía, ja úabaña jíri bürüwañu lúmagiñe ladügün uboú tídan líburu to lánina ibágari, to lúmaboun Jesucristu, le Mudún le oúwebei.

⁹ Le garígeiruguti lun lagáambun, agáambalá. ¹⁰ Ja adáürütiña ámu, jadáürurawagúba gíñe, ja áfarajatiña táo efeín, jáfarawagúba gíñe táo efeín. Ligía busén jabeí lánigu Búngiu gurásu lúma afíñeni.

¹¹ Lárigiñe, ábaya naríjin ábanya móнстру lamúdeirun múarugugíñe. Níñein bián gánchu luágú camá ligáanchun mudún, áni ítara líña ladímurejan camá ában dragón. ¹² Níñein sun ubáfu le láni furúmiñeti móнстру lúma lun ladügüní cátei lueígiñe louúbadina furúmiñeti móнстру. Ába ladügün lun jájuduragun sun gürígia ja uboúagubaña lun furúmiñeti móнстру, le lareídaguagüdübei lueígiñe chaünti le luágubei. ¹³ Adügati gíñe oúñwenbun buri miláguru, áburujagüüdati wátu geméti siélugiñe lun múarugun jagíbugiñe gürígia. ¹⁴ Lídaangiñeti miláguru buri le únbei líchugúa ubáfu lun ladügüní lueígiñe louúbadina furúmiñeti móNSTRU, ába leyéeduniña ja aganoúbaña uboúagu, ába ladügagüdüün ában liyáwa móNSTRU le gawágubalin chaünti ába lareídagun, joun. ¹⁵ Ába libíjin jabíaman móNSTRU ubáfu lun líchugun ibágari tun liyáwa furúmiñeti móNSTRU lun tadímurejan lúma lun táfaraguniña sun ja májuduraguntiña tun. ¹⁶ Adügati gíñe lun sun lan gürígia –weínamujaña, nübürigiña, rísitiña, gudémetiña, idámuni, máma idámuni –lun labürüdün líri móNSTRU luágú jájabu le joúñwenren o luágú lan jerébe. ¹⁷ Úati ni ában gayáraati lagáñijan ni cáta ni lalúgurajan ánjein úa líri móNSTRU o linúmerun líri luágú. ¹⁸ Buséntitia cátei le lichú áu, le gunfaráandati, atúriaialeí linúmerun móNSTRU, le ábanbei quei líri wügüri, áni niján número le asálirubei lídaangiñe lilétürana íri ligía. sísi-san ürüwa-wein-sísi.

14

Jerémujan ja san bián-wein-gádürüü mílu

¹ Lárigiñe líra, ába naríjini Jesucristu, le Mudún, rára lábulugu wübü le Sión, le siélubei. Níñanu san bián-wein-gádürüü mílu gürígia lúma, ja bürüwañubei líri Mudún lúma líri Lúguchi jeréberugu. ² Lárigiñe, ába nagáambun ában amúri nübünti siélugiñe camá lamúri barána, camá gíñe ladürgüdüün ában wayújururu le jéreti, ítara líña gíñe camá jamuga tamúri sarágu gidára. ³ Ába jerémujan gürígia jagía ában urému iséri ligíbugiñe lála Búngiu lúma jagíbugiñe gádürüü cátaña gabágaritiña jagía, lúma jagíbugiñe gürígia ja weírigutiña. Úati ni ában gayára lumúti laníchigu lerérun urému ligía gunfaráanda jaweídügüya san bián-wein-gádürüü mílu ja asálbarúabaña jádaangiñe ja uboúagubaña – ⁴ jagía ja mádaragúnbaña joúngua jámoun würíña, reídeitiña jarúmañu, falájamei Mudún le níjin lumúti

lídin, sálbwatiña jádaangiñe gürígia quei furúmiñeti edéweejani lun Búngiu lúma lun Mudún.⁵ Madárirúnwati ni murúsun iyéeni luágu jayumáru ladüga jarúmatiña ligíbugiñe Búngiu.

Ugánu buri le jíchubei ürüwa ánjeligu

⁶ Ábati naríjin ábaya ánjeli ájamaja lamídaangua siélu, ñíñein ugánu le magúmuchaditi lúma lun lapúrichijani joun ja aganoúbaña uboúagu—joun sun néchaanigu, rása, luwúyerigu dimúrei lúma sun fulásu.⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülüja dan lun lagúseragüdün. Judúgua jumá lun le adügübalin siélu lúma uboú, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíriguboun, ladüga tabácharuadágüdüni sun néchaani láu bínu le lánina liwiye tayúmajan.

⁹ Ába liábin ábanya jürüwan ánjeli, ába laríñagun láu umálali jéreti.

—Le ájuduraguti lun móнстру lúma tun liyáwa, ígira ligíame lun labürüdüniwa líri móнстру luágu lújabu o leréberugu,¹⁰ látubei bínu le lánina lanárimé ligáñi Búngiu le lúnbei láburujan le gumúti luágun, ábame lasúfurirun láu wátu lúma súfuru ligíbugiñe Jesucristu lúma jagíbugiñe ánjeligu ja sándubaña.¹¹ Laweínruba lugúmulalin wátu le asúfuriragüdübaliña lun sun dan, úabei eméraaguni ni wéyuagu ni áriebu joun ja ájuduragubaña lun móнстру lúma tun liyáwa, o ja bürüwañubei líri jawágu.¹² Ligía lébubei lúnti lan gagúraasun jamá lánigu Búngiu ja ñüdünbäña láu le lubeíbei áni falájamei Jesúsu surúñu, lun ítara meme jamá derégüdagu lídan jafíñen darí lúmoun joúnwen.

¹³ Ábati nagáambun laríñagun ában umálali ñübinti siélugiñe nun.

—Abürüjabeí le. “¡Gúnda jamá ja oúwetiña láu jafíñen luágu Jabúreme Jesucristu!” Lúmagiñe óra ligía, jeméraaguba lídaangiñe jawádigimari, ábame lídin le jadügübei úara jáma, líña Sífiri Sándu.

Lalúbajoúniwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucristu, le Wügüri Garaüwarügüti. Ñíñein ában rídi gólu lábulugu túma ában alúbagülei jamánatu lújaburugu.¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladüga chülüja dan lun alúbajani, ladüga funáali nádü.

16 Ába lásügüragüdünun le ñúnbei luágu juánriñu lalúbagüle múarugugíñe, ába lalúbajan.

17 Ábayati láfuridun ábaya ánjeli tídaangiñe lúban Búngiu to siéloboun táu gíñe lalúbagüle jamánatu. 18 Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboún tirésini beíbei to múaruguboun, ladüga funáaru.

19 Ába lásügüragüdünun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weíriti lun taríbichawagúniwa. (Míni lan líra, lanárimbe abeichúni le lúnbei liábin lúmagíñe Búngiu.) 20 Ába taríbichawagún beíbei boúgudi libíti ubúrugu, ába láfuridun jítäu lídaangiñe tágei chülü lúmoun líñun jafúrenun gabáyu, ürüwa-san kilómetro geyégu.

15

Ánjeligu jáma jagúmujoún sédü ígei

¹ Ába naríjin ábanya oúnwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmucha ligáñi Búngiu.

² Aríyatina gíñe camá jamuga ában barána le bídiriu láu wátu geméti lídan, ñíñanu ja agáñeirubaliña luágu móntstu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun. ³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weíriti áni buíti sun le adüga bálibei,
Wabúreme Búngiu, Súnti Gabáfu,
surúñu líña sun le badügübei, úaragua,
amúrrü le Lurúeitebei sun néchaani.

⁴ ¿Cábasan manúfude bueí, Wabúngiute?
¿Cábasan madímurejan buíti buágú?
Amúrrü rügüñadibu mafígonjan,
jayábinba lílana sun fulásu, ábame jájuduragun bun,
ladüga arijúaali luágu buídu lan sun le badügübei.

⁵ Lárigíñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri. ⁶ Ába jáfuridun sédü ánjeligu ja jáubaña sédü ígei jagía, ñígiñe. Táuñanu janáangun líno to jarúmatu, mirí, liábin jabélitin, gólu luágu janíguagu. ⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu

luweírin ligáñi Búngiu le gabágaribei lun sun dan. ⁸ Ába labuínchun fulásu le sándutimaabei láu gumúlali le ñübinbei lídaangiñe luweírigun Búngiu lúma lubáfu. siñátiti lebélurun ni ában ñíjin darí jagúmuchun sédu ígei ja jámabaña sédu ánjeligu jagía.

16

Cópu buri le lágei ligáñi Búngiu

¹ Ábatí nagáambun laríñagun ában umálali jéreti joun sédu ánjeligu jagía lídaangiñe fulásu le sándutimaabei.

—Jeiba áturei cópu buri láu lanárimé ligáñi Búngiu uboúagun.

² Ába lídin furúmiñeti ánjeli, ába láturuni licópun uboúagun, ába lasálirun gumeín gáriti jawágu sun ja gawágubalin líri móursturu, judúgua jagía lun.

³ Ába láturuni jabíaman ánjeli licópun baránajoun, ába lasáliragun barána queísi játa jiláaña, ába joúwegun sun cátaña ja gabágariibaña lídan.

⁴ Ába láturuni jürüwan ánjeli licópun luágun buri dúna lúma líseesen dúna, ába lasáliragun jítäüme. ⁵ Ába nagáambun laríñagun láni dúna ánjeli.

—Úaraguatibu láu bagúseragüdün ítara, Búngiu sándu, amürü le wínwanbei lúmagiñe lubáragiñe furúmiñeti dan áni wínwan amürü guetó, ⁶ ladüga jagía, aseíñeigüda jamúti játa profétagu jáma ja derégeguabaña joúngua bun, guetóti gurágüdaadibu jítäü joun, yúuti joun.

⁷ Agáambatina gíñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gúrígia láu lísü, ⁹ ába jachúrarun súngubei. Láu sun lira, masáansiragunti jagáburi, madímurejan jagía buíti luágu Búngiu, anábaguarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála móursturu, ába leréderun larúeijan lábugiñe lubúriga. Ába buri jágúragunun gúrígia jañéñe láu igári. ¹¹ Ni ítara, masáansiragunti jagáburi lun jígoruni wuríbati léñaja jadügübei, anábaguarügü jameí Búngiu le siélubei luágu jagárigu lúma jagúmein.

¹² Ába láturuni jasísín ánjeli licópun luágun oúnwenbun dúna le Eufrátes, ába lamábeidun lun ñi lan üma lun jásügürün urúeigu ja ñübinbaña lueígiñe oúbaü le ñígiñe lubeí laboúcha wéyu.

¹³ Ábatí naríjin jáfuridun ürüwa espíritugu wuríbatiña liyúmulugugiñe dragón, liyúmulugugiñe móursturu, lúma

liyúmulugugiñe proféta le yéebei, ítara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja uboúagubaña lubá wuríbu le lánina oúnwenbun luwéyuri Búngiu le Súnti Gabáfu. ¹⁵ (“Toúnigi jumátia ladüga sódinibei niábin quei liábin jíweruti áriebu. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubeí lun jaríjini luágu,” líña laríñagun Jesucristu.) ¹⁶ Ábati joúndaraguniña urúeigu lídan fulásu le gíribei Armagedón lídan dimúrei le hebreo.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, laríñaga.

—Adügüwaali.

¹⁸ Ába ñi lan labírijaníga, ireíni, lúma wayújururu, ába lánjingichun múa láu ában járabaganáli, jereti sügü láu sun járabaganáli le dagáalibeí lúmagiñe ñi jamá gürígia ligíbuagu uboú. ¹⁹ Ába lafánreinragun ubúrugu weíriti le Babilónia lídan ürüwa murúsun, ába buri lagúluludun ubúrugu le uboúagubei, ába larítagun Búngiu luágu ubúrugu weíriti le Babilónia lun lájuluchagüduni bínu le lánina abeichúni le loúnajabei lun lídan ligáñi. ²⁰ Sun uboúju lúma sun wübü, ába lagúmuchagun. ²¹ Ába gíñe láburujan oúnwenbun buri lúbara júya deréguati siélugiñe jawágun gürígia, jürüburiyi chülü lúmoun san líburu, ába janábaguni gürígia Búngiu luágu, ladüga ában lan abeichúni janárimeti.

17

Tasíadirúniwa oúnwenbun jórú

¹ Ábati liábin ában jádaangiñe sédü ánjeligu ja láubaña sédü cópu, ába laríñagun nun.

—Jigábu, narúfudaali tabeichún oúnwenbun jórú to ñúnboun ligíbuagu barána bun. ² Agánawaaña urúeigu ja uboúagubaña lídan salúfuri túma, bachárua jagía ja uboúagubaña láu bínu le lánina tisálufurin.

³ Ába lanügünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában würi waríñu luágu ában mónsturu funáti, bürüwañu líña sun luwúyeri dimúrei le anábaguti Búngiu tuágu, sédüñein lichügü móнстру le uágubei tañúura, díisi ligáanchun. ⁴ Würi tugúya, gúchu lúma funáti ticólorunbei tanáangun, liábin tuwénden, gólu, dübü buíduburiti, lúma pérla. Ñíñein ában cópu gólu tújaburugu buin láu tisálufurin lúma liwíye tadáagun. ⁵ Bürüwañu líña

ában íri teréberugu láu ában aníchigu arámudaguati. Íri le teréberugubei. “Babilónia to weíriboun, jáguchi jóru lúma sun luwúyeri iwíyeni uboúagu.”⁶ Ába nasúbudiruni luágua bacháruañoun lan würi tugúya láu játa ja lánigu Búngiu jáma ja áfarawagúbaña lueígiñe jadímurejan luágua Jesucristu. Dan naríjinbalin cátei le, ába laweíridun nanígi.⁷ Ábatí laríñagun ánjeli ligía nun.

—¿Cá uágua laweírida banígi? Nasúbudiragüdaali míni tan würi to bun, láu sun mónturu le anügübarun, le sédübei ichügü, díisi ligáanchun.⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe jýyu le mébejabei lubáragiñe lídin lídoun lagúmujoún loúnwen. Ja aganoúbaña uboúagu, ja úabei jíri bürüwañu tídan líburu to lánina ibágarí lúmagiñe ladügün uboú, laweíriduba janígi dánme jaríjini mónturu lé meja gabágaribeí áni úaali, ábaya liábin.

⁹ ‘Níjein cátei ya joun ja gayáraabeí gunfaráanda jamáni. Sédü ichügü ligía, míni lan sédü wübü le uágubei ñun tan würi tugúya,¹⁰ sédü méme ichügü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábiningili. Dánme liábin jagúmujoún, larúeijaba murúsurügü dan.¹¹ Le mónturu lé meja gabágaribeí áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujoún loúnwen.

¹² ‘Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágua ában óra úara lúma mónturu.¹³ Ában lábu jarítagun urúeigu jagía, jíchugubei jabáfu lúma jarúeijan lun mónturu.¹⁴ Jageíndaguba lúma Jesucristu, láfaragubaña jílágubei, ladüga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáñia lídan jaffíñen luágua, úara lúma.

¹⁵ Ába gíñe laríñagun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani.¹⁶ Áni díisi gánchu le baríjubei luágua mónturu, le méme díisibei urúeigu, teyéreeguduba jóru joun, ábame jígirunun fíwañu, surúsu, jeígubei tügürügü, ábame jágudunun láu wátu geméti.¹⁷ Rúlaali Búngiu tídoun janígi lun jadügünü le labúseerubei láu júaradun lun jedéregeruni jabáfu queísi urúeigu lun jíderaguni mónturu daríme lagúnfulirun le laríñagubei Búngiu.¹⁸ Würi to baríjuboun, tugúya weíriti ubúrugu le agúmadirubaliña lurúeitegu uboú, le gíribei Babilónia.

18*Teíguadun Babilónia*

¹ Lárigiñe sun cátei le, ába narijin ábanya ánjeli larárirun siélugiñe láu sarágu ubáfu, ába larúgoungadun uboú láu límirin.

² Lagúaraguati láu umálali jéreti.

—Gumúguua, gumúguua Babilónia to weíriboun, guetó jábiñejaru mafianu, jarámudaguagüle sun jawúyeri espíritugu wuríbatiña, jádibu dunúru wíyetiña queísi wadúbi. ³ Ladüga sun lan néchaanigu bacháruaaña láu bínu le lánina tisálufurin, áni agánawaaña lurúeitegu uboú túma lídan tisálufurin, alúgurajatiña buri ja uboúagubaña, rísijaña lídaangiñe luwénden toúseragun túngua.

⁴ Ábayati nagáambun lariñagun ábanya umálali ñübinti siélugiñe.

—Furíjuma Babilóniagiñe, jugúya le nánigu, mafánran jumámuga lídan tifigoun lúma lídan tabeichhúniwa. ⁵ Gíbeguaali tifigoun darí lun lachülürün siélu, áni jarítaguaali Búngiu luágu luríban toúserun. ⁶ Adüga jumá tun Babilónia quei tadüga joun ámu, fáyei jumoún dóbülü lueí le tadügübei. Rújuma ában uníñein le jéretimaati bián weíyaasu tun sügü láu le tíchugubei joun ámu. ⁷ Súfurigüda jumoún quei méme tederegeragun túngua lun anaanguni únguaü lúma lun agünrinchaguni, ladüga aríñaga tan tídan tanígi. “Ñun nína ya quei ában urúei, máma nugúya ában jiñáru mámaritu, masúfurirubadina gíñe.” ⁸ Ligía liábinba lubeí tabeichhún lídan ában meme wéyu—oúweni, íruni, ilámaü—ábame tagudún láu wátu geméti, ladüga gabáfuti Wabúreme Búngiu le asiadirubarun.

⁹ Lurúeitegu uboú ja aganoúbaña túma lídan salúfuri lúma irísini, jayájuba, gudémegua tugúyame joun dánme jaríjini gumúlali le lánina tagudún. ¹⁰ Ábame jeréderun díse, le janúfudei lueí tabeichhún, ábame jaríñagun.

—¡Fugiábu Babilónia, ubúrugu le weírabei, Babilónia ubúrugu le gabáfubei, lídaanrígü murúsun óra liábin babeíchun!

¹¹ Ja alúgurajatiña buri ja uboúagubaña, ayájuatiña gíñe, gudémegua ligía ubúrugu ligía joun ladüga úaaña lan cába lan agáñije ebégidinaü le janáajabe — ¹² ebégidinaü lé buri gólu, pláta, dübü buíduburitu, pérlas, gamísa to líno to fínutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dübü miríti, ¹³ canéla, cátei lé buri jémeti, cupáli, mírra, ibíñei, bínu, aíli, fulúwaaru fínutu, lúma türígu, barütiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún. ¹⁴ Jaríñaguba lun ubúrugu ligía.

—¡Úaaru frúta buri to seméboun búma to jínsiñeñajáboun bun sarágu, féridi báali gíñe sun irísini lúma wéndeí le búmañajabeí, féridiwaali lun sun dan!

¹⁵ Jáñiaya alúgurajabálín buri cáteí le áni rísiyaña lídan ubúruugu le, jeréderuba díse le janúfude lueí labeichún, ayájuajeina, aságürijeina. ¹⁶ Ábame jaríñagun.

—¡Fugiábu ubúruugu weíriti! Ítara liñá meja quei ában würi táu tadáüragun to líno fínutu túma anáanguni to colóru gúchu lúma funáti, láu tuwénden gólu, dübü buíduburiti lúma pérla. ¹⁷ ¡Lídan murúsun óra gumúja sarágu irísini!

Sún buri tarüne ugúnein, pasajérugu, mádulungu, jáma sun ja ñadágimeinbaña baránaja, díseti jeréderun. ¹⁸ Dánti le jaríjini lugúmulalin lágudun ubúruugu, ába jagúaragun.

—¿Cásan meja ámu ubúruugu ñíbei quei oúnwenbun ubúruugu le?

¹⁹ Ába jíchaagun múa jábulugu, ayájuaja, aságürija, agúaragua.

—¡Fugiábu Babilónia lé buga weíribel! Rísiyaña yebe sun ja gagúnebaña wapóru baránaja láu lirísin, áni lídaanrügü murúsun óra gürínwagua.

²⁰ Gúnda jumá láu le asúseredubei lun Babilónia, amüri siélu, júma jugúya apóstolugu, jáma profétagu, jáma sun ja lánigu Búngiu, ladüga adügaali Búngiu gúsei jun láu lasíadiruni.

²¹ Ábati liñúrun ában ánjeli gabáfuti ában dübü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdúniwa Babilónia, ubúruugu le weíribel, marijíndügüyáwalime. ²² Magaambúndügüyáwalime tamúri gidára, fidu, bémerirugu, úaañame gíñe ñadágimeintiña bídan ni ca uwúyeri, magaambúnjalime gíñe lamúri dübü le mulí bídan. ²³ Madúnraagúnjalime larúgounga lámpu bídan, magaambúndügüyáwalime areínjani le lánina maríei bídan, láu sun gabáfugüda bániña meja báni alúgurajatiña lídan sun uboú, eyéedagua báña sun néchaani láu babíñarajan.

²⁴ Daríwaali játa profétagu, jáma ja lánigu Búngiu, lúma játa sun ja áfarawagúañabaña uboúagu, daríwaali játa sun jagía lídan ubúruugu lé meja Babilónia.

19

¹ Lárigiñe cáteí le, ába nagáambuni jamálali sarágu gürígia, jagúarajan.

¡Alezúya! Weíriti Wabúngiute le Súnti Gabáfu, ligía asálbarubaliña lánigu.

² Agúseragüdati láu úarani lúma ísuruni, siádi láaru oúnwenbun jóru to agádeirubalin uboú láu tisálufurin, águyugüda láali jáfarawagún lánigu tuágu.

³ Ábaya jagúarajan.

—¡Aleluya! Magúmubei lamúdeirun tugúmulalin.

⁴ Játi weín-gádürü gürígia ja weírigutiña, jáma gádürü cátaña gabágaritiña jagía, ába jelemuchun chülu múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Aleluya!

⁵ Ábatí lagaambún laríñagun ában umálali yaráfa lueígiñe lála Búngiu.

Rújuma uweíriguni lun Búngiu,
sun jugúya ja esériwidubalin,
áni inébelá jun,
weíyaaña, ñübürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu dúna lúma wayújururu jéreguti, agúaraja.

¡Aleluya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buínwama láu ugúndani, ru wagíame uweíriguni lun,
ladüga chüluja óra lun lídan jamá ában lánigu Jesucristu lúma,
le gumúti.

Aráanseeña quei ában adári lubá tamárieidun,
⁸ táo tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábatí laríñagun ánjeli nun.

—Babürüja. “Gúnda jamá ja amísurajoúbaña lídoun fédu le lánina lúaradun Jesucristu jáma lánigu.”

Ába laríñagun nun.

—Dimúrei buri ináruniti le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madügabéi le, esériwiduti áu lun Búngiu quei amürü jáma bibíriña ja afálarubalin láni Jesúsu ugánu derégüdaguñu, lun Búngiu lun bájuduragun.

Ugánu le lanügübei Jesúsu lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábatí naríjini siélu junréñu, ába lasáliragun ában gabáyu jarúti, léti aweínjabalin, Gúnfultí lúma Inárüni, ligía líríbei, ladüga láu ísuruni lagúmadija, láu gíñe ísuruni lageíndagu.

¹² Ámirijati lágu camá ligémeri wátu, ñíñein sarágu rídi lábulugu, ñíñein gíñe ában íri bürüwañu luágu, ligía rügüñein asúbudirei.

¹³ Anáanguni to luáguboun, feíndiwatu láu jítäu. Lerérung Búngiu líríbei. ¹⁴ Jafálareiti súdaara ja siélubaña táo jadáüragun líno to fínutu, jarútu, jarúma, waríñu jagía jawágu gabáyu

jarútiña. ¹⁵ Ñíñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárimé ligáñi Búngiu joun. ¹⁶ Bürüwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigoúgu, oúndaragua jumá lun oúnwenbun ladíneragüdüni Búngiu, ¹⁸ jou jumámuga jágürügü urúeigu, gumádimatiña, jáma wüguriña ganíitiña, jágürügü gabáyu jáu sun ja aweínjabaliña, jágürügü sun jawúyeri wüguriña dándu ja joúnguatiña quei ja idámuni, dándu ñübürigiña quei weínamujaña.

¹⁹ Ábati naríjini móнстру jáma lurúeitegu uboú jáu jánigu oúndaraguaaña lun jageíndagun lúma le waríñubei luágu gabáyu jarúti jáma lánigu. ²⁰ Ába ladaürün móнстру úara lúma proféta yéeti lé buga adügübei miláguru ligíbugiñe móнстру. Láu buri miláguru ligía, ayéeda láaña proféta ligía ja ígiraguagüdübaña joúngua lun labüridüni líri móнстру jawágu, judúgu jagía tun liyáwa. Dánduti móнстру quei proféta yéeti ligía, ába jagurún wínwañu lídoun lagúnu le láubei wátu geméti lúma súfurú. ²¹ Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquímuledun sun dunúru buídu láu jágürügü.

20

Le mílu irúmu

¹ Lárigiñe, ába naríjin ában ánjeli larárirun siélugiñe láu ligélen jýyu le mébejabei, lúma ában oúnwenbun güríngüri lújaburugu. ² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagüraguni luágu mílu irúmu. ³ Ába láguruni lídoun jýyu le mébejabei le ñí lubei ladáürei. Ába lichugún ában séyu luágu béna lun mayéejandügyüa láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdüwaba luágu murúsun dan.

⁴ Ába naríjini jála buri ja ibíjubaña ubáfu lun jagúseragüdüni, ñun jáña luágu. Arija numútiña gíñe jawáni já meja adürürubaña ichügü lueígiñe japúrichijani Lerérunt Búngiu lúma lueígiñe jadímuarejan luágu Jesucristu, ja májuduragunbaña lun móнстру ni tun liyáwa, mígirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe oúweni lúnya jabágardun, ába jagúmadijan úara lúma Crístu luágu mílu irúmu. ⁵ Ánjeinti ja jíbiri jiláguaaña, másaaruntiña lídaangiñe oúweni daríme lárigiñe mílu irúmu. Niján furúmiñetibei ásaaruni

lídaangiñe oúweni. ⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe oúweni! Mabáfuti libíaman oúweni jawágu, lubáragiñe líra, fádirigubaña láni Búngiu lúma láni Crístu, ábame jagúmadijan úara lúma Crístu luágu mílu irúmu.

⁷ Dánme sügüjali mílu irúmu ligía, ligíame lígirawagüdün Máfia lídaangiñe jýyu le mébejabei, ⁸ ábame láfuridun lun layéejaniña néchaanigu lídan sun uboú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei liságounte barána, lun wuríbu. ⁹ Ítara líña lubeíti, ába jáfuridun súdaara jagía lídaangiñe sun uboú, ába jegéyedaguni fulásu le ñí jabeí lánigu Búngiu lúma ubúrugu le jínsiñebi lun Búngiu, le Jerusalénbei. Ába loúnajan Búngiu wátu geméti siélugiñe, ába láguduniña gumúgubei. ¹⁰ Máfiati le ayéedubaliña, ába lágurúniwa lídoun lagúnu le láubei wátu geméti lúma súfur, le ñíjin lubeí jágurúa móнстру lúma proféta yéeti. Jasúfuriruba ñi wéyuagu, áriebu lun sun dan.

Wísiyu ligíbugiñe oúnwenbun jalaü jarúti

¹¹ Ábati naríjin ában oúnwenbun jalaü jarúti, ñíñein Búngiu ñun luágu. Ába lagúmuchagun siélu lúma uboú ligíbugiñe, ába marijínjali lan. ¹² Ába naríjiniña jiláguaña, weínamujaña jáma ñübürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagüdün jiláguaña luágu buri cátei lé meja jadügübei, segúñ le bürüwañubei tídan líburu buri tugúya. ¹³ Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe oúweni, ába jagúserawagüdün luágu buri cátei lé meja jadügübei. ¹⁴ Ába lágurúniwa oúweni lúma jabára jiláguaña lídoun lagúnu le láubei wátu geméti. Lagúnu láuti wátu geméti ligía, ligía libíamabei oúweni, ¹⁵ ñíjin jagurúa ja úabeí jíri tídan líburu to lánina ibágari lun jasúfurirun ñi gumúgua dan.

21

Iséri siélu lúma iséri uboú

¹ Lárigiñe, ába layawadagun iséri siélu lúma ában iséri uboú nun, gumúgua buga furúmiñeti siélu lúma furúmiñeti uboú áni úaali buga barána. ² Áu Juan, aríja numúti ubúrugu biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáuguañu lubá tadári. ³ Ába nagáambun laríñagun ában umálali jéreti siélugiñe.

—Aríjabá, agánawati Búngiu jádan gürígia guetó. Laganoúba jáma, jagíaba lánigu, Búngiu mémeba jáma lun ligía lan

Jabúngiute.⁴ Larágajabe sun jáguira, úaalíme oúweni ni ayájuni ni íruni ni igárigu, ladüga sügüja sún meja cátei le níjeinbei.

⁵ Ábati laríñagun Búngiu.

—Aríjabá, adüga numúti sun cátei isérime.

Aríñagati gíñe.

—Babürüja, ladüga inárüniti dimúrei buri le, áni gayáraati lafíñerún luágua.

⁶ Lárigiñe, ába laríñagun nun.

—Súnja nadügüni sun cátei le. Áu lagúmesejabe sun cátei, áu gíñe lagúmujoúnbei, quei létüra 'A' lúma 'Z'. Le mágürabuti, níchuguba lun lun látun lídaangiñe líseesen dúna le íchugubei ibágari, mafáyeijaanga luagu.⁷ Ja ássiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü.⁸ Ánjañati ja janúfudebaña, ja mafíñebeña, ja iyéreejabúbaña, ja gáfarajadibaña, ja adáagubaña salúfuri, ja abíñarajabaña, ja ájuduragubaña joun sándu, jáma ja yéebaña, jágorúba lídoun lagúnu le súbei láu wátu geméti lúma súfuru, le libíamabei oúweni, ligíaba jalágaante.

Iséri Jerusalén

⁹ Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucristu bun.

¹⁰ Ába layáwadaguagüdüni Sífiri Sándu ában wübü nun, weíriti, íñu, ába larúfuduni oúnwenbun ubúrugu biníwati le Jerusalén nun, larárirun siélugiñe lúmagiñe Búngiu.¹¹ Ámirijati ubúrugu ligía láu larúgounga Búngiu, ítara líña límirin quei límirin ában dübü buídumeraüti, quei dübü le jáspe, jarúgoungati quei bídiriu.¹² Ñíñein ában baríeru weíriti, íñu, láu dúusu béna geyégu láu ubúrugu ligía, ában ánjeli luágua cáda béna, lúma jíri dúusu türíbu ladügawagun Israél bürüwañu luágua buri béna.¹³ Ürüwañein béna lueígiñe le ñígiñe lubeí laboúcha wéyu, ürüwa lueígiñe nórte, ürüwa lueígiñe sur lúma ürüwa lueígiñe oúbaü le ñígiñe lubeí lálüda wéyu.¹⁴ Baríeru ligía, ligíbuaguñein dúusu dübü lidérebuguñein, láu jíri dúusu láni Crístu apóstolugu bürüwañu luágua.

¹⁵ Ñíñein ában mabúru gólu lúma ánjeli le adímurejabei núma lun lamísurajani ubúrugu, lubéneri, lúma lubárierun.¹⁶ Ubúrugu ligía, ába lábu lidábuberen lúma limígifen. Ába lamísurajani ánjeli ligía ubúrugu láu lumáburu, bián-mílu bián-san kilómetros luweírin, ába lábu limígifen lúma líñun, lúma lidábuberen.¹⁷ Lárigiñe, ába lamísurajani baríeru, ürüwa-wein-gádürü métros luweírin según jamísuraagüle gürígia le layúsurubei ánjeli ligía.

18 Láu dübü le jáspe ladügüwa baríeru ligía, ubúruguti ligía, láuti gólu le tímatimaati, miríti queísi bídiriu le jarúmati.
 19 Wéndegüdáwati lébu baríeru ligía láu sun luwúyeri dübü buíduburiti. le furúmiñeti, láu jáspe, le libíaman, láu safíro, le lürüwan, láu ágata, le ligádürün, láu esmerálda,²⁰ le liseíngün, láu ónise, le lisísin, láu cornalína, le lisédün, láu crisólito, le liwidün, láu berílo, le linéfun, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta.
 21 Dúusugubei béna ligía, dúusu pérlas, cáda béna láu ábanrügü pérla ladügüwa. Léti üma buri láni ubúrugu ligía, láuti gólu jarúgoungati quei bídiriu.

22 Maríjintina ni ában ligílisi lídan ubúrugu lídan, ladüga añájein Wabúreme Búngiu le Súnti Gabáfu lúma Jesucristu ñi, mabúseerúnwatu ligílisi le ñí jabei. 23 Memégeirunti ubúrugu ligía larúgounga lúmagiñe wéyu ni lúmagiñe játi, ladüga le guánarü larúgounga Búngiu rúti larúgounga lun, léti Jesucristu, ligía lilámpunbei ubúrugu ligía. 24 Jeíbuguba sun néchaanigu ja sálbawañaabaña lídan lilámpun ubúrugu ligía, ábame janügüni lurúeitegu uboú jaweírigun ñíjin, lun jíchuguni lun Búngiu.
 25 Madáurawagunbei lubéneri wéyuagu, úabei gíñe áriebu ñi.
 26 Lanügüba jaweírigun néchaanigu ñíjin, láu sun jarísin,
 27 mebélubei ni cáta wíyeti ñíjin, ni le adügüti cátei le wuríbati o gayéeraguati. Ja rügübaña bürüwañaibaña íri tídan líburu to lánila ibágari to lúmaboun Jesucristu, jagía rügübaña ebélura.

22

1 Ábati larúfudun ánjeli ligía ában dúna jarúmati nun, le íchugubei ibágari, jarúgoungati quei bídiriu, lídaangiñe lála Búngiu lúma lála Jesucristu láfurida. 2 Ñíñein dúna ligía lamídaangua lémeri ubúrugu ligía, áni luágu bián loúba dúna ligía ñi laweírida buri tídibu wéwe le íchugubei ibágari, le agíindubei dúusu weíyaasu lídan irúmu. Ságü játi lagíindun, léti lubána, seríwiti lun lagáranijoún joun néchaanigu. 3 Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucristu lídan ubúrugu ligía, ábame jájuduragun lánigu lun. 4 Jagágibudaguba lúma Búngiu, ñíbei gíñe líri jeréberugu.
 5 Úaalíme áriebu ñi, ja aganoúbaña ñi, memégeirunbaña ligémeri lámpu ni ligémeri wéyu, ladüga larúgoungadagüdüba Wabúreme Búngiu jáu, ábame jagúmadijan sun dan.

Madíseeli liábin Jesúsu

6 Lárigiñe, ába laríñagun ánjeli ligía nun.

—Ináruniti dimúrei buri le, áni gayáraati lafíñerúniwa luágu, áni Wabúreme Búngiu méme le íchugubei dimúrei joun profétagu

oúnaja láadina lun narúfuduni le lúnbei lasúseredun joun lánigu madíse.

⁷ — ¡Aríja jumá! ¡Anáte madíse! líña laríñagun Jesucristu.

¡Gúndaalá le adügübei gásu láu ugánu le láni Búngiu le bürüwañubei tídan líburu to!

⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹ Ába laríñagun nun.

— Madügabéi le, esériwiduti lun Búngiu áu quei amürüü jáma bibíriña ja profétagu, jáma sun ja adügübaña gásu láu le bürüwañubei tídan líburu to, lun Búngiu lun bájuduragun.

¹⁰ Aríñagati gíñe nun.

— Marámudabeí láni Búngiu ugánu le bürüwañubei tídan líburu to ladüga yaráfaali dan lun lagúnfurírún. ¹¹ Ígirabeí le wuríbabei lun lasígirun adáagua wuríbani, le wíyebei, lun lasígirun lídan liwíye, áanjeinti le buídubei, buídumemelá, áni le wügüri le derégeguabei lúngua lun Búngiu, gúncimemelá.

¹² — Ánja, madíseeli niábin, líña laríñagun Jesucristu, áni barü numuti afáyeiruajaü le lúnbei níchuguni lun cáda ában según buri cátei le ladügübei. ¹³ Áu furúmiñetibeí lúma agúmujoúni, lagúmeseja sun cátei lúma lagúmujoún quei létura 'A' lúma 'Z'.

¹⁴ Gúndaatiña ja achíbubalin jafígoun lun garícha jamá lun jeígin lídaangiñe lin tídibu wéwe le íchubei ibágari, gayára lámuga jebélurun lueígiñe lubéneri ubúrugu. ¹⁵ Ánjaña ja mafíñeradibaña luágu Jesucristu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba boúgudi.

¹⁶ — Áu Jesúsu, oúnaja náali náni ánjeli lun lasúbudiragüdüni sún buri cátei le joún buri títana ligílisi. Áu linébaanfan urúei Davíd, áu gíñe queísi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucristu.

— Jigábu lun Jesucristu lun basálbarun.

Le gíñe agáambubei, aríñagalá.

— Jigábu lun Jesucristu, sálba bámuga.

Le mágürabubei, áanjein busén, ñübinlá, gurála lídaangiñe dúna le íchugubei ibágari, mafáyeijaanga luágu.

¹⁸ Sun ja agáambubalin láni Búngiu ugánu le bürüwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdübaña Búngiu ígei ja uágubaña labürüjoúa tídan líburu to, luágu. ¹⁹ Le gíñe agídaruti som cátei lídaangiñe láni Búngiu ugánu le bürüwañubei tídan líburu to, lagídarubei gíñe lufánran lídaangiñe lin tídibu wéwe le íchugubei

ibágari, líma lídaangiñe ubúrugu sándu lé buri bürüwabei uágu
tídan líburu to.

²⁰ Le asúbudiragüdübalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesúsu!

²¹ Binílaün Wabúreme Jesucristu sun jugúya. Ítaralá.